


Kaipimi Taita Dius
Rimaku



New Testament in Inga

Kaipimi Taita Dius Rimaku

New Testament in Inga

copyright © 2009 Wycliffe Bible Translators, Inc.

Language: Inga

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Inga

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 21 Feb 2024 from source files dated 29 Jan 2022
7cb53c42-7354-5f68-b71b-5115a92bd97a

Contents

SAN MATEO	1
SAN MARCOS	48
SAN LUCAS	77
SAN JUAN	126
HECHOS	162
ROMAPI CRISTOWA TUKUSKAKUNATA	207
1 KORINTOPI CRISTOWA TUKUSKAKUNATA	227
2 KORINTOPI CRISTOWA TUKUSKAKUNATA	245
GALASIAPI CRISTOWA TUKUSKAKUNATA	258
EFESOPI CRISTOWA TUKUSKAKUNATA	265
FILIPOSPI CRISTOWA TUKUSKAKUNATA	272
KOLOSASPI CRISTOWA TUKUSKAKUNATA	277
1 Tesalonikapi	281
2 Tesalonikapi	285
1 TIMOTEOTA	287
2 TIMOTEOTA	293
TITOTA	297
FILEMONTA	300
HEBREOKUNATA	301
SANTIAGO	317
1 SAN PEDRO	322
2 SAN PEDRO	328
1 SAN JUAN	331
2 SAN JUAN	336
3 SAN JUAN	337
SAN JUDAS	338
APOCALIPSIS	340

IAIA JESUSMANDA ALLI WILLAITA SAN MATEOMI WILLA

Jesucristopa ñugpamanda achala taitakuna

¹ Jesucristopa ñugpamanda achala taitakuna, kasasik suti karkakuna. Pai Jesús, atun taita David i Abrahampa iawarsik karka.

² Abraham, Isaak suti wawata iukarka.

Isaakka, Jakob suti wawata iukarka.

Jakobka, Judá suti i sug waugkindikunatapas iukarka.

³ Judaka, Fares i Zara suti wawakunata iukarka.

Paikunapa mamaka, Tamar suti karka.

Fareska, Esrom suti wawata;

Esromka, Aram suti wawata;

⁴ Aramka, Aminadab suti wawata;

Aminadabka, Naasón suti wawata;

Naasonka, Salmón suti wawata;

⁵ Salmonka, Booz suti wawata iukarka.

Boozpa mamaka, Rahab suti karka.

Boozka, Obed suti wawata iukarka.

Obedpa mamaka, Rut suti karka.

Obedka, Isaí suti wawata iukarka.

⁶ Isaika, atun mandag Davidta iukarka.

Davidka, Salomón suti wawata iukarka.

Paipa mamaka, Uriaspa warmi kaska karka.

⁷ Salomonka, Roboam suti wawata;

Roboamka, Abías suti wawata;

Abiaska, Asa suti wawata;

⁸ Asaka, Josafat suti wawata;

Josafatka, Joram suti wawata;

Joramka, Uzías suti wawata;

⁹ Uziaska, Jotam suti wawata;

Jotamka, Akaz suti wawata;

Akazka, Ezekías suti wawata;

¹⁰ Ezekiaska, Manasés suti wawata;

Manaseska, Amón suti wawata;

Amonka, Josías suti wawata iukarka.

¹¹ Josiaska, Jekonías suti i sug waugkindikunatapas iukarka.

Paikuna kaugsanakunkama, Israel alpamanda runakuna Babilonia suti alpama prisu apai tukurkakuna.

¹² Chi alpama apai tukuskapi,

Jekoniaska Salatiel suti wawata iukarka.

Salatielka, Zorobabel suti wawata;

¹³ Zorobabelka, Abiud suti wawata;

Abiudka, Eliakim suti wawata;

Eliakimka, Azor suti wawata;

¹⁴ Azorka, Sadok suti wawata;

Sadokka, Akim suti wawata;

Akimka, Eliud suti wawata;

¹⁵ Eliudka, Eleazar suti wawata;

Eleazarka, Matán suti wawata;

Matanka, Jakob suti wawata;

¹⁶ Jakobka, José suti wawata iukarka.

Chi Joseka, Mariapa kusami tukugsamurka. Mariaka, Mesías u Cristo suti Jesuspa mamami tukurka.

¹⁷ Chasaka, ñugpa taita Abrahammandata atun mandag Davidkama, chungu chusku achala taitakunasik karka. Davidmandata Israelmanda runakuna Babilonia alpama prisu apai tukunkama, chungu chusku achala taitakunasik tukugsamurka. Chi alpama apai tukuskauramandata Cristo tiagsamunkama, ikuti chungu chusku achala taitakunasik tukugsamurka.

Jaia Jesús tiagsamungapa kaskamanda

¹⁸ Kasami tukugsamurka, Jesucristo tiagsamungapa kaura. Paipa mama María, Josewa kasarangapa karka. Paikuna manara sugllapi kaugsagpi, Mariaka Santu Ispiritumandami wigsitawa ungug ña karka. ¹⁹ Paipa kusa tukunga Joseka kawarka, paipa warmi ña wambrawa ungug kagta. Pai, alli runa kaspá, mana munarka, sugkunapa ñawipi pingaichingapa. Nispa iuiarirka, paimanda pakalla sitaspa anchuringapa.

²⁰ Chasa iuiakunkama, atun Taita Diuspa sug anjilka, Joseta muskui ukupi kawarispa, nirka:

—Davidpa wawakunapa wawa José, mana mancharikui. Kamba warmi tukunga Mariata kamba wasima kaii. Paika, Santu Ispiritumandami ungug ka. ²¹ Kari wambrawi iukangapa ka. Paitaka sutichinkangimi Jesús. Paimi, paipa alpamanda kagkunata pandariskakunata pasinsiaspa, kispichingapa ka.

²² Chasami atun Taita Dius paipa Ispirituwa rimagwa ñugpata willaskasina tukugsamurka. Kasami ñugpamandata willaraiarka:

²³ Uiaichi. Mana kari rigsiska sipas, ungurispa, sug kari wambrawi iukagsamungapa ka.

Paita Emanuelmi sutichingapa kankuna. (Emanuel niraiami “Dius nukanchiwa”.)

²⁴ José, ña rigcharispaka, atun Taita Diuspa anjil imasa niskasina rurarka. Mariata paipa wasima warmitasina kaiarka. ²⁵ Chasa kaiaspapas, mana sugllapi tukurkakuna, willaska kari wambrawa tiagsamunkama. Ña tiagsamuura, paita Jesús sutichirka.

2

Magukuna, Jesuspagma chaiangapa riskakunamanda

¹ Judea alpamanda Belén puiblupimi Jesús tiagsamurka. Chi alpapi kaugsanakuskata mandag, Herodes suti karka. Chiurakuna magu suti istrillakunata iachaikug taitakunaka, indi llugsidirunigmada Jerusalén puibluma chaiagsamurkakuna. ² Chipika tapunakurka:

—Judikunapa atun mandag ña tiagsamuska, ¿maipitak ka? Istrilla pai tiagsamuska kawachigtami indi llugsidirupi kawarkanchi. Chimandami samurkanchi, paita kunguringapa.

³ Chasa uiaspa, atun mandag Herodes i Jerusalenpi tukui kaugsanakug iapa mancharirkakuna. ⁴ Herodeska, tukui iaia sasirdutikunata i Moisés ima niskata iachachig taitakunata kaiaspa, tapurkakunata:

—Cristo, ¿maipitak tiagsamungapa willaraiá?

⁵ Chiura ainirkakuna:

—Judá alpamanda Belén puiblupimi willaraiá. Kasami Santu Ispirituwa ñugpamanda rimag nirka:

⁶ Kam Belén, Judá alpamanda sug puiblukunamanda mas uchulla mana kangichu.

Kambagmandami sug atun mandag llugsingapa ka.

Paika, nukapa Israel alpamanda tukui runakunata kawaspa ñugpagma kangapa ka.

⁷ Chasa uiangallawa Herodeska, pakalla magukunata kaiaspa, allilla tapuchirka:

—¿Imauramandatak chi istrilla llugsiskata kawarkangichi?— ⁸ Tukui tapuchispaka, nirka— Belenma riichi. Chipika, chi wawamanda allilla tapungichi. Paita tarispaka, willawagsamungichi, nukapas rispa, paita kunguriringapa.

⁹ Chasa uiaspa, chi magukunaka chimanda llugsirkakuna. Chiura chi istrilla ñugpa kawaskaka, ikuti kawarispa, ñugparka. Belén puibluma chaiagrispa, chi wawa kaskapi saiarigrirka. ¹⁰ Istrillata kawaspaka, magukuna iapa suma iuiachiiwa tukurkakuna. ¹¹ Chi wasi ukuma iaikugrispaka, wawata mama Mariawanta tarigrirkakuna. Kungurispaka, wawata mucharkakuna. Ima apamuskata paskaspaka, paita kararkakuna: kuri, suma asna insinsu, mira kupal. ¹² Chiuramanda, magukunata muskui ukupi willai tukurkakuna, Herodespagma mana kutingapa. Chimanda, pai kikinkunapagma sug ñambita kutirkakuna.

Ejipto alpama mitikuspa riskamanda

¹³ Magukuna ña riskauramanda, atun Taita Diuspa anjilka, muskui ukupi kawarispa, Joseta kasami nirka:

—Atarii. Wawata mamandiwanta, Ejipto suti alpama mitikuichi. Chi alpapi chisiagriichi, nuka ikuti kamta willankama. Herodesmi wawata wañuchingapa maskachingapa ka.

¹⁴ Chi tutalla Joseka, atarispá, wawata mamandiwanta pusaspa, Ejiptoma mitikurkuna. ¹⁵ Chi alpapika kaugsagrirkakuna, Herodes wañunkama.

Chasami atun Taita Dios, paipa Ispirituwa rimagwa ñugpata willaskasina tukugsamurka. Kasami ñugpamandata willaraiarka: “Ejipto alpamandami nukapa wambrata kaiarkani”.

Mandag Herodes, wawakunata wañuchichiskamanda

¹⁶ Herodeska iuiarigsamurka: “Nuka imasa niskasina, magukuna mana willawag-samurkakuna”. Chiwanka, iapa rabiawa tukugsamurka. Nispaka, suldadukunata Belén puibluma chi suiu kaugsanakuskapagma kacharka, tukui manara is kai wataiug kari wambrakunata wañuchingapa. Istrilla imaura kawariskata magukunata allilla tapuchiskawa iuiarisipasi chasa kacharka.

¹⁷ Sutipami Jeremías suti Santu Ispirituwa rimag ñugpata willaskasina tukugsamurka. Kasami ñugpamandata willaraiarka:

¹⁸ Rama suti puiblupi, iapa llakii wakaikunami uiariku.

Chika, Rakel suti mamami paipa wawakunamanda wakaku.

Mana mas paipa wawakuna kawarigsamungapa kagmandami ñi pi mana pudinkuna, paipa llakiita anchuchingapa.

¹⁹ Ña Herodes wañuskauramanda, atun Taita Diospa anjilka, Ejipto alpama rispa, ikuti Joseta muskui ukupi kawarigrirka, ²⁰ kasa nispa:

—Atarii. Wawata mamandiwanta pusaspa, Israel alpama kutii. Wawata wañuchingapa munagkuna, ñami wañurkakuna.

²¹ Chasa uiaspa José, atarispas, wawata mamandiwanta pusaspa, Israel alpama samurkakuna. ²² Chaiagsamusapaka, iacharkakuna, Arkelao suti Herodespa wambra, Judea alpallapita mandag kagta. Chasa iachaspaka, mancharirka chi alpapi kaugsagringapa. Nispa, muskui ukupi paita willai tukuspa, Galilea suti alpama rirkakuna. ²³ Chima chaiagrispaka, Nazaret suti puiblupi kaugsai kallarirkakuna.

Chasami Santu Ispirituwa ñugpata willaraiaskasina tukugsamurka. Kasami willaraiarka: “Paika, nazareno sutimi kangapa ka”.

3

Juan Bautista, chusa sitaska alpapi kaskamanda

¹ Chi punchakuna Juan Bautista, Judeamanda chusa sitaska alpapi kawarigsamurka, ² kasa nispa:

—Suma luarmanda mandai, ñami chaiamungapa ka. Pandariikunata sakispa, Taita Dioswa tukugsamuichi.

³ Paimandami Santu Ispirituwa rimag Isaías suti, kasa willaska karka:

Chusa sitaska alpapi,

sug runa kaparispami puriku, kasa nispa:

“Imasami ñambi allichinchi:

chasallata alli iuiaikunata apiichi,

atun Taita Diusta chaskingapa”.

⁴ Juanka, kamello suti animalpa agchata awaska katanga churariskami karka. Karata siñidursina ruraspa chumbilliskami karka. Langosta suti chapulinsina i sachukumanda abijunkunapa dusi miskillami mikuspa kaugsakurka.

⁵ Jerusalén puiblunigmanda, Judea suiu alpamanda i Jordán iaku suiu ladumanda, tukuinigmanda runakuna paipagma chaiai kallarirkakuna. ⁶ Paika, Jordán iakupi maikan pandariskakunamanda willarinakuskata baugtisarurka.

⁷ Achka fariseo i saduseo suti taitakunapas, Juanpagma chaiagrirkakuna baugtisarungapa. Chikunata kawaspaka, paika nirka:

—Mana alli runakuna, kulibrasinami kangichi. ¿Pitak kamkunata willagrirka: “Taita Dios iapa rabiarpaspa llakii puncha, ñami chaiamuku. Mitikuichi, kispiriska kangapa?”

⁸ Tukui pandariikunata sakispa, allilla ruraichi. ⁹ Mana iuiarispas kaichi: “Ñugpamanda taita Abrahampa iawarmi kanchi”. Niikichitami: Taita Dios munagpika, kai rumikunapas pudinkunami, Abrahampa wambrakuna tukugsamungakuna. ¹⁰ Ñami tukuimanda justisiangapa ka; imasami sachakunata achawa urmachingapa kawaku: chasa. Tukui sachas chusa u mana mikingasina muui iukaskakunata anguwanta urmachispa, ninapimi churangapa ka.

¹¹ —Kasapas. Kamkuna allilla iuiarispas pandariikunata sakigpika, nuka iakuwami baugtisaikichita. Ikuti sug nukamanda mas iachaka, nukapa katimi samungapa ka. Paita, nuka mana pudinichu, kungurispas, paipa chakikunapi churaraiaskata surkungapagllapas. Paika, Santu Ispirituwa i nina sindiwasinami baugtisingapa ka. ¹² Imasami chagrapi trigu agllag runa, palawa mana alli ugsakunata chabsichispa anchuchi: chasallatami pai

suiaku, mana alli iuiagkunata alli iuiagkunapa chaugpimanda anchuchingapa. Alli trigusina kagkunata sugllapi sumami wakachingapa ka. Ikuti mana alli ugsasina kagkunataka mana wañug ninapi rupakungapami sitangapa ka.

Jesús baugtisariskamanda

¹³ Chi punchakuna Jesuspas, Galilea alpamanda llugsispa, Jordán iakuma chaiagirirka, Juan paita baugtisangapa. ¹⁴ Juanka, piñarispá nírka:

—¿Imapatak chasa mañawaspa samukungi? Nukatami iukarkangi, kam baugtisawanga.

¹⁵ Jesuska ainírka:

—Baugtisawailla. Chasami chaiaku, Taita Dios tukui imasa niskasina nukanchi ruran-gapa.

Chasa ainiura, Juanka paita baugtisarka.

¹⁶ Jesús baugtisai tukungallawa, iakumanda llugsírka. Chiuralla, awa suma luar paskarirka. Chimanda kawarka, Diospa Ispíritu palumasina rigcha kawarispami paipagma uraikumugta. ¹⁷ Suma luarmanda rimaipas uarigsamurka, kasa nispa:

—Kai, nukapa kuiaska wambraimi kapuá. Paita kwaspa, iapa alli sumami iuiachiiwa kawani.

4

Iaia kuku, Jesusta pandariikunapi urmachingapa munakuskamanda

¹ Chiuramandaka Santu Ispíritu, chusa sitaska alpama Jesusta pusarka. Chipika iaia kuku, pandariikunapi paita urmachingapa munakurka. ² Chusku chungá puncha tuta-kunawantami Jesús mana ñi imapas mikuspalla chisiakurka. Nispaka, iapa iarkaimanda iuiachigsamurka. ³ Chiura chi mana allilla iuiachig iaia kukuka, paipagma chaiagrispa, nírka:

—Kam Diospa wambra kagpika, kai rumikunata nii: “Tanda tukuichi”.

⁴ Jesuska ainírka:

—Ñugpamanda librupi, kasami willaraiá:

Runakuna, mana tandallawa kaugsangapa kankunachu.

Taita Dios tukui ima rimaskakunawami kaugsangapa chaiá.

⁵ Nispaka chi iaia kuku, Jerusalén suti Taita Diospalla kaska puibluma pusaspa, Diospa atun wasi awa puntapi saiachigrirka. ⁶ Nispaka, nírka:

—Kam Diospa wambra kagpika, alpama sitarii. Ñugpamanda librupi, kasami willaraiá: Taita Dios, paipa anjilkunatami ninga, kamta kawagsamungapa.

Paikunapa makipimi urmankangi.

Chasaka, mana rumipi u imapipas chaki takarinkangichu.

⁷ Jesuska ainírka:

—Kasapasmi willaraiá:

Kamba atun Taita Diusta mana ianga ningi:

“Abir kawasaki: ¿pudingichu?”

⁸ Ikuti chi iaia kukuka, iapa awa filuma pusaspa, kai luarpi tukui alpakuna i tukui ima chipi suma tiaskakunata kawachirka. ⁹ Nispaka, nírka:

—Kam kunguriwagpika, tukui kawarkangi: chikunatami karasaki.

¹⁰ Chiura Jesuska, chi iaia kukuta nírka:

—Nukapa ñawimanda anchurii. Ñugpamanda librupi, kasami willaraiá:

Kamba atun Taita Diosllata kungurispá kangi.

Pai ima niskallatami iukangi ruraspa kanga.

¹¹ Chasa niura, chi iaia kuku, Jesusta sakispa, anchurirka. Chiuralla anjilkuna, samuspa, paita ima ministiskami karagsamurkakuna.

Galilea alpapi, Jesús willai kallariskamanda

¹² Juan Bautista karsilpi wichkaska kagta iachaspa, Jesuska Galilea alpama rirka. ¹³ Manima Nazaret puiblupi kidarirka. Kafarnaum suti puiblupimi kaugsai kallarirka.

Chi Kafarnaumka, Galilea atun kucha ladupimi ka, Zabulón i Neftalí suti ñugpamanda taitakuna kaugsaska alpapi.

¹⁴ Isaiás suti Santu Ispirituwa rimag, ima ñugpamanda willaska tukugsamungapami Jesús chipi kaugsangapa chaiarka. Kasami Isaiás niska karka:

¹⁵ Zabulón i Neftalí alpapakunapi, atun kuchama ridiru ñambi ladu suiu,

Jordán iaku sug ladu chimba,

Galilea alpapimi Taita Diusta mana rigsikuna kaugsankuna.

¹⁶ Chi alpapakunapi iana tutapisina kaugsanakug,

sug atun punchaiachigsina runatami kawangapa kankuna. Chi alpa suiu, wañungapa manchaiwa kaugsanakuskapimi chi runa kawarigsamungapa kankunata.

¹⁷ Jesuska, Kafarnaum puiblupi kaugsakuspaka, kasami willai kallarirka:

—Suma luarmanda mandai, ñami chaimungapa ka. Pandariikunata sakispa, Taita Diuswa tukugsamuichi.

Chusku chalwadurkunata, Jesús kaiaskamanda

¹⁸ Galilea atun kucha pata pata purikuspa, Jesús, iska waugkindikunata kawarka: sug, Simón suti; paillatata Pedro. Sugka, Andresmi suti karka. Paikuna, chalwadurkuna kaspá, ataraia iaku ukuma sitaspami purinakurka. ¹⁹ Paikunata kawaspaka, Jesuska nirkakunata:

—Katiwaichi. Iachachisakichitami, chalwakunata apigsina, runapura maskapuagkuna kangapa.

²⁰ Chasa uiangallawa, ataraiakunata sakispa, Jesusta katirkakuna.

²¹ Chimanda mailla riskapi, ikuti Jesús, sug iska waugkindikunatami kawarka. Paikuna, Zebedeopa wambrakunami karka; sug Santiago suti; sugka Juan. Paikuna, taitandiwa kanuapi kaspá, ataraiakunata allichinakurka. Paikunata kawaspaka, Jesuska kaiarkakunata.

²² Paikunapas, uiangallawa, taitata i kanuata sakispa, Jesusta katirkakuna.

Jesús, iapa achka runakunata iachachiskamanda

²³ Chimanda Jesuska, Galilea alpa suiu, judiukuna tandariduru wasikunapi iachachispa, Diuspa suma mandaimanda Alli Willaita willaspa, tukuikunata maituku unguikunawa kaskakunatapas ambispami purikurka. ²⁴ Siria suti alpa suiupasmi paimanda iapa iacharigrirka. Chiwanka, tukui unguikunata paipagma pusanakurka. Sug rigcha sug rigcha ungui i nanaikunawa kaskakunata, kuku wairawa kagkunata, wañui ungui iukaskakunata, mana kuirpu kuiuringapa pudigkunatapas, tukui chasakunatami Jesús ambispa purikurka. ²⁵ Chi punchakuna iapa achka runakuna, paiwa sugllapi tandarispa purinakurka, Galilea i Judea alpakananigmanda, Dekápolis suti puiblukunanigmanda, Jerusalennigmanda i Jordán iaku sug ladu chimbanigmanda.

5

Awa lumapi, Jesús iachachiskamanda

¹ Chi achka runakunata kawaspaka, Jesús awa lumama rirka. Chipi tiarigriura, paita katiraiagkuna kaillaiagirkakuna. ² Chiura, Jesuska iachachii kallarirkakunata, kasa nispa:

³—Kamkuna, Taita Diuswa iuiarispa, mana iukagsina tukugkuna, paipa iapa kuiaskami kangichi. Chasa kagkuna, Dius suma mandakuskapimi iaikugringapa kangichi.

⁴—Piwapas mana atuniachiriska iuiaspa kagkunapas, Taita Diuspa iapa kuiaskami kangichi. Chasa kagkuna, kai alpa duiñu karaska kagkunami niraiangapa kangichi.

⁵—Kunaura iapa llakiiwa wakanakuskapas, Taita Diuspa iapa kuiaskami kangichi. Chasa kagkunata, paimi sumaglla llakiikunata anchuchingapa ka.

⁶—Iarkai i iakunaiwasina Taita Dius imasa munaskasina rurangapa munagkunapas, paipa iapa kuiaskami kangichi. Paillatatami ima alli munaskata karamungapa ka.

⁷—Sugkunamanda iapa llakiiwa kagkunapas, Taita Diuspa iapa kuiaskami kangichi. Chasa kagkunamanda, paipasmi iapa llakiiwa kawangapa ka.

⁸—Tukuipi allilla suma iuiaiwa kagkunapas, Taita Diuspa iapa kuiaskami kangichi. Chasa kagkuna, paipa ñawitami kawagringapa kangichi.

⁹—Rabiawa kagkunata pasinsichigkunapas, Taita Diuspa iapa kuiaskami kangichi. Chasa ruragkunata, pai ningapami ka: “Nukapa wambrakunami kangichi”.

¹⁰—Kamkuna alli ruraspa kaugsanakugmanda, sugkuna mana suma kamkunata ruranakugpipas, Taita Diuspa iapa kuiaskami kangichi. Chasa pasaspa kagkuna, Dius suma mandakuskapimi iaikugringapa kangichi.

¹¹—Nukamanda iuiarispa, maikanpas kamkunata kamispa, mana suma ruraspa, kamkunamanda llullaspa juchachispa rimagpikunaka, Taita Diuspa iapa kuiaskami kangichi. ¹² Chasa mana allilla kamkunata ruragpipas, kuntintarisalla kangichi. Kamkunata Taita Dius, sug luarpi askurinti sumami tukui karangapa ka. Chasallatami kamkunamanda mas ñugpa kaugsaskakuna. Santu Ispirituwa rimagkunatapas mana allilla rurarkakuna.

“Kachisina i iuiaikunata punchaiachigsinami kangichi”

¹³—Kamkuna, kai alpapi kaugsanakuskamanda kachisinami kangichi, tukuikuna mas sumaglla kaugsanakungapa. Kachi waglirigpika, mana pudiringachu kachiachingapa. Ñi imapapas mana balingapa kanchu. Chasataka, sitaimi chaiá, pipas saruspa ialingapa.

¹⁴—Kamkuna, kai alpapi kaugsanakuskapa iuiaikunata punchaiachigkunami kangichi. Maikan puiblu luma awapi tiag, mana pakallapimi ka. ¹⁵ Chasallata, ñi pipas mana bila sindichinkangichichu, kawitu ukuma churangapa. Awapimi churangapa kangichi, tukui chi ukupi kagkunata punchaiachingapa. ¹⁶ Chasallata kamkunapas, runakunapa ñugpa ladu alli ruraikunawa punchaiachigkunasina kaugsangichi. Chasapika, kamkunapa alli ruraikunata kawaspaka, paikunapas kamkunapa Taita Dios suma luarpi kagtami iapa suma atuniachingapa kankuna.

Moisés ima rurangapa niskamanda

¹⁷—Mana samurkanichu, Moisés i Santu Ispirituwa rimagkuna ima rurangapa niskata puchukangapa. Mana chasa iuanakuichi. Chikunapi ima willaraiaskata rurangapami samurkani. ¹⁸ Kasami nuka niikichita: sug luar i kai alpa luar tukurigsina kagpipas, chi ñugpamanda ima willaraiaskaka, ñi mailla mana anchuchii tukungapa kanchu. Tukui imasa ñugpamanda librupi willaraiaskasinami tukungapa ka. ¹⁹ Chasamanda, maikanpas tukui ima niskata mana ruraspa sugkunatapas chasallata iachachigpika, suma luarma iaikugrigpura mas uchullami niraiangapa kankuna. Ikuti maikanpas tukui ima niskata ruraspa sugkunatapas chasallata iachachigpika, suma luarma iaikugrigpura atunmi niraiangapa kankuna. ²⁰ Kasami niikichita: Moisés ima niskata iachachig taitakuna i fariseokunamandapas mas allilla kamkuna mana ruragpikunaka, suma luarma mana iaikugringapa kangichichu.

Rabiariskamanda

²¹—Ñami ñugpamanda runakunata kasa niraiaskata uiarkangichi: “Mana wañuchingichi. Maikan wañuchigtaka justisiaimi tukungapa ka”. ²² Chasa kagpipas, nukaka kasami niikichita: piwapas rabiarigkunatami justisiai tukungapa kankuna. Maikan kamigkunata mas atun justisiaimi tukungapa kankuna. “Kam, iapa upaiaskami kangi” maikan nigkunata diltudupa ninamami sitai tukungapa kankuna.

²³—Chasamanda kamta, kamariku altarma apakuura sug runawa mana allilla kagta iuiarigpi, ²⁴ kamarikuta sakispa, ñugpa ringapami chaiá, chi runawa allilla tukungapa. Chiuramanda kutingi, kamarikuta Taita Diusta kawachingapa.

²⁵—Maikan kamta dimandaspa, justisiapagma pusanakugpika, chara ñambi rinakuskallapi paita sumaglla rimangi, manara justisiapagma chaiachigriipi. Mana kagpika, chaiachigriura, justisiaka kamta alwasilkunapa makipimi sakinga. Chiura alwasilkunaka, kamta karsilpimi wichkanga. ²⁶ Kasami nuka niiki: chimanda mana llugsingapa kangichu, tukui kulki manara kutichinkama.

Kari warmiwa atun pandariskamanda

²⁷—Ñami kasa niraiaskata uiarkangichi: “Mana sugpa warmiwa pandarikungi”. ²⁸ Chasa kagpipas, nukaka kasami niikichita: maikanpas, sugpa warmita kawaspaka, paiwa siririrangapa munaspaka, ñami chasa iuiapi atun pandarii rurarkangichi.

²⁹—Kasapas. Kamkunapa alli ñawiwa kawaspaka, pandaringapa kagpika, chi ñawita chaianmi surkuspa sitangapa, mana pandaringapa. Chasapaka, mas allicher kantra, kuirpumanda suglla imapas sitaspa, pisi kangapa. Mana kagpika, ¿tukui kuirpuwantachu munaipa, diltudupa ninama sitai tukungapa?

³⁰—Chasallata, kamkunapa alli makiwa pandaringapa kagpika, chi makita chaianmi kuchuspa sitangapa, mana pandaringapa. Chasapaka, mas allicher kantra, kuirpumanda suglla imapas sitaspa, pisi kangapa. Mana kagpika, ¿tukui kuirpuwantachu munaipa, diltudupa ninama ringapa?

Warmita sitagkunamanda

³¹—Kasapasmi Moisés ima willaraiaskapi niraiarka: “Maikanpas kikinpa warmita sitangapa munagpika, chasa munaskata iskribispa, chi warmita kuangichi”. ³² Chasa kagpipas, nukaka kasami niikichita: maikanpas, kikinpa warmita imamandallapas sitagpika, atun pandariima kachagsinami rurá. Chi warmi sug kariwa apirigpika, chimandakar pudinmi sitanga. Chasallata, maikanpas kusa sitaska warmiwa kasaragpika, atun pandariimi rurá.

Taita Diospa ñawipi allilla nikuskamanda

³³—Kasapasmi ñugpamanda runakunata niraiarka: “Atun Taita Diospa ñawipi mana llullangichi. Imasami Taita Diospa ñawipi allilla rurangapa nirkangichi: chasa rurangichi”. ³⁴ Chasa kagpipas, nukaka kasami niikichita: mana imatapas kawag churangichi, kam nikuska allilla kagta. Suma luarta mana kawag churangichi; suma luar, Taita Diospa mandadirumi ka. ³⁵ Kai alpatapas mana kawag churangichi; kai alpa, paipa sarudirumi ka. Jerusalentapas mana kawag churangichi; chita, tukui manduig Taita Diospa puiblumi ka. ³⁶ Kamkunapa umatapas mana kawag churangichi; kamkuna manima

pudingapa kangichichu, ñi sug agcha iuraiachingapa u ianaiaichingapa. ³⁷ Chasapaka, “Ari” ningapa chaiagpika, “Ari” ningichilla. “Mana” ningapa kaura, ningichilla: “Mana”. Imatapas chiwa kawag churagpika, iaia kukumi iuiachiku.

“Kamkunata jiru ruraskakunata mana randichingichi”

³⁸ —Ñami kasa ñugpamanda niraiaskata uiarkangichi: “Maikanpas rabiari spa ñawi surkuskataka chasallata randichingapa. Maikanpas kiru llugsigta piaskataka chasallata randichingapa”. ³⁹ Chasa kagpipas, nukaka kasami niikichita: maikanpas kamta mana suma ruraskakunata mana randichingichi. Pipas alli ladu kachitipi kamta piagpika, sug ladu kachitipi piangapapas sakiringi. ⁴⁰ Maikan kamta dimandaspa, kuma kichungapa munagpika, kapisaiutapas kuangi apachu. ⁴¹ Maikanpas kamta chungu kuadra aparispa ningapa chaiagpika, iskai chungu kuadrapas katingi. ⁴² Maikanpas ima mañaskata karangilla. Maikan “Mañachiwai” niskata, jujalallapas ningi: “Mana”!

“Kamkunata mana munagkunata kuiangichi”

⁴³ —Ñami kasa ñugpamanda niraiaskata uiarkangichi: “Kamkunata iacharidukunata kuiami iukangichi. Ikuti kamkunata mana munagkunatar rabiawa kawangichi”. ⁴⁴ Chasa kagpipas, nukaka kasami niikichita: kamkunata mana munaspa piñanakuskata kuiangichi. Kamkunata mana suma rurasp puchukangapa munanakuskamanda, Taita Diusta paikunamanda allilla mañapungichi. ⁴⁵ Chasawaka, kamkunata Taita Dius suma luarpi kagpa wambrakunami tukungapa kangichi. Paimi alli ruragkunamanda i mana alli ruragkunamandapas indi llugsichimú. Chasallata, alli runakunamanda i mana alli runakunamandapasmi tamiachimú.

⁴⁶ —Kasapas. Kam kikinpuralla kuianakuspa kagpika, kamkunata, ¿imatata Taita Dius karangapa suianakungichi? Maikan mana suma ruragpurapas* kuianakuspami kaugsankuna. ⁴⁷ Kamkunata waugkindipuralla “Puangi” ninakugpika, ¿imapitak allilla rurankungichi? Chasami Taita Diusta manara rigsikunapas, kikinpura kaugsanakú. ⁴⁸ Imasami kamkunata Taita Dius suma luarpi kag, tukuipi alli ka: chasallatami kamkunapas iukangichi, tukuipi alli kangakuna.

6

Imasa allilla rurangapa chaiagta

¹ —Sugkunata: “Allimi kani” kawachiringapaglla, Taita Dius imasa niskasina rurankugta mana rurangichi. Chasa ruragkunata, Taita Dius suma luarpi kag, kawaspa, mana ñi imapas karangapa kanchu.

² —Chimanda, kamkuna imapas sugkunata karangapa chaiaura, kawachiringapaglla mana karangichi. Chasa karagkuna, tandariduru wasikunapi i ñambikunanigta tukukunata willaspa purinkuna, sugkuna paikunamanda “Iapa allimi ka” niwachukuna iuiaspalla. Kasami nuka niikichita: chasa rurasp purigkuna, ñami kaipi munaskasina chaskirkakuna. Ikuti sug luarpika ñi ima manima chashingaku kankunachu.

³ —Kamkuna imapas karaskataka, ñi kamba wasi ukupurallapas mana iachachukuna. ⁴ Pakalla karagsina rurangichi. Chasawaka, kamkunata Taita Dius pakallata kawagmi kamkunata imasa chaiaskasina karangapa ka.

Imasa Taita Diusta mañangapa chaiagta

⁵ —Chasallata, kamkuna Taita Diusta mañangapa chaiaura, kawachiringapaglla mana mañangichi. Chasa rimagkuna, tandariduru wasikunapi i ñambikunanigta saiarispami Taita Diusta mañankuna, “Sugkuna kawawachukuna” iuiaspalla. Kasami nuka niikichita: chasa ruragkuna, ñami kaipi munaskasina chaskirkakuna.

⁶ —Kamkunata, Taita Diusta mañangapa kaura, ukuma iaikuspa, pungukuna wichkarispa, Taita Dius kamkunata ñawiwa mana kawarigta mañangichi. Pai Taita Dius pakallata kawagmi kamkunata imasa chaiaskasina karangapa ka.

⁷ —Kamkuna Taita Diusta mañanakuuraka, ikuti ikuti ianga rimarispa mana mañangichi. Taita Diusta mana rigsikunami iuanakuna, chasa ikuti ikuti rimarispa mañaura, Taita Dius uiangapa kagta. ⁸ Kamkunata, mana paikunasina mañangichi. Kamkuna manara mañagpi, kamkunata Taita Diuska ima ministiskakunata ñami iachá. ⁹ Chimanda kamkuna, Taita Diusta mañanakuura, kasa ningichi:

Nukanchipa Atun Taita, suma luarpimi kangi.
Kam tukuipi mas alli kagta tukuikuna nisunchi.

¹⁰ Nukanchiwa samui, iaia kangapa.

Imasami suma luarpi kam munaskata rurankuna:

* **5:46** griego rimaiwa: mana judiu kaskakunamanda kulki chaskig.

chasallata kai alpapiipas rurasunchi.

¹¹ Kuna puncha, tanda ministiska nukanchita karamui.

¹² Nukanchi ima pandariskakunata pasinsiai.

Chasallata nukanchipas, sugkuna ima llakichiskakunata pasinsianchimi.

¹³ Mana sakii, nukanchi mana alli iuiiakunata iuianakungapa.

Tukui mana allikunatapas nukanchita kispichii.

¹⁴ —Kasapas. Sugkuna ima llakichiskakunata kamkuna pasinsiagpika, kamkunapa Taita Dius suma luarpi kagpasma kamkunata pasinsianga. ¹⁵ İkuti kamkuna sugkunata mana pasinsiagpika, Taita Diuspas kamkuna pandariskakunata manami pasinsianga.

Imasa Taita Diusmanda iuiarispa, mana mikuspalla kangapa chaiagta

¹⁶ —İkuti chasallata, kamkuna Taita Diusmanda iuiarispa mana mikuspalla kangapa chaiaura, kawachiringapaglla mana rurangichi. Chasa ruragkuna, llulla ñawiwa iapa irkiaspami tukunkuna, “Sugkuna kawawachukuna” iuiaspalla. Kasami nuka niikichita: chasa ruragkuna, ñami kaipi munaskasina chaskirkakuna.

¹⁷ —Kamkunaka, Taita Diusmanda iuiarispa mana mikuspalla kaura, ñawi suma maillarispa, uma llambu kangichi. ¹⁸ Chasa, sugkunaka mana iachangakunachu, mana mikuspalla kagta. Taita Dius kamkunapa ñawiwa mana kawarig, paillami iachangapa ka. Pai Taita Dius pakallata kawagmi imasa chaiaskasina kamkunata karangapa ka.

“Rurangichi, suma luarpi wakachikuskasina, chipi iukag kangapa”

¹⁹ —Mana kai alpapi mirachingichi, iapa iukag kangapa. Burbujumi kaipi wagllichispa puchukankuna. Chasallata, iru wakariskasinami tukunkuna. Sisaikunapasma kichunkuna. ²⁰ Chasapaka rurangichi, suma luarpi wakachikuskasina, chipi iukag kangapa. Chipika, burbuju mana tiangapa kanchu, wagllichispa puchukangapa. Ñi mana imapas wakariska tukungapa kanchu. Ñi sisaikuna mana tiangapa kanchu. ²¹ Kamkuna maipi wakachiskapimi kamkunapa iuiaita churaska kangichi: kai luarpi u sug luarpi.

Ñawi, kuirpupi punchaiachigsinamanda

²² —Kamkunapa ñawikuna, kuirpupi punchaiachigsinami kankuna. Imatapas alli iuiaiwa kawagpika, kamkunapa kuirpupas suma punchaiagsinami kangapa ka. ²³ İkuti mana alli iuiaiwa kawagpika, kamkunapa kuirpupas iana tutapi kagsinami kangapa ka. Kamkunapa iuiai mana punchapisina kagpika, tukuimi mas iana tutapisina kangapa ka.

Taita Diusmanda i kulkimanda

²⁴ —Ñi maikanpas, iskai patrunkunapa sugllapi mana trabajapungapa pudingapa kankunachu. Sug patrunta mana munangachu; ikuti sugtaka kuiangami. Sug patrunta wabutingami; ikuti sugtaka sumagllami rimanga. Chasallata, Taita Diusta i kai alpamanda iukaikunata mana pudinkangichichu, iskandima suuralla iuiakungapa.

²⁵ —Chimandami kasa niikichita: mana iapa iuiarinakungichi: “İmatak mikusunchi i upiasunchi, nukanchi kaugsankama? İma katangatak churarisunchi?”. Kamba kaugsaika, mikuikunamanda masmi ka. Chasallata kamba kuirpupas, katangamanda masmi ka. ²⁶ Piskukunamanda iuiariichi. Paikunaka mana tarpunkunachu. Mikui pallaspa, mana wakachinkunachu. Chasa kagpipas, kamkunapa Taita Dius suma luarpi kagka ñi ima mana pisichinkunatachu. Kamkunaka, piskukunamanda mas balimi kangichi.

²⁷ —İpikunatak, maituku iuiarisapas, sug palmullapas awa wiñai pudingapa kangichi? Ñi pipas manima. ²⁸ İmapatak iapa iuiarinakungichi: “İma katangatak churarisunchi?”? Kawaichi imasa liriu tugtukuna chagrapi suma wiñariskakunata. Iuiariichi: paikuna mana puchkaspa awankunachu. Ñi ima mana rurankunachu. ²⁹ Kasami niikichita: ñi atun mandag Salomón, pai tukui iapa suma katanga churarisppapas, chi tugtukunamanda mas suma mana kawarirkachu. ³⁰ Ugsa kuna puncha chagrapi suma kaskata, kaiandi rupachingapa kagta, Taita Dius chasa suma kawá. Kamkunataka, imawantak mana mas sumaglla kawanga? Kamkuna mana allilla Taita Diusmanda iuiarispa kagkuna, paita mas sumaglla iuiariichi.

³¹ —Chimanda, mana iapa iuiarinakungichi: “İmatak mikusunchi? İmatak upiasunchi? İma katangatak churarisunchi?”. ³² Kai alpamandalla iuiaiwa kagkunami chasa maskaspa kaugsanakú. Kamkuna tukui ima ministiskakunamandaka, kamkunapa Taita Dius suma luarpi kag ñami iachá.

³³ —Kamkuna ñugpa suma iuiarispa kangichi, Taita Dius imasa mandaskasina kaugsangapa. Chasallata, pai imasa niskasina rurangapa iuiarispa kangichi. Chasa kagpikunaka, kamkunata tukui ima ministiskakunatami karamunga.

³⁴ —Chimanda, mana iapa iuiarinakungichi: “Kaia, imasik pasasa?”. Kada punchami ima llakiikunapas tiagsamú. Kaiamanda llakiikunata mana iuiaringichi.

7

“Mana pitapas pandariskakunata kawangichi”

¹—Mana pitapas pandariskakunata kawangichi. Chasaka, Taita Dios mana kamkuna pandariskata kawangachu. ²Imasami kamkuna, sugkuna pandariskakunata kawangichi: chasallatami Taita Dios, kamkunatapas pandariskata kawangapa ka.

³—Nigpika, ¿imapatok sugpa ñawipi juituriska ugsata kawakungi; ikuti kam kikinpa ñawipi sug atun ugsa juituriska iukaskataka mana kawaringi? ⁴Chasallata, kam kikinpa ñawipi chi atun juituriska iukaspaka, ¿imasatak sugta ninkangi: “Ñawipi juituriska ugsata anchuchisaki”? ⁵Sungu awalla rimag, kam kikinpa ñawita chi atun juituriska iukaskata ñugpa anchuchirii. Chasa ruraspami allilla kawankangi, sugpa ñawita juituriska ugsata anchuchingapa.

⁶—Kasapas. Taita Diospalla tiapuskata, ¿alkukunatachu sitapuntrangichi; chiwanka, kam kikinkunata rabiarispa kaningapa? ¿Kamkunapa kuri pirlakunatachu kuchikunata sitapuntrangichi, sarungapa? Manima. Chasallata, Diospa Rimaita mana sitagsina rurangichi, maikan mana suma iuiaiwa chaskingapa.

Taita Diusta mañagpika, karamungapami ka

⁷—Taita Diusta mañagpika, karamungapami ka. Paita maskagpika, taringapami kangichi. Pungu takachigrigpika, kamkunata paskapungapami ka. ⁸Maikanpas chasa mañagpika, chaskingapami ka. Maikanpas maskagpika, taringapami ka. Maikan pungu takachigrigpika, iaiuchingapami ka.

⁹—Sug wambra, paipa taitata tanda mañakugpika, ¿rumichu karantra? ¹⁰Chasallata, chalwa mañakugpika, ¿kulibrachu karantra? Manima. ¹¹Kamkuna, mana alli kaspapas, kamkunapa wambrakunata suma imapas karangichi. Nigpika kamkunapa Taita suma luarpi kagka, ¿imawantok mana sumaglla karamunga, maikan suma mañagpika?

¹²—Imasami munanakungichi, sugkuna kamkunamanda allilla rurachukuna: chasallata kamkunapas, paikunamanda allilla rurangichi. Chasami Moisés i Santu Ispirituwa rimagkuna iachachiska niraiá.

Kichki pungusinamanda

¹³—Suma luarma iaiugringapa, kichki pungupisina ialingichi. Diltudupa chingangapa luarma ridiru, atun suma ñambisinami ka. Chima iaikudiru, atun pungu paskaskasinami ka. Achkakunami chi pungusina kaskapi iaiukununa. ¹⁴Ikuti diltudupa kagsai iukan-gapa luarma ridiruka, iapa amchi ñambisinami ka. Chima iaiugringapa, iapa kichki pungu-sinami ka. Maillakunallami chi ñambisinata katichinkuna.

“Runakuna ima ruraskata kawaspami paikunata rigsinkangichi”

¹⁵—Iuiaipilla uiangichi. Llullakunami tia, kasa nispa: “Santu Ispirituwa rimagmi kani”. Chikuna, ubijasina alli kawarisipami kamkunapagma samungakuna. Nigpika paikunapa iuiaipika, sug sachá alku imatapas mikungapa iuiaiwa kagsinami kankuna. ¹⁶Imasami kawangichi sachakuna, miski muiú u winja muiú tiarigta: chasallatami paikunata ima ruraskata kawaspaka, rigsinkangichi. Ispinauiug sachakunapi, mana ubas muiú tandachirin-chu. Chini sachakunapi, mana igus pallarinchu. ¹⁷Maikan alli sachakunapimi miski muiukuna tukú. Mana alli sachakunapika, winja muiukunami tukú. ¹⁸Alli sachakunapi, winja muiukuna mana tukugsamunchu. Mana alli sachakunapika, miski muiukuna mana tiarinchu. ¹⁹Tukui sachá mana allilla muiú tukuskakunata kuchuspa, ninapimi churangapa cháiá. ²⁰Chasallata, runakuna ima ruraskata kawaspami paikunata rigsinkangichi.

Tukuikuna, suma luarma mana iaiugringapa kankunachu

²¹—Achkakunami nukata: “Iaia Jesús, Iaia Jesús” niwankuna. Chasa niwagkuna, tukuikunaka suma luarma mana iaiugringapa kankunachu. Nukapa Taita suma luarpi kag imasa pai munaskasina alli ruragkunallami iaiugringapa kankuna. ²²Chi puncha, achkakunami niwangapa kankuna: “Iaia Jesús, ¿manachu kammanda willaspa purirkanchi? ¿Manachu, kammanda iuiarispa, kuku wairakunata lugsichiranchi? ¿Manachu achka mana imaurapas kawaskasina kammanda iuiarispa rurarkanchi?”

²³—Nukaka, chiura ainingapami kani: “Kamkunata mana imaurapas rigsiikichitachu. Kamkuna mana allilla ruragkuna, nukapa ñawimanda anchuriichi”.

²⁴—Chimandami niikichita: maikan nuka ima rimaskata uiaspa ruragkuna, suma iuiaiug runasinami kankuna. Chi runa, rumisina muruchu alpapi wasichirka. ²⁵Tamia samurka; iaku jundarka; sinchi wairapas pukugsamurka. Maituku chi wasita piagrikugpi-pas, manima urmarkachu, rumisina muruchu alpapi saiachiska kagmanda.

²⁶—Maikan uiawaspapas, nuka imasa rimaskasina mana ruragkunaka, mana iuiaiug runasinami kankuna. Chi runa, kaskaju awallapi wasichirka. ²⁷Tamia samurka; iaku

jundarka; sinchi wairapas pukugsamurka. Chi wasita iaku jundaspa piagrillapi, urma-chispa, waglichispami aparka.

²⁸ Jesús chasa rimaskata puchukauraka, chipi kagkuna, pai iachachiskata uiaspa, iapa ujnarrirkakuna. ²⁹ Paikunapa iachachig taitakunasinalla pai mana iachachirkachu. Tukuikunamanda mas suma allilla mandagsinami iachachirka.

8

Aicha ismui unguiwa kaskata, Jesús ambiskamanda

¹ Jesús chi lumamanda uraikuuraka, iapa achka runakuna paita katichirkakuna. ² Diulpilla sug runa, aicha ismui ungui iukaspa, paipagma kaillaiagrirka. Chi runaka, kungurispa, nirka:

—Taita waugki, kam munaspaka, pudingimi nukata ambiwanga.

³ Chiura Jesuska, ungueta maki churaspa, nirka:

—Ari, munanimi. Ambiriska tukui.

Chasa nigllapi, chi ungui allilla ambirigsamurka. ⁴ Chiura, Jesuska nirka:

—Uiamui. Mana pitapas willakungi. Sasirdutita kawachirigrii. Moisés kamariku karan-gapa niraiaskasina karagrii. Chasaka, tukuikunami kawangakuna, kam allilla ambiriska kagta.

Suldadukunata mandagpa lutrinta, Jesús aliachiskamanda

⁵ Jesús Kafarnaum puibluma chaiagrikuskapi, Romamanda achka suldadukunata mandagka, paita kaillaiaspa mañarka, ⁶ kasa nispa:

—Taita waugki, nukapa uchulla lutrinmi mana kuiuringapa unguiwa sinchi nanaiwa wasipi siripuaku.

⁷ Chiura, Jesús nirka:

—Nuka, kambagma rispa, aliachigrisami.

⁸ Chi runaka ainirka:

—Taita waugki, nuka mana mirisinichu, kam nukapa wasi ukuma iaikugringapa. Chasapaka, sug rimaila nipuai; nukapa ungu ambiripuanguallami. ⁹ Nukapas, sugkuna mandawaskapimi kani. Chasallata nukapas, sug suldadukunata mandagmi kani. Maikan suldaduta nuka “Rii” nisa; chiura rinllami. Ikuti maikanta: “Samui” nisa; chiura samunllami. Nukapa lutrinta: “Kasa rurai” nisa; chiura rurantllami.

¹⁰ Chiura Jesús, chi runata ujnarispa uiarka. Nispaka, katiraiagkunata nirka:

—Kasami nuka niikichita: ñi maikan Israelmanda runa, kai mandagsina suma allilla iuiawag mana tarirkanichu. ¹¹ Kasami niikichita: mana judíu kagkunapas,* achkakunami suma luarma iaikugringapa kankuna, Dios suma mandakuskapi, Abraham, Isaak i Jakob-wa sugllapi kangapa. ¹² Ikuti Taita Dios kikin agllaska judiukunaka, mana uiawagmanda, iana tuta kanchapisina diltudupa ninamami sitai tungungapa kankuna. Chipi, iapa llakispa, wakaspa, kiru mukuspami kangapa kankuna.

¹³ Chasa nispaka, chi mandagta nirka:

—Riilla kamba wasima. Imasami kam nukamanda suma iuiawangi: chasallata kam iuia-kuska, suma tukuchu.

Chiurallami chi ungu ambirigsamurka.

Pedropa suigrata, Jesús ambiskamanda

¹⁴ Chimandaka Jesús, Pedropa wasipi iaikugrirka. Chipika Pedropa suigra, rupaiwami ungu siririkurka. Chasa kawaspa, ¹⁵ Jesuska paipa makita tantiarka. Tantiauralla, rupai anchurirka. Chiura chi warmi, atarispa, mikui ianuspa, karai kallarirkakunata.

Achka ungukunata, Jesús ambiskamanda

¹⁶ Chi tuta, kuku wairawa kaskakunata, achkakunatami Jesuspagma chaiachigrirka-kuna. Chiura, suglla rimailawami chi kuku wairakunata llugsichirka. Tukui unguiwa kaskakunatapasmí ambirka.

¹⁷ Chasami tukugsamurka, Isaías suti Santu Ispirituwa rimag ñugpata willaskasina. Kasami willaraiarka: “Nukanchipa llakii i unguikunatapasmí pai aparka”.

Iskai runakuna, Jesusta katingapa munanakuskamanda

¹⁸ Iapa achka runakuna, Jesusta muiuchirkakuna. Chasa kawaspa, Jesuska paita kati-raiagkunata nirka:

—Kai kuchata chimbasunchi.

¹⁹ Chiura Moisés ima niskata sug iachachig taita, kaillaiaspa, nirka:

—Iachachig taita, kamta katisakimi maima kam rikuskama.

* 8:11 griego rimaiwa: indi llugsidirunigmanda i chingadirunigmanda runakuna.

²⁰ Jesuska ainirka:

—Chuchakuna, kuibakunami iukankuna, paikuna kaugsangapa. Piskukunapas, tasinwa suma allichiska wasimi iukankuna. Ikuti kai Runa Tukuskaka mana iukanchu, ñi maipipas samaringapa.

²¹ Sug katiraiagka, paita nirka:

—Taita waugki, ñugpa sakiwai, nukapa taitata pambagringapa.

²² Jesuska ainirka:

—Katiwailla. Nukata mana iuiariwagkuna[†] pambachukuna.

Sinchi wairata i iaku iapa kuiurikuskata, Jesús kasillaiachiskamanda

²³ Chiuramanda, Jesús kanuapi iaikuura, katiraiagkunapas iaikurkakuna. ²⁴ Ña iaku chimbanakuskapi, iapa sinchi waira atarii kallarirka. Chiwanka, kanua ukuma iaku ña iaikurka. Jesuska puñukurka. ²⁵ Chiura katiraiagkuna, kailliaspa, paita rigchachirkakuna, kasa nispa:

—Taita waugki, nukanchita kispichii. Mana kagpika, kaipichar wañusunchi.

²⁶ Jesuska, rigcharispa, ainirkakunata:

—¿Imapatak chituku mancharingichi? Kamkuna, maillami nukamanda iuiawaspa kangichi.

Chasa nispa, atarispa, wairata i iakuta piñarka. Chasa piñauraka, tukui allillami kasillaiagsamurka.

²⁷ Katiraiagkuna, ujnarispa paipura tapurinakurka:

—¿Ima runasik ka? Waira i iakupas, paita uiankuna.

Iskai runa achka kuku wairakuna iaikuskakunata, Jesús ambiskamanda

²⁸ Kucha ialispaka, sug ladu chimba chaiagrirkakuna Gadara suti alpama. Chipika, wañuskakuna pambaraiaskanigmanda iskai runakuna, kuku wairakuna iaikuska, Jesusta tupagrirkakuna. Chi runakuna, wañuchingapa manchachig karkakuna. Chiwanka, mana pipas chi suiu ialingapa pudirkakuna. ²⁹ Chi runakunaka, Jesusta kawaspa, kaparispa nirkakuna:

—Ai, kam Diuspa wambra, ¿imapatak nukanchi kaskama samukungi? ¿Samukungichu, sinchi nanachii puncha manara chaiagpipas, nukanchita llakichingapa?

³⁰ Manancha karullapi, achka kuchikuna mikuspa purinakurka. ³¹ Nigpika chi runakunapi kag kuku wairakunaka, Jesusta mañarkakuna, kasa nispa:

—Kaimanda nukanchita llugsichispaka, kachai, chi kuchikunapa ukuma iaikugringapa.

³² Chiura, Jesús nirkakunata:

—Riichilla.

Chasaka chi kuku wairakunaka, ña runakunamanda llugsispa, kuchikunapa ukuma iaikugrirkakuna. Chiwanka tukui kuchikuna, iapa saia patata kalpaspa, kucha iaku ukuma sitarigrirkakuna. Chipi chukarispa, tukui puchukarirkakuna.

³³ Chasa kawaspa, kuchikunata kawagkunaka, mitikuspa, puibluma chaiagrispaka, tukui imasa pasariskata willagrirkakuna. Chi kuku wairakuna iukaska runakunata imasa pasarigtapas willarkakuna. ³⁴ Chi uiagkunaka, chi puiblumanda tuikukuna llugsirirkakuna, Jesuswa tupanakungapa. Paita kawagrispaka, mañarkakuna:

—Nukanchipa alpamanda llugsipuai.

9

Mana kuiuringapa unguiwa kaskata, Jesús ambiskamanda

¹ Chiura Jesús, kanuapi iaikuspa, ikuti kucha ialispa, pai kaugsakuska puibluma chaiagrirkakuna. ² Chasa uiaspa sug runakunaka, mana kuiuringapa unguiwa kaskata chakanapi siri-chispa, Jesuspagma aparkakuna. Chiura Jesuska, “Ambipuangami” iuianakuskata kawaspa, mana kuiuringapa unguiwa kaskata nirka:

—Wambra, mana llakiiwa kai. Kam pandariikunata ñami pasinsiaska kangi.

³ Chasa uiaspa, Moisés ima niskata iachachig taita chipi kagkunaka, kikinpura tapurinakurka:

—Kai runa, ¿imapatak Diussina tukuspa rimaku?

⁴ Jesuska, chasa iuianakuskata iachaspa, nirkakunata:

—¿Imapatak sungullapi mana suma iuianakungichi? ⁵ ¿Maikantak mas alli ka: ningapa: “Kam pandariikunata ñami pasinsiaska kangi”? Mana kagpika, ¿ningapa: “Atarii, kamba wasima riilla; ña ambiriskami kangi”? ⁶ Kunaura kawachisakichita: kai Runa Tukuska, kai alpapi pudinmi, pandariikunata pasinsiangapa.

Chasa nispa, mana kuiuringapa unguiwa kaskataka nirka:

[†] 8:22 “Wañuska niraiaskakuna”, Jesusta mana iuiarigkunami niraiá.

—Atarii. Chakanata markarisa, kamba wasima rii.

⁷ Chasa niura, chi runa, atarisa, wasima rirka. ⁸ Chasa kawaspaka, chipi kagkuna iapa mancharirkakuna. Taita Diusta iapa suma atuniachirkakuna, kasa nisa:

—Paimi runakunata chituku iachaita karamuska ka.

Mateo suti runata, Jesús kaiaskamanda

⁹ Jesús, chimanda rikuspa, mana judiu kaskakunamanda kulki chaskikusapi ialikurka. Chipika, Mateo suti runami tiakurka. Chi runata kawaspaka, Jesuska nirka:

—Katiwai.

Chiura chi runa, atarisa, Jesusta katii kallarirka.

¹⁰ Chiuramanda, Jesuswa sugllapi katiraiagkuna Mateopa wasima iaikugrirkakuna. Chipi mikungapa tianakuura, paipura kulki chaskigkuna i mana allilla ruragkuna, achka-kunami, chaiagrispa, sugllapi tiarigrirkakuna. ¹¹ Chasa kawaspaka, fariseokuna chi katiraiagkunata tapurkakuna:

—Kamkunata iachachig, ¿imapatok mana judiu kagkunamanda kulki chaskig i mana allilla ruragkunata sugllapi mikuku?

¹² Chasa uiaspaka, Jesuska nirka:

—Mana unguiwa kagkuna mana ministinkunachu, ambigta maskangapa. Ungugkunami ambigta maskankuna. ¹³ Kamkuna, rispa, ñugpamanda librupi imasa niraiaskata iachaikugriichi kasa willaraiaskata:

Mana munanichu kamkuna, nukamanda animalkunata wañuchispa rupachipuungapa.

Kamkuna sug runakunamanda llakispa kaugsanakungapami munani.

Chasallata, nukaka mana samurkanichu, allilla ruragkunata kaiangapa. Mana allilla ruragkunata maskangapami samurkani; chasaka, Taita Diuswa allilla tukungapakuna.

Imaura mana mikungapa, Jesús iachachiskamanda

¹⁴ Chiura Juan Bautistawa purigkuna, kaillaiaspa, Jesusta tapurkakuna:

—Kamta katiraiagkuna, ¿imawantok imaurapas mikuspalla kankuna? Ikuti nukanchika fariseokunapas, achka punchakuna mana mikuspallami chisianchi.

¹⁵ Chiura, Jesuska ainirkakunata:

—Kasaraipi, kusa tukunga kunbidaskakunawa kankama, ¿irkiaspa llakiiwa mana mikuspallachu kangakuna? Manima. Imaura chaiachu, kusa anchuchii tukungapa: chiurami paikunata chaianga, mana mikuspalla kangapa.

¹⁶ —Ñi pipas, ruku katangapi musu linsuwa mana sirangichichu. Chasa siragpika, tagsaura, chi linsu uchullaiaspa, ruku katangatami llikichinga. ¹⁷ Chasallata musu binu, ruku kara taligapi mana tallingichichu. Chasa talligpika, musu binu timbuura, taligata tugiachispami icharinga. Kara taligapas mana balinchu. Chimandami musu binu, musu taligapi tallingapa chaiá. Chasa talligpika, binu taligapasmi allilla tukunga.

Jairopa wambra kaugsariskamanda i sug warmi Jesuspa katangata llamkaspá ambiriskamanda

¹⁸ Jesús chara rimakugllapi, sug mandag runa, kaillaiaspa, kungurispá, paita nirka:

—Nukapa warmi wambra, kunaaurallami wañupúá. Kamba maki churapuagrii. Chasaka, kaugsaripuungapami ka.

¹⁹ Chiura Jesús, atarisa, chi runawa rii kallarirka. Paita katiraiagkunapas, kati kati rirkakuna.

²⁰ Rinakunkama sug warmi, paipa katinigmanda kaillaiarka. Chi warmi, chungá iskai wata iawar sitaiwa ungu karka. ²¹ Paipa iuiáiipi nikurka: “Jesuspa katangata llamkaillawami ambirigsamusa”. Chasa iuiakuspaka, paipa katanga puntapi llamkarka. ²² Jesuska, tigrarispá, chi warmita kawaspa, nirka:

—Kam warmisita, mana llakikui. Nukamanda suma iuiariskamandami ambirig-samurkangi.

Chasa nigllapi, chi ungui anchurirka.

²³ Chi mandagpa wasima Jesús chaiagriuraka, flaugtakuna uiachispa, iapa killachispa wakanakurka, wañuskata apangapa. Chasa kawaspaka, ²⁴ Jesuska nirkakunata:

—Anchuriichi. Chi wambra mana wañuska kanchu. Puñuillami puñuku.

Uiagkuna, paita asirkakuna. ²⁵ Tukuikuna llugsichii tukuuraka, Jesuska wambra kaskama iaikugrirká. Chi wambrata makimanda apiura, kaugsarispá atarirka. ²⁶ Chiwanka chi alpa suiu, tukuipi chasa pasariskamanda iacharigsamurka.

Iskai runakuna mana ñawi kawagkunata, Jesús ambiskamanda

²⁷ Jesús chimanda llugsispa rikuskata, iskai runakuna mana ñawi kawagkuna katinkurka, kasa kaparispá:

—Davidpa wambra, nukanchimanda llakirii.

²⁸ Jesús wasima chaiagriura, chi runakuna kaillaiagrirkakuna. Chiura, Jesuska tapurkakunata:

—Kamkuna nukamanda, ¿sumachu iuianakungichi, nuka kamkunata ambii pudingapa kagta?

—Ari, taita waugki— ainirkakuna.

²⁹ Chiura Jesuska, ñawita llamkarkakunata, kasa nispa:

—Imasami nukamanda suma iuiawanakungichi: chasa tukuchu.

³⁰ Chasa niura, allilla kawai pudirkakuna. Nispaka, Jesús nirkakunata:

—¡Ujalallapas sugkunata willanakungichi!

³¹ Chi runakunaka, chi niskata mana uiaspalla, maipi riskapi, tukuipi Jesusmanda willaspa purigrirkakuna.

Mana rimangapa pudigta, Jesús ambiskamanda

³² Chi runakuna ña riska kauraka, sug runata kuku waira iukaskata Jesuspagma chaichigrirkakuna. Chi runa, mana rimangapa pudi karka. ³³ Jesús chi kuku wairata llugsichiruraka, chi runa allilla rimagsamurka. Chasa kawaspaka, achka chipi kagkuna iapa ujnarispa nirkakuna:

—Kai Israel alpapi, ñi imaupas mana iachariska kanchu pipas chasa ambigta.

³⁴ Ikuti fariseokunaka ninakurka:

—Iaia kukupa iachaiwami kuku wairakunata llugsichiku.

Tukui runakunamanda, Jesús llakiskamanda

³⁵ Chi alpapi, tukui atun i uchulla puiblukunapimi Jesús purikurka. Judiukuna tandariduru wasikunapi iachachispa, Diuspa suma mandaimanda Alli Willaita willaspa i tukui-kunata, maituku ungui i nanaikunawa kaskakunatapas ambispami purikurka. ³⁶ Tukui chipi kausagkuna, sitaska ubijakunasina, ñi pipas mana kawangapa tiagsinami karkakuna. Paikunata chasa kawaspaka, Jesús iapa llakirirka. ³⁷ Nispaka, paita katiraiagkunata chi runakunamanda kasa nirka:

—Pallangapaka, achkami tia. Nigpika pallagkunaka, maillami tiankuna. ³⁸ Chi pallaika, atun Taita Diuspa chagrasinami ka. Chimanda, paita mañaichi, achka pallagkuna kachamuchu.

10

Chunga iskai runakunata, Jesús agllaskamanda

¹ Chiuramanda Jesuska, paipa chungu iskai katiraiagkunata kaiarka. Nispaka kuarka, paikuna kuku wairakunata llugsichii, ima unguiwa i nanaiwa kaskakunatapas ambii pudingapa.

² Chi chungu iskai agllaskakuna, kasami suti karkakuna: tukuikunamanda mas ñugpa karkami Simón; paita, Jesús sutichirka Pedro; chimanda, paipa waugki Andrés; Santiago i paipa waugki Juan (paikuna, Zebedeopa wambrakanami karkakuna); ³ Felipe, Bartolomé i Tomás; Mateo (pai karkami mana judíu kaskakunamanda kulki chaskig); Alfeopa wambra Santiagollatata suti i Tadeo; ⁴ sug Simón (kananeo suti runakunawa ñugpata purig); i Judas Iskariote, Jesusta katuspa apichig.

⁵ Chi chungu iskai runakunata kachakuspa, Jesuska kasami nirka:

—Mana rinakungichi mana judíu kagkunapagma. Chasallata, Samaria alpa puiblunama mana iaikunakugringichi. ⁶ Chasapaka, Israelmanda runakunapagma riichi. Paikuna, ubijakuna chingaskasinami kankuna.

⁷ —Tukuipi willaspa ringichi: “Suma luarmanda mandai, ñami chaimuku”. ⁸ Unguiwa kaskakunata ambingichi. Wañuskunata kausachingichi. Aicha ismui unguiwa kaskakunatapas aliachingichi. Kuku wairakunata llugsichingichi. Mana pagaspallami kamkuna chaskirkangichi. Chasallata kamkunapas, ñi ima mana kubraspalla kangichi. ⁹ Mana purichiichi kuri, kulki ñi imapas chumbilliskapi wataskasina. ¹⁰ Mana apanakuichi jigra, ñi chakikunapi churariduru, ñi tawina ñi imapas ñambipa. Katangapas, imasa churariska kaskallawa riichi. Maikan trabajagkunata chaianmi, mikui u ima ministiska paikuna chaskingapa.

¹¹ —Maikan atun i uchulla puiblupi chaiagrispaka, maikan alli iuiwiwa runa kaskamanda tapugringichi. Tarigrispaka, chi alli runapaglapi kidaringichi, chi puiblumanda sugsinama llugsinkama. ¹² Paipa wasipi iaikuspa, ningichi: “Puangi. Sumaglla allilla kapuaichi”. ¹³ Chi wasipi sutipa alli iuiwiwa kausanakugpika, paikunata tukuipi allillami tukugsamungakunata. Ikuti mana alli iuiwiwa kagpikunaka, paikunata mana allilla tukugsamungakunatachu.

¹⁴ —Maipi kamkunata mana chaskingapa i kamkuna ima rimaskata mana uangapa manachukuna, chi wasi i puiblumanda llugsikuspaka, chakipi alpa llutaraiaaskata chabsingichi. ¹⁵ Kasami nuka niikichita: Taita Dios justisiai rurangapa puncha chaiauraka, Sodoma i Gomorra suti alpakunamanda runakunata llakichiskamandapas masmi chi puiblukunamanda runakuna llakii iukangapa kankuna.

Jesusta katiraiagkunata mana munaspa, puchukangapa munanakugmanda

¹⁶ —Uiamuichi. Kamkunata ubijakunatasina sacha alku kaugsanakuskasinamami kachanakuikichita. Chimanda kamkuna, iachakunasina allilla kawaspa, uiaspa, ruraspa puringichi. ¹⁷ Kamkunata jiru iuiaspa kawanakuskata mana kawaringichi. Paikuna, kamkunata apispa, justisiakunapagmami apangakuna. Paikuna tandariduru wasikunapimi kamkunata asutingakuna. ¹⁸ Kamkuna nukawa kagmanda, atun mandagkunapagmami purichingakuna, justisiai rurai tukungapa. Chiura, paikunata i mana judiu kagkunatapasmi nukamanda willangichi.

¹⁹ —Justisiakunapagma kamkunata apaura, mana iapa iuianakungichi: “¿Imasami paikunata ainini?”. Ainingapa chaiaura, kikin Santu Ispiritumi iuiachingapa ka. ²⁰ Kam kikin-kunapa iuiaiwa mana rimanakungapa kangichichu. Kamkunapa Taita Diospa Ispiritumi kamkunata allilla rimachingapa ka.

²¹ —Chi punchakuna sugkuna, waugkindikunatami kuangakuna, wañuchii tukungapa. Chasallata taitakunapas, paikunapa wambrakunatami wañuchingapa kuangakuna. Wambrakunapas, taita i mamandita kuntra tukuspa, wañuchingapami kuangakuna. ²² Tukuikunami kamkunawa rabiaringakuna, kamkuna nukawa kagmanda. Chasa pasanakuspami, wañunkama nukallawa iuiarispa kagkunami kispiringapa kankuna.

²³ —Kamkuna kaska puiblupi mana allilla rurangapa maskai kallariqipikunaka, sug puibluma mitikungichi. Kasami nuka niikichita: kai Israel alpapi tukui puiblukunama kamkuna manara chaigrigpimi kai Runa Tukuska ikuti samungapa ka.

²⁴ —Ñi maikan iachaikugkuna, iachachikuskamanda mas iacha mana kankunachu. Chasallata ñi maikan lutrinkunapas, paipa taitakunamanda mas mana kankunachu. ²⁵ Iachaikugkunata iachachigtasina suma kawagpikuna, allillami kantra. Chasallata, lutrinkunata kikinpatasina suma kawagpikuna, allillami kantra. Nukatata wasi duiñusinatami kamiwankuna, kasa nispa: “Beelzebú suti iaia kukuwami kangí”. Chasa nukata kamiwagpika, mascher nuka ima niskata ruragkunata kamipuangukuna.

“Taita Diusta manchangichi”

²⁶ —Chi runakunata mana manchangichi. Maikan pakalla iuiaspa rimaskaka, imaurapasmi iachari. Chasallata, ima pakalla wakachiskapasmi imaurapas kawarigsamú. ²⁷ Nuka tutapi kamkunata ima niskata punchapi willangichi. Chasallata, ima pakalla uiaskatapas wasi awamanda sinchi kaparispas willangichi.

²⁸ —Kamkunapa kuirputa wañuchispa, kamkunapa almata mana puchukangapa kankunachu. Chimanda, ñi ima mana paikunata manchaichi. Chasapaka, Taita Dios diludupa ninama kuirputa almawanta sitangapa kagmanda, paita manchangichi.

²⁹ —¿Manachu iskai pisku, aslita kulkimandalla katurí? Chasa kagpipas, kamkunapa Taita Dios mana lisinsiagpika, ñi sug paipura manacher wañuntra. ³⁰ Kamkunapa umamanda agchapas, Taita Dios kuintaskami iuká. ³¹ Chimanda kamkuna, mana manchaspalla kaugsaichi. Maituku achka piskukunamandapas mas balimi kangichi.

³² —Maikanpas, sugkunapa ñawipi nukamanda willachu: “Paita rigsiniimi”: nukapas, chi runamandaka nukapa Taita suma luarpi kagpa ñawipi willasami: “Paita rigsiniimi”. ³³ Ikuti maikanpas, sugkunapa ñawipi nukamanda nichu: “Paita mana rigsiniichu”: nukapas, paimandaka nukapa Taita suma luarpi kagpa ñawipi nisami: “Paita mana rigsiniichu”.

Jesús samugmanda, makanakugsinami tiangapa ka

³⁴ —Mana iuianakuichi nuka kai alpama samugta, tukui sumaglla kaugsanakungapa. Mana chasamanda samurkanichu. Nuka samugmanda, makanakugsinami tiangapa ka. ³⁵ Nuka samugmandami taitandiwa wambrandiwa mana allilla kaugsanakungapa ka. Chasallata, mamandiwa warmi wambrandiwa, suigrandiwa nuirandiwa mana allillami kaugsanakungapa kankuna. ³⁶ Kikinpa wasipi kaugsanakugpura llakichinakuspami kangapa kankuna.

³⁷ —Maikanpas taitata i mamata nukamanda mas kuiagpika, mana nukapa niraiankunachu. Chasallata maikanpas wambrata nukamanda mas kuiagkunaka, mana nukapa niraiankunachu. ³⁸ Maikanpas mana paipa krusta markarigsina ruraspa katiraiawagkunaka, mana nukapa niraiankunachu.

³⁹—Maikan kikinpa kaugsaita kispichingapaglla iuiakugpika, kikinmi puchukaringapa ka. Ikuti maikanpas nukamanda wañuchii tukugpika, mana mas wañui kaugsaitami tarin-gapa ka.

Jesumanda iuiarispa sugkunata chaskigpikuna, sumami sug luarpi chaskigringakuna
⁴⁰—Maikanpas kamkunata chaskigkuna, nuka kikinta chaskiwagmi niraiankuna. Chasa chaskiwaspaka, nukata kachamuwagtapasmi chaskig niraiankuna.

⁴¹—Maikanpas Santu Ispirituwa rimag runata chaskigpika, imasami Santu Ispirituwa rimagta karanga: chasallatami paitapas karangapa ka. Chasallata, maikanpas alli runata chaskigpika, imasami Taita Dios, alli runata karanga: chasallatami paitapas karangapa ka.
⁴² Kasami nuka niikichita: kai uchullakuna nukata katiraiawagkuna kagmanda, paikunata-pas maikanpas sug kuashag chiri iakullapas karagpika, Taita Dios chi runamanda mana kungaringapa kanchu.

11

Juan Bautista, Jesusta tapungapa kachaskakunamanda

¹ Jesuska, chungá iskai paita katiraiagkunata tukui iachachispaka, rirka, chi suiu pui-blukunapi iachachispa i willaspa puringapa. ² Juan Bautista, karsilpi wichkaraiaspa, Jesu-cristo ima rurakuskamanda iachaspa, paita katiraiagkunata Jesuspagma kacharka. ³ Chi runakunaka, Jesusta tapugrirkakuna:

—¿Kamchu kangí chi samungapa kaska? Mana kagpika, ¿sugtachu suiasunchi?

⁴ Chiura, Jesuska ainirkakunata:

—Juanta willagriichi kamkuna kunaura imasa uisaka i kawaskata. ⁵ Mana ñawi kawag-kuna kawanakumi. Mana purig pudigkunapas allillami purinakú. Aicha ismui ungui iukaskakunapasmi ambirigsamuska kankuna. Mana uiagkunapasmi allilla uianakú. Wañuskakunapasmi kaugsarinakú. Mana ñi ima iukagkunapasmi Alli Willaita chaski-nakú. ⁶ Maikan nukamanda suma iuiaita mana sakigpika, Taita Diospa iapa kuiaskami kankuna.

⁷ Juan kachaskakuna ikuti paipagmallatata kutinakuura, Jesuska chipi kagkunata Juan-manda nirka:

—Kamkuna, chusa sitaska alpapi Juan kaskama chaiagrispaka, ¿imaták kawagrirkangichi? ¿Sug wiru wairawa pakichingasina kuiuchikuskatasinachu kawagrirkangichi?

⁸ Mana kagpika, ¿imaták kawagrirkangichi? ¿Sug runa iapa suma musu katanga chura-riskatachu tarigrirkangichi? Manima. Chasa suma churarigkuna, mandagkunapa wasi-kunallapimi kaugsankuna. ⁹ Chasa kagpika, ¿imaták kawagrirkangichi? ¿Santu Ispirituwa rimagtachu tarigrirkangichi? Ari, niikichitami: Santu Ispirituwa ñugpamanda rimag-kunamandapas, Juan mas atunmi ka. ¹⁰ Paimandami kasa niraiá:

Kawai. Nuka ima niskata willagta kamba ñugpami kachakuni, kammanda ñambikunata allichipungapa.

¹¹ Kasami nuka niikichita: kai alpapi tukui tiagsamuskekunamanda, Juanllami mas atun ka. Chasa kagpipas, Dios suma mandakuskapi maikan mas uchullapas, Juanmanda mas atunmi niraiá.

¹² —Juan Bautista kawariskauramandata kunankama, Diospa suma mandaimanda willagkuna tukui llakiimi iukankuna. Chi llakichigkuna munanakumi, chi suma mandai-manda willaita puchukangapa. ¹³ Juan kawarinkama, tukui Santu Ispirituwa rimagkuna i Moisés ima rurangapa iachachiskapipasmi willanakurka, chi suma mandai samungapa kagta. ¹⁴ Kamkuna suma iuiaipi chaskingapa munagpikuna, pai Juanka niraianni Elías suti Santu Ispirituwa rimag samungapa niska pai kagta. ¹⁵ Rinri iukagkuna, nuka niskata uiawaspa, suma iuiaringichi.

¹⁶ —Kai punchakuna kaugsanakuska runakunata, ¿imasa kagtatak nisa? Sug wam-brakuna kallipi tiarispa pugllanakugsinami kankuna. ¹⁷ Chipika, paipura kaparinakú: “Nukanchi flaugta uiachigpipas, mana bailangichichu. Llakispa kantagpipas, mana wakangichichu”. ¹⁸ Chasallata, Juan Bautistamanda i nukamandami rimankuna. Juan mana tanda mikugmanda, mana binu upiagmandami ninkuna: “Kai runa, kuku waira iaikuskami ka”. ¹⁹ Kai Runa Tukuska, tukui mikuspa i upiaspa kagmanda, ninkunami: “Iapa mikudur i iapa upiadurmi ka. Mana judíu kaskakunamanda kulki chaskigkunawa i mana alli ruragkunawa sugllapimi puriku”. Chasa kawaspas nigpikunapas, Taita Diosmi kawachí, pai kikin ruraskawa iapa iachag kagta.

Jesús ima willakuskata mana uiagkunamanda

²⁰ Chasa nispaka Jesús, pai achka suma mana imaurapas kawaskasina ruraska puiblu-kunamanda runakunatami piñai kallarirka. Tukui chasakunata kwaspapas, allilla rurai-kunama mana tigraskamandami piñarka. ²¹ Kasami nirkakunata:

—¡Ai, kamkuna Korazín suti puiblupi kaugsagkuna! ¡Ai, kamkuna Betsaida puiblupi kaugsagkuna! Tiro i Sidón suti puiblukunamanda runakuna, imasa kamkunapa puiblukunapi chituku mana imaurapas kawaskasina ruraskata kawaspaka, chiurallami paikunaka, llakiiwa iana katangakuna churarispá, uchpawa umapi armarispá, alli rurai-kunama tigraska kantrakuna. ²² Kasami niikichita: Taita Dios justisiai rurangapa puncha chaiauraka, Tiro i Sidón puiblukunamanda runakunata llakichiskamanda masmi kamkuna llakii iukangapa kangichi.

²³ —Kamkuna, Kafarnaum puiblumandakunaka, ¿imapatá iuianakungichi: “Sug luarpi-mi atuniachii tukungapa kani”? Manima. Diltudupa ninamami sitai tukungapa kangichi. Sodoma suti puiblupi kaugsanakuskaka, imasa kamkunapa puiblupi chituku mana imaurapas kawaskasina ruraskata kawaspaka, paikuna alli ruraikunama tigraspami kunankama kangapa karkakuna. ²⁴ Kasami niikichita: Taita Dios justisiai rurangapa puncha chaiauraka, Sodoma alpamanda runakunata llakichiskamanda masmi kamkuna llakii iukangapa kangichi.

Nukawa samuichi samingapa, Jesús niskamanda

²⁵ Chiura Jesús, kasami Taita Diusta nirka:

—Taitiku, suma luar i kai alpa luarata iaia mandagmi kangi. Kamta iapa suma atun kagta-mi niiki. Kambagma iaikugringapa, iacha i iapa iuiiug runakunamanda pakaskasinami kapungi. Ikuti mana iacha i mana iapa iuiiugkunatami kawachirkangi. ²⁶ Ari, Taitiku, chasami kam munarkangi.

²⁷ Kasapasmi Jesús nirka:

—Nukapa Taita, tukuimi nukata karawaska ka. Paipa wambra nuka kagta, ñi maikan runapas mana iachankunachu. Nukapa Taitallami rigsiwá. Chasallata, nukapa Taitata mana pipas rigsinkunachu. Nukallami rigsini, paipa wambra kaspá. Maikan nuka munaskakunallami nukapa Taitata rigsingapa kankuna.

²⁸ —Tukuikuna saikuiwa i llakiiwa kagkuna, nukawa samuichi. Nukami tukuipi sama-chisakichita. ²⁹ Wagrakunapa iugu churaskasina nuka ima iachachiskata chaskiichi. Nukata iachaikuwaichi, nuka imasa uchullakunasina sumaglla iuiag, mana subirbi imapipas kaskata. ³⁰ Nuka ima iachachiska, mana llaa iugu churaskasinami ka. Chiwanka, nukata iachaikuwaspaka, kam kikinkunapa almapi alli iuiachiriimi tarispa iukankangi-chi.

12

Warda punchamanda, Jesús iachachiskamanda

¹ Sug warda puncha, Jesús katiraiagkunawanta chagra tarpuraiaskakunapi ialinaturka. Katiraiagkunaka, iapa iarkaimanda kaspá, trigu ispigakunata pitispa, mikui kallarirkakuna. ² Chasa kawaspaka, sug fariseokuna Jesusta nirkakuna:

—Kawamui. Kamta katiraiagkuna, warda punchami pandarinakú.

³ Jesuska ainirkakunata:

—¿Manachu ñugpamanda librupi willaraiaskata kawarkangichi, taita David i paiwa kagkunapas, iarkaimanda kaspá, imasa ruragtakuna? ⁴ Pai kikin, Diospa wasi ukuma iaikuspa, altarpí churaska tandakuna tiaskata mikurka, mana imapas mancharispalla. Chi tandakuna, sasirdutikunalla mikudirumi karka. Ñi paiwa kagkunata ñi pitapas mana karadiru karkachu.

⁵ —Moisés ima rurangapa niskapi, ¿manachu kawarkangichi imasa willaraiaskata? Kasami niraiá: ianga punchasina sasirdutikuna warda puncha Diospa atun wasipi imasa niraiaskasina ruraika, mana pandarii niraianchu. ⁶ Kasami niikichita: kunaúra Diospa atun wasimandapas mas atunmi kaipi ka.

⁷ —Kasami ñugpamanda librupi niraiá:

Mana munanichu kamkuna, nukamanda animalkunata wafuchispa rupachipuangapa. Kamkuna sug runakunamanda llakispa kaugsanakungapami munani.

Chi willaraiaskapi allilla kawaspá iachaspaka, nukata katiraiawagkunamanda manami niwangichi: “Warda punchami pandarinakú”. ⁸ Kai Runa Tukuskaka pudinmi ninga, warda punchakunatapas imasa chaiaiskasina rurangapa.

⁹ Chimanda rispaka, paikuna tandariduru wasipi iaikugrirka. ¹⁰ Chipika sug maki chakiriska unguiwa kag runa, paikunawa sugllapi karka. Chiura, Jesusta tapurkakuna:

—Warda punchapas unguakunata aliachingapa, ¿pudirinchu u mana?—. Chasa tapuchinakurka, paimanda justisiakunapagma willagringapa.

Jesuska ainirkakunata:

¹¹—Kamkunapa ubija sanjapi urmaggpika, ¿manachu warda puncha kaggpipas surkuntran-gichi? ¹² Sug runaka, ubijamandapas mas balimi ka. Chimandami mana michá, warda punchakuna tukui alli rurangapa.

¹³ Chasa nispa, chi ungug runataka nirka:

—Maki chutachii.

Chasa chutachigllapi, chi makika aliarka, sug ladu makisina. ¹⁴ Chasa kawaspa fari-seokunaka, llugsispa, Jesusmanda rimanakui kallarirkakuna, imasapipas paita wañuchin-gapa.

¹⁵ Jesuska, chasa iachaspa, chimanda anchurirka. Achka runakunami paita katchina-kurka. Paika, tukui ungugkunatami ambispa sakirka. ¹⁶ Chasa ambispaka, nirkakunata:

—Nukamanda mana willanakungichi, nuka pi kagta.

¹⁷ Chasami Isaías suti Santu Ispirituwa rimag ima ñugpata willaskasina tukugsamurka. Kasami Isaías niska karka:

¹⁸ Kaimi ka nukapa lutrinsina, nuka imasa niskata rurag.

Paimi nuka agllaska i kuiaska kapuá.

Paita kawaspa, iapami alli iuiachiiwa kawani.

Nukapa Santu Ispiritutami paita karangapa kani.

Chiwanka, tukui alpamanda runakunatami pai willangapa ka, nuka imasa allilla justisian-gapa kagta.

¹⁹ Mana piwapas piñarispera kaparispera kangapa kanchu.

Ñi maipipas, pitapas mana kaparispera rimangapa kanchu.

²⁰ Wiru pakirikuskata mana pakichingapa kanchu.

Wañukugsina kusnikuska michuntapas mana wañuchingapa kanchu,

imaura tukuikunata sumaglla mandai chaiankama.

²¹ Paillatami tukui alpamanda runakuna suianakungapa ka.

Jesusta iaia kukupa iachaiwa kagta juchachinakuskamanda

²² Chi punchakunallatata, sug runata kuku waira iaikuska kagmandami Jesuspagma pusarkakuna. Chi runata kuku waira mana kawangapa i rimangapa ruragsamuska karka. Jesús ña ambiura, chi runa ikuti rimangapa i kawangapa allilla tukugsamurka. ²³ Chasa kawaspaka, achka chipi kagkuna, iapa ujnarisipami kikinpura tapurinakurka:

—Chi ambig runa, ¿manacha ñugpamanda taita Davidpa wambrakunapa wambra kantra?

²⁴ Fariseokunaka, chasa uiaspa, nirkakuna:

—Chi, Beelzebú suti iaia kukupa iachaiwami kuku wairakunata llugsichiku.

²⁵ Paikuna ima iuianakuskata iachaspa, Jesuska nirkakunata:

—Sug alpapi mandagpura piñachinakuspa makanakuspalla kaugsanakugpika, tukuimi waglliri. Sug paiblupi u wasipi piñanakuspalla kaugsanakugpika, mana allilla kangapa kanchu, sumaglla sugllapi kaugsanakungapa. ²⁶ Chasallata iaia kukuwa kagkuna iaia kukuwa kagkunata llugsichigpikunaka, kikinpura piñachirinakugsinami niraiantra. Chasa piñachirinakugpika, ¿manachu paipura mandai, chiuralla puchukarintra?

²⁷ —Beelzebupa iachaiwa nuka kuku wairakunata llugsichikugpika, kampurakunaka, ¿pipa iachaiwatak llugsichinkuna? Pai kikinkunami kawachingapa kankuna, imasa kamkuna mana allilla nukamanda iuiarispera ninakugta. ²⁸ Taita Diospa Ispirituwa nuka kuku wairakunata llugsichikugpika, sutipami Diospa suma mandai ña kamkunapagma chaiamurka.

²⁹ —Maikanpas sug wapu runapa wasima iaikuspa, ima iukaskata kichungapa munaspa, iukanmi ñugpa paita watanga. Mana kaggpika, manima kichungapa pudingapa kanchu.

³⁰ —Maikanpas mana nukawa suma iuiaiwa kagkuna, nukata piñawagmi kankuna. Chasallata, maikanpas nukawa mana suma tandachigkuna, tukuimi susuripuangapa kankunata.

³¹ —Chasamanda niikichitami: runakuna pandariskakunata i Taita Diosmanda iapa jiru mana uangasina rimaska pandariskakunata, tukuitami pasinsiai tia. Ikuti maikan Santu Ispiritumanda iapa jirukuna rimaskataka mana pasinsiai tiangapa kanchu. ³² Kasapasmi niikichita: maikan kai Runa Tukuskamanda kuntra rimagkunamanda pasinsiaimi tia. Chasa kaggpipas, maikan Santu Ispiritumanda kuntra rimagkunamanda ñi imaurapas mana pasinsiai tiangapa kanchu, ñi kai alpa luarpi ñi sug luarpi.

³³ —Sacha alli kagpi, miski mikudiru muiumi tukú. Sacha mana alli kaggpika, winja muiu mana mikudirumi tukú. Tukui sacha, muiukuna tiariurami rigsiri, alli u mana alli kagta.

³⁴ Kamkunaka, kulibrakunasinami mana alli runakuna kangichi. Kam kikinkuna mana alli iuiaikuna iukaspa, ¿imasatak alli rimaita iukankangichi? Iuiapai imasa iuianakuska-sinami simipi rimachigsamú.

³⁵ —Alli runakuna, alli iuiaikuna iukaspami allilla rimagsamunkuna. Ikuti mana alli runakunaka, mana alli iuiaikuna iukaspami mana allilla rimagsamunkuna. ³⁶ Kasami niikichita: Taita Dios justisiai rurangapa puncha chaiaura, tukui ianga rimaskatapas tapuchingapami ka. ³⁷ Chasa tapuchiura, kamkuna allilla rimaska kagpika, allimi niraiangapa kangichi. Mana allilla rimaska kagpika, justisiaimi tukungapa kangichi.

Mana kawaskasina kawachimui, Jesusta mañanakuskamanda

³⁸ Chiuraka Moisés ima niskata sug iachachig taitakuna i fariseokuna, Jesusta nirkakuna: —Iachachig taita, munanakunchimi: kam nukanchita mana imaurapas kawaskasinata kawachimui.

³⁹ Paika ainirka:

—Kamkuna Taita Diusta mana iuiarispá, mana allilla ruraspa kaugsanakuspami mañanawakungichi: “Mana imaurapas kawaskasinata kawachimui”. Ni imapas mana kamkuna munaskasina kawangapa kangichichu. Ñugpamanda Santu Ispirituwa rimag Jonás suti, imasami pasarka: chasallata kawarillami kawangapa kangichi. ⁴⁰ Imasami Jonás, kimsa puncha i kimsa tuta atun chalwapa wígsa ukupi karka: chasallatami kai Runa Tukuska, kimsa puncha i kimsa tuta alpa ukuma kangapa ka.

⁴¹ —Taita Dios justisiai rurangapa puncha chaiaura, Nineve puiblumanda kagkuna saiarispami kuna ramanda runakunata ningapa kankuna: “Mana allilla ruragkunami kangichi”. Chi Ninevemanda runakuna, Jonás ima willaskata uiaspaka, alli ruraikunamami tigrakakuna. Kai rimakugka, Jonasmandapas mas iachami ka.

⁴² —Chasallata, Taita Dios justisiai rurangapa puncha chaiauraka, Chaugpuncha suti alpata mandag warmipas saiarispami kuna ramanda runakunata ningapa kankunata: “Mana allilla ruragkunami kangichi”. Ñugpata chi warmi, iapa karu alpamandami samurka, atun mandag Salomonpa iapa iachaiwa rimakuskata uangapa. Kai rimakugka, Salomonmandapas mas iachami ka.

⁴³ —Maikan runamanda kuku waira llugsichii tukuskaka, tusta alpa kaskapi samaringapami maskaspa purirka. Ni maipi mana samaringapa tarispaka, ⁴⁴ iuiarirkami: “Maimandami nuka llugsimurkani: chimallatatami kutingapa kani”. Chi runapagma kutispa ikuti iaikugriura, chusa uku suma pichaska i allichiskasinami tarigrirka. ⁴⁵ Chasa kawaspaka, kanchis kuku wairakuna paimanda mas jiru ruradurkunata pusangapami rirka. Chi runapi iaikugrispa, chi kukukuna kaugsaimi kallarirkakuna. Chasaka chi runa, ñugpamandapas mas jiru mana allillami tukuii tukurka. Kai punchakuna mana allilla ruraspa kaugsanakugta chasallatami tukungapa kankuna.

Sutipa Jesupa familiakunamanda

⁴⁶ Jesús chara chipi kagkunata rimakunkamaka, paipa mama i waugkindikuna kancha ladu saiarigrirkakuna, paita rimangapa munaspa. ⁴⁷ Chiura sug runa, paita nigrirka:

—Uiamui. Kamba mama i waugkindikunami kanchapi suianakú, kamta rimangapa.

⁴⁸ Paika, chi runata ainirka:

—¿Pitak nukapa mama niraiá? ¿Pikunatak niraiankuna nukapa waugkikuna?

⁴⁹ Chasa nispa, paita katiraiagkunata makiwa kawachispa, nirkakunata:

—Kaikunami nukapa mama, nukapa waugkikuna kankuna. ⁵⁰ Nukapa Taita suma luarpi kag, pai imasa munaskasina maikanpas ruragmi nukapa waugki, nukapa pani, nukapa mama niraiá.

13

Tarpudur runamanda parlu

¹ Chi punchallatata Jesús, wasimanda llugsispa, kucha pata ladu tiarigrirka. ² Chiura iapa achka runakuna, paipagma chaiagrirkakuna. Chasa kawaspaka Jesuska, kanua ukuma iaikuspa, tiarirka. Tukui chipi kagkuna, iaku pata ladu saiarirkakuna. ³ Chiura Jesuska, iuiái apingasina achka suma parlukunawa iachachispa, kasami nirka:

—Sug runasi llugsirka, simillakunata sitaspa tarpungapa. ⁴ Tarpukuura, sug simillakunaka ñambipisi urmarkakuna. Chi simillakunataka, piskukunasi mikugsamurkakuna.

⁵ —Sug simillakunaka, rumilla tiaskapisi urmarkakuna, mailla alpa tiaskapi. Mana achka alpa tiagmanda, mana unaila wiñarirkakuna. ⁶ Nigpika, indi piaspa, rupachirka. Mana achka anguiug kaspaka, utkalla chakirirkakuna.

⁷ —Sug simillakunaka, ispina sachakuna tiaskapisi urmarkakuna. Nigpika, ispina sachá wiñarka, simillakunata kilpagta.

⁸ —Ikuti sug simillakunakar, suma alpapisi urmarkakuna. Chasaka, allilla pallarirkakuna. Sug simillamandalla, patsa patsasi pallarirka. Sugmandalla, sugta chungá sugta chungá; ikuti sugmandalla, kimsa chungá kimsa chungási pallarirka.

9—Rinri iukagkuna, nuka niskata uiawaspa, suma iuiaringichi.

Imapa Jesús, iui ai pingasina parlukunawa rimaskamanda

¹⁰ Chasa uiaspaka katiraiagkuna, Jesuspagma kaillaiaspa, tapurkakuna:

—¿Imapatak chasa parlukunallawa runakunata rimangi?

¹¹ Chiura Jesuska, kasa ainirka:

—Kamkunata niskami ka, Taita Dios imasa suma mandakuskasina kaskata ñi imaurapas mana iachaskata iachangapa. Ikuti paikunataka mana chasa lisinsiaska kanchu.

¹² Maikan achka iukagta masmi karangapa ka, puchugta. Maikan mailla iukaskataka tukuimi kichungapa ka. ¹³ Chimandami iui ai pingasina parlukunallawa paikunata rimani. Paikuna, kawanakuspapas, mana kawagsinami kankuna. Uianakuspapas, mana uiagsina kaspas, mana iui ai apinkunata. ¹⁴ Paikuna chasa kagmandami Isaiás imasa ñugpata willaskasina tukugsamú: Kasami niraiá:

Rinriwa uiaspapas, mana uiagsinami tukunkangichi.

Ñawiwa kawasppapas, mana kawagsinami tukunkangichi.

¹⁵ Kai runakunapa iui ai, iana tutapi kagsinami tukugsamurkakuna.

Rinri tapariskasinami tukugsamurkakuna.

Ñawi wichkaskasinami tukugsamurkakuna.

Chasaka paikuna, mana ñawiwa kawagsina, mana rinriwa uiagsina, mana iui ai iukagsinami tukungapa kankuna.

Mana munankuna, nukawa tigramungapa.

Tigramugpika, nukami ambintranikunata.

¹⁶ —Ikuti kamkunaka, ñawiwa sumaglla kawanakuspa, rinriwa allilla uiaspa kagmandami Taita Diospa iapa kuiaska kangichi. ¹⁷ Kasami nuka niikichita: ñugpamanda Santu Ispirituwa rimagkuna i alli runakuna, achkakunami, kunaura kamkuna kawanakuskata kawangapa munanakuspapas, mana kawarkakuna. Chasallata, kunaura kamkuna uianakuskata uiangapa munanakuspapas, manima uiarkakuna.

Tarpudur runamanda paru ima niraiagta, Jesús willaskamanda

¹⁸ —Kasa uiaichi, tarpug runamanda paru imasa niraiagta. ¹⁹ Dios imasa suma mandakuskasina rimaita maikan uiaspapas, mana iui ai allilla apiskataka, chi uiaskata iai a kukuka tukuimi kichugsamú. Chasami ñambipi similla urmagkuna niraiá.

²⁰ —Similla rumilla tiaskapi urmagka, sug runa Diospa Rimaita uiagsinami niraiá. Chi uangallawaka, alli iui achiiwami chaskinkuna. ²¹ Nispaka, imasami chi mana achka anguiug simillakuna tukú: chasallata sug ratullami Taita Dioswa iui arispa kankuna. Ima Diospa Rimaimanda unzagpikunaka, llakiimi apigsamú. Chiuramanda, mana mas Taita Dioswa iui aringapa munankunachu.

²² —Similla ispinasachakuna tiaskapi urmagka, sug runa Diospa Rimaita uiagsinami niraiá. Uiaspapas, kai alpapi tiaskakunallawa sumaglla kaugsangapami iui arinkuna, mas achka iukag tukungapa. Chasaka, Diospa Rimaita tukuimi kungarinkuna. Ñi ima mana pallangapa tiaringasinami tukunkuna.

²³ —Similla suma alpapi urmagkar, sug runa, Diospa Rimaita sumaglla uiaspa, iui ai apiginami niraiá. Chi runakunapimi niraiá, suma alpapi similla urmaskamanda, achka suma pallai tukungapa. Imasami sug simillamandalla patsa patsa u sugta chungasugta chungasugta u kimsa chungasugta kimsa chungasugta pallari: chasallatami paikuna, Taita Diosmanda allilla ruraskunawa achka pallarigsina tukunkuna.

Mana alli ugsa, trigu chagrapi susuchigsamuskamanda paru

²⁴ Kai iui ai pingasina suma parlutapas, Jesús iachachirkakunata:

—Suma luarmanda mandai, kasami niraiá. Sug runa, paipa chagrapi alli simillasi tarpurka. ²⁵ Nigpika, tukuikuna puñunakunkama, paiwa mana munag runa chagrapi iai kurka. Chi runaka, mana alli ugsa, trigu chaugpipi susuchispasi rirka.

²⁶ —Trigu ña wiñaspa, granu kawarigsamuuraka, mana alli ugsapas chapu wiñaska kawarigsamurka. ²⁷ Chasa kawasppapa piunkuna, chagraiugpagma rispa, tapugrirkakuna: “Taita waugki, ¿manachu kam, alli similla tarpurkangi? ¿Maimandasik mana alli ugsa llugsirirka?”.

²⁸ —Chiura, paika ainirka: “Mana nukata munawag, chi runami chasa rurawaska kangapa ka”.

—Chasa uiaspaka, piunkuna nirkakuna: “Kam munagpika, nukanchi chi ugsata surkugrisunchimi”.

²⁹ —Chiura, paika ainirka: “Manima. Ugsata surkugpika, trigutapasmi surkunkangichi.

³⁰ Ianga kawaichi, iskandi wiñachukuna killui ankama, pallai puncha chai ankama. Chi

punchaka, pallagkunatami nisa: ‘Ñugpa, mana alli ugsata tandachiichi. Wangu rurangichi, ninapi rupachingapa. Triguta tandachispaka, nukapa trujapi churapuangichi.’”

Mustasa simillamanda parlu

³¹ Kai iuiiai apingasina suma parlutapas, Jesús nirkakunata:
–Suma luarmanda mandai, kasami niraiá. Sug runa, paipa chagrapi mustasa similla tarpugsinami niraiá. ³² Chi simillaka, tukuikunamandapas mas uchullami ka. Ña wiñai puchukauraka, tukui mikui chagrapi tiaskakunamandapas mas atunmi tukú. Sug puntu uchulla sachasinami tukú. Chasapika piskukunapas, malkikunapi sumagllami wasichig-samunkuna.

Libaduramanda parlu

³³ Kai iuiiai apingasina suma parlutapas, Jesús nirkakunata:
–Suma luarmanda mandai, kasami niraiá. Imasami sug warmi, kimsa tasa arinata libadurawa chapuuraka, suma timbuspa, miraspa achkaiagsamú: chasami niraiá.
³⁴ Chasami Jesús, iuiiai apingasina suma parlukunawa runakunata rimadur karka. Suma parlukunallowami tukui iachachidur karka. ³⁵ Imasami Santu Ispirituwa ñugpata willaska karka: chasami tukugsamurka. Kasami niska karka:
Iuiiai apingasina suma parlukunawami rimasa.
Kai alpa tiagsamuuramandata, mana pipas iachaskatami willasa.

Mana alli ugsa, chagrapi susuchigsamuskamanda parlu ima niraiagta, Jesús willaskamanda

³⁶ Chiuramanda Jesús, chi runakunata: “Kaiakama” nispaka, wasima rirka. Chiura paita katiraiagkunaka, kaillaiaspa, nirkakuna:
–Nukanchita willai: mana alli ugsa chagrapi susuchigsamuskamanda parlu, ¿imatak niraiá?

³⁷ Chiura Jesuska, kasami ainirka:
–Alli similla tarpug runa, kai Runa Tukuska nuka kagtami niraiá. ³⁸ Chagraka, kai alpami niraiá. Alli simillaka, suma luarmanda mandaiwa kag runakunami niraiá. Mana alli ugsaka, runakunallatata iaia kukuwa iuiagkunami niraiá. ³⁹ Chagraiugta mana munaspa mana alli ugsa susuchig runaka, kikin iaia kukumi niraiá. Pallai punchaka, kai luarpi alpa puchukaringapa punchami niraiá. Pallagkunaka, anjilkunami niraiá.
⁴⁰ –Imasami mana alli ugsata tandachispa, ninapi rupachingapa chaiá: chasallatatami kai luarpi alpa puchukarii puncha tungungapa ka. ⁴¹ Kai Runa Tukuskami paipa anjilkunata kachamungapa ka. Paikunami, tukui mana allilla ruraskakunata i ima jiru pandarikunapipas urmachigkunata nuka suma mandakuskamanda llugsichingapa kankuna.
⁴² Nispaka, iapa atun nina rupakuskamami sitangapa kankuna. Chipi, iapa llakispa, wakaspa, kiru mukuspami kangapa kankuna. ⁴³ Allilla ruraska kagkunaka, sumaiachiska kaspami, paikunapa Taita Dios suma mandakuskapi indisina punchaiagrangapa kankuna. Rinri iukagkuna, nuka niskata uiawaspa, suma iuiaringichi.

Achka kuri kulki alpa ukuma pambaska tiaskamanda parlu

⁴⁴ Kasapasmi Jesús nirkakunata:
–Suma luarmanda mandai, achka kuri kulki alpa ukuma pambaska tiaskasinami niraiá. Chi kuri kulkita, sug runa tarispaka, chillapita pakaspasi sakirka. Nispaka, iapa kuntintarispaka rirka. Tukui ima iukaskata katuspa, chi alpatasi randirka.

Iapa bali pirlamanda parlu

⁴⁵ –Suma luarmanda mandai, sug iapa bali pirlasinami niraiá. Sug suma pirlakuna randispa purig runa, ⁴⁶ chi pirla iapa bali kagmanda kawaspaka, tukui pai ima iukaskatapas katuspasi chi pirlata randigrirka.

Ataraiamanda parlu

⁴⁷ –Ikuti suma luarmanda mandai, ataraia atun kucha iaku ukupi sitagsinami niraiá. Chi ataraiawa imasa tiaska chalwakunami apirinkuna. ⁴⁸ Ña chalwa jundagta apiskakunata patama llugsichispa, tiarispaka, alli chalwakunata agllaspa, saporukunapimi wakachinkuna. Ikuti mana allikunataka sitankunami.

⁴⁹ –Chasallatami kai luarpi alpa puchukaringapa puncha, anjilkuna samuspa, mana alli runakunata alli runakunapa ladumanda anchuchigsamungapa kankuna. ⁵⁰ Nispaka, iapa atun nina rupakuskapimi sitangapa kankuna. Chipi, iapa llakispa, wakaspa, kiru mukuspami kangapa kankuna.

Iapa bali musu i maugkakunamanda parlu

⁵¹ Chasa nispaka, Jesús tapurkakunata:
–Nuka kamkunata tukui ima rimaska, ¿ñachu iuiaringichi ima niraiagta?

—Ari— ainirkakuna.

⁵² Chiura, Jesuska nirkakunata:

—Maikan ñugpata Moisés ima niskata iachachig taita, chasallata suma luarmanda mandaiwa niraiagta iachaikugkunaka, kasami niraiá. Imasami sug runa, wakachiska tiaskata iapa bali musu i maugkakunatapas surkú, sugkunata aidangapa: chasallatami kunauramanda i ñugpamanda Alli Willaita iachachingapa ka.

Nazaret puiblupi, Jesús kaskamanda

⁵³ Jesús chi parlukunata iachachii puchukaskamandaka, llugsispa, kikinpa puibluma rirka. ⁵⁴ Paipagma chaiagrispaka, tandariduru wasima iaiikuspa, iachachii kallarrirka. Paita uiaspa, iapa ujnarispa, kasa kikinpara tapurinakurka:

—Kai runa, ¿imawasik chituku suma iachaiwa tukurka? ¿Imawasik chituku mana imaurapas kawaskasina rurai pudí? ⁵⁵ ¿Manachu ka karpintirupa wambra? ¿Manachu paipa mama, María suti ka? ¿Manachu Santiago, José, Simón i Judaspa waugkindi ka? ⁵⁶ ¿Manachu tukui paipa panindikunapas, nukanchiwa kankuna? ¿Maipisik chituku iachaikugrirka?—.

⁵⁷ Chasa nispaka, Jesusta mana munarkakuna, pai ima iachachikuskata uangapa.

Mana uiagmandakuna, Jesuska kasami nirkakunata:

—Santu Ispirituwa rimagtaka sugnigta puriskapi sumaglla kuiaspami uiankuna. Ikuti kikinpa alpapi, kikinpa wasipi, ñi pi mana munankunachu uangapa.

⁵⁸ Chi runakuna mana paita suma uiagmanda, Jesús chi puiblupi mana achka milagrukuna rurarka.

14

Juan Bautista imasa wañuchii tukuskamanda

¹ Chi punchakuna mandag Herodes, Jesusmanda iachagsamurka. ² Chasa iachaspaka, paiwa kagkunata nirka:

—Chimi kangapa ka Juan Bautista. Wañuspaka, ikuti kaugariskami kangapa ka. Chimandami mana imaurapas kawaskasina ruraspapuriku.

³ Manara Jesusmanda iacharigpi, Herodes, Juanta apichispa, wataspa, karsilpisi churarka. Erodias suti warmipa kaugsasi chasa rurarka. Chi warmi karkasi Felipepa warmi. Chi Felipe, Herodespa waugkisi karka. Chi warmika, Herodeswasi kaugsakurka. ⁴ Chimandasi Juanka, Herodesta piñaspa nikurka: “Kamta michanmi, chi warmiwa kaugsakungapa”. ⁵ Chasa piñakugmanda Herodes, Juanta wañuchingapasi munakurka. Nigpika, chi alpapi kaugsanakuska runakunata manchai iukarka. Chi runakuna, Juanmanda ninakurka: “Santu Ispirituwa rimagmi ka”.

⁶ Herodes tiagsamuska puncha chaiauraka, pai kunbidaspapapiasi rurakurka. Chipika, Erodiaspa sipas warmi wambra, iapa sumasi bailarka. Chasa bailagmanda, Herodesta iapasi sumarka. ⁷ Chiura paika, sipasta nirka:

—Diuspa ñawipimi niiki: kam ima mañawaskami karasaki.

⁸ Chasa uiaspaka, mamandita willagirka. Mamandi nirka:

—Juan Bautistapa umata platupi mañai—. Chiwanka, Herodesta chasa mañagirka.

⁹ Mana pai iuiakuskasina mañagmanda, iapasi llakirigsamurka. Kikin, Taita Diuspa ñawipi niskata paiwa kagkuna uianakugmanda, iukarka ninga:

—Ari—. ¹⁰ Chasa nispaka, sug suldaduta karsilmasi kacharka. Juanta uma anchuchigrispaka, ¹¹ platupi apaspa, sipastasi kuagirka. Sipas, chaskispa, mamanditasi kuagirka.

¹² Juanwa purigkuna, chasa pasarigta iachaspaka, kuirputa apagrispa, pambagirrakuna. Nispaka, Jesusta willagirrakuna.

Pichka waranga runakunata, Jesús mikungapa karaskamanda

¹³ Juanmanda chasa uiaspaka, Jesús, maikan runapas mana kaugsanakuska alpama kanuapi rirka, sapalla kangapa. Chasa iachaspaka achka runakuna, chi puiblu suiumanda chakiwa pai kaskama rirkakuna. ¹⁴ Jesús kanuamanda llugsiura, iapa achka runakuna kawarirka. Paikunata kwaspa, suma llakirigsamurka. Paikunawa ungug kaskakunatami ambirka.

¹⁵ Ña chisiakuuraka, Jesusta katiraiagkuna, kaillaiaspa, nirkakuna:

—Kai suiu, ñi pipas mana kaugsanakunchu. Ñami chisi ka. Kai runakunata puiblukunama kachai, mikui randispa mikuchukuna.

¹⁶ Jesuska nirkakunata:

—Mana chianchu, paikuna ringapa. Kamkuna, paikunata mikui karaichi.

¹⁷ Paikunaka ainirkakuna:

—Pichka tanda i iskai chalwallami kaipi tia.

¹⁸ Chiura, Jesuska nirka:

—Apamuwaichi.

¹⁹ Nispaka, chipi kagkunata nirka:

—Ugsapi tiariichi.

Tiariura, chi pichka tandata i iskai chalwata charirispa, awasinama kawaspa, “Pai Sifur” Taita Diusta nirka. Tandakunata pitichispaka, katiraiagkunata kuaspa richirka. Chiura, tukuikunata karaspa aparkakuna.

²⁰ Tukuikunami sagsagta mikurkakuna. Nispaka, chungu iskai saparu junda piti pitikuna tandachirkakuna. ²¹ Mai pichka waranga karikunami mikurkakuna, warmi i wambrakunata mana kuintaspalla.

Iaku kuchapi, Jesús chakiwa saruspa awalla puriskamanda

²² Chiuralla Jesuska, paita katiraiagkunata nirka:

—Kanuama iaikuichi. Sug ladu chimba ialiiichi. Nukaka, kai tukui runakunata: “Kaia-kama” nispa, kachasakunata—. ²³ Chi runakunata kachaspaka, sug lumama rirka, sapalla, paipa Taita Diuswa rimanakungapa. Chi tutaka Jesús, sapalla chi lumapi karka. ²⁴ Katiraiagkunaka, ña karupi alpamanda rinakurka. Iapa sinchi waira, ñugpagnigmanda pukurka. Chiwanka, kanuata awapi urapi iaku apakurka.

²⁵ Ña pakaringama Jesús, chi iakupi awalla chakiwa saruspa saruspa, paikunapagma ña chaiakugrirka. ²⁶ Paikunaka, chasa iakupi saruspa awalla rikugta kawaspa, iapa mancharispa, nirkakuna:

—Sug wairachar ka—. Iapa mancharispami kaparirkakuna.

²⁷ Kaparigllapi, Jesuska nirkakunata:

—Sinchi iuiaichi. Nukami kani. Mana manchanakuichi.

²⁸ Chiura, Pedroka nirka:

—Kam kikin Taita Jesús kagpika, niwai, nukapas iakupi chakiwa kambagma ringapa.

²⁹ —Samui— Jesús nirka.

Chasa niura Pedroka, kanuamanda llugsispa, chakiwa iakupi rii kallariirka Jesuspagma. ³⁰ Chasa rikuura, sinchi waira piakugmanda, iapa mancharirka. Nispaka, rikuska iaku ukuma jundarii kallarispa, kaparirka:

—Taita waugki, kispichiwai.

³¹ Kaparigllapi Jesuska, maki suniaspa, Pedrota apispa, kasami nirka:

—Kam, ¿imapatak nukamanda mana mas suma allilla iuiaringi?

³² Paikuna ña kanuama iaikugriuraka, waira kasillaiagsamurka. ³³ Kanuapi kagkunaka, Jesusta kungurispa, nirkakuna:

—Kam sutipami Taita Diuspa wambra kangi.

Jenesaret alpapi, Jesús ungugkunata ambiskamanda

³⁴ Kucha ialispaka, sug ladu chimba Jenesaret suti alpama chaiagrirkakuna. ³⁵ Chi-manda runakunaka, Jesusta rigsispa, tukuima parlu willarkakuna. Chasa iachaspakunaka, tukui ungugkunata paipagma aparkakuna. ³⁶ Chaiagrispaka, ungugkuna paita mañarkakuna:

—Kamba katanga puntallapas sakiwai llamkangapa—. Chiwanka, tukui llamkagkuna ambirigsamurkakuna.

15

Runakunapa sungumanda jiru iuiaikuna llugsiskami Diuspa ñawipi mapa niraiá

¹ Chiuramanda sug fariseokuna i Moisés ima niskata iachachig taitakuna, Jerusalen-manda chaiagrirkakuna. Nispaka, Jesuspagma kaillaiaspa, kasa tapurkakuna:

² —Kamta katiraiagkuna, ¿imapatak ñugpamandakuna imasa iachachiskasina mana ruraspaka kaugsanakú? Mana maki maillarispallami mikunakú.

³ Jesuska nirkakunata:

—Kamkunaka, ¿imapatak Taita Dius ima niskata mana rurangichi? Ñugpamandakuna iachachiskallata ruraspami kaugsanakungichi. ⁴ Taita Diuska, kasami nirka: “Kamba taitata mamandita sumaglla kuiangi”. Kasapasmu nirka: “Maikanpas taitata i mamata kamigpika, chitaka chaianmi wañuchingapa”. ⁵ Ikuti kamkunaka, kasami iachachigichi, maikanpa taitata u mamata ningapa: “Nuka mana puidiikichitachu aidangapa. Tukui nuka ima iukaska, Taita Diusta karaskami niraiá”. ⁶ Kamkuna chasa nispa iachachinakungichi, taitata i mamata mana kuiaspa uiangapa. Chasa iachachispa, Diuspa Rimaitaka wabutingichimi. Kamkunapura ñugpamanda iachachiskallatami ruraspaka kaugsangapa munangichi.

⁷ —¡Miski simi, sungu awalla rimagkuna! Kamkunamandami ñugpata rimag Isaías suti, Santu Ispirituwa kasa sutipa nirka:

⁸ Kai alpapi kaugsagkuna,

sungu awalla rimaspami kuiawankuna.

Ikuti paikuna sungupi iuiaiwaka nukamanda sugpimi iuianakú.

⁹ Iangami nukata kunguriwagsina rurankuna.

Nuka niskata iachachingataka, runapura imasa rurangapa niskallatami iachachinkuna.

¹⁰ Chasa nispa, tukui chipi kagkunataka pai kaskama kaiaspa, Jesús nirkakunata:

—Suma iuiarispa uiawaichi. ¹¹ Runakuna ima mikuskaka, Diuspa ñawipi ñi ima mana mapasina niraianchu. Runakunapa sungumanda jiru iuiaikuna llugsiskami mapa niraiá.

¹² Chiuramanda Jesusta katiraiagkuna, kaillaiaspa, paita tapurkakuna:

—¿Ñachu iachangi, fariseokuna, kam chasa rimaskamanda sungu nanagta uiagtakuna?

¹³ Chiura, Jesuska ainirka:

—Maikan sachapas, nukapa Taita suma luarpi kag mana tarpuska kagpika, angundi pilaimi tukungapa ka. ¹⁴ Chi fariseokunata ianga kawaichi. Mana ñawi kawag, sug mana ñawi kawagta pusagmi niraiankuna. Chasaka, iskandikunami pusuma urmagingrapa kankuna.

¹⁵ Chiuraka, Pedro nirka:

—Kam ima iachachikuskata nukanchita allilla willai.

¹⁶ Chiura, Jesuska ainirkakunata:

—Kamkunapas, nukawa kaspa, ¿manarachu iachaikungichi ima niraiagta? ¹⁷ ¿Manachu iachangichi, ima mikuskapas, wigsama iaikuspa, wigsamandaka kanchama llugsigta?

¹⁸ Sungumanda jiru iuiaikuna llugsiskami Diuspa ñawipi mapa niraiá. ¹⁹ Sungumandami jiru iuiaikuna llugsi, kasa pandaringapa: wañuchingapa, sugpa warmiwa u sapalla warmiwa siriringapa, sisangapa, sugkunamanda llullaspa rimangapa, Taita Diustapas kamingapa. ²⁰ Chasa pandariikunami Diuspa ñawipi mapa niraiá. Mana maki maillarispalla mikugkunataka, Diuspa ñawipi ñi ima mana mapasina niraianchu.

Mana judíu kag warmipa wambrata, Jesús ambiskamanda

²¹ Chimanda llugsispa, Jesuska Tiro i Sidón suti puiblukuna suiu rirka. ²² Chiuraka sug warmi, chi Kanaán suti alpamanda paipagma kaillaiaspa, kasa nispa kaparirka:

—Davidpa wambra Iaia Jesús, nukamanda llakiripuai. Nukapa warmi wambrata kuku waira iaikuspami iapa nanachipuaku.

²³ Jesuska, mana imapas ainirka. Nigpika katiraiagkuna, paipagma kaillaiaspa, nirka-kuna:

—Chi warmita, ¿imapatak mana paipagma kachangi? Iapami kaparispa kaparispa kati-chimuku.

²⁴ Jesús ainirkakunata:

—Israelmanda runakuna chingaska ubijakunasina kaskamandallami nuka kachamuska kani.

²⁵ Chiura chi warmika, Jesusta kungurispa, nirka:

—Taita turi, nuka mañakuskata aidawai.

²⁶ Chiura, Jesuska ainirka:

—Mana chaianchu, wambrakunapa tandata kichuspa, alkukunata sitapungapa.

²⁷ Chiura, chi warmika nirka:

—Ari, taita turi. Alkukunapa duiñukuna mikunakuskapi, misa ukuma piti urmaskakunata, paikunapas mikunkunami.

²⁸ Chasa uiaspa, Jesuska paita nirka:

—Iapa sumami nukamanda iuiarkangi. Kam imasa iuiakuskasina, allilla tukuchu.

Chiurallami chi warmipa wambra ambirigsamurka.

Achka ungugkunata, Jesús ambiskamanda

²⁹ Chimanda llugsispaka Jesús, Galilea kucha patama rirka. Chimandaka, awa lumama sikaspa, tiarigrirka. ³⁰ Iapa achka runakuna, ungugkunata apaspa, pai kaskama chaigrirkakuna. Mana purii pudigkunata, maki u chaki illa kaskakunata, mana ñawi kawangapa pudiskakunata i mana rimai iukaskakunata Jesuspa chaki ladu churagrirkakuna. Chiura Jesuska, tukuikunatami ambirka. ³¹ Chasaka, mana rimai iukaskakuna rimagsamurkakuna. Maki i chaki illa kaskakunapas, allillami tukugsamurkakuna. Mana purii pudigkunapas purigsamurkakuna. Mana ñawi kawangapa pudigkunapas kawagsamurkakuna. Chasa kawaspaka, chipi kagkuna ujnarispa nirkakuna:

—Israelmanda runakunapa Taita Dius, iapa suma atunmi ka.

Iskai biajima, Jesús tandakunata achkaiachiskamanda

³² Chiuramanda Jesuska, katiraiagkunata kaiaspa, nirkakunata:

—Kai tukui runakuna, ña kimsa punchami nukawa kaipi kankuna. Paikuna ñi ima mana mikungapa iukagmanda, nukata iapami llakiriwagsamú. Mana munanichu, paikunata

mana mikui karaspalla kikinunapagma kachangapa. ¡Amalai ñambi rikuskallapi diarkai sambaiaspa urmagrintrakuna!

³³ Katiraiagkuna ainirkakuna:

—Kai maikan runapas mana kaugsanakuskapi, ¿maipitak chituku achka tanda randisunchi, kai tukui runakunata karangapa?

³⁴ Jesuska tapurkakunata:

—¿Maituku tandatak tiapungichita?

Chiura ainirkakuna:

—Kanchis tandallami tia, sug uchulla chalwakunapas.

³⁵ Chasa uiaspa Jesuska, chipi kagkunata nirka:

—Alpapi tiariichi—. ³⁶ Nispaka, chi kanchis tandata i chalwakunata charirispa, “Pai Siñur” Taita Diusta nirka. Chiuralla pitichispa, katiraiagkunata kuaspa richirka. Paikunaka, tukui kunami karaspa aparkakuna.

³⁷ Tukuikunami sagsagta mikurkakuna. Nispaka, kanchis saparu junda piti pitikuna tandachirkakuna. ³⁸ Mai chusku waranga karikunami mikurkakuna, warmi i wambra-kunata mana kuintaspalla.

³⁹ Chiuramanda Jesús, chi runakunata: “Kaiakama” nispaka, kanuama iaikurka. Chi-mandaka, Magadán suti alpama rirka.

16

Mana kawaskasina kawachimui, Jesusta mañanakuskamanda

¹ Fariseokuna i saduseokuna, kaillaiagrispa, Jesusta mañanakurka, mana imaurapas kawaskasina awa luarmanda kawachingapa; chasaka, paimanda iachangapa, sutipa Taita Dios kachamuska kagta.

² Jesuska ainirkakunata:

—Kamkuna, ¿manachu ningichi: “Chisima puka puii kawarigpika, kaia alli punchami kangapa ka”? ³ Chasallata, tutata amsa puka puii pakarigpika, ¿manachu ningichi: “Tamia punchami kangapa ka”? Imasa awapi kawariskakunata kawaspaka, iachangichimi ninga, punchakuna imasa kangapa kagta. Ikuti, kai punchakuna nuka ima rurakuskata kawaspapas, mana iuiaringichichu ima pasarikugta. ⁴ Taita Diusta mana iuiarispa, mana allilla ruraspa kaugsanakuspami mañawanakungichi: “Mana kawaskasina kawachimui”. Ñi imapas mana kamkuna munaskasina kawangapa kangichichu. Ñugpamanda Santu Ispirituwa rimag Jonás suti, imasami pasarka: chasallata kawarillami kawangapa kangichi.

Chasa nispaka, paikunata sakispa, kucha sug ladu chimba katiraiagkunawa rirka. ⁵ Katiraiagkuna kungariska karkakuna, tanda apangapa. ⁶ Chiura, Jesuska nirkakunata:

—Suma iuiarispa uiawaichi. Fariseokunapa i saduseokunapa libadurasina iuiaita, ¡ujalallapas iuianakungichi!

⁷ Chasa uiaspaka, kikinpura rimarinakurka, iuiaspa:

—Tanda mana apamuskamandami chasa nukanchita niku.

⁸ Chi rimanakuskata uiaspa, Jesuska nirka:

—¿Imapatak ninakungichi: “Tanda mana apamuskamandami chasa nukanchita niku”? Nukamandaka, ¿imapatak mana mas suma allilla iuiaringichi? ⁹ ¿Imawantak, uiawas-papas, kamkunapa umapika manara iaikú? Nuka pichka tandata pitichiuraka, pichka waranga runakuna mikurkakuna; chi puchuskakunataka, ¿manachu iuiaringichi, maituku saparu junda tandachigtakuna? ¹⁰ Chasallata, nuka kanchis tandata pitichiuraka, chusku waranga runakuna mikurkakuna; chi puchuskakunataka, ¿manachu iuiaringichi, maituku saparu junda tandachigtakuna? ¹¹ ¿Imapatak mana iuiaringichi, nukaka tandamandalla mana kamkunata rimakugta? Fariseokunapa i saduseokunapa libadurasina iuiaita, ¡ujalallapas iuiangichi!

¹² Chasa niuraka, iuiai apirkakunata, mana tanda libaduramanda rimakuska kagta; fari-seokunapa i saduseokunapa iachachiikunata kuidadu iukangapa niraiagta.

Kam, Dios agllaska Cristomi kang, Pedro Jesusta niskamanda

¹³ Jesús, Filipopa Sesarea suti alpama chaiagrispaka, paita katiraiagkunata tapurka:

—Runakunaka kai Runa Tukuskamanda, ¿pitak kagta ninkuna?

¹⁴ Paikunaka ainirkakuna:

—Maikankuna ninkunami: kam kangisi Juan Bautista. Sugkunaka: kam ñugpamanda rimag Elías; ikuti sugkunaka: Jeremías u Santu Ispirituwa sug ñugpata rimagsi kang.

¹⁵ Chiura, Jesús tapurkakunata:

—Kamkunaka nukamanda, ¿pi kagtatak niwangichi?

¹⁶ Chasa tapuura, Simón Pedroka ainirka:

—Kam kangimi kaugsag Diospa wambra. Pai agllaska Cristomi kang.

¹⁷ Chiura, Jesuska nirka:

—Kam Jonaspa wambra Simón, Taita Diospa iapa kuiaskami kangí. Ñi maikan runapas, kamta mana iuiachirkachu, chasa ainingapa. Nukapa Taita suma luarpi kagmi kamta chasa iuiachirka. ¹⁸ Nuka kamtami niiki: kam, Pedro u rumimi niraiangi. Kai atun rumipi wasichigsinami iglesia tukuskakunata mirachingapa kani. Chitaka, maituku infirnumanda puchukangapa munanakugpipas, mana puchukai pudingapa kankunachu.

¹⁹ —Suma luarma iaikugridiru llabikunatami kuangapa kaiki. Maikan pandariskakunata, kam kai alpapi mana pasinsiaska nigpika, sug luarpipas chasallatami tukungapa kankuna. Chasallata, maikan pandariskakunata kam kai alpapi pasinsiaskaka, sug luarpipas chasallatami pasinsiai tukungapa kankuna.

²⁰ Chasa nispaka, katiraiagkunata nirka:

—Mana pitapas willanakungichi, nuka, Taita Dios agllaska Cristo kagta.

Jesús imasa wañungapa kagta, pai musuglla willaskamanda

²¹ Chiuramanda Jesuska, paita katiraiagkunata iachachii kallarirka, kasa nispá:

—Nukata, Jerusalem ringapami chaiawaku. Chipika, iaia sasirdutikuna, Moisés ima niskata iachachig taitakuna i sug taitakunapas iapa llakii i nanaimi pasachiwangapa kankuna. Nukata wañuchiwangapami kankuna. Chasa wañuska kaspapas, kimsa punchapika ikutimi kaugsaringapa kani.

²² Chasa uiaspaka Pedroka, Jesús sapallata mana uianakuskama pusaspá, kasa piñagsina nii kallarirka:

—¡Ujalallapas Taita Dios chasa munachu, taita waugki! Chasa llakiikuna, mana imaupas kamta pasaringapa kanchu.

²³ Chiura Jesuska, tigrarispa, Pedrota nirka:

—Nukapa ladumanda, iaia kuku, anchurii. Kam chasa niwaspaka, pandachiwangapami munakungi. Kam mana iuiakungichu Taita Dios imasa iuiakuskasina. Runakunapa iuiailawami chasa iuiakungi.

²⁴ Chasa nispaka, katiraiagkunata nirka:

—Maikan nukata katiraiawangapa munagka, kikinmanda kungarichu. Paipa krusta markarigsina ruraspami iuká katiraiawanga. ²⁵ Maikan kikinpa kaugsaita kispichingapaglla iuiakugpika, kikinmi puchukaringapa ka. Ikuti maikanpas nukamanda wañuchii tukugpika, mana mas wañui kaugsaitami taringapa ka.

²⁶ —Sug runa, tukui kai alpapi ima munaska iukagpipas, paipa almata mana kispichigpika, chi iukaskakuna, ñi imapa mana balipungapa kanchu. Chi runaka, paipa almata chingachispaka, ¿imawatak pudingapa ka, ikuti taringapa? Ñi imawapas manima.

²⁷ —Kai Runa Tukuska samuura, nukapa Taita suma atuniachiskawami nukapa anjil-kunawa samungapa ka. Samuspaka, tukuikunatami imasa allilla u mana allilla ruraskakunata kawachigsamungapa kani.

²⁸ —Kasami nuka niikichita: maikan kaipi kagkuna manara wañugkuna, kai Runa Tukuska suma mandaiwa samugtami kawawangapa kankuna.

17

Jesús, sug rigcha kawari tukugsamuskamanda

¹ Chiuramanda sugta punchapika, Jesuska, Pedrota, Santiagota i waugkindi Juanta pusaspá, sug awa lumama paikunallawa sikagrirka. ² Chipi chaiagrispaka, paikuna kwanakugllapi, sug rigcha kawari tukugsamurka. Paipa ñawi, indisina punchami tukugsamurka. Paipa katangapas, iapa iura punchallami tukugsamurka.

³ Kawanakugllapi, Moisés i Elías kawarigsamurkakuna. Chi runakunaka, Jesuswa rimanakui kallarirkakuna. ⁴ Chasa kawaspaka Pedroka, Jesusta kasa nirka:

—Taita waugki, kaipi iapa alli iuiachimi kanchi. Kam munagpika, kimsa tambu kaipi rurasá: kammanda sug, Moisesmanda sug, sugka Eliasmanda.

⁵ Chasa Pedro rimakunkama, puncha puiulla, paikunata kilpagsamurka. Chi puii ukumanda, sug rimagta uarigsamurka, kasa nispá:

—Kai, nukapa kuiaska wambrami kapuá. Paita kwaspa, iapa alli sumami iuiachiiwa kawani. Paita uiapuungichi.

⁶ Chasa uiaspaka chi katiraiagkuna, askurinti mancharispa, umata alpama kumurirkakuna. ⁷ Chiuramanda Jesús kikin, kaillaiaspa, paikunata llamkaspá, nirka:

—Atariichi. Mana manchanakuichi.

⁸ Paikuna uma atarichispa kawaura, Jesuska ikuti sapalla kawarigsamurkakunata; sug-kunaka manima.

⁹ Chi lumamanda uraikunakuuraka, Jesuska nirkakunata:

—Kamkuna ima kawaskata mana pitapas willanakungichi. Kai Runa Tukuska wañuspa kaugsariskauramandami chasa kawaskata willankungichi.

¹⁰ Chiura katiraiagkuna, paita tapurkakuna:

—Nigpi, ¿imapatak Moisés ima niskata iachachig taitakuna ninkuna: “Eliastami chaiaku, Taita Dios agllaska Cristopa ñugpa samungapa”?

¹¹ Chiura, Jesuska ainirkakunata:

—Sutipami Elías ñugpa samungapa ka. Tukuimi allichigsamungapa ka. ¹² Chasa samungapa kagpipas, nukaka kasami niikichita: Elías ñami samurka. Paitaka mana rigsirkakunachu pi kagta. Imasa munaskasinami paita mana allilla rurarkakuna. Kai Runa Tukuskatapas chasallatami rurawangapa kankuna.

¹³ Chasa uaspaka, katiraiagkunata iuiarirka: “Juan Bautistamandami chasa rimakuska”.

Sug wambra wañui ungui iukaskata, Jesús aliachiskamanda

¹⁴ Paikuna iapa achka runakunapagma chaiagriuraka, sug runaka, kaillaiaspa, Jesusta kungurisp nirka:

¹⁵ —Taita waugki, nukapa wambramanda llakiripuai. Wañui unguiwa iapa llakingasinami kapuá. Ninapi i iakupi achka biajimi urmapuá. ¹⁶ Chimandami kamta katiraiagkunapagma apamuspa kawachirkani. Nigpika, paikuna manima ambipuangapa pudirkakunachu.

¹⁷ Jesuska ainirka:

—¡Ai, kam mana alli runakuna, Taita Dioswa ñi ima mana iuiagkunami kangichi! ¿Imaurakamatak kamkunata chasa charinakusakichita?—. Chasa nispaka— Chi ungueta kaima pusamuichi— nirka.

¹⁸ Chaiachigriura, Jesuska chi kuku wairata sinchi piñarka. Chasa piñaura, chi kuku waira chi wambramanda llugsirka. Chiuralla, suma ambirigsamurka.

¹⁹ Paita katiraiagkuna, chasa kawaspaka, Jesús sapalla kaskapi kaillaiaspa, tapurkakuna:

—¿Imawantak nukanchika mana pudirkanchi, chi kuku wairata llugsichingapa?

²⁰ Chiura, Jesuska ainirkakunata:

—Kamkuna nukamanda mailla iuianakugmandami mana llugsichingapa pudirkangichi. Kasami nuka niikichita: sug uchulla muritu mustasasinallapas kamkuna nukamanda iui ai iuantrangichi; kai lumata nintrangichi: “Kaimanda chasama ialirii”. Chiurallami chi luma, sugsinama ialirintra. Tukuimi chasa pudirintra. ²¹ [Chi kuku wairakunataka, mana mikuspalla Taita Diusta sinchi mañaskawami llugsichingapa pudiri.]*

Jesús imasa wañungapa kagta, pai parisma willaskamanda

²² Chara Galileapi kankama, Jesús nirkakunata:

—Kai Runa Tukuskaka, mana alli runakunapagmami chaiachii tukungapa ka. ²³ Paikunaka wañuchiwangapami kankuna. Chasa wañuska kaspapas, kimsa punchapika ikutimi kaugsaringapa kani.

Paikuna, chasa uaspaka, iapa llakirirkakuna.

Diuspa atun wasimanda kulki kuanakuskamanda

²⁴ Paikuna Kafarnaum puibluma chaiagriuraka, Diospa atun wasimanda impuistu chaskigkuna, kaillaiaspa, Pedrota tapurkakuna:

—Kamkunata iachachig, ¿impuistu paganachu?

Chiura ainirka:

—Ari.

²⁵ Pedro wasi ukuma iaikugrispa, manara imapas rimagpi, Jesuska paita tapurka:

—Kai alpapi mandagkuna, ¿pikunatak impuistu chaskinkuna: kikinpa wambrakunata u sugkunata? Kam, ¿imatak ainiwangi?

²⁶ —Sugkunata— Pedro ainirka.

Chiura, Jesuska nirka:

—Nigpi, wambrakunataka mana pagangapa chianchu. ²⁷ Chasa kagpipas, mana chi mañanakuskata piñachingapa, kucha patama rii. Chipi, ansuilu sitangi. Maikan ñugpa chalwa urmaskata simita kawangi. Chipimi sug kulki tarinkangi. Chita apaspa, nukamanda i kammanda mañanakuskata kuagringi.

18

Maikan mas atun taita kangapa, Jesús iachachiskamanda

* 17:21 Kasa [...] siñalwami willaraiaí, sug ñugpamanda pangakunapi chasa iskribiska kagta; ikuti sugkunapika, manima.

¹ Chasa kagllapi, Jesusta katiraiagkunaka, kaillaiaspa, tapurkakuna:

—Suma luarpi, Taita Dios mandakuskapi, ¿pitak mas atun taita tukuska kangapa ka?

² Chiura Jesuska, sug uchulla wambrata kaiaspa, chaugpipi saiachirka, ³ kasa nispa:

—Kasami nuka niikichita: kamkuna, mana Diospa ñawipi kai wawasina allilla tukug-samuspa, mana suma luarma iaikugringapa kangichichu. ⁴ Maikanpas kai uchullasina mana imakunapipas subirbiaspalla tukugsamug, paimi, suma luarpi, Taita Dios suma mandakuskapi, mas atun taita tukuska kangapa ka. ⁵ Maikanpas kai uchullatasina nukamanda iuiarispa chaskigpika, nukata chaskiwagsinami rurá.

⁶ —Ikuti maikanpas kasa uchulla nukamanda suma iuiawagta pandachipuagpika, paita chaiantrami, sug atun kutanga rumi kungapi wataspa, atun kucha iakuma sitangringapa.

⁷ —Kai alpapi pandariikunapi urmachingapa, achkami tia. Chasami imaurapas tiangapa ka. Chasa tiagpipas, jai, maikan runa, sugkunata pandariikunapi urmachig!

⁸ —Kamba makiwa u chakiwa pandaringapa chaiagpika, chita chaianmi kuchuspa sitangapa, mana pandaringapa. Chasapaka, mas allichar kantra, maki u chaki kuru suma luarma iaikugringapa. Mana kagpika, ¿iskandi maki i chakikunawantachu munaipa, atun nina ñi imaurapas mana wañungapa kaskama sitai tukungapa?

⁹ —Chasallata, kamba ñawiwa kawaspa pandaringapa chaiagpika, chita chaianmi surkuspa sitangapa, mana pandaringapa. Chasapaka, mas allichar kantra, suglla ñawilla-wapas suma luarma iaikugringapa. Mana kagpika, ¿iskandi ñawikunawantachu munaipa, diltudupa ninama sitai tukungapa?

Ubija chingaskamanda parlu

¹⁰ —Ñi maikan kai uchullakunata mana wabutingichi. Kasami nuka niikichita: pain-kunata kawag anjilkunaka, suma luarpi imaurapas nukapa Taitapa ñawipimi kankuna. [

¹¹ Kai Runa Tukuskaka samurkami, maikan chingaskasinata maskaspa taringapa.]

¹² —¿Imatak iuiangichi? Maikan runapas, patsa ubija iukaspa, sug ubija chingapugpika, ¿manachu iskun chungá iskunta sakispa, maskai kallaritra, chi ubijata tarinkama? Ari. ¹³ Kasami nuka niikichita: chi chingaskata tariura, iskun chungá iskun mana imaurapas chingagkunamanda masmi chi tarigta alli iuiachiritra. ¹⁴ Chasallata, kamkunapa Taita suma luarpi kag mana munanchu, ñi sug kai uchullakuna chingarispa, paipagma mana chaiagringapa.

Imasa sugkunata pasinsiangapa chaiagta

¹⁵ —Maikanpas kamta mana allilla ruragpika, pai sapallata rimaspa iuiachigringi. Kamta allilla uiagpika, ikutimi sumaglla waugkindi tukunkangichi. ¹⁶ Mana kamta uiagpika, sug u iska runakunata pusaspa, ikuti rimagringi; chipika, iska u kimsa uiagkuna tiachu, tukui imasa rimanakuska uiangapa. ¹⁷ Paikunatapas mana uiagpika, iglisia tukuskakunata willangichi. Iglisia tukuskakunatapas mana uiagpika, chi runa, kam kikinpura i Taita Diusta mana rigsismi tukú.*

¹⁸ —Kasami nuka niikichita: maikan pandariskakunata, kamkuna kai alpapi mana pasinsiaska nigpika, sug luarpipas chasallatami tukungapa kankuna. Ikuti maikan pandariskakunata kamkuna kai alpapi pasinsiaskaka, sug luarpipas chasallatami pasinsiai tukungapa kankuna.

¹⁹ —Kasapasmi niikichita: iskaikunallapas, kai alpapi sugllasina iuiarispa, nukapa Taita suma luarpi kagta mañagpika, chasallatami ima mañaska karamungapa ka. ²⁰ Iska u kimsa-kunallapas kaskapi nukata iuiariwachukuna: nuka kikinmi paikunawa sugllapi kangapa kani.

²¹ Chiura Pedro, kaillaiaspa, Jesusta tapurka:

—Taita waugki, maikanpas nukata mana allilla rurawagpika, ¿maituku biajitak chaiawaku, paita pasinsiangapa? ¿Kanchis biajikamachu pasinsiangapa chaiawangapa ka?

²² Jesuska ainirka:

—Mana niikichu, kanchis biajikamalla pasinsiangapa. Niikimi, kanchis chungata kanchis biaji ialigtapas pasinsiangapa.

²³ —Chasamanda Taita Dios suma luarpi kag, sug atun mandagsinami niraiá. Kasa niipa: chi mandagta munarka, paipa piunkunata: “Ima mañachiskata kutichiwai” ningapa.

²⁴ Chasa kallariukuraka, sug piuntasi paipagma pusagrirkakuna. Chi piunta chungá waranga kuri kulkisi mañachiska karka. ²⁵ Nigpika, mana kutichingapa pudikugmanda, chi mandag, justisiakunata nirkasi: “Paita, warmindita, wambrakunata i tukui ima tiapuskakunatapas katugriichi, imasa mañachiskasina kutichiwangapa”.

²⁶ —Chiura chi piun, kungurispa, mañai kallariirka, kasa nispa: “Taita waugki, nuka-manda llakirri. Suiawai. Tukuimi kutichisaki”.

* 18:17 griego rimaiwa: mana judíu kaskakunamanda kulki chaskigsina.

²⁷ —Chasa mañaura mandagka, suma llakirispá, piunta uiaspa, tukui mañachiskata pasinsiarka. Nispaka, sakirkasi ringapa.

²⁸ —Rikuura, pai piunpura kawanakurka. Chi sug piuntaka patsa billitisi pai mañachiska karka. Chita kawaspaka, kungapi apispa, sipikugsina charirispá, nirka: “Nukapa kulkitá kutichiwai”.

²⁹ —Chiura chi sug piun, kungurispá, mañai kallarirka, kasa nispá: “Nukamanda llakirii. Suiawai. Tukuimi kutichisaki”.

³⁰ —Paikar mana munarka, ñi imasapipas pasinsiangapa. Chi piunta karsilpi chura-chirka, tukui mañachiskata kutichinkama iuiaspá.

³¹ —Pai piunpura, chasa kawaspaka, iapasi llakirirkakuna. Nispaka, chi mandagta tukui imasa kawaska willagrirkakuna. ³² Chasa iachaspaka chi mandagka, paita kaiaspá, nirkasi: “¡Mana alli iuiaiiugmi kangí! Kam mañawagmandami nuka tukui mañachiskata pasinsiarkaiki. ³³ Nuka kamta sumami llakirirkaiki. Nigpika kamtapas, ¿manachu cháiakurka, chasallata kam piunpura llakiringapa?”.

³⁴ —Chasa nispaka, iapa rabiarispá, justisiakunata nirka: “Karsilpi wichkapuaichi, tukui kulki kutichiwankama”.

³⁵ Chasa parlaspaka, Jesús nirka:

—Kamkuna suma iuiaiwa sugkunata mana pasinsiagpikunaka, nukapa Taita suma luarpi kagpas kamkunatapás chasallatami mana pasinsiangapa ka.

19

Kusa, kikinpa warmita mana sitangapa, Jesús iachachiskamanda

¹ Jesús, chasa rimai puchukaspaka, Galilea alpamanda llugsispa rirka. Jordán iaku sug ladu chimba ialispá, Judea alpama cháiagirka. ² Chi laduka, iapa achka runakuna paita katichii kallarirkakuna. Jesuska, chipi cháiagrispa, unguiwa kaskakunata ambigrirka.

³ Sug fariseokuna, paipagma kaillaiagrirkakuna. Chi runakunaka, Jesusta pandachin-gapa iuiaiwa tapurkakuna:

—¿Pudinichichu, nukanchipa warmita imamandallapas sitangapa?

⁴ Jesuska ainirka:

—¿Manachu kasa Moisés niraiaskata kawarkangichi, Taita Dios runakunata wiñachig, kallariskauramandata kari i warmi wiñachispá ruragta? ⁵ Wiñachispaka, nirka: “Chimandami, kari kagpi, paipa taitata mamandita sakispá, paipa warmiwa iskandikuna sugllasina tukugsamungapa kankuna”. ⁶ Chasa kaspaka, mana iskaí niraianchu. Suglla tukuskami niraiá. Taita Dios chasa suglla tukuska niraiaskata, ñi maikan runapas mana iukanchu “Sitanakui” ninga.

⁷ Paikunaka tapurkakuna:

—Nigpika, ¿imapaták Moisés sakirka, kusa, sug iskribiska warmita kuaspaka, ña paitaka sitaska niraiangapa?

⁸ Chiura, Jesuska ainirka:

—Kamkuna upa iuiai tukuska kagmandami Moisés kamkunata chasa rurangapa sakirka. Ñugpa, runakuna tiai kallariura, mana chasa karkachu. ⁹ Kasami nuka niikichita: maikanpas, kikinpa warmita sitaspá, sug warmiwa kasaragpika, atun pandariimi rurá. Paipa warmi sug kariwa apirigpika, chimandakar pudingichimi sitangapa. [Maikanpas kusa sitaska warmiwa kasaragpika, atun pandariimi chasallata rurá.]

¹⁰ Chiuramanda katiraiagkuna, Jesusta nirkakuna:

—Maikan kusapas mana kikinpa warmita sitangapa pudigpika, mas allichar kantra mana kasarangapa.

¹¹ Jesuska nirkakunata:

—Mana tukuiakuna pudinkunachu, chi iachachiskata suma uiangapa. Taita Dios suma iuiai karaska iukagkunallami suma uiankuna. ¹² Maikankuna, tiagsamuskauramandata-mi mana pudinkuna kasarangapa. Sugkunaka, kapai tukuskami kankuna, mana warmi iukangapa. Ikuti sugkunaka, Taita Dios suma luarpi kag ima niskata rurangapa iuiaspami mana warmi iukangapa munankuna. Maikan chasa allilla uiaspa rurangapa pudigkuna, uiachukuna.

Wawakunata, Jesús maki churaskamanda

¹³ Chiuramanda uchullakunata, paikunapa atunkuna Jesuspagma pusarkakuna, Taita Diusta paikunamanda mañaspá, maki churangapa. Jesusta katiraiagkunaka, pusanakugta piñaspá, nirkakuna:

—Mana kaillaiianakuichi.

¹⁴ Chiura, Jesuska nirka:

—Ianga kawaichi, wawakuna nukapagma samuchukuna. ¿Imapatak arkanakungichi? Kai wawakunasina kagkunami suma luarma iaikugringapa kankuna.

¹⁵ Chasa nispaka, wawakunata maki churarka. Nispaka, chimanda llugsispa rirka.

Sug iapa iukag musu, Jesuswa rimanakuskamanda

¹⁶ Sug musu, Jesuspagma kaillaiagrispa, tapurka:

—Iachachig taita, ¿ima alli ruraiwatak iukani ruranga, mana puchukariduru suma kaugsaita taringapa?

¹⁷ Jesuska ainirka:

—¿Imapatak alli ruraimanda tapuwakungi? Taita Diosllami alli ka. Chi kaugsaita iukanapa munaspaka, Moisés ima niskata allilla ruraspa kaugsangi.

¹⁸ Chi musuka ikuti tapurka:

—¿Maikankuna?

Chiura, Jesuska ainirka:

—Mana wañuchingi. Mana sugpa warmiwa siriringi. Mana sisangi. Mana pimandapas llullangi. ¹⁹ Kamba taitata mamandita sumaglla kuiangi. Kam kikintasinami iukangi, tukui runakunata kuianga.

²⁰ Chasa uiaspa, chi musu nirka:

—Tukui chi niskata chasa ruraspami kaugsani. Niwai: ¿imatatak pisiwaku?

²¹ Chiura, Jesuska ainirka:

—Kam tukuipi alli kangapa munaspaka, kunaauralla rii. Tukui ima iukaskata katugrii. Katuska kulkitaka mana iukaskakunata tukuita karagrii. Chasa ruraspa, suma luarpi iapa iukagmi tungungapa kangi. Nispaka samungi, nukata katiwangapa.

²² Chasa rimaskata uiaspaka, chi musu llakirisipami rirka, iapa iukag kaspa.

²³ Jesuska, katiraiagkunata nirka:

—Kasami nuka niikichita: iapa iukagkuna suma luarma iaikugringapaka, iapa trabajusumi kangapa ka. ²⁴ Ikuti niikichitami: maschar alli kantra, sug wagra* sug aguja ñawipi ialingapa. Chimanda mas trabajusumi ka, chi iapa iukagkuna suma luarma iaikugringapa.

²⁵ Chasa uiaspaka katiraiagkuna, iapa ujnarispa, kasa tapurkakuna:

—Nigpika, ¿pisik kispiringapa pudinga?

²⁶ Chiura Jesuska, paikunata kawaspa, nirka:

—Ñi maikan runa mana pudinchu. Taita Diosllami kispichingapa pudí.

²⁷ Chiura, Pedroka nirka:

—Uiamui. Nukanchi, tukui ima iukaskata sakispami kamta katiraiianchi. Nigpika, ¿imatatak nukanchimanda tiangapa ka?

²⁸ Jesuska, paikunata ainirka:

—Kasami nuka niikichita: tukui musuiachii tukugsamuuraka, kai Runa Tukuska iapa suma atun mandadirupimi tiarigringapa ka. Chiuraka, kamkuna nukata katiraiawagkunapas, chillapita chunganga iska mandadirupimi tiarigringapa kangichi; chasaka, ñugpamanda achala taita Israelpa chunganga iska wambrakunapa wambrakunata kawaspa justisiangapa. ²⁹ Maikanpas, nukata kuiawaspa, wasita, waugki i panikonata, taita i mamandita, wambrakunata, alpakunata u ima iukaskata sakispa katiwagka, patsamanda mas patsami chaskingapa kankuna. Mana puchukariduru suma kaugsaitapasm tarigringapa kankuna. ³⁰ Chasa kagpipas, kunaura ñugpa niraiaskakuna, achkakunami kati laduma tungungapa kankuna. Ikuti kunaura kati niraiaskakunaka, achkakunami ñugpa laduma tungungapa kankuna.

20

Ubasta pallagkunamanda parlu

¹—Taita Dios sug luarpi suma mandag, ubas chagraiug runasinami niraiá. Kasa niipa: chi runaka, iapa tutatasi rirka, pallagkuna maskangapa. ² Pallagringapa munagkunata nirka: “Sug sug chisiagta pallsina bali kulkimi kuasakichita”.

—“Ari” ainiskakunatasi kacharka, ubas chagrapi pallangapa.

³—Chaugpi tutatapas, ikutisi kallima rirka. Chipi ianga saianakuskata tarispaka, ⁴ tapurkakunata: “¿Kamkunapas munantrangichichu, nukapa chagrapi pallagringapa? Imasa baliskasinami kuasakichita”. Chasa tapuura, chikunapas rirkakuna pallangapa.

⁵—Ikuti chaugpuncha i chaugpi chisimapas, chasallatasi maskagrirka. ⁶ Na indi chingakuurapas, ikuti kallima rispa, sugkuna saianakuskatata tarigrirka. Chikunatasi tapurka: “¿Imapatak chisiagta ianga saianakungichi?”.

⁷—Chiura ainirkakuna: “Ñi pipas nukanchita mana ñi imapas maskankunachu”.

* **19:24** griego rimaiwa: kamello suti atun animal.

—“Nigpika kamkunapas, nukapa ubas chagrama riichi pallangapa” nirkakunata.

⁸—Ña amsaiakuraka, chi chagraiugka paipa kapuralta nirkasi: “Pallagkunata kaiaspa, kallaringi, kati chaiamugkunata ñugpa pagangapa. Nispaka, suiu suiu, tutata kallariigta pagangi”.

⁹—Ña pagai kallariuraka, chisima chaiagrigrkuna, chisiagta pallagsina bali kulkisi chaskigrirkakuna. ¹⁰Chasa chaskinakuska iachaspaka, tutatamandata pallagkunaka iuianakurka: “Nukanchita masmi chaskingapa chaianga”. Chasa iuianakugpipas, sugkuna chaskiskasinallata chaskingapa chaiarka.

¹¹—Chaskispaka, chagraiugta kallariirkakuna, rabiariispa, kasa ningapa: ¹²“Kati chaiamugkuna, sug urallami pallarkakuna. Nukanchikar, indi iapa ruparikuskapimi chisiarankanchi. ¿Imapatak paikuna chaskiskasinallata nukanchita pagachirkangi?”.

¹³—Chasa uiaspa chagraiugka, sug paipurata nirka: “Waugki, nuka kamta mana jiru imapipas rurakuikichu. ‘Chisiagta pallagsina bali kulkimi kuasaki’ nuka niura, ¿manachu ainiwarkangi: ‘Ari’? ¹⁴Kamta chaiakuska kulkita apaspa rii. Nukami munarkani, kamba kati samuskakunatapas, kamkunata imasami kuangapa chaiá: chasallata kuangapa. ¹⁵Nukapa kulkita, ¿manachu pudini, nuka imasa munaskasina rurangapa? Nukapa alli iuiaiwa chasa kuaskamanda, ¿imapatak kamka mana allilla iuiaspa kawakungi?”.

¹⁶—Chasallatami tukungapa ka: kunaura kati niraiaskakuna, ñugpa ladumami tukungapa kankuna. Ikuti kunaura ñugpa niraiaskakuna, kati ladumami tukungapa kankuna.

Jesús imasa wañungapa kagta, pai kimsama willaskamanda

¹⁷Jerusalén puibluma ñambi rinakuskapi, Jesuska, chungá iskai katiraiagkunallata kaiaspa, nirka:

¹⁸—Ujawaichi. Jerusalemami rinakunchi. Chipika, kai Runa Tukuskaka iaia sasir-dutikunapa i Moisés ima niskata iachachig taitakunapa makipimi apichii tukungapa ka. Chi runakunaka, nukamanda ningapami kankuna: “Wañuchiimi chaiá”. ¹⁹Nispaka, mana judío kaskakunapagmami chaiachiwangapa kankuna. Paikuna, nukata unzáwaspa, asutiwaspa, kruspi klaspami wañuchiwigangapa kankuna. Chasa wañuska kaspapas, kimsa punchapika ikutimi kaugsaringapa kani.

Santiago i Juanpa mama, ima Jesusta mañapuskamanda

²⁰Chiura Zebedeopa warmi, iskandi wambrakunawa Jesuspagma kaillaiaspaka, kungurirka, kasa nispa:

—Nuka ima mañakuskata, ¿manachu uiawantrangi?

²¹Chiura, Jesús tapurka:

—¿Imatak munakungi?

Chasa uiaspa, chi warmika ainirka:

—Kam mandangapa tiarispá chaiaura, kai nukapa iskandi wambrakunata tiarichipuangi: sugtaka, kamba alli ladu; sugtaka, kamba lluki ladu.

²²Jesúska nirka:

—Mana iachangichichu ima mañanakugta. Nukata chaiawangapami ka, iapa achka llakiikuna* iukangapa. ¿Kamkunapaschu chasallata pudintrangichi, llakiikunata pasan-gapa?

—Ari— ainirkakuna—, chasa pudingapami kanchi.

²³Jesúska nirkakunata:

—Ari, nuka llakiikunasinallata, kamkunapasmi pasankangichi. Chi nukapa alli ladu lluki ladu tiarichingapaka, nukata mana chaiawakunchu kawangapa. Maikan nukapa Taita agllaskakunatami chasa tiarichingapa ka.

²⁴Chi iskai waugkindikuna ima mañanakuskata uiaspaka, chi sug chungá katiraiagkuna rabiarii kallariirkakuna. ²⁵Jesúska, paikunata kaiaspa, nirkakunata:

—Kamkuna allillami iachangichi: kai alpapi atun mandagkuna, mandanakuskapi kaugsagkunata ñi ima mana llakisipallami mandankuna. Chasallata, maikanpas atun mandag-sina tukuspa, mana llakisipallami runakunata charinkuna. ²⁶Kam kikinpuraka, chasa rurag runakunaka mana kangichi. Kam kikinpura maikan, Diuspa ñawipi atun kangapa munaspaka, sugkunapa lutrinsina tukuchu. ²⁷Maikan mas atun taita kangapa munagpas, ñugpa iukanmi sugkunapa lutrinsina kanga. ²⁸Chasallata kai Runa Tukuskaka mana samurkachu, sugkunata lutrinsina churangapa. Tukuikunapa lutrinsina kangapami nuka samurkani. Nukapa wañuiwami achkakunata kispichingapa kani.

Iskai runa mana ñawi kawagkunata, Jesús aliachiskamanda

* 20:22 “Sug winja kupata upiangapa”, iapa achka llakiikuna iukangapami niraiá.

²⁹ Paikuna Jerikó suti puiblumanda llugsispa rinakuskata, iapa achka runakuna Jesusta katicihii kallarirkakuna. ³⁰ Chi ñambi kuchupi, iskai runa mana ñawi kawagkunami tianakurka. Chi runakunaka, Jesús ña ialikugta uiaspa, kaparii kallarirkakuna, kasa nispa:

—Davidpa wambra [Iaia Jesús], nukanchimanda llakirii.

³¹ Chi achka katiraiagkuna, paikunata piñaspa, ninakurka:

—Upalla kaichi.

Paikunaka, upallangataka, mas sinchimi kaparii kallarirkakuna, nispa:

—Davidpa wambra Iaia Jesús, nukanchimanda llakirii.

³² Chasa uiaspa Jesuska, saiarispa, chi runakunata kaiaspa, tapurka:

—¿Imatak munanangkichi, nuka kamkunata rurangapa?

³³ Chiura ainirkakuna:

—Taita waugki, nukanchi kawangapami munanangkichi.

³⁴ Chiura Jesuska, suma llakirispa, ñawikunata llamkarka. Chasa llamkagllapi, allilla kawai kallarirkakuna. Nispaka, Jesusta katii kallarirkakuna.

21

Jerusalén puibluma, Jesús iaikugriskamanda

¹ Jerusalem ña kaillaianakuspa, Betfajé suti puiblu ña kawarikuskamanda, Olivos suti lumakama chaiagrirkakuna. Chimanda Jesuska, iskai katiraiagkunata kacharka, ² kasa nispa:

—Riichi chi ñugpa ladu uchulla puibluma. Chaiagrispaka, sug bura wataraiaskatami tarigringkichi. Wawa burupas, sugllapimi kanga. Chi burata paskaspa, iskandikunata apamungichi. ³ Maikan tapuchu: “¿Imapatak apapuakungi?”: chiura ainingichi: “Iaia Jesustami ministiku. Mañachii. Ñami kutichimunga”.

⁴ Chasa tukugsamurka, Santu Ispirituwa ñugpata willaraiaskasina. Chipika, kasami niraia:

⁵ Sión lumamanda warmikunata kasa willapuaichi:

“Kawaichi. Kamkunapa atun mandagmi samuku.

Mana imapas iukagsinami samuku, sug burupi tiariska.

Aparichidiru animalpa maltu wawa burupimi tiariska samuku”.

⁶ Chi kachai tukuskakunaka, rispa, imasa Jesús niskasina ruragrirkakuna. ⁷ Burata wawandiwanta Jesuspagma aparkakuna. Chaiachigrispaka, burapa wasapi paikunapa katangakunata churarkakuna. Chasapika Jesús, tiariska, rii kallarirka. ⁸ Chasa Jesús rikugta kawaspa, achka runakuna, paikuna kataraiaska katangakunata ñambi suiu mandachirkakuna. Sugkunaka, pangaiug sacha uchulla malkikunata kuchuspa, ñambi ñambi churarkakuna, pai ialingapa. ⁹ Nispaka Jesusta ñugpagkuna i paipa kati rinakug, kasa kaparispa nii kallarirkakuna:

—Ñugpamanda taita Davidpa wambra kangi.

Kam iapa suma kagtami ninchi.

Atun Taita Dios kachamuskami samukungi.

Paipa iapa kuiaskami kangi.

Taita Dios awa suma luarpi kagtapasmi ninchi:

“Kam, iapa sumami kangi”.

¹⁰ Jesús chasa Jerusalem chaiaagriuraka, chipi kaugsagkuna, iapa achka runakuna katiraiagkunata kawaspa, mancharispa tapunakurka:

—Chi runa, ¿pisik ka?

¹¹ Katiraiagkunaka ainirkakuna:

—Jesús suti Santu Ispirituwa rimagmi ka. Galilea alpa i Nazaret puiblumandami ka.

Diuspa atun wasi ukumanda, Jesús katugkunata llugsichiskamanda

¹² Chiuramanda Jesuska, Diuspa atun wasi ukuma iaikugrispaka, katugkunata i randinakugta chi ukupi kawarka. Chimanda, iapa rabiarispa, tukuikunata llugsichii kallarirka. Kulki trukagkunapa misakunata i paluma katugkunapa bankukunatapas bulachirka, ¹³ kasa nispa:

—Ñugpamanda librupi, kasami willaraiá: “Nukapa wasi, Taita Diusta iuiarispa mañadirumi kangapa ka”. “Kamkunaka, sisai kaugsadirusinami rurankungichi”.

¹⁴ Jesús chi ukupi kagllapi, mana ñawi kawagkuna i mana purii pudigkuna paipagma kaillaarkakuna. Chiura, paika ambirkakunata.

¹⁵ Iaia sasirdutikuna i Moisés ima niskata iachachig taitakuna, Jesús chasa mana imaurapas kawaskasina rurakuskata kawanakurka. Wambra kunapas, Diuspa atun wasi ukupi kaparispa ninakurka:

Ñugpamanda taita Davidpa wambrami kangi.

Kam iapa suma kagtami ninchi.

Chasa uiaspaka, chi taitakuna, rabiarispa, ¹⁶ Jesusta tapurkakuna:

–Kaikuna ima kammanda kaparinakugta, ¿manachu uiakungi?

Chiura, Jesuska ainirka:

–Ari. ¿Manachu ñugpamanda librupi kawarkangichi kasa willaraiagta?

Uchulla wawakunata chuchug wawakunawantami iachachirkangi,

“Tukuipi iapa suma atunmi kangi” ningapa.

¹⁷ Chasa nispaka, paikunapagmanda anchurirka. Chi atun puiblumanda llugsispaka, Betania puibluma rispa, chipi pakarigrirka.

Igus sacha wañuringapa, Jesús niskamanda

¹⁸ Chi tutata, Jerusalemna ikuti rinakuskapika, Jesusta iarkai apigsamurka. ¹⁹ Sug igus sachata ñambi kuchupi kawarka. Chi sachama chaiagriuraka, ñi ima mikui mana iukarka; pangalla iukarka. Chiura, Jesuska nirka:

–Kunauramanda, ñi imaurapas mana kai sacha mikui muii tiarichu.

Chasa nigllapi, chi sacha limpiumi chakirirka. ²⁰ Chasa kawaspaka, katiraiagkuna iapa ujnarirkakuna, kasa tapuspa:

–¿Imawasik chi sacha, chasa nigllapi chakirirka?

²¹ Jesuska, paikunata ainirka:

–Kasami nuka niikichita: kamkuna mana sug rigcha iuiaspalla nukamandalla iuiagpi-kunaka, imasami chi sacha tukurka: chimandapas masmi pudinrangichi. Kai lumata ninrangichi: “Kaimanda anchurispa, atun kucha iaku ukuma sitarigrii”; kamkuna ima niskasinami tukugsamuntra. ²² Chasallata, nukamanda suma iuiarispa, tukui Taita Diusta mañagpikunaka, kamkuna ima mañaskasinami tukugsamuntra.

Kamtaka, ¿pitak kachamurka, atun tukuspa puringapa?, Jesusta tapuskamanda

²³ Chimandaka Jesús, Diospa atun wasi ukuma ikuti iaikugrirka. Chipi iachachikuuraka, iaia sasirdutikuna i sug taitakunapas paipagma kaillaiarkakuna, kasa tapungapa:

–¿Imapatak chasa ruraspa purikungi? ¿Pitak kamta kachamurka, atun tukuspa purikun-gapa?

²⁴ Jesuska ainirkakunata:

–Nukapas, kamkunata tapusakichita. Kamkuna ainiwagpika, nukapas willasakichita-mi, pi nukata kachamuwaspa atuniachiwaska kagta. ²⁵ ¿Pitak Juanta kacharka, baugtisan-gapa? ¿Taita Dioschu kachamurka? Mana kagpika, ¿runakunallachu kacharka?

Chiuraka, kikinpura rimarinakurka, kasa iuiarispa:

–“Taita Dios kachamuskami karka” nigpika, paika ainingami: “Nigpika, ¿imapatak mana paita uiarkangichi?”. ²⁶ “Runakunalla kachamuskami karka” mana nisunchi. Tukuikuna-mi Juanmanda iuianakú: “Santu Ispirituwa rimagmi karka”. Paikunata chimandami manchai iukanchi.

²⁷ Chasa rimanakuspa, Jesusta ainirkakuna:

–Mana iachanchichu, Juanta pi kachamuska kagta.

Chasa ainiura, Jesuska nirkakunata:

–Chimandami nukapas mana willaikichita, pi kachamuwaska kagta, atun tukuspa kan-gapa.

Iskai wambrakunamanda parlu

²⁸ Kasapasmi Jesús nirkakunata:

–¿Imasatak kai parlu, kamkunata uiarintra? Sug runa, iskai wambrakunasi iukarka. Chi runaka, atun wambrata kaiaspa, nirkasi: “Rii chagrama. Ubas pallagrii”.

²⁹ –Paika ainirka: “Mana munanichu ringapa”. Chasa ainispapas, kipama allilla iuiarispa, maima kachakuskama rirkalla.

³⁰ –Uchulla wambratapas, taita kaillaiaspa, chasallatasi nirka. Chiura ainirka: “Ñami risa, taita”. Chasa ainispapas, manimasi rirka.

³¹ Chasa parlaspaka, Jesús tapurkakunata:

–Chi iskandikuna, ¿maikantak taita imasa munakuskasina allilla rurarka?

–Atun wambra— ainirkakuna.

Chasa ainiura, Jesuska nirkakunata:

–Kasami nuka niikichita: mana judíu kaskakunamanda kulki chaskigkuna i karisapa warmikuna, kamkunapa ñugpami suma luarma iaikugringapa kankuna. ³² Juan Bautista samurkami, kamkunata imasa sumaglla kaugsaita iachachingapa. Kamkunakar, mana paita uiarkangichi. Kulki chaskigkuna i karisapa warmikunapas, pai rimakuskata suma

iuiarispa, suma kaugsaiwami kallariirkakuna. Chasa kawaspapas, kamkunakar ñi ima manima.

Ubas sachakunata almagkuna, mana allilla ruraskamanda parlu

³³—Sug iuiari apingasina parlutapas uiawaichi. Sug runa, achka ubas sachka malkikunasi paipa alpapi tarpurka. Chi alpa muiundi kincha saiachispa, ubas iaku surkudirupassi rurarka. Chasallata, awa kawitu saiachirka, tarpuskata kawanakungapa. Chasa ruraspaka, sug runakunata chi ubas sachakunata sakirka, almaspa, chaugpi chaugpi pallangapa. Chasa sakispaka, karu alpama rirka.

³⁴—Ña pallangapa chaiauraka, sug piunkunata chi almagkunapagma kacharka, paipa rasiunta chaskingapa. ³⁵ Chi runakunaka, kachai tukuskakunata apispa, sugta makarkakuna; sugta wañuchirkakuna; ikuti sugtaka runikunawa piarkakuna.

³⁶—Chiuramanda, ikuti ñugpamanda mas achka piunkunatasi kacharka. Chikunatapas chasallatasi mana alli rurarkakuna.

³⁷—Katimakar duiñuka, kikinpa wambratasi kacharka, kasa iuiarispa: “Nukapa wambra kagmanda, mana imapas rurapungakunachu”.

³⁸—Nigpika chi almagkunaka, chi wambrata kawaspa, kikinpura rimarirkakuna, kasa nispa: “Kawaichi. Kai alpa duiñupa wambra samuku. Paitapas wañuchisunchi. Chasaka, nukanchipallami kai alpa tukunga”.

³⁹—Chasa nispaka, paita apispa, chi alpamanda llugsichispa, wañuchirkakuna.

⁴⁰ Chasa parlaspaka, Jesús tapurka:

—Nigpi chi duiñuka, ¿imatak chi runakunata ruragsamunga?

⁴¹ Chiura ainirkakuna:

—Chasa mana alli ruragkunata mana llakisipallami wañuchingakunata. Nispaka, chi sachakunata ikuti sugkunatami almangapa sakinga. Mikui pallaura, paipa rasiunta allilla kuagkunatami sakinga.

⁴² Paikuna chasa ainiura, Jesuska nirka:

—¿Manachu ñugpamanda librupi kasa willaraiaskata kawarkangichi?

Wasichigkuna wabutiska rumi, wasita charigmi tukugsamurka.

Atun Taita Diusmi chasa rurarka.

Nukanchi, iapa ujnarisipami chasa ruraskata kawanakunchi.

⁴³ Chimandami kasa niikichita: Taita Dius, kamkunata suma mandag kaskamanda anchuringapami ka. Sugkuna, pai imasa munaskasina alli ruragkunapaggimi suma mandag tukungapa ka. [⁴⁴ Kasapas. Maikan chi rumipi urmagkuna, piti pitimi tukungakuna. Chasallata, chi rumi awalla urmaggika, ñutumi tukungakuna.]

⁴⁵ Chasa parlkunata uiaspaka, iaia sasirdutikuna i fariseokuna iuiarirkakuna: “Nukanchimandami chasa parluwa niku”. ⁴⁶ Chimanda, rabiarispa, Jesusta apichingapa munanarkurka. Chasa munanakuspapas, achka runakuna chipi kagmanda, manchai apirkakunata. Tukuikunami iuianakurka: “Jesús, Santu Ispirituwa rimagmi ka”.

22

Kasarai atun punchamanda parlu

¹ Jesuska, sug luarmanda mandaimanda ikuti iuiari apingasina suma parlarkakunata, kasa nispa:

²—Sug atun mandag, paipa wambra kasarakuura, suma mikui mikungapa kaiarka.

³ Chi kasarai puncha ña chaiauuraka, lutrinkunata kacharkasi, tukui kunbidaskakunata: “Samui” nigringapa. Chasa willagriura, kunbidaskakunaka nirkakunasi: “Manima pudinichu”.

⁴—Chasa uiaspaka, chi mandagka ikuti sug lutrinkunata kacharkasi, kasa nispa: “Kunbidaskakunata willagriichi: ‘Tukui allichiskami ka. Maltu i wirra wagra wañuchiskakuna i tukui mikui ianuskami tia’. Tukui samuchukuna, kasaragkunawa sugllapi mikungapa”.

⁵—Chasa ikuti willagrigpipas, chi kunbidaskakuna manimasi uiarkakuna. Sugka, paipa chagrama rirka. Sugka rirkasi, paipa katudirukunata katungapa. ⁶ Ikuti sugkunaka, piunkunata tandarispa, wañugtasi makarkakuna.

⁷—Chasa uiaspaka, chi mandagka, rabiarispa, paipa suldadukunata kacharka, chi wañuchigkunata puchukangapa i paikunapa puibluta rupachingapa. ⁸ Nispaka, piunkunata nirkasi: “Tukui mikui, ñami allichiska ka, kasaragkunawa sugllapi mikungapa. Nuka ñugpa kunbidaskakuna, mana alli iuiagkuna kaspas, mana samurkakuna. ⁹ Chimanda kamkuna, tukui ñambikunama riichi. Tukui ialinakuskata nigriichi samuchukuna, kasaragkunawa sugllapi mikungapa”.

¹⁰—Chiura piunkuna, tukui ñambikunama rispa, maituku ialinakuskata kasaragkunapa wasima pusarkakunata. Alli u mana alli runakuna, maituku taririskakunata tandachirkakuna. Chasaka, wasi ukupi jundachigrirkakunata.

¹¹—Ña chi mandagka, kunbidaskakunata kawangapa iaikuura, sug runaka suma katanga mañachiskata mana churariska kagta kawarka.* ¹²Paita kawaspaka, nirka: “Kam waugki, ¿imapatak nuka katanga mañachiskata mana churarispa iaikurkangi?”

—Chi runa, ñi ima mana ainirka. ¹³Chiura chi mandagka, piunkunata nirkasi: “Kai runata apiichi. Chakita i makita wataichi. Nispaka, kanchama iana tutapi sitagriichi. Chipi, iapa llakispa, wakaspa, kiru mukuspami kangapa ka”.

¹⁴Chasa parlaspaka, Jesuska nirka:

—Achkakunami kaiaska kankuna. Agllaskakunaka, maillami kankuna.

Impuistumanda Jesusta tapuskakunamanda

¹⁵Chasa uiaspa, fariseokunaka paipura rimanakugrirka, Jesús ima rimakuskata uiaspa, imapipas pandarigpika, justisiakunata willagringapa. ¹⁶Nispaka, sug paipurakunata i mandag Herodeswa purigkunata Jesuspagma kacharkakuna, kasa sumaglla ningapa:

—Iachachig taita, nukanchi iachanchimi, kam mana llullaspalla rimagta. Mana pitapas kawaspallami tukuiyunata iwalla sutipa kaskata iachachingi, imasa Taita Dios munas-kasina ruraspaka kausangapakuna. ¹⁷Chimandami tapugsamunchi: kam, ¿imatata ningi? ¿Allillachu ka, Romamanda iaia mandagta nukanchi impuistu kuangapa? ¿Pagasunchichu u mana?

¹⁸Jesusa iacharka, mana allilla iuiiwa chasa tapunakugta. Nispaka, nirkakunata:

—Kamkuna sungu awalla iuiagkuna, ¿imapatak munanakungichi pandachiwangapa?

¹⁹Impuistu kulki kuadiruta kawachiwaichi.

Chiura, sug kulki apagrispa kuagrirkakuna. ²⁰Chita kawaspa, Jesuska tapurkakunata:

—Kai kulkipi, ¿pipa ñawitak kawariku? ¿Pimandatak willaska niraiá?

²¹—Romamanda iaia mandagmanda— ainirkakuna.

Chasa ainiura, Jesuska nirkakunata:

—Chasa kagpika, Romamanda iaia mandagpa kaskata paita kuaichi. Taita Diospa kaskata Taita Diusta kuaichi.

²²Chasa uiaspaka, iapa ujnarirkakuna. Nispaka, paita sakispa, anchurirkakunalla.

Wañuskakuna kausaringapa kaskamanda, Jesusta tapuskakunamanda

²³Chi punchallatata, sug saduseo suti runakuna Jesuspagma chaiagrirkakuna. Chi runakuna iachachidurmi kankuna, wañuskakuna mana mas kausaringapa kagta. Chaiagrispaka, Jesusta nirkakuna:

²⁴—Iachachig taita, Moiseska kasasi nirka. Sug kari kasaraspaka, warmi manara wamburakuna iukagllapi wañugpika, sug waugkindisi iuká chi biudawa kasaranga; chasaka, wañug waugkindipa kuinta wawakuna iukangapa.

²⁵—Nigpika, kanchis waugkindikunasi nukanchipa alpapi tiarka. Atun waugkindika, kasaraspaka, warmi manara wawakuna iukagllapisi wañurka. Chiwanka, kipamanda waugkindisi chi sapalla kidaska warmiwa kasarai iukarka. ²⁶Chi waugkindipas, chasallata wañurka. Katimanda waugkinditapas chasallata pasarirka. Chasallatasi tukui kanchis waugkindikuna wañurkakuna. ²⁷Katimakar, chi warmipas wañurka. ²⁸Nigpika, wañuskakuna kausariuraka, ¿pipatak chi warmika kanga, tukui chi kanchis waugkindikunawa kasadu kaspaka?

²⁹Jesusa ainirkakunata:

—Kamkuna, ñugpamanda librupi willaraiaskata ñi Taita Diospa iapa iachaita mana iuii iukangichichu. Chimandami pandarisa iuianakungichi. ³⁰Wañuskakuna kausariskauramandaka, kari ñi warmi mana kasarangapa kankunachu. Imasa suma luarmanda anjilkunasinami kausangapa kankuna.

³¹—Kasapas. ¿Imapatak kamkuna ningichi: “Wañuskakuna mana mas kausaringapa kankunachu?”. ¿Manachu kasa willaraiaskata kawarkangichi? “Taita Dios nirka: ³²‘Nukami kani Abrahampa, Isaakpa i Jakobpa Taita Dios.’” Taita Dios mana kanchu wañuskakunapa. Kausagkunapami Taita Dios ka.

³³Jesús chasa iachachiskata uiaspaka, tukui chipi kagkuna iapa ujnarispa mancharirkakuna.

Tukui mandaikunamanda, ¿maikantak mas atun ka?, Jesusta tapuskamanda

* **22:11** Chiurakuna, kasa kustumbri iukarkakuna: tukui kunbidaskakunata suma katanga mañachingapa; chika, tukui suma churariska kawaringapa.

³⁴ Jesús saduseokunata chasa ainiura, upalla uiarkakuna. Chasa iachaspa, sug fariseokunaka Jesuspagma tandarirakuna. ³⁵ Nispa sug paipura, Moisés ima niskata iachachig taita kaspá, Jesusta pandachingapa iuiaspa, tapurka:

³⁶ —Iachachig taita, tukui mandaikunamanda, ¿maikantak mas atun ka?

³⁷ Chiura, Jesuska ainirka:

—“Kamba atun Taita Diusta kuiangi kam kikinpa almawa, tukui animuwa i tukui iuiainunawa”. ³⁸ Chi mandaimi tukuikunamanda mas atun ka.

³⁹ —Kai katimandapasmi chi mandaisinallatata atun ka: “Kam kikintasinami iukangi, tukui runakunatapas kuianga”. ⁴⁰ Moisés i Santu Ispirituwa rimagkuna tukui iachachiskakuna, chi iskandi mandaikunapimi willaraiá.

Taita Dios agllaska Cristo, Davidpa iaiami ka

⁴¹ Chi fariseokuna chara tandariska kankama, Jesuska tapurkakunata:

⁴² —Taita Dios agllaska Cristomanda, ¿imasatak kamkuna iuianakungichi? ¿Pipa wambra kati wambreak ka?

Chiura ainirkakuna:

—Davidpa wambra kati wambra.

⁴³ Chiura, Jesuska nirrakunata:

—Chasa kagpika, ¿imapatak kikin Davidka, Santu Ispirituwa kaspá, Cristomanda nirka: “Nukapa iaia”? Kasa willaraiaskapimi David nirka:

⁴⁴ Atun Taita Diosmi nukapa iaia nirka:

“Nukapa alli ladu tiarii,

nuka tukui kamta mana munagkunata apagrispa,

kamba chaki sarudiru ukuma churankama”.

⁴⁵ Chasami David kikin, Cristomanda nirka: “Nukapa iaia”. Nigpika, ¿imawantak Cristo, paipa wambra kati wambra kanga?

⁴⁶ Chiura, ñi pipas mana pudirkakuna, ñi ima rimaiwa Jesusta ainingapa. Chi punchamanda, ñi pipas mana animu iukarkakuna, paita imapas tapungapa.

23

Iachachig taitakunata, Jesús piñaskamanda

¹ Chiura Jesuska, paita katiraiagkunata i tukui chipi kagkunata rimarka, ² kasa nispa:

—Moisés ima niskata iachachig taitakuna i fariseokuna ninkuna: “Nukanchitami chaiaiku, Moisés mandaraiaska imasa niraiaskata iachachingapa”. ³ Chimandami kamkunata niikichita: paikuna tukui ima iachachiskata suma uiaspa rurangichi. Ikuti paikuna ima ruraskakunasinaka mana rurangichi. Paikuna suma iachachispapas, kikinkunaka sug rigchami rurankuna. ⁴ Iapa mana pudiringasina llasa aparichigsinami iachachinkuna, paikuna imasa niskasina ruraspá kausangapa. Chasa iachachispapas, pai kikinkunaka mana munankunachu, imasa iachachinakuskasina ruraspá kausangapa.

⁵ —Paikuna, allilla imapas rurankuna, “Kawawachukuna” iuiaspalla. Chasa paikuna, printipi i makipi ñugpamanda librupi willaraiaskata watarispami purinkuna, ianga kawachiringapaglla. Chasallata, sugkunamanda mas atun suma siñidurkuna katangama wataspami kawachiringapaglla purinkuna. ⁶ Maima kunbidagpi suma mikungapa kaiaura, ñugpa ladu tiaringapami munankuna. Tandariduru wasikunapipas munankunami, atun taitakuna tiariduru ñugpa ladu tiarigringapa. ⁷ Kallipi paikunawa tupanakuskapi munankunami, iapa suma kuiaiwa kumurispa, “Puangi, iachachig taita” ningapakunata.

⁸ —Kamkunaka mana sakiringichi, sugkuna, “Iachachig taita” nispa, kamkunata kuingapa. Nukallami kamkunapa iachachig taita kani. Tukui kamkuna, waugkindimi kangichi. ⁹ Chasallata, kai alpapi ñi pitapas mana ningichi: “Taita”. Suglla Taitami iukangichi: suma luarpi kausag Taita Dios. ¹⁰ Mana munangichi, sugkuna kamkunata atunachiska mandagkuna niraiangapa. Nukallami kani kamkunata kawaspa mandag Cristo. ¹¹ Chimanda, kamkunata mas mandag tukungapa munagpika, kamkunapa lutrinsina tukuchu. ¹² Maikanpas atuniachirispá iuiagta, Taita Dioska uchullaiachingapami ka. Ikuti maikanpas uchullaiaspá iuiaskataka, Taita Dios atunaiachingapami ka.

¹³ —¡Ai, kam Moisés ima niskata iachachig taitakuna i fariseokuna, sungu awalla rimagkuna! Suma luarpi iaikunakuskata arkanakugsinami kangichi. Kam kikinkuna mana munanangkungichichu iaikungapa. Iaikungapa munanakugtapasmi arkanakugsina rurankungichi.

[¹⁴ —¡Ai, kam Moisés ima niskata iachachig taitakuna i fariseokuna, sungu awalla rimagkuna! Warmi sapalla kidaskakunata wasikunatami kichudur kangichi. Nispaka, kawachiringapagllami unai Taita Diusta rimanakudur kangichi. Chasa ruraskakunamandami sug luarpi sugkunamandapas mas llakiipi justisiai tukungapa kangichi.]

¹⁵ —¡Ai, kam Moisés ima niskata iachachig taitakuna i fariseokuna, sungu awalla rimagkuna! Kamkunami iapa munangichi, lamar iaku chimbaspas, karu alpakanapi purigrispa, suglla runallapas kamkunamanda tarigringapa. Chi runa, ña kamkunawa purikuspa, kamkunamandapas mas iapa jiru infirnumanda kukusinami tukungapa ka.

¹⁶ —¡Ai, kamkuna, mana ñawiiug sugkunata pusanakugsinami niraiangichi! Kasami iachachidur kangichi: “Maikanpas nichu: ‘Diuspa atun wasi kawawakumi; kasami rurasas;’ chika mana balinchu. Ikuti, ‘Diuspa atun wasi ukupi kuri tiaska kawawakumi’ nigpika, chikar balinmi” ningichi. ¹⁷ ¡Mana ñawiiug upakunasinami kangichi! ¿Maikantak mas bali niraiá: kuri u Diuspa atun wasi? Chi wasi ukupi tiaskamandami chi kuri Diuspalla tukugsamuka niraiá.

¹⁸ —Kasapasmi iachachidur kangichi: “Maikanpas nichu: ‘Altarmi kawawaku; kasami rurasas;’ chika mana balinchu. Ikuti, ‘Altarpi churaska kamarikumi kawawaku’ nigpika, chikar balinmi” ningichi. ¹⁹ ¡Mana ñawiiugkunasinami kangichi! ¿Maikantak mas bali niraiá: kamariku u altar? Altarpi churaskamandami Taita Diusta kawachiska kamariku niraiá. ²⁰ Nigpika, maikanpas: “Altarmi kawawaku” nigpika, tukui ima altarpi churaskakunapasmi kawaku. ²¹ Maikanpas: “Diuspa atun wasimi kawawaku” nigpika, Taita Dius chipi kaugsakuskapasmi kawaku. ²² Maikanpas: “Suma luarmi kawawaku” nigpika, Taita Diuspa mandadiru, kikin chipi tiakugpasmi kawaku.

²³ —¡Ai, kam Moisés ima niskata iachachig taitakuna i fariseokuna, sungu awalla rimagkuna! Minta, anis i kuminu suti iuiukuna pallaskakunamanda chungapika, sugllami Taita Diusta karangichi. Chasa karaspapas, kam kikinkuna kungariskami kangichi, sugkunamanda mas atun mandaikunata rurangapa, kasa: sugkunata imasa chaiaskasina allilla ruraspa, sugkunamanda llakirisa, Taita Diusta suma iuiaspa kaugsangapa. Chunga pallaskamanda sug karangapa mana sakispalla, iukangichimi chi sug atun mandaikunatapas allilla ruraspa kaugsangakuna. ²⁴ Kamkuna mana ñawiiug, sugkunata pusanakugsinami niraiangichi. Upianakuskapi sug kikitutaskata anchuchigsinami rurangichi. Ikuti sug wagrataka* tragagsinami rurangichi.

²⁵ —¡Ai, kam Moisés ima niskata iachachig taitakuna i fariseokuna, sungu awalla rimagkuna! Kuashag i platuta awallallami maillangichi. Ikuti kamkunapa iuiái ukumaka, sugkunapata iapa mumarispa i sisarispa kaugsagkunami kangichi. ²⁶ Kam fariseokuna mana ñawiiug, sugkunata pusanakugsinami niraiangichi. Ñugpa, kamkunapa jiru iuiaikunata maillagsina ruraichi. Chasa ruraspaka, tukui maillaskasinami tukunkangichi.

²⁷ —¡Ai, kam Moisés ima niskata iachachig taitakuna i fariseokuna, sungu awalla rimagkuna! Wañuska pambaraiaska bubidata iuraiachiskasinallami kangichi. Awalla, chi iuraiachiska bubidakuna sumami kawarinkuna. Ikuti chi ukumaka, wañuska ismuska tullukuna tukui millai jiru asnakunami jundaraiá. ²⁸ Kamkunapas, chasasinami kangichi. Runakunapa ñawipi, suma alli iuiái iukag runakunasinami kawaringichi. Ikuti kamkunapa iuiái ukumaka, tukui mana alli jiru iuiaikuna jundami kangichi.

²⁹ —¡Ai, kam Moisés ima niskata iachachig taitakuna i fariseokuna, sungu awalla rimagkuna! Ñugpamanda Santu Espirituwa rimagkunamanda iuiarispa, suma atun bubidakuna ruraspami kangichi. Chasallata, ñugpamanda alli ruraspa kaugsag runakuna pambaraiaskata sumaiachispami kangichi, ³⁰ kasa nispa: “Nukanchipa ñugpamanda taitakunawa nukanchi kaugsangapa chaiappika, manami chi Santu Espirituwa rimagkunata wañuchingapa sakinchi”. ³¹ Chasa nispa, kam kikinkunami willarinakungichi, chi Santu Espirituwa rimagkunata wañuchigkunapa wambrakuna kagta. ³² Nigpika, kamkunapa ñugpamanda taitakuna imasa kallarikata, chi iuiailawanta puchukaichi.

³³ —¡Kulibrakunasina, mana alli runakunami kangichi! ¿Imasatak kispiringapa kangichi, diltudupa ninama sitai tukungapa? ³⁴ Chimandami Santu Espirituwa rimagkunata, suma iachakunata i iachachigkunata nuka kachamungapa kaikichita. Chi kachamui tukuskakunata, maikankunataka wañuchingapami kangichi. Sugkunataka kruspi warkuchispami wañuchingapa kangichi. Ikuti sugkunataka kamkuna tandariduru wasikunapi asutispa kangapa kangichi. Sugkunataka sug puibluma sug puibluma mitikuchispami kangapa kangichi. ³⁵ Chimanda, kai alpapi tukui allilla ruraspa kaugsanakuska wañuchii tukuskakunamanda, kam kikinkunami iapa achka llakii iukangapa kangichi. Ari, Abel suti alli runa musuglla wañuchii tukuskauramandata, sugka, Berekiassa wambra Zakarías suti, Taita Diuswa iuiariduru uku i altarwa chaugpipi wañuchii tukuskaurakama, maituku wañuchii tukuskakunamandapasmi iapa achka llakii iukangapa kangichi. ³⁶ Kasami nuka niikichita: kuna punchakunamanda runakuna, tukuikunamandami chasa llakii iukangapa kangichi.

* 23:24 griego rimaiwa: kamello suti atun animal.

Jerusalén puiblumanda, Jesús wakaskamanda

³⁷—¡Ai, Jerusalén, Jerusalemanda runakuna! Kamkuna, Santu Ispirituwa rimagkunata wañuchigmi kangichi. Kamkunapagma kachamuska runakunatami rumiwa piaspa wañuchingichi. Imasami atawalpa, paipa pullitukunata kunuchingapa kaiaspa ugllari: chasallatami nukapas, achka biaji kaiaspa, tandachingapa munanakurkaikichita. Chasa munakugpipas, kamkunaka mana nukata munawarkangichichu. ³⁸ Chimandami kamkunapa wasikuna, sitaska tukugsamungapa kankuna. ³⁹ Kasami niikichita: kuna ramanda mana kawawangapa kangichichu, imaura kamkuna kasa niwankama: Atun Taita Dios kachamuskami samukungi. Paipa iapa kuiaskami kam kangi.

24

Diuspa atun wasita puchukai tukungapa, Jesús willaskamanda

¹ Diuspa atun wasi ukumanda Jesús llugsispa rikuuraka, paita katiraiagkuna kaillaiarakuna, chi wasi imasa suma kaskata kawachingapa. ² Jesuska ainirkakunata: —Kai kantiaska rumikunawa saiachiska suma wasimanda, kasami nuka willaikichita: chi tukui piachiska rumikuna, ñi sug mana sakingapa kankunachu. Tukuitami urmachispa puchukangapa kankuna.

Kai alpa puchukarii puncha manara chaiagllapi, imasa kawaringapa kaskamanda

³ Olivos lumapi chaiagrispa tiarigriuraka, Jestu katiraiagkunalla, kaillaiaspa, tapurkaku: —Nukanchita willai: ¿imauratak chasa pasaringa? Kam ikuti samungapa puncha i kai alpa puchukaringapa puncha chaiangapa kaura, ¿imawatak chi pasaringapa kaskata kawachinkangi?

⁴ Chiura, Jesuska ainirkakunata:

—¡Ujalallapas maikan, kamkunata llullachispa pandachichukuna! ⁵ Achkakunami, nukasina tukuspa, samungapa kankuna, kasa nispa: “Nukami Taita Dios agllaska Cristo kani”. Chasa rimanakuskawaka achka runakunatami llullachingapa kankuna.

⁶ —Tukuimami mana llakispalla wañuchinakuga iacharingapa ka; kamkuna mana mancharinakungichi. Chasami pasaringapa ka. Nigpipas, kai alpa puchukarii puncha manara chaimuska niraianchu. ⁷ Ñugpami sug mandag alpanigmandakunawa sugnigmandakunawa wañuchinakui tiangapa ka. Iapa iarkaimi tiangapa ka. Sugnigmandag sugnigmandami alpa kuiurisa chapurisa ringapa ka. ⁸ Chi llakiikuna pasariska, chara kallariillami kangapa ka.

⁹ —Chi punchakuna, kamkunata apispa, mandagkunatami apangakuna. Kamkunata iapa llakichispa nanachispami wañuchingakuna. Tukui alpamanda runakunami kamkunawa rabiaringakuna, kamkuna nukawa kagmanda.

¹⁰ —Chi punchakuna, achkakunami sakingapa kankuna, Taita Diusta iuiaringapa. Chikunaka, parijumami piñachirinakuspalla, apichinakuspa, mandagkunapagma apanakungapa kankuna. ¹¹ Achka llullachigkunami kawarigsamungapa kankuna, kasa nispa: “Nukami Santu Ispirituwa rimag kani”. Chasa rimaskakunawaka achka runakunatami llullachingapa kankuna. ¹² Iapa achka mana alli ruragkunami mirangapa kankuna. Chiwanka, achkakunami sakingapa kankuna, pai kikinpura kuianakuspa kaugsangapa. ¹³ Chasa kagpipas, wañunkama nukallawa iuiarispa kagkunami kispiringapa kankuna.

¹⁴ —Diuspa suma mandaimanda Alli Willaita, kai alpapi tukui kaugsanakuskata willaurami kai alpa puchukarii puncha kangapa ka.

¹⁵ —Ñugpamanda Santu Ispirituwa rimag, Daniel suti, kasami willarka: iapa jiru mana kawangasinami rurangapa kankuna. Sug ianga diussina rigchata Taita Diuspa tukuiikumanda mas alli ukupimi saiachingapa kankuna. Chitaka, kamkuna kawangapami kangichi. (Chasa willaraiaskata allilla iuiawai iuiarispa kawangichi.) ¹⁶ Chasa kawaspaka, Judea alpapi kaugsanakug, sachukuma mitikuchukuna. ¹⁷ Maikanpas wasi truja awapi kagkuna, mana uraikunakuchu, ukuma iaikuspa, imakuna apangapa. Imasa kaskasinalla mitikuchukuna. ¹⁸ Chasallata maikanpas chagrapi kagkuna, mana wasima kutichukuna, katanga u imapas tandachingapa. ¹⁹ ¡Ai, maikan warmijimkuna, chi punchakuna wigsawa ungug u uchulla markaska kagkuna! ²⁰ Taita Diusta mañangichi, mana chaiachu, tamia puncha u warda puncha mitikui tiangapa.

²¹ —Chi punchakuna, askurinti iapa llakiimi tiangapa ka. Taita Dios kai alpa wiñachiskauramandata kunankama, chasa llakiika mana tiaska kanchu. Chasallataka, kuna ramanda mana ikuti chasa tiangapa kanchu. ²² Taita Dios chi llakii punchakunata mana pisiachigpika, ñi pipas manachar kispirinha. Pai agllaska runakunata iapa kuiaspami chi punchakunata pisiachingapa ka.

²³—Chiurakuna, kamkunata ninakungami: “Uiamuichi. Taita Dios agllaska Cristo, kaipimi ka” u “Chipimi ka”. Chasa ninakugpipas, kamkuna mana uiangichi. ²⁴Chi punchakuna, iapa llullachigkunami kawarigsamungapa kankuna, kasa nispa: “Nukami Cristo kani” u “Nukami Santu Ispirituwa rimag kani”. Chi runakunaka, mana imaurapas kawaskasina i iapa ujnaringasinami kawachingapa kankuna. Chasa kawachiskawaka Taita Dios agllaskakunatapasma ñalla llullachingapa kankuna. ²⁵Manara chasa tukungapa chaigpitami allilla willaikichita.

²⁶—“Uiamuichi. Cristo, chusa sitaska alpapimi ka” nigpipas, kamkuna mana chima ringichi. “Uiamuichi. Kai wasi ukupimi ka” nigpipas, mana uiangichi. ²⁷Imasami rilampa, indi llugsidirunigmanda punchaiachigsamuspa, indi chingaridirupi punchaiachi: chasallatami kai Runa Tukuska, kutimuspa, kawarigsamungapa ka. ²⁸Imasami, pipas mana willagpi, gallinasukuna wañuska kaskama tandarinkuna: chasami, nuka samuura, tukugsamungapa ka.

Jesús imasa ikuti samungapa kaskamanda

²⁹—Chi iapa llakii punchakuna ialigllapika, indimi amsaiangapa ka; killapas, manami punchaiachingapa ka; istrillakuna, awamandami urmangapa kankuna; kai alpamanda awa ladu tiaskakunapasma kuiuchii tukungapa kankuna. ³⁰Chiura kai Runa Tukuskapa siñalka, awa puiukunapimi kawarigsamungapa ka. Chasa kawaspaka, kai alpapi tukui runakuna ajaimi wakangapa kankuna. Kai Runa Tukuska samugtami kawawangapa kankuna. Nukapa tukui iapa suma iachaiwa awa puii ukupimi samungapa kani. ³¹Samuspaka, nukapa anjilkunatami kachasa. Paikunaka, bututusinawa sinchi uiachispa, tukui chusku kuchunigmandami nuka agllaska runakunata tandachipuungapa kankuna.

³²—Kai iuiai apingasina suma rimaiwa iachaikuichi. Imasami igus sachá malkikuna wiñaspa, pangakuna ña susuriura, kamkuna kawaspa, ningichi: “Ñami alli punchakuna chaiamuku”: ³³chasallata kamkuna, tukui chasa pasarinakuskata kawaspaka, ñami iachankangichi, nuka ña chaiamukugta.

³⁴—Kasami nuka niikichita: manara tukui kunaura kaugsagkuna wañugpimi tukui chasa tukugsamungapa ka. ³⁵Sug luar i kai alpa luar puchukarigpipas, nuka ima niskaka mana ialingapa kanchu.

³⁶—Ima puncha ima ura chasa tukugsamungapa kagta, mana pipas iachanchichu. Ñi suma luarmanda anjilkuna ñi Diospa wambrapas mana iachanchu. Nukapa Taitallami iachá.

³⁷—Imasami, Noé kaugsakuura, mana iuianakuskasina tukugsamurka: chasallatami kai Runa Tukuska kawarigsamungapa puncha tukungapa ka. ³⁸Noé kaugsakuska punchakunaka, manara atun iakuwa puchukai tukunkama, sumaglla mikuspa, upiaspa, kasarapami kaugsanakurka, Noé ruraska atun barkupi iaikunkama. ³⁹Paikuna kungaska kaugsanakuurami, chi atun tamia tukugsamuspa, tukuikunata puchukagsamurkakunata. Chasallatami kai Runa Tukuska kawarigsamungapa puncha tukugsamungapa ka.

⁴⁰—Chiura, iskai runakuna chagrukupi purinakuskata, sugtaka apangami; sugtaka sakingami. ⁴¹Chasallata, iskai warmikuna sugllapi kutanakuskata, sugtaka apangami; sugtaka sakingami.

⁴²—Chimanda, iuiaipilla kangichi. Kamkuna mana iachangichichu, ima ura kamkunapa iaiá samungapa kagta.

⁴³—Kasa iachaichi: wasi duiñu iachantra, ima ura sisai samungapa kagta. Iachaspaka, mana puñurispallachar rigcharaiantra, paipa wasipi mana sisai iaikungapa. ⁴⁴Chasallata kamkunapas, allichiriskasina suianakungichi. Kamkuna mana iuianakuurami kai Runa Tukuska chaiamungapa ka.

⁴⁵—Maikan tukuipi alli rurag piun kagtami paipa patrun sakirka, ima wasipi kawapungapa, sug piunkunata mikui karaspa, pai kikin chaiamunkama. ⁴⁶Patrun ikuti chaiagsamuspa, imasa niskasina allilla rurakugta kawaspaka, chi piunta sumagllami “Pai Siñur” nispa, kuiangapa ka. ⁴⁷Chimandami paita maituku ima iukaskatapas mingaspa sakingapa ka.

⁴⁸—Ikuti chi piun, mana allilla iuiarispalla nintra: “Nukapa patrun mana utka chaiamungapa ka”. ⁴⁹Chasa nispaka, sug piunkunata makai kallaritra. Kikinka, sug machangichukunawa sugllapi mikuspa upiaspa kantra. ⁵⁰Chi piun kungaska mana iuiakuurami patrunka, chaiamuspa, shachigsamungapa ka. ⁵¹Chasa shachigsamuspa, paita sinchimi asutingapa ka. Nispaka kachangami, sungu awalla rimanakugwa justisiai tukungapa. Chipika, iapa llakispa, wakaspa, kiru mukuspami kangapa kankuna.

¹ Jesús, suma luarmanda mandaimanda kasa nirka:

—Sug tuta chungu sipaskuna, michun sindi charirispati rirkakuna, kusa tukungapa kasata tupangapa. ² Chi sipaskunaka, pichkaka, allilla iuiarispa kagkuna; ikuti sug pichkaka, mana allilla iuiarispa kagkuna. ³ Mana allilla iuiarispa kagkunaka, mana kirusin apar-kakuna, tallispa sindilla iukangapa. ⁴ Ikuti allilla iuiarispa kagkunakar, kirusinsi aparka-kuna, tallingapa. ⁵ Kusa tukungapa kag, mana utka chaimurka. Chiwanka, tukuikuna puñurirkakuna.

⁶ —Chaupgi tutaka, kapariisi uiarirkakunata: “Uiamuichi. Kusa tukungapa kag, ñami samuku. Tukuikuna tupagrisunchi”.

⁷ —Chiura tukui sipaskuna, atarispá, allichirirkakuna, atun sindi michun rurangapa. ⁸ Chiurallatata mana allilla iuiarispa kagkuna, sugkunata nirkakuna: “Nukanchipa michun sindi, ñami wañuku. Kamkunapa kirusinta karawaichi”.

⁹ —Allilla iuiarispa kagkunaka ainirkakuna: “Manima. Tukuikunamanda mana pagtan-gachu. Katugkunapagpi randigriichi”.

¹⁰ —Chi mana allilla iuiarispa kagkuna kirusin randingapa rinkamaka, kusa tukungapa kag ña chaimurka. Chiura chi allichiriska suianakug sipaskunaka, kasaragkunawa iaikurkakuna, sumaglla mikungapa. Iaikuspaka, punguta wichkarkakuna.

¹¹ —Kipamaka, chi sug sipaskunapas chaiagsamurkakuna. Nispaka, kaparii kallarirka-kuna: “Taita turi, taita turi, pungu paskapuai”.

¹² —Paika, ukunigmandalla ainirkakunata: “Kasami nuka niikichita: kamkunata mana rigsiiikichitachu”.

¹³ Chasa parlaspa, Jesuska nirkakunata:

—Kamkunapas, allichiriskasinalla suiangichi. Mana iachangichichu, nuka ima puncha, masa ura chaimungapa kagta.

Kuri kulkikunamanda parlu

¹⁴ Sug iuiái apingasina, Jesús suma parlarka, kasa nispa:

—Sug patrun, sugsinama ringapa kaspaka, lutrinkunata kaiaspa, paipa kulkikunata mingarka. ¹⁵ Paikuna imasa pudingasina kawaspami mingarka. Sug runata pichka kuri kulkisi mingarka; sugtaka iskai; ikuti sugtaka suglla. Chasa paikunata mingaspaka, sugsinama nirka.

¹⁶ —Chi pichka chaskig runaka, chiuralla rispa, randispa katuspa, sug pichka massi mirachirka. ¹⁷ Iskai chaskig runapas, sug iskai massi mirachirka. ¹⁸ Ikuti suglla chaskig runaka, alpapisi pusu utkuspa, patrunpa kulkita pambarka.

¹⁹ —Ña unaipika, chi lutrinkunapa patrunka kutimurka. Nispaka, paikunata kaiarka tapungapa, masa kulkimi mirachiska tiapunkunata. ²⁰ Chiura pichka chaskig runaka, chaiamuspa, sug pichka iapawa apamuspa, nirka: “Taita waugki, kamta pichka kuri kulkimi chaskirkaiki. Sug pichka masmi mirachirkani”.

²¹ —Chiura, chi patrunka ainirka: “Kam, iapa allimi kangí. Allillami rurarkangi. Chasa maillallawa mirachigmanda, kunauramanda achkami mingasaki. Iaikui ukuma, nukawa sumaglla kangapa”.

²² —Iskai chaskig runapas, chaiamuspa, sug iskai iapawa apamuspa, nirka: “Taita waugki, kamta iskai kuri kulkimi chaskirkaiki. Sug iskai masmi mirachirkani”.

²³ —Chiura, chi patrunka ainirka: “Kam, iapa allimi kangí. Allillami rurarkangi. Chasa maillallawa mirachigmanda, kunauramanda achkami mingasaki. Iaikui ukuma, nukawa sumaglla kangapa”.

²⁴ —Chi suglla chaskig runaka, chaiamuspa, nirka: “Taita waugki, nuka iachanimi, kam sinchi sungu iukagta; kam maipi mana tarpuskapi pallangapa munagta, maipi mana similla sitaskapi tandachingapa munagta. ²⁵ Chasa iachaspaka, iapami manchai apiwarka. Chimandami kamba kulkita alpa ukuma pambarkani. Chiká. Kaipimi tiapungi”.

²⁶ —Chasa uiaspaka, chi patrunka nirka: “Kam, mana alli iuiáiug, iapa killa wangu lutrinmi kangí. Kam allillami iacharkangi, nuka maipi mana tarpuskapi palladur kagta, maipi mana similla sitaskapi tandachidur kagta. ²⁷ Chasa iachaspaka, ¿imapatk nukapa kulki mirangapa, mana bankupi mingapuarkangi; chasaka, nuka kutimuura, iapawa kuawangapa?”.

²⁸ —Chasa rimaspaka, chipi kagkunata nirka: “Kai runata kulki kichuspa, chi chungu iukagta kuaichi”. ²⁹ Maikan iapa achka iukagta masmi karangapa ka, puchugta. Ikuti maikan mailla iukaskataka tukuimi kichungapa ka. ³⁰ Kai ñi imapapas mana balig lutrintaka iana tuta kanchapisina ninama sitagriichi. Chipika, iapa llakispa, wakaspa, kiru mukuspa-mi kangapa ka.

Tukui runakuna imasa justisiai tukungapa kaskamanda

³¹ Kasapasmi Jesús nirka:

—Kai Runa Tukuska suma atuniachiska samuura, tukui anjilkunami paiwa samungapa kankuna. Paipa suma atun mandadirupimi tiarigsamungapa ka. ³² Chiura, tukuinigm-
 manda runakunami paipa ñugpa ladu chaiachii tukungapa kankuna.

—Chasa chaiachiska kauraka, allilla ruraspa kagkunata i mana allilla ruraspa kag-
 kunata iskaimami saiachingapa ka; imasami ubija i kabrakunata kawag, iskaima chura:
 chasa. ³³ Allilla ruraspa kagkunata alli ladumi saiachingapa ka. Mana allilla ruraspa
 kagkunataka lluki ladumi saiachingapa ka.

³⁴ —Nispaka chi atun mandagka, paipa alli ladu kaskakunata ningapami ka: “Nukapa
 Taitapa iapa kuiaskakuna, samuichi, nukawa mandangapa. Kamkuna chasa mandan-
 gapaka, alpa tukuskauramandatami allichiska kapurkangichita. ³⁵ Kamkunaka, nuka
 iarkaiwa kaura, mikuimi karawarkangichi. Nuka iakunaiwa kaura, upiangapami kara-
 warkangichi. Nuka ñambipi ialispa purikuura, kamkunapa wasimami kaiawarkangichi.
³⁶ Nuka mana katangawa kaura, kamkunami churachiwarkangichi. Nuka ungug kaura,
 kawawangapami rirkangichi. Chasallata, karsilpi kaura, chaiawagrirkangichimi”.

³⁷ —Chiura, chi allilla ruraspa kagkuna tapungapami kankuna: “Taitiku, ¿imauratak,
 kam iarkaiwa kaskata kawaspa, mikui kararkanchi? ¿Imauratak, kam iakunaiwa kas-
 kata kawaspa, upiangapa kararkanchi? ³⁸ ¿Imauratak, kam ñambipi ialispa purikuskata
 kawaspa, kaiarkanchi? ¿Imauratak, kam mana katangawa kaskata kawaspa, chura-
 chirkanchi? ³⁹ ¿Imauratak kam ungug u karsilpi kaskata chaiangapa rirkanchi?”.

⁴⁰ —Paikuna chasa tapuura, chi atun mandag ainingapami ka: “Kasami nuka niikichita:
 kai nukapa uchulla waugkikunata kamkuna chasa ruraskaka, nukata rurawagsinami
 rurarkangichi”.

⁴¹ —Chasa nispaka, paipa lluki ladu kaskakunataka kasami ningapa ka: “Kamkuna
 maldisiskakuna, nukapa ñawimanda anchuriichi. Mana wañudiru ninama rupangapa
 riichi, iaia kukuta i paipa anjilkunata rupachingapa kaskama. ⁴² Kamkunaka, nuka
 iarkaiwa kaura, mana mikui karawarkangichichu. Iakunaiwa kaura, mana upiangapa
 karawarkangichichu. ⁴³ Ñambipi ialispa purikuura, mana wasima kaiawarkangichichu.
 Mana katangawa kaura, ñi ima mana churachiwarkangichichu. Ungug u karsilpi kaura,
 mana chaiawangapa rirkangichichu”.

⁴⁴ —Chiura tapungapami kankuna: “Taitiku, ¿imauratak kam iarkaiwa u iakunaiwa
 kaskata, ñambipi purikuskata u mana katangawa u ungug u karsilpi kaskata kawaspapas,
 mana ñi imapas rurarkanchi?”.

⁴⁵ —Paikuna chasa tapuura, ainingapami ka: “Kasami nuka niikichita: kai uchulla
 waugkikunata imaura mana ñi imapas ruraskaka, nukata rurawagsinami mana ñi imapas
 rurarkangichi”.

⁴⁶ —Chi mana allilla ruraspa kagkuna, diltudupa llakii kaskamami ringapa kankuna.
 Allilla ruraspa kagkunakar, suma luar mana puchukariduru kaugsai tiaskamami ringapa
 kankuna.

26

Jesusta wañuchingapa iuanakuskamanda

¹ Chi tukui ima rimaskata puchukaspaka, Jesús, paita katiraiagkunata nirka:

² —Kasami kamkuna iachangichi: paskua atun punchapa iskai punchallami pisiku. Chi
 punchami kai Runa Tukuska apii tukungapa ka, kruspi wañuchii tukungapa.

³ Chi punchallatata, iaia sasirdutikuna i sug judiú taitakuna tandarirrakuna Kaifás suti
 iaia sasirdutipa atun wasipi. ⁴ Chipika, paipura rimarinakurka, Jesusta pakalla apispa
 wañuchingapa. ⁵ Iuarispa ninakurka:

—Kai atun punchakunaka, mana paita apichisunchi. Apichigpika, tukui runakuna,
 iachaspaka, nukanchiwami rabiaringakuna.

Jesuspa umapi, sug warmi suma asna asiti talliskamanda

⁶ Jesús, Betania puiblupimi karka, Simón suti runapa wasipi. Chi Simón, aicha ismui
 unguiwa ñugpata karka. ⁷ Jesús mikuspa tiakuuraka, sug warmi kaillaiarka. Chi warmi,
 suma asna asiti iapa bali kulkiwa randispa, marmul rumi butillapi apaspami kaillaiarka.
 Nispaka, Jesuspa umapimi asitita tallirka. ⁸ Paita katiraiagkuna, chasa kawaspaka,
 rabiariispa, kasami kikinpura ninakurka:

—¿Imapatak ianga tallí? ⁹ Chi asitita achka kulkimanda katuspa, mana ñi imapas iukaska-
 kunata chi kulkikunata karangapami chaiakurka.

¹⁰ Jesuska, chasa uiaspa, nirkakunata:

—¿Imapatak kai warmi ninakungichi, mana allilla ruragta? Paika allillami rurawarka.

¹¹ Ñi ima mana iukagkunata imaurapasmu iukangapa kangichi. Ikuti nukataka sug ratulla-
 mi kawawanakungichi. ¹² Kai warmi suma asitiwa talliwaskaka niraianni, nukapa kuirpu

wañuskata pambangapa ña allichiska sakigsina. ¹³ Kasami nuka niikichita: tukui alpapi, maipipas nukamanda Alli Willaita willaskapi, kai warmi ima rurawaskatapas parlanguapami kankuna, paimanda mana kungaris palla.

Jesusta apichingapa, Judas Iskariote maskaskamanda

¹⁴ Nigpika chungá iskai Jesús agllaskakunamanda Judas Iskariote sutika, iaia sasirduti-kunapagma rispa, ¹⁵ tapurkakunata:

—Nuka kamkunata Jesusta apichigpika, ¿maituku kulkitak karawantrangichi?

Chiura, paikuna ainirkakuna:

—Kimsa chungá kulkimi kamta karasunchi.

¹⁶ Chasa kulki chaskispaka, Judas maskai kallarirka, imasa Jesusta apichingapa.

Iaia Jesús, ña wañungapa chaiakuura, katiraiagkunawa mikuskamanda

¹⁷ Tanda mana libadurawa mikudiru atun punchakuna kallariura, chi punchaka Jesusta katiraiagkuna, kaillaiaspa, tapurkakuna:

—Paskua punchapa mikui kam mikungapa, ¿maipitak munangi, nukanchi allichigringapa?

¹⁸ Chiura, Jesuska ainirka:

—Riichi Jerusalén puibluma, kasa suti runapa wasima. Paita nigriichi: “Nukanchita iachachig taitami kachamú, kamta ningapa: ‘Nukapa puncha, ñami chaiamuku. Nuka munakunimi, kamba wasipi katiraiawagkunawa paskua mikungapa’.”

¹⁹ Chasa uiaspa chi katiraiagkuna, imasa Jesús niskasina ruragrispaka, allichirkakuna, paskua mikungapa.

²⁰ Ña tutaiauraka, Jesús paipa chungá iskai agllaska runakunawanta tiarigrirka.

²¹ Tukuikuna mikuspa tianakuura, Jesuska nirkakunata:

—Kasami nuka niikichita: kamkunapuramanda, sugmi apichiwangapa ka.

²² Chasa uiaspa, iapa llakirirkakuna. Nispaka tukuikuna, sug suglla tapui kallarirka-kuna:

—Taita waugki, ¿nukachu apichingapa kaiki?

²³ Jesuska ainirkakunata:

—Kai platupi nukawa maki churagpurami apichiwangapa ka. ²⁴ Imasami ñugpamanda-ta willaraiá: chasallatami kai Runa Tukuskata pasariwangapa ka. Chasa kagpipas, jai, chi runa apichiwag! Chasapaka, chi runa mana tiagsamunmi.

²⁵ Chasa uiaspaka, Judas Jesusta apichingapa kagka tapurka:

—Iachachig taita, ¿nukachu apichingapa kaiki?

Chiura, Jesuska ainirka:

—Ari, kammi kangi.

²⁶ Chara mikunakunkama Jesús, tandata makipi charirispa, “Pai Siñur” Taita Diusta nirka. Tandata pitichispa, katiraiagkunata kuaspa, kasami nirka:

—Chaskiwaichi, mikungichi. Kai, nukapa kuirpumi ka.

²⁷ Nispaka, sug binu kupata makipi charirispa, “Pai Siñur” Taita Diusta nispa, paikunata kuaspa, kasami nirka:

—Tukuikuna upiaichi. ²⁸ Kai, nukapa iawarmi ka, Taita Dioswa i runakunawa ikuti pasinsiachirispa sumaglla tukungapa. Achkakunamandami chi iawar llugsispa, icharingapa ka, pandariikunata pasinsiangapa. ²⁹ Kasami niikichita: kai ubas iaku mana mas upiangapa kanichu, imaura nuka Taitapa suma mandai puncha chaiankama. Chi punchami musu binuta ikuti kamkunawa upiangapa kani.

Jesusta mana rigsinichu, Pedro ningapa kaskamanda

³⁰ Mikuskauramanda, kantaspaka, Olivos lumama rirkakuna. ³¹ Chipi, Jesuska nirkakunata:

—Kasami ñugpamanda librupi willaraiá: “Ubija kawagtami wañuchisa. Chiura paipa ubiakuna, kasama chasamami mitikungapa kankuna”. Chasallatami kamkuna, kai tuta nukata mana rigsiwagsina sakiwaspa, mitikungapa kangichi. ³² Nuka, wañuspa kaugaris-paka, Galilea alpapimi ñugpa kagrisa. Chipimi kawarisakichita.

³³ Chiura, Pedroka nirka:

—Kamta tukuikuna sakingpipas, nukakar ñi imaurapas mana sakingapa kaikichu.

³⁴ Jesuska nirka:

—Kasami nuka niiki: kai tuta, gallu manara kantagpimi kamka kimsa biaji nukamanda ningapa kangi: “Paita mana rigsinichu”.

³⁵ Pedroka ainirka:

—Kamwa wañungapa chaiawagpipas, ñi imaurapas mana chasa ningapa kanichu.

Tukui Jesusta katiraiagkuna, chasallata nirkakuna.

Jetsemaní wirtapi, Jesús Taita Diusta mañaskamanda

³⁶ Jetsemaní suti wirtapi chaiagrispaka, Jesuska katiraiagkunata nirka:

—Kaillapi tianakuichi, nuka chi ladu Taita Diusta mañaspa rimagrinkama.

³⁷ Chasa nispa, Pedrota i Zebedeopa iskai wambrakunata pusaspa, mas karuajma rirka. Chipika, llakii irkiaimi tukurka. ³⁸ Nispaka, chi kimsandikunata nirka:

—Nukata iapa llakii wañungasinami iuiachiwaku. Kamkuna, kaillapi suiawaichi, nukasina mana puñurispalla.

³⁹ Chasa nispaka, mas ñugpasinama rispa, alpama tupagta kumurispa, Taita Diusta mañai kallarirka, kasa nispa:

—Nukapa Taitiku, pudirigpika, kai iapa llakiita* anchuchiwai. Nuka chasa munakugpi-pas, nuka imasa munaskasina mana tukuchu. Kam imasa munaskasina rurai.

⁴⁰ Chasa nispa, chi kimsandikunapagma kutispaka, puñunakuskata tarigrispa, Pedrota nirka:

—¿Manachu ñi sug ratullapas nukawa rigcharaiangapa pudirkangichi? ⁴¹ Mana puñuris-palla, Taita Diusta mañanakuichi, tukui mana allilla ruraikuna kamkunata mana chaiachu. Sungupi allilla rurangapa munanakuspapas, kuirpupika iapa sambami kangichi. Chiwami mana pudingichi, allilla rurangapa.

⁴² Chasa nispaka, ikuti rispa, Taita Diusta mañarka, kasa nispa:

—Taitiku, kai iapa llakiita† mana anchuchiwai pudiringapa kaggpika, kam imasa munaskasina rurai.

⁴³ Sug ratuma ikuti paikunapagma kutiura, puñunakuskata tarigrirka. Paikunapa ñawi, dipuñui wañunakurka.

⁴⁴ Chasa kawasapaka, paikunata sakispa, Taita Diusta imasami ñugpata mañakurka: chasallatami kimsama mañarka. ⁴⁵ Nispaka, ikuti paikunapagma kutispa, nirka:

—Kunaura samariichi, puñuichi. Nukapa ura chaiarkami. Kai Runa Tukuska, mana allilla rurag runakunapa makipimi ña urmarka. ⁴⁶ Atariichi. Akushi. Apichiwag runa, ñami kaillaiamuku.

Jesusta apiskakunamanda

⁴⁷ Jesús chasa rimakugllapi, Judaska chipi chaiagrirka. Chi runa, Jesuspa chungu iskai agllaskakunamandami karka. Chi runawaka iapa achkakunami chaiagrirkakuna, ispada i garutikuna charispa. Paikunaka, iaia sasirdutikuna i sug judíu taitakuna kachaskakunami karkakuna.

⁴⁸ Chi Judas, manara rispalla, willaska karka, kasa nispa: “Maikanta nuka muchasa; chimi ka. Chita apingichi”. ⁴⁹ Imasa niskasina chaiagringallawa, Jesuspagma kaillaiaspa, nirka:

—Puangi, iachachig taita—. Chasa nispaka, paita mucharka.

⁵⁰ Jesuska nirka:

—Waugki, ¿imapatak samukungi?

Chiuralla, kaillaiaspa, Jesusta apirkakuna.

⁵¹ Chasa kawasapaka, sug Jesuswa kagpura, maki suniaspa, ispada surkurka. Nispaka, iaia sasirdutipa lutrinta piaspa, sug rinri ialigta kuchurka. ⁵² Jesuska, paita nirka:

—Kamba ispadata churachidirullapita wakachii. Ispadawa wañuchinakugka, ispadalla-wantami wañuchii tukunga. ⁵³ ¿Manachu iachangi: nukapa Taitata nuka mañagpika, kunauralla mana kuintai pudingasina anjllkunatami kachamuwantra? ⁵⁴ Chasa tukuggpika, ¿imasatak ima nukamanda willaraiaskasina allilla tukunga?

⁵⁵ Chasa nispaka, Judaswa riskakunata nirka:

—¿Imapatak nukata, saisaitasina ispada i garuti kaspikunawa apiwangapa samunakungichi? Tukui punchakunami Diuspa atun wasi ukupi nuka iachachispa tiakurkani. Chipika, ¿imapatak mana apiwarkangichi? ⁵⁶ Nigpika iukarkami, tukui kasa pasaringa, ñugpamanda Santu Ispirituwa rimagkuna willaskasina tukugsamungapa.

Chiura Jesusta tukui katiraiagkuna, paillata sakispa, mitikurkakuna.

Judíu taitapura sugllapi tandariska kaskapi, Jesús kaskamanda

⁵⁷ Jesusta apispaka, Kaifás suti iaia sasirdutipa wasima chaiachigrirkakuna. Moisés ima niskata iachachig taitakuna i sug judíu taitakunapas, chipi tandariska karkakuna.

⁵⁸ Pedroka, karu karullapi katichispa, chi wasi kanchakama chaiagrirka. Nispaka, iaikuspa, chi wasi kawang runakunawa tiarigrirka, kawangapa: Jesusta, ¿imami pasarig-samú?

⁵⁹ Iaia sasirdutikuna i tukui judíu taitakunapas maskanakurka, pipas maski llullaspapas willantra, ima pandariipas Jesús iukagta; chasaka, paita wañuchingapa pudingapa.

* 26:39 “Kai winja kupata”, iapa llakiitami niraiá. † 26:42 “Kai winja kupata”, iapa llakiitami niraiá.

⁶⁰ Achkakuna paimanda llullaspa willanakugpipas, manima pandariikuna iukagta tarirakakuna. Katimakar, iskaikunaka chaiagrirkakuna, ⁶¹ kasa nispa:
 –Kasa niskatami uiarkanchi: “Nukami pudini, Diospa atun wasita puchukangapa; nispaka, kimsa punchallapi ikuti saiachingapa”.

⁶² Chasa uiaspaka, iaia sasirduti, saiarispa, Jesusta tapuchirka:

–Kammanda mana allilla rimanakuskataka, *¿imat*ak mana ainingi?

⁶³ Jesuska, ñi ima mana ainirka. Chiura chi iaia sasirdutika, paita nirka:

–Kamta diltudupa kausag Taita Diospa ñawipimi niiki, kasa willangapa: *¿kam*chu kangi Cristo suti Taita Diospa wambra?

⁶⁴ Chiura, Jesuska ainirka:

–Sutipami kam chasa nukamanda ningi. Kasapasmi niikichita: kai Runa Tukuskata kawawangapami kangichi, tukui manduiug Taita Diospa alli ladu tiakugta. Suma luar-manda puukunapi samukugtapasmi kawawangapa kangichi.

⁶⁵ Chasa uiaspaka, chi iaia sasirdutika, iapa rabiariispa, kikinpa katangata llikichirirka, kasa nispa:

–Kikin Taita Diussina tukuspami willariku. *¿Im*apatak sugkunata suianakusunchi, paimanda imapas willangapa? Ñami nukanchi kikin uiarkanchi, imasa Taita Diussina tukuspa willarigta. ⁶⁶ Kamkuna, *¿im*atak ningichi?

Chiura chi taitakuna, Jesusmanta ainirkakuna:

–Paita wañuchiimi chaiá.

⁶⁷ Chasa ainispaka, Jesusta ñawipi tukaspa, puñitiaspa rurarkakuna. Sugkunaka, paita ñawi kilpaspa, piاسpa, ⁶⁸ ninakurka:

–Kam Taita Dios agllaska Cristo kaspaka, willamui: *¿pit*ak kamta piarka?

*Jesusta mana rigsini*chu, Pedro niskamanda

⁶⁹ Chikama Pedroka, chi wasi kanchallapimi tiakurka. Chiura sug kawag warmi, kailliaspa, paita tapurka:

–*¿Man*achu kampas, chi Galileamanda Jesuswa purikurkangi?

⁷⁰ Pedroka, chasa uiaspa, tukuikunapa ñawipi ainirka:

–Manima iachanichu, kam imamanda chasa rimakugta.

⁷¹ Chasa ainispaka, atarispa, iaikudiru atun punguma rirka. Ikuti chipipas sug warmi, paita kawaspaka, chipi kagkunata nirka:

–Kai runapasmi chi Nazaretmanta Jesuswa purikurka.

⁷² Pedroka, ikuti chasa uiaspa, ainirka:

–Diospa ñawipimi niiki: nuka mana chi runata rigsinichu.

⁷³ Ikuti sug ratullapi, chipi kagkunapas, kailliaspa, Pedrota nirkakuna:

–Kampas, sutipami chi runapura kangi. Kamba rimaillapimi allilla rigsiri, paiwa kam-purakuna kagta.

⁷⁴ Chiura Pedroka, kikinmanta mana suma rimarispa, nii kallariirka:

–Nukaka, Diospa ñawipi sutipami niikichita, mana llullaspalla. Nukaka, chi runata mana rigsinichu.

Pedro chasa nigllapika, gallu kantarka. ⁷⁵ Chiura iuiarigsamurka, imasa Jesús kikin Pedrota nigta: “Gallu manara kantagpimi kamka kimsa biaji nukamanda ningapa kangi: ‘Paita mana rigsinichu.’” Chasa iuiarigsamuspaka, kanchama llugsispa, dillakii wakai kallariirka.

27

¹ Pakarigllapi, iaia sasirdutikuna i judíu taitakuna, tukuikuna tandarispaka, Jesusmanta rimanakuspa iuiarirkakuna, paita wañuchingapa. ² Chasa iuiarispaka, paita wataspa, Pilatos suti mandagpagma chaiachigrirkakuna.

Judas Iskariote sipiriskamanda

³ Tukui chasa uiaspa, Judas Jesusta apichigka kawarka, Jesús sutipa wañuchii tukungapa kagta. Nispaka, kikin mana allilla ruraskamanda llakii piarka. Chi kimsa chungu kulkita iaia sasirdutikunata i sug taitakunatapas kutichigrirka, ⁴ kasa nispa:

–Nukaka, kunaaurami iuiariwarka, mana allilla ruragta. Ñi ima pandariipas mana ruraska runatami wañuchingapa apichirkani.

Paikunaka nirkakuna:

–Nukanchitaka, *¿im*atak ninkangi? Chika, kam kikinllami iachankangi.

⁵ Chasa uiaspa Judaska, Diospa atun wasi ukuma kulkikunata sitaspa, rirka sipiringapa.

⁶ Iaia sasirdutikunaka, chi kulkikunata tandachispa, nirkakuna:

–Kai kulkika kanmi sug runata katuska; chasaka, paita wañuchingapa. Chimandami michá, Taita Diusta karaska kulkikunawa chapungapa.

⁷ Chasa nispaka, tukui iuiarirkakuna, chi kulkikunawa manga ruradiru suti alpata randingapa. Karunigmanda runakuna samuspa wañuskakunata pambangapami randirkakuna. ⁸ Chasamandami kunankama chi alpata sutichiska kapunkunata: “Iawar alpa”.

⁹ Chasami tukugsamurka, imasa Jeremías suti Santu Ispirituwa rimag ñugpata willaskasina. Kasami willaraiarka:

Israelmanda runakuna,

kimsa chungu kulki kuaskata ikuti sitaska kaskatami tandachirkakuna.

¹⁰ Chikunawaka, manga ruradiru alpata randirkakuna.

Chasami atun Taita Dios nukata: “Rurangi” niwaska karka.

Mandag Pilatos kaskapi, Jesús kagriskamanda

¹¹ Jesús, mandag Pilatos kaskapi saiarigrirka. Paitaka, Pilatos tapuchii kallarirka:

—Kam, ¿judiukunapa atun mandagchu kangi?

Chiura, Jesús ainirka:

—Sutipami kam chasa nirkangi.

¹² Iaia sasirdutikuna i sug taitakunapas Jesusmanda mana allilla ruragta nispa juchachinakugpipas, paika tukuipimi upalla karka. ¹³ Chimanda Pilatoska, paita tapurka:

—¿Manachu uiakungi, kam achka mana allilla ruraskakunata willanakugpipas?

¹⁴ Jesuska, ñi imapas mana ainirka. Chimanda Pilatos, iapa ujnarispa kawarka.

Jesusta wañuchigriichi, Pilatos niskamanda

¹⁵ Wata watapi atun puncha chaiaura, Pilatos iacharka, sug maikan karsilpi kaskata runakuna mañaskata kacharinga. ¹⁶ Chi punchakuna, tukuikuna rigsiska [Jesús] Barrabás suti runami karsilpi wichkaraiarka. ¹⁷ Tukui runakuna tandariska kaura, Pilatos tapurkakunata:

—¿Maikantatak kamkuna munanakungichi, nuka kacharingapa: [Jesús] Barrabasta u Cristo suti Jesusta?—. ¹⁸ (Pilatos allillami iacharka, ianga Jesusta mana munaspa, wañuchingapa munanakugta. Chimandami chasa chipi kagkunata tapurka.)

¹⁹ Chiuraka, Pilatos justisiai ruradirupi tiakuskama, paipa warmika kasa nispa kacharka: “Chi alli runata ianga kawai. Nuka, kunantuta iapa mana sumami paimanda muskurkani”.

²⁰ Chikamaka iaia sasirdutikuna i sug taitakunapas, chipi kagkunawa chapurispa chapurrispa rirkakuna, kasa nispa:

—Mañaichi, Barrabasta kacharichu. Jesustaka wañuchichu.

²¹ Ikuti Pilatoska tapurkakunata:

—Chi iskai runakunataka, ¿maikantatak kamkuna munanakungichi, nuka kacharingapa?

Chiura, tukui chipi kagkuna kaparirkakuna:

—Barrabasta.

²² Chasa uiaspaka, Pilatos tapurkakunata:

—Nigpika, ¿imatak munanakungichi, kai Cristo suti Jesusta nuka rurangapa?

Chiura, tukuikuna kaparirkakuna:

—Kruspi churaspa wañuchii.

²³ Pilatos tapurkakunata:

—Kamkunataka, ¿imapatik kawari, mana allilla ruraska kagta?

Paikunaka, mas sinchi kaparispa, ikuti nirrakuna:

—Kruspi churaspa wañuchii.

²⁴ Chasa iapa kaparispa uiarinakugmanda, Pilatos iuiarirka, pai ñi imapas mana pudingapa kagta, kispichingapa. Nispaka, chipi kagkunapa ñawipi iakuwa maki maillarirka, kasa nispa:

—Kai alli runa kamkunapa makipi wañuchii tukungapa kaskamanda, nukataka mana iuiachiwanchu, ñi ima kulpa iukagsina. Chika, kamkunatami chaiangapa ka.

²⁵ Chiura tukui chipi kagkunaka, kasa ainirkakuna:

—Ari, chi runa wañuchii tukuskamanda, nukanchita i nukanchipa wambrakunata imasa chaiaskasina chaiachu.

²⁶ Chasa uiaspaka Pilatoska, Barrabasta kacharirka. Jesustakar mana llakispalla iapa asutichirka. Nispaka, suldadukunapa makipi sakirka, paikuna kruspi klabaspa wañuchingapa.

²⁷ Chiura chi mandagpa suldadukunaka, Jesusta wasi kanchamalla pusarkakuna. Chipika, tukui suldadukuna tandachirirkakuna. Jesús kaskapi muiugta saiarirkakuna.

²⁸ Nispaka, paipa katangata surkuspa, sutipa mandagsina kawaringapa, pichi katanga katachirkakuna. ²⁹ Ispinakunalla llaugtu simbaspa, paipa umapi churachirkakuna.

Pukunga bara alli makipi charichispaka, ñugpa ladu kungurispaka, muchanakugsina burlarinarurka, kasa nispá:

—Puangi, kam judiukunapa atun mandag. ¿Allillachu kapuangi?—. ³⁰ Chasa ninakuspaka, paita tukaspa, pukungata kichuspa, chillawanta umapi pianakurka. ³¹ Paita chasa asiskauramandaka, pichi katangata surkuspa, ikuti kikinpata churachirkakuna.

Jesusta kruspi klabagriskakunamanda

Chi wasimandaka Jesusta llugsichirkakuna, paita kruspi klabagringspa. ³² Rinakuskapika, Sirene puiblumanda Simón suti runa, ñambipi tuparka. Chi runataka Jesús markaspa apakuska krusta markachirkakuna.

³³ Gólgota suti pambamami Jesusta chaiachigrirkakuna. (Chi Gólgota niraianni: “Uma Tullu pamba”.) ³⁴ Chipika, mira kupal chapuska binu paita karanakurka upiangapa. Paika, chi binuta tantiaspa, mana munarka upiangapa.

³⁵ Jesusta kruspi klabaspaka, paipa katangakunataka suirtipi pugllarkakuna, iachangapa: imasami chaiá, paipura sug sug apangapa. ³⁶ Nispaka, chipi tiarirkakuna, paita kawanakungapa.

³⁷ Kruspi, Jesuspa uma awa ladu, sug willaraiaskami churarkakuna, kawaspa, imamanda wañuchii tukukugta iachangapa. Chipi, kasami niraiarka: “Kaimi ka Jesús suti judiukunapa atun mandag”.

³⁸ Chillapita, iskaí saiakunata kruspi klabaspa saiachirkakuna: sugtaka Jesuspa alli ladu, sugtaka paipa lluki ladu. ³⁹ Chipi ialinakug, Jesusta kawaspaka, uma kaima chima chabsichirispaka, kaminakurka, ⁴⁰ kasa nispá:

—Kamsina ningi, Diospa atun wasita lim wagllichispa, ikuti kimsa punchallapi saiachingapa; kunaura kam kikin kispichirii. Kam sutipa Taita Diospa wambra kaspaka, krusmanda uraikui.

⁴¹ Chasallata iaia sasirdutikunapas, Moisés ima niskata iachachig taitakuna, sug taitakunawapas, Jesusta iapa unzaspa ninakurka:

⁴² —Chiins, sugkunata kispichigsamurkasi. Niggpika pai kikinka, mana pudí kispichiringspa. Israelmanda runakunapa atun mandagsi ka. Kunaurakar, krusmanda kikinlla uraikuchu. Chasa kawaspami paimanda suma iuiarisunchi. ⁴³ Taita Diosllatasi iuiaspa karka. “Taita Diospa wambra kani” nikurka. Sutipa Taita Dios paita kuiagpika, kunaura kispichigsamuchu.

⁴⁴ Sisaikuna Jesuswa sugllapi kruspi kagkunapas, chasallata kaminakurka.

Jesús wañuskamanda

⁴⁵ Ña chaugpuncha tukuuramanda chaugpi chisikama, tukui alpa tutaiagsamurka. ⁴⁶ Chaugpi chisi kaura, Jesuska sinchi kapariwa kaparirka, kasa nispá:

—Elí, Elí, ¿lema sabaktani?—. Chi niraianni: “Nukapa Dios, nukapa Dios, ¿imapatak nukata sapalla sakiwangi?”.

⁴⁷ Chasa uiaspaka, chipi saianakugpura nirkakuna:

—Kai runa, Elías suti ñugpamanda willagtami kaiaku.

⁴⁸ Chasa iuiaringallowaka, sug paipura saianakuskamanda kalpaka. Sug ispunja apispa, chiwa winja binuta jukuchispa, chaglla puntapi churarka, Jesuspa simima atarichispa, chupachingapa. ⁴⁹ Sugkunaka nirkakuna:

—Ianga kawai. ¿Sutipachu Elías samú, paita kispichingapa?

⁵⁰ Jesuska, ikuti sinchi kaparispaka, paipa ispirituta Taita Diusta mingaspa, wañurka. ⁵¹ Wañugllapi, Diospa atun wasi ukupi atun linsu arkaraiaiska, awanigmamanda ura ladukama chaugpi chaugpimi llikirigsamurka. Alpapas kuiurirka. Rumi piñakunapas, chaugpi chaugpi pakirirkakuna. ⁵² Chiwanka, wañuskakunapa bubidakunapas paskarirkakuna. Taita Diosmandalla kaugsaspa wañuskakuna, Jesús kaugsariskauramanda, achkakunapasmi kaugsarirkakuna. ⁵³ Nispaka, pambaraiaskamanda llugsispa, Taita Diospalla kaska Jerusalén puibluma iaikugrirkakuna. Chipika, achka runakunatami kawachirirkakuna.

⁵⁴ Alpa iapa kuiurikugmandaka, kapitan i paiwa Jesusta kawanakugka, ima pasarikuskata kawaspaka, iapa mancharispa, nirkakuna:

—Kai runa, sutipami Taita Diospa wambra karka.

⁵⁵ Achka warmikunapasmi chipi karkakuna, karumandalla kawaspa. Paikuna karkakunami Galilea alpanigmamanda Jesusta sugllapi katiraiagkuna, paita imapiipas aidaspa. ⁵⁶ Paipura karkakunami María Magdalena, Zebedeopa wambrakunapa mama i sug María sutipas; chi María, Santiago i Josepa mama.

Jesús pambai tukuskamanda

⁵⁷ Ña chisiakuuraka, Arimatea puiblumanda José suti achka iukag runaka Pilatospagma rirka. Chi runapas, Jesús iachachikuskata iuiái apakurka. ⁵⁸ Chi runaka, Pilatospagpi iaikugrispa, Jesuspa kuirputa mañarka. Chiura, Pilatoska nirka:

—Allillami ka. Apaichi.

⁵⁹ Chiura Joseka, Jesusta krusmanda uraikuchigrirka. Nispaka, musu linsuwa maituspa, murtajarka. ⁶⁰ Sug rumi piñapi, José iukarka atun utkuchiska; chipika, kikin pambai tukungapa. Chipimi Jesuspa kuirputa churagrirkakuna. Nispaka, utku punguta sug atun rumiwa wichkaspaka, sakirkakuna. ⁶¹ José riura, María Magdalena i sug Mariapas chi pungu ñugpa ladu tiarispa kidarkakuna.

Jesusa kuirpu pambaraiaska punguta, suldadukuna chapanakuskamanda

⁶² Warda punchapa allichidiru puncha ña ialiura, kaiandi iaia sasirdutikuna i fariseo-kunaka Pilatospagma chaiagrirkakuna, ⁶³ kasa nispa:

—Taita waugki, nukanchi iuiarirkanchimi: chi llulla runaka, kaugsakunkama kasami nirka: “Kimsa punchapika ikutimi kaugsaringapa kani”. ⁶⁴ Chimanda, suldadukunata kachapuai, pambaraiaska punguta chapanakuchu, kimsa puncha ialinkama. Mana kagpika, paiwa purigkuna, kuirputa apagrispa, ningakunami: “Wañuskaka, sutipami kaugsarirka”. Chasa llullachigpikuna, chi runa ñugpa llullachiskakunamandapas mas mana allillami tukugsamungapa ka.

⁶⁵ Chiura, Pilatos nirka:

—Suldadukunami iukangichi. Pusaichi. Kamkuna imasa munaskasina ruragriichi.

⁶⁶ Chiura paikuna, rispa, pambaraiaska punguta siñalaspaka, mas suma wichkagrirkakuna. Nispaka, suldadukunata sakirkakuna, chipi chapanakungapa.

28

Jesús kaugsariskamanda

¹ Judiukunapa warda puncha ña ialiska kaura, simana kallarii puncha u dumingu pakarikuuraka, María Magdalena sug Mariawa rirkakuna Jesús pambaraiaskama, kawangapa. ² Chiura alpa, iapa kuiurigsamurka. Atun Taita Diospa anjilsi, suma luarmanda uraikumuspa, chima kaillaiaspaka, kawarigsamurka. Nispaka, kilparaiaska rumita anchuchispa, chi awalla tiarirka. ³ Chi anjil, rilampa punchaiachiisinasi kawarirka. Katangapas, iapa iura puuisinasi kawarirka. ⁴ Chasa kawaspaka, chi pambaraiaska punguta chapanakug suldadukuna, iapa mancharispa, chugchurispa, wañuskasinasi alpama urmarkakuna.

⁵ Warmikunataka, anjil nirka:

—Mana manchanakuichi. Iachanimi: kamkuna, Jesús kruspi wañuskatami maskanakingichi. ⁶ Kaipika mana kanchu. Imasami pai kikin nirka: chasami kaugsarirka. Pai churaska kaskata kawagsamuichi. ⁷ Kawaspaka, utka riichi. Paita katiraiagkunata willagriichi: “Pai Jesús wañuska, ñami kaugsarirka. Ñugpami Galilea alpama ringapa ka. Chipimi kawanakungapa kangichi”. Ñami willarkaikichita.

⁸ Chi warmikunaka, chasa uiaspa, chimanda utkalla anchurirkakuna. Mancharispa, alli iuiarispa, kalparkakuna, Jesusta katiraiagkunata willangapa. ⁹ Rinakugllapi, Jesús kikinka paikunata kawarirka, “Puangi” nispa. Chiura paikuna, kungurispa, chakita ugllaspaka, paita mucharkakuna. ¹⁰ Chiura, Jesuska nirkakunata:

—Mana manchanakuichi. Riichi; nukata katiraiawag waugkikunata willagriichi, Galilea alpama richukuna. Chipimi kawawangapa kankuna.

Chapanakug suldadukuna imasa willagriskamanda

¹¹ Warmikuna rinakunkama, suldadukuna pambaraiaska punguta chapanakug, Jerusalén puibluma sugkuna rirkakuna, iaia sasirdutikunata tukui imasa pasarigta willagriringapa. ¹² Chasa uiaspaka, tukui taitakunawa tandachirinakuspa, sugllasina iuiarigsamurkakuna, chi suldadukunata achka kulki karangapa. ¹³ Kasasi suldadukunata nirkakuna:

—Ningichi: “Tuta nukanchi puñunakunkama, Jesusta katiraiagkuna kuirputa lugsichispa aparkakuna”. ¹⁴ Mandag Pilatos iachagsamugpika, nukanchimi paita imasapas nisunchi. Chasaka, kamkunata ñi imapas mana pasaringachu.

¹⁵ Chi suldadukuna, kulki chaskispaka, imasa paikunata niskasina tukuikunata willanakurka. Chasa iachariskataka kunankamami judiukuna iuiankuna chasa kagta.

Jesús, pai agllaska runakunata ima mingaskamanda

¹⁶ Jesusta chungu sug katiraiagkunaka, Jerusalemmanda Galilea alpama rispa, Jesús ñugpata niska lumama chaiagrirkakuna. ¹⁷ Chipika, paita tarigrirkakuna. Paita kawaspaka, kungurigrirkakuna. Sugkunaka, Jesusta allilla kawanakuspapas, iuianakurka: “¿Sutipacha kantra?”.

¹⁸ Kaillaiaspaka, Jesuska nirkakunata:

—Taita Diosmi nukata kuawarka, sug luarpi i kai alpa luarpipas nuka tukuikunata mandangapa. ¹⁹ Chimandami tukui alpa suiu kachaikichita, tukui runakunata iachachispa puringapa. Chasaka paikunapas, nukawami tukungakuna. Paikunataka, Taita Diospa, Wambrapa i Santu Ispiritupa sutiwa baugtisaspas puringichi. ²⁰ Iachachispa puringichi, nuka tukui kamkunata niskata rurangapa. Nuka, tukui punchakunami kamkunawa sugllapi kangapa kani, kai alpa imaura puchukarinkama.

IAIA JESUSMANDA ALLI WILLAITA SAN MARCOSMI WILLA

Juan Bautista, chusa sitaska alpapi kaskamanda

¹ Diuspa Wambra Jesucristomanda Alli Willai, kasami kallarirka.

² Santu Ispirituwa ñugpamanda rimag Isaiás suti, kasa willaska niraiarka: Kawai. Nuka ima niskata willagta kamba ñugpami kachakuni, kammanda ñambikunata allichipungapa.

³ Chusa sitaska alpapi, sug runa kaparisipami puriku, kasa nispa:

“Imasami ñambi allichinchi:
chasallata alli iuiiakunata apiichi,
atun Taita Diusta chaskingapa”.

⁴ Chasami Juan Bautista, chusa sitaska alpapi kawarigsamurka, kasa nispa:

—Pandariikunata sakispa, Taita Diuswa tukugsamuichi. Baugtisiichi, pandariikunata pasinsiai tukungapa.

⁵ Judea suiu alpamanda i Jerusálén suti puiblunigmanda, tukuinigmanda runakuna paipagma chaiiai kallarirkakuna. Paika, Jordán suti iakupi maikan pandariskakunamanda willarinakuskata baugtisarurka.

⁶ Juanka, kamello suti animalpa agchata awaska katanga churariskami karka. Karata siñidursina ruraspá chumbilliskami karka. Langosta suti chapulinsina i sachukumanda abijunkunapa dusi miskillami mikuspa kaugsakurka. ⁷ Paika, kasa nisipami willakurka:

—Sug nukamanda mas iachaka, nukapa katimi samungapa ka. Paita, nuka mana pudinichu, kumurispa, paipa chakikunapi churaraiaska wataraiaskata paskapungapagllapas.

⁸ Nuka, iakullawami baugtisaikichita. Paika, Santu Ispirituwami baugtisingapa ka.

Jesús baugtisariskamanda

⁹ Chi punchakuna Jesuska, Galilea suti alpa i Nazaret puiblumanda llugsispa, Juanpagma rirka. Chipi chaiagriura, Juan, Jordán iakupi paita baugtisarurka. ¹⁰ Jesús iakumanda llugsikuura, paita awa suma luar paskarigta kawarirka. Chimanda Santu Ispiritu, palumasina rigcha kawarisipami paipagma uraikumurka. ¹¹ Suma luarmanda rimaiipas uarigsamurka, kasa nispa:

—Kam, nukapa kuiaska wambami kangi. Kamta kawaspa, iapa alli sumami iuiachiiwa kawaiki.

¹² Chiuramandaka Santu Ispiritu, Jesusta chusa sitaska alpama pusarka. ¹³ Chipika, sachukumanda animalkuna tiaskapi, chusku chungá puncha tutakunawantami chisiarka. Chi punchakunaka iaia kuku, pandariikunapi paita urmachingapa munakurka. Chi punchakuna ialiuura, anjilkuna paita ima ministiskami karagsamurkakuna.

¹⁴ Chiuramanda, Juan Bautista ña karsilpi wichkai tukuska kaura, Jesuska Galilea alpama rirka. Diusmanda Alli Willaita kasa nispa purii kallarirka:

¹⁵ —Taita Dius niska puncha, ñami chaiamurka. Diuspa suma mandai, ñami chaiamungapa ka. Pandariikunata sakispa, Taita Diuswa tukugsamuichi. Diusmanda Alli Willaita nuka willakuskata suma uiawaichi.

Chusku chawadurkunata, Jesús kaiaskamanda

¹⁶ Galilea atun kucha pata pata purikuspa, Jesús, Simonta i waugkindi Andresta kawarka. Paikuna, chawadurkuna kaspá, ataraia iaku ukuma sitaspa purinakurka.

¹⁷ Paikunata kawaspaka, Jesuska nirakunata:

—Katiwaichi. Iachachisakichitami, chawakunata apigsina, runapura maskapuagkuna kangapa.

¹⁸ Chasa uangallawa, ataraiakunata sakispa, Jesusta katirkakuna.

¹⁹ Chimanda mailla riskapi, Santiago i waugkindi Juan sutitami kawarka. Paikuna, Zebedeopa wambrakunami karka. Kanuapi ataraiakunata allichinakurka. ²⁰ Paikunata kawaspa, Jesuska kaiarkakunata. Paikunapas uangallawa, taitata piunkunallawa kanuapi sakispa, Jesusta katirkakuna.

Sug runa kuku waira iaikuskata, Jesús ambiskamanda

²¹ Chimandaka, Kafarnaum suti puibluma chaiagrirkakuna. Warda puncha tandariduru wasima iaikuspa, Jesús iachachii kallarirka. ²² Pai iachachikuskata uiaspaka, iapa ujnarikakuna. Moisés ima niskata iachachig taitakunasinalla, pai mana iachachikurka. Tukukunamanda mas suma allilla mandagsinami iachachikurka.

²³ Chi tandariduru wasipika, sug kuku waira iaikuska runami chaigrirka. Chi runaka, kaparispa nirka:

²⁴ —Nazaret puiblumanda Jesús, ¿imapatak nukanchipagma samurkangi? Nukanchita puchukangapachar samurkangi. Nuka allillami rigsiiki, kam Taita Diospa tukuipi mas alli wambra kagta.

²⁵ Jesuska, kuku wairata piñaspa, nirka:

—Upalla rikui, kai runamanda llugsispa.

²⁶ Chiura kuku waira, chi runata chugchuchispa, sinchi kaparichispa, llugsirka. ²⁷ Tukui chasa kawagkuna, iapa mancharirkakuna. Kikinpura tapurinakurka:

—Chi pasariska, ¿imasik niraiá? Kai runaka, musu rimaiwami atun mandagsina suma iachachiku. Kuku wairakunata pai rimaura, ima niskata uiaspa, runamanda anchurinkuna.

²⁸ Chiwanka, mana unaila Galilea alpa suiu Jesusmanda iacharigsamurka.

Achka ungugkunata, Jesús ambiskamanda

²⁹ Chi tandariduru wasimanda llugsispa, Jesús, Santiago i Juanwanta Simón i Andrespa wasipi iaikugrirkakuna. ³⁰ Chipika Simonpa suigra, rupaiwami ungug sirikurka. Paimandaka Jesusta willarkakuna:

—Ungugmi siriku.

³¹ Chasa uiaspa Jesuska, paipagma kaillaiaspa, makita apispa, atarichirka. Atarigllapi, rupai anchurirka. Chiura chi warmi, atarispa, mikui ianuspa, karai kallarirkakunata.

³² Chi tuta, indi ña chingaska kaura, ungugkuna i kuku wairawa kaskakunata, tukui-kunatami Jesuspagma chaiachigrirkakuna. ³³ Chi puiblumanda tukui runakuna, wasi punguma tandarigrirkakuna. ³⁴ Chiura Jesuska, maituku ungugkuna kaskakunatapasm ambirka. Chasallata, achka kuku wairakunatami llugsichirka. Chi kuku wairakuna iacharkakuna pi Jesús kagta. Chimandami chi kukukunata mana sakikurka, chasa willangapa.

³⁵ Kaiandi iapa tutata, Jesuska atarirka. Chi puiblumandaka rirka mana maikan runakunapas kaugsanakuska alpama. Chipika, Taita Dioswa rimanakui kallarirka. ³⁶ Simón i paiwa kagkunaka, Jesusta maskagrirkakuna. ³⁷ Paita tarigrispaka, nirkakuna:

—Kamta, tukuikunami maskanakú.

³⁸ Jesuska ainirkakunata:

—Kai suiu puiblukunama risunchi, Alli Willaita willangapa. Chasamandami nuka llugsimuspa purikuni.

³⁹ Pai imasa niskasina, Galilea alpapi tukui tandariduru wasikunapi iaikuspa, Alli Willaita willaspa, kuku wairakunata llugsichispami purikurka.

Aicha ismui unguiwa kaskata, Jesús ambiskamanda

⁴⁰ Sug runa, aicha ismui ungui iukaspa, Jesuspagma chaigrirka. Chi runaka, kungurrispa, nirka:

—Kam munaspaka, pudingimi nukata ambiwanga.

⁴¹ Chiura Jesuska, iapa llakirispa, ungugta maki churaspa, nirka:

—Ari, munanimi. Ambiriska tukui.

⁴² Chasa nigllapi, chi ungui allilla ambirigsamurka. ⁴³ Chiura Jesuska, chi runata kachakuspa, sinchi rimaspa, nirka:

⁴⁴ —Uiamui. Mana pitapas willakungi. Sasirdutita kawachirigrii. Moisés kamariku karangapa niraiaskasina karagrii. Chasaka, tukuikunami kawangakuna, kam allilla ambiriska kagta.

⁴⁵ Chi runaka, mana uiaspalla, maipi riskapi tukuikunata imasa pasariska willaspa aparka. Chasa kagmanda, Jesuska ñi maikan puiblumapas mana pudikurka iaikuspa kawarigringapa. Chiwanka, maikan runapas mana kaugsanakuskapimi purikurka. Chasa kagpipas, tukuinigmamandami paipagma chaianakugrirka.

2

Mana kuiuringapa unguiwa kaskata, Jesús ambiskamanda

¹ Sug punchakuna ialiuira, Jesuska Kafarnaum puibluma ikuti iaikugrirka. Pai wasipi kagta iachariura, ² achka runakuna chi ukupi kanchawanta jundagrirkakuna. Chiura Jesús, Diospa Rimaita willai kallarirkakunata.

³ Chasa iachachikuura, chusku runakunaka, mana kuiuringapa unguiwa kaskata wanduspa, chi wasima aparkakuna. ⁴ Iapa achka runakuna ukupi junda kagmanda, mana pudirkakuna Jesús kaskama iaikuchingapa. Chimandaka, wasi awama sikachirkakuna. Jesuspa awa ladu wasita utkuchispa, chi runa chakanapi sirikuskata Jesuspa ñawi ladu

uraikuchirkakuna. ⁵ Chiura Jesuska, “Ambipuangami” iuianakuskata kawaspaka, mana kuiuringapa unguiwa kaskata nirka:

—Wambra, kam pandariikunata ñami pasinsiaska kang'i.

⁶ Moisés ima niskata iachachig taitakunapasm'i chi ukupi tianakurka. Jesús chasa niskata uiaspa, chi runakunaka sungullapi iuianakurka: ⁷ “Kai runa, ¿imapatak Diussina tukuspa, chasa rimaku? Ñi pipas mana pudinkunachu, pandariikunata pasinsiangapa. Taita Diusllami pasinsiangapa pudí”.

⁸ Jesuska, chasa iuianakuskata iachaspa, nirkakunata:

—¿Imapatak chasa sungullapi iuianakungichi? ⁹ ¿Maikantak mas alli ka: kai runata ningapa: “Kam pandariikunata ñami pasinsiaska kang'i”? Mana kagpika, ¿ningapa: “Atarii; chakanata markarispa, kamba wasima riilla; ña ambiriskami kang'i”? ¹⁰ Kunaura kawachisakichita: kai Runa Tukuska, kai alpapi pudinmi, pandariikunata pasinsiangapa.

Chasa nispa, mana kuiuringapa unguiwa kaskataka nirka:

¹¹ —Nukami niiki: atarii. Chakanata markarispa, kamba wasima rii.

¹² Chasa nigllapi, chi runa atarirka. Chakana sirikuskata markarispa, tukui chipi kagkuna kawanakugllapi, llugsispa rirka. Chasa kawaspaka, iapa ujnarispa tukugsamurkakuna. Taita Diusta iapa suma atuniachirkakuna, kasa nispa:

—Kunaurasina suma ruraskata ñi imaurapas mana kawaska kanchichu.

Leví suti runata, Jesús kaiaskamanda

¹³ Chiuramanda Jesuska, ikuti kucha pata laduma rirka. Chiura iapa achka runakuna, paipagma chaiagrirkakuna. Chipika, paikunata iachachii kallarirka. ¹⁴ Ña puchukaskauramanda, mana judíu kaskakunamanda kulki chaskikuspai ialikurka. Chipika, Alfeopa wambra Leví sutimi tiakurka. Chi runata kawaspaka, Jesuska nirka:

—Katiwai.

Chiura chi runa, atarispa, Jestusta katii kallarirka.

¹⁵ Nispaka, Jesuswa sugllapi katiraiagkunawanta Levipa wasima iaikugrispa, mikungapa tiarigrirkakuna. Paipura kulki chaskigkuna i mana allilla ruragkunapas, achkakunami paikunawa tianakurka. Iapa achkakunami Jestusta katiraiarkakuna, pai iachachikuskata uangapa.

¹⁶ Jesús chi runakunawa mikunakuskata kawaspaka, Moisés ima niskata iachachig taitakuna i fariseokuna paipa katiraiagkunata tapurkakuna:

—Kamkunata iachachig, ¿imapatak mana judíu kaskakunamanda kulki chaskig i mana allilla ruragkunawa sugllapi mikuku?

¹⁷ Chasa uiaspaka, Jesuska nirkakunata:

—Mana unguiwa kagkuna mana ministinkunachu, ambigta maskangapa. Ungugkunami ambigta maskankuna. Chasallata, nukaka mana samurkanichu, allilla ruragkunata kaiangapa. Mana allilla ruragkunata maskangapami samurkani; chasaka, Taita Diuswa allilla tukungapakuna.

Imaura mana mikungapa, Jesús iachachiskamanda

¹⁸ Juan Bautistawa i fariseokunawa purigkuna iukarkakuna, sug punchakuna mana mikuspalla chisianga. Chimanda sug runakuna, Jestusta tapugrirkakuna:

—Kamta katiraiagkuna, ¿imawantak imaurapas mikuspalla kankuna? Ikuti Juanwa i fariseokunawa purigkunaka, achka punchakuna mana mikuspallami chisiankuna.

¹⁹ Chiura, Jesuska ainirkakunata:

—Kasaraipi, kusa tukunga kunbidaskunawa kankama, ¿mana mikuspallachu kangakuna? Manima. Imaura kusa tukunga paikunawa kankama, iukankunami sumaglla mikuspa kangakuna. ²⁰ Imaura chaiachu, kusa anchuchii tukungapa: chiurami paikunata chaianga, mana mikuspalla kangapa.

²¹ —Ñi pipas, ruku katangapi musu linsuwa mana sirangichichu. Chasa siragpika, tagsaura, chi linsu, uchullaiaspa, ruku katangatami llikichinga. ²² Chasallata ñi pipas, musu binu, ruku kara taligapi mana tallingichichu. Chasa talligpika, musu binu timbuura, taligata tugiachispami icharinga. Kara taligapas mana balinchu. Chimandami musu binu, musu taligapi tallingapa chái.

Warda punchamanda, Jesús iachachiskamanda

²³ Sug warda puncha, Jesús katiraiagkunawanta chagra tarpuraiskakunapi ialinakurka. Katiraiagkunaka, trigu ispigakunata pitii kallarirkakuna. ²⁴ Chasa kawaspaka, sug fariseokuna Jestusta tapurkakuna:

—Kawamui. Kamta katiraiagkuna, ¿imapatak warda puncha pandarinakú?

²⁵ Jesuska ainirkakunata:

—¿Manachu imaurapas ñugpamanda librupi willaraiaskata kawarkangichi, taita David i paiwa kagkunapas, iarkaimanda i ministiska kaspá, imasa ruragtakuna? ²⁶ Pai kikin, Diuspa wasi ukuma iaikuspa, Abiatar suti iaia sasirduti kaura, altarpí churaska tandakuna tiaskata mikurka, mana imapas mancharispalla. Chi tandakuna, sasirdutikunalla mikurirumi karka. Chi tandakunallatata paiwa kagkunatapas kararka, mikungapa.

²⁷ Kasapasmi Jesús nirkakunata:

—Runakunamandami Taita Dius nirka, warda punchakuna samangapa tiachu. Mana runakunata rurarkachu, warda punchakuna samangapaglla. ²⁸ Chimanda kai Runa Tukuska pudinmi ninga, warda punchakunatapas imasa chaiaskasina rurangapa.

3

¹ Chi punchallatata, tandaridiru wasipi ikuti Jesús iaikugirka. Chipika, sug maki chakiriska unguiwa kag runa, paikunawa sugllapi karka. ² Jesusta chapanakurka, warda puncha chi unguga ambichu; ambigpika, paimanda justisiakunapagma willagrangapa. ³ Jesuska, chi runa maki chakiriska kaskata nirka:

—Atarii. Runakunapa chaugpipi saiarigsamui—. ⁴ Chasa nispa, chipi kagkunataka tapurka— Warda puncha, ¿imaták mas alli ka: allilla u mana allilla rurangapa; runata kispichingapa, ubi wañuchingapa?

Chiura, upallami tianakurka. ⁵ Jesuska, rabiawa kawarkakunata. Paikunapa iuiái iana tutapisina kagmandami llakirirka. Nispaka, chi ungu runata nirka:

—Maki chutachii.

Chasa chutachigllapi, chi makika aliarka.

⁶ Chasa kawaspa fariseokunaka, llugsispa, mandag Herodeswa purigkunawa tandarigrispa, Jesusmanda rimanakui kallarikakuna, imasapipas paita wañuchingapa.

Kucha pata ladu, iapa achka runakunata, Jesús ambiskamanda

⁷ Jesús katiraiagkunawanta kucha patama rirkakuna. Galilea alpanigmanda achka runakunami paita katchinakurka. ⁸ Pai tukuipi iapa suma ruraskakunata iachaspa, Judea alpanigmanda, Jerusalén puiblunigmanda, Idumea suti alpanigmanda, Jordán iaku sug ladu chimbánigmanda, Tiro i Sidón puiblu kuchukunamanda, tukuinigmándapasmí iapa achka runakuna pai kaskama chaiagrirkakuna. ⁹⁻¹⁰ Iapa achkakunata ambikugmanda iachaspa, tukui unguiwa kagkuna munanakurka, paita llamkaspa ambiringapa. Kichunakuiwantami jundanakurka. Chimanda Jesuska, katiraiagkunata nirka:

—Sug kanuata allichiskalla suiawangichi—. Chi achka runakuna paita tanganakuiwanta iapa jundanakugmandami chasa nirka.

¹¹ Kuku waira iaikui tukuska runakunapas, paita kawaspa, paipa ñugpa ladu kungurispa, kaparinakurka, kasa nispa:

—Diuspa wambrami kangí.

¹² Chiura Jesuska, chasa kaparinakuskata sinchi rimaspa nirkakunata:

—Nukamanda mana willanakuichi nuka pi kagta.

Chunga iskai runakunata, Jesús agllaskamanda

¹³ Chiuramanda Jesuska, awa lumama sikagrispa, pai munaskakunata kaiarka. Chiura, paipagma kaillaiarkakuna. ¹⁴ Chiura, chungá iskaikunatami agllarka. Chi agllaskakunataka nirka:

—Kamkunata agllaikichitami, kamkuna nukawa kangapa i kamkunata kachangapa, Diuspa Rimaita willaspa puringapa. ¹⁵ Chasallatami pudingapa kangichi, kuku wairakunatapas llugsichingapa.

¹⁶ Chi chungá iskai agllaskakuna, kasami suti karkakuna: Simón (paita, Jesús sutichirka Pedro); ¹⁷ Santiago i paipa waugki Juan (paikuna, Zebedeopa wambrakunami karka; paikuna iapa kurinti kagmanda, Jesús sutichirkakunata Boanerjes; chi niraiami “Triwinu wambrakuna”); ¹⁸ Andrés; Felipe; Bartolomé; Mateo; Tomás; Alfeopa wambra Santiagollatata suti; Tadeo; sug Simón (kananeo suti runakunawa ñugpata purig); ¹⁹ i Judas Iskariote, Jesusta katuspa apichig.

Jesusta, iaia kukupa iachaiwa kagta juchachinakuskamanda

²⁰ Jesús ikuti wasima chaiagriskauramanda, iapa achka runakuna ikuti jundagrirkakuna. Jesuswa kagkunata ñi mikungapagllapas mana sakinakurka. ²¹ Jesuspa paipurakunaka, chasa iachaspa, ninakurka:

—Upami tukurka—. Chimanda chaiagrirkakuna, paita pusangapa.

²² Moisés ima niskata iachachig taitakuna, Jerusalemamanda chaiagriska karkakuna. Chi runakunaka nii kallarikakuna:

—Beelzebú suti iaia kukumi iuká. Chi iaia kukupa iachaiwami kuku wairakunata llugsi-chiku.

²³ Chasa ninakugmanda, Jesuska, paikunata kaiaspa, iui ai apingasina suma parlarka, kasa nispa:

—¿Imasatak iaia kuku, paipura kaspa, llugsichingapa munanga? ²⁴ Nintranchi: sug alpapi mandagpura piñachinakuspa makanakuspalla kaugsanakugpika, chipi mandai iukanmi puchukaringa. ²⁵ Chasallata, sug wasipi piñanakuspalla kaugsanakugpika, mana allilla kangapa kanchu, sumaglla sugllapi kaugsanakungapa. ²⁶ Chasallatami kantra: iaia kukuwa kagpura piñachirinakuspa kagpika, iukankunami parijuma puchukarinakunga.

²⁷ —Maikanpas sug wapu runapa wasima iaikuspa, ima iukaskata kichungapa munaspa, iukanmi ñugpa paita watanga. Mana kagpika, manima kichungapa pudingapa kanchu.

²⁸ —Kasami nuka niikichita: runakuna pandariskata tukuitami pasinsiai tia. Taita Diosmanda iapa jiru mana uiangasina rimaska pandariskakunatapasm pasinsiai tia. ²⁹ Ikuti maikan Santu Ispiritumanda iapa jirukuna rimaskataka ñi imaurapas mana pasinsiai tiangapa kanchu. Chasa jiru rimaskakunamandami chi runakunaka diltudupa kulpa iukangapa kankuna—. ³⁰ “Jesuska, kuku waira iaikuskami ka” ninakugmandami pai chasa ainirkakunata.

Sutipa Jesuspa familiakunamanda

³¹ Jesús kaskama, paipa mama i waugkindikuna chaiagrirkakuna. Kanchamandalla kacharkakuna, paita kaiangapa. ³² Iapa achka runakuna, Jesús kaskapi muiugta tianakurka. Chiuraka, paita nigrirkakuna:

—Uiamui. Kamba mama, waugkikuna i panikunami kanchapi suianakú, kamta riman-gapa.

³³ Paika ainirkakunata:

—¿Pikunatak nukapa mama, nukapa waugkikuna niraiankuna?

³⁴ Chasa nispa, muiugta paiwa tianakuskata kawaspa, nirkakunata:

—Kaikunami nukapa mama, nukapa waugkikuna kankuna. ³⁵ Taita Dios imasa munas-kasina maikanpas ruragmi nukapa waugki, nukapa pani, nukapa mama niraiá.

4

Tarpudur runamanda parlu

¹ Kucha pata ladu, Jesús ikuti iachachii kallarirka. Chiura iapa achka runakuna, paipagma chaiagrirkakuna. Chasa kawaspaka Jesuska, iakupi kaska kanua ukuma iaikuspa, tiarirka. Tukui chipi kagkuna, iaku pata ladu alpapi karkakuna, paita uangapa. ² Chiura Jesuska, iui ai apingasina achka suma parlukunawa iachachii kallarirka.

Iachachikuspa, kasami nirkakunata:

³ —Sumaglla uiawaichi. Sug runasi llugsirka, simillakunata sitaspa tarpungapa. ⁴ Tarpukuura, sug simillakunaka ñambipisi urmarkakuna. Chi simillakunataka, piskukunasi mikugsamurkakuna.

⁵ —Sug simillakunaka, rumilla tiaskapisi urmarkakuna, mailla alpa tiaskapi. Mana achka alpa tiagmanda, mana nailla wiñarirkakuna. ⁶ Nigpika, indi piaspa, rupachirka. Mana achka anguiug kaspaka, utkalla chakirirkakuna.

⁷ —Sug simillakunaka, ispina sachakuna tiaskapisi urmarkakuna. Nigpika, ispina sacha wiñarka, simillakunata kilpagta. Chiwanka, ñi imapas mana tiarirka.

⁸ —Ikuti sug simillakunakar, suma alpapisi urmarkakuna. Chasaka, suma wiñaspa, allilla pallarirkakuna. Sug simillamandalla, kimsa chungu kimsa chungu pallarirka. Sugmandalla, sugta chungu sugta chungu; ikuti sugmandalla, patsa patsasi pallarirka.

⁹ Chasa parlaspaka, nirkakunata:

—Rinri iukagkuna, nuka niskata uiawaspa, suma iuiaringichi.

Imapa Jesús, iui ai apingasina parlukunawa rimaskamanda

¹⁰ Jesús iachachikuska uiagkuna riskauramandaka, chungu iska pai agllaskakuna sugllapi katiraiagkunawa paita tapurkakuna:

—Chi parlu kam iachachiska, ¿imatak niraiá?

¹¹ Chiura Jesuska, kasami ainirka:

—Kamkunata niskami ka, Taita Dios imasa suma mandakuskasina kaskata ñi imaurapas mana iachaskata iachangapa. Ikuti mana kaimanda kagkunataka iui ai apingasina parlukunallowami rimani. ¹² Chasaka paikuna, kawanakuspapas, mana kawagsinami kankuna. Uianakuspapas, mana uiagsinami kankuna. Mana kagpika paikuna, Taita Dioswa tigramuspa, pasinsiaimi tukuntrakuna.

Tarpudur runamanda parlu ima niraiagta, Jesús willaskamanda

¹³ Kasapasm Jesús nirkakunata:

—Chi iuiai apingasina parlaskaka, ¿kamkunapaschu ima niraiaskata mana iachangichi? Chasaka, ¿imasatak kunaauramanda sug parlukunata ima niraiaskata iachankangichi?

¹⁴—Tarpug runaka, Diospa Rimaita willagsinami niraiá.

¹⁵—Similla ñambipi urmagka, sug runa Diospa Rimaita uiagsinami niraiá. Chasa uiagllapi, iaia kukuka chi rimaskata tukuimi kichugsamú.

¹⁶—Chasallata, similla rumilla tiaskapi urmagka sug runa Diospa Rimaita uiagsinami niraiá. Chi uiangallowaka alli iuiachiiwami chaskinkuna. ¹⁷ Nispaka, imasami chi mana achka anguiug simillakuna tukú: chasallata sug ratullami Taita Dioswa iuiaripa kankuna. Ima Diospa Rimaimanda unzägpikunaka, llakiimi apigsamú. Chiuramanda, mana mas Taita Dioswa iuiaringapa munankunachu.

¹⁸—Similla ispina sachakuna tiaskapi urmagka, sug runa Diospa Rimaita uiagsinami niraiá. Uiaspapas, ¹⁹ kai alpapi tiaskakunallowa sumaglla kaugsangapami iuiarinkuna, mas achka iukag tukungapa. Chasaka, Diospa Rimaita tukuimi kungarinkuna. Ñi ima mana pallangapa tiaringasinami tukunkuna.

²⁰—Similla suma alpapi urmagkar, sug runa Diospa Rimaita sumaglla uiaspa, mana kungarispalla kagsinami niraiá. Chi runakunapimi niraiá, suma alpapi similla urmaskamanda, achka suma pallai tukungapa. Imasami sug simillamandalla kimsa chungu kimsa chungu, u sugta chungu sugta chungu, u patsa patsa pallari: chasallatami paikuna, Taita Diosmanda allilla ruraskakunawa achka pallarisina tukunkuna.

Sindimanda parlu

²¹ Kasapasmi Jesús nirka:

—Ñi pipas, ima sindi apamuskata manga ukupi u kawitu ukuma mana churangapa chaianchu. Awa kawitupimi churangapa chaiá. ²² Chasallata, ima pakalla kaskapas, imaurapasmi iachari. Ima pakalla wakachiskapasmi imaurapas kawarigsamú. ²³ Rinri iukagkuna, nuka niskata uiawaspa, suma iuiaringichi.

²⁴ Kasapasmi Jesús nirka:

—Nuka ima rimaskata suma iuiaiwa uiawangichi. Kamkuna imasami sugkunata tupungichi: chasallatami Taita Dios, kamkunata allilla u mana allilla ruraskata iapawa tupungapa ka. ²⁵ Maikan achka iukagta masmi karangapa ka. Ikuti maikan mailla iukaskataka tukuimi kichungapa ka.

Similla imasa wiñagmanda parlu

²⁶ Kasapasmi Jesús nirka:

—Diospa suma mandai, similla alpapi tarpuska wiñakuskasinami niraiá. Tarpug runa, ²⁷ tutakunaka puñuspa, punchakunaka ataripa, imapas rurakunkama, simillaka, llugsispa, wiñaspa wiñaspa, atunmi tukuspa ri. Chasa kagpipas, chi runa mana iachanchu, simillaka imasa wiñakugta. ²⁸ Alpapi similla tarpuskaka wiñanllami, ñugpaka panga, nispaka kiki, nispaka chugllu. ²⁹ Ña pallangapa tukuura, chi runaka tandachingapagllami ri.

Mustasa simillamanda parlu

³⁰ Kasapasmi Jesús nirka:

—Diospa suma mandai, ¿imasatak rigchá? ¿Ima parluwatak iachachintraikichita? ³¹ Mustasa simillasina kagtami niraiá. Chi simillaka, chagrapi tarpuura, tukuikunamandapas mas uchullami ka. ³² Ña wiñai puchukauraka, tukuí mikui chagrapi tiaskakunamandapas mas atunmi tukú. Malkikunapasmi atun tukú. Chasakunapika, piskukunapas pudinkuna, sumbra ukupi sumaglla wasichigsamungapa.

³³ Chasallata iuiai apingasina achka suma parlukunawami Diospa Rimaita iachachidur karka, imasa paikuna iachaikungasina. ³⁴ Sugkunataka parlukunallowami iachachidur karka. Ikuti paita katiraiagkunallowa kaura, paikunataka iacharkami willanga, chi parlu-kuna ima niraiagta.

Sinchi wairata i iaku iapa kuiurikuskata, Jesús kasillaiachiskamanda

³⁵ Chi punchallatata amsaiakuura, Jesuska katiraiagkunata nirka:

—Akushi. Kai kuchata chimbasunchi.

³⁶ Chiura, runakuna chipi uianakuskata sakispa, Jesús ña kanuapi tiaskuskata chimbachii kallarrirakuna. Sug kanuakunapi sug runakunapas, sugllapi katirirakuna.

³⁷ Ña iaku chimbanakuskapi, iapa sinchi waira atarii kallarrirka. Ulaskunapas, iapa awa atarirka. Chiwanka, kanua ukuma iaku ña iaikukurka. ³⁸ Jesuska, kati ladu puñukurka, sawinapi uma churaspa. Chiura katiraiagkuna, paita rigchachirirakuna, kasa nispa:

—Iachachig taita, ¿manachu nukanchimanda llakingi, wañungapa kagpipas?

³⁹ Jesuska, rigcharispa, atarirka. Nispaka, wairata piñarka. Iakutapas piñarka, kasa nispa:

—Upalla. Ianga kawai.

Chasa pai niuraka, wairami ialirigsamurka. Tukui allillami kasillaiagsamurka. ⁴⁰ Chiura, Jesuska nirkakunata:

—¿Imapatak chituku mancharingichi? ¿Manarachu nukamanda suma iuiawaspa rigsiwangingichi?

⁴¹ Paikunaka, iapa mancharispami kikinpura tapurinakurka:

—Kai runa, ¿imasik ka? Waira i iakupas, paita uiankuna.

5

Sug runa achka kuku wairakuna iaikuskata, Jesús ambiskamanda

¹ Kucha ialispaka, sug ladu chimba chaiagrirkakuna Jerasa suti alpama. ² Jesús ña kanuamanda alpama uraikuuraka, wañuskakuna pambaraiaskanigmanda sug runa kuku wairakuna iaikuska, paita tupagirka. ³ Chi runa, wañuskakuna pambaraiaskapimi kaug-sakurka. Paita ñi kadinakunawapas mana pudirkakuna, wataspa charingapa. ⁴ Ñugpaka, achka biajisi sinchi kadinakunawa wataspa, allilla charidur karkakuna. Chasa kagpipas, lim piti pitisi watskakunatapas ruradur karka. Chimanda, ñi maikan wapu runapas mana pudirkakuna, wataspa charingapa. ⁵ Tukui tuta i punchakuna, lumakuna suiu i pantiunnigmanda kaparispa, rumiwa piarispa purikurka.

⁶ Chi runaka, karumandata Jesusta kawaspa, kalpa kaillaiagrispa, paipa ñugpa ladu kungurigrirka. ⁷ Sinchi rimaiwa kaparispa, nirka:

—Ai, kam tukuimanda mas atun Taita Diuspa wambra Jesús, ¿imapatak nuka kaskama samukungi? Diusmanda purdiusillami mañaiki: mana nukata sungu nanagta llakichiwa-kugsamui—. ⁸ Jesús, chi kuku wairata ñami niska karka: “Chi runamanda llugsii”. Chi-mandami chasa nirka.

⁹ Jesuska, chi runata tapurka:

—Kam, ¿imatak suti kangí?

Chiura ainirka:

—Nuka, achka warangakunami suti kani. Iapa achkakunami kanchi.

¹⁰ Nispaka, Jesusta sinchi mañai kallarirka:

—Mana kaimanda nukanchita sug luarma kachakui.

¹¹ Chi ladira ladullapi, iapa achka kuchikuna mikuspa purinakurka. ¹² Nigpika chi runapi kag kuku wairakunaka, Jesusta mañarkakuna, kasa nispa:

—Nukanchita kachai, chi kuchikunapa ukuma iaikugringapa.

¹³ Chiura, Jesuska sakirka, chasa tukungapa. Chasaka chi kuku wairakunaka, ña runamanda llugsispa, kuchikunapa ukuma iaikugrirkakuna. Chiwanka tukui kuchikuna, mai iska warangasina, iapa saia patata kalpaspa, kucha iaku ukuma sitarigrirkakuna. Chipi chukarispa, tukui puchukarirkakuna.

¹⁴ Chasa kawaspa, kuchikunata kawagkunaka, mitikuspa, puiblunigta i ñambinigta suiu parlaspa purigrirkakuna. Chasa uiagkunaka rirkakuna, imasa pasariskata kawangapa.

¹⁵ Jesuspagma chaiagrispaka, chi achka kuku wairakunata llugsichii tukuska runata kawagrirkakuna. Paika, allilla katanga churariska tiakurka; paipa iuiaipas, ña allilla. Chasa kawaspaka, iapa mancharirkakuna. ¹⁶ Chi imasa pasariskata kawagkunaka willarkakunata, kuku wairakunata imasa Jesús llugsichispa, kuchikuna ukuma kachagta.

¹⁷ Chasa uiaspaka, Jesuspagma kaillaiaspa, nirkakuna:

—Nukanchipa alpamanda llugsipuai.

¹⁸ Jesús ña kanuama iaikuska kauraka, chi kuku waira llugsichii tukuska runa, paita mañai kallarirka:

—Nukatapas pusawai.

¹⁹ Jesuska, paita ainirka:

—Manima. Kamba wasima rii. Kambakunata willagrii, kamta imasa atun Taita Dius suma llakiiwa kawagta i allilla ruraspa sakigta.

²⁰ Chi runaka, Dekápolis suti puiblukuna suiu rispa, tukuipi imasa Jesús paita allilla ruraskata willaspa purigrirka. Chiura tukui uiagkuna, iapa mancharispa ujnarirkakuna.

Jairoa wambra kaugsariskamanda i sug warmi Jesuspa katangata llamkaspalla ambi-riskamanda

²¹ Jesús ña ikuti kucha ialispa, sug ladu chimba chaiagriuraka, iapa achka runakuna paipagma tandarigrirkakuna. Jesús, chi iaku patallapi karka. ²² Chiura sug tandariduru wasimanda taita, Jairo sutimi paipagma chaiagrirka. Chi taitaka, Jesusta kawaspa, paipa chaki ladu kungurispaga, ²³ sumaglla mañai kallarirka, kasa nispa:

—Nukapa warmi wambra, ñami wañupuaku. Kamba maki churapuagrii. Chasaka, ambi-ripuangapami ka.

²⁴ Chiura Jesús, chi taitawa rii kallarirka.

Nigpika iapa achka runakuna, Jesusta tanganakuwanta kati kati rinakurka. ²⁵ Katichinakugpura sug warmimi sugllapi rikurka. Chi warmi, chung a iska i wata iawar sitaiwa ungu karka. ²⁶ Tukui ima iukaskata tukuchigpipas, ñi maikan ambigkunapas manima aliachirkakuna. Chasapaka, chi ambigkunawa mas ungurispa rikurka. ²⁷ Chi warmika, Jesusmanda uiaspa, chi achka runakunapa chaugpipi Jesusta kati kati kaillaiaspa katichikurka. ²⁸ “Jesuspa katangata llamkaillawami ambirigsamusa”; chasa iuiaspa katiraiarka. Ña alli kaura, paipa katangata llamkarka. ²⁹ Llamkagllapi, chi ungui ambirirka. Chi warmi, kikinpa kuirpupi ungui ambiriska iuiachirigsamurka.

³⁰ Chasa ambirigllapi Jesuska, paipa iachaillawa maikan ambiriskata iuiachirispa, kati-raiagkunata tigraspa, tapurka:

—¿Pitak nukapa katangata llamkawarka?

³¹ Paiwa iachaikugkunaka nirkakuna:

—¿Manachu tukuikuna, tanganakuwanta kamta katiraiakanakú? Nigpika, ¿imapatak tapukungi: “¿Pitak llamkawarka?”?

³² Jesuska, muiugta kawai aparka, pi llamkagta iachangapa.

³³ Chiura chi ambirig warmika, manchaiwa chugchuspa, ña ambiriska kagta iuiarispa, kaillaiaspa, Jesusta kungurispa, sutipa tukui ima pasariskata willarka. ³⁴ Chiura, Jesuska nirka:

—Kam warmisita, nukamanda suma iuiariskamandami ambirigsamurkangi. Rii, mana manchaspalla. Kamba ungui, tukui ambiriskami kangi.

³⁵ Jesús chara rimakugllapi, chi taitapa wasimanda chaiagrirkakuna, kasa nispa:

—Kamba wambra ñami wañurka. ¿Imapatak chara kai iachachig taitata imapas mañakungkangi?

³⁶ Jesuska, paikunata chasa uiaspa, chi taitata nirka:

—Mana llakikui. Nukamanda suma iuiawai.

³⁷ Chasa nispaka, tukuikunatami sakirka. Pedro, Santiago i waugkindi Juanllatami pusaspa rirka. ³⁸ Chi wasima chaiagriuraka, iapa killachinakugta uiarinakurka. Sinchi llakiiwa kaparispa wakanakurka. ³⁹ Jesuska, ukuma iaikuspa, nirkakunata:

—¿Imapatak wakaspa killachinakungichi? Chi wambra mana wañuska kanchu. Puñuillami puñuku.

⁴⁰ Uiagkuna, paita asirkakuna. Jesuska, tukuikunata nirka:

—Kanchama llugsiichi—. Nispaka, wambropa taita i mama i paiwa sugkuna kaskakunallata pusaspa, wambra kaskama iaikugrirka. ⁴¹ Chi wambrata makimanda apispa, nirka—Talita kum—. Chi niraianmi: “Wambrita, niikimi: atarii”.

⁴² Chasa nigllapika, chi wambra atarirka. Atarispaka, purii kallarirka. Ña chung a iska i watami iukarka. Chasa kawaspaka, chipi kagkuna iapa mancharispa ujnarkakuna.

⁴³ Jesuska nirkakunata:

—Chi wambrata mikui karaichi—. Kasapasmi nirkakunata— Chasa kawaskata, ujalallapas sugkunata willanakungichi!

6

Jesús, kikinpa puiblupi wabutii tukuskamanda

¹ Chimanda llugsispaka Jesús, kikinpa puibluma chaiagrirka. Paita katiraiagkunapas katirkakuna. ² Warda punchaka Jesús, tandaridiru wasima iaikuspa, iapa achkakunata iachachii kallarirka. Paita uiaspa tukuikuna, iapa ujnarispa, kasami kikinpura tapurinakurka:

—Kai runa, ¿maipisik chituku iachaikugrirka? ¿Imawasik chituku suma iachaiwa tururka? ¿Imawasik chituku mana imaurapas kawaskasina rurai pudí? ³ ¿Manachu karpintiru ka? ¿Manachu Mariapa wambra ka? ¿Manachu Santiago, José, Judas i Simonpa waugkindi ka? ¿Manachu paipa panindikunapas, kaillapita nukanchiwa kankuna?—. Chasa nispaka, Jesusta mana munarkakuna, pai ima iachachikuskata uangapa.

⁴ Mana uiagmandakuna, Jesuska kasami nirkakunata:

—Santu Ispirituwa rimagtaka sugnigta puriskapi sumaglla kuiaspami uiankuna. Ikuti kikinpa alpapi, kikinpa wasipi, kikinpurakuna mana munankunachu uangapa.

⁵ Chimanda Jesús, chi puiblupi mana milagrukuna rurarka. Mailla ungugkunata maki churaspa, ambirka. ⁶ Chi runakuna paimanda mana suma uiagmanda, ujnarkirka.

Jesús agllaskakunata, pai kachaskamanda

Chimanda llugsispaka, chi suiulla kaugsanakuskata iachachispa purikurka. ⁷ Chung a iska i pai agllaskakunata kaiaspa, iska i iska i kachai kallarirka. Kachakuspaka, paipa iachaita kararkakunata, kuku wairakunata llugsichingapa. ⁸ Kasami nirkakunata:

—Mana apanakuichi tanda, jigra, kulki ñi imapas ñambipa. Tawinalla makipi charirispa richi. ⁹ Chakikinapi churaridirukar churaringichi. Katangapas, imasa churariska kaskallawa ringichi.

¹⁰ Kasapasmi nirkakunata:

—Maikan wasipi iaikuspaka, chi wasillapi kangichi, chi puiblumanda sugsinama llugsinkama. ¹¹ Ikuti maipi kamkunata mana chaskingapa u uangapa munaskakunapagpika, chi puiblumanda llugsikuspa, chakipi alpa llutaraiaskata chabsispa, paikunata willagsina kawachingichi, mana alli rurag kagtakuna.

¹² Chi kachai tukuskakunaka, purii kallarirkakuna, kasa iuiachispa:

—Pandariikunata sakispa, Taita Dioswa tigramuichi—, ¹³ Chasallata, achka kuku wairakunata llugsichispa, achka ungugkunata asitiwa kakuksa ambispa purirkakuna.

Juan Bautista imasa wañuchii tukuskamanda

¹⁴ Jesús iapa suma ruraspa purikuskamanda, tukuipimi iacharigsamurka. Chasa parlanakuskata uiaspa, mandag Herodeska paimanda nirka:

—Chimi kangapa ka Juan Bautista. Wañuspaka, ikuti kaugsariskami kangapa ka. Chimandami mana imaurapas kawaskasina ruraspa puriku.

¹⁵ Sugkuna, Jesusmanda ninakurka:

—Ñugpamanda Santu Ispirituwa rimag Eliasmu kangapa ka.

Ikuti sugkunaka ninakurka:

—Ñugpata tiarka Santu Ispirituwa rimagkuna; chasallata rimagchar ka.

¹⁶ Herodeska, chasa uiaspa, nikurka:

—Juanmi sutipa kangapa ka. Paipa umata, nukami anchuchingapa kacharkani. Pai Juanmi ikuti kaugsariska kangapa ka.

¹⁷ Manara Jesusmanda iacharigpi, Herodeska kacharka, Juanta apispa, karsilpi churangapa. Erodías suti warmipa kaugsasi chasa rurarka. Chi warmi karkasi Felipepa warmi. Chi Felipe, Herodespa waugkisi karka. Chi warmika, Herodeswasi kasararka. ¹⁸ Chimandasi Juanka, Herodesta piñaspa nikurka:

—Kanta michanmi, kamba waugkipa warmiwa kaugsakungapa.

¹⁹ Chasa piñakugmanda, chi warmi iapa rabiawa munakurka, Juanta wañuchichingapa. Chasa munakuspapas, manasi pudikurka. ²⁰ Kikin Herodeska, Juanmanda tukuipi allilla rurag i iuiag kagta iachaspaka, paita manchaspaka, imasapipas kispichikurka. Juanta uiaspaka, mana iacharikurka ima ruranga. Chasa kagpipas, Juan rimaskata iacharka, kuntintulla uiana.

²¹ Chi warmi imasa iuiakuskasina paimanda puncha, kasasi chaiarka. Herodes tiagsamuka puncha chaiaura, paika, kati mandagkunata, suldadukunata mandagkunata i Galilea alpamanda taitakunata kunbidaspa, achka suma mikui kararkakunata. ²² Tuku kunbidaskakuna kawaspa tianakunkama, chi warmipa sipas warmi wambra, chi ukupi iaikugrispa, iapa sumasi bailarka. Chasa bailagmanda, mandag Herodesta i paiwa mikonakuskata iapasi sumarka. Chiura paika, sipasta nirka:

—Kam ima munaska mañawai; karasakimi—. ²³ Sipasta ikuti kasapasi nirka— Taita Diospa ñawipimi niiki: kam ima mañawaskami karasaki. Nuka mandakuska alpata chaugpipasmi karasaki.

²⁴ Chasa uiaspaka chi sipaska, llugsispa, mamandita tapugrirka:

—¿Imatak mañasa?

Chi warmika ainirka:

—Juan Bautistapa umata mañai.

²⁵ Chasa uiaspaka, kalpalla iaikugrispa, mandagta mañarka:

—Kasami munani: kunaauralla Juan Bautistapa umata platupi karawai.

²⁶ Mana pai iuiakuskasina mañagmanda, iapasi llakirigsamurka. Kikin, Taita Diospa ñawipi niskata paiwa kagkuna uianakugmanda, mana alli karka, sipasta: “Mana” ningapa. ²⁷ Chasaka, chiuralla sug suldaduta kacharka, kasa nispa:

—Juanta kunga anchuchispa, umata apagrii—. Chasa uangallawa, karsilma rispa, umata anchuchigrirka. ²⁸ Chita platupi apaspa, sipastasi kuagrirka. Sipas chaskispa, mamanditasi kuagrirka. ²⁹ Juanwa purigkuna, chasa pasarigta iachaspaka, kuirputa apagrispa, pambagrirkakuna.

Pichka waranga runakunata, Jesús mikungapa karaskamanda

³⁰ Jesús kachaska runakuna, paipagma ikuti chaiagrispaka, tukui imasa ruraspa i iachachispa puriska willagrirkakuna. ³¹ Chipi iapa achka runakuna chaispa i llugsispa purinakugmanda, mana iukarkakuna, ñi imasa mikunga. Chimanda Jesuska, pai agllaskakunata nirka:

—Akushi nukanchilla, maipi mana runakuna tiaskama. Chipika samarisunchimi.

³² Chasa paikuna kanuapi iaikuspa, maikan runapas mana kaugsanakuska alpama rirkakuna, paikunalla kangapa. ³³ Rinakugta kawaspaka, achka runakuna, maima ringapa kaskata iachaspa, tukui ladullapi puiblu suiunigmanda chakillawa kalpaspa rirkakuna. Chasaka, paikunapa ñugpa chaiagrirkakuna. ³⁴ Jesús kanuamanda llugsuira, iapa achka runakuna kawarirka. Sitaska ubijakunasina ñi pipas mana kawangapa tiagsinami karkakuna. Paikunata chasa kawaspaka, Jesús iapa llakirigsamurka. Nispaka, achka imakuna allilla iachachii kallarirkakunata.

³⁵ Ña chisiakuuraka, Jesusta katiraiagkuna, kailliaspa, nirkakuna:

—Kai suiu, ñi pipas mana kaugsanakunchu. Ñami chisi ka. ³⁶ Kai runakunata kachai kai suiulla kaugsanakuska wasikunama, mikui randispa mikuchukuna.

³⁷ Jesuska nirkakunata:

—Kamkuna, paikunata mikui karaichi.

Paikunaka ainirkakuna:

—¿Iskai patsa pucha ganaska kulkiwa tanda randigrispachu paikunata karasunchi?

³⁸ Jesuska nirkakunata:

—Kawagriichi: ¿maituku tandatak tiapungichita?

Kawagripaka, nigriirkakuna:

—Pichka tanda i iskai chalwallami tia.

³⁹ Chiura, Jesuska nirkakunata:

—Tukuikunata, achka achka, sugllapi sugllapi, suma ugsapi tiarichiichi.

⁴⁰ Chasa uiaspaka, patsa patsa i pichka chungu pichka chungu tiarichirkakunata. ⁴¹ Nigpi Jesuska, chi pichka tandata i iskai chalwata charirispas, awasinama kawaspas, “Pai Siñur” Taita Diusta nirka. Tandakunata pitichispaka, katiraiagkunata kuaspa richirka, tukui-kunata karaspa apangapa. Iskai chalwatapas chasallata tukuikunata karaspa richirka.

⁴² Tukuikunami sagsagta mikurkakuna. ⁴³ Nispaka, chungu iskai saparu junda piti pitikuna tandachirkakuna. ⁴⁴ Chi tandakunata, mai pichka waranga karikunami mikurkakuna.

Iaku kuchapi, Jesús chakiwa saruspa awalla puriskamanda

⁴⁵ Tanda puchuskata tandachigllapi, Jesuska paita katiraiagkunata nirka:

—Kanuama iaikuichi. Sug ladu chimba Betsaida puibluma ialiiichi. Nukaka, kai tukui runakunata: “Kaiakama” nispa, kachasakunata—. ⁴⁶ Chi runakunata kachaspaka, sug lumama rirka, paipa Taita Diuswa rimanakungapa.

⁴⁷ Chi tutaka Jesús, sapalla chi lumapi karka. Katiraiagkunaka, kanuapi kucha chaugpipi bugaspa rinakurka. ⁴⁸ Iapa sinchi waira ñugpagnigmanda arkakugmandami iapa saikuska rinakurka. Chasa kawaspaka Jesuska, ña pakaringama, chi iakupi awalla chakiwa saruspa saruspa, paikunapagma ña chaiakugrirka. Paikuna kaska karullapi ialingapa kagsina rigchakurka. ⁴⁹ Paikunaka, chasa iakupi saruspa awalla rikugta kawaspas, iuanakurka: “Sug wairachar ka”. Iapa mancharispami kaparirkakuna. ⁵⁰ Tukuikunami paita chasa kawarkakuna.

Kaparigllapi, Jesuska nirkakunata:

—Sinchi iuiaichi. Nukami kani. Mana manchanakuichi.

⁵¹ Chasa nispaka, paikuna rinakuska kanuapi iaikugrirka. Chiura, wairapas kasillaiagsamurka. Chasa kawaspaka, iapa ujnarigsamurkakuna. ⁵² Jesús tandakunata achkaiachigsamuska ima niraiaskata manara iuia apiska kaspami chasa ujnarirkakuna. Paikunapa iuiaika, charami iana tutapisina karkakuna.

Jenesaret alpapi, Jesús ungugkunata ambiskamanda

⁵³ Kucha ialispaka, sug ladu chimba Jenesaret suti alpama chaiagrirkakuna. Chipika, kuchupi kanuata watagrirkakuna. ⁵⁴ Kanuamanda llugsiska kagllapi, chipi kagkunaka Jesusa rigsirkakuna. ⁵⁵ Chi suiulla paipura willanakuspa, kalpalla rirkakuna. Nispaka, ungugkunata chakanakunapi apai kallarirkakuna maipi Jesús kagta iachaskama. ⁵⁶ Maikan atun u uchulla puiblupi, maipi runakuna kaugsanakuskapi, Jesús ialingapa kaskanigta ungugkunata churarkakuna. Jesús ialikuura, ungugkunapas paita mañanakurka:

—Kamba katanga puntallapas sakiwai llamkangapa—. Chiwanka, tukui llamkagkuna ambirigsamurkakuna.

¹ Sug fariseokuna i Moisés ima niskata iachachig taitakuna, Jerusalenmanda chaiagrispaka, Jesuspagma kaillaiagrirkakuna. ² Jesusta sug katiraiagkuna, mana maki maillaris-palla mikunakurka. Chasa, ñugpamandakuna imasa iachachiskasina mana ruranakurka. Chasa kawaspa chi runakunaka, iapa mana allilla paikunamanda rimanakurka.

³ (Fariseokuna i tukui judiukunapas, ñugpamandakuna imasa iachachiskasina maki maillarisipami mikunakuna. ⁴ Chasallata, wasimanda llugsispa, ikuti mainigmandapas chaiagrispaka, mana maki maillarisipalla mana mikunkunachu. Achka ñugpamandakuna imasa iachachiskasinami chasallata rurankuna; imasami wisinga, manga, iura pailakuna i puñudiru kawitukunata maillai iukankuna: chasa.)

⁵ Chasa ruradiru kagmandami chi runakuna, Jesusta tapurkakuna:

—Kamta katiraiagkuna, ¿imapatak ñugpamandakuna imasa iachachiskasina mana ruraspa kaugsanakú? Mana maki maillarisipallami mikunakú.

⁶ Jesuska ainirkakunata:

—¡Miski simi, sungu awalla rimagkuna! Kamkunamandami ñugpata rimag Isaías suti, Santu Ispirituwa kasa sutipa nirka:

Kai alpapi kaugsagkuna, sungu awalla rimaspami kuiawankuna.

Ikuti paikuna sungupi iuiaiwaka nukamanda sugpimi iuianakú.

⁷ Iangami nukata kunguriwagsina rurankuna.

Nuka niskata iachachingataka,

runapura imasa rurangapa niskallatami iachachinkuna.

⁸ Chasa nispaka, nirkakunata:

—Kamkunapas, Taita Dios ima rurangapa willaraiaskata sakispa, ñugpamandakuna iachachiskallata ruraspami kaugsanakungichi.

⁹ Kasapasmi nirkakunata:

—Kamkunapa ñugpa iachachiskallata ruraspa kaugsangapaka, Taita Dios ima rurangapa willaraiaskata wabutingichimi. ¹⁰ Moiseska, kasami nirka: “Kamba taitata mamandita sumaglla kuiangi”. Kasapasmi nirka: “Maikanpas taitata i mamata kamigpika, chitaka chianmi wañuchingapa”. ¹¹ Ikuti kamkunaka, kasami iachachingichi, maikanpa taitata u mamata ningapa: “Nuka mana pudiikichitachu aidangapa. Tukui nuka ima iukaska, ‘Korbán’ u Taita Diusta karaskami niraiá”. ¹² Kamkuna chasa nispami iachachinakungichi, kuna ramanda taitata i mamata mana kuiaspa aidangapa. ¹³ Chasa iachachispa, Taita Dios ima rurangapa willaraiaskataka wabutingichimi. Kamkunapura ñugpamanda iachachiskallatami ruraspa kaugsangapa munangichi. Achka chasallata rigchakunatami ruraspa kaugsanakungichi.

¹⁴ Chasa nispa, tukui chipi kagkunataka ikuti pai kaskama kaiaspa, nirkakunata:

—Tukui runakuna, suma iuiarispa uiawaichi. ¹⁵ Runakuna ima mikuskaka, Diospa ñawipi ñi ima mana mapasina niraianchu. Runakunapa sungumanda jiru iuiaikuna llugsiskami mapa niraiá. [¹⁶ Rinri iukagkuna, nuka niskata uiawaspa, suma iuiaringichi.]

¹⁷ Chi runakunata sakispa, wasima chaiagriuraka, Jesusta katiraiagkuna pai chasa iachachiskamanda tapurkakuna. ¹⁸ Chiura, Jesuska ainirkakunata:

—Kamkunapas, nukawa kaspá, ¿manarachu iachaikungichi ima niraiagta? ¿Manachu iachangichi, ima mikuskapas Diospa ñawipi mana mapasina niraiagta? ¹⁹ Chi mikui, mana sunguma iaikunchu. Wigsamami iaiakú. Wigsamandaka, kanchamami llugsí—. (Chasa nispaka, iachachirkami, tukui mikui kunaka alli kagta.)

²⁰ Kasapasmi nirka:

—Sungumanda jiru iuiaikuna llugsiskami Diospa ñawipi mapa niraiá. ²¹ Sungumandami jiru iuiaikuna llugsí, kasa pandaringapa: sugpa warmiwa u sapalla warmiwa siriringapa, sisangapa, wañuchingapa, ²² sugkunapata kichungapa munaringapa, jiru mana allilla ruraikuna rurangapa, llullachingapa, tukui mana allilla ruraspa kaugsangapa, sugkunata jiru iuiaiwa kawangapa, Taita Diusta kamingapa, iapa atun iuiaikunawa tukungapa, Taita Dios iuiachiskakunata mana uiaspalla upasina puringapa. ²³ Tukui chasa pandaringapaka, sungumandami jiru iuiaikuna llugsí. Chasa pandariikunami Diospa ñawipi mapa niraiá.

Mana judú kag warmipa wambrata, Jesús ambiskamanda

²⁴ Chimanda llugsispa, Jesuska Tiro suti puiblu suiu nirka. Chipi chaiagrispaka, sug wasipi iaiugrirka. Kikinka munakurka, pipas mana iachachu chaiagrigta. Chasa munakugpipas, mana pudirka pakalla kangapa. ²⁵ Paimanda iacharigllapi, sug warmi, paipagma rispa, kungurigrirka. Chi warmipa warmi wambra, kuku waira iaiuskaka karka. ²⁶ Chi warmi mana karka Israelmanda. Sirofenisia suti alpamanda karka. Kungurispa, Jesusta mañarka:

—Nukapa wambramanda kuku wairata llugsichipuai.

²⁷ Jesuska nirka:

—Ñugpa, wasimanda wambrakuna mikuchukuna sagsagta. Mana chaianchu, wambrakunapa tandata kichuspa, alkukunata sitapungapa.

²⁸ Chiura, chi warmika ainirka:

—Ari, taita turi. Wambrakuna mikunakuskapi, misa ukuma piti urmaskakunata, alkukunapasmi mikunkuna.

²⁹ Chasa uiaspa, Jesuska paita nirka:

—Allillami ainiwarkangi. Kuku waira, ñami kamba wambramanda llugsirka. Kunaura riilla kambagma.

³⁰ Chi warmi paipagma chaiagriuraka, paipa wambraka allilla sirikuskatami tarigrirka, kuku waira ña llugsiska.

Sug runa mana uiai i mana allilla rimai pudigta, Jesús ambiskamanda

³¹ Tiro puiblunigmanda llugsispaka, Sidón suti puibluta Dekápolis puiblukunanigtapas ialispa, Galilea kuchama ikuti chaiagrirka. ³² Chipi kagkunaka, sug runa mana uiai i mana allilla rimai pudigta Jesuspagma pusarkakuna, kasa nispa:

—Kai runata maki churapuai, ambiriska kangapa.

³³ Chiura Jesuska, runakunapa sugllapi kaskata sapallata karuajma pusarka. Nispaka, paipa iskandi rinri utkupi paipa didu churarka. Chasallata, makipi tuka churaspa, paipa kallupi ialichirka. ³⁴ Nispaka, awasinama kawaspa, sinchi samai kachaspa, nirka:

—Efata—. (Chi niraianni: “Paskarichu”.)

³⁵ Chasa nigllapi, chi runapa rinrikuna allilla uiarka. Kallupas, allilla rimai kacharirirka.

³⁶ Chipi kagkunata, Jesuska nirka:

—Kamkuna kawaskata mana ñi pitapas willanakungichi.

Maituku “Mana willanakungichi” nigpipas, kawagkuna, mana uiaspalla, iapa ujnarispa, tukuipimi parlai apanakurka, ³⁷ kasa nispa:

—Tukuipimi iapa suma allilla, Jesús rurá. Mana rinri uianakugtapasmi uangapa ambí. Mana rimai pudiskakunatapasma rimangapa ambí.

8

Iskai biájima, Jesús tandakunata achkaiachiskamanda

¹ Chi punchakuna, iapa achka runa tandariskakuna kaspaka, ikuti mana iukarkakuna ima mikungapa. Nigpi Jesuska, katiraiagkunata kaiaspa, nirkakunata:

² —Kai tukui runakuna, ña kimsa punchami nukawa kaipi kankuna. Paikuna ñi ima mana mikungapa iukagmanda, nukata iapami llakiriwagsamú. ³ Sugkuna, karumandami kankuna. Paikunata mana mikui karaspalla kikinkunapagma nuka kachagpika, ñambi rinakuskallapimi diarkai sambaiaspa urmagingakuna.

⁴ Katiraiagkuna ainirkakuna:

—Kai maikan runapas mana kaugsanakuskapi, paikunata, ¿imawatak iarkai anchuchi-sunchi?

⁵ Jesuska tapurkakunata:

—¿Maituku tandatak tiapungichita?

Chiura ainirkakuna:

—Kanchis tandallami tia.

⁶ Chasa uiaspa, Jesuska chipi kagkunata nirka:

—Alpapi tiarichi—. Nispaka, chi kanchis tandata charirispa, “Pai Siñur” Taita Diusta nirka. Chiuralla pitichispa, katiraiagkunata kuaspa richirka. Paikunaka, tukuikunata karaspa aparkakuna.

⁷ Sug uchulla chalwakunapasmi tiapurkakunata. Chikunatapas chasallata makipi charirispa, “Pai Siñur” Taita Diusta nirka. Nispaka, katiraiagkunata nirka:

—Tukuikunata karachi.

⁸ Tukuikunami sagsagta mikurkakuna. Nispaka, kanchis saparu junda piti pitikuna tandachirkakuna. ⁹ Mai chusku waranga runakunami mikurkakuna.

Chiuramanda Jesús, chi runakunata: “Kaiakama” nispa, kacharkakunata. ¹⁰ Kachangallawa, katiraiagkunawa kanuapi iaiurkakuna. Chimandaka, Dalmanuta suti alpama rirkakuna.

Mana kawaskasina kawachimui, Jestusta mañanakuskamanda

¹¹ Chi alpama chaiagriuraka, fariseokuna, kaillaiagrispa, Jesuswa kallarikakuna sinchi rimanakungapa. Paita mañanakurka, mana imaurapas kawaskasina awa luarmanda kawachingapa; chasaka, paimanda iachangapa, sutipa Taita Dios kachamuska kagta.

¹² Jesuska, llakirispa, sinchi samai kachaspa, nirkakunata:

—¿Imapatak kai punchakunamanda runakuna mañawanakungichi: “Mana kawaskasina kawachiwai”? Kasami nuka niikichita: ñi imapas mana kamkuna munaskasina kawan-gapa kangichichu.

¹³ Chasa nispaka, paikunata sakispa, ikuti kanuapi katiraiagkunawanta iaikuspa, llugsirkakuna, kucha sug ladu chimba ialingapa.

¹⁴ Katiraiagkuna kungariska karkakuna, tanda apangapa. Kanua ukupi, sug tandallami tiapurkakunata. ¹⁵ Ña kuchapi rinakuura, Jesuska nirkakunata:

—Suma iuiarispa uiawaichi. Fariseokunapa i Herodespa libadurasina iuiaita, ¡ujalalla-pas iuianakungichi!

¹⁶ Chasa uiaspaka, kikinpura rimarinakurka, iuiaspa: “Tanda mana apamuskamandami chasa nukanchita niku”.

¹⁷ Chi rimarinakuskata uiaspa, Jesuska nirkakunata:

—¿Imapatak ninakungichi: “Tanda mana apamuskamandami chasa nukanchita niku”? ¿Imawantak, uiawaspapas, kamkunapa umapika manara iaikú? Kamkunapa iuiaika, ¿charachu amsapisina kangichi? ¹⁸ Ñawi iukaspapas, ¿charachu mana kawagsina kangichi? Chasallata, rinri iukaspapas, ¿charachu mana uiagsina kangichi? ¹⁹ ¿Manachu iuiaringichi, nuka pichka tandata pitichiuraka, pichka waranga runakuna mikugtakuna? Chi puchuskakunataka, ¿maituku saparu jundatak tandachirkangichi?

Paikunaka ainirkakuna:

—Chunga iskai saparu.

²⁰ Jesuska tapurka:

—Chasallata, nuka kanchis tandata pitichiuraka, chusku waranga runakuna mikurka-kuna; chi puchuskakunataka, ¿maituku saparu jundatak tandachirkangichi?

Ainirkakuna:

—Kanchis saparu.

²¹ Chasa ainiura, Jesuska nirkakunata:

—Chasa kagpipas, ¿manarachu kamkunapa iuiaipi iaikú?

Sug runa mana ñawi kawagta, Jesús ambiskamanda

²² Chiuramandaka, Betsaida puibluma ikuti chaiairirkakuna. Chipika, sug runa mana ñawi kawagta Jesuspagma pusaspa, mañarkakuna, kasa nispa:

—Kamba makiwa kai runata llamkapuai, ambiringapa.

²³ Chiura Jesuska, chi mana ñawi kawagta makimanda apispa, chi puiblumanda sug-sinama pusarka. Chaiachigrispaka, paipa tuka makipi churaspa, ñawipi llamkarka. Nis-paka, paita maki churaspa, tapurka:

—¿Ñachu imapas kawangi?

²⁴ Chiura ainirka:

—Runakunaka, sachakunasina purinakugtami kawakuni.

²⁵ Ikuti Jesús, ñawipi maki churarka. Chasa churaura, mas allilla tukugsamurka. Chasaka, tukui allilla ñawiwa kawai kallarirka. ²⁶ Chiura Jesuska, wasima paita kacharka, kasa nispa:

—¡Ujalallapas puiblupi kutikungi!

Kam, Dios agllaska Cristomi kangi, Pedro Jesusta niskamanda

²⁷ Chimandaka, Filipopa Sesarea suti suiu paita katiraiagkunawanta purinakurka. Ñambi rinakuskapika, Jesús tapurkakunata:

—Maikankuna nukamanda, ¿pitak kagta ninkuna?

²⁸ Paikunaka ainirkakuna:

—Sugkuna ninkunami: kam kangisi Juan Bautista. Sugkunaka: kam ñugpamanda rimag Elías; ikuti sugkunaka, maikan ñugpamanda Santu Ispirituwa rimagsi kangi.

²⁹ Chiura, Jesús tapurkakunata:

—Kamkunaka nukamanda, ¿pi kagtatak niwangichi?

Chasa tapuura, Pedroka ainirka:

—Taita Dios agllaska Cristomi kangi.

³⁰ Pedro chasa niura, Jesuska paikunata nirka:

—Mana pitapas nukamanda chasa willanakungichi.

Jesús imasa wañungapa kagta, pai musuglla willaskamanda

³¹ Nispaka iachachii kallarirkakunata, kasa nispa:

—Kai Runa Tukuskataka iapa llakii i nanai iukangapami chaiawaku. Iaia sasirdutikuna, Moisés ima niskata iachachig taitakuna i sug taitakunapas wabutiwangapami kankuna. Nukata wañuchiwangapami kankuna. Chasa wañuska kaspapas, kimsa punchapika iku-timi kaugsaringapa kani—. ³² Chasa nikurka, katiraiagkuna allilla iachangapa.

Chasa uiaspa Pedroka, Jesús sapallata mana uianakuskama pusaspa, piñaimi kallariirka. ³³ Chiura Jesuska, tigrarispa, katiraiagkunata kawaspa, Pedrotaka piñarka, kasa nispa: —Nukapa ladumanda, iaia kuku, anchurii. Kam mana iuiakungichu Taita Dios imasa iuiakuskasina. Runakunapa iuiailawami chasa iuiakungi.

³⁴ Chasa nispaka, achka runakunata paita katiraiagkunawanta kaiaspa, nirkakunata: —Maikan nukata katiraiawangapa munagka, kikinmanda kungarichu. Paipa krusta markarigsina ruraspami iuká katiraiawanga. ³⁵ Maikan kikinpa kaugsaita kispichingapaglla iuiakugpika, kikinmi puchukaringapa ka. Ikuti maikanpas nukamanda i Alli Willaimanda wañuchiú tukugpika, mana mas wañui kaugsaitami taringapa ka.

³⁶ —Sug runa tukui kai alpapi ima munaska iukagpipas, paipa almata mana kispichigpika, chi iukaskakuna ñi imapa mana balipungapa kanchu. ³⁷ Chi runaka, paipa almata chingachispaka, ¿imawatak pudingapa ka, ikuti taringapa? Ñi imawapas manima.

³⁸ —Taita Diusta ñi imapa mana iuiarispa, mana allilla ruraspa purinakug runakunawami kamkuna kaugsanakungichi. Chi runakunapa ñawipi maikanpas nukamanda i nukapa rimaikunamanda unzaspaspa, “Mana rigsinichu” nigkunata, nukapami chasallata ruraspa. Kai Runa Tukuska samuura, nukapa Taita suma atuniachiskawami tukuipi alli anjilkunawa samungapa ka. Chiura samuspami, maikan nukamanda wabutispa, “Mana rigsinichu” nigkunata, chasallata nukapas ningapa kani.

9

¹ Kasapami nirkakunata:

—Kasami nuka niikichita: maikan kaipi kagkuna manara wañugkuna, tukui imasa Diospa suma mandai chaiamugtami kawangapa kankuna.

Jesús, sug rigcha kawari tukugsamuskamanda

² Chiuramanda sugta punchapika, Pedrota, Santiagota i Juanta pusaspa, sug awa lumama paikunallawa sikagrirka. Chipi chaiagrispaka, paikuna kawanakugllapi, sug rigcha kawarimi tukugsamurka. ³ Paipa katanga, iapa iura punchallami tukurka, kai alpapi ñi maikan katanga tagsag mana chasa iuraiachii pudingasina.

⁴ Kawanakugllapi, Elías i Moisés kawarigsamurkakuna. Chi runakunaka, Jesuswa rimanakui kallariirkakuna. ⁵ Chasa kawaspaka, Pedroka Jesusta kasami nirka:

—Iachachig taita, kaipi iapa alli iuiachimi kanchi. Kimsa tambu kaipi rurasunchi: kamanda sug, Moisesmanda sug, sugka Eliasmamanda—. ⁶ Tukui kimsandikuna iapa manchaiwa kaspami mana imapas iuiarispa Pedro chasa nirka.

⁷ Chiura puiulla, paikunata kilpagsamurka. Chi puiú ukumanda sug rimagta uiarigsamurka, kasa nispa:

—Kai, nukapa kuiaska wambrami kapuá. Paita uiapuungichi.

⁸ Paikuna ikuti muiugta kawaura, Jesuska ikuti sapalla kawarigsamurkakunata; sugkunaka manima.

⁹ Chi lumamanda uraikunakuuraka, Jesuska nirkakunata:

—Kamkuna ima kawaskata mana pitapas willanakungichi. Kai Runa Tukuska wañuspa kaugsariskauramandami chasa kawaskata willankangichi.

¹⁰ Chasa paikuna uiaspaka, ñi pita mana willarkakuna. Chi kimsandikunaka tapurinakurka:

—Chi “wañuspa, ikuti kaugsariska”, ¿imatak niraiá? —. ¹¹ Nispaka, Jesustaka tapurkakuna— ¿Imatak Moisés ima niskata iachachig taitakuna ninkuna: “Eliastami chaiaku, Taita Dios agllaska Cristopa samungapa?”

¹² Chiura, Jesuska ainirkakunata:

—Sutipami Elías ñugpa samungapa ka. Tukuimi allichigsamungapa ka. Chasa samungapa willaraiaskaka, allillami ka. Kasapami ñugpamanda librupi willaraiá: Runa Tukuska, achka llakii i nanai iukaspa, wabutiimi tukungapa ka. ¹³ Nukaka, kasami niikichita: Elías ñami samurka. Paitaka imasa munaskasinami mana allilla rurarkakuna, imasa paimanda willaraiaskasina.

Sug wambra wañui ungui iukaskata, Jesús aliachiskamanda

¹⁴ Jesús chi kimsandikunawa paita katiraiagkunapagka chaiagriura, iapa achka runakuna paikunapa muiugta saianakugtami kawagrirkakuna. Paita katiraiagkunawa Moisés ima niskata iachachig taitakunawa sinchi rimanakurka. ¹⁵ Tukui chipi kagkunaka, Jesusta kawaspa, iapa uñarirkakuna. Nispaka, paipagma kalpalla rirkakuna, “Puangi” ningapa.

¹⁶ Chiura, Jesuska tapurkakunata:

—¿Imatak chikunawa sinchi rimanakungichi?

¹⁷ Chi runakunapuramanda sug runaka, Jesusta ainirka:

—Iachachig taita, nukapa wambratami kambagma pusamurkani. Paita, sug kuku wairami iaikupuarka. Chimandami mana rimangapa pudipúa. ¹⁸ Chi kuku waira, paipa kagsina, imaurapas apispa, alpapimi urmachipúa. Chiura, tuka sitaspa, kiru mukuspa, kanirisipami kallari. Nispaka, wañuskasinami tukugsamú. Chimandami kamta katiraiagkunata mañagsamurkani: “Chi kuku wairata llugsichipuaichi”. Nigpika, paikuna manima llugsichipuanaga pudirkakunachu.

¹⁹ Jesuska, paikunata nirka:

—¡Ai, kam runakuna, Taita Dioswa ñi ima mana iuiagkunami kangichi! ¿Imaurakamatak kamkunata chasa charinakusakichita?—. Chasa nispaka— Chi ungueta, kaima pusamuchi— nirka.

²⁰ Chiura, wambrata Jesuspagma pusarkakuna. Kuku wairaka, Jesusta kawangallawami wambrata iapa chabsichigsamurka. Chiwanka, alpapi urmaspa, tukuima builtiarikurka, tuka sitaspa. ²¹ Chiura Jesuska, taitandita tapurka:

—¿Maituku unaitak chasa ungui iuká?

Chiura ainirka:

—Uchullauramandata. ²² Achka biajimi chi kuku waira, nina ukupi i iakupi urmachipúa, paita puchukangapa. Kamka, imallapas pudispaka, nukanchimanda llakirispa, aidawai.

²³ Jesuska nirka:

—¿Imapatak niwakungi: “Kamka, imallapas pudispaka, aidawai”? Maikanpas nukamanda suma iuiawagtaka tukui imapas allillami tukugsamú.

²⁴ Chasa nigllapi, chi wambrapa taitaka, kaparispa, nirka:

—Ari, kammanda sumami iuiani. Aidawai, mas iuiaringapa.

²⁵ Achka runakuna, chima kalpa chaianakugrirka. Chasa kawaspa, Jesuska chi mana alli kuku wairata sinchi piñarka, kasa nispa:

—Kam kuku waira mana rimangapa i mana uangapa sakigtami niiki: wambramanda llugsii. Mana mas ikuti iaikugsamungi.

²⁶ Chasa niuraka, kaparichispa, ikuti iapa chabsichispa, llugsirka. Chiura chi wambra, wañuskasina tukugsamurka. Chasa kawaspa, achkakuna ninakurka:

—Wañuskami ka—. ²⁷ Jesuska, chi wambrata makimanda apispa, atarichirka. Chiuralla, allilla saiarigsamurka.

²⁸ Chiuramanda Jesuska, sug wasipi iaikugrirka. Chipika pai sapalla kaura, paita kati-raiagkuna tapurkakuna:

—¿Imawantak nukanchika mana pudirkanchi, chi kuku wairata llugsichingapa?

²⁹ Chiura, Jesuska ainirkakunata:

—Taita Diusta sinchi mañaskakunawami chi kuku wairakunata llugsichingapa pudirí.

Jesús imasa wañungapa kagta, pai parisma willaskamanda

³⁰ Chimanda llugsispaka, Galilea alpata ialinakurka. Chita ialinakuspa, Jesús munarka, mana pipas iachachukuna. ³¹ Katiraiagkunatami iachachispa rikurka, kasa nispa:

—Kai Runa Tukuskaka, mana alli runakunapagmami chaiachii tukungapa ka. Paikunaka wañuchiwangapami kankuna. Chasa wañuska kaspapas, kimsa punchapika ikutimi kaugsaringapa kani.

³² Chasa niskata uiaspaka, katiraiagkuna mana iacharkakuna ima niraiagta. Chi uiaskata mana iachaspapas, manhaspa karkakuna, ima niraiagta Jesusta tapungapa.

Maikan mas atun taita kangapa, Jesús iachachiskamanda

³³ Kafarnaum puibluma chaiagrispaka, wasima iaikurkakuna. Chipika, Jesuska tapurkakunata:

—Ñambi samunakuskapi, ¿imatatak sinchi rimanakurkangichi?

³⁴ Paikunaka, upalla tianakurka. Ñambi rinakuskapika, kikinpura sinchi rimarinakurka, kasa iuiarispa: “Nukanchimandaka, ¿pisik mas atun taita tukuska niraianchi?”.

³⁵ Chimanda Jesuska, tiarispa, chungu iska pai agllaskakunata kaiaspa, nirkakunata:

—Maikan mas atun taita kangapa munagka iukanmi ñugpa mas uchullasina, tukukunapa lutrinsina kang.

³⁶ Chasa nispaka, sug uchulla wambrata kaiaspa, chaugpipi saiachirka. Chi wambrata ugllaspa, paikunata nirka:

³⁷ —Maikanpas kai uchullatasina nukamanda iuiarispa chaskigpika, nukata chaskiwagsinami rurá. Chasa chaskiwaspaka, mana nukallata chaskiwag niraianchu. Nukata kachamuwagtapasmi chaskig niraiá.

Jesús manda iuiarispa, sugkuna allilla ruranakuskamanda

³⁸ Juanka, Jesusta kasami nigrirka:

—Iachachig taita, sug runa kamba sutiwami kuku wairakunata llugsichikugta kawar-kanchi. Pai mana nukanchiwa sugllapi purig kagmanda, nukanchika nirkanchimi: “Mana chasa rurakui”.

³⁹ Jesuska, katiraiagkunata ainirka:

—Ianga kawangichi. Maikan nukapa sutiwa suma mana imaurapas kawaskasina ruragkuna, nukamanda tukuipi allillami rimankuna. ⁴⁰ Maikanpas mana nukanchita piñagkuna, nukanchiwa suma iuiawami kankuna. ⁴¹ Kasami nuka niikichita: maikanpas kamkunata, Cristota katiraiagmanda iuiarisa, sug kuashag chiri iakullapas karagpika, Taita Dios, paimanda mana kungaringapa kanchu.

⁴² —Ikuti maikanpas kasa uchulla nukamanda suma iuiawagta pandachipuagpika, paita chaiantrami, sug atun kutanga rumi kungapi walkachispa, atun kucha iakuma sitagringapa. ⁴³ Kamba makiwa pandaringapa chaiagpika, chita chaianmi kuchungapa, mana pandaringapa. Chasapaka, mas allichar kantra, maki kuru suma luarma iaikugringapa. Mana kagpika, ¿iskandi makikunawantachu munaipa, atun nina ñi imaurapas mana wañungapa kaskapi kaugsagringapa? [⁴⁴ Chipika, kuru kuirputa mikugkuna mana wañungapa kanchu. Ninapas chasallata ñi imaurapas mana wañungapa kanchu.]

⁴⁵ —Chasallata, kamba chakiwa pandaringapa chaiagpika, chita chaianmi kuchungapa, mana pandaringapa. Chasapaka, mas allichar kantra, chaki kuru suma luarma iaikugringapa. Mana kagpika, ¿iskandi chakikunawantachu munaipa, diltudupa ninama sitai tukungapa? [⁴⁶ Chipika, kuru kuirputa mikugkuna mana wañungapa kanchu. Ninapas chasallata ñi imaurapas mana wañungapa kanchu.]

⁴⁷ —Ikuti chasallata, kamba ñawiwa kwaspa pandaringapa chaiagpika, chita chaianmi surkungapa, mana pandaringapa. Chasapaka, mas allichar kantra, suglla ñawillawapas Taita Dios suma mandakuskama iaikugringapa. Mana kagpika, ¿iskandi ñawikunawantachu munaipa, diltudupa ninama sitai tukungapa? ⁴⁸ Chipika, kuru kuirputa mikugkuna mana wañungapa kanchu. Ninapas chasallata ñi imaurapas mana wañungapa kanchu.

⁴⁹ Kasapasmi Jesús nirka:

—Tukuikuna alli kangapaka, ninapi rupakugsina llakiiwami kangapa kankuna, kaug-sankama.

⁵⁰ —Kasapas. Kachi, allillami ka. Kachi wagllirigpika, mana pudiringachu kachiachingapa. Imasa allilla kachiwa mikuita kachiachigsina, kam kikipura tukuipi sumaglla kaugsangichi, mana piñachirinakuspalla.

10

Kusa kikinpa warmita mana sitangapa, Jesús iachachiskamanda

¹ Chi puiblumanda llugsispaka, Jordán iaku sug ladu chimba ialispa, Judea alpama chaiagirrakuna. Chipika, ikuti achka runakuna tandarirrakuna. Chiura chi runakunata, Jesús iachachii kallarirka; imasami iachachidur karka: chasallata. ² Chi iachachikunkama, sug fariseokunapas kaillaiaagirrakuna. Chi runakunaka, Jesusta pandachingapa iuiaiwa tapurkakuna, kasa nispa:

—¿Sug runa pudinchu, kikinpa warmita sitangapa?

³ Chiura, Jesuska tapurkakunata:

—Moiseska, ¿imatatak kamkunapa ñugpamandakunata nirka?

⁴ Chiura, paita ainirkakuna:

—Moiseska sakirka, kusa, sug iskribiska warmita kuaspaka, ña paitaka sitaska niraian-gapa.

⁵ Jesuska nirkakunata:

—Kamkuna upa iuiai tukuska kagmandami Moisés kamkunata chasa rurangapa sakirka.

⁶ Taita Dioska, ñugpata kai alpata wiñachispa, “Kari i warmimi rurarka. ⁷ Chimandami, kari kagpi, paipa taitata mamandita sakispa, paipa warmiwa iskandikuna sugllasina tukugsamungapa kankuna”. ⁸ Chasa kaspaka, mana iska niraianchu. Suglla tukuskami niraia. ⁹ Taita Dios chasa suglla tukuska niraiaaskata, ñi maikan runapas mana iukanchu, “Sitanakui” ninga.

¹⁰ Chiuramandaka wasipi kagriura, Jesusta katiraiagkuna chasa pai iachachikuska-manda ikuti tapugrirrakuna. ¹¹ Chiura, Jesuska ainirkakunata:

—Maikanpas, kikinpa warmita sitaspa, sug warmiwa kasaragpika, ñugpa warmimanda kuntra atun pandariimi rurá. ¹² Chasallata maikan warmi, paipa kusata sitaspa, sug kari-wa kasaragpika, atun pandariimi rurá.

Wawakunata, Jesús maki churaskamanda

¹³ Suura uchullakunata, paikunapa atunkuna Jesuspagma pusarkakuna, paikunata maki churaspa, Taita Diusta paikunamanda mañangapa. Jesusta katiraiagkunaka, pusanakugta piñaspa, nirkakuna:

–Mana kaillaianakuichi.

¹⁴ Chasa kawaspa Jesuska, paita katiraiagkunata rabiawa piñaspa, nirka:

–Ianga kawaichi, wawakuna nukapagma samuchukuna. ¿Imapatak arkanakungichi? Kai wawakunasina kagkunami suma luarma iaikugringapa kankuna. ¹⁵ Kasami nuka niikichita: maikanpas mana Diuspa ñawipi kai uchullakunasina allilla tukugsamugpika, mana suma luarma iaikugringapa kankunachu.

¹⁶ Chasa nispaka, wawakunata ugllaspa, paikunata maki churaspa, nirka:

–Taita Dios, kamkunata iapa kuiaspa kawapuachu.

Sug iapa iukagruna, Jesuswa rimanakuskamanda

¹⁷ Chimanda ñambi llugsikuskapika, sug runa, kalpaspa, Jesuspa ñugpa ladu kungurigrirka, kasa tapuspa:

–Alli iachachig taita, ¿imasatak iukani ruranga, mana puchukariduru suma kaugsaita taringapa?

¹⁸ Jesuska ainirka:

–¿Imapatak nukata: “Alli iachachig taita” niwakungi? Maikanpas mana alli tianchu. Taita Diosllami alli ka. ¹⁹ Moisés ima niskata ñami iachangi: “Mana wañuchingi. Mana sugpa warmiwa siriringi. Mana sisangi. Mana pimandapas llullangi. Imapas mana llullachispa sisangi. Kamba taitata mamandita sumaglla kuiangi”.

²⁰ Chiura, chi runa ainirka:

–Iachachig taita, nuka uchulla kauramandatami tukui chi niskata chasa ruraspa kaug-sani.

²¹ Jesuska, paita kuiaiwa kawaspa, nirka:

–Nigpika, kasami pisipukungi. Kunaauralla rii. Tukui ima iukaskata katugrii. Katuska kullkitaka mana iukaskakunata tukuiwta karagrii. Chasa ruraspaka, suma luarpika iapa iukagmi tukungapa kangi. Nispaka samungi, nukata katiwangapa.

²² Chasa rimaskata uiaspaka, chi runa llakirirka. Irkiaspami rirka, iapa iukag kasp.

²³ Jesuska, muiugta kawaspa, katiraiagkunata nirka:

–Iapa iukagkuna suma luarma iaikugringapaka, iapa trabajusumi kangapa ka.

²⁴ Chasa uiaspa, katiraiagkunaka iapa ujnarirkakuna. Jesuska, ikuti nirkakunata:

–Wambrakuna, iapa trabajusumi ka, suma luarma iaikugringapa. ²⁵ Maschar alli kantra, sug wagra,* sug aguja ñawipi ialingapa. Chimanda mas trabajusumi ka, chi iapa iukagkuna suma luarma iaikugringapa.

²⁶ Chasa uiaspaka katiraiagkuna, iapa mancharispa, kikinpura tapurinakurka:

–Nigpika, ¿pisik kispiringapa pudinga?

²⁷ Chiura Jesuska, paikunata kawaspa, nirka:

–Ñi maikan runa mana pudinchu. Taita Diosllami kispichingapa pudí. Taita Diosmi imapas pudí.

²⁸ Chiura Pedroka, nii kallariirka:

–Uiamui. Nukanchi, tukui ima iukaskata sakispami kamta katiraianchi.

²⁹ Jesuska ainirka:

–Kasami nuka niikichita: maikanpas, nukata i Alli Willaita kuiaspa, wasita, waugki i panikunata, mama i taitandita, wambrakunata, alpakunata u ima iukaskata sakispa katiwagka, ³⁰ patsamanda mas patsami kai alpapita chaskingapa kankuna. Chasallata wasikuna, waugki i panikunata, mamandikunata, wambrakunata i alpakunatapasmichaskingapa kankuna, nukata katiraiawagmanda llakii pasaspa. Suma luarpipas, mana puchukariduru kaugsaitapasmi tarigringapa kankuna. ³¹ Chasa kagpipas, kunaura ñugpa niraiaskakuna, achkakunami kati laduma tukungapa kankuna. Ikuti kunaura kati niraiaskakunaka, achkakunami ñugpa laduma tukungapa kankuna.

Jesús imasa wañungapa kagta, pai kimsama willaskamanda

³² Chiuramanda, Jerusalén puibluma ñambi rinakurka. Jesuska ñugpa rikurka. Paita katiraiagkunaka, ujnarispa kati kati rinakurka. Sug runakunaka, manchaspami katichinakurka. Jesuska, ikuti chungu iskai pai agllaskakunallata kaiaspa, ima paita pasaringapa kagta willai kallariirka, kasa nispa:

³³ –Uiawaichi. Jerusalenmami rinakunchi. Chipika, kai Runa Tukuskaka iaia sasir-dutikunapa i Moisés ima niskata iachachig taitakunapa makipimi apichii tukungapa ka. Chi runakunaka, nukamanda ningapami kankuna: “Wañuchiimi chaiá”. Nispaka, mana

* 10:25 griego rimaiwa: kamello suti atun animal.

judiu kaskakunapagmami chaichiwangapa kankuna. ³⁴ Paikuna, nukata unżawaspa, tukawaspa, asutiwaspa, wañuchiwangapami kankuna. Chasa wañuska kaspapas, kimsa punchapika ikutimi kaugsaringapa kani.

Zebedeopa wambrakuna, ima Jesusta mañanakuskamanda

³⁵ Zebedeopa wambrakuna, Santiago i Juan suti, Jesuspagma kaillaiaspaka, kasami nirkakuna:

—Iachachig taita, nukanchi ima mañanakuskata, ¿manachu uiawantrangi?

³⁶ Chiura, Jesús tapurka:

—¿Imatak munanakungichi, nuka rurangapa?

³⁷ Chiura ainirkakuna:

—Kam sumaglla mandangapa tiarispapa chaiaura, nukanchita tiarichingi: sugtaka kamba alli ladu, sugtaka kamba luku ladu.

³⁸ Jesuska nirkakunata:

—Mana iachangichichu ima mañanakugta. Nukata chaiawangapami ka, iapa achka llakiikuna[†] iukangapa. ¿Kamkunapaschu chasallata pudinrangichi, llakiikunata pasan-gapa? Chasallata, nukata chaiawangapami ka, wañuchii[‡] tukungapa. ¿Kamkunapaschu chasallata pudinrangichi, wañuchii tukungapa?

³⁹ Chiura ainirkakuna:

—Ari, chasa pudingapami kanchi.

Jesuska nirkakunata:

—Ari, nuka llakiikunasinallatata, kamkunapasmi pasankangichi. Imasami nuka wañuchii tukungapa kani: kamkunapasmi chasallata wañunkangichi. ⁴⁰ Chi nukapa alli ladu luku ladu tiarichingapaka, nukata mana chaiawakunchu kawangapa. Maikan nukapa Taita agllaskakunatami chasa tiarichingapa ka.

⁴¹ Santiago i Juan ima mañanakuskata uiaspaka, chi sug chungu katiraiagkuna rabiarii kallarirkakuna. ⁴² Jesuska, paikunata kaiaspaka, nirkakunata:

—Kamkuna allillami iachangichi: kai alpapi atun mandagkuna, mandanakuskapi kaug-sagkuna ñi ima mana llakisipallami mandankuna. Chasallata, maikanpas atun mandag-sina tukuspa, mana llakisipallami runakunata charinkuna. ⁴³ Kam kikinpuraka, chasa rurag runakunaka mana kangichi. Kam kikinpura maikan, Diuspa ñawipi atun kangapa munaspaka, sugkunapa lutrinsina tukuchu. ⁴⁴ Maikan mas atun taita kangapa munagpas, ñugpa iukanmi, tukuikunapa lutrinsina kanga. ⁴⁵ Chasallata kai Runa Tukuskaka mana samurkachu, sugkunata lutrinsina churangapa. Tukuikunapa lutrinsina kangapami nuka samurkani. Nukapa wañuiwami achkakunata kispichingapa kani.

Sug runa mana ñawi kawagta, Jesús aliachiskamanda

⁴⁶ Jesús katiraiagkunawanta, Jeriko suti puibluma chaiagrirkakuna. Iapa achka runa-kuna, paita katicirkakuna. Chimanda llugsinakuura, sug runa mana ñawi kawag, limusna mañaspa, ñambi kuchupi tiakurka. Chi runa, Timeopa wambra Bartimeo suti karka. ⁴⁷ Chi runaka, Nazaretmanda Jesús ña ialikugta uiaspa, kaparii kallarirka, kasa nispa:

—Davidpa wambra Iaia Jesús, nukamanda llakirii.

⁴⁸ Achka runakuna, paita piñaspa, ninakurka:

—Upalla kai.

Paika, ikuti mas sinchimi kaparii kallarirka, nispa:

—Davidpa wambra, nukamanda llakirii.

⁴⁹ Chasa uiaspa Jesuska, saiarispa, nirka:

—Paita kaiamuichi.

Chi runata kaiaspaka, nirkakuna:

—Alli iuiachirispa, atarii. Kamtami kaiaku.

⁵⁰ Chasa uiaspaka, kataraiaska katangata sitaspa, utkalla Jesuspagma chaiagrirka.

⁵¹ Chaiagriura, Jesuska paita tapurka:

—¿Imatak munakungi, nuka kamta rurangapa?

Chiura ainirka:

—Nukapa iachachig taita, nuka kawangapami munakuni.

⁵² Chiura, Jesuska nirka:

—Kam nukamanda suma iuiariskamandami ambirigsamungi. Kunaura kambagma riilla.

Chasa nigllapi, allilla kawai kallarirka. Nispaka, Jesús maima rikuskama katii kallarirka.

[†] 10:38 “Sug winja kupata upiangapa”, iapa achka llakiikuna iukangapami niraiá.

[‡] 10:38 “Sug bautismuta chaskingapa”, wañuchii tukungapami niraiá.

11

Jerusalén puibluma, Jesús iaikugriskamanda

¹ Jerusalemna ña kaillaianakuspa, Betfajé i Betania suti puiblukuna ña kawarikuskamanda, Olivos suti lumakama chaiagrirkakuna. Chimanda Jesuska, iskai katiraiagkunata kacharka, ² kasa nispa:

—Riichi chi ñugpa ladu uchulla puibluma. Chaiagrispaka, tarigrinkangichimi sug buru watariaskata, manara pipas tiariska. Chi buruta paskaspa, apamungichi. ³ Maikan tapugta: “¿Imapatak chasa runanakungichi?”: chiura ainingichi: “Iaia Jesustami ministiku. Mañachii. Ñami kutichimunga”.

⁴ Chi kachai tukuskakunaka, rispa, sug wasi ladullapi buru wataskata tarigrirkakuna. Chitaka paskarkakuna. ⁵ Chipi kagkunaka tapurkakuna:

—¿Imapatak buruta paskanakungichi?

⁶ Chiura, Jesús imasa niskasina ainirkakuna. Chasa uiaspaka, sakirkakuna apangapa.

⁷ Chiura, buruta Jesuspagma aparkakuna. Chaiachigrispaka, burupa wasapi paikunapa katangakunata churarkakuna. Chasapika Jesús, tiarispá, rii kallarirka. ⁸ Chasa Jesús rikugta kawaspa, achka runakuna, paikuna kataraiaska katangakunata ñambi suui mandachirkakuna. Sugkunaka, pangaiug sachá uchulla malkikunata kuchuspa, ñambi ñambi churarkakuna, pai ialingapa. ⁹ Nispaka Jesusta ñugpagkuna i paipa kati rinakug, kasa kaparispá nii kallarirkakuna:

—Taita Diusta iapa suma kagtami ninchi.

Atun Taita Dios kachamuskami samukungi.

Paipa iapa kuiaskami kangí.

¹⁰ Kam samukungimi,

nukanchipa ñugpamanda taita David mandaskasinallatata suma mandag kangapa.

Taita Dios awa suma luarpi kagtami ninchi:

“Kam, iapa sumami kangí”.

¹¹ Jesús chasa Jerusalemna chaiagrispaka, Diospa atun wasi ukuma iaikugrirka. Chi ukupi tukuita kawaspaka, ña chisiaska kaura, chungá iskai pai agllaskakunawanta Betania puibluma rirka.

Igus sachá wañuringapa, Jesús niskamanda

¹² Chi kaiandi, Betania puiblumanda rikuskapika, Jesusta iarkai apigsamurka. ¹³ Sug igus pangaiug sachata karumandata kawarka. “Chi sachapi mikui muiumi tianga” iuiaspa, chima kaillaiarka. Chi sachama chaiagriuraka, ñi ima mikui mana iukarka, manara tiariska kagmánda. ¹⁴ Chiura, Jesuska nirka:

—Kunauramanda, ñi imaurapas mana pipas, kai sachamanda muiui mikungapa kan-kunachu.

Chasa rimagtaka, paita katiraiagkuna uiarkakuna.

Diuspa atun wasi ukumanda, Jesús katugkunata llugsichiskamanda

¹⁵ Chimandaka, Jerusalén puibluma ikuti chaiagrirkakuna. Diospa atun wasi ukuma iaikugrispa, Jesuska katugkunata i randinakugta chi ukupi kawarka. Chimanda, iapa rabiarispa, paikunata llugsichii kallarirka. Kulki trukagkunapa misakunata i paluma katugkunapa bankukunatapas bulachirka. ¹⁶ Chasallata, mana sakirka, pipas chi wasi ukuta imapas aparispa ialingapa. ¹⁷ Chipi kagkunatapas iachachirka, kasa nispa:

—Ñugpamanda librupi, kasami willaraiá: “Nukapa wasi, Taita Diusta iuiarispa tukui alpakunamanda runakuna mañadirumi kangapa ka”. “Kamkunaka, sisai kausadirusina-mi rurarkangichi”.

¹⁸ Jesús chasa rimaskataka, iaia sasirdutikuna i Moisés ima niskata iachachig taitakuna uiarkakuna. Chasa uiaspaka, paita iuiarinakurka, imasapipas wañuchingapa. Nigpika, pai ima iachachiskakunata tukui runakuna suma ujnarispa kagmandami paita manchar-kakuna.

¹⁹ Ña tutaiakuura, Jesús katiraiagkunawanta chi atun puiblumanda llugsirkakuna.

Chi igus sachá chakiriska kaskamanda

²⁰ Chi kaiandi tutata ñambi rinakuskapika, chi igus sachata angumandata limpiu chakiriska kagta kawarkakuna. ²¹ Chiura Pedro, iuiarispa, Jesusta nirka:

—Kawai, iachachig taita. Sachata kam nirkangi wañungapa; chika ñami chakiriska ka.

²² Jesuska, paikunata ainirka:

—Taita Diosmánda suma iuiái iukangichi. ²³ Kasami nuka niikichita: kamkuna chi suma iuiáiwa mana sug rigcha iuiaspalla, kai lumata ninrangichi: “Kaimanda anchurispá, atun kucha iaku ukuma sitarigríi”; kamkuna ima niskasinami tukugsamuntra. Imasa niskasina

pasaringapa kagta suma iuiagpika, chasallatami tukugsamunga. ²⁴ Chimanda, kasami niikichita: Taita Diusta kamkuna ima mañaspaka, suma iuiarispaka, kasa iuiangichi: “Ñami chaskiska kani”. Chasa suma iuiagpikunaka, kamkuna ima mañaskasinami tukugsamungapa ka.

²⁵ —Kasapas. Taita Diusta mañangapa kaura, maikanwa piñachirinakuska kagta iuiarichu: ringapami chaía, ñugpa parijuma pasinsiachirinakungapa. Sugkunata pasinsiangpika, kamkunapa Taita Dios suma luarpi kagpasma kamkuna pandariskakunatapas pasinsiangapa. [²⁶ Ikuti kamkuna sugkunata mana pasinsiangpika, kamkunapa Taita Dios suma luarpi kagpas kamkuna pandariskakunata manami pasinsiangapa.]

Kamtaka, ¿pitak kachamurka, atun tukuspa puringapa?, Jesusta tapuskamanda

²⁷ Chimandaka, ikuti Jerusalenma chaiagrirkakuna. Diuspa atun wasi ukupi Jesús purikuura, iaia sasirdutikuna, Moisés ima niskata iachachig taitakuna i sug taitakunapas paipagma kaillaikarkakuna, ²⁸ tapungapa:

—¿Imapatak chasa ruraspaka purikungi? ¿Pitak kamta kachamurka, atun tukuspa purikungapa?

²⁹ Jesuska ainirkakunata:

—Nukapas, kamkunata tapusakichita. Kamkuna ainiwagpika, nukapas willasakichitami, pi nukata kachamuwaspa atuniachiwaska kagta. ³⁰ ¿Pitak Juanta kacharka, bautgisangapa? ¿Taita Dioschu kachamurka? Mana kagpika, ¿runakunachu kacharka? Ainiwaichi.

³¹ Chiuraka, kikinpura rimarinakurka, kasa iuiarispaka:

—“Taita Dios kachamuskami karka” nigpika, paika ainingami: “Nigpika, ¿imapatak mana paita uiarkangichi?” ³² “Runakunalla kachamuskami karka” mana nisunchi. Tukuikunami Juanmanda iuianakú: “Sutipami Santu Ispirituwa rimag karka”. Paikunata chimandami manchai iukanchi.

³³ Chasa rimanakuspa, Jesusta ainirkakuna:

—Mana iachanchichu, Juanta pi kachamuska kagta.

Chasa ainiura, Jesuska nirkakunata:

—Chimandami nukapas mana willaikichita, pi kachamuwaska kagta, atun tukuspa kangapa.

12

Ubas sachakunata almagkuna, mana allilla ruraskamanda parlu

¹ Chiuramandaka, iuiai apingasina suma parlukunawami rimai kallarikakunata, kasa nispapa:

—Sug runa, achka ubas sacha malkikunasi paipa alpapi tarpurka. Chi alpa muiundi kincha saiachispapa, ubas iaku surkudirupassi rurarka. Chasallata, awa kawitu saiachirka, tarpuskata kawanakungapa. Chasa ruraspaka, sug runakunata chi ubas sachakunata sakirka, almaspa, chaugpi chaugpi pallangapa. Chasa sakispaka, karu alpama rirka.

²—Ña pallangapa chaiauraka, sug piunta chi almagkunapagma kacharka, paipa rasiunta chaskingapa. ³ Chi runakunaka, kachai tukuskata apispa, makaspa, chusa maki kacharkakuna.

⁴—Chiuramanda, ikuti sug piuntasi kacharka. Chitaka kamispa, makaspa, umapi kuchurkakuna. Chasallata, chusa maki rirka.

⁵—Ikuti sug piuntapassi kacharka. Chitaka wañuchirkakunasi. Chiuramandaka, ikuti achkakunata kacharka. Paikunataka makarkakuna. Sugkunataka wañuchirkakuna.

⁶—Chi duiñuka iukarkasi suglla wambra, iapa kuiaska. Katimakar, paita kacharka, kasa nispapa: “Nukapa wambra kagmanda, mana imapas rurapuangakunachu”.

⁷—Nigpika chi almagkunaka, chi wambrata kawaspa, kikinpura rimarirkakuna, kasa nispapa: “Kawaichi. Kai alpa duiñupa wambrami samuku. Paitapas wañuchisunchi. Chasaka, nukanchipallami kai alpa tukunga”.

⁸—Chasa nispaka, paita apispa, wañuchirkakuna. Chi alpamanda llugsichispa, sitagrirkakuna.

⁹ Chasa parlaspaka, Jesús nirka:

—Nigpi chi duiñuka, ¿manachu samuspa, chi runakunata tukuita wañuchigsamuntra; nispaka, chi sachakunata ikuti sugkunata almagkuna sakintra?

¹⁰—¿Manachu ñugpamanda librupi kasa willaraiaskata kawarkangichi?

Wasichigkuna wabutiska rumi, wasita charigmi tukugsamurka.

¹¹ Atun Taita Diosmi chasa rurarka.

Nukanchi, iapa ujnarisipami chasa ruraskata kawanakunchi.

¹² Chi parluta uiaspaka, judiu taitakuna nirkakuna:

–Nukanchitami uiachiku—. Chimanda, Jesusta apichingapa munanakurka. Chasa munanakuspapas, achka runakuna chipi kagmanda, manchai apirkakunata. Chimanda, paita sakispa, anchurirkakuna.

Impuistumanda Jesusta tapuskakunamanda

¹³ Nispaka, sug fariseokunata i mandag Herodeswa purigkunata Jesuspagma kacharakuna, pai rimakuskata uiaspa, imapipas pandarigpika, justisiakunata willagringapa. ¹⁴ Chaiagrispaka, chi runakuna Jesusta sumaglla nirkakuna:

–Iachachig taita, nukanchi iachanchimi, kam mana llullaspalla rimagta. Mana pitapas kawaspallami tukuikunata iwalla sutipa kaskata iachachingi, imasa Taita Dios munaskasina ruraspa kaugsangapakuna. Chimandami kasa tapugsamunchi: ¿allillachu ka, Romamanda iaia mandagta nukanchi impuistu kuangapa? ¿Pagasunchichu u mana?

¹⁵ Jesuska iacharka, sungu awalla chasa tapunakugta. Nispaka nirkakunata: –¿Imapatak munanakungichi pandachiwangapa? Impuistu kulki kuadiruta apamuichi, nuka kawangapa.

¹⁶ Chiura, sug kulki apagrispa kuagrirkakuna. Chita kawaspa, Jesuska tapurkakunata: –Kai kulkipi, ¿pipa ñawitak kawariku? ¿Pimandatak willaska niraiá? –Romamanda iaia mandagmenda— ainirkakuna.

¹⁷ Chasa ainiura, Jesuska nirkakunata: –Chasa kagpika, Romamanda iaia mandagpa kaskata paita kuaichi. Taita Diospa kaskataka Taita Diusta kuaichi. Chasa uiaspaka, iapa ujnarirkakuna.

Wañuskakuna kaugsaringapa kaskamanda, Jesusta tapuskakunamanda

¹⁸ Chiuramanda sug saduseo suti runakuna, Jesuspagma chaiagrirkakuna. Chi runakuna iachachidurmi kankuna, wañuskakuna mana mas kaugsaringapa kagta. Chaiagrispaka, Jesusta nirkakuna:

¹⁹ –Iachachig taita, Moiseska nukanchimanda kasasi willaspa sakirka. Sug kari kasaraspa, warmi manara wambrakuna iukagllapi wañugpika, sug waugkindisi iuká chi biudawa kasaranga; chasaka, wañug waugkindipa kuinta wawakuna iukangapa.

²⁰ –Nigpika, kanchis waugkindikunasi tiarka. Atun waugkindika, kasaraspa, warmi manara wawakuna iukagllapisi wañurka. ²¹ Chiwanka, kipamanda waugkindisi chi sapalla kidaska warmiwa kasarai iukarka. Chi waugkindipas, warmi manara wawakuna iukagllapisi wañurka. Katimanda waugkinditapas chasallata pasarirka. ²² Chasallatasi tukui kanchis waugkindikuna, warmi manara wawakuna iukagllapi wañurkakuna. Katimakar, chi warmipas wañurka. ²³ Nigpika, wañuskakuna kaugsariuraka, ¿pipatak chi warmika kanga, chi kanchis waugkindikunawa kasadu kaspaga?

²⁴ Jesuska ainirkakunata: –Kasamandami kamkuna pandarispa iuianakungichi: ñugpamanda librupi willaraiaskata ñi Taita Diospa iapa iachaita mana iuiái iukangichichu. ²⁵ Wañuskakuna kaugsariskauramandaka, kari ñi warmi mana kasarangapa kankunachu. Imasa suma luarmanda anjilkunasinami kaugsaringapa kankuna.

²⁶ –Kasapas. ¿Imapatak kamkuna ningichi: “Wañuskakuna mana mas kaugsaringapa kankunachu”? ¿Manachu kasa Moisés willaraiaskata kawarkangichi? Taita Dios, sacharupakuskamanda rimaspa, kasami paita nirka: “Nukami kani Abrahampa, Isaakpa i Jakobpa Taita Dios”. ²⁷ Taita Dios mana kanchu wañuskakunapa. Kaugsagkunapami Taita Dios ka. Chasa mana iachaspami iapa pandarispa iuianakungichi.

Tukui mandaikunamanda, ¿maikantak mas atun ka?, Jesusta tapuskamanda

²⁸ Moisés ima niskata sug iachachig taita, Jesús saduseokunawa rimanakuskata uiaurka. Jesús chasa suma ainiskata iachaspa, chi runaka, paipagma kaillaiaspa, tapurka:

–Tukui mandaikunamanda, ¿maikantak mas atun ka?

²⁹ Chiura, Jesuska ainirka: –Kai mandaimi tukuikunamanda mas atun ka: “Uiaichi, Israelmanda runakuna. Nukanchipa atun Taita Dioska, suglla iaiami ka. ³⁰ Kamba atun Taita Diusta kuiangi kam kikinpa almawa, sunguwa, tukui animuwa i tukui iuiaikunawa”. ³¹ Kai katimandapasmí chi mandaisinallatata atun ka: “Kam kikintasinami iukangi, tukui runakunatapaspas kuianga”. Chi iskandi mandaimi tukuikunamanda mas atun ka.

³² Chiura, chi runaka nirka: –Allillami ainiwangi, iachachig taita. Sutipami ningi: “Taita Dios, sugllami tia”. Sug rigcha diuska, mana tianchu. ³³ “Kam kikinpa sunguwa, tukui iuiaiwa i tukui animuwa Taita Diusta kuiangichi” i “Kam kikintasinami iukangi, tukui runakunata kuianga”: chasa

rurairkunawaka, Diuspa ñawipi tukui allilla kagtami kawá. Ikuti maitukupas Taita Diusta kamariku karaspa, ima wagra u animal altarpí rupachiskaka, Diuspa ñawipi maillami ka.

³⁴ Chi runa suma ainiskata uiaspa, Jesuska paita nirka:

–Kamta maillami pisiku, Taita Diuswa tukuskapura kangapa.

Chiuramanda ñi pipas, mana mas animu iukarkakuna, Jesusta tapungapa.

Taita Dios agllaska Cristo, Davidpa iaiami ka

³⁵ Diuspa atun wasi ukupi iachachikuspa, Jesuska nirka:

–Taita Diuspa agllaska Cristomanda, ¿imapaták Moisés ima niskata iachachig taitakuna ninkuna, Davidpa wambrapa kati wambra kagta? ³⁶ ¿Manachu David kikin, Santu Ispiritu-wa kaspera, Cristomanda kasa willarka?

Atun Taita Diosmi nukapa iaiata nirka:

“Nukapa alli ladu tiarii,

nuka tukui kamta mana munagkunata apagrispa,

kamba chaki sarudiru ukuma churankama”.

³⁷ Chasami David kikin, Cristomanda nirka: “Nukapa iaia”. Nigpika, ¿imawantak Cristo, paipa wambrapa kati wambra kanga?

Iapa achka runakuna, Jesusta sumagllami uianakurka.

Iachachig taitakunata, Jesús piñaskamanda

³⁸ Kasapasmi Jesuska iachachispa nikurka:

–Moisés ima niskata iachachig taitakunawa mana iapa sugllapi iuiaiwa kangichi. Paikuna munankunami, iapa suma kawari katangakuna churarispas puringapa. Kallipi paikunawa tupanakuskapi munankunami, iapa suma kuiaiwa kumurispa, “Puangi, taita waugki” ningapakunata. ³⁹ Tandaridiru wasikunapipas munankunami, atun taitakuna tiaridiru ñugpa ladu tiaringapa. Chasallata, maima kunbidagpi suma mikungapa kaiaura, ñugpa ladu tiaringapami munankuna. ⁴⁰ Warmi sapalla kidaskakunata wasikunatami kichudur kankuna. Nispaka, kawachiringapagllami unai Taita Diusta rimanakudur kankuna. Chasa ruraskakunamandami sug luarpi sugkunamandas mas llakiipi justisiai tukungapa kankuna.

Sug mana iukag warmi, Taita Diusta kulki karaskamanda

⁴¹ Diuspa atun wasi ukuma sugnigmanda iaikugrispaka, Jesús, kulki churadirukuna ladullapi tiarigrirka. Chipika, runakuna imasa kulki churanakuskata kawakurka. Achka-kuna, iapa iukagkuna kaspera, achka kulki churanakurka. ⁴² Chiura sug warmi mana iukag sapalla kidaskaka, chaiagrispa, iskaí uchulla kulkillami churarka. ⁴³ Chasa kawaspa Jesuska, paita katiraiagkunata kaiaspa, nirka:

–Kasami nuka niikichita: chi warmi mana iukag sapalla kidaska, tukuikunamanda mas achka churagmi niraiá. ⁴⁴ Sugkunaka, paikunapa puchuskatami churarkakuna. Ikuti chi warmika, mana iukaspapas, pai mikungapa charikuskatami tukuita kararka.

13

Diuspa atun wasita puchukai tukungapa, Jesús willaskamanda

¹ Diuspa atun wasi ukumanda Jesús llugsikuuraka, sug paita katiraiag, ujnarispa, nirka: –Kawamui, iachachig taita. Askurinti iapa atun kantiaska rumikunawa saiachiska suma wasikunami ka.

² Jesuska, paita nirka:

–Kai atun wasikunamanda kasami willaiki: chi tukui piachiska rumikuna, ñi sug mana sakingapa kankunachu. Tukuitami urmachispa puchukangapa kankuna.

Kai alpa puchukarii puncha manara chaiagllapi, imasa kawaringapa kaskamanda

³ Jesús ña Olivos lumapi, Diuspa atun wasi sug ladu chimba kawariipi tiarigrirka. Chiura Pedro, Santiago, Juan i Andrés, paillawa kaspera, tapurkakuna:

⁴ –Nukanchita willai: ¿imauratak chasa pasaringa? Ña tukui chasa pasaringapa kagta, ¿imawatak kawachinga?

⁵ Chiura Jesuska, nii kallarirkakunata:

–¡Ujalallapas maikan, kamkunata llullachispa pandachichukuna! ⁶ Achkakunami, nukasina tukuspa, samungapa kankuna, kasa nispa: “Nukami Taita Dios agllaska Cristo kani”. Chasa rimanakuskawaka achka runakunatami llullachingapa kankuna.

⁷ –Tukuimami mana llakispalla wañuchinakugta iacharingapa ka; kamkuna mana mancharinakungichi. Chasami pasaringapa ka. Nigpipas, kai alpa puchukarii puncha manara chaimuska niraiianchu. ⁸ Ñugpami sug mandag alpanigmandakunawa sugnigmandakunawa wañuchinakui tiangapa ka. Sugnigmanda sugnigmandami alpa kuiurispa

chapurispa ringapa ka. Iapa iarkaimi tiangapa ka. Chi llakiikuna pasariska, chara kallariillami kangapa ka.

⁹—Allilla iuiarispa kaugsanakungichi. Kamkunata apispa, justisiakunapagmami apanagakuna. Tandariduru wasikunapimi kamkunata asutingakuna. Kamkuna nukawa kagmanda, atun mandagkunapagmami purichingakuna, justisiai tukungapa. Chiura, paikunata nukamandami willankungichi. ¹⁰ Nukamanda Alli Willaita tukui runakunata kai alpapi willaurami kai alpa puchukarii puncha kangapa ka.

¹¹—Justisiakunapagma kamkunata apaura, mana iapa iuianakungichi: “¿Imasami paikunata ainini?”. Ainingapa chaiaura, kikin Santu Ispiritumi iuiachingapa ka. Kam kikin-kunapa iuiaiwa mana rimanakungapa kangichichu. Santu Ispiritumi kamkunata allilla rimachingapa ka.

¹²—Chi punchakuna sugkuna, waugkindikunatami kuangakuna, wañuchii tukungapa. Chasallata taitakunapas, paikunapa wambrakunatami wañuchingapa kuangakuna. Wambrakunapas, taita i mamandita kuntra tukuspa, wañuchingapami kuangakuna. ¹³ Tukuikunami kamkunawa rabiaringapa kankuna, kamkuna nukawa kagmanda. Chasa pasanakuspapas, wañunkama nukallawa iuiarispa kagkunami kispiringapa kankuna.

¹⁴—Iapa jiru mana kawangasinami rurangapa kankuna; sug ianga diussina rigchata Diuspa atun wasi ukupimi* saiachingapa kankuna. Chitaka, kamkuna kawangapami kangichi. (Santu Ispirituwa rimag willaraiaskata allilla iuiaiwa iuiarispa kawangichi.) Chasa kawaspaka, Judea alpapi kaugsanakug sachukuma mitikuchukuna. ¹⁵ Maikanpas wasi truja awapi kagkuna, mana uraikunakuchu, ukuma iaikuspa, imakuna apangapa. Imasa kaskasinalla mitikuchukuna. ¹⁶ Chasallata maikanpas chagrapi kagkuna, mana wasima kutichukuna, katanga u imapas tandachingapa. ¹⁷ ¡Ai, maikan warmijmkuna, chi punchakuna wigsawa ungug u uchulla markaska kagkuna! ¹⁸ Taita Diusta mañangichi, mana chaiaichu, tamia puncha mitikui tiangapa.

¹⁹—Chi punchakuna, askurinti iapa llakiimi tiangapa ka. Taita Dius kai alpa wiñachiskauramandata kunankama, chasa llakiika mana tiaska kanchu. Chasallataka, kunauramanda mana ikuti chasa tiangapa kanchu. ²⁰ Atun Taita Dius chi llakii punchakunata mana pisiachigpika, ñi pipas manachar kispirintra. Pai aglaskakunata iapa kuiaspami chi punchakunata pisiachingapa ka.

²¹—Chiurakuna, kamkunata ninakungami: “Uiamuichi. Taita Dius agllaska Cristo, kaipimi ka” u “Chipimi ka”. Chasa ninakugpipas, kamkuna mana uiangichi. ²² Chi punchakuna, iapa llullachigkunami kawarigsamungapa kankuna, kasa nispa: “Nukami Cristo kani” u “Nukami Santu Ispirituwa rimag kani”. Chi runakunaka, mana imaurapas kawaskasina i ujnaringasinami kawachingapa kankuna. Chasa kawachiskawaka Taita Dius agllaskakunatapasmí ñalla llullachingapa kankuna. ²³ Chasa uiaspa, kamkunaka allilla iuiarispa kaugsanakungichi. Manara chasa tukungapa chaigpiti tukui allilla willaikichita.

Jesus imasa ikuti samungapa kaskamanda

²⁴—Chi iapa llakii punchakuna ialiskauramandaka, indimi amsaiangapa ka; killapas, manami punchaichingapa ka; ²⁵ istrillakuna, awamandami urmangapa kankuna; kai alpamanda awa ladu tiaskakunapasmí kuiuchii tukungapa kankuna. ²⁶ Chiura, kai Runa Tukuskatami kawawangapa kankuna. Nukapa tukui iapa suma iachaiwa puuiukunapimi samungapa kani. ²⁷ Samuspaka, nukapa anjilkunatami kachasa. Paikunaka, nuka agllaska runakuna sug kuchu sug ladu kuchu kai alpapi kaskakunata, tukuikunatami† tandachipungapa kankuna.

²⁸—Kai iuiai apingasina suma rimaiwa iachaikuichi. Imasami igus sacha malkikuna wiñaspa, pangakuna ña susuriura, kamkuna kawaspa, ningichi: “Ñami alli punchakuna chaiamuku”: ²⁹ chasallata kamkuna, tukui chasa pasarinaskata kawaspaka, ñami iachankangichi, nuka ña chaiamukugta.

³⁰—Kasami nuka ñikichita: manara tukui kunaura kaugsagkuna wañugpimi tukui chasa pasaringapa ka. ³¹ Sug luar i kai alpa luar puchukarigpipas, nuka ima niskaka mana ialingapa kanchu.

³²—Ima puncha ima ura chasa tukugsamungapa kagta, mana pipas iachanchichu. Ñi suma luarmanda anjilkuna ñi Diuspa wambrapas mana iachanchu. Nukapa Taitallami iachá. ³³ Chimanda, sumaglla iuiaiwa rigcharaiagsina kangichi. Kamkunapas mana iachangichichu, ima ura nuka samungapa kagta.

³⁴—Chi puncha chaingapa kagta kasa iuiarintranchi. Sug patrún, sugsinama ringapa kaspera, wasimanda llugsikuspa, paipa piunkunata sug sug imasa chaiaskasina rurangapa sakirka. Shanžatapas iuiachirka, rigcharaiaspalla suiakungapa. ³⁵ Chi runakuna mana

* 13:14 “Maipi mana allilla kaskapi”, Diuspa atun wasi ukupimi niraiá.

† 13:27 “Chusku wairanigmanda”,

tukuinigmandami niraiá.

iacharkakuna, patrun imaura kutimungapa kagta. Chasallatami kamkunapas mana iachangichi: ¿amsaiakuurachu chaimusa, u chauppi tuta, u gallu kantaura u tutata pakari-kuura? Chimanda, iuiaipilla kangichi. ³⁶ ¡Amalai puñuriska kagsinata shachigsamuntrani! ³⁷ Nuka ima kamkunata niska, tukuikunatami nini: “Iuiaipilla kangichi”.

14

Jesusta wañuchingapa iuanakuskamanda

¹ Tanda mana libadurawa mikudiru punchakuna ña chaiakuura, paskua suti atun punchapa iskai punchalla pisikuura, chi punchakuna, iaia sasirdutikuna i Moisés ima niskata iachachig taitakunaka paipura rimarinakurka, Jesusta pakalla apispa wañuchingapa.

² Iuiarispa ninakurka:

—Kai atun punchakunaka, mana paita apichisunchi. Apichigpika, tukui runakuna, iachaspaka, nukanchiwami rabiaringakuna.

Jesupa umapi, sug warmi suma asna asiti talliskamanda

³ Jesús, Betania puiblupi karka, Simón suti runapa wasipi. Chi Simón, aicha ismui unguiwa ñugpata karka. Jesús mikuspa tiakuuraka, sug warmi chaiagirirka. Chi warmi, nardo suti suma asna asiti iapa bali kulkiwa randispa, marmul rumi butillapi apaspami chaiagirirka. Nispaka, chi butilla kungata pakispa, Jesupa umapi asitita tallirka. ⁴ Chasa kawaspaka sugkuna, rabiarispa, kasami kikipura ninakurka:

—¿Imapatak chi suma asna asiti, ianga tallí? ⁵ Chita, kimsa patsa puncha ganaska ialigta bali kulkimanda katuspa, mana ñi imapas iukaskakunata chi kulkikunata karangapami chaiakurka—. Chasa rimanakuspa, chi warmita piñagsinami ninakurka.

⁶ Jesuska nirkakunata:

—Ianga kawaichi. ¿Imapatak kai warmita ninakungichi, mana allilla ruragta? Paika, allillami rurawarka. ⁷ Ñi ima mana iukagkunata imaurapasmu iukangapa kangichi. Kamkuna paikunata suma rurangapa munagpikuna, paikunaka tiangapagillami kankuna. Ikuti nukataka sug ratullami kawawanakungichi. ⁸ Kai warmi, mailla pudiskaka allillami rurawá. Kai suma asitiwa talliwaskaka niraianni nukapa kuirpu wañuskata pambangapa ña allichiska sakigsina. ⁹ Kasami nuka niikichita: tukui alpapi, maipipas nukamanda Alli Willaita willaskapi, kai warmi ima rurawaskatapas parlangapami kankuna, paimanda mana kungarisipalla.

Jesusta apichingapa, Judas Iskariote maskaskamanda

¹⁰ Nigpika chungu iskai Jesús agllaskakunamanda Judas Iskariote sutika, iaia sasirdutikunapagma rispa, nirkakunata:

—Jesusta apichisakichita.

¹¹ Chasa uiaspaka, sumaglla kuntintarispa nirkakuna:

—Kulkimi kamta karasunchi—. Chiuramandaka, Judas maskai kallarirka, imasa Jesusta apichingapa.

Iaia Jesús, ña wañungapa chaiakuura, katiraiagkunawa mikuskamanda

¹² Tanda mana libadurawa mikudiru kallarii puncha chaiarka; chiurallatata paskua ubija wañuchispa mikungapa. Chi punchaka, Jesusta katiraiagkuna paita tapurkakuna:

—Paskua punchapa mikui kam mikungapa, ¿maipitak munangi, nukanchi allichigringapa?

¹³ Chiura Jesuska, iskai paita katiraiagkunata kacharka, kasa nispa:

—Riichi Jerusalén puibluma. Chipi chaiagriuraka, sug runa iaku wabkanawami tupanga. Paita katchingichi. ¹⁴ Chi runa sug wasima chaiagriskapika, chi wasiugta nigringichi: “Nukanchita iachachig taitami kachamú, kamta tapungapa: ‘¿Maikan uku ladutak nukapa purigkunawa paskua mikungapa kani?’.” ¹⁵ Chiura chi runaka, awapi sug atun uku tukui ima ministiskakunawa tim allichiskatami kawachingapa ka. Nukanchi mikungapa, chipi allichingichi.

¹⁶ Chi kachai tukuskakuna Jerusalén puibluma chaiagriuraka, tukui imasa Jesús niskasina allilla tukugsamurka. Chipimi allichirkakuna, paskua mikungapa.

¹⁷ Ña tutaiauraka, Jesús paipa chungu iskai agllaska runakunawanta chaiagirirka.

¹⁸ Tukuikuna mikuspa tianakuura, Jesuska nirkakunata:

—Kasami nuka niikichita: kamkuna nukawa mikunakuskamanda, sugmi apichiwan-gapa ka.

¹⁹ Chasa uiaspa, iapa llakirirkakuna. Nispaka tukuikuna, sug suglla tapui kallarirka-kuna:

—¿Nukachu apichingapa kaiki?

²⁰ Jesuska ainirkakunata:

—Kam chungá iskaikunamanda, kai platupi nukawa tanda makiwa jukuchispa miku-nakugmánda sugmi apichiwangapa ka. ²¹ Imasami ñugpamandata willaraiá: chasallatami kai Runa Tukuskata pasariwangapa ka. Chasa kagpipas, jai, chi runa apichiwag! Chas-apaka, chi runa mana tiagsamunmi.

²² Chara mikonakunkama Jesús, tandata makipi charirispa, “Pai Siñur” Taita Diusta nirka. Tandata pitichispa, paikunata kuaspa, kasami nirka:

—Chaskiwaichi. Kai, nukapa kuirpumi ka.

²³ Nispaka, sug binu kupata makipi charirispa, “Pai Siñur” Taita Diusta nispa, paikunata kuarka. Chiura, tukuikunami upiarkakuna.

²⁴ Upianakunkama, Jesuska nirkakunata:

—Kai, nukapa iawarmi ka, Taita Diuswa i runakunawa ikuti pasinsiachirispa sumaglla tukungapa. Achkakunamandami chi iawar llugsispa icharingapa ka. ²⁵ Kasami nuka niikichita: ubas iaku mana mas upiangapa kanichu, imaura Diuspa suma mandai puncha chaiankama.

Jesusta mana rigsínichu, Pedro ningapa kaskamanda

²⁶ Mikuskauramanda, kantaspaka, Olivos lumama rirkakuna. ²⁷ Chipi, Jesuska nirkakunata:

—Kasami ñugpamanda librupi willaraiá: “Ubija kawagtami wañuchisa. Chiura paipa ubijakuna, kasama chasamami mitikungapa kankuna”. Chasallatami kamkuna, saki-waspa, mitikungapa kangichi. ²⁸ Nuka, wañuspa kaugsarispa, Galilea alpapimi ñugpa kagrisa. Chipimi kawarisakichita.

²⁹ Chiura, Pedroka nirka:

—Kamta tukuikuna sakigpipas, nukakar manima.

³⁰ Jesuska nirka:

—Kasami nuka niiki: kai tuta, gallu manara iskaí biaji kantagpimi kamka kimsa biaji nukamanda ningapa kangí: “Paita mana rigsínichu”.

³¹ Pedroka, mas sinchi nirka:

—Kamwa wañungapa chaiawagpipas, ñi imaurapas mana chasa ningapa kanichu. Tukuikuna, chasallata nirkakuna.

Jetsemani wirtapi, Jesús Taita Diusta mañaskamanda

³² Jetsemani suti wirtapi chaiagrispaka, Jesuska katiraiagkunata nirka:

—Kaillapi tianakuichi, nuka Taita Diusta mañaspa rimagrinkama.

³³ Chasa nispa, Pedro, Santiago i Juanta pusaspa, mas karuajma rirka. Chipika, iapa llakii irkiami tukurka. ³⁴ Nispaka, chi kimsandikunata nirka:

—Nukata iapa llakii wañungasinami iuiachiwaku. Kamkuna kaillapi suiawaichi, mana puñurispalla.

³⁵ Chasa nispa, mas ñugpasinama rispa, kungurirka. Alpama tupagta kumurispa, Taita Diusta mañai kallarirka, kasa nispa:

—Alli kagpika, ¿manachu pudirintra, kai llakiita anchuchiawangapa?—. ³⁶ Kasapasmi nikurka— Kam Taitiku, tukuimi pudingi. Kai iapa llakiita* anchuchiwai. Nuka chasa muna-kugpipas, nuka imasa munaskasina mana tukuchu. Kam imasa munaskasina rurai.

³⁷ Chasa nispa, chi kimsandikunapagma kutispaka, puñunakuskata tarigrispa, Simón Pe-drota nirka:

—¿Imapatak puñurirkangi? ¿Manachu ñi sug ratullapas rigcharaiangapa pudirkangi?

³⁸ Mana puñurispalla, Taita Diusta mañanakuichi, tukui mana allilla ruraikuna kamkunata mana chaiachu. Sungupi allilla rurangapa munanakuspapas, kuirpupika iapa sambami kangichi. Chiwami mana pudingichi, allilla rurangapa.

³⁹ Chasa nispa, ikuti rispa, Taita Diusta imasami ñugpata mañakurka: chasallatami parisma mañarka. ⁴⁰ Sug ratuma ikuti paikunapagma kutiura, puñunakuskata tarigrirka. Paikunapa ñawi, dipuñui wañunakurka. Chimanda, paikunata niura, mana iacharkakuna ima ainanga.

⁴¹ Chasallata ña kimsama Taita Diusta mañakugrispa, paikunapagma kutispa, Jesuska nirkakunata:

—Kunaura samariichi, puñuichi—. Nispaka, chiuralla nirka— Chilla. Nukapa ura chaiar-kami. Kai Runa Tukuska, mana allilla rurag runakunapa makipimi ña urmarka. ⁴² Atari-ichi. Akushi. Apichiwag runa, ñami kaillaiamuku.

Jesusta apiskakunamanda

⁴³ Jesús chasa rimakugllapi, Judaska chipi chaiagrirka. Chi runa, Jesuspa chungá iskaí agllaskakunamandami karka. Chi runawaka achkakunami chaiagrirkakuna, ispada

* 14:36 “Kai winja kupata”, iapa llakiitami niraiá.

i garutikuna charispa. Paikunaka, iaia sasirdutikuna, Moisés ima niskata iachachig taitakuna i sug judíu taitakuna kachaskakunami karkakuna.

⁴⁴ Chi Judas, manara rispalla, willaska karka, kasa nispa: “Maikanta nuka muchasa; chimi ka. Chita apispa, suma wataspa apangichi”. ⁴⁵ Imasa niskasina chaiagringallawa, Jesus-pagma kaillaiaspa, nirka:

—Puangi, iachachig taita—. Chasa nispaka, paita mucharka.

⁴⁶ Chasa muchaura, Jesusta apirkakuna.

⁴⁷ Chasa kawaspaka, sug Jesuswa kagpura, ispada surkuspa, iaia sasirdutipa lutrinta piaspas, sug rinri ialigta kuchurka.

⁴⁸ Chikama Jesuska, Judaswa riskakunata tapurka:

—¿Imapatak nukata, sisaitasina ispada i garuti kaspikunawa apiwangapa samunakungichi? ⁴⁹ Tukui punchakunami nuka, kamkunapa chaugpipi, Diospa atun wasi ukupi iachachispa karkani. Chipika, ¿imapatak mana apiwarkangichi? Nigpika iuarkarnami, tukui kasa pasaranga, ñugpamanda librupi willaraiaskasina tukugsamungapa.

⁵⁰ Chiura Jesuswa tukui kagkuna, paillata sakispa, mitikurkakuna.

⁵¹ Jesusta apanakuura, sug musuka, suglla katanga katarispa, katichikurka. Paitapas apinakurka. ⁵² Paika, katangata sitaspa, llatanmi mitikurka.

Judíu taitapura sugllapi tandariska kaskapi, Jesús kaskamanda

⁵³ Jesusta apispaka, chi runakuna iaia sasirdutipa wasima chaiachigrirkakuna. Iaia sasirdutikuna, Moisés ima niskata iachachig taitakuna i sug taitakunapas, tukuikunami chipi tandariska karkakuna. ⁵⁴ Pedroka, karu karullapi katichispa, chi wasi kanchakama chaiaagirka. Nispaka, iaikuspa, chi wasi kawag runakunawa tiarigrirka, nina kunuspa.

⁵⁵ Iaia sasirdutikuna i tukui judíu taitakunapas maskanakurka, pipas willantra, ima pandariipas Jesús iukagta; chasaka, paita wañuchingapa pudingapa. Chasa maskanakuspapas, manima tarirkakuna. ⁵⁶ Achkakuna, paimanda llullaspa willanakurka. Nigpika, kikinpura sug rigcha sug rigcha ninakuspa, mana iacharirka, maikan mana allilla kagta.

⁵⁷ Ikuti sugkunaka, saiarispa, Jesusmanda llullaspa, kasa nirkakuna:

⁵⁸ —Kasa niskatami uiarkanchi: “Kai Diospa wasi runakuna ruraskata, nukami puchukangapa kani. Nispaka, kimsa punchallapimi sug wasi runakuna mana saiachiskasina saiachingapa kani”.

⁵⁹ Chi runakuna chasa rimanakuspapas, ikuti paipura sug rigcha sug rigcha ninakuspaka, ñi imapi mana allilla tukurka.

⁶⁰ Chiuramanda iaia sasirduti, chaugpipi saiarispa, Jesusta tapuchirka:

—Kammanda mana allilla rimanakuskataka, ¿imapatak mana ainingi?

⁶¹ Jesuska, upallami karka, mana imapas ainispalla.

Ikuti chi iaia sasirdutika, paita tapuchirka:

—Nigpi, ¿kamchu kangi Cristo suti iapa suma atun Taita Diospa wambra?

⁶² Chiura, Jesuska ainirka:

—Ari, nukami kani. Kai Runa Tukuskata kawawangapami kangichi, tukui manduiug Taita Diospa alli ladu tiakugta. Suma luarmanda puiukunapi samukugtapasmi kawawangapa kangichi.

⁶³ Chasa uiaspa chi iaia sasirdutika, iapa rabiariispa, kikinpa katangata llikichirirka, kasa nispa:

—¿Imapatak sugkunata suianakusunchi, paimanda imapas willangapa? ⁶⁴ Ñami nukanchi kikin uiarkanchi, imasa Taita Diussina tukuspa willarigta. Kamkuna, ¿imatatak ningichi? Chiura tukui chi taitakuna, Jesusmanda ainirkakuna:

—Paita wañuchiimi chaiá.

⁶⁵ Chiuralla sugkuna, Jesusta tukaspa, paipa ñawita kilpaspa, puñitiaspa rurarkakuna, kasa nispa:

—Willamui: ¿pitak kamta piarka?—. Nispaka, Jesús mana mitikungapa kawagkunapas chasallata piaspas charirkakuna.

Jesusta mana rigsinichu, Pedro niskamanda

⁶⁶ Chikama Pedroka, chi wasi ura ladu kanchallapimi karka. Chiura iaia sasirdutipagpi sug kawag warmi, Pedropagma kaillaiarka. ⁶⁷ Chi warmika, paita nina kunukuskata kawaspa, ikuti allilla kawaspa, tapurka:

—¿Manachu kampas, chi Nazaretmanda Jesuswa purikurkangi?

⁶⁸ Pedroka, chasa uiaspa, ainirka:

—Manima iachanichu, kam imamanda chasa rimakugta.

Chasa ainispaka, kancha ladu, iaikudiru atun punguma llugsirka. [Chasa kagllapi, gallu kantarka.] ⁶⁹ Chi warmika, Pedrota ikuti chipi kawaspa, chipi kagkunata nii kallairirka:

—Kai runapasmi paipura ka.
⁷⁰ Pedroka, ikuti chasa uiaspa, ainirka:
 —Manima.
 Ikuti sug ratullapi, chipi kagkunapas Pedrota nirkakuna:
 —Kampas, sutipami chi runapura kang. Galilea alpamandami kang.
⁷¹ Chiura Pedroka, kikinmanda mana suma rimarisp, nii kallarrirka:
 —Nukaka, Diuspa ñawipi sutipami niikichita, mana llullaspalla. Nukaka, chi kamkuna rimanakuskamanda runata mana rigsinihu.
⁷² Pedro chasa nigllapika, gallu ikuti kantarka. Chiura iuiarigsamurka, imasa Jesús kikin Pedrota nigta: “Gallu manara iskai biaji kantagpimi kamka kimsa biaji nukamanda nungaga kang: ‘Paita mana rigsinihu.’” Chasa iuiarigsamuspa, iapa llakirisp, wakai kallarrirka.

15

Mandag Pilatos kaskapi, Jesús kagriskamanda

¹ Pakariska kagllapi, iaia sasirdutikuna i Moisés ima niskata iachachig taitakuna, tukui judiú taitakunawa ikuti tandarirkakuna. Nispaka, Jesusta watasp, Pilatos suti mandagpagma chaiachigrirkakuna. ² Chiura Pilatoska, Jesusta tapuchii kallarrirka:

—Kam, ¿judiukunapa atun mandagchu kang?
 Chiura, Jesús ainirka:
 —Sutipami kam chasa nirkangi.
³ Chiuraka iaia sasirdutikuna, Jesusmanda achka mana allilla ruragta nispa juchachinaturka. ⁴ Pilatoska, ikuti Jesusta tapuchirka:
 —¿Imapatak mana imapas ainingi? ¿Manachu uiakungi, kam achka mana allilla ruraskakunata willawanakugpipas?
⁵ Jesuska, ñi imapas mana ainirka. Chimanda Pilatos, iapa ujnarispa kawarka.

Jesusta wañuchigrüichi, Pilatos niskamanda

⁶ Wata watapi atun puncha chaiaura, Pilatos iacharka, sug karsilpi kaskata runakuna mañaskata kacharinga. ⁷ Chi punchakuna, Barrabás suti runami karsilpi wichkaraiarka. Chi runa karkami mandagkunata wañuchispa puchukangapa kagkunapa iaia. ⁸ Nigpika sug runakuna, Pilatospagma chaiagrispa, paita mañai kallarrirkakuna:

—Kam imasami iachangi kacharinga: chasallata kunaurapas sug runata kacharii.
⁹ Pilatoska tapurkakunata:
 —¿Munanakungichichu, judiukunapa atun mandagta nuka kacharingapa?— ¹⁰ Pilatos allillami iacharka, iaia sasirdutikuna, ianga Jesusta mana munaspa, wañuchingapa munanukgta. Chimandami chasa chipi kagkunata tapurka.

¹¹ Iaia sasirdutikunaka, chipi kagkunawa chapurisp rirkakuna, kasa nispa:
 —Mañai, Barrabasta kacharichu.

¹² Paikuna chasa mañaura, Pilatoska ikuti tapurkakunata:
 —Nigpika, ¿imatatak munanakungichi, kai runata kamkuna judiukunapa atun mandag sutichiskata nuka rurangapa?

¹³ Paikunaka, kaparisp ainirkakuna:
 —Kruspi churaspa wañuchii.

¹⁴ Pilatos tapurkakunata:
 —Kamkunataka, ¿imapitak kawari, mana allilla ruraska kagta?
 Paikunaka, mas sinchi kaparisp, ikuti nirkakuna:
 —Kruspi churaspa wañuchii.

¹⁵ Chiura Pilatos, paikunata alli iuiachiwa sakingapa, Barrabasta kacharirka. Jesustakar mana llakispalla iapa asutichirka. Nispaka, suldadukunapa makipi sakirka, paikuna kruspi klabaspa wañuchingapa.

¹⁶ Chiura chi suldadukunaka, Jesusta chi mandagpa wasi kanchamalla pusarkakuna. (Chi wasi, “pretorio” suti ka.) Chipika, tukui suldadukuna tandachirirkakuna. ¹⁷ Nispaka, Jesusta sutipa mandagsina kawaringapa, puka katanga katachirkakuna. Ispinakunalla llaugtu simbaspa, paita umapi churachirkakuna. ¹⁸ Churachispaka, paita kamispa, nii kallarrirkakuna:

—Puangi, kam judiukunapa atun mandag. ¿Allillachu kapuangi?— ¹⁹ Chasa ninakuspaka, paita umapi pukungawa piasp, tukaspa richirkakuna. Chasallata, muchanakug-sina, ñugpa ladu kungurisp karkakuna. ²⁰ Paita chasa asiskauramandaka, puka katangata surkuspa, ikuti kikinpata churachirkakuna.

Jesusta kruspi klabagriskakunamanda

Chi wasimandaka Jesusta llugsichirkakuna, paíta kruspi klabagríngapa. ²¹ Rinakuskapíka, Sirena puíblumanda Simón suti runa ñambipi tuparka. Chi Simón, Alejandro i Rufopa taita karka. Paika, chagramandami chaiamukurka. Paitaka, Jesús markaspa apakuska krusta markachirkakuna.

²² Gólgota suti pambamami Jesusta chaiachigrirkakuna. (Chi Gólgota niraianmi: “Uma Tullu pamba”.) ²³ Chipíka, mira kupal chapuska binu paíta karanakurka. Paika, chita mana upiangapa munarka. ²⁴ Nispaka, paíta kruspi klabarkakuna. Jesuspa katangakunata, suldadukuna suirtipi pugllarkakuna, iachangapa: imasami chaía, paipura sug sug apangapa.

²⁵ Chaugpi tutatami Jesusta kruspi klabarkakuna. ²⁶ Krus uma awa ladu, sug willaraiaskami churarkakuna, kawaspa, imamanda wafíuchii tukukugta iachangapa. Chipi, kasami niraiarka: “Judiukunapa atun mandagmi ka”.

²⁷ Chillapita, iskai saiakunata kruspi klabaspa saiakirkakuna: sugtaka Jesuspa alli ladu, sugtaka paipa lluki ladu. [²⁸ Chasawami ñugpamanda librupi imasa willaraiaskasina tukugsamurka. Chipíka, kasami niraiarka: “Paipas, jiru ruragkunawa sugllapimi kawarirka”.]

²⁹ Chipi ialínakug, Jesusta kawaspaka, uma kaima chima chabsichiríspa kaminakurka, kasa nispa:

—Ajaa, wanai. Kamsina ningi, Diospa atun wasita lim wagllíchíspa, ikuti kimsa punchallapi saiachíngapa; ³⁰ kunaúra kam kikin kispichiríi. Krusmanda uraikui.

³¹ Chasallata iaia sasirdutikunapas, Moisés ima niskata iachachig taitakunawa Jesusta iapa unzaspa ninakurka:

—Chiins, sugkunata kispichígsamurkasi. Nigpíka, pai kíkinka mana pudí kispichiríngapa. ³² Cristo suti Israelmanda runakunapa atun mandag, kunauraka krusmanda kam kikinlla uraikui. Chasa kawaspami kammanda suma iuiarisunchi.

Jesuswa sugllapi kruspi kagkunapas, paíta kaminakurka.

Jesús wañuskamanda

³³ Ña chaugpuncha tukuskauramanda chaugpi chisíkama, tukui alpa lim tutaiagsamurka. ³⁴ Chaugpi chisi kaura, Jesuska sinchi kapariíwa kaparirka, kasa nispa:

—Elí, Elí, ¿lema sabaktani?—. Chi niraianmi: “Nukapa Dios, nukapa Dios, ¿imapaták nukata sapalla sakiwangi?”.

³⁵ Chasa uiaspaka, chipi saianakugpura ninakurka:

—Uiamui. Elías suti ñugpamanda willagtami kaiaku.

³⁶ Chasa iuiarispaka, sug paipura saianakuskamanda kalparka. Winja binuta ispunjawa jukuchíspa, chaglla puntapi churarka, Jesuspa simima atarichíspa, chupachíngapa. —Kawasunchi— nirka—, ¿sutipachu Elías samú, paíta uraikuchíngapa?

³⁷ Jesuska, sinchi kaparíspa, wañurka. ³⁸ Wañugllapi, Diospa atun wasi ukupi atun linsu arkaraíaska, awanígmanda ura ladukama chaugpi chaugpimi llikirígsamurka. ³⁹ Jesuspa ñawi ladu kapitan saiakugka, Jesusta imasa wañugta kawaspaka, nirka:

—Kai runa, sutipami Taita Diospa wambra karka.

⁴⁰ Sug warmikunapasmi chipi karkakuna, karumandalla kawaspa. Paipura karkakunami María Magdalena, Salomé i sug María sutipas; chi María, kati Santiago i Josepa mama. ⁴¹ Paikuna karkakunami Galilea alpa suu Jesusta sugllapi katiraiagkuna, paíta imapipas aidaspa. Achka sug warmikunapas, Jesuswa Jerusalemna Galileamanda rispa, paikunawa sugllapi karkakuna.

Jesús pambai tukuskamanda

⁴² Warda punchapa tukui suma allichídiru puncha ña chisiarka. Kaiandika, warda puncha pakaríkurka. ⁴³ Chimanda Arimatea puíblumanda José suti runaka, Pilatospagma rirka. Chi runa, judíu mandagkunapura atun taitami karka. Paika, Diospa suma mandai chaiamungapa punchata suiakurka. Pilatospagma rispaka, mana manchaspalla iaikugrispa, Jesuspa kuirputa mañarka. ⁴⁴ Pilatoska, Jesusmanda ujnarisipami uiarka, ña wañuska kagta nigmanda. Nispaka, chi kapitanta kaiaspa, tapuchirka:

—¿Sutipachu Jesús ña wañuska ka?

⁴⁵ Sutipa kagta iachaspaka, Joseta: —Imasa mañakuskasina, chasa rurai— nirka. ⁴⁶ Chiura Joseka, suma linsu randispa, Jesusta krusmanda uraikuchigrirka. Nispaka, suma linsuwa maituspa, murtajarka. Sug rumi piñapi atun utkuchiskapimi Jesuspa kuirputa churagrirkakuna. Nispaka, utku punguta sug atun rumiwa wichkarkakuna. ⁴⁷ María Magdalena i Josepa mama Mariapas kawarkakuna, maipi Jesuspa kuirputa churagrigtakuna.

16

Jesús pambaraiaskapi manima tarigriskamanda

¹ Judiu kunapa warda puncha ña ialiska kaura, María Magdalena, Santiagopa mamandi María i Salomé, suma asna iaku randirkakuna, Jesuspa kuirpupi talligringapa. ² Nispaka, simana kallarii puncha u dumingu iapa tutata, indi ña llugsigllapi, Jesús pambaraiaskama rirkakuna. ³ Ñambipi, kikinpura tapurinakurka:

—Chi atun utkuchiska pungupi kilparaiaska rumita, ¿pisik anchuchinga, nukanchi iai-kungapa?

⁴ Chaiagrispa kawauraka, chi kilparaiaska iapa atun rumi tim anchuchiskami karka. ⁵ Ukuma iaikugriuraka, alli ladu kawarirkakunata sug musu iura katanga churariska tiakugta. Chasa kawaspaka, chi warmikuna iapa mancharirkakuna. ⁶ Chi musuka nirka:

—Mana manchanakuichi. Nazaretmanda Jesús kruspi wañuskatami maskanakungichi. Paika kaugsarirkami. Kaipi mana kanchu. Pai churaska kaskata kawaichi. ⁷ Kunauraka, paita katiraiagkunata Pedrowanta willagriichi: “Pai Jesús, ñugpami Galilea alpama ringapa ka. Chipimi kawanakungapa kangichi; imasami kamkunata ñugpa willaska karka: chasa”.

⁸ Chi warmikunaka, chasa kawaspa i uiaspa, iapa mancharispa chugchuspa, chimanda llugsispa mitirkakuna. Dimanchai ñi pitapas mana willagrirkakuna.

Jesús kaugsarispa, paita katiraiagkunata kawariskamanda

[⁹ Chi simana kallarii puncha u dumingu pakariura, Jesuska kaugsarirka. Kaugsaris-paka, ñugpa María Magdalenatami kawarirka. Chi warmitami kanchis kuku wairakunata Jesús llugsichiska karka. ¹⁰ Chi warmika, Jesusta kawaspa, paiwa sugllapi purigkunata willangapa rirka. Paikuna, Jesusmanda llakispa wakaspa tianakurka. ¹¹ Paikunata willagrirka, kasa nispa:

—Jesús kaugsatami kawarkani—. Paikunaka mana munarkakuna, chasa kagta uangapa.

¹² Chiuramanda Jesuska, iskai runakunata kawarirka, mana rigsiska runasina tukuspa. Chi iskaikunaka, kikinkunapa wasima ñambimi rinakurka. ¹³ Chipi Jesusta kawaspaka, Jerusalemna kutirkakuna, sugkunata willangapa. Chasa uiaspapas, ikuti mana munar-kakuna, chasa kagta uangapa.

¹⁴ Chiuramanda, chungu sug pai agllaska runakuna mikuspa tianakuura, Jesuska kawar-igsamurkakunata. Paikuna mana paimanda suma iuiaskamanda, piñaspa nirkakunata:

—Nuka kaugsariskata kawawagkuna kamkunata willagpipas, ¿imapatak mana uiarkan-gichi? ¿Imapatak, chituku ninakuskata uiaspapas, kamkunapa uma upa tukuskasina kan-gichi?

Jesús, pai agllaska runakunata ima mingaskamanda

¹⁵ Jesús, kasa nisipami kacharkakunata:

—Kai alpapi tukui kaugsanakuskata nukamanda Alli Willaita rimaspa purigriichi. ¹⁶ Chi nukamanda Alli Willaiwa suma iuiarigkunaka, baugtisarisa, kispiringapami kankuna. Ikuti mana uiagkunaka, diltudupa ninamami kachai tukungapa kankuna.

¹⁷ —Chi nukamanda Alli Willaiwa suma iuiagkunaka, kasami kawachingapa kankuna: nukapa sutiwami kuku wairakunata llugsichingapa kankuna. Mana iachaska rimaikuna-wami rimangapa kankuna. ¹⁸ Makiwa kulibrata apigpipas u ima wañudiruta upiagpipas, mana imapas tukungapa kanchu. Ungugkunata maki churagpika, ambirigsamungapami kankuna.

Suma luarma, Jesús sikaskamanda

¹⁹ Iaia Jesús chasa rimaspaka, suma luarma sikai kallariirka. Suma luarpi chaiagrispaka, Taita Diospa alli ladu tiarigrirka. ²⁰ Pai agllaska runakunaka, Jerusalemmanda llugsispa, tukui alpapi Alli Willaita rimaspa purii kallariirkakuna. Iaia Jesús kikinmi suma luar-manda paikunata aidamukurka. Paikunata iachai karamurka, mana imaurapas kawas-kasina rurangapa; chasaka, paikuna ima rimaskakunaka sutipa kagta kawachingapa.]

IAIA JESUSMANDA ALLI WILLAITA SAN LUCASMI WILLA

San Lucas, Teófilo suti runata willaskamanda

¹ Nukapa kuiaska Teófilo:

Achka runakunami iuiarirkakuna, tukui ima nukanchipa alpapi pasariskata iskribispa willangapa. ² Chasa ñugpamandata kawaspa willagkunami nukanchita iachachirkakuna. Paikunaka, Diospa Suma Rimaita willagkunami karkakuna.

³ Nukapas, tukui chikunamanda ñugpamandata suma tapudurmi karkani. Chimandami suma iuiariwá, kamta suiumandata iskribispa willangapa. ⁴ Chasaka, allillami iachankangi, kamta ima iachachiska sutipa kagta.

Juan Bautista tiagsamungapa kagta, sug anjil willaskamanda

⁵ Herodes suti Judea alpapi atun mandag kaura, Zakariás suti judíu sasirduti chipi kaugsakurka. Sug sasirdutikunamanda paika, Abía suti sasirdutikunapurami karka. Paipa warmi, Isabel suti, Aarón suti sasirdutipurapa wambrapa wambrami karka. ⁶ Paikuna, Diospa ñawipi allilla iuiaiwa kawarimi karkakuna. Atun Taita Dios ima rurangapa niskata tukuimi allilla ruradur karkakuna. Chasapika, ñi pipas mana pudirkakunachu, ñi imapas ninga. ⁷ Isabel chusa kaspera, mana wawita iukarkakuna. Iskandikunami ña ruku karkakuna.

⁸ Chi punchakuna, Zakariasta chaiarka, paipura sasirdutikunawa Diospa atun wasipi imasa niraiaskasina ruragrangapa. ⁹ Paikuna kustumbri iukarkakuna, suirtipi maskangapa: pitami chaiá, Taita Diospa atun wasi ukuma iaikuspa, insinsu rupachispa kusnichingapa. Chiura, Zakariastami chaiarka, chi ukuma iaikungapa. ¹⁰ Pai insinsu rupachikunkama, tukui kanchapi kagkuna Taita Diusta suma iuiarisipami mañanakurka. ¹¹ Chiuraka atun Taita Diospa sug anjil, Zakariasta kawarigsamurka. Insinsu rupachidiru altar alli ladumi saiakurka. ¹² Anjilka kawaspa, Zakariás iapa ujnarispa mancharirka. ¹³ Chiura anjilka, paita nirka:

—Mana mancharikui. Kam ima mañakuskata, Taita Dios uiarkami. Chimandami kamba warmi Isabel, sug kari wambra iukapungapa kangi. Paitaka sutichinkangimi Juan. ¹⁴⁻¹⁵ Paika, atun Taita Diospa ñawipi atunmi kangapa ka. Chimanda, pai tiagsamuura, iapa suma alli iuiachiiwami tukungapa kangi. Chasallata, achka runakunapasma kuntintaringapa kankuna. Binuta i ima machadirutapas, pai mana upiangapa kanchu. Manara tiagsamuskauramandata, Santu Ispiritu jundaskami kangapa ka. ¹⁶ Paimi Israelmanda achka runakunata atun Taita Dioswa tigrachingapa ka. ¹⁷ Nukanchipa Iaiatami ñugpangapa ka. Elías suti Santu Ispirituwa ñugpa rimagsinami kangapa ka; chasallata tukui allilla pudig. Paimi taitakunawa wambrakunawa piñachirinakuskata pasinsichingapa ka. Chasallata, subirbiaspa mana uiai munagkunata iuiachingapami ka, uia kangapa; chasaka, nukanchipa Iaiá samuura, runakuna suma iuiaiwa allichiriska suianakungapa.

¹⁸ Chiura Zakariás, anjilka tapurka:

—¿Imasatak nuka iachasa, kam willawaska sutipa kagta? Nukapa warmi i nukapas, iapa rukumi kanchi.

¹⁹ Anjilka ainirka:

—Nukami kani Taita Diospa ñawi ladulla saiakug. Gabrielmi suti kani. Paimi kachamuwarka, chi imasa suma tukungapa kagta kamta willangapa. ²⁰ Nuka ima willakuskata kam mana uiawaskamanda, kunaoramandaka mana rimai pudingapa kangichu, imaura wawita tiagsamunkama. Nuka niskaka, chasami tukunga, imaura chaiankama.

²¹ Paikuna chasa rimanakunkama, kanchapi kagkuna Zakariasta unai suianakurka. Mana utka llugsigmanda mancharispa, tapurinakurka: “¿Imawasik ukupi iapa unaiaku?”. ²² Chiuraka Zakariás, llugsispa, mana rimai pudirka. Makillawa siñas ruraspaka kawachikurka. Chiura iuiarirkakuna: paita sutipami Diospa atun wasi ukupi muskui ukupisina ima kawarirka.

²³ Taita Diospa wasipi ima ruraikuna chaiaskata ruraspaka, Zakariás paipa wasima kutirka. ²⁴ Chiuramandaka paipa warmi Isabelka, wigsawa ungu tukugsamurka. Paika, pichka killa mana wasimanda llugsirka. Chillapi karka, kasa iuiarispa: ²⁵ “Kunaura, atun Taita Dios nukata chasa karawagmandata, mana maikanpas wabutiwangapa kankunachu”.

Jesús tiagsamungapa kagta, sug anjil willaskamanda

²⁶⁻²⁷ Isabel ña sugta killa wigsawa ungu kaura, Taita Dioska ikuti anjil Gabrielta kachamurka María suti sipaspagma. Pai warmi, Galilea alpamanda Nazaret suti puiblupi kaug-sakurka. Mana kari rigsiska karka, ña José suti kariwa kasarangapa. José karkami David suti atun mandagpa wambrapa wambra.

²⁸ Anjilka, María kaskapi iaikuspaka, nirka:

—Puangi. Atun Taita Dios, kamwami ka. Paipa suma kuiaita chaskiskami kang. Kamka, tukui warmikunamandapas masmi iapa kuiaska kang.

²⁹ Chasa uiaspaka María, iapa mancharirka. Iuiarikurka: “¿Imapatak chasa saludawaku?”.

³⁰ Anjilka nirka:

—María, mana mancharikui. Kamta, Taita Dios iapa suma kuiaiwami kawá. ³¹ Kuna-uraka, unguiringapami kang. Nispaka, sug kari wambami iukangapa kang. Paitaka sutichinkangimi Jesús. ³² Diospa ñawipi, paika iapa atun niskami kanga. Tukuimanda mas atun Taita Diospa wambami suti kanga. Atun Taita Dioska, paita kuangapami ka, ñugpamanda taita Davidsina mandangapa; ³³ chasallata, Jakobpa wambrapa wambrakunata tukui punchakuna mandakungapaglla. Paipa mandaika, mana imaurapas puchukaringapa kanchu.

³⁴ —Nukaka, manara kusaiug kanichu— María anjilta ainirka—. Chimanda, ¿imasatak chasa tukuwanga?

³⁵ Chiura, anjilka ainirka:

—Santu Ispiritumi kam kikinma uraikumunga. Tukuimanda mas atun Taita Diospa iapa iachaiwa puiusinami kamta kilpagsamunga. Chimanda wawita tiagsamugka, tukui pi mas allimi kangapa ka. Taita Diospa wambami suti kangapa ka.

³⁶ —Willasaki. Kam kikinpura Isabelpas, ña achalaiakuura, wawitami iukangapa ka. Paimanda “Chusa” ninakugpipas, ña sugta killami wigsitawa ungu ka. ³⁷ Taita Diosmanda mana tianchu ñi imapas pai mana pudingasina.

³⁸ Chasa niura, María ainirka:

—Atun Taita Diospa lutrinsinami nuka kani. Kam imasa niwaskasina tukuwachu. Chiura anjil, Mariapagmanda llugsispa rirka.

María, Isabelpagma chaiangapa riskamanda

³⁹ Chi punchakunamandaka, Mariaka mana unaiilla rirka Judea sachuku sug puiblu tiaskama. ⁴⁰ Chima chaiagrispaka, Zakariaspa wasima iaikuspa, Isabelta nirka:

—Puangi.

⁴¹ Chasa niskata Isabel uiaura, paipa wawitaka wigsu ukupi sinchi kuiurigsamurka. Chiura Isabelta, Santu Ispíritu iaikuspa iuiachigsamurka. ⁴² Chiwanka, sinchi rimaiwa kasami nirka:

—Kamka, tukui warmikunamandapas mas iapa kuiaskami kang. Kamba wigsapi tiaska wawitapasmi chasallata iapa kuiaska ka. ⁴³ Nukaka, ¿imatatak kani, chituku suma nuka Iaiapa mama chaiawagsamungapa? ⁴⁴ Kam “Puangi” niwagllapi, nukapa wigsapi tiaska wawita, alli iuiachirispami kuiuriwagsamurka. ⁴⁵ Kam, Taita Diusta suma iuiakuskamandami paipa iapa kuiaska kang. Tukui imasa atun Taita Dios niskasinami sutipa chasa tukugsamungapa ka.

⁴⁶ Chiura, Mariaka nirka:

—Nukapa almawa atun Taita Diustami nini: “Kam, iapa atunmi kang”.

⁴⁷ Nukapa ispirituwapasmu nini:

“Taita Dios kispichiwigamanda, alli iuiachimi kani”.

⁴⁸ Paipa upalla lutrinsina kagmandami nukata iapa kuiaspa kawawarka.

Chimandami kuna ramandata tukui kaugsagkuna, nukata sutichiwangapa kankuna,

Taita Diospa iapa kuiaska kagta.

⁴⁹ Tukui allilla pudig Taita Dios,

mana imaurapas ruraskasinami nukapi rurarka.

Pai, tukui pi mas allimi ka.

⁵⁰ Maikan paita suma kuiaspa manchaspasuma ruragkunamanda imaurapas llakingapami ka.

⁵¹ Pai tukui allilla pudig kagtami kawachirka.

Tukui runakuna kikin atuniachirispas mana alli iuiag kaskakunata tuntiachirkami.

⁵² Atun mandagkunatapas

kikinpa mandadirumandami uraikuchirkakunata.

Ikuti uchulla mana atun kaskakunataka
atun mandadirupimi tiarichirka.

⁵³ Iarkaiwa kaskakunata
sagsagta suma mikiuimi kararka.

Ikuti iapa iukagkunataka
chusa makimi kacharka.

⁵⁴ Nukanchi Israelmanda runakuna paipa lutrin kagkunatami aidarka.

Paipa suma llakiiwami
nukanchimanda iuiarirka.

⁵⁵ Imasami nukanchipa ñugpamanda taitakunata,
Abrahamta i paipa wambrapa wambrakunata rurangapa nirka:
chasami kunaura ruragsamurka.

⁵⁶ Kimsa killasina Isabelpa wasipi kaspa, María, kikinpa wasima kutirka.

Juan Bautista tiagsamuskamanda

⁵⁷ Isabelta ña puncha chaiaura, sug kari wambami iukagsamurka. ⁵⁸ Ladullapi kaug-sanakug i paipurakunapas uiaska karkakuna, imasa atun Taita Dios paikunata alli suma ruragta. Nispaka, chaiangapa rirkakuna, wawita tiaskamanda kuntintulla kaskakunawa sug ratullapas kagringapa. ⁵⁹ Pusag punchapika, ikuti chaiagrirkakuna, wawata judiukunapa marka churachingapa kaura. Munanakurkami, Zakariasllatata taitapa sutisina sutichingapa.

⁶⁰ Mamandika nirka:

—Manima. Juanmi suti kangapa ka.

⁶¹ Chiura nirkakuna:

—¿Imapa? Kamkunapura, mana tianchu pipas chasa suti.

⁶² Chasa nispaka, paipa taitata siñas ruraspá, tapurkakuna:

—¿Imatak suti kanga?

⁶³ Chiura Zakariaska, sug kaspi tablilla mañaspa, iskribispa churarka:

—Juanmi suti ka.

Chasa kawaspaka, tukuikuna iapa ujnarirkakuna.

⁶⁴ Chiurallatata Zakariaspas, ikuti rimai pudirka. Nispaka, Taita Diusta sumaglla nii kallarirka:

—Kam, iapa suma atunmi kangi.

⁶⁵ Chiwa, tukui ladullapi kaugsanakug mancharirkakuna. Judea sachuku suiupas, tukui ima pasariskata uiaspa, paipura rimarinakurka. ⁶⁶ Atun Taita Dios sutipa paiwa kagmanda, tukui uiagkuna, iuiarispa, tapurinakurka:

—Chi wambra, wiñaspaka, ¿imasik tukunga?

Zakarias imasa kantaskamanda

⁶⁷ Juanpa taita Zakariasta, Santu Ispirituwa iaikugsamurka. Chiwanka, imasa kangapa kas-kata kasami nirka:

⁶⁸ —Nukanchi Israelmanda runakunapa atun Taita Diusta nisunchi:

“Kam, iapa suma atunmi kangi”.

Paipa runakunata kispichingapami samurka.

⁶⁹ Pai ima niskata rurag Davidpa wambrapa wambratami kachamurka,

tukui allilla pudig kaspa,

nukanchita kispichingapa.

⁷⁰ Chasami ñugpamandata

paipa Ispirituwa alli runakunata rimachirka,

kasa nispa:

⁷¹ “Tukui kamkunata mana munagkunamanda

i piñagkunamanda kispichisakichitami.

⁷² Kamkunapa ñugpamandakunata niskami karkani,

kamkunamanda llakingapa.

Chasallata, nuka ñugpamanda runakunawa iuiariskata

mana kungarinichu”.

⁷³ Imasami nukanchipa ñugpamanda taita Abrahamta jurarka, kasa nispa:

⁷⁴ “Kamkunata mana munagkunamanda kispichisakichitami;

chasaka, mana manchaspalla,

⁷⁵ tukuipi suma allilla iuiari iukaspá, Diospa ñawipi pai ima niskata rurangapa, kaugsan-kama”.

⁷⁶ Kam nukapa wawa,

tukuimanda mas atun Taita Diospa Ispirituwa rimagmi suti kankangi.

Nukanchipa iaiatami ñugpankangi,
kam ñambi allichiskapi pai chaiamungapa.

⁷⁷ Israelmanda runakunatami iachachinkangi,
imasa Taita Dios, pandariskakunata pasinsiaspa,
nukanchita kispichingapa kagta.

⁷⁸ Nukanchipa Taita Dios,

paipa suma llakiiwa awa suma luarmanda

punchaiachingapa pakariska suma puncha kagsinami kachamuku;

⁷⁹ chasaka, iapa iana tutupisina iuiaikunawa kaugsanakuskata punchaiachigsamungapa;
chasallata, nukanchita alli ñambi rikuskapi pusagsina iuiachingapa;

chasaka, sumaglla sugllapi kaugsanakungapa.

⁸⁰ Chi wawa, wiñaspa, Taita Diospa alli iachaiwami tukurka. Paika, chusa sitaska alpami kaugsakurka, imaura Israelmanda runakunata kawaringapa chaiankama.

2

Jaia Jesús tiagsamuskamanda

¹ Chi punchakuna Augusto suti Romapi iaia mandag, paipa alpakuna suiu tukui kaugsanakuskapagma kacharka, paikuna maituku kaugsanakuskata tapuchingringapa. ² Musuglla sinumi rurakurka, Siria suti alpapi Sirenio mandakuura. ³ Tukuikunami iukarkakuna, ñugpata taitakuna kaugsaskama ringa, chipi paikuna maituku kaugsanakuska willagringapa. ⁴ Chiwanka, Joseta chaiarka, Galilea alpa i Nazaret puiblumanda llugsispa, Judea alpama ringapa. Belén suti puibluma rirka, paipa ñugpamanda taita David chipi tiagsamuska kagmanda. ⁵ María, Josewa kasarangapa kaspa, paiwa rirka. María, wigsitawami ungug karka.

⁶ Belenma chaiagriuraka, tiagsamungapa puncha chaiarka. ⁷ Mana tarirkakuna, maikan wasipipas samaringapa, iapa junda runakuna kagmanda. Chimanda, animalkunapa kaugsadiru ukupi iaiukurkakuna. Chi ukupika, Mariaka kari wambрами iukagsamurka. Paitaka linsu pitiwa maituspa, animalkuna mikudiru batiasinapi sirichirka.

Ubijakuna kawagkunata, anjilkuna kawariskamanda

⁸ Belén puiblu kuchu kuchu, sug runakuna tuta ubijakunata kawag pakaridur tiarkakuna. ⁹ Diulpillakar atun Taita Diospa sug anjil, Diospa suma punchaiachiiwa paikunata kawarigsamurka. Chasa kawariura, paikuna iapa mancharirkakuna. ¹⁰ Anjilka nirrakunata:

—Mana mancharinakuichi. Suma Willaimi apamukuni. Chi Willaita uiaspaka, tukui runakunami iapa kuntintaringapa kankuna. ¹¹ Kunaurami David tiagsamuska puiblupi kamkunata kispichig tiagsamurka. Taita Dios agllaska iaia Cristomi ka. ¹² Kasa kawaspami paita rigsinkangichi: animalkuna mikudiru batiasinapi linsuwa maituska wawita sirikuskatami tarigrinkangichi.

¹³ Kawarigsamug anjil rimakugllapi, askurinti achka anjilkuna kawarigsamurkakuna. Taita Diusta iapa suma atuniachispa, nirrakuna:

¹⁴ —Taita Dios awa suma luarpi kagtami ninchi:

“Kam, iapa suma atunmi kangi”.

Alpapipas, Taita Diusta kuiag runakuna sumaglla kachukuna.

¹⁵ Samug anjilkuna paikunapa suma luarma kutiura, chi ubijakunata kawagkunaka paipura rimarirkakuna, kasa nispa:

—Akushi Belenma. Atun Taita Dios imasa nukanchita anjilkunawa willangapa kachamuskata kawagrisunchi.

¹⁶ Chiuralla, Belén puibluma kalpalla rirkakuna. Chaiagrispaka, Mariata, Joseta i wawita animal mikudiru batiasinapi sirikuskatami tarigrirkakuna. ¹⁷ Chasa kawaspaka, tukui ima anjilkuna chi wawitamanda niskata tukuikunatami willai aparkakuna. ¹⁸ Tukui uiagkunami ujnarirkakuna. ¹⁹ Mariaka, tukui ima uiaskata suma wakachirirka, allilla iuiarispa kangapa.

²⁰ Chiuramanda, chi ubijakunata kawagkuna kutirkakuna. Tukui imasa willaskasina pasarigta uiaspa i kawaspaka, Taita Diusta nirrakuna:

—Kam, iapa suma atunmi kangi.

Diospa atun wasipi, wawita Jesusta kawachigriskamanda

²¹ Pusag puncha chi wawita iukaura, judiukunapa marka churachirkakuna. Jesusmi sutichirkakuna, imasa anjil, María manara wigsitawa ungug kagpita, niskasina.

²² Nispaka, imasa Moisés niskasina chaiagmandaka, wawa tiagsamuskauramanda limpiulla tukungapa punchakuna ña ialiuara, Jesuspa atunkuna paita Jerusalemna aparakakuna, atun Taita Diusta kawachispa, ningapa: “Kamballami ka”. ²³ Ñuggpamanda librupi willaraiá, tukui ñugpa tiagsamuska kari wambrakunata chasa rurangapa. ²⁴ Kasapasmi willaraiá: iskai turtulita u wawa palumitakuna apangapa, atun Taita Diosmanda rupachigringapa. Paikuna, imasa niraiaskasini ruragrirkakuna.

²⁵ Chi punchakuna, Jerusalemni kaugsakurka sug runa, Simeón suti. Chi runa, tukui alli rurag, Taita Diusta iuiarispa kaugsagmi karka. Israelmanda runakunata kispichingapa punchakunami pai suiakurka. Santu Ispiritu, paiwa kaspá, ²⁶ iuiachiska karka: “Kam manara wañuspalla, atun Taita Dios aglaska Cristotami kawankangi”. ²⁷ Paika, Santu Ispirituwa iuiachiska kaspá, Diospa atun wasima rirka. Ña chipi kauraka, wawita Jesuspa atunkuna paita chaiachigrirkakuna, imasa chi librupi willaraiaskasina rurangapa. ²⁸ Chiura Simeonka, wawata chaskispa markaspa, Taita Diusta iapa suma atun kagta nispa, kasa nirka:

²⁹ —Kunaura, nuka kam Taitikupa lutrinsina kaskata sakiwai, sumaglla wañungapa.

Ñami kam imasa niwaskasina tukugsamurka.

³⁰ Kam kachamuska kispichigtami nukapa ñawiwa ña kawakuni.

³¹ Paita allillapimi kachamurkangi, tukui runakunata kawaringapa;

³² mana Israelmanda kagkunata iuiakunata punchaiachingapa; chasallata, kamba Israelmanda runakunata paimanda iapa suma atun kagta kawachingapa.

³³ Simeón chasa wawitamanda niskata uiaspaka, taita i mamandi ujnarirkakuna. ³⁴ Chiura Simeonka, paikunata nirka:

—Taita Dios, kamkunata iapa kuiaspa kawapuachu—. Nispaka, mamandi Mariata nirka—Uiamui. Kai wawitamandami achka Israelmanda runakuna urmangapa kankuna. Ikuti sugkunaka, paimandami kispiringapa kankuna. Paita kawaspa, achkakunami wabutingapa kankuna. ³⁵ Kamtaka sug ispada almapi ialichigsinami iapa llakii iukangapa kangi. Chiwanka, tukui imasa iuianakuska iacharigsamungapami ka.

³⁶ Chillapita karka Santu Ispirituwa rimag sug warmi, Ana suti, ña iapa awila. Chi warmi, ñugpamanda Aser suti runapa iawar karka. Fanuel suti runapa wambrami karka. Paika, sipas kasararka. Kanchis wata kasaraskauramanda, kusa wañurka. ³⁷ Chiuramanda, mana ikuti kasaraspalla, ña pusag chungá chusku wata kaugsakurka. Diospa atun wasimanda mana llugsispalla, puncha i tuta Taita Dios ima niskata ruragllami karka. Mana mikuspalla chisijsa i paita iuiarispa karka. ³⁸ Simeón chasa rimakugllapi, chi warmika, kaillaijsa, Taita Diusta: “Pai Sifñur” nii kallarirka. Nispaka, Taita Diusta tukui iuiarinakugta wawita Jesusmanda willakurka, kasa nispa:

—Kaimi ka Jerusalemna kispichingapa samug. Paitami suianakurkanchi.

³⁹ Atun Taita Dios imasa niskata tukui ruraskauramanda, Jesuspa atunkunaka Galilea alpama Nazaret puiblupi ñugpata kaugsanakuskama kutirkakuna. ⁴⁰ Chipika wambra Jesús, sumaglla wiñaspa rirka. Chasallata, iachai pagta tukurka. Taita Diospas, iapa sumami paita kuiarka.

Wambra Jesús, Diospa atun wasipi kaskamanda

⁴¹ Jesuspa mama taitandi, Jerusalén puibluma wata watapi ridur karkakuna, paskua atun punchakuna ialichingapa. ⁴² Jesús ña chungá chusa iskai wata iukauraka, tukui kuna rirkakuna, imasa kaskasina ruraspá ialichingapa.

⁴³ Chi punchakuna sumaglla ialichispaka, mama taitandi paikunapagma kutirkakuna. Wambra Jesuska, Jerusalemna mana rirka. Chitaka, mama taitandi mana iacharkakuna. ⁴⁴ Iuianakurka: “Sugkunawachar riku”. Chimanda, chisijsa rirkakuna. Nispaka, paipurakunapagpi i rigsidukunapagpi paimanda tapui kallarirkakuna. ⁴⁵ Mana tarispaka, Jerusalemna kutirkakuna, maskangapa.

⁴⁶ Kimsa puncha maskanakuskapika, Diospa atun wasi ukupi paita tarirkakuna. Moisés ima niskata iachachig taitakunapa chaugpipimi tiakurka, uiaspa i paikunata tapuspa. ⁴⁷ Tukuikuna, ujnarispa paita uianakurka, paipa iachaiwa imasa ainikugta.

⁴⁸ Jesuspa mama taitandika, iapa ujnarispa paita kawarkakuna. Mamandi nirka:

—Nukapa wambra, ¿imapatá nukanchita chasa rurarkangi? Kamba taita i nuka, iapa llakiiwami maskaspa purinakurkanchi.

⁴⁹ Chiura, Jesuska ainirka:

—¿Imapatak maskawanakurkangichi? ¿Manachu kamkuna iachangichi, nukapa Taita imasa munaskata rurangapa nukata chaiawakugta?

⁵⁰ Jesuspa mama taitandi mana iacharkakuna, chika ima niraiagta.

⁵¹ Chiuramandaka Jesús, Nazaret puibluma paikunawa kutirka. Chipika, paikuna tukui ima niskata uiaspa, allilla ruraspami sugllapi kaugsakurka. Paipa mamaka, tukui ima pasariskata sumaglla iuiapi wakachirirka. ⁵² Jesuska, sumaglla wiñaspa rirka, Taita Dios i runakunapa ñawipi iapa alli kagta kawari.

3

Juan Bautista, chusa sitaska alpapi kaskamanda

¹ Tiberio suti Romapi iaia mandag ña chungu pichka wata mandakuura, Judea alpapi mandag karka Ponso Pilatos. Herodes, Galileapi mandakurka. Waugkindi Felipeka, Iturea i Trakonte suti alpakanapi mandag karka. Abilene suti alpapika, Lisania mandakurka. ² Iaia sasirdutikuna suti karkakuna Anás i Kaifás.

Chi punchakuna Zakariaspa wambra, Juan suti, chusa sitaska alpapi kaugsakuura, paita Diospa Rimaita willangapa iuiachirigsamurka. ³ Nispaka, Jordán suti iaku pata pata kasa willaspa purii kallarirka:

—Pandariikunata sakispa, Taita Dioswa tukugsamuichi. Baugtisarichi, pandariikunata pasinsiai tukungapa.

⁴ Chasami pasarirka, imasa Santu Ispirituwa ñugpamanda rimag Isaías suti willaskasina. Kasami willaraiá:

Chusa sitaska alpapi,
sug runa kaparisipami puriku,
kasa nispa:

“Imasami ñambi allichinchi:
chasallata alli iuiaikunata apiichi,
atun Taita Diusta chaskingapa”.

⁵ Tukui waikukunata jundachispa pambaiachiichi.

Tukui filu i lumakunatapas pambaiachiichi.
Wistu ñambikunata dirichaichi.

Chasallata, ñambi pusukunata jundachiichi.

⁶ Tukui runakuna kawangapami kankuna,
Taita Dios imasa kispichingapa kagta.

⁷ Achka runakuna Juanpaga chaianakurka, baugtisingapa. Chiura paika, maikan-kunataka nikurka:

—Mana alli runakuna, kulibrasinami kangichi. ¿Pitak kamkunata willagrirka: “Taita Dios iapa rabiarispa llakii puncha ñami chaiamuku. Mitikuichi, kispiriska kangapa.”?

⁸ Allilla ruraichi, tukui pandariikunata sakispa. Mana iuiarispa kaichi: “Ñugpamanda taita Abrahampa iawarmi kanchi”. Niikichitami: Taita Dios munagpika, kai rumikunapas pudinkunami, Abrahampa wambrakuna tukugsamungakuna. ⁹ Ñami tukuimanda justisiangapa ka; imasami sachakunata achawa urmachingapa kawaku: chasa. Tukui sacha chusa i mana mikungasina muii iukaskakunata anguwanta urmachispa, ninapimi churangapa ka.

¹⁰ Chipi kagkuna tapurkakuna:

—Nigpika nukanchitaka, ¿imatak rurangapa cháiá?

¹¹ Chiura, Juanka ainirka:

—Maikanpas, iskaí kapisaiu iukaspaka, mana iukaskata sug iukachingichi. Chasallata, maikan achka mikui iukaskaka mana iukaskata karangichi.

¹² Mana judiu kaskakunamanda kulki chaskigkunapas, baugtisingapa chaiagrispaka, Juanta tapurkakuna:

—Iachachig taita, nukanchitaka, ¿imatak rurangapa cháiá?

¹³ Chiura, Juanka ainirka:

—Mana iapa kubrangichi. Mailla kaskalla mañangichi.

¹⁴ Sug suldadukunapas tapugrirkakuna:

—Nukanchitaka, ¿imatak rurangapa cháiá?

Chiura, Juanka ainirka:

—Manchachispa, ñi llullaspa i ianga juchachispa mana pitapas kichungichi. Mailla ganakuskallawa kuntintaringichi.

¹⁵ Juan chasa nikugmanda, tukui chipi kagkuna, Taita Dios aglaska Cristota suianakuspa, paimanda iuiarispa, tapurinakurka:

—¿Paichu Cristo kantra?

¹⁶ Juanka, tukuikunata nirka:

—Nuka, iakullawami baugtisaikichita. Ikuti sugmi nukamanda mas iacha samungapa ka. Paita, nuka mana pudinichu, kungurispá, paipa chakikunapi churaraiaska wataskata paskapungapa. Paika, Santu Ispirituwa i nina sindiwasinami baugtisingapa ka. ¹⁷ Imasami chagrapi trigu agllag runa, palawa mana alli ugsakunata chabsichispa anchuchí: chasallatami pai suiaku, mana alli iuiagkunata alli iuiagkunapa chaupimanda anchuchingapa. Alli trigusina kagkunata sugllapi sumami wakachingapa ka. Ikuti mana alli ugsasina kagkunataka mana wañug ninapi rupakungapami sitangapa ka.

¹⁸ Achka sug rigcha sug rigcha rimaikunawapas Cristomanda Alli Willaitami Juan willakurka.

¹⁹ Kasapas. Mandag Herodesta piñaspami iuiachikurka, chi Herodes, waugkindipa warmi Erodías sutiwa kaugsakugmanda. Tukui sug mana allilla ruraskakunamandapasmi piñaspá iuiachikurka. ²⁰ Chasa piñakugmanda, Herodeska karsilpi churachirka. Chasa ruraspaka, mas mana allilla rurag kagtami kawachirirka.

Jesús baugtisariskamanda

²¹ Juanta manara karsilpi churagpi, tukui chipi kagkunami baugtisarirkakuna. Chiura, Jesuspami baugtisarigrirka. Taita Diusta rimakunkama, awa suma luar paskarirka.

²² Chiura Santu Ispiritu, palumasina rigcha kawarisipami Jesuspagma uraikumurka. Suma luarmanda rimaipas uiarigsamurka, kasa nispá:

—Kam, nukapa kuiaska wambra kangi. Kamta kawaspa, iapa alli sumami iuiachiiwa kawaiki.

Jesucristopa ñugpamanda achala taitakuna

²³ Jesús, Alli Willaita willai kallariura, kimsa chungá watasina iukarka. Tukuikuna iuianakurka, pai Josepa wambra kagta.

José karka Elipa wambra.

²⁴ Elí karka Matatpa wambra.

Matat karka Levipa wambra.

Leví karka Melkipa wambra.

Melki karka Janapa wambra.

Jana karka Josepa wambra.

²⁵ José karka Matatiaspa wambra.

Matatías karka Amospa wambra.

Amós karka Naumpa wambra.

Naum karka Eslipa wambra.

Eslí karka Nagaipa wambra.

²⁶ Nagai karka Maatpa wambra.

Maat karka Matatiaspa wambra.

Matatías karka Semeipa wambra.

Semei karka Josekpa wambra.

Josek karka Judapa wambra.

²⁷ Judá karka Joananpa wambra.

Joanán karka Resapa wambra.

Resa karka Zorobabelpa wambra.

Zorobabel karka Salatielpa wambra.

Salatiel karka Neripa wambra.

²⁸ Neri karka Melkipa wambra.

Melki karka Adipa wambra.

Adi karka Kosampa wambra.

Kosam karka Elmadampa wambra.

Elmadam karka Erpa wambra.

²⁹ Er karka Jesuspa wambra.

Jesús karka Eliezerpa wambra.

Eliezer karka Jorimpa wambra.

Jorim karka Matatpa wambra.

Matat karka Levipa wambra.

³⁰ Leví karka Simeonpa wambra.

Simeón karka Judapa wambra.

Judá karka Josepa wambra.

José karka Jonampa wambra.

Jonam karka Eliakimpa wambra.

³¹ Eliakim karka Meleapa wambra.

Melea karka Menapa wambra.
 Mena karka Matatapa wambra.
 Matata karka Natanpa wambra.
 Natán karka Davidpa wambra.
³² David karka Isaipa wambra.
 Isái karka Obedpa wambra.
 Obed karka Boozpa wambra.
 Booz karka Salapa wambra.
 Sala karka Naasonpa wambra.
³³ Naasón karka Aminadabpa wambra.
 Aminadab karka Adminpa wambra.
 Admin karka Arnipa wambra.
 Arni karka Esrompa wambra.
 Esrom karka Farespa wambra.
 Fares karka Judapa wambra.
³⁴ Judá karka Jakobpa wambra.
 Jakob karka Isaakpa wambra.
 Isaak karka Abrahampa wambra.
 Abraham karka Tarepa wambra.
 Taré karka Nakorpa wambra.
³⁵ Nakor karka Serugpa wambra.
 Serug karka Ragaupa wambra.
 Ragau karka Pelegpa wambra.
 Peleg karka Eberpa wambra.
 Eber karka Salapa wambra.
³⁶ Sala karka Kainanpa wambra.
 Kainán karka Arfaxadpa wambra.
 Arfaxad karka Sempa wambra.
 Sem karka Noepa wambra.
 Noé karka Lamekpa wambra.
³⁷ Lamek karka Matusalenpa wambra.
 Matusalén karka Enokpa wambra.
 Enok karka Jaredpa wambra.
 Jared karka Maalaleelpa wambra.
 Maalaleel karka Kainanpa wambra.
³⁸ Kainán karka Enospa wambra.
 Enós karka Setpa wambra.
 Set karka Adanpa wambra.
 Adán karka Taita Diospa wambra.

4

Jaia kuku, Jesusta pandariikunapi urmachingapa munakuskamanda

¹ Jesús baugtisariskauramanda, Santu Ispíritu paima iaikurka. Nispaka, Jordán iakumanda kutirka. Chiura Santu Ispíritu, chusa sitaska alpama paita pusarka. ² Chipika, chusku chungu punchami chisiarka. Chi punchakuna iaia kuku, pandariikunapi paita urmachingapa munakurka.

Tukui chi punchakuna Jesús, mana ñi imapas mikuspalla chisiakurka. Chi chusku chungu puncha ialiskauramandaka, iapa iarkaimanda iuiachigsamurka. ³ Chiura, chi iaia kukuka nirka:

–Kam Diospa wambra kagpika, kai rumita nii: “Tanda tukui”.

⁴ Jesuska ainirka:

–Ñugpamanda librupi, kasami willaraiá:

Runakuna, mana tandallawa kaugsangapa kankunachu.

Taita Dios tukui ima rimaskakunawami kaugsangapa chaiá.

⁵ Nispaka chi iaia kukuka, iapa awa filuma pusaspa, sug kawaridirumanda kai luarpi tukui alpakanata kawachirka. ⁶ Nispaka nirka:

–Tukui chi alpakanatami karasaki, kam mandag kangapa; chasallata, tukui ima chipi suma tiaskakunatapas, kamballa kangapa. Tukuimi nukata kuawaska ka. Chimanda, nuka maikan munaskatami karasa. ⁷ Kam kunguriwagpika, tukui kamballami kanga.

⁸ Chiura Jesuska, chi iaia kukuta ainirka:

–Ñugpamanda librupi, kasami willaraiá:

Kamba atun Taita Diosllata kungurispá kangí.

Pai ima niskallatami iukangi ruraspá kanga.

⁹ Ikuti chi iaia kukuka, Jerusalén puibluma pusaspá, Diospa atun wasi awa puntapi saia-chigrirka. Nispaka nirka:

¹⁰ —Kam Diospa wambra kaggpika, kaimanda alpama sitarii. Ñugpamanda librúpi, kasami willaraiá:

Taita Dios, paipa anjilkunatami ninga, kamta kawagsamungapa.

¹¹ Paikunapa makipimi urmankangi.

Chasaka, mana rumipi u imapipas chaki takarinkangichu.

¹² Jesuska ainirka:

—Kasapasmi willaraiá:

Kamba atun Taita Diusta mana ianga ningi:

“Abir kawasaki: ¿pudingichu?”.

¹³ Chasa chi iaia kuku, tukui imawapas pandachingapa mana pudispaka, Jesusta sak-
ispa, sug punchakunakama rirka.

Galilea alpapi, Jesús willai kallariskamanda

¹⁴⁻¹⁵ Jesuska, Santu Ispiritupa iapa iachaiwa Galilea alpama ikuti rirka. Chipika, judiu-kuna tandaridiru wasikunapi iachachii kallarigrirka. Paimanda, tukuikuna sumaglla uiaspa rimanakurka.

Jesús, kikinpa puiblupi wabutii tukuskamanda

¹⁶ Chiuramanda Jesús, pai wiñaska Nazaret puibluma chaiagrirka. Sug warda punchaka, tandaridiru wasima iaikurka, imasa kustumbri kaskasina. Chipika saiarirka, ñugpamanda librúpi willaraiaskata chaskingapa. ¹⁷ Chiura, Isafas suti Santu Ispirituwa rimag ima willaraiaskata kuarkakuna. Maskaspa, tarirka maipi kasa niraiaskata:

¹⁸ Atun Taita Diospa Ispíritu, nukawami ka.

Aglaskami kani, mana iukagkunata Alli Willaita willagringsapakunata.

Kachamuskami kani,

karsilpi kaskakunata willangapa kacharii tukungapa kagtakuna;

chasallata, mana ñawi kawagkuna ikuti kawagsamungapakuna;

mana allilla rurai tukuskakunata kispichingapa;

¹⁹ atun Taita Dios kispichii wata chaiamuskata willangapa.

²⁰ Jesús chasa rimaspaka, chi niraiaska libruta wichkaspá, kutichispaka, tiarirka. Tukui chipi kagkuna, paita upalla kawanakurka. ²¹ Chiura Jesuska, kasami nii kallarirkakunata:

—Kuna punchami, kamkunapa ñawipi, imasa chi willaraiaskasina tukugsamurka.

²² Chipi tukui kagkuna, paimanda allilla rimanakurka. Pai iapa suma rimakugmanda, ujnarispa tapurinakurka:

—Kai runaka, ¿manachu ka Josepa wambra?

²³ Jesuska nirkakunata:

—Imasami ninkuna: chasami niwankangichi: “Ambig runa, kam kikinlla ambirii”. Kasapasmi niwankangichi: “Kam, tukui imasa Kafarnaum puiblupi ruraskata uariskasina kai kam kikinpa alpapi chasallata rurai”.

²⁴ Kasapasmi Jesús nirka:

—Kasami nuka niikichita: ñi maikan Santu Ispirituwa rimagkunata kikinpa alpapi kausagkuna mana munankunachu uiangapa. ²⁵ Sutipami kasa niikichita: ñugpamanda rimag Elías kausakuura, kimsa wata sugta killami mana tamiarka. Tukui alpapi iapa iarkaimi tukurka. Chiurakuna, kai Israel alpapi achka sapalla kidaska warmikunami tiarka. ²⁶ Chi warmikunapagma, Taita Dios Eliasta mana kacharka. Sidón puiblu ladullapi Sarepta suti puiblupi kausag biudapagmami kacharka.

²⁷ —Chasallata, ñugpamanda Eliseo Santu Ispirituwa rimag kausakuura, kai Israel alpapi achkakuna aicha ismui unguiwa tiarkakuna. Chi ungugkunata, Eliseo mana ambirka. Siria alpamanda samuska Naamán suti runallatami ambirka.

²⁸ Chasa uiaspa, chi wasi uku tukui kagkuna iapami rabiarrakakuna. ²⁹ Tukuikuna, atarispa, Jesusta puiblumanda llugsichii kallarirkakuna. Chi puiblu, luma awapi wasi-kuna saiachiskami iukarkakuna. Chi luma awamanda tangangapa iuiawami Jesusta apanakurka. ³⁰ Paika, paikunapa chaugpimanda kichuchirispá, llugsispa rirkalla.

Sug runa kuku waira iaikuskata, Jesús ambiskamanda

³¹ Nispaka, Galilea alpapi Kafarnaum suti puibluma chaiagrirka. Chipika, warda punchakuna ³² iachachii kallarirka. Pai iachachikuskata uiaspa, tukuikuna iapa ujnarrakakuna. Allilla mandagsinami iachachikurka.

³³ Chi tandariduru wasipika, sug kuku waira iaikuska runami chaiagrirka. Chi runaka, sinchi kaparispa nirka:

³⁴—Ai, Nazaret puiblumanda Jesús, ¿imapatak nukanchipagma samurkangi? Nukanchita puchukangapachar samurkangi. Nuka allillami rigsiiki, kam Taita Diospa tukuipi mas alli wambra kagta.

³⁵ Jesuska, kuku wairata piñaspa, nirka:

—Upalla rikui, kai runamanda llugsispa.

Chiura chi kuku wairaka, tukuikunapa ñawipi chi runata alpama urmachispa, llugsirka, mana imapas lisiachispalla. ³⁶ Tukuí chasa kawagkuna, iapa mancharirkakuna. Kikin-pura tapurinakurka:

—¿Ima rimaisik ka? Kai runaka, paipa iapa iachaiwa atun mandagsina kuku wairakunata rimaspa, runamanda llugsichí.

³⁷ Chasa ruraskakunata kawagkunawaka, tukuima Jesusmanda iacharigsamurka.

Achka ungugkunata, Jesús ambiskamanda

³⁸ Chi tandariduru wasimanda llugsispa, Jesús, Simonpa wasipi iaikugrirka. Chipika Simonpa suigra, iapa rupaiwami ungug sirikurka. Jesusta mañarkakuna:

—Ambipuai.

³⁹ Chiura Jesuska, chi ungugpagma kaillaiaspa, kumurispa nirka:

—Kai rupai anchurii.

Chiuralla, rupai anchurirka. Anchurigllapi chi warmi, atarispa, mikui ianuspa, karai kallarirkakunata.

⁴⁰ Indi ña chingakuuraka, achkakuna ima unguiwa kaskakunatami Jesuspagma chai-chigrirkakuna. Chiura Jesuska, tukuikunata maki churaspa, ambirkakunata. ⁴¹ Chasallata kuku wairakunatapaspas, achkakunatami llugsichirka. Chi kuku wairakuna, kaparispa, ninakurka:

—Taita Diospa wambra kangi.

Jesuska, chasa kaparinakuskata piñarka. Chi kuku wairakuna iacharkakuna, pai Taita Dios agllaska Cristo kagta. Chimandami chi kukukunata mana sakikurka, chasa rimangapa.

⁴² Pakariillapi Jesuska, chi puiblumanda rirka, mana maikan runakunapas kaugsanakuska pambama. Chi puiblumanda achka runakunaka, paita maskaspa, pai kaskama chaiagrirkakuna. Munanakurka paikunapagllapi kangapa, mana maimapas rispalla. ⁴³ Chasa mañanakuskata uiaspa, Jesuska kasami nirka:

—Nukata chaiawakumi, sug puiblukunapipas Diospa suma mandaimanda Alli Willaita willaspa puringapa. Chasamandami nuka kachamuska kani.

⁴⁴ Pai imasa niskasina, Judea alpapi tukui tandariduru wasikunapi iaikuspa, Alli Willaita willaspami purikurka.

5

Askurinti achka chalwakuna apiskamanda

¹ Jesús Jenesaret suti kucha patapi kauraka, achka runakuna paita tanganakuiwantami kaillaiagrirkakuna, Diospa Rimaita uiangapa. ² Chi iaku patapi, iska chusa kanuami tiarka. Kanuamanda chalwadurkuna, llugsispa, ataraiakuna tagsanakurka. ³ Chasa kawaspaka, Jesuska sug kanuapi iaikurka. Nispaka, chi kanua Simonpa kagmanda, paita mañarka:

—Kai kanuata alpamanda aslita karuiachipuai.

Chasa rurauraka, kanuapi tiarispa, chipi kagkunata iachachii kallarirka. ⁴ Iachachii puchukaspaka, Simonta nirka:

—Kanuata jundu kuchama apaspaka, ataraiagriichi, chalwa apingapa.

⁵ Simonka ainirka:

—Iachachig taita, pakarigtami chalwanakurkanchi. Ñi imapas mana apirkanchichu. Kam chasa niwagmanda, nigpika ataraiagrisa.

⁶ Chasa ataraiagriuraka, iapa achka chalwa apirkakuna, ataraiakunapas ñalla llikirigta. ⁷ Chiura, sug kanuapi kaskakunata makiwa kaiarkakuna, aidagringapa. Chaiagrispaka, iskandi kanuapi chalwakuna jundachigrirkakuna, ñalla kanuakunapas asintarigta.

⁸ Chasa kawaspaka Simón Pedroka, kungurispa, Jesusta nirka:

—Taita waugki, nukamanda anchuripuai. Nuka, iapa pandaridurmi kani—. ⁹ Iapa achka chalwakuna apirigmanda, Simón i tukui paiwa kagkuna askurinti mancharirkakuna.

¹⁰ Santiago i Juan suti Zebedeopa wambrakuna Simonwa purig kagkunapas, chasallata mancharirkakuna.

Jesuska, Simonta nirka:

—Mana mancharikui. Kunauramanda iachachisakimi, chalwakunata apigsina, runapura maskapuag kangapa.

¹¹ Chasa uiaspaka, kanuakunata alpama llugsichispa, tukui ima tiaskakunata sakispa, Jesusta katirkakuna.

Aicha ismui unguiwa kaskata, Jesús ambiskamanda

¹² Jesús ña sug puiblupi kagriuraka, sug runa, aicha ismui ungui iukaspa, paipagma kaillaiagrirka. Chi runaka, Jesusta kawaspa, ñallapas alpakama kumurispa, nirka:

—Taita waugki, kam munaspaka, pudingimi nukata ambiwanga.

¹³ Chiura Jesuska, ungugta maki churaspa, nirka:

—Ari, munanimi. Ambiriska tukui.

Chasa nigllapi, chi ungui allilla ambirigsamurka. ¹⁴ Chiura, Jesuska nirka:

—Mana pitapas willakungi. Sasirdutita kawachirigrii. Moisés kamariku karangapa niraikaskata karagrii. Chasaka, tukuikunami kawangakuna, kam allilla ambiriska kagta.

¹⁵ “Mana willakungi” nigpipas, Jesús ima ruraskamanda masmi iacharikurka. Chiwanka, iapa achka runakuna tandaridur karkakuna, paita uangapa. Chasallata, ungugkunatapas ambichingapa apadur karkakuna. ¹⁶ Chimanda Jesuska, maikan runapas mana kausanakuskama ridur karka, Taita Dioswa rimanakungapa.

Mana kuiuringapa unguiwa kaskata, Jesús ambiskamanda

¹⁷ Sug punchakuna ialiuira, Jesuska iachachikurka. Chipika, sug fariseokuna i Moisés ima niskata iachachig taitakuna tianakurka. Chi taitakuna karkakuna Galilea i Judea alpakuna suui i Jerusalemamanda chaiagriskakuna. Chiura Jesuska, atun Taita Diospa iapa iachaiwa karka, ungugkunata ambingapa.

¹⁸ Jesús iachachikuuraka, sug runakunaka, mana kuiuringapa unguiwa kaskata chakanapi sirichispa, chi wasima aparkakuna. Iuianakurka: “Wasi ukuma iaikuchispa, Jesuspa ñugpa ladumi churasunchi”. ¹⁹ Chasa iuianakuspapas, iapa achka runakuna ukupi junda kagmanda, mana iaikuchii pudirkakuna. Chimandaka, wasi awama sikachirkakuna. Wasita utkuchispa, chi runa chakanapi sirikuskata tukuikunapa chaugpipi Jesuspa ñawi ladu uraikuchirkakuna. ²⁰ Chiura Jesuska, “Ambipuangami” iuianakuskata kawaspa, mana kuiuringapa unguiwa kaskata nirka:

—Waugki, kam pandariikunata ñami pasinsiaska kangi.

²¹ Chasa uiaspaka, Moisés ima niskata iachachig taitakuna i fariseokunaka kikinapura ninakurka: “Kai chasa rimag, Diussina tukuspa, ¿pisik ka? Ñi pipas mana pudinkunachu, pandariikunata pasinsiangapa. Taita Diosllami pasinsiangapa pudí”.

²² Jesuska, chasa iuianakuskata iachaspaka, nirkakunata:

—¿Imapatak chasa sungullapi iuianakungichi? ²³ ¿Maikantak mas alli ka ningapa: “Kam pandariikunata ñami pasinsiaska kangí”? Mana kagpika, ¿ningapa: “Atarii; kamba wasima riilla; ña ambiriskami kangí”? ²⁴ Kunaura kawachisakichita: kai Runa Tukuska, kai alpapi pudinmi, pandariikunata pasinsiangapa.

Chasa nispa, mana kuiuringapa unguiwa kaskataka nirka:

—Nukami niiki: atarii. Chakanata markarisa, kamba wasima rii.

²⁵ Chasa nigllapi, tukui chipi kagkuna kawanakugllapi, chi runa atarirka. Chakana sirikuskata markarisa, wasima rirka, Taita Dios iapa suma atun kagta nispa. ²⁶ Chiwa tukui-kuna, iapa ujnarispa tukugsamurkakuna. Taita Diusta iapa suma atuniachirkakuna. Iapa mancharispa, nirkakuna:

—Kuna puncha, ñi ima urapas mana kawaskatami kawarkanchi.

Leví suti runata, Jesús kaiaskamanda

²⁷ Chiuramanda Jesuska, llugsispa, Leví suti runa mana judíu kaskakunamanda kulki chaskikuskapi tiakugta kawaspa, nirka:

—Katiwai.

²⁸ Chiura chi runa, atarispa, Jesusta katichirkalla, tukui sakispa. ²⁹ Nispaka, atun punchasina suma mikui Jesusta paipa wasipi karagrirka. Paipura kulki chaskigkuna i sug achkakunapas, sugllapi paikunawa tiarigrirkakuna. ³⁰ Chasa kawaspa, fariseokuna i Moisés ima niskata iachachig taitakuna Jesusta katiraiagkunata piñaspa tapurkakuna:

—¿Imapatak mana judíu kaskakunamanda kulki chaskig i mana allilla ruragkunawa sugllapi mikunakungichi i upianakungichi?

³¹ Jesuska nirkakunata:

—Mana unguiwa kagkuna mana ministinkunachu, ambigta maskangapa. Ungugkunami ambigta maskankuna. ³² Chasallata, nukaka mana samurkanichu, allilla ruragkunata kaiangapa. Mana allilla ruragkunata maskangapami samurkani, paikunata allilla rurai-kunama tigrachingapa.

Imaura mana mikungapa, Jesús iachachiskamanda

³³ Chipi kagkuna, Jesusta nirrakuna:

—Juanwa i fariseokunawa purigkuna, achka punchakuna mana mikuspallami chisiadur kankuna, Taita Diusta mañaspalla. Ikuti kamta katiraiagkunaka, imaurapismi mikunkuna i upiankuna.

³⁴ Chiura, Jesuska ainirkakunata:

—Kasaraipi, kusa tukunga kunbidaskakunawa kankama, ¿pudinkangichichu ninga: “Mana mikuspalla kaichi”? Manima. ³⁵ Imaura chaiachu, kusa anchuchii tukungapa: chiurami paikunata chaianga, mana mikuspalla kangapa.

³⁶ Nispaka, chipi kagkunata iui ai apingasina suma parlarka, kasa nispa:

—Ñi pipas, musu katangamanda piti mana llikichinkangichichu, ruku katangapi siran-gapa. Chasa siragpika, musu katangami waglliri. Musumanda pitipas rukupi siraska mana sumanchu.

³⁷ —Chasallata ñi pipas, musu binu, ruku kara taligapi mana tallingichichu. Chasa tallig-pika, musu binu timbuura, taligata tuglachispami icharinga. Kara taligapas mana baling-a-chu. ³⁸ Chimandami musu binu, musu taligapi tallingapa chaiá.

³⁹ —Ñi pipas, suma timbuska binu upiaska, llullu binutaka mana upiai munangapa kangichichu. “Timbuskatami mas alli ka” ningapami kangichi.

6*Warda punchamanda, Jesús iachachiskamanda*

¹ Sug warda puncha, Jesús katiraiagkunawanta chagra tarpuraiskakunapi ialina-kurka. Katiraiagkunaka, trigu ispigakunata pitispa, makiwa kakuksa, murukunata miku-nakurka. ² Chasa kawaspaka, sug fariseokuna tapurkakuna:

—¿Imatak warda puncha pandarinakungichi?

³ Jesuska ainirkakunata:

—¿Manachu ñugpamanda librupi willaraiskata kawarkangichi, taita David i paiwa kagkunapas, iarkaimanda kaspá, imasa ruragtakuna? ⁴ Pai kikin, Diuspa wasi ukuma iaikuspa, altarpí churaska tandakuna tiaskata aisaspa, mikurka, mana imapas mancharispalla. Chi tandakuna, sasirdutikunalla mikudirumi karka. Chi tandakunallatata paiwa kagkunatapas kararka, mikungapa.

⁵ Kasapasmi Jesús nirrakunata:

—Kai Runa Tukuska pudinmi ninga, warda punchakunatapas imasa chaiaskasina ruran-gapa.

⁶ Sug warda punchaka Jesús, tandariduru wasipi iaikuspa, iachachikurka. Chipika, sug alli ladu maki chakiriska unguwiwa kag runa, paikunawa sugllapi karka. ⁷ Chiura Moisés ima niskata iachachig taitakuna i fariseokunaka, Jesusta chapanakurka, warda puncha ambichu; ambigpika, paimanda justisiakunapagma willagringapa. ⁸ Jesuska, paikuna ima iuianakuskata iachaspa, chi runa maki chakiriska kaskata nirka:

—Atarii. Runakunapa chaugpipi saiarigsamui.

Chiura chi runa, atarispa, chipi saiarigrirka. ⁹ Chiura Jesuska, chi taitakunata nirka:

—Tapusakichita: warda puncha, ¿imatak mas alli ka: allilla u mana allilla rurangapa; runata kispichingapa ubi puchukangapa?

¹⁰ Chasa tapuspa, tukui paipa muiugta kagkunata kawaspa, chi runata nirka:

—Maki chutachii.

Chasa chutachigllapi, chi makika aliarka. ¹¹ Chipi kag taitakuna, Jesuswa iapa rabia-rispa, kikinpura tapurinakurka:

—¿Imatak kai runata rurasunchi?

Chunga iskaik runakunata, Jesús agllaskamanda

¹² Chi punchakuna Jesuska, awa lumama rirka, Taita Diusta rimangapa. Chipi, paka-rigami Taita Diuswa rimanakurka. ¹³ Pakariuraka, tukui paita katiraiagkunata kaiaspa, chunga iskaikunatami agllarka. Chi agllaskakunataka nirka:

—Nukami kamkunata kachanakuikichita, nukamanda Alli Willaita willagkuna kangapa.

¹⁴ Chi agllaskakuna, kasami suti karkakuna: Simón (paita, Jesús sutichirka Pedro); paipa waugki Andrés; Santiago i Juan; Felipe i Bartolomé; ¹⁵ Mateo i Tomás; Alfeopa wambra Santiagollatata suti; sug Simón (kananeo suti runakunawa ñugpata purig); ¹⁶ Santiagopa waugki Judas; i Judas Iskariote, Jesusta katuspa apichig.

¹⁷ Chiuramanda Jesús, chi lumamanda pai agllaska runakunawanta uraikuspa, sug pamba alpama chaiagrirkakuna. Chipika, achka paita katiraiagkuna tandariska karka-kuna. Chasallata iapa achka runakuna, Judea alpa suiunigmanda, Jerusalén puiblunig-manda, i Tiro i Sidón puiblu lamar iaku patamandakuna, Jesusta uangapa i ungugkunata

ambichingapa tandarigriska karkakuna. ¹⁸ Chiurallatata, kuku wairawa kagkunapasmi ambirirkakuna. ¹⁹ Jesús, paipa iapa iachaillawa tukui unguiwa kaskakunatami aliachikurka. Chimanda tukui chipi kagkuna, paita llamkangapami munanakurka.

Taita Diospa iapa kuiaskakuna

²⁰ Chiura Jesuska, paita katiraiagkunata kawaspa, kasami nirka:

—Kamkuna Taita Dioswa iuiarispa mana iukagsina tukugkuna, paipa iapa kuiaskami kangichi. Kamkuna, Dios suma mandakuskapimi iaikugringapa kangichi.

²¹ —Iapa iarkaimanda kunaura kagkunapas, Taita Diospa iapa kuiaskami kangichi. Paillatatami ima alli munaskata karamungapa ka.

—Kunaura iapa llakiiwa wakanakuskapas, Taita Diospa iapa kuiaskami kangichi. Nis-paka asinkangichimi.

²² —Kai Runa Tuskamanda iuiarispa, maikanpas kamkunata piñaspa, llugsichispa, kamispa, imasa mana allillawa sutichinakugpipas, Taita Diospa iapa kuiaskami kangichi.

²³ Chasa mana allilla kamkunata ruragpipas, kuntintarisapalla kangichi. Kamkunata, Taita Dios sug luarpi askurinti sumami tukui karangapa ka. Chasallatami ñugpata kaugsag runakuna Santu Ispirituwa rimagkunatapas mana allilla rurarkakuna.

Taita Diospa ñawipi mana alli kagkuna

²⁴ —¡Ai, kamkuna iapa iukag kagkuna! Ñami tukui chaskirkangichi.

²⁵ —¡Ai, kamkuna kunaura sagsaskalla kagkuna! Kamkunata chaiangapami ka, iapa iarkaiwa kangapakuna.

—¡Ai, kamkuna kunaura asigkuna! Kamkunata chaiangapami ka, iapa llakiiwa wakaspa kangapakuna.

²⁶ —¡Ai, kamkunamanda iapa allilla tukui runakuna rimagmanda! Chasallatami ñugpata kaugsag runakunapas, Diospa Rimaíta llullaspa willanakugmanda, “Iapa allillami ka” nir-kakuna.

“Kamkunata piñanakuskata kuiangichi”

²⁷ —Chasa kagpipas, kamkuna uiawagkunata kasami niikichita: kamkunata piñanakus-kata kuiangichi. Kamkunata mana munanakuskatapas allilla rurangichi. ²⁸ Kamkunata kamigkunatapas ningichi: “Taita Dios, kamkunata iapa kuiaspa kawapuachu”. Kamkunata mana suma ruragkunamandapas Taita Diusta paikunamanda allilla mañapungichi.

²⁹ —Maikanpas kachitipi kamta piagpika, sug ladu kachitipi piangapapas sakiringi. Maikan kamta kapisaiu kichungapa munagpika, kusmatapas kuangi apachu. ³⁰ Maikanpas ima mañaskata karangilla. Ima kambatapas maikan kichugpipas, mana ningi: “Kutichiwai”. ³¹ Imasami munanakungichi, sugkuna kamkunamanda allilla rurachukuna: chasallata kamkunapas, paikunamanda allilla rurangichi.

³² —Kam kikipuralla kuianakuspa kagpika, kamkunaka, ¿imatak Taita Dios karangapa suianakungichi? Maikan mana allilla ruraspas kaugsanakugpurapas kuianakuspami kaugsankuna. ³³ Chasallata, kamkunata suma ruragkunallata suma ruragpika, kamkunaka, ¿imatak Taita Dios karangapa suianakungichi? Mana allilla ruragkunapas, paipura suma ruranakuspami kaugsankuna. ³⁴ Maikanpas kutichiwachu iuiaspalla mañachigpika, kamkunaka, ¿imatak Taita Dios karangapa suianakungichi? Mana allilla ruragkunapas, paipura mañachirinakú, parijuma kutichirinakungapa.

³⁵ —Chasapaka, kamkunata mana munaspa piñanakuskata kuiaspa, tukui allillata rurangichi. Mañachingichi, mana kutichingapa iuiaspalla. Chasaka, tukui sumagllami sug luarpi chaskigrinkangichi. Chasapi, tukuikunamanda mas atun Taita Diospa wambrakunami tukungapa kangichi. Taita Dioska, tukui mana “Pai Siñur” niskakunata i mana allilla ruragkunatapas paipa llakiiwa sumagllami kawá. ³⁶ Imasami kamkunapa Taita Dios, kamkunata llakiiwa sumaglla kawá: kamkunapas chasallatami iukangichi, sugkunata llakiiwa kuiaspa kawanga.

“Mana pitapas pandariskakunata kawangichi”

³⁷ —Mana pitapas pandariskakunata kawangichi. Chasaka Taita Dios, mana kamkuna pandariskata kawangachu. Mana sugkunata ningichi: “Diltudupa ninama ringapami kangichi”. Chasaka Taita Dios, mana kamkunata chi ninama kachangachu. Sugkuna pandariskakunata pasinsiangichi; chasaka Taita Dios, kamkuna pandariskakunatapas pasinsiangami.

³⁸ —Sugkunata karangichi; chasaka Taita Dios, kamkunatapas karangami. Achka, junda, icharigtami karanga. Imasami sugkunata kamkuna tupungichi: chasallatami Taita Dios, kamkunata allilla u mana allilla ruraskata tupungapa ka.

³⁹ Chasa nispaka, chipi kagkunata iuiái apingasina suma parlarka, kasa nispa:

—Mana ñawi kawag, sug mana ñawi kawagta pusagpika, ¿manachu iskandikuna pusuma urmagrintrakuna? ⁴⁰ Ni maikan iachaikugkuna, iachachiskamanda mas iacha mana kan-kunachu. Tukuipi allilla iachaikugpika, iachachiskasinallatatami tukunga.

⁴¹ —¿Imapatak sugpa ñawipi juituriska ugsata kawakungi; ikuti kam kikinpa ñawipi sug atun ugsa juituriska iukaskataka mana kawaringi? ⁴² Chasallata, kam kikinpa ñawipi chi atun juituriska iukaskata mana kawarispalla, ¿imasatak sugta ninkangi: “Waugki, ñawipi juituriska ugsata anchuchisaki”? Sungu awalla rimag, kam kikinpa ñawita chi atun juituriska iukaskata ñugpa anchuchirii. Chasa ruraspami allilla kawankangi, sugpa ñawita juituriska ugsata anchuchingapa.

⁴³ —Kasapas. Alli sachakunapi winja muiu mana tukugsamunchu. Mana alli sachakunapika miski muiukuna mana tiarinchu. ⁴⁴ Tukui sacha, muiukuna tiariurami rigsiri, alli u mana alli kagta. Ispinauiug sachakunapi mana igus muiu tandachirinchu. Chini sachakunapi mana ubas pallarinchu. ⁴⁵ Chasallata alli runakuna, alli iuiaikuna iukasapami allilla rimagsamunkuna. Ikuti mana alli runakunaka, mana alli iuiaikuna iukasapami mana allilla rimagsamunkuna. Iuiaiipi imasa iuianakuskatami simipi rimachigsamú.

Atun pamba rumipi i chusa alpallapi wasichiimanda parlu

⁴⁶ —¿Imapatak, nuka imasa niskata mana ruraspapas, nukata: “Iaia Jesús, Iaia Jesús” niwangichi? ⁴⁷ Maikan nukapagma samuspa, nuka ima rimaskata uiaspa ruragkuna, nisakichita kasa kagta. ⁴⁸ Sug runa, suma jundu utkuspa, atun rumipi sug wasi saia-chigsinami ka. Maituku iaku jundaure, chi wasita piagrikugpipas, mana kuichingapa kanchu, allilla saiachiska kagmanda. ⁴⁹ Maikan uiawasapapas, nuka imasa rimaskasina mana ruragkunaka kanmi mana rumipi utkuspa, chusa alpallapi wasichigsina. Chitaka, iaku jundaspa, piagrillapi urmachispa, wagllichispami apá.

7

Suldadukunata mandagpa lutrinta, Jesús aliachiskamanda

¹ Chipi kagkunata Jesús chasa rimaspa, Kafarnaum puibluma rirka. ² Chipika, Romamanda achka suldadukunata mandagpa iapa kuiaska lutrin, sinchi ungug sirikurka, ña wañungasina. ³ Jesús chaiagriskata uiaspaka, chi mandagka sug judiu taitakunata kacharka, mañangapa: “Ungugta ambipuagsamuchu”. ⁴ Jesuspagma chaiagrispaka, chi taitakunaka, suma mañaspa, nirkakuna:

—Chi mandag, alli runami ka. Aidapuai. ⁵ Nukanchipa alpamandakunata iapami muná. Paimi nukanchi tandariduru wasitapas saiachirka.

⁶ Chiura Jesús, chi runakunawa rirka. Ña wasima chaianakugriuraka, chi mandagka paiwa rimanakudiruta kacharka, Jesusta ningapa:

—Taita waugki, mana iapa llakiripuangi. Nuka mana mirisinichu, kam nukapa wasi ukuma iaikugsamungapa. ⁷ Chimandami nuka kikin kambagma mana rirkani, kamta maskangapa. Chasapaka, sug rimaila nipuai; nukapa ungug ambiripuangallami. ⁸ Nukapas, sugkuna mandawaskapimi kani. Chasallata nukapas, sug suldadukunata mandagmi kani. Maikan suldaduta nuka “Rii” nisa; chiura rinllami. Ikuti maikanta: “Samui” nisa; chiura samunllami. Nukapa lutrinta: “Kasa rurai” nisa; chiura rurannllami.

⁹ Chi rimaskata uiaspaka, Jesús iapami ujnarrka. Nispaka, tigrarispa, chi achka kati-raiagkunata nirka:

—Nukami kasa niikichita: ñi maikan Israelmanda runa, chi mandagsina suma allilla iuiawag mana tarirkanichu.

¹⁰ Chi mandag kachaskakuna, wasima kutispa chaiagriuraka, ungug ña ambiriska kas-kata tariirirkakuna.

Sug biudapa wambrata, Jesús kaugsachiskamanda

¹¹ Chiuramanda, Jesús rirka Naín suti puibluma. Paita katiraiagkuna i iapa achka runakuna, paiwa rinakurka. ¹² Chi puiblupunguma ña chaiagriura, kawarkakuna: sug biuda warmipa suglla wambra iukaskata, ña wañuska kagmanda, apanakurka pambangapa. Achka chi puiblupi kaugsanakug, sugllapi rinakurka. ¹³ Chasa kawasapaka Iaia Jesuska, chi warmimanda llakirispapa, paita nirka:

—Mana wakakui.

¹⁴ Chasa nispaka, kaillaiaspa, chakanata tuparirka. Chiura, wandugkuna saiarirkakuna. Chiura Jesuska, wañuskata nirka:

—Kam musutami niiki: atarii.

¹⁵ Chasa nigllapi, wañuska, kaugsarispa, tiarirka. Nispaka, rimai kallarrirka. Jesuska, chasa kaugsachispaka, paipa mamawa sakirka.

¹⁶ Tukai chasa kawagkuna, iapa mancharispa, Taita Diusta iapa suma atun kagta nirkakuna. Kasapasmi nirkakuna:

—Santu Ispirituwa sug atun rimagmi nukanchipa chaugpipi kawarigsamurka. Diusmi nukanchita kawangapa chaiagsamurka.

¹⁷ Chasa Jesús ruraskaka, Judea alpa i chi muiugta tukuinigmada iacharigsamurka.

Juan Bautista, Jesusta tapungapa kachaskakunamanda

¹⁸ Juan Bautistawa purigkuna, tukui imasa Jesús ruraskata kawaspaka, paita willag-rirkakuna. Chasa uiaspaka Juanka, iska katiraiagpurata kaiaspa, ¹⁹ Iaia Jesuspagma kacharka, tapungapa: “¿Kamchu kang chi samungapa kaska? Mana kagpika, ¿sugtachu suiasunchi?”.

²⁰ Chi runakunaka, Jesuspagma chaiagrispa, nirkakuna:

—Nukanchita, Juan Bautistami kachamurka, kamta tapungapa: “¿Kamchu kang chi samungapa kaska? Mana kagpika, ¿sugtachu suiasunchi?”.

²¹ Chiura, paikuna kawanakugllapi, Jesuska ima unguiwa kaskakunata ambirka. Kuku waira iaikuskakunata i mana ñawi kawanakuskatapas, achkakunatami ambirka. ²² Nispaka ainirkakunata:

—Juanta willagriichi kamkuna kunaura imasa kawaska i uiaskata. Mana ñawi kawagkuna kawanakumi. Mana purig pudigkunapas, allillami purinakú. Aicha ismui ungui iuskakunapasmi ambirigsamuska kankuna. Mana uiagkunapasmi allilla uianakú. Wañuskakunapasmi kaugsarinakú. Mana ñi ima iukagkunapasmi Alli Willaita chaskinakú. ²³ Maikan nukamanda suma iuiaita mana sakigpika, Taita Diuspa iapa kuiaskami kankuna.

²⁴ Juan kachaskakuna chimanda riura, Jesuska chipi kagkunata Juanmanda nirka:

—Kamkuna, chusa sitaska alpapi Juan kaskama chaiagrispaka, ¿imatata kawagrirkangichi? ¿Sug wiru wairawa pakichingasina kuiuchikuskatasinachu kawagrirkangichi?

²⁵ Mana kagpika, ¿imatata kawagrirkangichi? ¿Sug runa iapa suma musu katanga churakatachu tarigrirkangichi? Manima. Chasa suma churarigkuna, mandagkunapa wasikunallapimi iapa suma iuiachilla kaugsankuna. ²⁶ Chasa kagpika, ¿imatata kawagrirkangichi? ¿Santu Ispirituwa rimagtachu tarigrirkangichi? Ari, niikichitami: Santu Ispirituwa ñugpamanda rimagkunamandapas, Juan mas atunmi ka. ²⁷ Paimandami kasa niraiá:

Kawai. Nuka ima niskata willagta kamba ñugpami kachakuni, kammanda ñambikunata allichipungapa.

²⁸ Kasami niikichita: kai alpapi tukui tiagsamuskakunamanda, Juanllami mas atun ka. Chasa kagpipas, Dius suma mandakuskapi maikan mas uchullapas, Juanmanda mas atunmi niraiá.

²⁹ Chasa uiaspa, tukui chipi kagkuna i mana judiu kaskakunamanda kulki chaskigkuna Juan baugtisaska kagkuna, iuiarispa nirkakuna:

—Taita Dius, tukui iapa allimi ka—. ³⁰ Ikuti fariseokuna i Moisés ima niskata iachachig taitakuna Juan mana baugtisaska kagkunaka, Taita Dius imasa allilla rurakuskatami wabutirkakuna.

³¹ Kasapasmi Jesús nirka:

—Kai punchakuna kaugsanakuska runakunata, ¿imasatak kagta nisa? Kasa nintrani. ³² Sug wambrakuna kallipi tiarispa pugllanakugsinami kankuna. Chipika, paipura kaparinakú: “Nukanchi flaugta uiachigpipas, mana bailangichichu. Llakispa kantagpipas, mana wakangichichu”. ³³ Chasallata, Juan Bautistamanda i nukamandami rimangichi. Juan mana tanda mikugmanda, mana binu upiagmandami kamkuna nirkangichi: “Kai runa, kuku waira iaikuskami ka”. ³⁴ Kai Runa Tukuska tukui mikuspa i upiaspa kagmanda, ningichimi: “Iapa mikudur i iapa upiadurmi ka. Mana judiu kaskakunamanda kulki chaskigkunawa i mana alli ruragkunawa sugllapimi puriku”. ³⁵ Chasa kawaspa nigpikunapas, Taita Diuska tukui paipa wambrakunawami kawachi, pai iapa iacha kagta.

Mana allilla rurag warmi, Taita Diuswa tigragmanda

³⁶ Sug fariseo, Jesusta kunbidarka, paipa wasipi mikugringapa. Wasima iaikugrispaka, Jesús mikungapa tiarigrirka.

³⁷ Chi puiblupi kaugsakurka sug mana allilla rurag warmi. Chi warmika, Jesús fariseopaggi mikungapa riskata iachaspaka, suma asna asitiwa marmul rumi butillapi apaspami chaiagrirka. ³⁸ Jesuspa wasanigmada kaillaiaspaka, kungurirka. Wakaspa, paipa wikiwa chakita maillarka. Nispaka, kikinpa agchawa tustachispa, chakikunata mucharka. Chi asititapas chakipimi tallirka.

³⁹ Chasa kawaspaka, chi Jesusta kunbidag fariseo, iuiaspa, kawakurka: “Chi runa, sutipa Santu Ispirituwa rimag kaspaka, iachantrami, chi tuparikug warmi mana allilla rurag kagta”.

- ⁴⁰ Jesuska, chi runata nirka:
 –Simón, munakuikimi kamta rimangapa.
 Chiura ainirka:
 –Iachachig taita, niwai.
- ⁴¹ Chiura, Jesuska nirka:
 –Iskai runakunasi kulki mañachigta dibinakurka. Sug runa, pichka patsa bali kulkisi dibikurka. Sugka, pichka chungallasi dibikurka. ⁴² Nigpi, kutichingapa mana pudinakugmandaka, kulki mañachig, iskandikunatasi pasinsiarka.
 –Kunaura niwai: chi iskandi kulki dibinakugka, ¿maikantak mañachigta mas kuianga?
- ⁴³ Chiura, Simón ainirka:
 –Nukata rigchawanmi: maikan mas achka pasinsiai tukug.
 –Allillami ainiwarkangi— Jesuska nirka.
- ⁴⁴ Nispaka, warmita kawaspa, Simonta nirka:
 –Kai warmi ima ruraskata kawarkangi. Nuka kamba wasima iaikuuraka, kam mana iaku karawarkangichu, chaki maillaringapa. Ikuti kai warmika, wikiwami chakita maillawarka. Nispaka, agchawa chakichiwaraka. ⁴⁵ Kam, “Puangi” niwaspa, mana muchawarkangichu. Ikuti kai warmika, nuka iaikuuramandata, chakikunatami muchawailla ka. ⁴⁶ Kam ñi ima asiti mana umapi talliwarkangichu. Ikuti kai warmika, iapa suma asiti-wa chakikunapimi talliwarka. ⁴⁷ Chimandami niiki: chasa suma kuiawagmandami niraiá, pai achka pandariskata pasinsiai tukugta. Chasallata, maikan mailla pandariskata pasinsiai tukugka, maillami kuiá.
- ⁴⁸ Chasa nispaka, chi warmita nirka:
 –Kam pandariskakunata ñami pasinsiaska kangí.
- ⁴⁹ Jesuswa mikungapa kunbidanakuskapura tapurinakurka:
 –Kai runa, pandariskakunata pasinsiag niku; ¿pisik ka?
- ⁵⁰ Jesuska, chi warmita nirka:
 –Kam nukata iapa alli iuiawagmandami ña kispiriska tukurkangi. Rii, mana manchaspalla.

8

Jesusta aidag warmikunamanda

¹ Chiuramanda Jesuska, Diuspa suma mandaimanda Alli Willaita willaspa, atun i uchulla puiblukunapi purikurka. Chunga iskai pai aglaska runakunapas, paiwa sugllapi purinakurka. ² Sug warmikuna, kuku waira i ungui iukaspa aliachiskakuna, paita katirairkakuna. Chi warmipura karkakuna: sugka, Maria, Magdalena suti (chi warmita, kanchis kuku wairakunata Jesús llugsichiska karka); ³ sugka, atun mandag Herodespa wasita kawag Kuza suti runapa warmi, Juana suti; chimanda, Susana suti i achka sug warmikunapas. Tukui chi warmikuna, ima iukaskakunawa Jesusta aidanakurka.

Tarpudur runamanda parlu

⁴ Iapa achka runakuna, tukui puiblukunamanda Jesuspagma tandarigrirkakuna. Chiura Jesuska, paikunata iuiái apingasina suma parlarka, kasa nispa:

⁵ –Sug runasi llugsirka, simillakunata sitaspa tarpungapa. Tarpukuura, sug simillakunaka, ñambipi urmaspa, sarui tukurkakuna. Chi simillakunataka, piskukunasi mikurkakuna.

⁶ –Sug simillakunaka, rumilla tiaskapisi urmarkakuna. Tusta alpapi urmaspa, mailla wiñarispaña, lim chakirirkakuna.

⁷ –Sug simillakunaka, ispina sachakuna tiaskapisi urmarkakuna. Nigpika, ispina sacha wiñarka, simillakunata kilpagta.

⁸ –Ikuti sug simillakunakar, suma alpapisi urmarkakuna. Chasaka, suma wiñaspa, allilla pallarirkakuna. Sug simillamandalla, patsa patsasi pallarirka.

Chasa nispaka, sinchi kaparirka:

–Rinri iukagkuna, nuka niskata uiawaspa, suma iuiaringichi.

Imapa Jesús, iuiái apingasina parlukunawa rimaskamanda

⁹ Chiuramandaka katiraiagkuna, paita tapurkakuna:

–Chi parlu kam iachachiska, ¿imaták niraiá?

¹⁰ Chiura Jesuska, kasa ainirka:

–Kamkunata niskami ka, Taita Dius imasa suma mandakuskasina kaskata ñi imaurapas mana iachaskata iachangapa. Ikuti sugkunataka iuiái apingasina parlukunallawami rimani. Chasaka paikuna, kawanakuspapas, mana kawagsinami kankuna. Uianakuspapas, mana uiagsinami kankuna.

Tarpudur runamanda parlu ima niraiagta, Jesús willaskamanda

¹¹—Chi parlu nuka rimaskaka, kasami niraiá. Simillakuna, Diuspa Rimaimi niraiá.
¹²Similla ñambipi urmagka, sug runa Diuspa Rimaita uiagsinami niraiá. Chi uiaskata, iaia kukuka tukuimi kichugsamú; chasaka, mana suma iuiaspa, kispiringapa.

¹³—Similla rumilla tiaskapi urmagka, sug runa Diuspa Rimaita uiagsinami niraiá. Chi uangallawaka, alli iuiachiiwami chaskinkuna. Nispaka, imasami chi mana achka anguiug simillakuna tukú: chasallata sug ratullami Taita Diuswa iuiarispa kankuna. Imaura unzagpikunaka, chiuramanda mana mas Taita Diuswa iuiaringapa munankunachu.

¹⁴—Similla ispina sachakuna tiaskapi urmagka, sug runa Diuspa Rimaita uiagsinami niraiá. Uiaspapas, kai alpamandakunallawa sumaglla kaugsangapa iuiarispa, mas achka iukag tukungapa iapa munaspa i sumaglla kai alpapi kaspa, Diuspa Rimaita tukuimi kungarinkuna. Chasaka, ñi ima mana pallangapa tiaringasinami tukunkuna.

¹⁵—Similla suma alpapi urmagkar, sug runa Diuspa Rimaita uiagsinami niraiá. Sumaglla uiaskata suma umapi wakachirisa, mana kungarisallami kankuna. Chiwanka paikuna, Taita Diusmanda allilla ruraskakunawa mana sakispalla, achka pallarigsinami tukunkuna.

Sindimanda parlu

¹⁶—Ñi pipas, ima sindi sindichispaka, manga ukupi u kawitu ukuma mana churangapa chaianchu. Awa kawitupimi churangapa chaiá, maikan iaikugkunata punchaiachingapa. ¹⁷Chasallata, ima pakalla kaskapas imaurapasmi iacharí. Ima pakalla wakachiskapasmí imaurapas kawarigsamú. ¹⁸Chimanda, nuka ima rimaskata suma iuiawi uiawangichi. Maikan achka iukagta masmi karangapa ka. Ikuti maikan “Maillami iukani” iuiakuskataka kichungapami ka.

Sutipa Jesuspa familiakunamanda

¹⁹Jesús kaskama, paipa mama i waugkindikuna chaiagrirkakuna. Iapa achka runakuna chi ukupi kagmanda, manima kaillaiangapa pudirkakuna. ²⁰Chiura sug runa, paita nigrirka:

—Kamba mama i waugkindikunami kanchapi kankuna. Kamta rimangapami munakú.

²¹Paika ainirka:

—Diuspa Rimaita uiaspa ruragkunami nukapa mama i nukapa waugkikuna niraiankuna.

Sinchi wairata i iaku iapa kuiurikuskata, Jesús kasillaiachiskamanda

²²Sug punchakuna Jesús, kanuapi iaikurka, paita katiraiagkunawanta. Nispaka, paikunata nirka:

—Akushi. Kai kuchata chimbasunchi.

Nispa, ña rii kallariirkakuna. ²³Ña iaku chimbanakuskapi, Jesús puñurigsamurka. Chiura iapa sinchi waira, chi kuchapi atarii kallariirka. Chiwanka, kanua ukuma iaku ña iaikurka. ²⁴Jesusta katiraiagkuna, paita rigchachirkakuna, kasa nispa:

—Iachachig taita, iachachig taita, wañungapami kanchi.

Jesuska, rigcharispa, wairata i iakuta piñarka. Chasa piñauraka, tukui allillami kasillaiagsamurka. ²⁵Chiura Jesuska, katiraiagkunata nirka:

—¿Manarachu nukamanda suma iuiawaspa rigsiwangichi?

Chiura, iapa mancharispa ujnarisipami paipura tapurinakurka:

—Kai runa, ¿imasik ka? Waira i iakupas, paita uiankuna.

Sug runa achka kuku wairakuna iaikuskata, Jesús ambiskamanda

²⁶Kucha ialispaka, Galilea sug ladu chimba chaiagrirkakuna Jerasa suti alpama. ²⁷Jesús ña kanuamanda alpama uraikukuuraka, chi puiblumanda sug runa kuku wairakuna iaikuska, paita tupagrirka. Chi runa, ña unai ñi ima katanga mana churariska karka. Ñi ima wasipi mana kaugsakurka. Wañuskakuna pambaraiaskapimi karka. ²⁸Chi runaka, Jesusta kawaspaka, kaparispa, paipa ñugpa ladu kungurigrirka. Sinchi rimaiwa nirka:

—Ai, kam tukuimanda mas atun Taita Diuspa wambra Jesús, ¿imapatak nuka kaskama samukungi? Mañaikimi: mana nukata sungu nanagta llakichiwakugsamui.

²⁹Jesús, chi kuku wairata ñami niska karka: “Chi runamanda llugsii”. Chimandami chasa nirka. (Chi runata, kuku wairakuna achka biajisi apiska karkakuna. Chimanda, paita makipi i chakipi sinchi kadinakunawa wataspa, allilla charidur karkakuna. Chasa charinakugpipas, kuku wairakuna, kadinakunata pitichispa, chusa sitaska alpama paita apadur karkakuna.) ³⁰Chiura Jesuska, chi runata tapurka:

—Kam, ¿imatak suti kangí?

Chiura ainirka:

—Nuka, achka warangakunami suti kani—. Iapa achka kuku wairakuna paita iaikuska kaspami chasa ainirka.

³¹ Chiura chi runapa kag kuku wairakunaka, Jesusta mañai kallarirkakuna:

—Mana nukanchita kachakui, chi iapa jiru alpa ukuma ikuti ringapa.

³² Chi ladira ladullapi, iapa achka kuchikuna mikuspa purinarkurka. Nigpika, chi runapi kag kuku wairakunaka Jesusta mañarkakuna, kasa nispa:

—Nukanchita sakii, chi kuchikunapa ukuma iaikugringapa.

Chiura, Jesuska sakirka, chasa tukungapa. ³³ Chasaka chi kuku wairakunaka, ña runamanda llugsispa, kuchikunapa ukuma iaikugringakuna. Chiwanka tukui kuchikuna, iapa saia patata kalpasp, kucha iaku ukuma sitarigrirkakuna. Chipi chukarisp, tukui puchukarirkakuna.

³⁴ Kuchikunata kawagkuna, imasa pasariskata kawaspaka, mitikuspa, puiblunigta i ñambinigta suiu parlasp purigrirkakuna. ³⁵ Chasa uiagkunaka rirkakuna, imasa pasariskata kangangapa. Jesuspagma chaiagrispaka, chi kuku wairakunata llugsichii tukuska runata tarigrirkakuna. Paipa iui ai ña allilla, suma katanga churariska, Jesuspa chaki ladu tiakuskata tarigrirkakuna. Chasa kawaspaka, iapa mancharirkakuna. ³⁶ Chi kuku wairakuna iukaska runata imasa aliachiska kaskata kawagkunapas willarkakunata imasa pasarigta. ³⁷ Chiura chi alpanigmanda tukui uiagkunaka, askurinti manchaiwa kasp, Jesuspagma kaillaiasp, nirkakuna:

—Nukanchipa alpamanda llugsipuai.

Chasa uiaspaka Jesús, kanuama iaikuspa, kutirka.

³⁸ Manara rigllapi, chi kuku wairakuna llugsichii tukuska runa, paita mañai kallarirka:

—Nukatapas pusawai.

Jesuska, paita ainirka:

³⁹ —Kamba wasima rii. Willagrii, kamta imasa Taita Dios allilla ruraspa sakigta.

Chiura chi runa, risp, imasa Jesús paita allilla ruraskata chi puiblu suiu willasp purigrirka.

Jairopa wambra kaugsariskamanda i sug warmi Jesuspa katangata llamkaspalla ambiriskamanda

⁴⁰ Jesús kutispa chaiagriuraka, tukui paita suianakug sumaglla chaskirkakuna. ⁴¹⁻⁴² Sug tandaridiru wasimanda taita Jairo sutipasmi chaiagrirka. Chi taitaka, suglla warmi wambra iukarka, chung a iskai wataiug. Chi wabraka ña wañupukurka. Chaiagrispaka, Jesusta kungurisp, mañarka:

—Nukapa wasima ripuai.

Jesús chi taitawa paipa wasima rikuskapika, achka runakuna paita tanganakuiwanta kati kati rinakurka. ⁴³ Katichinakugpura sug warmimi sugllapi rikurka. Chi warmi, chung a iskai wata iawar sitaiwa ungug karka. Tukui ima iukaskata tukuchigpipas, ñi maikan ambigkunapas manima ambirkakunachu. ⁴⁴ Chi warmika, Jesusta kati kati kaillaiasp, paipa katanga puntapi llamkarka. Llamkagllapi, chi ungui ambirirka. ⁴⁵ Chiura, Jesuska tapurka:

—¿Pitak llamkawarka?

Tukuikuna: “Ñi pipas manima” ainiura, Pedro nirka:

—Iachachig taita, ¿manachu tukuikuna, tanganakuiwanta kamta kataraianakú?

⁴⁶ Jesuska nirka:

—Nukapa iachaitami aisagta iuiachirirwarka. Chiwami iachani, maikan ima iuiasp llamkawagta.

⁴⁷ Chiura chi ambirig warmika, Jesús imasa iachaskata uiaspaka, chugchuspa kaillaiasp, Jesusta kungurisp, tukuikunapa ñawipi willarirka, imapa Jesusta llamkagta i imasa llamkagllapi ungui ña ambirigsamugta. ⁴⁸ Chiura, Jesuska nirka:

—Kam warmisita, nukamanda suma iuiariskamandami ambirigsamurkangi. Rii, mana manchaspalla.

⁴⁹ Jesús chara rimakugllapi, sug runa, chi taitapa wasimanda chaiagrispa, nirka:

—Kamba wambra, ñami wañurka. Mana mas kai iachachig taitata imapas mañakui.

⁵⁰ Jesuska, chasa uiaspa, chi taitata nirka:

—Mana llakikui. Nukamanda suma iuiawai. Ungugka ambiripunkangimi.

⁵¹ Wasima chaiagrispaka, Jesús mana tukuikunata sakirka iaikungapa. Pedro, Juan, Santiago i wabrapa taita i mamandilla, paikuna paillawa iaikurkakuna. ⁵² Tukui chipi kagkuna, wañuska kagmanda iuiarisp, wakanakurka. Jesuska nirka:

—Mana wakanakuichi. Chi wambra mana wañuska kanchu. Puñuillami puñuku.

⁵³ Uiaigkuna, tim wañuska kagta allilla iachaspaka, paita asirkakuna. ⁵⁴ Jesuska, chi wañuskata makimanda apispa, sinchi kaparisp, nirka:

—Wambrita, atarii.

⁵⁵ Chasa nigllapi, alma ikuti samuspa, kaugsarigsamurka. Nispaka atarirka. Chiura, Jesuska nirka:

—Wambritata mikui karaichi.

⁵⁶ Chasa kawaspaka, wambropa atunkuna iapa ujnarirkakuna. Jesuska nirkakunata:

—Chasa kawaskata, ¡ujalallapas sugkunata willanakungichi!

9

Chunga iskai Jesús agllaskakunata, pai kachaskamanda

¹ Chiuramanda Jesuska, chi chungu iskai pai agllaskakunata kaiaspa, paipa iapa iachaita kararka, paikunapas kuku wairakunata llugsichii i unguiwa kaskakunata ambii pudingapa. ² Nispaka kacharkakunata, Diuspa suma mandaimanda willangapa i ungugkunata ambingapa. ³ Kachakuspaka, nirka:

—Mana apanakuichi tawina, ñi jigra, ñi tanda kukawi ñi ima kulkipas ñambipa. Katangapas, imasa churariska kaskallawa riichi. ⁴ Maikan wasipi iaikuspaka, chi wasillapi kangichi, chi puiblumanda sugsinama llugsinkama. ⁵ Ikuti maipi kamkunata mana chaskingapa munanakuskapagpika, chi puiblumanda llugsikuspa, chakipi alpa llutaraiaskata chab-sispa, paikunata willagsina kawachingichi, mana alli rurag kagtakuna.

⁶ Chi kachai tukuskakunaka, Alli Willaita willaspa i ungugkunata ambispa, chi puiblu suiu purigrirkakuna.

Herodes imasa Jesusta iuiakuskamanda

⁷ Mandag Herodes, Jesús tukui imasa rurakugta uiaspa, paimanda mana iacharka imasa iuiaringa. Sugkuna, Jesusmanda ninakurka:

—Chimi kangapa ka Juan Bautista. Wañuspaka, ikuti kaugsariskami kangapa ka.

⁸ Sugkunaka ninakurka:

—Ñugpamanda Santu Ispirituwa rimag Eliaschar ikuti kawarigsamurka.

Ikuti sugkunaka ninakurka:

—Maikan ñugpamanda Santu Ispirituwa rimagchar kaugsarigsamurka.

⁹ Herodeska nikurka:

—Nuka kikinmi Juanta uma anchuchingapa kacharkani. Chiwanka, chi tukui ima ruras-kata uiaspa, paimanda nuka ninimi: “¿Pisik ka?”—. Chimanda munakurka, Jesusta rigsingapa.

Pichka waranga runakunata, Jesús mikungapa karaskamanda

¹⁰ Jesús kachaska runakuna, paipagma ikuti chaiagrispaka, imasa ruraspa puriska willagrirkakuna. Chiuramanda Jesuska, paikunallata pusaspa, Betsaida suti puiblu kuchumalla rirka, ñi maikan runapas mana kaugsanakuskama, paikunallawa kangapa. ¹¹ Chasa iachaspaka, achka runakuna katichirkakuna. Chiura Jesuska, chi katichinakuskata sumaglla kaiaspa, Diuspa suma mandaimanda iachachirkakunata. Tukui chipi unguiwa kaskakunatapasmu ambirka.

¹² Ña chisiakuuraka, chungu iskai Jesús agllaskakuna, paipagma kaillaiaspa, nirkakuna:

—Kai runakunata kachai kai suiulla kaugsanakuska wasikunama, mikui maskagrispa puñgrichukuna. Nukanchi kaipi kaskapi, ñi pipas mana kaugsankunachu.

¹³ Jesuska nirkakunata:

—Kamkuna, paikunata mikui karaichi.

Paikunaka ainirkakuna:

—Pichka tanda i iskai chalwallami kaipi iukanchi. Mana kagpika, chaiakunchar kai tukuikunamanda mikui randigringapa—. ¹⁴ Mai pichka waranga karikunami chipi karkakuna.

Chiura Jesuska, katiraiagkunata nirka:

—Paikunata mai pichka chungu pichka chungu tiarichiichi.

¹⁵ Paikuna uiaspaka, chasa rurarkakuna. ¹⁶ Nigpi Jesuska, chi pichka tandata i iskai chalwata charirispa, awasinama kawaspa, “Pai Siñur” Taita Diusta nirka. Chi mikuikunata pitichispaka, katiraiagkunata kuaspa aparka, paikuna tukuikunata karaspa richingapa. ¹⁷ Tukuikunami sagsagta mikurkakuna. Nispaka, chungu iskai saparu junda piti pitikuna tandachirkakuna.

Kam, Dius agllaska Cristomi kangí, Pedro Jesusta niskamanda

¹⁸ Sug pucha Jesús, Taita Diusta rimakurka, katiraiagkunallawa sugllapi kaspas. Nispaka, paikunata tapurka:

—Maikankuna nukamanda, ¿pi kagtatak ninkuna?

¹⁹ Paikunaka ainirkakuna:

—Sugkuna ninkunami: kam kangisi Juan Bautista. Sugkunaka: kam ñugpamanda rimag Elías; ikuti sugkunaka: maikan ñugpamanda Santu Ispirituwa rimag kaugsariskasi kangi.

²⁰ Chiura, Jesuska tapurkakunata:

—Kamkunaka nukamanda, ¿pi kagtatak niwangichi?

Chasa tapuura, Pedroka ainirka:

—Taita Dios kikin agllaska Cristomi kangi.

²¹ Pedro chasa niura, Jesuska paikunata nirka:

—Mana pitapas nukamanda chasa willanakungichi.

Jesús imasa wañungapa kagta, pai musuglla willaskamanda

²² Kasapasmi Jesús nirkakunata:

—Kai Runa Tuskuskataka iapa llakii i nanai iukangapami chaiawaku. Iaia sasirdutikuna, Moisés ima niskata iachachig taitakuna i sug taitakunapas wabutiwangapami kankuna. Nukata wañuchiwangapami kankuna. Chasa wañuska kaspapas, kimsa punchapika ikuti kaugsaringapa kani.

²³ Chasa nispaka, tukuikunata nirka:

—Maikan nukata katiraiawangapa munagka, kikinmanda kungarichu. Tuku punchakuna, paipa krusta markarigsina ruraspami iuká katiraiawangapa. ²⁴ Maikan kikinpa kaugsaita kispichingapaglla iuiakugpika, kikinmi puchukaringapa ka. Ikuti maikan nukamanda wañuchii tukugpika, mana mas wañui kaugsaitami taringapa ka.

²⁵ —Sug runa tukui kai alpapi ima munaska iukagpipas, paipa almata mana kispichigpika, chi iukaskakuna ñi imapa mana balipungapa kanchu. ²⁶ Kai Runa Tuskuska samuura, nukapa i nuka Taitapa i tukuipi alli anjilkunapa suma atuniachiskawami samungapa ka. Chi punchaka, maikanpas nukamanda i nukapa rimaikunata wabutispa, “Mana rigsinichu” nigkunata, nukapasmi chasallata ningapa kani. ²⁷ Nukami kasa niikichita: maikan kaipi kagkuna manara wañugkuna, Taita Diospa suma mandaitami kawangapa kankuna.

Jesús, sug rigcha kawari tukugsamuskamanda

²⁸ Chasa niskauramanda mai pusag punchapika, Jesuska, Pedrota, Juanta i Santiagota pusaspa, sug awa lumama sikagrirka, Taita Dioswa rimanakungapa. ²⁹ Jesús chasa rimakunkamaka, paipa ñawi, sug rigcha kawarimi tukugsamurka. Paipa katangapas, iapa iura punchallami tukurka.

³⁰ Chiuraka iskai ñugpamanda runakuna, Moisés i Elías suti, kawarigsamurkakuna. ³¹ Chi runakunaka, Taita Diospa suma punchaiachiiwa kawarispas, Jesuswa rimanakui kallarikakuna. Jesusta imasa Jerusalenpi wañuchingapa kaskatami rimanakurka.

³² Pedro i paiwa kagkuna, iapa puñuiwa kaspapas, mana puñurirkakuna. Jesús chasa punchaiiwa kaskata i chi iskandi runakunata kawarkakuna. ³³ Chi runakuna Jesuswa kaskamanda ña anchurinakuuraka, Pedroka Jesusta nirka:

—Iachachig taita, kaipi iapa alli iuiachimi kanchi. Kimsa tambu kaipi rurasunchi: kamanda sug, Moisesmanda sug, sugka Eliasmanda—. Mana imapas iuiarisplallami Pedro chasa nirka.

³⁴ Chasa rimakugllapika, puiulla paikunata kilpagsamurka. Chi puii kilpaura, mancharirkakuna. ³⁵ Puii ukumandaka sug rimagta uarigsamurka, kasa nispa:

—Kai, nukapa agllaska wambra kapuá. Paita uiapuungichi.

³⁶ Chi rimai uarigsamuura, Jesuska ikuti sapalla kawarigsamurkakunata. Paikuna chasa kawaskata chiurakuna ñi pita mana willarkakuna.

Sug wambra wañui ungui iukaskata, Jesús aliachiskamanda

³⁷ Kaiandika chi lumamanda uraikuura, iapa achka runakuna Jesusta tupagrirkakuna. ³⁸ Chipi kagkunapuramanda sug runaka, kaparispa nirka:

—Iachachig taita, nukapa wambra kawapuá. Pai, suglla wambra kapuá. ³⁹ Paita, sug kuku waira iaikuspa, diulpillami kaparichipuá. Kaima chimami chabsichipuá. Simi mandapas tukallami jundaspa sitapuá. Iapa tukuipi nanachispaka, mailla maillami anchuri. ⁴⁰ Chimandami kamta katiraiagkunata mañagsamurkani: “Chi kuku wairata llugsichipuaichi”. Nigpika, paikuna manima llugsichipuungapa pudirkakunachu.

⁴¹ Jesuska, paikunata nirka:

—¡Ai, kam mana alli runakuna, Taita Dioswa ñi ima mana iuiagkunami kangichi! ¿Imaurakamatak kamkunata chasa charinakusakichita?—. Chasa nispaka, wambra taitataka nirka— Kamba wambra kaima pusamui.

⁴² Chi wambra ña kaillaiakuura, kuku wairaka, paita ikuti chabsichispa, alpama urmachispa, kaima chima aparka. Chiura Jesuska, kuku wairata sinchi piñaspa, llugsichirka. Wambra ambispaka, paipa taitata kutichirka. ⁴³ Chiwanka tukui chipi kagkuna, Taita Diospa iapa suma iachaiwa imasa rurakuskata kawaspa, iapa ujanarirkakuna.

Jesús imasa wañungapa kagta, pai parisma willaskamanda

Tukuikuna imasa Jesús rurakuskata ujnarispa kawanakuura, paika katiraiagkunata nirka:

⁴⁴—Kai nuka ima willakuskata suma uiaspa, mana kungaringichi. Kai Runa Tukuskaka, mana alli runakunapagmami chaiachii tukungapa ka.

⁴⁵ Chasa niskata uiaspaka, katiraiagkuna mana iacharkakuna ima niraiagta, Taita Dios paikunapa iuiaita pakaskasina charikugmanda. Chi uiaskata mana iachaspapas, manchaspaka karkakuna, ima niraiagta Jesusta tapungapa.

Maikan mas atun taita kagta, Jesús iachachiskamanda

⁴⁶ Chiuramanda Jesusta katiraiagkunaka, paipura rimarinakurka, kasa nispa:

—¿Pisik mas atun taita tukuska niraiianchi?

⁴⁷ Chimanda Jesuska, imasa iuianakuskata iachaspaka, sug uchulla wambrata kaiaspa, paipa ladullapi saiachirka. ⁴⁸ Nispaka, paita katiraiagkunata nirka:

—Maikanpas kai uchullatasina nukamanda iuiarispa chaskigpika, nukata chaskiwag-sinami rurá. Chasa chaskiwaspaka, nukata kachamuwagtapasmi chaskig niraiá. Kam-kunapas maikan tukuikunamanda mas uchulla tukugka, mas atunmi niraiá.

Jesumanda iuiarispa, sugkuna allilla ruranakuskamanda

⁴⁹ Chiura, Juanka nirka:

—Iachachig taita, sug runa kamba sutiwami kuku wairakunata llugsichikugta kawarkanchi. Pai mana nukanchiwa sugllapi purig kagmanda, nukanchika nirkanchimi: “Mana chasa rurakui”.

⁵⁰ Jesuska, paita ainirka:

—Ianga kawangichi. Maikanpas mana kamkunata piñagkuna, kamkunawa suma iui-i-wami kankuna.

Santiago i Juanta, Jesús piñaskamanda

⁵¹ Jesús ña suma luarma sikangapa puncha chaiakuuraka, pai ñi ima mana manchaspalla Jerusalemna rirka. ⁵² Rikuskamandaka, sugkunata ñugpa kacharka, “Ñami samuku” willangapa. Chi kachai tukuskakuna, Samaria alpapi sug puibluma chaiagrirkakuna, Jesusmanda pusada mañapungapa. ⁵³ Chimanda runakunaka, Jesús Jerusalemna rikugta iachaspaka, mana munarkakuna paita chaskingapa.

⁵⁴ Chasa kawaspaka, Santiago i Juan suti Jesusta katiraiagkuna tapurkakuna:

—Taita waugki, ¿munangichu, nukanchi mañangapa: “Awanigmamanda nina kachamuwai, paikunata puchukangapa”?

⁵⁵ Jesuska, tigrarispa, pai iskandikunata piñarka. ⁵⁶ Chiuramanda, sug puibluma rirkakuna.

Kimsa runakuna, Jesusta katingapa munanakuskamanda

⁵⁷ Ñambi rinakuskapi, sug runa, kaillaiaspa, Jesusta nirka:

—[Taita waugki,] kamta katisakimi maima kam rikuskama.

⁵⁸ Jesuska ainirka:

—Chuchakuna, kuibakunami iukankuna, paikuna kaugsangapa. Piskukunapas, tasinwa suma allichiska wasimi iukankuna. Ikuti kai Runa Tukuskaka mana iukanchu, ñi maipipas samaringapa.

⁵⁹ Nispaka, sug runata nirka:

—Katiwai.

Chika ainirka:

—Taita waugki, ñugpa sakiwai, nukapa taitata pambagringapa.

⁶⁰ Jesuska nirka:

—Nukata mana iuiariwagkuna* pambachukuna. Kamka riilla, Diospa suma mandai-manda runakunata willangapa.

⁶¹ Ikuti sugka, Jesusta nirka:

—Taita waugki, kamta katingapami munakuiki. Ñugpa sakiwai; nukapa wasipi kag-kunata: “Kaiakama” nigrisa.

⁶² Jesuska ainirka:

—Maikan, ñugpasinama trabajaspa rikuspa, katisinama kawagka, mana balinchu, Diospa suma mandaimanda willag kangapa.

10

Kanchis chungá iskai runakunata, Jesús kachaskamanda

* 9:60 “Wañuska niraiaskakuna”, Jesusta mana iuiarigkunami niraiá.

¹ Chiuramanda Iaia Jesuska, sug kanchis chungá iskaí runakunata agllaspaka, tukui puiblu i wasikunama pai ringapa kaskama iskaí iskaí ñugpa kacharka. ² Kachakuspaka, kasami nirka:

–Pallangapaka, achkami tia. Nigpika pallagkunaka, maillami tiankuna. Chi pallaika, atun Taita Diospa chagrasinami ka. Chimanda, paita mañaichi, achka pallagkuna kachamuchu.

³ –Kamkuna riichilla. Kamkunata ubijakunatasina sacha alku kaugsanakuskasinamami kachanakuikichita. ⁴ Mana purichiichi kulki wakachiduru, ñi jigra ñi chakikunapi churaridirupas. Mana ñambipi saiarispa, piwapas ianga parlanakungichi.

⁵ –Maikan wasipipas iaikuspaka, ñugpa ningichi: “Puangi. Sumaglla allilla kapuaichi”. ⁶ Chi wasipi sutipa sumaglla iuiaiwa kaugsanakugpika, chasa niskamanda, paikunata tukuipi allillami tukugsamungakunata. Ikuti mana sumaglla chi wasipi kaugsanakugpika, chasa nigpipas, paikunata mana allilla tukugsamungakunatachu.

⁷ –Maikan wasipi kamkunata chaskigpika, chi wasillapi kangichi, ima karaskata mikuspa i upiaspa. Maikan trabajagkunata chaianmi, mikui u ima ministiska paikuna chaskingapa. Mana wasi wasi purinakungichi. ⁸ Maikan puibluma kamkuna chaigriskapi kaiachukuna: paikuna ima karaskata mikungichi. ⁹ Chipi unguiwa kaskakunata ambingichi. Paikunata willangichi: “Diuspa suma mandai, kamkunapagma ñami chaiaimuku”.

¹⁰ –Ikuti maikan puiblupi kamkunata mana chaskingapa munachukuna: kallikunama llugsispa, ningichi: ¹¹ “Kamkunapa puiblumanda alpa chakipi llutaraiaskata chabsichinchimi. Chasaka, kamkuna mana alli rurag kagtakunami kawachinchi. Chasa kagpikunapas, kasami willaikichita: Diospa suma mandai, ñami chaiaimuku”. ¹² Kasami niikichita: Taita Dios justisiai rurangapa puncha chaiauraka, Sodoma puiblumanda runakunata llakichiskamandapas masmi chi puiblukumamanda runakuna llakii iukangapa kankuna.

Jesús ima willakuskata mana uiagkunamanda

¹³ –¡Ai, kamkuna Korazín suti puiblupi kaugsagkuna! ¡Ai, kamkuna Betsaida puiblupi kaugsagkuna! Tiro i Sidón suti puiblukumamanda runakuna, imasa kamkunapa puiblukumapi chituku mana imaurapas kawaskasina ruraskata kawaspaka, chiurallami paikunaka, llakiiwa iana katangakuna churarispa, uchpawa umapi armarispa, alli rurai-kunama tigraska kantrakuna. ¹⁴ Taita Dios justisiai rurangapa puncha chaiauraka, Tiro i Sidón puiblukumamanda runakunata llakichiskamanda masmi kamkuna llakii iukangapa kangichi.

¹⁵ –Kamkuna, Kafarnaum puiblumandakunaka, ¿imapatá iuianakungichi: “Sug luarpimi atuniachii tukungapa kani”? Manima. Diltudupa ninamami sitai tukungapa kangichi.

¹⁶ Kasapasmi katiraiagkunata nirka:

–Maikan kamkunata uiagkunaka, nuka kikintami uiawankuna. Maikan kamkunata wabutigkunaka, nukatami wabutiwankuna. Chasa wabutiwaspaka, nukata kachamuwagtapasmi wabutig niraiankuna.

Kanchis chungá iskaí Jesús kachaskakuna ña kutiskauramanda

¹⁷ Chi kanchis chungá iskaí Jesús kachaska runakunaka, iapa suma alli iuiachiiwa kutispa, chaigrirkakuna, kasa nispa:

–Taita waugki, kuku wairakunapasmi kamba sutiwa nukanchita uiarkakuna.

¹⁸ Jesuska nirka:

–Ari, chiura iaia kuku rilampasina awamanda urmagtami kawarkani. ¹⁹ Nukapa iapa iachaitami kararkaikichita, kulibrakunata i alakrankunatapas sarugpi, kamkunata ñi imapas mana tukungapa; chasallata, iaia kuku tukuipi ima mana allilla rurai munaskatapas binsii pudingapa. ²⁰ Chasa kagpipas, kamkunata kuku wairakuna uiagmandalla, mana iuianakungichi, suma allilla iuiachiiwa kangapa. Kamkuna ima suti kaska, suma luarmanda librupi willaraiaskamandami iukangichi iapa kuntintarispa kangakuna.

Jesús, Taita Diusta: “Pai Siñur” niskamanda

²¹ Jesús, Santu Ispirituwa suma alli iuiachiiwa kaspá, chiuralla nirka:

–Taitiku, suma luar i kai alpa luarta iaia mandagmi kangí. Kamta iapa suma atun kagta-mi niiki. Kambagma iaikugringapa, iacha i iapa iuiaiug runakunamanda pakaskasinami kapungi. Ikuti mana iacha i mana iapa iuiaiugkunatami kawachirkangi. Ari, Taita, chasami kam munarkangi.

²² Kasapasmi Jesús nirka:

–Nukapa Taita, tukuimi nukata karawaska ka. Paipa wambra nuka kagta, ñi maikan runapas mana iachankunachu. Nukapa Taitallami rigsiwá. Chasallata, nukapa Taitata

mana pipas rigsinkunachu. Nukallami rigsini, paipa wambra kaspá. Maikan nuka munaskakunallami nukapa Taitata Rigsingapa kankuna.

²³ Chasa nispaka, tigrarispa, paita katiraiagkunallata nirka:

—Maikan kamkuna kunaura kawanakuska kawagkuna, Taita Diospa iapa kuiaskami kankuna. ²⁴ Kasapasmi niikichita: ñugpamanda Santu Ispirituwa rimagkuna i atun mandagkuna, achkakunami, kunaura kamkuna kawanakuskata kawangapa munanakuspapas, mana kawarkakuna. Chasallata, kunaura kamkuna uianakuskata uangapa munanakuspapas, manima uiarkakuna.

Samariamanda alli runamanda parlu

²⁵ Tianakuskamanda, Moisés ima niskata sug iachachig taita saiarirka. Chi runaka, Jesusta pandachingapa iuiiwa tapurka:

—Iachachig taita, ¿imasatak iukani ruranga, mana puchukariduru suma kaugsaita tarin-gapa?

²⁶ Chiura, Jesús tapurka:

—Moisés ima willaraiaskapi, ¿imatak rurangapa niraiá? Willawai.

²⁷ Chiura, chi runaka ainirka:

—“Kamba atun Taita Diusta kuiangi kam kikinpa sunguwa, almawa, tukui animuwa i tukui iuiiakunawa. Kam kikintasinami iukangi, tukui runakunatapas kuianga”.

²⁸ Chiura, Jesús nirka:

—Allillami ainiwangi. Chasa ruraspami alli suma kaugsaita iukankangi.

²⁹ Chi runaka, allilla iuiiuiug kagta kawachiringapa, Jesusta tapurka:

—¿Pitak nukapa waugkisina niraiá?

³⁰ Chiura, Jesuska ainirka:

—Sug runa Jerusalenmanda Jerikó puibluma ñambi rikuskata, sisaikuna apispa, tukui ima apakuskata katangawanta kichuspa, ñalla wañunaiagta lisiachispasi sakirkakuna.

³¹ Chasa kauraka, sug sasir dutisi chi ñambillapita rikurka. Chi runaka, ñalla wañukuska runata kawaspaka, muiuspa ialirka. ³² Nispaka, Diospa atun wasipi aidagpassi chillatata rikurka. Chi runapas, ñalla wañukugta kawaspaka, muiuspa ialirka. ³³ Kipama, Samaria alpamanda sug runasi, chi ñambillapita rikuspa, wañukuskapagma chaiagrirka. Chi runakar, kawaspaka, paimanda llakirirka. ³⁴ Paipagma kaillaiaspa, wira i binuwa piaskakunapi ambispa, watarka. Atarichispa, kikinpa burupi tiarichispa, pusarka. Pusada mañachiduru wasima chaiachigrispaka, sumaglla sirichigrirka. ³⁵ Kaiandika, sugma rikuspa, wasi mañachigta iskai punchapa kulki surkuspa kuarka, kasa nispa: “Kai runata suma kawapuangi. Kai kulki sakiska pisigpika, nuka kutimuura kuasakimi”.

³⁶ Chasa parlaspaka, Jesuska tapurka:

—¿Imasatak kamta rigchá? Sisaikuna apiska wañukuskapika, chi kimsandikunamanda, ¿maikantak waugkindisina kawari?

³⁷ Chiura, chi runa ainirka:

—Maikan paimanda llakirispaka ambig.

Chasa ainiura, Jesuska nirka:

—Riilla. Kampas, chasallata ruragrii.

Marta i María ñañandipa wasipi, Jesús kaskamanda

³⁸ Jesús ñambi rikuspa, sug uchulla puibluma chaiagrirka. Chipika Marta suti warmi, Jesusta paipa wasipi sumaglla kaiarka. ³⁹ Chi warmi iukarka María suti ñaña. Mariaka, Iaia Jesuspa chaki ladu tiarispaka, ima rimakuskata uiakurka. ⁴⁰ Martaka, achka ruraikunawa kaspá, puririkurka, tukui ruraikunata sapalla ruraspaka. Nispaka, Jesuspagma kaillaiaspa, nirka:

—Taita turi, ¿manachu llakingi, nukapa ñaña kai tukui ima rurangapa nukallata saki-wagta? Nipuai aidawachu.

⁴¹ Iaia Jesuska ainirka:

—Kam Marta, achka ruraikuna iukaspaka, iapa llakispa iuiiakunawami puririkungi.

⁴² Nuka niikimi: sugllami tukuiunamanda mas ministidu ka. Chi mas ministiskatami María agllarka. Pai chasa agllaskataka, ñi pipas mana kichungapa kankunachu.

11

Imasa Taita Diusta mañangapa chaiagta

¹ Suura Jesús, Taita Dioswa rimanakurka. Rimanakui puchukauraka, sug paita katiraiag nirka:

—Taita waugki, nukanchita Taita Diusta mañangapa iachachii; imasami Juan Bautista, paita katiraiagkunata mañangapa iachachirka: chasa.

² Chiura, Jesuska nirka:

—Kamkuna Taita Diusta mañanakuura, kasa ningichi:

Nukanchipa atun Taita:

kam tukuipi mas alli kagta tukuikuna nisunchi.

Nukanchiwa samui, iaia kangapa.

³ Tukui punchakuna, tanda ministiska nukanchita karamungi.

⁴ Nukanchi ima pandariskakunata pasinsiai.

Chasallata nukanchipas, sugkuna ima llakichiskakunata pasinsianchimi.

Mana sakii, nukanchi mana alli iuiaikunata iuianakungapa.

⁵ Kasapasmi Jesús nirka:

—Kasa iuiarisunchi. Maikan iacharidupura, chaugpi tuta paipagma rispa, mañakugrintra: “Waugki, kimsa tanda mañachiwai. ⁶ Kunauritallami sug waugki, karunigmanda chaiamuwarka. Nuka, ñi imapas mana iukanichu, paita karangapa”.

⁷ —Sugka, ukumandalla ainintra: “Mana killachiwai. Pungukunapas, suma wichkaskami kapuá. Nukapa wambrakunawantami ña sirinakunchi. Chimandami mana pudini, ataripa, kamta mañachingapa”.

⁸ —Iuiarisunchi: maituku iacharidu kagmandalla, mana ataripa kanchu. Niikichitami: “Mana mas killachiwachu” iuiaspami tukui ima mañakuskata kuangapa ka.

⁹ —Chimanda niikichitami: Taita Diusta mañagpika, karamungapami ka. Paita maskagpika, taringapami kangichi. Pungu takachigrigpika, kamkunata paskapungapami ka.

¹⁰ Maikanpas chasa mañagpika, chaskingapami ka. Maikanpas maskagpika, taringapami ka. Maikan pungu takachigrigpika, iaikuchingapami ka.

¹¹ —Sug wambra paipa taitata chalwa mañakugpika, ¿kulibrachu karantra? ¹² Chasallata, sug wibus mañakugpika, ¿chini kukuchu karantra? Manima. ¹³ Kamkuna, mana alli kaspapas, kamkunapa wambrakunata suma imapas karangichi. Nigpika kamkunapa Taita suma luarpi kagka, ¿imawantak mana Santu Ispirituta karamunga, maikan suma mañagpika?

Jesusta, iaia kukupa iachaiwa kagta juchachinakuskamanda

¹⁴ Jesús, kuku wairata sug runamanda llugsichikurka. Chi runata, kuku waira mana rimangapa ruragsamuska karka. Chi kuku waira llugsichii tukuuraka, chi runa allilla rimagsamurka. Chasa kawaspaka, achka chipi kagkuna iapa ujnarrirakuna. ¹⁵ Maikanakuna nirkakuna:

—Chi, Beelzebú suti iaia kukupa iachaiwami kuku wairakunata llugsichiku—. ¹⁶ Ikuti sugkunaka, Jesusta mañanakurka, mana imaurapas kawaskasina awa luarmanda kawachichu; chasaka, paimanda iachangapa, sutipa Taita Dios kachamuska kagta.

¹⁷ Paikuna ima iuianakuskata iachaspaka, Jesuska nirkakunata:

—Sug alpapi mandagpura piñachinakuspa makanakuspalla kaugsanakugpika, tukuimi waglliri. Sug wasipi piñanakuspalla kaugsanakugpika, mana allilla kangapa kanchu, sumaglla sugllapi kaugsanakungapa. ¹⁸ Chasallata iaia kukuwa kagkuna sugma sugma tukugpikunaka, ¿manachu paipura mandai chiuralla puchukarintra? Kamkuna nukamanda ninakungichi: “Beelzebupa iachaiwami kuku wairakunata llugsichiku”; chimandami chasa ninakuikichita.

¹⁹ —Beelzebupa iachaiwa nuka kuku wairakunata llugsichikugpika, kampurakunaka, ¿pipa iachaiwatak llugsichinkuna? Pai kikinkunami kawachingapa kankuna, imasa kamkuna mana allilla nukamanda iuiarispa ninakugta. ²⁰ Taita Diospa iapa iachaiwa nuka kuku wairakunata llugsichikugpika, sutipami Diospa suma mandai ña kamkunapagma chaimurka.

²¹ —Sug wapu runa, chunta makana charispa, paipa wasita kawakugpika, tukui ima wakachiraiaskami mana chinganga. ²² Ikuti paimanda sug mas wapu runa chaiagrigpika, binsiimi tukunga. Binsispaka, makanata i ima charikuskatami kichunga. Ukupi tukui ima tiaskata sisaspami ringa.

²³ —Maikanpas mana nukawa suma iuiaiwa kagkuna, nukata piñawagmi kankuna. Chasallata maikanpas nukawa mana suma tandachigkuna, tukuimi susuripuungapa kankunata.

²⁴ —Maikan runamanda kuku waira llugsichii tukuskaka, tusta alpa kaskapi samaringapami maskaspa purirka. Ni maipi mana samaringapa tarispaka, iuiarirkami: “Maimandami nuka llugsimurkani: chimallatami kutingapa kani”. ²⁵ Chi runapagma kutispa ikuti iaikugriura, uku suma pichaska i allichiskasinami tarigrirka. ²⁶ Chasa kawaspaka, kanchis kuku wairakuna paimanda mas jiru ruradurkunata pusangapa rirka. Chi runapi iaikugrispa, chi kukukuna kaugsaimi kallarirkakuna. Chasaka chi runa, ñugpamandapas mas jiru mana allillami tukuipi tukurka.

²⁷ Jesús chasa nikunkamaka, chipi kagpura sug warmi, kaparispa, nirka:

—Maikan warmi kamta iukagsamuska chuchuchispa wiñachig, Taita Diospa iapa kuiaskami ka.

²⁸ Jesuska nirka:

—Chasapaka, Taita Dios ima rimakuskata suma uiaspa ruragkunami paipa mas iapa kuiaska kankuna.

Mana kawaskasina kawachimui, Jesusta mañanakuskamanda

²⁹ Jesuspagma tandarispamirai apanakuura, Jesús nirka:

—Kunauramanda runakuna, mana allilla ruraspa kaugsanakugmi kangichi. Mañawanakungichi: “Mana kawaskasina kawachimui”. Ñi imapas mana kamkuna munaskasina kawangapa kangichichu. Ñugpamanda Santu Ispirituwa rimag Jonás suti imasami pasarka: chasallata kawarillami kawangapa kangichi. ³⁰ Imasami Jonás, Nínive puiblupi kaugsanakuskata iuiachispa kawarirka: chasallatami kai Runa Tukuskapas, kunaauramanda runakunata iuiachispa kawaringapa ka.

³¹ —Taita Dios justisiai rurangapa puncha chaiauraka, Chaugpuncha suti alpata mandag warmika saiarispami kunaauramanda runakunata ningapa kankunata: “Mana allilla ruragkunami kangichi”. Ñugpata chi warmi, iapa karu alpamandami samurka, atun mandag Salomonpa iapa iachaiwa rimakuskata uangapa. Kai rimakugka, Salomonmandapas mas iachami ka.

³² —Chasallata, Taita Dios justisiai rurangapa puncha chaiaura, Níneve puiblumanda kagkunapas saiarispami kunaauramanda runakunata ningapa kankunata: “Mana allilla ruragkunami kangichi”. Chi Nínevemanda runakuna, Jonás ima willaskata uiaspaka, alli ruraikunamami tigrarkakuna. Kai rimakugka, Jonasmandapas mas iachami ka.

Ñawi, kuirpupi punchaiachigsinamanda

³³ —Ñi pipas mana bila sindichinkangichichu, pakallapi u kawitu ukuma churangapa. Awapimi churangapa kangichi, maikan iaikugkunata punchaiachingapa. ³⁴ Kamkunapa ñawikuna, kuirpupi punchaiachigsinami kankuna. Imatapas alli iuiiwa kawagpika, kamkunapa kuirpupas suma punchaiagsinami kangapa ka. Ikuti mana alli iuiiwa kawagpika, kamkunapa kuirpupas iana tutapi kagsinami kangapa ka. ³⁵ Chimandami niikichita: ¡ujalallas kamkunapa iuiiwa mana punchapisina kachu! ³⁶ Kamkunapa kuirpupi imapipas mana iana tutapisina kagpika, suma punchaiagsinami kangapa kangichi; imasami bila sindi punchaiachi: chasa.

Judú taitakunata, Jesús piñaskamanda

³⁷ Jesús rimai puchukauramanda, sug fariseo runa paita kunbidarka, paipa wasipi mikugringapa. Chaiaagripalla, Jesús tiarigrirka mikugringapa. ³⁸ Mana maki maillarispalla mikui kallarirka; ñugpamandakuna imasa iachachiskasina, manima. Chasa kawaspaka, chi fariseo ujnarirka. ³⁹ Chiura laia Jesuska, paita nirka:

—Uiawai. Kam fariseokuna, kuashag i platuta awallallami maillingichi. Ikuti kamkunapa iuiiwa ukumaka sugkunapata iapa munarispam i sisarispam kaugsagkunami kangichi. ⁴⁰ Kamkuna, mana alli iuiiagkunami kangichi. Taita Dios awalla kawari kuirputa rurag, ¿manachu ukumapas rurarka? ⁴¹ Chimanda, suma iuiiwa limusna karangichi. Chasa ruragpika, tukui maillaskasinami niraiankangichi.

⁴² —¡Ai, kam fariseokuna! Minta, ruda i tukui iuiu mikuikunapas pallaskakunamanda chungapika, sugllami Taita Diusta karangichi. Chasa karaspapas, kam kikinkuna kungariskami kangichi, sugkunata imasa chaiaskasina allilla rurangapa i Taita Diusta suma kuiaspa kaugsangapa. Chunga pallaskamanda sug karangapa mana sakispalla, iukangichimi chi sug atun mandaikunatapas allilla ruraspa kaugsangkuna.

⁴³ —¡Ai, kam fariseokuna! Tandariduru wasikunapi munangichimi, atun taitakuna tiariduru ñugpa ladu tiarigringapa. Kallipi sugkunawa tupanakuskapi munangichimi, iapa suma kuiiwa kumurispam, “Puangi, taita waugki” nukata niwachukuna.

⁴⁴ —¡Ai, kamkuna! Wañuska pambaraiaska mana kawarigsinami kangichi. Chi awalla saruspa ialigpikunapas, chi ukupi ima niskata mana iachankunachu.

⁴⁵ Jesús chasa niuraka, Moisés ima niskata sug iachachig taitaka nirka:

—Kam iachachig taita, chasa nispaka, nukanchitapaschar piñakungi.

⁴⁶ Chiura, Jesuska nirka:

—¡Ai, kamkuna Moisés ima niskata iachachig taitakunapas! Kamkuna, mana pudiringasina llasa aparichigsinami runakunata iachachingichi, paikuna imasa niskasina ruraspa kaugsangapa. Chasa iachachispapas, kam kikinkunaka mana munangichichu, imasa iachachinakuskasina ruraspa kaugsangapa.

⁴⁷ —¡Ai, kamkuna! Ñugpamanda Santu Ispirituwa rimagkunata kamkunapa ñugpamandakuna wañuchiskata iuiaringapa, kamkunaka suma atun bubidakuna ruraspami

kangichi. ⁴⁸ Chasa ruraspaka, kawachingichimi, imasa kamkunapa ñugpamandakuna ruraskata, kamkunapas chasallata ruragkuna kagta. Paikuna wañuchirkakuna; kamkunaka, suma atun bubidakunami rurangichi, iuiaringapaglla.

⁴⁹ —Chimandami Taita Dios, paipa iachaiwa nirka:

Santu Ispirituwa rimagkunata

i nuka kikin agllaska runakunatami kachamungapa kani.

Maikankunataka wañuchingapami kankuna.

Sugkunataka mitikuchingapami kankuna.

⁵⁰ Chimandami, kai alpata wiñachiskauramandata tukui ñugpamanda Santu Ispirituwa rimagkunata wañuchiskakunamanda, kunaoramanda runakuna iapa achka llakii iukan-gapa kangichi. ⁵¹ Kasami niikichita: Abel suti alli runa musuglla wañuchii tukuska-uramandata, sugka, Zakarias suti, Taita Dioswa iuiaridiru uku i altarwa chaugpipi wañuchii tukuskaurakama; maituku wañuchii tukuskakunamandapasmi kunaoramanda runakuna iapa achka llakii iukan-gapa kangichi.

⁵² —¡Ai, kam Moisés ima niskata iachachig taitakuna! Iachaita kamkunapa iuiaipimi pakadur kangichi. Kam kikinkuna, nukamanda Alli Willaita mana munangichichu iachangapa. Sugkuna iachaikungapa munanakuskatapas arkagsinami ruranakungichi.

⁵³ Jesús chimanda llugsiuraka, Moisés ima niskata iachachig taitakuna i fariseokunaka, iapa rabiari spa, paipa achkapimi tapuchii kallarrirkakuna; ⁵⁴ chasaka, pai ainiskata uiaspa, imapipas pandarigpika, justisiakunata willagringapa.

12

Jesús, paipa katiraiagkunata suma iachachiskamanda

¹ Chikamaka, achka waranga runakuna tandarirkakuna, sarunakuiwanta. Chiura Jesu-ska, paipa katiraiagkunata kasami nirka:

—Fariseokunapa libadurasina iuiaita, ¡ujalallapas iuianakungichi! Paikuna, sungu awa-llami rimankuna. ² Maikan pakalla iuiaspa rimaskaka, imaurapasmi iachari. Chasallata, ima pakalla wakachiskapasmi imaurapas kawarigsamú. ³ Tukui ima kamkuna pakalla iana tutapi rimaskapas, punchapimi iacharigsamungapa ka. Chasallata, maituku wasi ukuma pungu wichkarispa rimanakugpipas, wasi awamandami sinchi kaparii uiaringapa ka.

⁴ —Kamkuna nukapa iacharidu kuiaska kagmanda, kasami niikichita: kamkunapa kuir-puta wañuchigpika, mana manchangichi. Nispaka, mana imapas rurangapa pudingapa kankunachu. ⁵ Willasakichita, pitami manchangapa chaiá: wañuura, Taita Dios diltudupa ninama sitangapa kagtami manchangapa chaiá. Ari, niikichitami: paipa manchangichi.

⁶ —¿Manachu pichka pisku, iskai uchulla kulkimandalla katurí? Chasa kagpipas, Taita Dios paikunamanda mana kungarinchu. ⁷ Kamkunapa umamanda agchapas, Taita Dios kuintaskami iuká. Chimanda, kamkuna mana manchaspalla kaugsai chi. Maituku achka piskukunamandapas mas balimi kangichi.

⁸ —Kasapasmi niikichita: nukamanda maikanpas, sugkunapa ñawipi willachu: “Paipa rigsini mi”: kai Runa Tukuskapas, chi runamandaka Diospa anjilkunapa ñawipi willasami: “Paipa rigsini mi”. ⁹ Ikuti maikanpas, sugkunapa ñawipi nukamanda nichu: “Paipa mana rigsini chu”: nukapas, paimandaka Diospa anjilkunapa ñawipi nisami: “Paipa mana rigsini chu”.

¹⁰ —Maikan kai Runa Tukuskamanda kuntra rimagkunamanda pasinsiaimi tia. Chasa kagpipas, maikan Santu Ispiritumanda kamiskamandaka mana pasinsiai tiangapa kanchu.

¹¹ —Tandaridiru wasikunama, justisia i mandagkunapagma kamkunata apaura, mana iapa iuianakungichi: “¿Imasami paikunata ainini u willani?”. ¹² Ainingapa chaiaura, Santu Ispiritu kikinmi iuiachingapa ka.

Iapa iukag kikinmandalla micharigmanda

¹³ Chipi kagpura sug runa, Jesusta nirka:

—Iachachig taita, nukapa waugkita nipuai, nukapa atunkuna sakiskata chaugpi karawachu.

¹⁴ Jesuska ainirka:

—Waugki, ñi pipas mana churawarkachu, kamkunapa justisia kangapa, ima kamkunata sakiskata chaugpingapa.

¹⁵ Chasa nispaka, chipi kagkunata nirka:

—¡Ujalallapas iapa iukag kikinmandalla micharispa kangichi! Kai alpapi maituku iukag-pas, paipa kaugsaita mana pudinchu diltudupa chariringapa.

¹⁶ Nispaka, chipi kagkunata iui ai apingasina suma parlarka, kasa nispas:

—Sug runa iapa iukagsi tiarka. Chi runapa alpakunapi, iapa achka mikuikuna pallarka. ¹⁷ Nispaka iuiarirka: “¿Imasatak rurasa? Kunaura pallaripuaskata, ¿maipitak wakachisa?”.

¹⁸ —Nispaka iuiarirka: “Ñami iachani ima rurangapa chaiawakugta. Pallaskakuna wakashiduru wasikunata waglichispa, sug mas atunkunami saiachingapa kani. Chikunapimi tukui ima pallariska i tukui ima tiapuaskata wakachisa. ¹⁹ Nispaka, nuka kikin nirisami: ‘Kunaura, ñami achka watakunapa achka wakachiska iukangi. Chimandaka, samaspa, mikuspa, upiaspa, allilla sumagllami chisiankangi’.”

²⁰ —Chasa iuiarikunkamaka, Taita Dioska nirka: “Ja, kam mana allilla iuiaiiug. Kunantutallami kamba almata mañangapa kaiki. Nigpika chi wakachiskaka, ¿pimandasik kanga?”.

²¹ —Chasa, maikanpas kikinmandalla wakachigka, Diospa ñawipi ñi ima mana iukag niraianchu.

Taita Dios, paipa wambrakunamanda mana kungarinchu

²² Chasa nispaka, paita katiraiagkunata nirka:

—Chimandami kasa niikichita: mana iapa iuiarinakungichi: “¿Imatak mikusunchi, nukanchi kaugsankama?” u “¿Ima katangatak churarisunchi?”. ²³ Kamba kaugsaika, mikuikunamanda masmi ka. Chasallata kamba kuirpupas, katangamanda masmi ka. ²⁴ Chiwakukunamanda iuiariichi. Paikunaka mana tarpunkunachu. Mikui pallaspa, wakashiduru trujapas mana iukankunachu. Chasa kagpipas, Taita Dioska ñi ima mana pisichinkunatachu. Kamkunaka, piskukunamanda mas balimi kangichi.

²⁵ —¿Pikunatak, maituku iuiarisppas, sug palmullapas awa wiñai pudingapa kangichi? Ñi pipas manima. ²⁶ Chi uchulla ruraita mana pudispaka, ¿imapatk sug imakunamanda iapa iuiarinakungichi?

²⁷ —Kawaichi imasa liriu tugtukuna chagrapi suma wiñariskakunata. Iuiariichi: pai-kuna mana puchkaspa awankunachu. Ñi ima mana rurankunachu. Kasami niikichita: ñi atun mandag Salomón, pai tukui iapa suma katanga churarisppapas, chi tugtukunamanda mas suma mana kawarirkachu. ²⁸ Ugsa, kuna puncha chagrapi suma kaskata kaiandi rupachingapa kagta, Taita Dios chasa suma kawá. Kamkunataka, ¿imawantak mana mas sumaglla kawanga? Kamkuna mana allilla Taita Diosmanda iuiarispa kagkuna, paita mas sumaglla iuiariichi.

²⁹ —Chimanda, mana iapa maskaspa purinakungichi, ima mikungapa i upiangapa iuiarispalla. ³⁰ Kai alpamandalla iuiaiwa kagkunami chasa maskaspa kaugsanakú. Kamkuna tukui ima ministiskakunamandaka, kamkunapa Taita Dios ñami iachá. ³¹ Kamkuna suma iuiarispa kangichi, Taita Dios imasa mandaskasina kaugsangapa. Chasa kagpikunaka, kamkunata tukui ima ministiskakunatami karamunga.

³² —Nukapa kuiaska asllita ubijakunasina kaspapas, mana manchaspalla kaichi. Kamkunapa Taita Dios munakumi, kamkunapas pai suma mandakuskapi kagsamuchukuna. ³³ Kamkuna ima iukaskata lim katuspa, ministiskakunata karaichi. Chasa karaspaka, suma luarpi kulki imapas mana puchukaringasina mana ismug wakachidirupisina wakashiskami iukankangichi. Chi luarpi, sisaikuna mana tiangapa kanchu. Ñi burbujukunapas mana waglichispa mikungapa kankunachu. ³⁴ Kamkuna maipi wakachiskapimi kamkunapa iuiaita churaska kangichi: kai luarpi u sug luarpi.

“Allichiriskasina suianakungichi”

³⁵ —Kamkuna, suma chumbilliska i bila sindichiska, allichiriskasina suianakungichi. ³⁶ Imasa piunkuna, patrun kasaraimanda paipa wasima chaiagsamukuura, pungupi kaiagglapika, paskangapa suianakugsina kangichi. ³⁷ Piunkuna chasa rigcharaiaskata tarigsamuspaka, chi patrun sumagllami kawagsamunga. Kasami nuka niikichita: chi patrunka, sumaglla tiarichispa, kikinmi mikui karangapa kankunata. ³⁸ Chaugpi tuta u pakaringama chaiamuspa, chi piunkuna rigcharaiaskata tarigsamugpika, paikuna iapa allimi pasangapa kankuna.

³⁹ —Kasa iachaichi: wasi duiñu iachantra, ima ura sisai samungapa kagta. Iachaspaka, mana puñurispallachar rigcharaiantra, paipa wasipi mana sisai iaikungapa. ⁴⁰ Chasallata kamkunapas, allichiriskasina suianakungichi. Kamkuna mana iuianakuurami kai Runa Tukuska chaiamungapa ka.

⁴¹ Chiura, Pedro tapurka:

—Taita waugki, ¿chi parluta nukanchillatachu ubi tukuikunatachu nikungi?

⁴² Chiura, Iaia Jesuska ainirka:

—Maikan tukuipi alli rurag runa kagtami paipa patrun sakirka, ima wasipi kawapungapa, sug piunkunata mikui karaspa, pai kikin chaiamunkama. ⁴³ Patrun ikuti chaiagsamuspa, imasa niskasina allilla rurakugta kawaspaka, chi runata sumagllami, “Pai

Sifur” nispa, kuiangapa ka. ⁴⁴ Chimandami paita maituku ima iukaskatapas mingaspa sakingapa ka.

⁴⁵ —Ikuti chi piun, kasa iuiarispa nintra: “Nukapa patrun, mana utka chaimungapa ka”. Chasa nispaka, sug piunkunata, kari i warmikunata makai kallarintra. Kikinka, mikuspa i machagta upiaspa kantra. ⁴⁶ Chi runa kungaska mana iuiakuurami patrunka, chaiamuspa, shachigsamungapa ka. Chasa shachigsamuspa, paita sinchimi asutingapa ka. Nispaka kachangami, pai ima niskata mana uiagkunawa justisiai tukungapa.

⁴⁷ —Chi piun, ima patrun munakuskasina allilla iachaspapas, ima tiaskakunata mana allichispa, ñi ima munakuskasina mana ruraskamanda, paita achkami asutingapa ka. ⁴⁸ Maikan piun, mana allilla iachaspalla pandarigpika, mailla asutimi chaiangapa ka. Maikanta achka karaskata chasallatami achka mañanga. Maikanta achka mingaskataka mas achkami mañangapa ka.

Jesús samugmanda, makanakugsinami tiangapa ka

⁴⁹ —Nuka samurkanimi, kai alpapi nina sindichigsina rurangapa. Munakunimi, ña sindi rupakugsina kantra. ⁵⁰ Nukata chaiawakumi, wañuchii tukungapa. * Manara chaiawagpi, iapa llakiiwami kani.

⁵¹ —¿Kamkuna iuiangichichu nuka kai alpama samugta, tukui sumaglla kaugsanakungapa? Niikichitami: manima. Nuka samugmanda, tukuima chaupinakugsinami tiangapa ka. ⁵² Chasa kunaoramanda, sug wasipi pichkakuna kaugsanakuskapika, iskaima tukuspa, kimsakunawa iskaikunawami mana allilla kaugsanakungapa ka, nuka samugmanda. ⁵³ Taitandiwa wambrandiwa, mamandiwa warmi wambrandiwa, suigrandiwa nuirandiwa, chasallata mana allillami kaugsanakungapa kankuna.

Chi punchakuna ima niraiaska kagta, Jesús niskamanda

⁵⁴ Kasapasmi Jesús, tukui chipi kagkunata nirka:

—Indi chingaridirunigmanda puii kawarigpika, chiurallami ningichi: “Tamiangapami ka”. I sutipa. ⁵⁵ Chasallata, alli makinigmanda sinchi wairamugpika, ningichimi: “Iapami indi ruparingapa ka”. I sutipa. ⁵⁶ Kamkuna, sungu awalla rimagkunami kangichi. Imasa awapi i alpapi kawariskakunata kawaspaka, iachangichimi ninga, punchakuna imasa kangapa kagta. Nigpika, kai punchakuna nuka ima rurakuskata kawaspaka, ¿imapatat mana iuiaringichi ima niraiagta?

⁵⁷ —¿Imapatat kam kikinkuna mana iuiaringichi, ima allilla u mana allilla kagta? ⁵⁸ Maikan kamta dimandaspa, justisiapagma pusanakugpika, paita sumaglla rimangi, manara justisiapagma chaiachigripi. Mana kagpika chaiachigriura, justisiaka kamta alwasilkunapa makipimi sakinga. Chiura alwasilkunaka, kamta karsilpimi wichkanga. ⁵⁹ Kasami niiki: chimanda mana llugsingapa kangichu, tukui kulki manara kutichinkama.

13

Allilla ruraikunama tigrangapa, Jesús kaiaskamanda

¹ Jesús chasa iachachikugllapika, sug runakuna, chaispa, paita willai kallarirkakuna:

—Galilea alpamanda sug runakuna, Diuspa atun wasipi animalkunata rupachinakuura, chi runakunataka mandag Pilatos wañuchichispa, chi animalkunapa iawarwami chapuchirka.

² Jesuska ainirkakunata:

—¿Iuianakungichichu: chi Galileamandakuna, tukuikunamanda mas pandarigkuna kaskamandachar chasa wañuchirkakunata? ³ Niikichitami: manima. Kamkunapas, allilla ruraikunama mana tigrapika, tukuikunami puchukaringapa kangichi.

⁴ —Chasallata, chi chungu pusag runakuna, Siloepi sug askurinti iapa awa wasi paikunapa awalla urmaura, wañuskakuna: ¿iuianakungichichu: chikuna, tukui Jerusalenpi kaugsanakuskamandapas mas pandarigkunachar karkakuna? ⁵ Niikichitami: manima. Kamkunapas, allilla ruraikunama mana tigrapika, tukuikunami puchukaringapa kangichi.

Igus sachamanda parlu

⁶ Chasa nispaka, chipi kagkunata iui ai apingasina suma parlarka, kasa nispa:

—Sug runa, ubas sachakuna tiaskapi sug igus sacha tarpuskasi iukarka. Unaipika rirka kawangapa: ¿igus ñachu tiarirka? Chiura, manara tiariska karka. ⁷ Chimanda, chagra kawagta nirka: “Kawamui. Ñami kimsa wata samukuni, kai sachapi igus tianchu kawangapa. Ñi imapas mana tarigsamunichu. Kuchuilla. ¿Imapatat kai sacha, alpapi ianga saiakunga?”.

* 12:50 “Sug baugtismuta chaskingapa”, wañuchii tukungapami niraiá.

⁸ –Chagra kawagka ainirka: “Taita waugki, kai watalla sakiwai. Nuka, alpata ñutuchispaka, suma majada churasami; ⁹ chiwanka, kawangapa: ¿watapika igus tiarinchu? Mana tiarigpika, kuchungi”.

Sug iapa wasa kumuridu warmita, warda puncha Jesús aliachiskamanda

¹⁰ Sug warda puncha Jesús, sug tandariduru wasipi iachachikurka. ¹¹ Chipi karka sug warmi ña chungu pusag wata kuku waira iaikuspa unguilla. Chi warmi, wasa kumuridu kaspas, mana pudirka, ñi imaura allilla diricharingapa. ¹² Paita kawaspaka, Jesuska kaiaspas, nirka:

–Kam warmi, ñami kamba ungui anchuriska kangi.

¹³ Nispaka, chi warmita paipa maki churarka. Churagllapi, chi warmika suma allilla saiarispa diricharirka. Nispaka, Taita Diusta nii kallariirka: “Kam, iapa suma atunmi kangi”.

¹⁴ Chasa warda puncha aliachigta kawaspas, chi tandariduru wasimanda taitaka, Jesuswa piñarispa, tukui chipi kagkunata nirka:

–¿Manachu sugta puncha iukanchi, trabajangapa? Chi punchakuna samungichi, ambichiringapa; warda punchaka, mana.

¹⁵ Chasa niura, Iaia Jesuska nirka:

–Kamkuna, sungu awalla rimagkunami kangichi. Kamkunapa wagra u buru wataraiaskakunata, ¿manachu paskangichi, iaku upiachigringapa, warda puncha kagpipas? ¹⁶ Kai warmika, ñugpamanda taita Abrahampa iawarmi ka. Paita iaia kukumi chungu pusag wata chi unguiwa wataskasina charikurka. Warda puncha kagmandaka, ¿manachu pudiri, paita unguima wataskata aliachinga?

¹⁷ Jesús chasa niuraka, tukui paiwa mana alli iuiawi kagkuna iapami pingai pasarkakuna. Ikuti sugkunaka, Jesús chi suma allilla ruraskakunata kawaspas, iapa kuntintarirkakuna.

Mustasa simillamanda parlu

¹⁸ Kasapasmi Jesús nirka:

–Diuspa suma mandai, ¿imasatak rigchá? Kasa nintrani. ¹⁹ Sug runa, paipa chagrapi mustasa similla tarpugsinami niraiá. Ña wiñai puchukauraka, sachami tukú. Chasapika piskukunapas, malkikunapi sumagllami wasichigsamunkuna.

Libaduramanda parlu

²⁰ Kasapasmi nirka:

–Diuspa suma mandai, ¿ima kagsinatak nintrani? ²¹ Imasami sug warmi, kimsa tasa arinata libadurawa chapuuraka, suma timbuspa, miraspa achkaiagsamú: chasami niraiá.

Kichki pungusinamanda

²² Jesús Jerusalenma rikuspa, atun i uchulla puiblukunata iachachispa ialirka. ²³ Rikuskapika, sug runa paita tapurka:

–Taita waugki, ¿maillakunallachu kispiringakuna?

Chiura, paika ainirka:

²⁴ –Suma luarma iaikugringapa, iuiaringichi kichki pungupisina ialingapa. Kasami niikichita: achkakuna, iaikungapa munanakugpipas, mana pudingapa kankunachu.

²⁵ –Kamkuna kanchapi kankama, wasi duiñu pungu wichkagpika, kamkuna kaiaspas, ninkangichimi: “Taita waugki, nukanchimanda pungu paskapuai”.

–Paika ainingami: “Kamkunata mana rigsikichitachu. ¿Maimandakunachar kangichi?”.

²⁶ –Chiura, kamkuna ninkangichimi: “¿Manachu iuiangi? Kamwami mikurkanchi i upiarkanchi. Nukanchipa puiblumanda kallikunapimi kam iachachirkangi”.

²⁷ –Paika ningami: “Ikutimi niikichita: mana rigsikichitachu. ¿Maimandakunachar kangichi? Tukui kamkuna mana allilla ruragkuna, nukapa ñawimanda anchuriichi”.

²⁸ –Ñugpamanda Abraham, Isaak i Jakob suti taitakuna i Santu Ispirituwa tukui rimagkuna, sug luarpi Dios suma mandakuskapimi kangapa kankuna. Chasa kawaspaka, kamkuna kanchama sitaska kagkuna, iapa llakispa, wakaspas, kiru mukuspami kangapa kangichi. ²⁹ Indi llugsidirunigmanda i chingaridirunigmanda, alli maki ladunigmanda i lluki maki ladunigmanda, tukuinigmandami ringapa kankuna, Dios suma mandakuskapi tiarispas mikungapa. ³⁰ Chiura sugkuna kunaura kati niraiaskakuna, ñugpa ladumami tukungapa kankuna. Ikuti sugkuna kunaura ñugpa niraiaskakunaka, kati ladumami tukungapa kankuna.

Jerusalén puiblumanda, Jesús wakaskamanda

³¹ Chiurallatata sug fariseokuna, Jesuspagma kaillaiagrispa, nirkakuna:

—Kaimanda llugsispa, utka riilla. Mandag Herodes, kamta wañuchingapami munaku.

³² Jesuska ainirka:

—Ianga kawaichi. Chi miski simi iukaska sungu awalla rimagta kasa nigriichi: “Kuna puncha kaiandikunapas, kuku wairakunata llugsichinimi; unugkunatapas ambinimi. Kimsa punchakunaka ñami ialinga, nukata ima chaiawakuskata rurangapa”. ³³ Kuna puncha, kaia, sug punchapas chaiawakumi ringapa. Santu Ispirituwa rimagtaka mana chaianchu, Jerusalén mana kaskapi wañuchii tukungapa.

³⁴ —¡Ai, Jerusalén, Jerusalem! Kamkuna, Santu Ispirituwa rimagkunata wañuchigmi kangichi. Kamkunapagma kachamuska runakunatami rumiwa piaspa wañuchingichi. Imasami atawalpa, paipa pullitukunata kunuchingapa kaiaspa ugllari: chasallatami nukapas, achka biaji kaiaspa, tandachingapa munanakurkaikichita. Chasa munakugpipas, kamkunaka mana nukata munawarkangichichu. ³⁵ Chimandami kamkunapa wasikuna, sitaska tukugsamungapa kankuna. Kasami niikichita: kunaauramanda mana kawawangapa kangichichu, imaura kamkuna kasa niwankama: “Atun Taita Dios kachamuskami samukungi. Paipa iapa kuiaskami kam kang’i”.

14

Warda puncha, pungii ungui iukaspata tukui kuirpu pungiskata, Jesús aliachiskamanda

¹ Sug warda puncha Jesuska, fariseokunamanda taitapa wasima rirka, mikungapa. Chi-pika fariseokuna, mana allilla iuiaiwa paita chapanakurka. ² Jesuspa ñugpa ladu, sug runa, pungii ungui iukaspata, tukui kuirpu pungiskami tiakurka. ³ Chiura Jesuska, Moisés ima nis-kata iachachig taitakunata i fariseokunata tapurka:

—Warda punchapas unugkunata aliachingapa, ¿pudirinchu u mana?

⁴ Chiura, upalla tianakurka. Nigpi Jesuska, unug runata maki churaspa, ambirka. Nis-paka, paipagma kacharka. ⁵ Kachaspaka, chipi kagkunata nirka:

—Kamkunapa wambra u wagra sanjapi urmaggpika, ¿manachu warda puncha kagpipas chiuralla surkunrangichi?

⁶ Chiura, ñi pipas mana ainingapa pudirkakuna.

Mana atunsina iuiaiwa tukungapa, Jesús iachachiskamanda

⁷ Chi mikungapa chaiagrighkuna, taitakuna tiaridirukunata agllanakurka tiaringapa. Jesuska, chasa kawaspa, paikunata iuiai apingasina kasami nirka:

⁸ —Maikan kamkunata kasarai mikuima kunbidachukuna: taitakuna tiaridirupi mana tiarigringichi. Chasa tiarigpika, kamkunamanda sug mas atun taita chaimuggpika, ⁹ chi kunbidagka, samuspa, pudinmi kamkunata ninga: “Kai tiaridiruta sakipuai, kai runa tiar-ingapa”. Chiura, kamkunata pingaipami iuiachinga, kati ladu tiarigringapa.

¹⁰ —Kamkunata kunbidachukuna: chiuraka kati ladulla tiarigringichi. Nigpi kunbidagka, samuspa, kamkunata ningami: “Taita waugki, mas ñugpa ladu ialispa tiarii”. Chiuraka, tukui chipi kamkunawa tianakuskapa ñawipi atuniachigsina iuiachimi tukun-kangichi.

¹¹ —Chasallata maikanpas atuniachirispata iuiagta, Taita Dioska uchullaiachingapami ka. Ikuti maikanpas uchullaiaspata iuiaskataka, Taita Dios atuniachingapami ka.

Maikankunata kunbidangapa, Jesús iachachiskamanda

¹² Chasa nis-paka, paita kunbidag runata nirka:

—Mikungapa kunbidangapa chaiaura, mana kaiakungi kamba iacharidukunallata, waugkindikunallata ñi kam kikinpurakunallata; iapa iukag kamba ladu suiu kaugsanakuskatapas mana kunbidakungi. Chasa kunbidagpika, paikunapas, kamta kunbidaspata, kutichingakunami.

¹³ —Chasapaka, mikungapa kunbidangapa chaiaura, kaiangi mana iukagkunata, mana allilla sarungapa i chaki mana kuiuchingapa pudiskakunata; mana ñawi kawagkunatapas kunbidangi. ¹⁴ Paikuna mana kamta kutichingapa pudigmandami Taita Diospa iapa kuiaska kankangi. Allilla iuiaiwa kagpura kaugarii punchami pai, kamta sumaglla kutichinga.

Kunbidaskakuna mana allilla ainigkunamanda parlu

¹⁵ Chasa uiaspaka, sug kunbidaska Jesuswa tianakuskapuraka paita nirka:

—Dius suma mandakuskapi maikan mikug, paipa iapa kuiaskami kangapa ka.

¹⁶ Chiura, Jesuska ainirka:

—Sug runa, suma mikui karangapa kaspaka, achka runakunatasi kunbidarka. ¹⁷ Ña chi mikungapa puncha chaimuuraka, sug lutrinta kacharkasi, tukui kunbidaskakunata nig-ringapa: “Samuichi. Ña tukui allichiskallami tia”.

¹⁸—Chasa willagriuraka, tukuikuna nirkakunasi: “Mana pudingapa kanchichu”. Sug runa nirkasi: “Kunaurallami sug alpa randirkani. Iukanimi kawangapa ringa. Chimanda nipuagarii, pasinsiwachu”.

¹⁹—Sugka nirka: “Kunaurallami pichka paris wagra randirkani. Kawagrisa: ¿imasachar kapuá? Chimanda nipuagarii, pasinsiwachu”.

²⁰—Ikuti sugka nirka: “Kunaurallami kasararkani. Chimandami manima ringapa pudini. Pai Siñur nipuangi”.

²¹—Chi lutrin, kutispaka, tukuikuna imasa ainiskasina mikui karangapa kagta patrunta willagrirka. Chasa uiaspaka, rabiarispa, nirkasi: “Rii puiblu suiu tukui ñambikunama. Tukui ñi ima mana iukaskakunata, mana allilla sarungapa, mana chaki kuiuchingapa pudiskakunata i mana ñawi kawagkunatapas utka pusagrii”.

²²—Chasa ruraspaka, chi runa nirka: “Taita waugki, ñami kam imasa niwaskasina rurarkani. Chasa kagpipas, charami pagtá, mas achka mikugkuna jundachingapa”.

²³—Chiura, patrunka nirkasi: “Ñambi suiu rispa, maikan tupaskakunatapas iaikuchigrii, kai nukapa wasi jundankama. ²⁴ Niikichitami: nuka ñugpa kunbidaska runakuna, ñi pipas kai suma mikuita mana mikungapa kankunachu”.

Cristowa purigkuna imasa sakii iukaskamanda

²⁵ Iapa achka runakuna Jesusta katiraiarkakuna. Paika, tigrarispa, nirkakunata:

²⁶—Maikanpas, nukawa samungapa munaspaka, taitata i mamandita, warmindita, wambrakunata, waugki i panindikunata, kikinpa kaugsaitapas mana sakigsina ruragpika, mana nukata katiraiawag niraianchu. ²⁷ Maikanpas mana krusta markarigsina ruraspaka katiraiawagkunaka, mana nukawa purigmi niraiá.

²⁸—Maikan kamkunapura, atun awa wasi rurangapa munaspaka, manara kallarisipalla, ¿manachu tiarintra, iuiaringapa: maituku kulkiwasik pagtawanga puchukagta rurangapa?

²⁹ Mana chasa iuiarisipalla kallarisipalla, pudinmi mana puchukanga. Nigpika, tukui chasa kawagkuna, asispami ³⁰ ningakuna: “Kai runa, wasi rurai kallarisipaka, mana puchukai pudirkachu”.

³¹—Chasallata maikan mandag, sugnigmanda mandagwa manara wañuchinakungapa llugsispalla, ¿manachu iuiarintra: chungu waranga suldadukunallawachu pagtawanga, sug mandag is kai chungu waranga suldadukuna samunakuskawa wañuchinakungapa?

³² Mana pudingasina kawaspaka, chi sug mandag chara karupi samukugpita, mañangapami kachanga, mana wañuchinakui tiachu.

³³—Chasallata maikan kamkunapurapas, tukui ima iukaskata mana sakigsina ruragpika, mana nukawa purigmi niraiá.

³⁴—Kachi, allillami ka. Kachi wagllirigpika, mana pudiringachu kachiachingapa. ³⁵ Alpa suiu ichangapa, ñi majada alpa muntunariaskapi churangapa ñi imapapas mana balingapa kanchu. Chasataka, sitaimi chaiá. Rinri iukagkuna, nuka niskata uiawaspa, suma iuiaringichi.

15

Ubija chingaskamanda parlu

¹ Mana judíu kagkunamanda kulki chaskigkuna i mana allillata ruragkuna, achkakunami Jesuspagma kaillaianakurka, paita uangapa. ² Chasa kawaspaka, fariseokuna i Moisés ima niskata iachachig taitakuna mana allilla iuiaiwa paimanda ninakurka:

—Chi runa, mana allilla ruragkunata chaskispa, paikunawa sugllapimi mikuku.

³ Jesuska, chipi kagkunata iuiái apingasina suma parlarka, kasa nispa:

⁴—Maikan kamkunapura, patsa ubija iukaspaka, sug ubija chingapugpika, ¿manachu iskun chungu iskunta sakispa, maskai kallarintra, chi ubijata tarinkama? Ari. ⁵ Chi chingaskata tarispaka, iapa kuntintarispa, markaspami apanga. ⁶ Paipa wasima chaiagrispaka, iacharidukunata i ladu suiu kaugsanakuskata kaiaspa, ningami: “Nukawa tukuikuna suma kuntintaripuaichi. Chi ubija chingapuaska, ñami taririwarka”. ⁷ Kasami niikichita: chasallata kagsina iuiarisunchi: iskun chungu iskun allilla ruragkuna mana ministinkunachu, allilla ruraikunama tigragsina tukungapa. Ikuti sug pandarig runa allilla ruraikunama tigramuuraka, paimandami mas suma kuntintarispa iuiaiwa suma luarmanda kawangapa kankuna.

Kuri kulki chingaskamanda parlu

⁸—Chasallata maikan warmi, chungu kuri kulki iukaspaka, sug kulki chingapugpika, ¿manachu bila sindichispa, wasi ukuma suma allimanda pichanga, imaura chingapuskata tarinkama? ⁹ Tarispaka, paipa iacharidukunata i ladu suiu kaugsanakuskata kaiaspami ninga: “Nukawa tukuikuna suma kuntintaripuaichi. Chi kuri kulki chingapuaska, ñami

taririwarka". ¹⁰ Kasami niikichita: chasallata sug pandarig runa allilla ruraikunama tigramuuraka, Diuspa anjilkunapas alli iuiachirispami kawangapa kankuna.

Wambra wasita sakispa, mana allilla ruraima riskamanda parlu

¹¹ Kasapasmi Jesús nirka:

–Sug runa, iskai wambrakunasi iukarka. ¹² Uchulla waugkika, taitata nirka: “Taita, kam ima sakiwangapa kaskata nukata karawai”.

–Chiura taitandi, ima iukaskata paikunata chaugpi chaugpi kararka.

¹³ –Mailla punchakuna ialiuuraka, chi uchulla waugkika, tukui ima karaskata katuspa, kulki tandachispa, sug karu alpamasi rirka. Chipika, mana allilla ruraikunapi tukui kulkita puchukarka.

¹⁴ –Tukui tukuchispa kauraka, chi alpapi iapa iarkai tukugsamurka. Chiura, chi musu-taka iapa iarkai pasai kallarirka. ¹⁵ Chasa kaspaka, sug chimanda runapagma chaiagris-kataka kacharka, kuchikunata mikui karag kangapa. ¹⁶ Chiuraka, diiarkai munakurka, kuchikuna mikunakuskatapas paipa wigsa jundachiringapa. Chasa munakugpipas, ñi pi mana paita sakirkakuna mikungapa.

¹⁷ –Chiuraka iuiarirka: “Nukapa taitapagpi, tukui piunkunami mikunkuna maituku munaska. Ikuti nukaka, diiarkaimi kaipi wañukuni. ¹⁸ Atarispá, risa. Nukapa taitapagma rispa, kasami nigrisa: “Taita Diusmanda i kam taitata mana allilla ruraiwami pandarirkani. ¹⁹ Mana chaiawakunchu, kam nukata: “wambra” niwangapa. Kamba sug lutrintasina kangapa chaskiwai.” ²⁰ Chasa iuiarispá, atarispá, taitapagma rii kallarirka.

–Chara karu chaiagringapa pisikugpita, taitandika, kawaspa, paimanda iapa llakii piarka. Kalpalla rispa, tupagrirka. Uglaspá, kuiaspa mucharka. ²¹ Chiuraka, wambra nirka: “Taita Diusmanda i kam taitata mana allilla ruraiwami pandarirkani. Mana chaiawakunchu, kam nukata: ‘wambra’ niwangapa”.

²² –Taitandika, niskakunata mana uiaspalla, piunkunata nirka: “Utka mas suma katan-gakunata apamuspa, churachipuaichi. Chasallata makipi surtija, chakikunapi churari-dirupas churachipuaichi. ²³ Maikan mas wira wagrata apigrispa, wañuchiichi. Mikuspa, tukuikuna iapa suma kuntintarisunchi. ²⁴ Kai nukapa wambraka, ña wañuskasina kaspapasmi kaugsariska tukupuarka. Chingaskasina kaspapasmi taririwarka”. Chiura, kusikui atun punchasina ialichii kallarirkakuna.

²⁵ –Atun waugkika, chagrapi kaspá, wasima kutimuspa chaiagsamukuura, musika uiachinakuskata i bailanakuskata uiarka. ²⁶ Sug piunta kaiaspaka, tapurka: “¿Ima atun punchatak kaipi ialichinakú?”.

²⁷ –Chiura, chi runa ainirka: “Kamba waugkimi kunaúra chaiamurka, allilla, mana ungu. Chimandami kamba taita kacharka, suma wira wagrata wañuchispa, mikuspa, kuntintaringapakuna”.

²⁸ –Chasa uiaspaka atun waugkindika, rabiariispa, mana ukuma iaikungapa muna-kurka. Chimanda taitandika, llugsispa, nirka: “Iaikumui”.

²⁹ –Paika ainirka: “Taita, uiawai. Maituku watakuna kam ima niwaskata imaurapas allilla ruraspalla kaugsakuni. Chasa kagpipas, nukata ñi imaurapas mana karawangichu ñi sug kuchillapas,* nuka iacharidukunawa mikuspa, kuntintaringapa. ³⁰ Kunaúra ñasi kamba wambrakar chaiamupurkangi, chi mana alli warmikunawa kam kulki karaskata tukuita puchukaspa. Paimandakar maikan mas wira wagratasi wañuchirkangi mikungapa”.

³¹ –Chasa uiaspa, taitandika nirka: “Nukapa wambritu, kamka imaurapas nukallawami kangi. Tukui nuka ima iukaskaka, kamballami ka. ³² Chasa kagpipas, kunaúra nukanachita chaiakumi, alli iuiachirispá, kusikuchii atun punchasina ialichingapa. Kamba waugki, ña wañuskasina kaspapas, kaugsami ka. Chingaskasina kaspapas, taririwarkami”.

16

Ima iukaskata kawag, mana allilla ruraskamanda parlu

¹ Kasapasmi katiraiagkunata iuiái apingasina iachachirka:

–Sug iapa iukag runa, pai ima iukaskata kawangapasi sakirka. Mana unailapika, patrunta willarkakuna, imasa chi kawag tukui tiapuskakunata tukuchipukugta. ² Chiura patrunka, chi kawagta kaiaspa, nirkasi: “Kammanda, ¿imasatak nukata willawanakú? Kam imasa trabajukuna ruraskata kawachiwai. Ña kunaúramanda, mana mas nuka ima iukaskata kawapuag kangapa kangichu”.

* 15:29 griego rimaiwa: kabritu.

³—Chiura, chi runataka iuiarirka: “¿Imasami rurani? Nukapa patrun, ñami llugsichiwaku. Mana animu iukanichu, alpa pikangapa. Limusna mañaspa puringapa, nukata pingaimi iuiachiwá. ⁴Ñami iuiariwarka, ima nuka rurangapa kagta; nuka ñi pipa kawagpas mana kaura, maikanpas paikunapa wasima nukata kaiawangapa”.

⁵—Chasa iuiarispa, paipa patrunta dibinakuskata sug sugllasi kaiarka. Sug runata tapurka: “¿Masatak nukapa patrunta dibikungi?”.

⁶—Chiura ainirka: “Patsa baril asitimi dibikuni”.

—Chasa uiaspaka, chi kawagka nirkasi: “Chiká. Kam, patrunta dibikuska listata kawai. Nispaka, utka tiarisa, pichka chungalla dibikugta churai”.

⁷—Chasallata, sug runata tapurka: “Kamka, ¿maitukutak dibikungi?”.

—Chiura ainirka: “Patsa tupu trigumi dibikuni”.

—Chasa uiaspaka, chi kawagka nirka: “Chiká. Kam, patrunta dibikuska listata kawai. Nispaka, pusag chungalla dibikugta churai”.

⁸—Patrunka, paipa mana alli alpamanda iuraskata iachaspaka, nirkasi: “Mana allilla ruraspapas, suurapipaka allillami rurarkangi”. Chasallata, kai alpapi tiaskakunallawa iuiarisa kagkunaka, kikinpura imasa chaiaskasina ruradurmi kankuna, Taita Dios punchachiaska runakunamandapas mas.

⁹—Kasami niikichita: kai mana alli alpamanda iukaskakunawa chita karaspa maskangichi, iacharidu runakuna iukangapa. Chiwanka, kai alpapi ima iukaska tukuriuraka, kamkunata ñi imaurapas mana tukuridiru suma luarpi kaugsangapami kaiangakuna.

¹⁰—Maikanpas, asllita mingaskata allilla ruragpika, chasallatami achka mingaskatapas allilla ruranga. Ikuti maikanpas, asllita mingaskata mana allilla ruragpika, chasallatami achka mingaskatapas mana allilla ruranga. ¹¹Kai mana alli alpamanda kulki u imapas iukaskata kamkuna mana allilla ruragpika, ¿imasatak suma luarmanda sutipa iukaikunata kamkunata mingangkuna? ¹²Chasallata, sugkuna mingaskata mana allilla ruragpika, ¿imasatak kam kinkunata chaiakuskata kuangkuna?

¹³—Ñi maikanpas, iskai patrunkunapa sugllapi mana trabajapungapa pudingapa kankunachu. Sug patrunta mana munangachu; ikuti sugtaka kuiangami. Sug patrunta wabutingami; ikuti sugtaka sumagllami rimanga. Chasallata, Taita Diusta i kai alpamanda iukaikunata mana pudinkangichichu, iskandima suuralla iuiakungapa.

Fariseokunata, Jesús piñaskamanda

¹⁴Chasa uiaspa fariseokunaka, iapa kulki iukangapa iuiariillawa kaspa, Jestusta unzarkakuna. ¹⁵Jesusk nirkakunata:

—Kamkuna, runakunapa ñawipi iapa allilla ruranakugsinami kangichi. Chasa kagpipas, Taita Dioska iachanmi kamkuna ima iuanakugta. Kai alpamandakunalla atuniachiska runakunata, pai mana munanachu.

¹⁶—Moisés i Santu Ispirituwa rimagkuna ima willaraiaska, Juan Bautista kaugsankamallami chaimurka. Chiuramandaka, Diospa suma mandaimanda Alli Willaillawami willai tiangapa ka. Tukuikunami munanakú, imasapipas chima iaikungapa.

¹⁷—Sug luar i kai alpa luar tukurigsina kagpipas, chi ñugpamanda ima willaraiaskaka ñi mailla mana ialingapa kanchu.

¹⁸—Kasapasmu niikichita: maikanpas, kikinpa warmita sitaspa, sug warmiwa kasaragpika, atun pandariimi rurá. Chasallata, maikanpas kusa sitaska warmiwa kasaragpika, atun pandariimi rurá.

Iapa iukag runa i Lázaro suti ñi ima mana iukagmanda parlu

¹⁹—Sug iapa iukag runasi tiarka. Paika, iapa suma katanga churarispa, atun punchasina iapa alli mikuillawa kuntintulla iuiachirispasi tukui punchakuna ialichikurka. ²⁰Ikuti Lázaro suti ñi ima mana iukag runasi tiarka. Chi runa, aicha ismui ungui iukarka. Paika, chi iapa iukagpa wasi pungupi sitaska sirikuspa, ²¹munakurka, mikui mikunakuskamanda urmaskawa wigsa jundachiringapa. Alkukunalla, kaillaiaspa, paipa aicha ismuskakunata llakuanakurka.

²²—Chasa kaugsaspaka, chi mana iukag runa wañurkasi. Paitaka, anjilkuna sug larma aparkakuna, ñugpamanda taita Abraham kaskama. Chi iapa iukagpas wañurka. Paitaka sumaglla pambarkakuna. ²³Chiura paika, mana wañuduru ninapi rupakuspa, iapa llakiwa kaspa, chimanda wichai kawaspaka, karupi Abrahamta i Lázaro paipa migllapi charikuskata kawarka. ²⁴Abrahamta kaparisa, nirkasi: “Taita, nukamanda llakiriwai. Lazarota kachamuwai, maki didu puntallatapas iakupi jukuchispa, nukapa kalluta chiriachiwagsamuchu. Kai nina sindikuska iapami rupakuni. Tukui nanaimi iukani”.

²⁵—Chiura, Abrahamka ainirka: “Wambra, iuiarii: kam kaugsankama, kamba iukaiwa iapa sumagllami kaugsarkangi. Ikuti Lazaroka, tukui llakiikunami kaugsankama iukarka.

Kunauraka, kaipi pai alli iuiachiiwami kuntintulla ka. Kamka iukangimi, tukui llakiiwa nanaiwa kanga. ²⁶ Kasapas. Nukanchiwa kamkunawa tuparingapa, iapa atun waikusinami tia. Chimanda maikanpas kaimanda kamkunapagma ialingapa munaspapas, mana alli kanchu. Chasallata, kamkunapagmanda kaima ialimungapa munaspapas, mana alli kanchu”.

²⁷—Chiura, chi iukag runa nirkasi: “Nukapa taita, mañaikimi: Lazarota kachapuai nuka taitapa wasima. ²⁸ Pichka waugkindikunami chipi iukani. Paikunata nukamanda willarigipi, uiaspaka, mana kai iapa llakii kadiruma samungapa chaiangakunatachu”.

²⁹—Abrahamka nirkasi: “Moisés i Santu Ispirituwa rimagkuna imasa kaugsangapa willaraiaskakunata iukankunami. Chikunata allilla iuiarispa uiachukuna”.

³⁰—Chi iukag runa, Abrahamta ainirka: “Mana, taita. Sug wañuska kaugsarispa, paikunapagma chaiagrigipika, allilla ruraikunamami tigraspa, suma kaugsai kallarintrakuna”.

³¹—Chasa ainiura, Abrahamka nirkasi: “Moisés i Santu Ispirituwa rimagkuna ima willaraiaskata mana ui ai munaspaka, mana uangakunachu, ñi sug wañuska kaugsarigpipas”.

17

Sugkunata pandariikunapi urmachigmanda

¹ Kasapasmi Jesús, paita katiraiagkunata nirka:

—Imaurapasmi tiangapa ka, runakunata pandariikunapi urmachingapa. Chasa tiagipapas, jai, maikan runa, sugkunata pandariikunapi urmachig! ² Maikan kai uchullakunata pandachipuagpika, paita chaiantrami, sug atun kutanga rumi kungapi walkachispa, atun kucha iakuma sitagringapa.

Tukui waugkikunata pasinsiaskamanda

³—Suma iuiariiichi. Maikanpas mana allilla ruraipi pandarigpika, paita iuiachispa rimangi. Alli tukugpika, pasinsiangi. ⁴ Suglla puncha kanchis biaji kamta mana allilla ruraspa, kamta nigsamuchu: “Mana mas ikuti chasa rurasakichu”: tukui kanchis biaji pasinsiangi.

Taita Diusllawa tukuipi suma iuiagkuna imasa pudiskamanda

⁵ Chiura Iaia Jesús aglaska runakuna, paita nirkakuna:

—Nukanchita aidai, kammanta mas iuiaringapa.

⁶ Paika nirka:

—Sug uchulla muritu mustasasinallapas kamkuna nukamanda iui ai iukantrangichi; kai sachata* nintrangichi: “Kaimanda anchurispa, atun kucha iakupi saiarigrii”. Chiurallami chi sacha, chasa rurantira.

Diuspa ñawipi, uchulla lutrinsinakunami kanchi

⁷—Kamba lutrin chagrapi trabajakuspa u wagra kawakuspa, kutimuuraka, ¿maikan kumpuratak nintrangi: “Tiarispa, mikugsamui”? ⁸ Chasapaka, nintrangimi: “Allichirispa ianui, nukata karawangapa. Nuka mikusa i upiasa. Chiuramandaka, kamka mikungi i upiangi”. ⁹ ¿Kamkuna ima niskata rurag lutrintachu iukangichi ninga: “Pai Siñur”? Manima. ¹⁰ Chasallata kamkunapas, tukui imasa Taita Dius niskasina ruraspaka, ningichi: “Ñi imapa mana bali lutrinsinakunami kanchi. Nukanchita rurangapa chaiakuskallatami rurarkanchi”.

Chunga runakuna aicha ismui unguiwa kaskakunata, Jesús ambiskamanda

¹¹ Jesús Jerusalenma rikuspa, Samaria i Galilea alpa kucha kucha ialirka. ¹² Sug uchulla puiblupi chaiakugriuraka, chungu runakuna aicha ismui unguiwa kagkuna paipagma rirakuna tupangapa. Karullapi saiarispaka, ¹³ sinchi kaparispa, nirkakuna:

—Iachachig taita, nukanchimanda llakirii.

¹⁴ Chi runakunata kawaspaka, Jesuska nirka:

—Sasirdutikunata kawachirigriichi.

Imasa uiaskasina ñambi rinakuskapika, ambirigsamurkakanata.

¹⁵ Ambiriskapura suglla, chasa kawarispaka, Jesuspagma kutirka. Kutispaka, Taita Diusta iapa suma atun kagta kaparispa nikurka. ¹⁶ Jesuspa chaki ladu kungurispa, ñallapas alpakama kumurispa, nirka: “Pai Siñur”. Chi runa karka Samaria suti alpamanda.

¹⁷ Nigpi Jesuska, chipi kagkunata nirka:

—¿Manachu chungu runa ambiriska kankuna? Sug iskunkunaka, ¿maipitak kankuna?
¹⁸ ¿Imapatak kai mana judiu runalla kutimurka, Taita Diusta iapa suma atun kagta ningapa?

* 17:6 griego rimaiwa: kai sikómoro suti sacha.

¹⁹ Chasa nispaka, chi runata nirka:

—Atarisa riilla. Kam nukamanda suma iuiariskamandami ambirigsamurkangi.

Diuspa suma mandai puncha, imasa chaiamungapa kagta

²⁰ Fariseokuna, Jesusta tapurkakuna:

—Diuspa suma mandai puncha, ¿imauratak chaiamungapa ka?

Chiura, paika ainirka:

—Diuspa suma mandai puncha chaiamugtaka kamkunapa ñawiwa mana kawangapa kangichichu. ²¹ Mana ningapa pudirinchu: “Kaipimi ka” u “Chipimi ka”. Kam kikinkunapa chaugpipimi Taita Diuspa suma mandaika ña tiagsamú.

²² Chasa nispaka, paita katiraiagkunata nirka:

—Kai Runa Tuskusa illaura, kamkuna munantrangichimi: “¡Amalai suglla punchallapas kutimusa kawarigsamuntra!”. Kamkuna chasa munagpipas, mana chasa kawawangapa kangichichu. ²³ Chiura, kamkunata nukamanda ninakungami: “Chipimi ka” u “Kaipimi ka”. Chasa ninakugpipas, mana kawangapa katingichi. ²⁴ Imasami rilampa, awapi sugnigmanda punchaichigsamuspa, sug ladukama punchaiaichi: chasallatami iapa suma punchaiaichiwa kutimusa, kai Runa Tuskusa kawarigsamungapa ka.

²⁵ —Ima kagpipas, ñugpami kai Runa Tuskukata chaiawaku, iapa lakii i nanai pasangapa. Kunauramanda runakunami wabutiwangapa kankuna.

²⁶ —Imasami, Noé kaugsakuura, mana iuianakuskasina tukugsamurka: chasallatami kai Runa Tuskusa kawarigsamungapa puncha tungapa ka. ²⁷ Noé kaugsakuska punchakunaka, sumaglla mikuspa, upiaspa, kasaraspami kaugsanakurka, Noé ruraska atun kanuapi iaikunkama. Chiura, iapa atun tamia tukugsamuspa, tukuikunata puchukagsamurkakunata. ²⁸ Chasallata, Lot kaugsakuura, mana iuianakuskasinami tukugsamurka; Sodoma suti puiblumandakuna, sumaglla mikuspa upiaspa, randispa katuspa, tarpuspa wasichispa kaugsanakurka. ²⁹ Lot chi puiblumanda llugsiuraka, nina i asufrimi, awanigmanda tamiagsamuspa, tukuikunata puchukagsamurka. ³⁰ Chasallatami kai Runa Tuskusa kawarigsamungapa punchapas tukugsamungapa ka.

³¹ —Chi puncha, maikanpas wasi truja awapi kagkuna mana uraikuchukuna, ukuma iaikuspa, imakuna apangapa. Imasa kaskasinalla mitikuchukuna. Chasallata, maikanpas chagrapi kagkuna mana wasima kutichukuna. ³² Lotpa warmi imasa pasaskata iuiariichi. ³³ Maikan kikinpa kaugsaita kispichingapaglla iuiakugpika, kikinmi puchukaringapa ka. Ikuti maikanpas nukamanda wañuchii tukugpika, mana mas wañui kaugsaitami tarigapa ka.

³⁴ —Kasami niikichita: chi tuta, suglla kawitupi iskaikuna kaskakunata, sugtaka apangami; sugtaka sakingami. ³⁵ Chasallata, iskai warmikuna sugllapi kutanakuskata, sugtaka apangami; sugtaka sakingami.

³⁶ Chiura, chasa uiagkuna tapurkakuna:

—Taita waugki, ¿maipitak chasa pasaringa?

³⁷ Chasa tapuura, Jesuska ainirka:

—Imasami gallinasukuna, pipas mana willagpi, paikuna wañuska kaskama tandarin-kuna: chasami tukugsamungapa ka.

18

Mana allilla rurag justisiamanda parlu

¹ Jesús, chipi kagkunata iachachirka, imaurapas mana sambaiaspalla Taita Diusta mañangapa chaiagta. Chasaka, iuiai apingasina suma parlarkakunata, ² kasa nispa:

—Sug puiblupi tiarkasi sug justisiai rurag. Chi runa, Taita Diusta ñi pitapas mana mancharka. ³ Chi puiblullapita tiarkasi sug sapalla kidaska warmi. Chi warmika, justisiapagma ikuti ikuti mañangapa rikurka, kasa nispa: “Nukata piñawagta kaiaspa, justisiapuai”.

⁴ —Achka punchakuna rigpipas, chi justisiai rurag, paita mana uangapa munarka. Nispaka, kikinlla iuiarirka: “Taita Diusta ñi pitapas sutipa mana manchani. ⁵ Chasa kagpipas, chi sapalla warmi iapa killachiwakugmandaka, paimanda justisiapusami. Chimi pai mana mas killachiwagsamunga”.

⁶ Kasapasmi iaia Jesús nirka:

—Chi mana imasa chaiaskasina justisiai rurag ima niskata iuiariichi. ⁷ ¿Manachu Taita Dius agllaskakuna tuta i puncha paita mañanakugpika, paika justisiapunga, unaiachispapas? ⁸ Kasami niikichita: mana unaiaspallami paikunamanda justisianga. Chasa kagpipas, kai Runa Tuskusa ikuti samuuraka, ¿paimanda suma iuiagkuna, kai alpapi charachu tianga?

Fariseo i mana judíu kagkunamanda kulki chaskigmanda parlu

⁹ Sug runakuna: “Nuka, tukuipi allimi kani” iuiarispa, sugkunataka wabutinakurka. Chikunata iui ai apingasina, Jesuska suma parlarka, kasa nispa:

¹⁰ —Iskai runakuna, Diospa atun wasimasi rirkakuna, paita iuiarispa mañangapa. Sug karka fariseo; sugka, mana judiu kagkunamanda kulki chaskig. ¹¹ Fariseoka, saiarispalla, Taita Diusta rimakugsina kikinmandalla kasa nikurka: “Nukapa Dios, nuka mana sugkunasina kanichu. Ñi sisai, ñi pandarigi, ñi sugpa warmikunawa siririg ñi kai kulki chaskigsinapas mana kanichu. Chimandami niiki: ‘Pai Siñur’.” ¹² Simanapi iskai punchami mana mikuspalla chisiadur kani. Tukui nuka ima ganaskatapas chungapika sugmi karadur kaiki”.

¹³ —Ikuti chi kulki chaskigka, karullapi kumuridu saiakurka, mana awasinama ñawillapas atarichispalla. Pichupi makiwa piarispa, nikurka: “Nukapa Dios, nukamanda llakiriwai. Nuka, iapa pandarigmi kani”.

¹⁴ —Kasami niikichita: chi kulki chaskig wasima kutiuraka, paitami Taita Dios, pasinsiaspa, nirka: “Mana pandarigmi niraiapuangi”. Ikuti chi fariseotaka chasa manima. Maikanpas atuniachirispai iuiagta, Taita Dioska uchullaichingapami ka. Ikuti maikanpas uchullaiaspai iuiaskataka, Taita Dios atuniachingapami ka.

Wawakunata, Jesús maki churaskamanda

¹⁵ Suura uchullakunata, paikunapa atunkuna Jesuspagma pusarkakuna, paikunata maki churaspa, Taita Diusta paikunamanda mañangapa. Jesusta katiraiagkunaka, pusanakugta piñaspa, nirkakuna:

—Mana kaillaiakuichi.

¹⁶ Jesuska, wawakunata kaiaspai, paita katiraiagkunataka nirka:

—Ianga kawaichi, wawakuna nukapagma samuchukuna. ¿Imapatak arkanakungichi? Kai wawakunasina kagkunami suma luarma iaikugringapa kankuna. ¹⁷ Kasami nuka niikichita: maikanpas, mana Diospa ñawipi kai uchullakunasina allilla tukugsamugpika, mana suma luarma iaikugringapa kankunachu.

Sug iapa iukag runa, Jesuswa rimanakuskamanda

¹⁸ Sug mandag runa, Jesusta tapurka:

—Alli iachachig taita, ¿imasatak iukani ruranga, mana puchukariduru suma kaugsaita taringapa?

¹⁹ Jesuska ainirka:

—¿Imapatak nukata: “Alli iachachig taita” niwakungi? Maikanpas mana alli tianchu. Taita Diosllami alli ka. ²⁰ Moisés ima niskata ñami iachangi: “Mana sugpa warmiwa siriringi. Mana wañuchingi. Mana sisangi. Mana pimandapas llullangi. Kamba taitata mamandita sumaglla kuiangi”.

²¹ Chiura, chi runa ainirka:

—Nuka, uchulla kauramandatami tukui chi niskata chasa ruraspa kaugsani.

²² Chasa uiaspa, Jesuska nirka:

—Nigpika, kasami pisipukungi. Kam tukui ima iukaskata katugrii. Katuska kulkitaka mana iukaskakunata tukuita karagrii. Chasa ruraspaka, suma luarpika iapa iukagmi tukungapa kangi. Nispaka samungi, nukata katiwangapa.

²³ Chasa rimaskata uiaspaka, chi runa irkiaspami llakirirka, iapa iukag kaspai. ²⁴ Chasa llakirigta kawaspaka, Jesuska nirka:

—Iapa iukagkuna suma luarma iaikugringapaka, iapa trabajusumi ka. ²⁵ Maschar alli kantra, sug wagra,* sug aguja ñawipi ialingapa. Chimanda mas trabajusumi ka, chi iapa iukagkuna suma luarma iaikugringapa.

²⁶ Chasa uiagkuna tapurkakuna:

—Nigpika, ¿pisik kispiringapa pudinga?

²⁷ Chiura, Jesuska ainirka:

—Ñi maikan runa mana pudiskataka, Taita Diosmi tukui pudí.

²⁸ Chiura, Pedroka nirka:

—Uiamui. Nukanchi, tukui ima iukaskata sakispami kamta katiraianchi.

²⁹ Jesuska, paikunata ainirka:

—Kasami nuka niikichita: maikanpas, Dios suma mandakuskata munaspai, wasita, warmindita, waugkindikunata, taita i mamandita i wambrakunata sakispa katiwagka, ³⁰ mas achkami kai alpapita chaskingapa kankuna. Suma luarpipas mana puchukariduru kaugsaitapasmi tarigringapa kankuna.

Jesús imasa wañungapa kagta, pai kimsama willaskamanda

* 18:25 griego rimaiwa: kamello suti atun animal.

³¹ Chunga iskai pai agllaskakunallata kaiaspaka, Jesuska nirka:

—Uiawaichi. Jerusalemami rinakunchi. Chipika, tukui ima Santu Ispirituwa rimaguna kai Runa Tukuskamanda ñugpamanda librupi willaraiaskata tukuiipi chasami pasariwangapa ka. ³² Mana judíu kaskakunapagmami chaiachii tukungapa kani. Paikuna unzáwaspa, kamiwaspa, tukawaspami kangapa kankuna. ³³ Asutiwaspaka, wañuchiwan-gapami kankuna. Chasa wañuska kaspapas, kimsa punchapika ikutimi kaugsaringapa kani.

³⁴ Chasa niskataka, katiraiagkuna mana iacharkakuna ima niraiagta. Paikunamanda pakaska kagsina karka; chiwanka, chi ima niraiaskata mana iachangapa.

Sugruna mana ñawi kawagta, Jesús aliachiskamanda

³⁵ Jesús ña Jerikó puibluma chaiakugriskapika, sug runa mana ñawi kawag, limusna mañaspá ñambi kuchupi tiakurka. ³⁶ Chi runaka, achkakuna ialinakuskata uiaspa, tapurka:

—¿Imatak pasariku?

³⁷ Chiura ainirkakuna:

—Nazaret puiblumanda Jesusmi ialiku.

³⁸ Chasa uiaspa, chi runaka kaparirka, kasa nispa:

—Davidpa wambra Iaia Jesús, nukamanda llakirii.

³⁹ Ñugpa rinakug, paita piñaspá, nirkakuna:

—Upalla kai.

Paika, upallangataka, mas sinchimi kaparii kallarirka, nispa:

—Davidpa wambra, nukamanda llakirii.

⁴⁰ Chasa uiaspaka Jesuska, saiarispa, kacharka, chi runata pusangapa. Chaiachigri-uraka, paita tapurka:

⁴¹ —¿Imatak munakungi, nuka kamta rurangapa?

Chiura ainirka:

—Taita waugki, nuka kawangapami munakuni.

⁴² Chiura, Jesuska nirka:

—Nigpika, kawai. Kam nukamanda suma iuiariskamandami ambirigsamungi.

⁴³ Chasa nigllapi, allilla kawai kallarirka. Nispaka, Jesusta katii kallarirka, Taita Diusta nispa:

—Kam, iapa suma atunmi kangí.

Chasa kawaspa, tukui chipi kagkunapas Taita Diusta nirkakuna:

—Tukuikunamanda mas suma atunmi kangí.

19

Zakeo suti runamanda

¹ Chi Jerikó puiblu ukupi, Jesús ña ialikurka. ² Chipi kaugsakurka Zakeo suti iapa iukag runa, mana judíu kagkunamanda kulki chaskigkunata mandag. ³ Chi runa munakurka, Jesusta rigsingapa. Chasa munakuspapas, iapa achka runakuna chipi kagmandaka, paitaka mana alli karka kawangapa, iapa uchulla runa kaspá. ⁴ Chimandaka, ñugpa kalpaspá, maipi Jesús ialingapa kaskapi sug sikómoro suti sachapi sikagrirka, chimanda kawangapa.

⁵ Chi ladullapi Jesuska, ialikuspa, wichai kawaspa, Zakeota nirka:

—Utká uraikumui. Kuna puncha chaiawakumi, kamba wasima chaiagringapa.

⁶ Chiuralla Zakeo, uraikuspa, Jesusta pusarka. Alli iuiachiiwa paipagma iaikuchigrirka.

⁷ Tukui chasa kawagkuna, paipura mana allilla iuiaiwa ninakurka:

—Pandarigpagmami Jesús iaikugrirka, paiwa sugllapi kagringapa.

⁸ Zakeoka, saiarispa, Iaia Jesusta nirka:

—Taita waugki, tukui ima nuka iukaskata mana iukaskakunata chaugpimi karangapa kani. Maikanta llullachispa, kulki mañaskakunatapas chusku biaji iapawami kutichingapa kani.

⁹ Chiura, Jesuska nirka:

—Kuna punchami kai wasimanda runakuna kispirigsamurkakuna. Kai runapas, ñugpa-manda taita Abrahampa iawarmi ka. ¹⁰ Kai Runa Tukuska samurkami, maikan chingaska-sinata maskaspa, tarispa, kispichingapa.

Chunga kuri kulkimanda parlu

¹¹ Jesús ña Jerusalemka kaillaiakugmanda, chasa niskata uiagkuna iuianakurka: “Dius-pa suma mandai, ñachar chaiamuku”. Chimanda, paikunata iuiái apingasina suma parlarka, ¹² kasa nispa:

–Sug runa, mandagpa wambrasi tiarka. Chi runaka, sug karu alpama rirka, atun mandag tukuspa kutimungapa. ¹³ Llugsikuspaka, chungu lutrinkunata kaiaspa, sug sug kuri kulki mingarka, kasa nispa: “Kaiwa randispa i katuspa, mirachipuangichi, imaura nuka chaiamunkama”. ¹⁴ Pai rigllapi, chi alpamanda runakuna, paita mana munaspa, kacharkakuna, ñugpa willangapa: “Chi runata mana munanchichu, nukanchipa atun mandag kangapa”.

¹⁵ –Atun mandag tukuspa kutimuspaka, chi runaka kacharka, tukui kulki mingaskakunata kaiaspa, tapungapa: masa kulkimi mirachiska tiapunkunata. ¹⁶ Chiura sug runaka, chaiamuspa, nirka: “Taita waugki, kamta chaskiskawa ña chungu biaji masmi mirachipuiki”.

¹⁷ –Chiura, chi atun mandagka ainirka: “Kam, iapa allimi kangi. Allillami rurarkangi. Chasa maillallawa mirachigmanda, chungu puiblutami mandag kankangi”.

¹⁸ –Chasallata sug runaka, chaiamuspa, nirka: “Taita waugki, kamta chaskiskawa ña pichka biaji masmi mirachipuiki”.

¹⁹ –Chiura nirkasi: “Kamka, pichka puiblutami mandag kankangi”.

²⁰ –Ikuti sugka, chaiamuspa, nirkasi: “Taita waugki, kamba kulki kaipimi tiapungi. Nuka, kamta manchaiwa kaspas, sug piti linsupi maituspa wakachipurkaikimi. ²¹ Kamka, sinchi sungumi iukangi. Kam mana wakachiska iukaskatami tandachidur kangi. Chasallata, maipi mana tarpuskapi palladurmi kangi”.

²² –Chasa uiaspaka, chi atun mandagka nirka: “Kam kikinpa rimaiwami iachariwarka, kam mana alli kagta. Kam, allillami iacharkangi, nuka sinchi sungu iukagta; nuka mana wakachiska iukaskata tandachidur kagta; chasallata, maipi mana tarpuskapi palladur kagta. ²³ Chasa iachaspaka, ñimapatok nukapa kulki mirangapa, mana bankupi mingapuarangkangi; chasaka, nuka kutimuura, iapawa kuawangapa?”.

²⁴ –Chasa rimaspaka, chipi kagkunata nirka: “Kai lutrinta kulki kichuspa, chi chungu iukagta kuaichi”.

²⁵ –Chiura nirkakuna: “Taita waugki, paika ñami chungu iuká”.

²⁶ –Chasa niura, chi atun mandagka nirkasi: “Kasami niikichita: maikan iapa achka iukagta masmi karangapa ka. Ikuti maikan mailla iukaskataka tukuimi kichungapa ka. ²⁷ Kasapas. Maikan nuka atun mandag tukungapa mana munawaskakunataka pusagrispa, nukapa ñawipi wañuchiichi”.

Jerusalén puibluma, Jesús iaikugriskamanda

²⁸ Jesús rimai puchukaspaka, paita katiraiagkunata Jerusalenma ñambi ñugparka. ²⁹ Betfajé i Betania suti puiblukuna ña kawarikuskamanda, Olivos suti lumakama chaiagrirka. Chimanda, iskai katiraiagkunata kacharka, ³⁰ kasa nispa:

–Riichi chi ñugpa ladu uchulla puibluma. Chaiagrispaka, tarigrinkangichimi sug buru wataraiaskata, manara pipas tiariska. Chi buruta paskaspa, apamungichi. ³¹ Maikan tapuchu: “¿Imapatok buruta paskanakungichi?”: chiura ainingichi: “Iaia Jesustami ministiku”.

³² Chi kachai tukuskakuna chaiagriuraka, tukui imasa Jesús niskasina allilla tukug-samurka. ³³ Buruta paskanakuuraka, duiñukuna tapurkakuna:

–¿Imapatok buruta paskanakungichi?

³⁴ Chiura ainirkakuna:

–Iaia Jesustami ministiku.

³⁵ Apangapa sakiuraka, buruta Jesuspagma aparkakuna. Chaiachigrispaka, buru wasapi paikunapa katangakunata churaspa, Jesusta tiarichirkakuna. ³⁶ Jesús ñambi rikuskapika, paikuna kataraiaska katangakunata ñambi suiu mandachirkakuna, pai ialingapa.

³⁷ Ña Jerusalenma chaianakugriura, Olivos lumamanda uraikunakuskapika, iapa achka runakuna Jesusta katiraiagkunaka, iapa alli iuiachirispa, kallariirkakuna, Taita Diusta kaparispa ningapa: “Kam, iapa suma atunmi kangi”. Tukui ima mana imaurapas kawaskasina pai ruraskakunata kawaskata iuiarispami chasa kaparinakurka. ³⁸ Kasapasmi kaparispa ninakurka:

–Atun Taita Dios kachamuska atun mandagmi samukungi.

Paipa iapa kuiaskami kangi.

Sug luarpi, sumaglla kachu.

Taita Dios awa suma luarpi kagtami ninchi:

“Kam, iapa sumami kangi”.

³⁹ Chipi kagpura sug fariseokuna, Jesusta nirkakuna:

–Iachachig taita, kamta katiraiagkunata piñai.

⁴⁰ Jesuska ainirkakunata:

—Kasami niikichita: paikuna upallagpika, rumikunami chasallata kaparingapa kankuna.

Jerusalenmanda, Jesús wakaskamanda

⁴¹Jerusalenma ña kailla rikuspaka, chi puibluta kawaspa, paimanda wakarka. ⁴²Wakaspaka, nirka:

—Kunaura kamkuna, kai punchakuna imasa karaskata iachantrangichi, sumaglla kaug-sangapa. Nigpika, pakaskasinami ka, kamkuna mana iachai pudingapa. ⁴³Sug punchakuna chaiamungapami ka; kamkunata wañuchingapa samugkunaka, tukuinigmamanda kinchaspaga, sug awa pata ruraspami muiuchingapa kankuna, ñi pipas mana ialingasina. ⁴⁴Nispaka, kai puibluta lim urmachispa, tukui ukupi kaugsanakuskatami wañuchingapa kankuna. Tukui piachiska rumikunapas, ñi sug mana sakingapa kankunachu. Taita Dios kachamuska kamkunapagma chaimuura, mana rigsigmandami chasa iapa llakii pasangapa kangichi.

Diuspa atun wasi ukumanda, Jesús katugkunata llugsichiskamanda

⁴⁵Diuspa atun wasi ukuma iaikugrispaka, tukui chipi katugkunata llugsichii kallarrirka, ⁴⁶kasa nispa:

—Nugpamanda librupi, kasami willaraiá: “Nukapa wasi, Taita Diusta iuiarispa mañadirumi kangapa ka”. “Kamkunaka, sisai kaugsadirusinami rurarkangichi”.

⁴⁷Chiuramanda tukui punchakuna, Diuspa atun wasi ukupimi iachachikurka. Iaia sasirdutikuna, Moisés ima niskata iachachig taitakuna i sug taitakunapas, paita iuiarinakurka imasapipas wañuchingapa. ⁴⁸Pai ima iachachikuskata, tukui runakuna suma allilla uiaspa kagmandami paikunata mana iacharirkakunata imasa wañuchinga.

20

Kamtaka, ¿pitak kachamurka, atun tukuspa puringapa?, Jesusta tapuskamanda

¹Sug punchaka Jesús. Diuspa atun wasi ukupi kagkunata iachachikuspa, Alli Willaita willakurka. Chiura iaia sasirdutikuna, Moisés ima niskata iachachig taitakuna i sug taitakunapas, paipagma chaiagrispa, ²tapurkakuna:

—Nukanchita willai: ¿imapatak chasa ruraspaga purikungi? ¿Pitak kamta kachamurka, atun tukuspa purikungapa?

³Jesuska ainirkakunata:

—Nukapas, kamkunata tapusakichita. Willawaichi: ⁴¿pitak Juanta kacharka, baugtisan-gapa? ¿Taita Dioschu kachamurka? Mana kagpika, ¿runakunachu kacharka?

⁵Chiuraka, kikinpura rimarinakurka, kasa iuiarispa:

—“Taita Dios kachamuskami karka” nigpika, paika ainingami: “Nigpika, ¿imapatak mana paita uarkangichi?”. ⁶“Runakunalla kachamuskami karka” mana nisunchi. Tukuikunami Juanmanda iuianakú: “Santu Ispirituwa rimagmi karka”. ¡Amalai nukanchita rumiwa piaspa wañuchintrakuna!

⁷Chasa rimanakuspa, Jesusta ainirkakuna:

—Mana iachanchichu, Juanta pi kachamuska kagta.

⁸Chasa ainiura, Jesuska nirkakunata:

—Chimandami nukapas mana willaikichita, pi kachamuwaska kagta, atun tukuspa kangapa.

Ubas sachakunata almagkuna, mana allilla ruraskamanda parlu

⁹Chasa nispa, chipi kagkunata iuiái apingasina suma parlarka, kasa nispa:

—Sug runa, achka ubas sachakunata sakirka, almaspa, chaugpi chaugpi pallangapa. Chasa sakispaka, iapa unai karu alpama rirka. ¹⁰Ña pallangapa chaiaraka, sug lutrinta chi almagkunapagma kacharka, paipa rasiunta chaskingapa. Chi runakunaka, kachai tukuskata makaspa, chusa maki kacharkakuna.

¹¹—Chiuramanda, ikuti sug lutrintasi kacharka. Chitapas makaspa, kamispa, chasallata chusa maki kacharkakuna. ¹²Ña kimsamaka, ikuti sug lutrintapassi kacharka. Chitaka lisiachispa, kanchamasi llugsichirkakuna.

¹³—Nigpi, chi duiñuka iuiarirkasi: “¿Imatak rurasa? Nukapa iapa kuiaska wambratami kachasa. Nukapa wambra kagmanda, mana imapas rurapuangakunachu”.

¹⁴—Nigpika chi almagkunaka, chi wambrata kawaspa, kikinpura rimarirkakuna, kasa nispa: “Kai alpa duiñupa wambrami samuku. Paitaka wañuchisunchi. Chasaka, nukanchipallami kai alpa tukunga”. ¹⁵Chasa nispa, paita chi alpamanda llugsichispa, wañuchirkakuna.

Chasa parlaspa, Jesús tapurka:

—Nigpi chi alpa duiñuka, ¹⁶¿manachu samuspa, chi runakunata tukuita wañuchigsamuntra; nispaka, chi sachakunata ikuti sugkunata almangapa sakintra?

Chasa uiagkuna ainirkakuna:

—Chasa mana pasarichu.

¹⁷Chasa niura Jesuska, ñawima kawaspa, nirkakunata:

—Nigpi, ñugpamanda librupi kasa willaraiaska, ¿imatak niraiá?

Wasichigkuna wabutiska rumi,

wasita charigmi tukugsamurka.

¹⁸Maikan chi rumipi urmagkuna, piti pitimi tukungakuna. Chasallata, chi rumi awalla urmagpika, ñutumi tukungakuna.

Impuistumanda Jesusta tapuskakunamanda

¹⁹Chi parluta uiaspaka, Moisés ima niskata iachachig taitakuna i iaia sasirdutikunapas nirkakuna:

—Nukanchitami uiachiku—. Chimanda, chiuralla Jesusta apichingapa munanakurka. Chasa munanakuspapas, achka runakuna chipi kagmanda, manchai apirkakunata. ²⁰Nispaka, suma rimagkunasina kawari kaskakunata kacharkakuna, Jesusta chapangapa. Chi runakuna rirkakuna, pai rimakuskata uiaspa, imapipas pandarigpika, paita apichingapa; apispaka, tukuikunata mandagpagma chaiachispa, paita justisiangapa.

²¹Kachai tukuskakunaka, chaiagrispa, Jesusta sumaglla nirkakuna:

—Iachachig taita, nukanchi iachanchimi, kam mana llullaspalla rimagta. Mana pitapas kawaspallami tukuikunata iwalla sutipa kaskata iachachingi, imasa Taita Dios munaskasina ruraspa kaugsangapakuna. ²²Chimandami kasa tapugsamunchi: ¿allillachu ka, Romamanda iaia mandagta nukanchi impuistu kuangapa? ¿Pagasunchichu u mana?

²³Jesuka iacharka, mana allilla uiuiawa chasa tapunakugta. Nispaka nirkakunata:

²⁴—Impuistu kulki kuadiruta kawachiwaichi—. Kawachiuraka, tapurka— ¿Pipa ñawitak kawariku? ¿Pimandatak willaska niraiá?

Chiura ainirkakuna:

—Romamanda iaia mandagmanda.

²⁵Chasa ainiura, Jesuska nirkakunata:

—Chasa kagpika, Romamanda iaia mandagpa kaskata paita kuaichi. Taita Diospa kaskataka Taita Diusta kuaichi.

²⁶Chasa, tukuikunapa ñawipi, Jesús ainigmanda mana apichingapa pudirkakuna. Chi ainiskata uiaspaka, iapa uñarispami upalla karkakuna.

Wañuskakuna kaugsaringapa kaskamanda, Jesusta tapuskakunamanda

²⁷Chiuramanda sug saduseo suti runakuna, Jesuspagma chaiagrirkakuna. Chi runakuna iachachidurmi kankuna, wañuskakuna mana mas kaugsaringapa kagta. Chaiagrispaka, Jesusta nirkakuna:

²⁸—Iachachig taita, Moiseska nukanchimanda kasasi willaspa sakirka. Sug kari kasarapa, warmi manara wambrakuna iukagllapi wañugpika, sug waugkindisi iuká chi biudawa kasaranga; chasaka, wañug waugkindipa quinta wawakuna iukangapa.

²⁹—Nigpika, kanchis waugkindikunasi tiarka. Atun waugkindika, kasarapa, warmi manara wawakuna iukagllapisi wañurka. ³⁰Chiwanka, kipamanda waugkindisi chi sapalla kidaska warmiwa kasarai iukarka. Chi waugkindipas, warmi manara wawakuna iukagllapisi wañurka. ³¹Katimanda waugkinditapas chasallata pasarirka. Chasallatasi tukui kanchis waugkindikuna, warmi manara wawakuna iukagllapi wañurkakuna.

³²Katimakar, chi warmipas wañurka. ³³Nigpika, wañuskakuna kaugsariuraka, ¿pipatak chi warmi kanga, chi kanchis waugkindikunawa kasadu kaspá?

³⁴Jesuka ainirkakunata:

—Kunaura kaugsagkuna, karikuna i warmikuna kasaranakumi. ³⁵Chasa kagpipas, maikan wañuska Diospa ñawipi allilla kaspá, kaugsarispa, suma luarma chaiagrispa kagkunaka, kari ñi warmi mana kasarangapa kankunachu. ³⁶Paikuna, mana mas wañungapa kankunachu. Anjilkunasina kaspá, Diospa wambrakunami tukuska kangapa kankuna, paikunata kaugsachii ruraskamanda.

³⁷—Kasapas. ¿Imapatak kankuna ningichi: “Wañuskakuna mana mas kaugsaringapa kankunachu”? Moisespas, sacha rupakuskamanda rimaspa, chasallatami iachachirka, kasa nispa: “Atun Taita Dios, Abrahampa, Isaakpa i Jakobpa Diosmi ka”. ³⁸Chiwanka, Taita Dios mana kanchu wañuskakunapa. Kaugsagkunapami Taita Dios ka. Paipa ñawipika, tukuikunami kaugsa kankuna.

³⁹Chiura Moisés ima niskata sug iachachig taitakunaka, Jesusta nirkakuna:

—Iachachig taita, iapa allillami rimarkangi.

⁴⁰ Chiuramanda, Jesusta mancharispa, ñi maikan mana mas paita tapungapa munarkakuna.

Taita Dios agllaska Cristo, Davidpa iaiami ka

⁴¹ Chiura, Jesuska nirkakunata:

—Taita Dios agllaska Cristomanda, ¿imapatak ninkuna, Davidpa wambrapa kati wambra kagta? ⁴² ¿Manachu David kikin, Salmos suti librupi, Cristomanda kasa willarka?

Atun Taita Diosmi nukapa iaiata nirka:

“Nukapa alli ladu tiarii,

⁴³ nuka tukui kamta mana munagkunata apagrispa, kamba chaki sarudiru ukuma churankama”.

⁴⁴ Chasami David kikin, Cristomanda nirka: “Nukapa iaia”. Nigpika, ¿imawantak Cristo, paipa wambrapa kati wambra kanga?

Iachachig taitakunata, Jesús piñaskamanda

⁴⁵ Chasa nispaka, tukui chipi kagkuna uianakunkama, paita katiraiagkunataka nirka:

⁴⁶ —Moisés ima niskata iachachig taitakunawa mana iapa sugllapi iuiiwa kangichi. Paikuna munankunami, iapa suma kawari katangakuna churarispa puringapa. Kallipi paikunawa tupanakuskapi munankunami, iapa suma kuiiwa kumurispa, “Puangi, taita waugki” ningapakunata. Tandaridiru wasikunapipas munankunami, atun taitakuna tiaridiru ñugpa ladu tiaringapa. Chasallata, maima kunbidagpi suma mikungapa kaiaura, ñugpa ladu tiaringapami munankuna. ⁴⁷ Warmi sapalla kidaskakunata wasikunatami kichudur kankuna. Nispaka, kawachiringapagllami unai Taita Diusta rimanakudur kankuna. Chasa ruraskakunamandami sug luarpi sugkunamandapas mas llakiipi justisiai tukungapa kankuna.

21

Sug mana iukag warmi, Taita Diusta kulki karaskamanda

¹ Chiuramanda Jesús, iapa iukagkuna imasa kulki churadirukunapi churanakuskata kawakurka. ² Chipi chaiagrispa, sug warmi mana iukag sapalla kidaskaka, iska uchulla kulkillami churarka. ³ Chasa kawaspaka, Jesuska nirka:

—Nukami kasa niikichita: chi warmi mana iukag sapalla kidaska, tukuikunamanda mas achka churagmi nirai. ⁴ Sugkunaka, paikunapa puchuskatami churarkakuna. Ikuti chi warmika, mana iukaspapas, pai mikungapa charikuskatami tukuita kararka.

Diuspa atun wasita puchukai tukungapa, Jesús willaskamanda

⁵ Sug runakuna, Diuspa atun wasimanda rimaspa, ninakurka:

—Iapa atun kantiaska rumikunawa i Taita Diusta karaskakunawa saiachiska, ña iapa sumami kawariku.

Chasa uiaspa, Jesuska nirka:

⁶ —Tukui ima kamkuna kawanakuska puchukaringapa punchakunami chaimungapa ka. Chi tukui piachiska rumikuna, ñi sug mana sakingapa kankunachu. Tukuitemi urmachispa puchukangapa kankuna.

Kai alpa puchukarii puncha manara chaiagllapi, imasa kawaringapa kaskamanda

⁷ Chiura, paita tapurkakuna:

—Iachachig taita, ¿ima uratak chasa pasaringa? Ña chasa pasaringapa kagta, ¿imawatak kawachinga?

⁸ Chiura, Jesuska ainirka:

—¡Ujalallapas maikan, kamkunata llullachispa pandachichukuna! Achkakunami, nukasina tukuspa, samungapa kankuna, kasa nispa: “Nukami Taita Dios agllaska Cristo kani”. Kasapasmi ningakuna: “Ñami chi puncha chaimuku”. Chasa nigpikunapas, mana paikunata katingichi. ⁹ Tukuimami mana llakispalla wañuchinakugta, ñi pita mana uiaspalla piñachirinakugta iacharingapa ka; kamkuna mana mancharinakungichi. Chasami ñugpa pasaringapa ka. Nigpipas, kai alpa puchukarii puncha manara chaimuska niraiianchu.

¹⁰ Chasa nispaka, kasapasmi nirkakunata:

—Sug mandag alpanigmandakunawa sugnigmandakunawa wañuchinakuimi tiangapa ka. ¹¹ Alpa kuiurispa chapurispami ringapa ka. Sugnigmanda sugnigmanda iapa iarkai i purig unguikunapasmi tiangapa ka. Awapipas iapa manchangasina mana imaurapas kawaskasinami kawaringapa ka.

¹² —Tukui chikuna manara pasarigpimi, kamkunata apispa, mana allilla rurangapa kankuna. Tandaridiru wasikunama kamkunata chaiachispa, karsilpimi wichkangapa

kankuna. Kamkuna nukawa kagmanda, atun mandagkunapagmami purichingapa kankuna, justisiai rurai tukungapa. ¹³ Chiura, paikunata nukamandami willankangichi. ¹⁴ Mana iuianakungichi imasa ainingata. ¹⁵ Nukami suma iachaiwa kamkunata iuiachisakichita imasa ainingata. Chi kamkuna iachaskata, ñi maikan kamkunata piñagkuna mana pudingakunachu imapas ainingapa. Upallami kangakuna.

¹⁶ —Chi punchakuna, kamkunapa atunkuna, waugkindikuna, kampurakuna i iacharidupurapasmi kamkunata apichingakuna, justisiai tukungapa. Kamkunata, achkakunatami wañuchingapa apichingakuna. ¹⁷ Tukuikunami kamkunawa rabiaringakuna, kamkuna nukawa kagmanda. ¹⁸ Chasa rabiariigpikunapas, kamkunapa umamanda ñi sug agcha mana chingachigsinami kankangichi. ¹⁹ Nukamanda iuiailawa apanakungichi. Chasaka, kamkunapa almata kispichinkangichimi.

²⁰ —Jerusalén puibluta achka suldadukuna muiuchinakugta kawaspaka, iuianakungichi, chi puiblu ña puchukaringapa kagta. ²¹ Chasa kawaspaka, Judea alpapi kaugsanakug, sachukuma mitikuchukuna. Jerusalenpi kagkuna, chimanda mitikuspa, llugsichukuna. Chagrapi kagkunapas, mana Jerusalenma samuchukuna. ²² Chi punchakuna, iapa llakiimi tukungapa ka. Tukui imasa ñugpamanda librupi niraiaskasinami pasaringapa ka.

²³ —¡Ai, maikan warmijimkuna, chi punchakuna wigsawa ungu u uchulla markaska kagkuna! Kai alpapi iapa achka llakiikunami tiangapa ka. Kai Israelmanda runakunawa, Taita Diospa rabiama chaimungapa ka, tukui llakiikuna tiangapa. ²⁴ Chiura, sugkunata ispadawami wañuchingapa kankunata. Sugkunataka wataspa, sug alpakunamami apan-gapa kankunata. Jerusalentaka, mana Israelmanda runakunami mandangapa kankuna, imaura Taita Dios paikuna chipi kangapa niraiaska puncha chaimungapa.

Jesús imasa ikuti samungapa kaskamanda

²⁵ —Indi, killa, istrillakunapas, mana imaurapas kawaskasinami kawaringapa ka. Kai alpapi lamar iakukuna iapa sinchi uiariuraka, tukui kaugsagkuna, iapa mancharispa, tuntiadusina mana iacharingapa ka ima ruranga. ²⁶ Kai alpapi imasa pasarikugta iuiarispa, dimanchaimi wañuskasina builtanakungapa ka. Kai alpamanda awa ladu tiaskakunapasmi kuiuchii tukungapa kankuna.

²⁷ —Chiura, kai Runa Tukuskatami kawawangapa kankuna. Nukapa tukui iapa suma iachaiwa puipimi samungapa kani.

²⁸ —Chasa pasarii kallariuraka, kuntintulla alli iuiachiiwa kangichi. Kamkunata kispichii puncha ñami chaimungapa.

²⁹ Chasa nispaka, paikunata iui ai apingasina suma parlarka, kasa nispa:

—Igu u maikan sachata kawaspaka, iachaikuichi. ³⁰ Pangakuna ña susuriura, kamkuna kawaspaka, ningichimi: “Ñami alli punchakuna chaimuku”. ³¹ Chasallata kamkuna, tukui chasa pasarinakuskata kawaspaka, ñami iachankangichi, Diospa suma mandai puncha ña chaimukugta.

³² —Kasami nuka niikichita: manara tukui kunaura kaugsagkuna wañugpimi tukui chasa pasaringapa ka. ³³ Sug luar i kai alpa luar puchukarigpipas, nuka ima niskaka mana ialingapa kanchu.

³⁴ —Sumaglla iuianakungichi. ¡Ujalallapas jiru iui aikunallawa, machaiwa i kai alpamanda imakunapas munailawa kanrangichi! Chasa kaugsanakugpika, chi puncha chaimungami, kamkuna mana iuianakuura. ³⁵ Imasami tuglla urma: chasallatami chi puncha, kai alpapi tukui kaugsanakugpaga chaimungapa ka. ³⁶ Chimanda, imaurapas iuiaipilla kangichi. Taita Diusta iuiarispa mañanakungichi, tukui chasa pasaringapa punchakuna chaimuura, kamkuna kispiriska kangapa; chasallata, kai Runa Tukuskapa ñugpa ladu mana manchaspalla saiarigringapa.

³⁷ Jesús, chi punchakuna Diospa atun wasi ukupi chisiagta iachachikurka. Tutakunaka, Olivos suti lumapi pakarikugrirka. ³⁸ Tutatakunaka, achka runakuna Diospa atun wasima chaimungarirka, paita uangapa.

22

Jesusta wañuchingapa iuianakuskamanda

¹ Tanda mana libadurawa mikudiru paskua suti atun puncha ña chaimuura, ² iaia sasirdutikuna i Moisés ima niskata iachachig taitakunaka, Jerusalenpi achka runakuna kaskata manchanakuspa, paipura rimarinakurka, imasa Jesusta pakalla wañuchingapa. ³ Chiura, chunga iskai Jesús agllaskakunamanda Judas Iskariote suti runapa sungupimi iaia kuku iaikurka. ⁴ Chi runaka, iaia sasirdutikuna i Diospa atun wasita kawagkunapagma rispa, rimanakurka imasa Jesusta apichingapa. ⁵ Paikuna, chasa uiaspaka, sumaglla kuntintarispa, nirkakuna:

—Kulkimi kamta karasunchi.

⁶ Chiuramanda Judas, “Ari” nispa, maskai kallarirka imasa Jesusta apichingapa, mana achka runakuna kawanakuura.

Íaia Jesús, ña wañungapa chaiakuura, katiraiagkunawa mikuskamanda

⁷ Tanda mana libadurawa mikudiru atun puncha chaiarka; chiurallatata paskua ubija wañuchispa mikungapa. ⁸ Nigpi Jesuska, Pedro i Juanta kacharka, kasa nispa:

—Allichigriichi, paskua punchapa mikui nukanchi mikungapa.

⁹ Chiura tapurkakuna:

—¿Maipitak munangi, nukanchi allichigringapa?

¹⁰ Chiura, Jesuska ainirka:

—Kamkuna puiblupi chaiagriuraka, sug runa iaku wabkanawami tupanga. Paita katingichi, sug wasima iaikunkama. ¹¹ Chi wasiugta nigringichi: “Nukanchita iachachig taitami kachamú, kamta tapungapa: ‘¿Maikan uku ladutak nukapa katiraiagkunawa paskua mikungapa kani?’.” ¹² Chiura chi runaka, awapi sug atun uku tukui ima ministiskakunawa tim allichiskatami kawachingapa ka. Nukanchi mikungapa, chipi allichingichi.

¹³ Chi kchai tukuskakuna chaiagriuraka, tukui imasa Jesús niskasina allilla tukug-samurka. Chipimi allichirkakuna, paskua mikungapa.

¹⁴ Ña mikui kallaringapa chaiauraka, Jesús, pai agllaska runakunawanta tiarigrirka. Tukui mikuspa tianakuura, ¹⁵ Jesuska nirkakunata:

—Iapami munakurkani, kamkunawa kai paskua mikungapa, nuka manara wañuchii tukugpi. ¹⁶ Kasami niikichita: kai mikui mana mas mikungapa kanichu, imaura Diospa suma mandai puncha chaiankama.

¹⁷ Chasa nispaka, sug binu kupata makipi charirispa, “Pai Siñur” Taita Diusta nispa, paikunata nirka:

—Chaririichi. Rasiunarispa, upiaichi. ¹⁸ Kasami niikichita: kuna ramanda, ubas iaku mana mas upiangapa kanichu, imaura Diospa suma mandai puncha chaiankama.

¹⁹ Nispaka, tandata makipi charirispa, “Pai Siñur” Taita Diusta nirka. Tandata pitichispa, paikunata kuaspa, kasami nirka:

—Kai, nukapa kuirpumi ka, kamkunamanda karaska kangapa. Nukamanda iuiarispa, chasallata tandata pitichispa rurangichi.

²⁰ Ña mikuskauramandaka, sug binu kupata chasallata charirispa, kasami nirka:

—Kai binu kupa, nukapa iawarmi ka, Taita Dioswa i runakunawa ikuti pasinsiachirispa sumaglla tukungapa. Kamkunamandami chi iawar llugsispa icharingapa ka.

²¹ —Uiamuichi. Sug nukawa sugllapi kai misapi tiakugmi apichiwangapa ka. ²² Imasami ñugpamandata willaraiá: chasallatami kai Runa Tukuskata pasariwangapa ka. Chasa kagpipas, jai, chi runa apichiwag!

²³ Chiura Jesuspa agllaska runakuna, kikinpura tapurinakurka:

—¿Maikansik nukanchipura Jesusta apichingapa ka?

Maikan mas atun taita kagta, Jesús iachachiskamanda

²⁴ Nispaka, kikinpura sinchi rimarinakurka, kasa iuiarispa: “Nukanchimandaka, ¿pisik mas atun taitasina tukuska niraiianchi?”. ²⁵ Jesuska nirkakunata:

—Kai alpapi atun mandagkuna, mandanakuskapi kaugsagkunata ñi ima mana llakispa-llami mandankuna. Chi mandagkunapas sutichirinkunami: “Allilla ruragkuna”. ²⁶ Kam kikinpuraka, chasa rurag runaka mana kangichi. Kamkunamanda mas atuniaska kag, mas uchullasina tukuchu. Chasallata, kamkunata mas atun taita kag, sugkunapa lutrin-sina tukuchu. ²⁷ ¿Maikantak mas atun taita ka: mikungapa tiakug u paita mikui ialichig? Mikungapa tiakugmi ka. Chasa kagpipas, nukami kamkunata mikui ialichigsina kani.

²⁸ —Kamkuna, nukawami karkangichi, nuka ima llakiikuna iukagpipas. ²⁹ Chimandami kamkunata tiarispa mandangapa kuaikichita; imasami nukapa Taita mandangapa kua-warka: chasa. ³⁰ Nispaka, maipi nuka mandakuskapi, kamkunapas nukawami mikunkangichi i upiankangichi. Mandadirukunapimi tiarinkangichi; chasaka, ñugpamanda achala taita Israelpa chungá iskai wambrakunapa wambrakunata kawasa, justisiangapa.

Jesusta mana rigsinichu, Pedro ningapa kaskamanda

³¹ Kasapasmi nirka:

—Simón, Simón, uiamui. Íaia kukuka maskakumi, trigalta chabsichigsina, kamkunata wagllichingapa. ³² Nukaka, kammanda Taita Diusta mañarkanimi, kam mana nukamanda suma iuiaita sakingapa. Kam, Taita Dioswa ikuti tigraspaka, kai waugkindikunata allilla iuiachispa kangí.

³³ Chiura, Simón ainirka:

—Taita waugki, kamta karsilpi wichkaspá, wañuchingapa apagpikunapas, nuka kamwami rintrani.

³⁴ Chasa niura, Jesuska Pedrota nirka:

—Kasami niiki: kai tuta, gallu manara kantagpimi kamka kimsa biaji nukamanda ninalgapa kangi: “Paita mana rigsinihu”.

Jesusta imasa pasaringapa ña chaimuskamanda

³⁵ Chasa nispaka, paikunata tapurka:

—Nuka kamkunata kacharkaikichita mana jigrawa, ñi kulki wakachiduruwa ñi ima chakipi churariduruwa; chiura, ¿imatak pisi karkangichi?

Paikuna ainirkakuna:

—Ñi imapas manima.

³⁶ Chiura, Jesuska nirka:

—Kunauraka, maikanpas jigra u kulki wakachiduruwa iukag, apaichi. Maikan mana ispada iukagpika, kikinpa katangata katuspa, sug ispada randichu. ³⁷ Kasami niikichita: ñugpamanda librupi imasa niraiaskasinami nukata pasariwangapa ka. Chipika, kasami willaraiá: “Paipas, jiru ruragkunawa sugllapimi kawarirka”. Tukui imasa nukamanda willaraiaskasinami tukugsamungapa ka.

³⁸ Chiura nirkakuna:

—Taita waugki, iskai ispadakuna kaipimi tia.

Chiura, Jesuska ainirka:

—Chilla.

Jetsemani wirtapi, Jesús Taita Diusta mañaskamanda

³⁹ Chasa nispaka, Olivos lumama rirka; imasami tukui tutakuna ridur karka: chasa. Paita katiraiagkunapas katichirkakuna. ⁴⁰ Ña chima chaiagrispa, Jesuska nirkakunata:

—Taita Diusta mañanakuichi, tukui mana allilla ruraiakuna kamkunata mana chaiachu.

⁴¹ Chasa nispaka, paikunapagmanta sug rumi sitaska urmagriskasina karuajma rispa, chipi kungurispa, Taita Diusta mañai kallarirka, kasa nispa:

⁴² —Taitiku, kam munaspaka, kai iapa llakiita* anchuchiwai. Nuka chasa munakugpipas, nuka imasa munaskasina mana tukuchu. Kam imasa munaskasina rurai.

⁴³ [Chiura suma luarmanda sug anjil, kawarigsamuspa, mas animuchirka. ⁴⁴ Iapa llakikuspa, Jesuska paipa Taita Diusta masmi mañakurka. Alpama sutuchigtami iawarsina jumbikurka.]

⁴⁵ Taita Diusta mañai puchukaspaka, atarispas, katiraiagkunapagma kutirka. Llakiw puñunakuskata tarigrispa, ⁴⁶ nirka:

—¿Imatak puñurirkangichi? Atarispas, Taita Diusta mañanakuichi, tukui mana allilla ruraiakuna kamkunata mana chaiachu.

Jesusta apiskakunamanda

⁴⁷ Jesús chasa rimakugllapi, achka runakuna chima chaiagrirkakuna. Chi runakunata, chungas iskai Jesús agllaskakunamanda Judas suti runami ñugparaiarka. Jesusta muchangapa iuiwiwa paipagma kaillaiarka. ⁴⁸ Jesuska, Judasta nirka:

—¿Kai Runa Tukuskata muchaspallachu apichiwankangi?

⁴⁹ Ima pasaringapa kaskata kawaspaka, Jesuswa kagkuna paita tapurkaku:

—Taita waugki, ¿ispadakunawachu micharisunchi?—. ⁵⁰ Chasa tapuspa, sug Jesuswa kagpuraka, ispada surkuspa, iaia sasirdutipa lutrinta piaspa, alli ladu rinrita ialigta kuchurka.

⁵¹ Jesuska nirka:

—Chilla. Ianga kawaichi—. Chasa nispaka, chi runapa rinrita tuparispas, aliachirka.

⁵² Iaia sasirdutikuna, Diuspa atun wasita kawagkuna i sug taitakunapas riska karkakuna, Jesusta apichingapa. Chi runakunataka, Jesús tapurka:

—¿Imatak nukata, sisaitasina ispada i garuti kaspikunawa apiwangapa samunakungichi? ⁵³ Tukui punchakunami Diuspa atun wasi ukupi nuka kamkunawa karkani. Chipika, ¿imatak mana makiwa apiwarkangichi? Nigpika, kunaurami kamkuna iana tutapi mandag iaia kukuwa kangichi.

Jesusta mana rigsinihu, Pedro niskamanda

⁵⁴ Jesusta apispaka, chi runakuna iaia sasirdutipa wasima chaiachigrirkakuna. Pedroka, karu karullapi katichikurka. ⁵⁵ Chi wasi kancha chaugpipi nina sindichispa, muiugta tiarirkakuna. Pedropas, paikunawa tiarirka. ⁵⁶ Chiura sug kawag warmika, Pedro chasa tiakuskata nina sindi punchaiachiskawa kawaspas, ikuti allilla kawaspas, nirka:

—Kai runapas, chi Jesuswami karka.

⁵⁷ Pedroka, chasa uiaspas, nirka:

—Pani, mana paita rigsinihu.

* 22:42 “Kai winja kupata”, iapa llakiitami niraiá.

⁵⁸ Sug manancha unailapika, sug runapas, paita kawaspa, nirka:

—Kampasmi chi runapura kangi.

Pedroka, ikuti chasa uiaspaka, ainirka:

—Waugki, nuka manima paiwa kanichu.

⁵⁹ Ikuti sug urasina kauraka, sug runapas mas sinchi rimaiwa nirka:

—Kai runapas, sutipami chi Jesuswa karka. Galilea alpamandami ka.

⁶⁰ Chiura, Pedroka nirka:

—Waugki, manima iachanichu, kam imamanda chasa rimawakugta.

Pedro chara rimakugllapi, gallu kantarka. ⁶¹ Chiura iaia Jesuska, tigrarispa, Pedrota kawarka. Chiura iuiarigsamurka, imasa Jesús kikin Pedrota nigta: “Kai tuta, gallu manara kantagpimi kamka kimsa biaji nukamanda ningapa kangi: ‘Paita mana rigsinichu.’”

⁶² Chasa iuiarigsamuspaka, kanchama lugsispa, dillakii wakai kallarirka.

Judú taitapura sugllapi tandariska kaskapi, Jesús kaskamanda

⁶³ Jesusta kawag runakunaka, paita unžaspa, piaska charinakurka. ⁶⁴ Paipa ñawita kilpaspaka, piaspaka, ninakurka:

—Willamui: ¿pitak kamta piarka?—. ⁶⁵ Paikuna imasa munaskasina Jesusta kaminaurka.

⁶⁶ Pakariska kauraka, iaia sasirdutikuna, Moisés ima niskata iachachig taitakuna i sug taitakunapas tandarirrakuna. Paikuna tandariska kaskamami Jesusta chaiachigrirrakuna. Chipi chaiachigriuraka, paita nirkakuna:

⁶⁷ —Kam, Taita Dios agllaska Cristo kaspaka, nukanchita willai.

Chiura, Jesuska ainirka:

—Nuka “Ari” nigpika, kamkuna mana uiawankangichichu. ⁶⁸ Nuka ima tapugpipas, mana ainiwankangichichu. ⁶⁹ Chasa kagpipas, kunauramandata kai Runa Tukuska, tukui manduig Taita Diospa alli ladumi tiarigringapa ka.

⁷⁰ Chiura, tukuikuna tapurkakuna:

—Nigpika kam, ¿Taita Diospa wambrachu kangi?

Chiura, Jesuska ainirka:

—Sutipami kamkuna chasa nukamanda nirkangichi.

⁷¹ Chasa ainiura, nirkakuna:

—Chiwanka, ¿imapatat chara paimanda willagkunata ministisunchi? Nukanchi kikinmi uiarkanchi, pai kikin Taita Diussina tukuspa willarigta.

23

Mandag Pilatos kaskapi, Jesús kagriskamanda

¹ Nispaka tukui chipi kagkuna, atarispaka, Pilatos suti mandagpagma Jesusta chaiachigrirrakuna. ² Chipika, Jesusmanda willai kallarirrakuna:

—Kai runa, nukanchi Israelmandakunata sug rigcha sug rigcha iuiachispa purikuskatami uiarkanchi. Nikurkami: “Romamanda iaia mandagta mana impuistu kulki kuangichi”. Kasapasmi nikurka: “Cristo, atun mandagmi kani”.

³ Chasa uiaspa Pilatoska, Jesusta tapuchirka:

—Kam, ¿judiukunapa atun mandagchu kangi?

Chiura, Jesús ainirka:

—Sutipami kam chasa nirkangi.

⁴ Chiura Pilatoska, iaia sasirdutikunata i tukui chipi kagkunata nirka:

—Kai runata mana tarinichu ñi ima pandariska kagta.

⁵ Chipi kagkunaka, mas sinchi rimaiwa nirkakuna:

—Tukui Judea alpapi, Galileamandata kai puiblukama, runakunata iachachispa, sug rigcha sug rigcha iuiachispami purikurka.

⁶ Chasa uiaspaka, Pilatoska tapurka:

—Kai runa, ¿Galileamandachu ka?—. ⁷ “Ari” ainiura, Herodes Galileapi mandag Jerusalenpi kagmanda iachaspaka, Jesusta paipagma kacharka.

Mandag Herodes kaskapi, Jesús kagriskamanda

⁸ Jesusta kawaspa, Herodeska iapa kuntintarirka. Ña unaimandata paimanda uiaspa, munakurka, ñi imaurapas mana kawaskasina ruragta kawapungapa. ⁹ Nispaka, Jesusta imakunapas achkami tapuchikurka. Nigpika Jesuska, ñi ima mana ainirka.

¹⁰ Iaia sasirdutikuna i Moisés ima niskata iachachig taitakunapas, chipi kaspaka, Jesusmanda iapa sug rigcha sug rigcha willanakurka.

¹¹ Jesús mana ainigmanda, Herodeska, suldadukunawa paita asispa, sutipa mandagsina kawaringapa, iapa suma katanga katachirkakuna. Nispaka, Pilatospagma paita ikuti

kacharka. ¹² Chi punchamanda, Pilatoswa Herodeswa ikuti allilla tukurkakuna. Ñugpata paipura piñachiriskami karkakuna.

Jesusta wañuchigriichi, Pilatos niskamanda

¹³ Pilatoska, iaia sasirdutikunata, judíu taitakunata i tukui chipi kagkunatapas tandachispa, ¹⁴ nirka:

—Kai runata pusamuspaka, niwarkangichimi: “Kaika, tukuikunatami sug rigcha sug rigcha iuiachispa purikurka”. Nukaka, kamkunapa ñawipi paita ña tapuchispa, imasa paimanda willawaskasina ñi ima pandariipas mana taripunichu. ¹⁵ Herodespas, mana imapas tarirkachu. Nispami nukanchipagma ikuti kachamurka. Nigpika, ñi imapas mana pandariska kagmanda, ¿imamandatak wañuchingapa chái? ¹⁶ Asutichispaka, kacharingapami kani.

[¹⁷ Wata watapi atun puncha chaiaura, Pilatos iacharka, sug karsilpi kaskata kacharinga.] ¹⁸ Pilatos Jesusta kacharingapa niuraka, tukui chipi kagkuna sugllasina kaparii kallarirkakuna, nispa:

—Jesusta manima. Barrabastaka kacharii.

¹⁹ Chi Barrabás, chi puiblupi mandagkunapa kuntra atarichispa, wañuchidur kagmandami karsilpi wichkaraiarka. ²⁰ Pilatoska, Jesusta kacharingapa munakuspa, ikuti rimarkakunata. ²¹ Paikunaka kaparirkakuna, nispa:

—Kruspi churai. Kruspi churaspa wañuchii.

²² Pilatoska, ña kimsama ikuti nirka:

—¿Imapitak kawarí, mana allilla ruraska kagta? Ñi ima pandariipas mana tarinichu. ¿Imamandatak paita wañuchingapa chái? Asutichispaka, kacharingapami kani.

²³ Chiura, mas sinchi kaparispa, tukuikuna mañarkakuna, Jesusta kruspi churai tukungapa. Chasa kaparinakuskamanda, paikuna imasa munanakuskasina tukurka. ²⁴ Pilatospas iuiarigsamurka, paikuna mañanakuskata: “Ari” ningapa. ²⁵ Chi mandagkunawa kuntra atarichispa wañuchidurta karsilpi wichkaraiaskata kacharirka, imasa mañanakuskasina. Jesustakar kacharka, imasa paikuna munanakuskasina wañuchii tukungapa.

Jesusta kruspi klabagriskakunamanda

²⁶ Ña Jesusta llugsichinakuskapika, Sirene puiblumanda Simón suti runata apirkakuna. Chi runa, chagramandami chaiamukurka. Paitaka Jesús markaspa apakuska krusta markachirkakuna; chasaka, Jesusta katichingapa.

²⁷ Achka runakuna, Jesusta katichinakurka. Achka warmikunapas, katichinakuspa, paimanda llakiwa kaparispa wakanakurka. ²⁸ Jesuska, chi warmikunapagma tigrarispa, nirka:

—Kam Jerusalemmanda warmikuna, nukamanda mana wakanakuichi. Kam kikinkunamanda i kamkunapa wambrakunamandakar wakangichi. ²⁹ Sug punchakuna chaiamuraka, ningakunami: “Mana wambra iukagkuna, imaurapas mana wigsawa ungurigkuna i mana chuchuchigkuna, kuntintulla alli iuiawami kankuna”. ³⁰ Chiura, lumakunata ningakunami: “Nukanchipagma urmagsamuichi”. “Awa lumakuna, nukanchita kilpagsamuichi”. ³¹ Chawa kaspita kasa ruragpikunaka, chakiska kaskataka, ¿imasasik rurangakuna?*

³² Iskai mana allilla ruragkunatapasmi apanakurka, Jesuswa sugllapi wañuchingapa. ³³ Uma Tullu suti pambama chaiagrispaka, Jesusta kruspi klabarkakuna. Chi iskandi mana allilla ruragkunatapas kruspi klabaspa saiachirkakuna: sugtaka Jesuspa alli ladu, sugtaka paipa lluki ladu. [³⁴ Jesuska nirka:

—Taitiku, paikunata pasinsiai. Mana iachankunachu ima ruranakugta.]

Jesuspa katangakunataka, suldadukuna suirtipi pugllarkakuna, iachangapa: imasami chái, paipura sug sug apangapa.

³⁵ Tukui chipi kagkuna kawanakurka. Judíu taitakunaka, Jesusta iapa unzaspa, ninakurka:

—Kam, sugkunata kispichigsamurkangisi. Kunaura, kam kikin kispichirii, Taita Dios agllaska Cristo kaspaka.

³⁶ Suldadukunapas, unzaspa, paipagma kaillaiaspa, winja binu chupachispa, ³⁷ ninakurka:

—Judiukunapa atun mandag kaspaka, kam kikinlla kispichirii.

³⁸ Kruspi, Jesuspa uma awa ladu, sug willaraiaskami churarkakuna. Chipi, kasami niraiarka: “Kaimi ka judiukunapa atun mandag”.

³⁹ Chi iskandi mana allilla ruragpuramanda klabaraiaskapas, sugka, Jesusta kamispa, nikurka:

* **23:31** Cristo ñi imapi mana pandariskata chasa ruragpikuna, ¿imasasik Jerusalemmanda pandarigkunata rurangakuna?.

—Kam, ¿manachu Cristo kangi? Chasa kaspaka, ¿imapatak mana kispichiringi, kam kikin i nukanchitapas?

⁴⁰ Ikuti sugka, kamikuskata piñarka, kasa nispa:

—Kam, ¿imapatak mana Taita Diusta manchangi, kai runa pasakuskasinallata pasakuspapas? ⁴¹ Nukanchitakar sutipami chaiakurka, kasa pasangapa, pandariskakunamanda. Ikuti kai runaka, ñi imapi mana pandariska kanchu.

⁴² Nispaka, Jesusta nirka:

—Kam atun mandag tukuspaka, nukamanda iuiariwangi.

⁴³ Chasa niura, Jesuska ainirka:

—Kasami nuka niiki: kunaumandatami nukawa kagringapa kangi, paraíso suti suma luarpi.

Jesús wañuskamanda

⁴⁴ Ña chaugpunchasina tukuuramanda chaugpi chisikama, tukui alpa lim tutaig-samurka. ⁴⁵ Indipas, lim amsaiarka. Diuspa atun wasi ukupipas atun linsu arkaraiaska, chaugpi chaugpimi llikirigsamurka. ⁴⁶ Chiura Jesuska, sinchi kaparirka, kasa nispa:

—Taitiku, nukapa ispiritutami kamta mingaiki—. Chasa nispaka, wañurka.

⁴⁷ Imasa pasariskata kawaspaka, kapitanka, Taita Diusta iapa suma atun kagta nispa, nirka:

—Kai runa, sutipami ñi imapi mana pandarig karka.

⁴⁸ Chima kawangapa riskakunaka, tukui ima pasariskata kawaspaka, llakiiwa pichupi makiwa piarisa, paikunapagma kutirkakuna. ⁴⁹ Jesusta tukui rigsikuna i Galilea alpaignimanda paita katiraiaska warmikunaka, karumandalla tukui ima pasarikuskata kawakurka.

Jesús pambai tukuskamanda

⁵⁰ Judíu taitapuramanda tiarka sug runa José suti, suma rurag i allilla iuiaiwa kag. ⁵¹ Chi Jesuspa kuntra iuiarisa ruraska taitakunawa, paika chasa mana munaska karka. Judea alpa i Arimatea suti puiblumanda karka. Diuspa suma mandai chaiamungapa punchata suiakurka. ⁵² Paika, Pilatospagpi iaikugrispa, Jesuspa kuirputa mañarka. ⁵³ “Ari” niuraka, Jesusta krusmanda uraikuchigrispa, suma linsuwa maituspa, murtajarka. Sug rumi piñapi atun utkuchiskapi, ñi pita manara pambaska kaskapimi utkalla churagrirkakuna. ⁵⁴ Ña warda puncha chaiakugmanda, chi chisika chaiarka, tukui sumaglla allichirinakungapa.

⁵⁵ Galileamanda Jesusta katig warmikunaka, Joseta katichispa, kawarkakuna, maipi i imasa kuirputa churaspa sakigtakuna. ⁵⁶ Chimanda kutispaka, suma asnari ugsakuna i chasallata suma asna iaku allichirkakuna. Kaiandika, warda puncha kagmanda, imasa niraiaskasina samarirkakuna.

24

Jesús kaugsariskamanda

¹ Simana kallarii puncha u duminguka iapa tutata, chi warmikunaka, chi suma asnari allichiskata apaspa, Jesús pambaraiaskama rirkakuna. ² Chaiagriskapa, chi atun utkuchiska pungupi kilparaiaska rumita tim anchuchiska kaskata tarigrirkakuna. ³ Iaikus-paka, Iaia Jesuspa kuirputa manima tarirkakuna. ⁴ Mana tiagmanda ujnarispa kawanakuraka, iskai runa, iapa iura puncha katanga churariskakunami kawarigsamurkakunata. ⁵ Chi warmikuna, iapa mancharispa, ñallapas alpakama kumurispa kawanakurka. Chiura, chi runakunaka nirkakunata:

—¿Imapatak kaugsariskata maskanakungichi wañuskakuna pambadirupi? ⁶ Kaipi mana kanchu. Kaugsarirkami. Iuiariichi ima kamkunata rimaskata, Galilea alpapi kaura. ⁷ Kasami nirka: “Kai Runa Tukuskataka mana allilla ruragkuna apispa, kruspi churaspami wañuchiwangapa kankuna. Kimsa punchapika ikutimi kaugsaringapa kani”.

⁸ Chiura chi warmikunaka, Jesús chasa niskata iuiarirkakuna. ⁹ Chi pambadirumanda kutispaka, chungu sug Jesús agllaskakunata i tukui paita katiraiagkunatapas tukui imasa kawaskasina willagrirkakuna. ¹⁰ Jesús agllaskakunata chasa willagkuna karkakunami María Magdalena, Juana, Santiagopa mamandi María i sug warmikunapas. ¹¹ Paikuna chasa willanakugpipas, chi runakunataka uiarirka mana iuiailapi rimanakugsina. Chimanda mana munarkakuna, chasa kagta uiangapa. ¹² Pedroka, atarisa, chi pambaraikaskama kalparka, kawangapa. Chaiagriskapa, kumurispa kawarka. Chiura, linsukunalla chipi tiarka. Chasa kawaspaka, ima pasarikugta iapa ujnarispa kutirka.

Emaús puibluma ñambipi, Jesús kawariskamanda

¹³ Chi punchallata, iskai Jesusta katiraiagkuna Emaús suti puibluma ñambipi rinakurka. (Chimanda Jerusalemna chungu sug kilumitrusinami tia.) ¹⁴ Rinakuskapika,

tukui ima pasariskamanda rimanakurka. ¹⁵ Paikuna rimaspa rinakuskapi, Jesús kikin, kaillaiaspa, paikunawa sugllapi rii kallariirka. ¹⁶ Chasa sugllapi rinakuspapas, paikuna mana rigsingapa pudirkakuna. ¹⁷ Jesuska tapurkakunata:

—¿Imamandatak rimaspa rinakungichi?

Chiura, llakiwi irkiaspa, saiarirkakuna. ¹⁸ Sugllapi rigpura, Kleofas sutika, ainirka:

—¿Imawantak kam mana iachangi, kai punchakuna Jerusalemipi ima pasarigta? Kamlachar, mainigmanda samuska kaspas, ñi ima mana iachangi.

¹⁹ —¿Imatak pasarirka?— Jesús tapurka.

Chiura ainirkakuna:

—Nazaret puiblumanda Jesús ima pasagta. Pai runa, Santu Ispirituwa rimag kaspas, Taita Diuspa i runakunapa ñawipi mana imaurapas kawaskasina ruraspa, tukuipi allilla iachachispami karka. ²⁰ Paitaka, iaia sasirdutikuna i nukanchipa taitakuna apichirkakuna, kruspi churaspa wañuchingapa. ²¹ Nukanchikar iuianakurkanchimi: “Paimi Israelmanda runakunata kispichinga”.

—Kasapas. Kunaura, kimsa punchami ña chasa pasariska ka. ²² Nukanchipura sug warmikuna, nukanchita ujnachirkakunami. Paikuna, kai tutata pambaraiaskama rispa, ²³ kuirputa manimasi tarigrirkakuna. Chimanda kutimuspa, ninakurkami: “Anjilkuna, muskui ukupisina kawarispas, nirkakunasi: ‘Paika, kaugsami ka.’” ²⁴ Chiura nukanchiwa sug kagkunapas, pambaraiaskama rispa, imasa warmikuna niskasina tarigrirkakuna. Jesuska, manimasi kawarirka.

²⁵ Chiura, Jesuska nirka:

—Ai, kam runakuna, ¿manarachar iui ai iukangichi? Santu Ispirituwa rimagkuna tukui ima ñugpata willaraiaskata, ¿imawantak kamkuna, iapa allimanda iuiaringichi? ²⁶ ¿Manachu Cristota chaiarka, chasa pasangapa; chiwanka pai sumata atuniachiska, Taita Dius kaskapi iaikugringapa?

²⁷ Chasa nispaka, Moisés i Santu Ispirituwa tukui rimagkuna imasa willaraiaskamanda iuiachingapa kallariirka; chasaka, tukui ima ñugpamanda librupi paimanda willaraiaskata ima niraiagta paikuna iachangapa.

²⁸ Paikuna rinakuska puibluma ña chaianakugriuraka, Jesús mas karuma ialikugsina rii kallariirka. ²⁹ Chiura nirkakuna:

—Mana rikui. Nukanchiwa samarii. Ñami chisi ka. Kamta tutaiangapami ka.

³⁰ Chasa niura, Jesuska paikunapagpi iaikurka, samaringapa. Nispa, ña paikunawa mikungapa tiakuspaka, tanda charirispa, “Pai Siñur” Taita Diusta nirka. Tandata pitichispa, paikunata kararka. ³¹ Chasa ruraurami ñawi paskarigsina tukurkakunata. Chasaka, Jesuska rigsirkakuna. Chiuralla, paikunapa ñawipi mana mas kawarirka.

³² Chiura, paipura ninakurka:

—Ñambi samunakuskapika nukanchiwa rimanakuspa, ñugpamanda librupi willaraiaska imasa niraiagta willakuura, ¿manachu nukanchita iapa alli iuiachirigsamurka?

³³ Chasa ningallawaka, atarispas, Jerusalemata kutirkakuna. Jesús kikin chungas agllaskakunapagma chaiagrirkakuna. Chipika, sugkunapas sugllapi kaskatami tarigrirkakuna. ³⁴ Chipi kagkunaka, paikunata nirkakuna:

—Iaia Jesús, sutipami kaugsariska ka. Simontami kawarirka.

³⁵ Chiura, paikunapas willarkakuna imasa ñambi rinakuskapi pasarigta. Imasa Jesús tandata pitichiura rigsigtakunapas willarkakuna.

Jesús, kaugsarispas, paita katiraiagkunata kawariskamanda

³⁶ Chasa rimanakugllapi, Jesuska, paikunapa chaugpipi saiarigsamuspa, “¿Allillachu ka-puangichi?” nirkakunata.

³⁷ Chiura, iapa mancharispas, ujnarisipami iuianakurka: “Sug wairatachar kawanakunchi”. ³⁸ Chiura, Jesuska nirka:

—¿Imapatak mancharingichi? ¿Imapatak kamkunapa sungupi chasa iuianakungichi?

³⁹ Nukapa maki i chakikunata kawaichi. Nuka kikinllatatami kani. Llamkawaspa, kawawaichi. Waira, aicha ñi tullu mana iukankunachu. Ikuti nukaka, imasa kamkuna kawawanakugsinami aicha i tullu iukani—. ⁴⁰ Chasa nispaka, maki i chakita kawachirkakunata.

⁴¹ Chasa kawaspa paikuna, iapa ujnarispa, dikuntintu manara pai kikin kaskata iuiarinakugmandaka, tapurkakunata:

—¿Imatak mikungapa tiapungichita?

⁴² Chiura, sug piti chalwa kusaska kararkakuna. ⁴³ Chita chaskispaka, paikuna kawanakugllapi mikurka.

⁴⁴ Mikuspaka, nirkakunata:

—Nuka, ñugpa kamkunawa kaspera, kasami nirkaikichita: Moisés imasa rurangapa niskasina, Santu Ispirituwa rimaraiaskasina i Salmos librupi tukui imasa nukamanda willaraiaskasinami iukarka pasaringa.

⁴⁵ Chasa nispaka, paikunapa umapi iuiaikunata punchaiachigsina iuiachirka; chasaka, ñugpamanda librupi willaraiaska ima niraiaskata iachangapa.

⁴⁶ Kasapasmi nirkakunata:

—Kasami chi librupi willaraiá: Taita Dios agllaska Cristo, iapa nanai i llakii iukaspami wañungapa ka. Nispaka, kimsa punchapi ikutimi kaugsaringapa willaraiá. ⁴⁷ Paimanda, Jerusalenpi kallarispera, tukui alpapunapi willagringapami niraiá. Maikan pandarii-kunata sakispa Taita Dioswa tukugsamuskakunataka, pandariikuna pasinsiai tukungapami willaraiá.

⁴⁸ —Kamkunaka, tukui ima pasariskata kawaspera, nukamanda willagkunami kankangichi. ⁴⁹ Nigpika, nukapa Taita kamkunata karamungapa niskatami nuka kachamusakichita. Chimanda, kai puiblullapi suiangichi, imaura suma luarmanda paipa iapa iachaita chaskinkama.

Suma luarma, Jesús sikaskamanda

⁵⁰ Chasa nispaka, Betania puibluma ña chaiankama paikunata pusarka. Chipi chaiagripaka, makikunata atarichispa, Taita Diusta paikunamanda mañapurkakunata. ⁵¹ Chasa mañakuspalla, paikuna kawanakugllapi, suma luarmani sikai kallarirka.

⁵² Paikunaka, Jesusta kungurirkakuna. Nispaka, suma alli iuiachiiwa Jerusalenma kutirkakuna. ⁵³ Chipika, Diospa atun wasipi imaurapas nidur karkakuna:

—Kam Taitiku, iapa suma atunmi kangi.

IAIA JESUSMANDA ALLI WILLAITA SAN JUANMI WILLA

Diuspa Rimai, Jesús suti runa tukuskamanda

¹ Kallariura, ñi imapas manima tiaura,
timpumi Diuspa Rimai tiarka.
Paimi Taita Diuspi tiarka.
Diusllatatami karka.

² Kallariura, mana imapas tiaskauramandata,
Taita Diuspimi tiarka.

³ Paiwami tukui ima ruraska tia.
Mana pai kagpika, ñi imapas mana ruraskami kantra.

⁴ Pai kikinpami kaugsai tiarka.
Chi kaugsaimi runakunapa iuiaikunata punchaiachigsamú.

⁵ Chi punchaiachig runa samurkami,
maipi iana tuta iuiaiwa kaskakunata punchaiachingapa.
Chi punchaiachii iuiaitaka,
tutaichig mana puchukangapa pudirka.
Punchallami kidá.

⁶ Tiarka sug runa, Juan suti, Taita Dius paita kachamuska. ⁷ Pai samurkami, runakunapa iuiaikunata punchaiachigmanda willag kangapa; chasaka, tukuikuna pai ima willaskata suma iuiaringapa. ⁸ Juan, mana chi punchaiachig karkachu. Chi punchaiachigmanda willangapami samurka. ⁹ Chi punchaiachig runaka, sutipa punchaiachigmi ka. Paimi tukui runakunapa iuiaikunata punchaiachigsamú. Paillatami kai alpama samurka.

¹⁰ Paiwa kai alpa wiñachiska kagpipas, ña kai alpama samuska kaura, kai alpamanda runakuna mana paita rigsirkakunachu. ¹¹ Pai kikinpa alpamanda runakunapama samurka. Chiura, pai kikinpa runakuna mana munarkakuna, paita chaskingapa. ¹² Maikankuna paita suma iuiarispa chaskigkunatar nirkakunata, Diuspa wambrakuna tukungapa. ¹³ Chi suma iuiagkuna, runapa iawarmanda, ñi kasadupuramanda ñi kari munaskamanda mana tiagsamunkunachu. Taita Diusmandallami tiagsamunkuna, paipa wambrakuna kangapa.

¹⁴ Diuspa Rimai, runa tukuspa, nukanchiwami kaugsagsamurka. Taita Diuspa suglla wambra kagmanda, pai iapa suma atun kagtami kawarkanchi. Iapa suma kuiag pagtami karka, ñi imapi mana llullaspalla.

¹⁵ Paimanda, Juanka sinchi rimaiwami willarka, kasa nispa:
—Kai runamandami nirkaikichita: “Sug nukamanda mas iachaka, nukapa katimi samungapa ka. Paimi nukamanda mas ñugpa kallarisauramandata tiaska ka”. ¹⁶ Pai tukui iapa allilla iukaspaka, iapa suma kuiaiwami tukui nukanchita imaurapas karamú. ¹⁷ Moisesmandami imasa Taita Dius rurangapa niskata iachanchi. Ikuñi Jesucristomandaka tukui suma kuiaita i sutipa kaskatami chaskinchi.

¹⁸ Ñi pitapas mana imaurapas Taita Dius kawariska canchu. Paipa suglla wambra Diusllatami, Taita Diuspi kaspas, paita nukanchita kawachigsamurka.

Jesusmanda, Juan Bautista musuglla willaskamanda

¹⁹ Jerusalemmanda judíu taitakuna, sasirdutikunata i Diuspa atun wasipi aidagkunata Juanpagma kacharkakuna, tapungapa:

—Kam, ¿pitak kangí?

²⁰ Chiura paika, imasa kaskasina willarka, kasa nispa:

—Nuka, mana Taita Dius agllaska Cristo kanichu.

²¹ —Nigpika— tapurkakuna—, ¿imatak kangí? ¿Eliaschu kangí?

Chiura, paika ainirka:

—Manima.

—Mana kagpika, ¿Santu Ispirituwa rimag samungapa niraiaskachu kangí?

—Manima.

²² Chiura tapurkakuna:

—¿Pitak kangí; chasaka, nukanchi kachamuskakunata willagringapa? Kam kikinmanda, ¿imatak niringí?

²³ Chasa tapuura, Juanka ainirka:

—Nuka kanimi chusa sitaska alpapi sug sinchi rimaiwa kaparig, kasa nispá: “Imasami ñambi allichinchi: chasallata alli iuiaikunata apiichi, atun Taita Diusta chaskingapa”. Chasami Isaiás suti Santu Ispirituwa ñugpamandata nukamanda willaska karka.

²⁴ Chi Juanpagma kachaska runakuna, fariseokunami karkakuna. ²⁵ Nispaka, paita tapurkakuna:

—Nigpi kamka, Cristo, ñi Elías ñi chi Santu Ispirituwa rimag mana kaspaka, ¿imapatak baugtisakungi?

²⁶ Chasa tapuura, Juanka ainirka:

—Nuka, iakullawami baugtisani. Sugmi kamkunapa chaugpipi ka. Kamkuna manara paita rigsingichichu. ²⁷ Paika, nukapa katimi samungapa ka. Paita, nuka mana pudinichu, kungurispa, paipa chakikunapi churaraiaska wataskata paskapungapa.

²⁸ Jordán iaku sug ladu chimba, Betania suti puiblupi, Juan baugtisakusapimi chasa pasarirka.

Jesumanda, Juan Bautista paris willaskamanda

²⁹ Kaiandi, Jesús Juanpagma kaillaiakuskata kawaspa, nirka:

—Kawaiichi. Kaimi ka Taita Diuspa Ubijasina niraiaska. Paika, kai alpapi kaugsagkunapa pandariikunatami anchuchi. ³⁰ Paimandami nuka nirkaikichita: “Sug nukamanda mas iachami nukapa kati samungapa ka. Paika, ñugpamandatami tiarka”. ³¹ Paita, nuka mana rigsirkanichu. Mana rigsispapas, nuka, samuspa, iakuwa baugtisarkanimi; chasaka, Israelmanda runakuna paita rigsingapa.

³² Juan, imasa kawaskasina willaspa, kasami nirka:

—Santu Ispiritu, palumasina rigcha awamanda uraikumuspa, paipagma chaiagsamuskatami kawarkani. ³³ Chikama, paita mana rigsirkanichu. Taita Dius iakuwa baugtisingapa kachamuwagmi niwaska karka: “Kam kawankangimi, Santu Ispiritu uraikumuspa, sug runapagma chaiagsamugta. Chi runami Santu Ispirituwa baugtisag niraiá”.

³⁴ —Nukaka, chasa kawaspa, willaikichitami: “Paimi Taita Diuspa wambra ka”.

Jesusta musuglla katii kallarisakunamanda

³⁵ Sug kaiandi Juanka, ikuti iska paita katiraiagkunawa kaspá, ³⁶ Jesús ialikuskata kawaspa, nirka:

—Kawaiichi. Kaimi ka Taita Diuspa Ubijasina niraiaska.

³⁷ Chasa niskata uiaspaka, chi iskandi runakuna Jesusta katii kallarisakuna. ³⁸ Jesuska, tigrarispa, chi katinakugta kawaspa, tapurka:

—¿Imatak maskanakungichi?

Chiura ainirkakuna:

—Rabí, ¿maipitak kaugsangi?—. (Rabí niraiami: “Tachachig taita”.)

³⁹ Chiura, Jesuska nirka:

—Akushi; kawankangichimi.

Paikuna, rispaka, Jesús kaugsadiru wasita kawagrirkakuna. Ña chisi, mai las kuartru kagmandaka, Jesuswa chipi kidarirkakuna.

⁴⁰ Chi iskandi Juanta uiaspa Jesusta katigkuna, sug karkami Andrés suti Simón Pedropa waugki. ⁴¹ Paika, kikinpa waugki Simonta willagrirka, kasa nispá:

—Mesías runatami tarirkanchi—. (Mesías niraiami Taita Dius agllaska Cristo.)

⁴² Chasa nispaka, Simonta Jesuspagma pusarka. Chiura Jesuska, Simonta allilla kawaspa, nirka:

—Kam kangimi Simón, Jonaspa wambra. Kunauramanda, Sefas sutichisaki—. (Sefas niraiami Pedro.)

⁴³ Kaiandi Jesús, Galilea alpama ringapa munakuspaka, Felipe suti runata maskangapa rirka. Tarigrispaka, paita nirka:

—Katiwai.

⁴⁴ Felipe, Betsaida suti puiblumandami karka, Andrés i Pedropa puiblumandallatata. ⁴⁵ Chiuramanda Felipeka, Natanael suti runata maskangapa rirka. Tarigrispaka, paita nirka:

—Moisés ima rurangapa niskapi willaraiaskasina i Santu Ispirituwa ñugpata rimagkuna willaskasina, pai runawami kawanakurkanchi. Jesús suti Nazaret puiblumanda José suti runapa wambra mi ka.

⁴⁶ Natanaelka nirka:

—¿Imauratak uiaska kanchi, Nazaret puiblumanda suma alli runa llugsigta?

Chiura, Felipeka nirka:

—Akushi; kawankangimi.

⁴⁷ Natanael kaillaiagrikua, Jesuska, kawaspa, paimanda nirka:

- Kaimi ka Israelmanda sug sutipa alli runa, ñi imapipas mana llulla.
⁴⁸ Natanaelka tapurka:
 —Nukata, ¿imasatak rigsiwangi?
 Chiura, Jesús ainirka:
 —Felipe manara kambagma chaiagripita, kam igira sacha sikipi tiakuskatami kawakurkaiki.
⁴⁹ Chasa ainiura, Natanael nirka:
 —Kam iachachig taita, Taita Diuspa wambрами kangi. Israelmanda runakunata iaia mandagmi kangi.
⁵⁰ Chiura, Jesuska ainirka:
 —“Kam igira sacha sikipi tiakuskata kawaspa”, ¿chasa nigmandallachu chasa suma iuiariwangi? Kuna ramanda mas suma mana imaurapas kawaskakunami kawangapa kangi—. ⁵¹ Kasapasmi nirka— Kasami nuka niikichita: suma luar paskariskatami kawan-gapa kangichi, Taita Diuspa anjilkuna kai Runa Tukuskapagma uraikumuspa sikana-kuskata.

2

Kaná puiblupi kasarai budapi, Jesús kaskamanda

- ¹ Kimsa punchapika, Galilea alpamanda Kaná suti puiblupi sug kasaraimi tiarka. Chi kasarai, Jesuspa mamapasmi kagrirka. ² Jesusta i paita katiraiagkunatapasmii kunbidar-kakuna.
³ Chi kasarai, binu pisigsamurka. Chasa kagmandaka, Jesuspa mama, paita nirka:
 —Binu, ña mana iukankunachu.
⁴ Paika ainirka:
 —Mama, ¿imapatok chasa niwakungi? Nukapa puncha manara chaiamunchu.
⁵ Paipa mamaka, chi kasarai aidagkunata nirka:
 —Pai tukui imasa niskasina rurangichi.
⁶ Chi wasipi tiarka sugta atun rumi mangakuna; chikunapi, ñugpamanda judiukuna iachachiskasina maillingapa. Sug sug mangapi, pichka chungu u kanchis chungu litru pagtarka. ⁷ Nigpika Jesuska, aidagkunata nirka:
 —Mangakunapi iaku jundachiichi.
 Chiuralla, tukui mangakunapi jundachirkakuna. ⁸ Chiura, Jesuska nirkakunata:
 —Kunaura wisipa, butijiruta tantiachigriichi.
⁹ Karaura, butijiruka iaku binu tukuskata upiarka, maimanda wisiska kagta mana iachaspalla. Iaku jundachigkunallami iacharkakuna. Upiaspaka, kusa tukungapa kagta kaiaspa, ¹⁰ nirka:
 —Tukuikunapagpimi ñugpa alli binuta karankuna. Nispaka, ña alli upiaska kaura, mananchatami karankuna. Ikuti kamka, kunankamami mas alli binuta wakachiska kangi.
¹¹ Chasami, Galilea alpamanda Kaná puiblupi, Jesús musuglla mana imaurapas kawaskasina rurarka. Chiwa, pai suma atun kagtami kawachirirka. Chasa kawaspaka, paita katiraiagkuna mas suma paimanda iuiarirkakuna.
¹² Chiuramandaka Jesús, paipa mama i waugkikuna i paita katiraiagkunawanta Kafarnaum suti puibluma rirkakuna. Chipi chaiagripaka, sug mailla punchakunami chisiarkakuna.

Diuspa atun wasi ukumanda, Jesús katugkunata llugsichiskamanda

- ¹³ Judiukunapa paskua atun puncha ña chaiamukuura, Jesús Jerusalenma rirka.
¹⁴ Diuspa atun wasi ukuma iaikugripaka, wagra, ubija i palumakuna katugkunata i kulki trukagkuna tianakuskata tarigrirka. ¹⁵ Chasa tarigrispaka, kabristu asutiduru patarispa, tukui chi ukupi kagkunata, ubija i wagrakunawanta kanchama llugsichirka. Trukagkunapa kulkita misakunawanta kaima chima bulachirka. ¹⁶ Paluma katugkunatapasmii nirka:
 —Tukui kaikunatapasmii kaimanda llugsichiichi. Nuka Taitapa wasita mana ruraichi randigsamuduru i katuduru wasi.
¹⁷ Jesusta katiraiagkuna iuiarirkakuna, ñugpamanda librupi kasa willaraiaskata: “Kamba atun wasita kawaspami dillakii puchukarikuni”.
¹⁸ Jesús chasa ruragmandaka, judiukuna paita tapurkakuna:
 —Kamka, ¿imawatak kawachinkangi, kam chasa llugsichingapa pudigta?
¹⁹ Chiura, Jesuska ainirka:
 —Kai Diuspa wasita puchukaichi. Nukaka, kimsa punchapika ikutimi saiachisa.
²⁰ Chiura, judiukuna nirkakuna:

—Kai atun wasi, chusku chungu watapimi saiachiska ka. Kamka, ¿imasatak kimsa punchallapi saiachinkangi?

²¹ Jesuska, Diospa wasimanda chasa nispa, pai kikinpa kuirpumandami nikurka. ²² Pai ña wañuspa, kaugсарiska kaura, paita katiraiagkuna chasa niskata iuiarirkakuna. Chasa iuiarispa, ñugpamanda librupi willaraiaskata i Jesús ima rimaskata mas suma iuiarirkakuna.

Tukuikunata, Jesús rigsiskamanda

²³ Chi paskua atun puncha Jesús Jerusalenpi kaura, achka runakuna, mana imaurapas kawaskasina pai rurakuskata kawaspaka, paita suma iuiarirkakuna. ²⁴ Chasa kagpipas, Jesuska, tukuikunata imasa sungupi iuianakuskata kawaspaka, paikunata mana allilla munarka. ²⁵ Mana paita ministirka, kikin runakuna imasa kaskasina willaringapa. Pai kikinmi kawarka, sungupi imasa iuianakugta.

3

Nikodemo suti runa, Jesuswa rimanakuskamanda

¹ Sug judiu taita fariseo runami karka, Nikodemo suti. ² Chi runaka, sug tuta Jesuspaga chaiagrispa, nirka:

—Iachanchimi, kam iachachig taita, Taita Dios kachamuska iachachig kangapa kagta. Taita Dios mana kamwa kagpika, manachar pudintrangi, chi mana imaurapas kawaskasinata kam rurangapa.

³ Jesuska ainirka:

—Kasami nuka niiki: mana ikuti llullu wawasina tiagsamugpika, ñi maikanpas mana pudingapa kanchu, Taita Dios suma mandakuskapi kawarigringapa.

⁴ Chiura, Nikodemo tapurka:

—Ña ruku runa kaspera, ¿imasatak ikuti pudiringa tiagsamungapa? Nigpi, ¿ikutichu mamandipa wigsa ukuma iaikurispas, pudiri tiagsamungapa; chasachu pudiri?

⁵ Chiura, Jesuska ainirka:

—Kasami nuka niiki: mana iakuwa i Santu Ispiritumanda tiagsamugpika, ñi maikanpas mana pudingapa kanchu, Taita Dios suma mandakuskapi iaikugringapa. ⁶ Mamapa wigsamanda tiagsamug, aichallami ka. Ikuti Santu Ispiritumanda tiagsamugka, alli ispiritumi ka. ⁷ “Chaiakumi, kamkuna ikuti tiagsamungapa”; nuka kamta chasa niskata mana ujnarikui. ⁸ Wairaka, maima munaskamami pukunlla. Waira pukukuskata uiaspaka, mana iachangichichu, mainigmanda pukumukugta ñi masama rikugta. Chasallatami Santu Ispiritumanda tukui tiagsamugkuna tukugsamunkuna.

⁹ Chiura, Nikodemo tapurka:

—¿Imasatak chasa kanga?

¹⁰ Jesuska nirka:

—Kam, Israelmanda runakunata iachachig taitami kangi. Ikuti chasataka, ¿imawantak mana iachangi? ¹¹ Kasami nuka niiki: nukanchika, iachaspami rimanchi; kawaspami willanchi. Nukanchi chasa willaskata, kamkunaka mana munangichichu uangapa. ¹² Nuka kai alpapi tiaskamanda willakuskata kamkuna mana uiawagpika, ¿imasatak suma luarpi tiaskamanda willakuskataka uiawankangichi?

¹³ —Ñi pipas mana suma luarma sikaska kanchu. Kai Runa Tukuska suma luarmanda uraikumuska, paillami ikuti suma luarma sikangapa ka. ¹⁴ Imasami Moisés, chusa sitaska alpapi sug kulibrasina rigchata atarichirka: chasallatami kai Runa Tukuskatapas chaiaiku, atarichii tukungapa; ¹⁵ chasaka, paimanda tukui suma iuiagkuna mana puchukaridiru kaugsaita iukangapa.

¹⁶ Taita Dios, kai alpamanda tukui runakunata ña iapa kuiaspa, kikinpa suglla wambrotami kachamurka; chasaka, paimanda tukui suma iuiagkuna, puchukaringataka, mana puchukaridiru kaugsaita iukangapakuna. ¹⁷ Taita Dios, kikinpa wambrotami kai alpama mana kachamurka, kaimanda runakunata justisiai rurangapa. Nukanchita kispichingapami paita kachamurka.

¹⁸ Maikanpas Taita Diospa wambrotami suma iuiagkuna mana justisiai tukungapa kankunachu. Ikuti maikan paita mana uiagkunaka, Taita Diospa suglla wambrotami uiagmanda, timpumi justisiai tukuska kankuna. ¹⁹ Kasami justisiai tukurkakuna: paikunapa iuiakunata punchaiachig runa kai alpama samuura, paikuna, mana alli rurag runakuna kaspera, chi punchaiachigta mana munarkakuna. Munarkakunami, tutaiachiska iuiakunallawa kaugsanakungapa. ²⁰ Maikan mana alli ruragkuna, punchaiachigta mana munankunachu. Chiwanka, chi punchaiachigpaga mana kaillaiai munankunachu. Kaillaiaipikunaka, mana allilla ruraskamandami piñai tukuntrakuna. ²¹ Ikuti maikanpas

sutipa alli ruragkunaka, punchaiachigpagmami samunkuna; chasaka, paikuna ima alli ruranakuskata Taita Dios imasa munaskasina kagta kawachingapa.

Juan Bautista, ña kimsama Jesusmanda willaskamanda

²² Chiuramanda, Jesús katiraiagkunawanta Judea alpama rirka. Chipi paikunawa kagrispaka, baugtisachiimi kallarirka. ²³ Enón suti Salim puiblu ladullapi, achka iaku tiaskapika Juanpami baugtisakurka. Achka runakunaka, Juanpagma chaianakugrirka baugtisaringapa. ²⁴ Paika, manara karsilpi churai tukuska karkachu.

²⁵ Juanta katiraiagkuna i sug judiüwa sinchi rimanakurka, kasa nispa: "Baugtisarisapaka, ¿imasasik Diospa ñawipi maillariskasina allilla kawaringa?". ²⁶ Nispaka, Juanpagma kailliaspa, nirkakuna:

—Iachachig taita, kam Jordán iaku sug ladu chimba kaura, sug runa kamwa kaskamanda pai pi kagta willarkangi; chi runapassi kunaura baugtisaku. Tukuikunami paiwa rinakú.

²⁷ Chiura, Juanka ainirka:

—Suma luarmanda mana paita imapas karamuska kagpika, manachar paipas ñi imapas pudintra karangapa. ²⁸ Kam kikinkunami uiawarkangichi imasa nuka nigta: "Taita Dios agllaska Cristo, nuka mana kanichu. Paimanda ñugpa rimag kachamuscallami kani". ²⁹ Kasarai punchaka, kusa tukungapa kagmi warmita chaski. Kusa tukungapa kagwa iachariduka, paita uiaspaka, iapa allimi iuiachiri. Chasallata nukatapas, chi runamanda uiaspa, ajai iapa allimi iuiachiriwá. ³⁰ Paitami chaiaku, kunaura nukamanda mas atuniahii tukungapa. Ikuti nukataka chaiawakumi, paimanda mas uchulla tukungapa.

³¹ Suma luarmanda samugmi tukui iaiakunamandapas mas iai ka. Kai alpamanda kagka, kai alpamandallami ka. Chasallata, kai alpapi tiaskakunamandallami rimá. Suma luarnigmanda samugka, tukui iaiakunamandapas mas iaiami ka. ³² Pai ima kawaska i uiaskatami allilla willá. Chasa willagpipas, ñi pipas mana munankunachu uangapa. ³³ Maikan pai ima willaskata uiaspa suma chaskigkunaka, allillami iuiaringakuna, Taita Dios kikin imapipas mana llulla kagta. ³⁴ Taita Dios, paipa Ispirituta mana tupuspallami pai kachamuskata karamurka. Chiwami paipa rimailawa willaku.

³⁵ Taita Dios, kikinpa wambrata iapa kuiaspa, paipa makipimi churarka, tukuipi mandag kangapa. ³⁶ Maikanpas Taita Diospa wambrata suma iuiagkuna, mana puchukariduru kaugsaitami iukankuna. Ikuti Taita Diospa wambrata mana uangapa munagkunaka, chi kaugsaita mana iukangapa kankunachu. Taita Diospa iapa rabiawa llakiitami chaskingapa kankuna.

4

Samaria alpamanda warmiwa, Jesús rimanakuskamanda

¹ Fariseokunaka iachagsamurkakuna, Jestusta katiraiagkuna, Juanmandapas mas achka miraspa, baugtisarinakugta. ² Jesús kikinka mana baugtisakurka. Paita katiraiagkunami baugtisanakurka. Fariseokuna chasa iachaskata uiaspaga, ³ Jesuska, katiraiagkunawanta Judeamanda llugsispa, Galilea alpamami kutirkakuna.

⁴ Chima rinakuura, paita chaiarka, Samaria alpa suiu ialingapa. ⁵ Chi suiu ialikuspa, Sikar suti puiblumami chaiagrirka. Chi puiblu kaillaiakuskapika, ñugpamanda taita Jakob, José suti paipa wambrandita chi alpata karaskasi karka. ⁶ Chipika, sug pusumi tiarka, Jakob sakiska. Jesuska, iapa saikuska purikuspa, chi pusu ladupimi tiarigrirka, ña chaugpunchasina.

⁷ Chiuraka, sug Samariamanda warmisi chaiagrirka, pumumanda iaku surkungapa. Chi warmitaka, Jesús nirka:

—Iaku karawai, upiangapa—. ⁸ (Jestusta katiraiagkuna, puiblumami riska karkakuna, mikui randingapa.)

⁹ Chi warmika ainirkasi:

—¿Imasamandatak kamka, judiü kaspera, nukata iaku mañawakungi, nuka Samariamanda warmi kaskata?—. (Judiükunawa i Samariamanda runakunawa mana rimanakudur kankuna.)

¹⁰ Jesuska ainirka:

—Kam mana iachangichu, Taita Dios ima karangapa tiapugta ñi pi kamta iaku mañakugta. Kam chasa iachaspaka, mañawantrangichar, nuka mana wañudiru iakuta karangapa.

¹¹ Chi warmika nirka:

—Kam taita turika, mana imapas iukangichu, iaku surkungapa. Kai pusu, iapa jundumi ka. Nigpika, ¿imawatak chi mana wañudiru iakuta surkupuanhangi? ¹² ¿Nukanchipa ñugpamanda taita Jakobmanda mas atunchu kangi? Paisik kai pusuta nukanchimanda sakirka.

Kikinsik kai pusumanda iakuta upiadur karka. Paipa wambrakuna i wagrakunapas, chilatata upiadur karkakuna.

¹³Jesuska ainirka:

—Kai pusumanda iakuta upiagkuna, ikutimi iakunaiai iukangapa kankuna. ¹⁴Ikuti maikanpas nuka karaska iakuta upiagkunaka, mana mas iakunaiai iukangapa kankunachu. Chi iaku nuka karaska, pai kikinkunapa kuirpupi iaku ñawi iukagsinami tukungapa ka. Chiwanka, mana puchukariduru suma kaugsaitami chaskingapa kankuna.

¹⁵Chasa ainiura, chi warmi nirka:

—Taita turi, chi iakuta karawai, nuka mana mas iakunaiai iukangapa. Chasaka, mana nukata chaiawangachu, ikuti kai pusupi iaku surkugsamungapa.

¹⁶Jesuska nirka:

—Rilla. Kamba kusata kaiagrispa, kaima ikuti samungichi.

¹⁷Chi warmika ainirka:

—Nuka, mana kusaiug kanichu.

Jesuska nirka:

—“Mana kusaiug kanichu” kam niwangi; allillami ka. ¹⁸Pichka kusakunami iukarkangi. Kunaura kamwa kaugsakug, mana kamba kusa kanchu. Chasapi, sutipami niwangi.

¹⁹Chiura, chi warmi nirka:

—Kam taita turi rigchawangimi Santu Ispirituwa rimag kagsina. ²⁰Nukanchipa ñugpamanda taitakuna, kai lumapimi Taita Diusta kunguriduru karkakuna. Ikuti kamkunaka ningichimi: Jerusalenllapimi Taita Diusta kungurigriduru ka.

²¹Jesuska nirka:

—Kam warmi, nukata suma iuiawai. Kunaura chaiamukumi, mana kai lumapi ñi Jerusalenpi kamkuna Taita Diusta kunguringapa. ²²Kamkunaka mana iachangichichu, pita kungurinakugta suma atuniachingapa. Nukanchikar iachanchimi, pita suma atuniachinakugta. Tukui runakunata kispichig, judiukunapagmandami ka.

²³—Suianakuska puncha ñami chaiamurka. Kunauramandata Taita Diusta sutipa suma atuniachigkuna, Santu Ispirituwa i sutipa iuiaiwami paita suma atuniachingapa kankuna. Chasa atuniachigkunatami Taita Dios maskaku. ²⁴Taita Dioska, ispiritullami ka. Maikanpas paita suma atuniachigkunata chaiakumi, Santu Ispirituwa i sutipa iuiaiwa suma atuniachingapa.

²⁵Chiura, chi warmi nirka:

—Nuka iachanimi, Mesías u Cristo samungapa tagta. Pai samuuraka, nukanchita tukui willangapa ka.

²⁶Chasa niura, Jesuska paita nirka:

—Kamwa rimakug, kam niskaka, nukami kani.

²⁷Chikama Jesusta katiraiagkunaka, chima chaiagrispa, paita sug warmiwa rimanakuskata kawaspaka, iapa ujnarirkakuna. Chasa kawaspapas, mana pipas paita tapurkaku: “¿Imatak munakungi?” u “¿Imatak chi warmiwa rimanakungichi?”.

²⁸Chi warmika, iaku apagriduru wabkanata sakispa, puibluma kalparka. Chaiagrispaka, tukui runakunata nirka:

²⁹—Samuichi. Akushi, kawangapa. Sug runa, tukui nuka ima ruraskatami willawarka. ¿Manacha Cristo kantra?

³⁰Chasa uiaspaka, chi puiblupi kagkunaka, llugsispa, Jesuspagma chaiagrirkakuna.

³¹Chikamaka, Jesusta katiraiagkuna ninakurka:

—Iachachig taita, kaita maillallapas mikui.

³²Paika ainirka:

—Sug rigcha mikui nuka iukani. Chita, kamkuna mana rigsingichichu.

³³Katiraiagkunaka, paipura tapurinakurka:

—¿Maikanchu paita mikui apamupurka?

³⁴Jesuska nirka:

—Nukata kachamuwagmanda, pai imasa munaskasina tukui ruraspa puchukagta kawachiska, chimi nukapa mikui niraia.

³⁵—Kasapas. Kamkuna, ¿manachu ningichi: “Chusku killami chara pisiku, pallangapa”? Nukaka, kasami niikichita: chagrakunatasina ñawiwa runakunata allilla kawaichi. Paikunaka, timpumi killuiaska pallangapasina kankuna. ³⁶Maikan pallagkunaka, ganankunami. Chi pallaskakunaka, mana puchukariduru suma kaugsaitami iukangakuna. Chasaka, tarpug i pallag sugllapimi kuntintarispa tukugsamungakuna.

³⁷—Imasami suura ninchi kasa: “Sugka, tarpugmi ka; sugka, pallagmi ka”: ³⁸chasallatami nukaka kachaikichita, kam kikinkuna mana tarpuskata pallagsina rurangapa. Sug ñugpamandakuna, tarpugsinami iachachirkakuna. Kamkunaka, paikuna ima tarpuskakunata pallagkunasinami kangichi.

³⁹ Chi Samaria puiblumanda warmika, chipi kaugsanakuskata Jesusmanda willagirrika, kasa nispa:

—Tukui nuka ima ruraskatami willawarka.

Chasa uiaspaka, achkakuna Jesusmanda suma iuiarirkakuna. ⁴⁰ Nispaka, paipagma chaiagrispa, mañanurka:

—Nukanchiwa kaillapi kai.

Chimanda Jesús, iskai punchami paikunawa karka. ⁴¹ Pai rimakuskata uiaspaka, mas achkakunami paita suma iuiarirkakuna. ⁴² Nispaka, chi warmita nirkakuna:

—Ña kunauramanda, kam rimakuskallataka mana paimanda suma iuiarinchichu. Nukanchi kikinkuna, paita uiaspami iachanchi, pai sutipa kai alpamanda runakunata kispichig kangapa kagta.

⁴³ Chi puiblupi iskai puncha chisiaspaka, Jesuska llugsirka, pai kikinpa Galilea alpama ringapa. ⁴⁴ Jesús kikin willaska karka, kasa nispa: “Kikinpa alpapi, Santu Ispirituwa rimagkunata mana allilla kuiankunachu”. ⁴⁵ Chi Galilea alpapi kaugsanakug, paskua atun puncha Jerusalemipi Jesús tukui mana imaurapas kawaskasina ruraskatami kawaska karkakuna. Chimandami, Jesús chipi chaiagriuraka, paita iapa sumaglla chaskirkakuna.

Atun mandagta aidagpa wambata, Jesús aliachiskamanda

⁴⁶ Jesús ña Galileapi kaspá, Kaná puibluma ikuti chaiagirrika, ñugpata iakuta binu ruraska kaskama. Chipi karkami sug atun mandagta aidag runa. Chi runapa wambra, Kafarnaum puiblupi ungugi sirikurka. ⁴⁷ Chi runaka, Jesús Judeamanda Galileama chaiakugta iachaspaka, pai kaskama rirka. Chaiagrispaka, mañai kallarirka, kasa nispa:

—Nukapa wasima ripuai, nukapa wambata ambipuungapa. Ñami wañupuaku.

⁴⁸ Jesuska nirka:

—Mana kamkunata imaurapas kawaskasina mana kawachigpika, mana nukamanda suma iuiawangichichu.

⁴⁹ Chi runaka nirka:

—Taita waugki, ripuai, nukapa wambra manara wañupuagpi.

⁵⁰ Chasa niura, Jesús nirka:

—Riilla kamba wasima. Kamba wambra, kaugsami ka.

Jesús niskata uiaspa, suma iuiailawami chi runaka rirkalla.

⁵¹ Ña wasima chaiakugriuraka, paipa sug lutrinkuna, wasimanda llugsispa, tupagirrikakuna, paita willaspa:

—Kamba wambra, allilla kaugsami ka.

⁵² Chiura, paika tapurka:

—¿Imasauratak ambirirka?

—Kaina, chaugpuncha ialimi rupaika anchurka— ainirkakuna.

⁵³ Chasa ainiuraka, chi ungupa taitaka iuiarirka: “Chasaurallatami Jesús niwarka: ‘Kamba wambra, kaugsami ka.’” Chasa iuiarispaka, pai i paipa tukui wasimandakuna, Jesusmanda mas suma iuiarirkakuna.

⁵⁴ Chasaka Jesús, Judea alpamanda Galileama chaiagrispaka, ña parismami mana imaurapas kawaskata rurarka.

5

Iaku kuchaiachiska pata ladupi, unug runata Jesús ambiskamanda

¹ Chiuramanda, judiukuna ikuti sug atun puncha ialichingapa chauraka, Jesuspas ikuti Jerusalemma rirka. ² Chi puiblupi, ubijakunata iaikuchidiru pungu ladullapi tianmi sug iaku kuchaiachiska. Chi iaku, hebreo rimaiwa suti kanmi Betzata. Chipi, pichka atun pungukunami tia. ³ Chikunapi, achka unugkuna sirinurka: ñawi mana kawagkuna, chakiwa mana allilla sarui pudigkuna i mana kuiurii pudigkuna. [Tukui chikuna suianurka, chi kuchaiachiska iaku kuiurinkama. ⁴ Atun Taita Diospa anjil, diul diulpi uraikumuspá, chi iakuta kuiuchidur karka. Iaku kuiuchiuraka, maikan ñugpa iakuma iaikugka ima unguipas ambiriskasik kidadur karka.]

⁵ Chipika karka sug runa, kimsa chungá pusag wata unug. ⁶ Chi runata kawaspaka, Jesuska, unaimandata chipi sirikugta iachaspá, tapurka:

—¿Munangichu ambiriska kangapa?

⁷ Chiura, chi unug runa ainirka:

—Taita waugki, iaku kuiuchigsamuuraka, mana iukanichu ñi pipas nukata iakuma iaikuchiwangapa. Nuka imaurapas kaillaiakunkamaka, sugmi nukapa ñugpa iaikugri.

⁸ Jesuska nirka:

—Atarii. Chakanata atarichispa, kamba wasima rii.

⁹ Chasa nigllapi, chi runaka ambirigsamurka. Chakanata atarichispaka, purii kallarirka.

Chi aliachiska puncha, wardami karka. ¹⁰ Chimanda judiukunaka, chi ambiriska runataka nirkakuna:

—Warda punchami ka. Kamba chakanata apangapa, kuna puncha michami ka.

¹¹ Paika ainirka:

—Nukata ambiwagllatami niwarka: “Chakanata atarichispa, kamba wasima rii”.

¹² Chiura tapurkakuna:

—¿Maikan runatak kamta: “Atarichispa, kamba wasima rii” nirka?

¹³ Chi ambiriska runa mana iacharka pi ambigta. Achka runakunapi, Jesús chapuriska karka. Chiwanka, paipa ñawimanda chingarirka.

¹⁴ Chiuramanda Jesuska, Diospa atun wasi ukupi ambiriska runata kawarispaka, nirka:

—Uiamui. Aliaskami kangi. Mana mas Diospa ñawipi pandaringi. Ikuti pandarigpika, pudinmi kunaauramanda mas mana allillapas tunganga.

¹⁵ Chi runaka, judiukunapagma rispa, nigrirka:

—Nukata ambiwagka, Jesusmi suti ka.

¹⁶ Chiuramanda judiukunaka, Jesús warda puncha chasa ambiskamanda, paita kuntrai kallarirkakuna. ¹⁷ Paika nirkakunata:

—Nukapa Taita, kuna punchapasmi allilla ruraku. Nukapasmi allilla rurakuni.

¹⁸ Judiukuna, chasa niskata uiaspaka, mas wañuchingapa iui ai apirkakunata. Warda puncha unugta aliachiskamandallaka, mana; kikin Jesús, Taita Diussinallatata tukuspa, “Nukapa Taitami ka” nigmandami munanakurka wañuchingapa.

Taita Diospa wambra, paiwa sugllapi tukui ruraskamanda

¹⁹ Chiura, Jesuska nirka:

—Kasami nuka niikichita: Taita Diospa wambra, kikinpa iui ai llawa mana imapas rurai pudinchu. Imasa Taita Dios ruruskata kawaskawami rurá. Taita Dios imasami rurá: chasallatami paipa wambrapas rurá. ²⁰ Taita Dios, paipa wambrata iapa kuiaspami tukui ima ruruskata kawachiwá. Kunaauramanda, ikuti mas sug rigchapasmi ruraikunata kawachiwangapa ka; chasaka kamkunapas, nuka chasallata ruruskata ujnarispa kawawangapa. ²¹ Imasami Taita Dios, wañuskakunata kaugsachispa, paipa kaugsaita kará: chasallatami paipa wambrapas, maikan nuka munaskata kaugsaita karani.

²² —Kasapas. Taita Dios, mana pitapas justisiai ruranchu. Chasapaka, paipa wambratami tukui iachaita kararka, tukui kunata justisiai rurangapa. ²³ Chiwanka, imasami Taita Diusta suma atuniachinkuna: chasallata paipa wambratapasmi tukui kuna suma atuniachingapa kankuna. Maikanpas Taita Diospa wambrata mana suma atuniachigpika, ¿imasatak kikin Taita Dios kachamugta atuniachingakuna?

²⁴ —Kasami nuka niikichita: maikanpas nukapa rimaikunata uiawaspá, nukata kachamuwagmá suma iui agkuna, mana puchukariduru kaugsaitami iukankuna. Mana justisiai tukungapa kankunachu. Diltudupa wañuita kispispa, mana mas wañungapa kaugsaitami tarirkakuna. ²⁵ Kasami nuka niikichita: suianakuska puncha ñami chaimurka; wañuskakunapas, Taita Diospa wambrata rimaita uangapami kankuna. Maikan uiawagkunaka, diltudupa kaugsaitami taringapa kankuna. ²⁶ Imasami Taita Dios kikin, kaugsaita iuká: chasallatami paipa wambrata kararka, kikinpa kaugsaita iukangapa. ²⁷ Paipa wambra runa tukuska kagmá, tukui iachaitami kararka, justisiai rurangapa.

²⁸ —Chasa uiawanakuspaka, mana ujnarinakuichi. Ñami chaimungapa ka, tukui wañuskakuna, nukapa rimaita uiawaspá, ²⁹ paikuna pambaraiaskamanda llugsingapa. Chiura, maikanpas allilla ruraspá wañuskakunaka kaugsaringapami kankuna, mana puchukariduru suma kaugsaita iukangapa. Ikuti mana allilla ruraspá wañuskakunaka, kaugsarispa, justisiaimi tukungapa kankuna, diltudupa ninama kachai tukungapa.

³⁰ —Nuka kikinpa iui ai llawa mana imapas ruranchu. Nukapa Taita imasa niwaskasinawami justisiai rurani. Nuka justisiai ruraskaka, imasa chaiaskasina allillami ka. Chika, nuka mana ruranchu nuka imasa munaskasina. Nukapa Taita kachamuwag imasa pai niwaskasinami rurakuni.

Taita Dios, paipa wambramanda sutipa kagta willaskamanda

³¹ —Nuka kikinmandalla willarikugpi, manachar sutipa kantra. ³² Sugmi nukamanda willag ka. Iachanimi, pai nukamanda willakuskaka tukui sutipa kagta.

³³ —Kamkuna Juanpagma kacharkangichi, nukamanda tapungapa. Chiura pai ainiskaka, tukui sutipami ka. ³⁴ Chasa kagpipas, nukata mana ministiwanchu, ñi maikan runapas nukamanda willangapa. Kam kinkuna kispichii tukuska kangapaglami nuka chasa niikichita. ³⁵ Juan karkami sug bila punchaiachikug sindikugsina. Kamkunaka, chi punchaiachigsinata kawaspaka, sug ratullami alli iui achirisa karkangichi.

³⁶—Juanmanda mas sumami nukamanda willag tia. Imasami nukapa Taita rurangapa kachamuwarka: chasami rurakuni. Nuka ima ruraskata kawaspaka, chikunawami iachankangichi, nukapa Taita nukata kachamuwaska kagta.

³⁷—Nukapa Taita kachamuwagpasmu nukamanda willá. Kamkunaka, mana imaurapas paipa rimaita uaska i pai imasa rigcha kagta kawaska kangichichu. ³⁸ Pai kachamuwaska kagta mana uiawangapa munagmandami paipa rimaita mana kamkunapa iuiapi iukan-gichi.

³⁹—Diuspa Rimai librupi sumami kawangichi, kasa iuiaspa: chipimi mana puchukari-diru suma kaugsaita tariri. Chillapitami nukamandapas willaraiá, nuka kachamuska kangapa kagta. ⁴⁰ Chasa willaraiaskata kawaspapas, kamkuna mana munanakungichi, nukawa samuspa, chi kaugsaita iukan-gapa.

⁴¹—Nuka mana munanichu, ñi maikan runapas atuniachiwangapa. ⁴² Kamkunata allillami rigsiikichita. Ichanimi, kamkuna mana Taita Diusta kuiagtakuna.

⁴³—Nukaka, nukapa Taita kachamuwaskami samurkani. Chasa samugpipas, nukata kamkuna mana munawangichichu. Ikuti sug maikanpas samuntra, kikinmandalla iuiarispa; chitakar chaskinrangichimi.

⁴⁴—Suglla Taita Dius kamkunata atuniachingapa kaskata maskangataka, kamkuna-purallami atuniachirispas kangichi. Chasa runanakuspaka, ¿imasatak nukamanda suma iuiawankangichi?

⁴⁵—Mana iuianakuichi, nuka kamkunamanda nukapa Taitapa ñawipi mana allilla ruraskakunata willagringapa kagta. Moisés kikinmi kamkunamanda chasa willangapa ka, kamkuna paiwa sumaglla iuianakupipas. ⁴⁶ Kamkuna, Moiesta sutipa suma iuiaris-paka, nukamandapaschar chasallata suma iuiariwanrangichi. Paimi nukamanda ñugpa willarka. ⁴⁷ Pai librupi willaska sakiskata mana uaspaka, ¿imasatak nuka rimakuskataka suma iuiawankangichi?

6

Pichka waranga runakunata, Jesús mikungapa karaskamanda

¹ Chiuramanda, Jesús rirka Galilea u Tiberias suti kucha sug ladu chimba. ² Achka runakuna, paita katiraiarkakuna, mana aliangasina unguikunata suma ambigta kawaspa. ³ Jesuska, awa lumama sikaspa, katiraiagkunawanta tiarirka. ⁴ Judiukunapa paskua atunpuncha ñami chaiakurka.

⁵ Chi lumapi tiakuspaka, Jesuska tukuikunata kawarka, chi achka runakuna paipagma kaillaianakugta. Chasa kawaspaka, Felipeta tapurka:

—¿Maipitak tanda randinchi, kai tukui runa samunakuskata karangapa?—. ⁶ Chasa tapurka, Felipe imasa ainigta uangapa. Jesús kikin allillami iacharka, imasa rurangapa chaiakugta.

⁷ Chiura, Felipe ainirka:

—Iskai patsa puncha ganaska kulkiwa tanda randispa, manachar kai tukui runakunata sug sug uchulla pitillapas karangapa pagtantra.

⁸ Sug paita katiraiag, Simón Pedropa waugki Andrés sutika, nirka:

⁹—Kaipimi ka sug wambra. Pichka sibada tanda i iskai chalwami iuká. Chika, ¿imatak pagtanga, kai tukui achka runakunata karangapa?

¹⁰ Jesuska nirka:

—Tukuikunata nigriichi, tiarichukuna.

Suma ugsa chipi tiarka. Mai pichka waranga runakuna, chipi tiarirkakuna. ¹¹ Chiura Jesuska, chi tandakunata charirispas, “Pai Siñur” Taita Diusta nirka. Nispaka, chipi tianakuskata kuaspa richirka. Chalwakunatapas chasallata kuaspa richirka. Chiura tukuikuna, masa munaska chaskispa mikurkakuna.

¹² Tukuikuna ña sagsagta mikuuraka, Jesuska katiraiagkunata nirka:

—Pitikuna puchuskakunata tandachiichi, mana sitanakuchu.

¹³ Chasa uaspaka, chi pichka sibada tanda piti pitikuna puchuskakunata chungaspa iskai saparu jundami tandachirkakuna.

¹⁴ Chi mana imaurapas ruraskasinata kawaspaka, tukui chipi kagkuna nirkakuna:

—Santu Ispirituwa rimag runa kai alpama samungapa willaraiaska, kaimi chi runa kangapa ka.

¹⁵ Tukuikunami munanakurka, Jestusa apispa, atun mandag churangapa. Paika, chasa iuianakugta iachaspaka, anchurispas, chi awa lumama kutirka, sapalla kangapa.

Iaku kuchapi, Jesús chakiwa saruspa awalla puriskamanda

¹⁶ Ña chisima kauraka, Jesusta katiraiagkunaka atun kuchama uraikurkakuna. ¹⁷ Ña tutaiaska kaura, Jesús manara paikunapagma chaiagriska karka. Chimanda, kanuapi iai-kuspaka, kucha sug ladu chimba rii kallarirkakuna, Kafarnaum puibluma chaiagringapa.

¹⁸ Paikuna chimbanakuuraka, iapa sinchi waira, atarispá, iakuta wagtachii kallarirka. ¹⁹ Paikuna ña mai pichka u sugta chungá kuadrásina iakupi rinakuura, Jesús, chi iakupi awalla chakiwa saruspa saruspa, paikunapagma kaillaiaugta kawarkakuna. Chasa kawaspaka, ajaimi mancharirkakuna. ²⁰ Jesuska nirkakunata:

—Nukami kani. Mana manchanakuichi.

²¹ Chasa uiaspaka, alli iuiachirispá, páita: —Kanuama samui— nirkakuna. Chasa nina-kugllapi, maima rinakuskama chaiagrirkakuna.

Jesús iachachikuskata uiagkuna, páita maskanakuskamanda

²² Kaiandika, tukui runakuna chi kucha sug ladu kagkuna iuiarirkakuna, kaina suglla kanua chipi tiaska kagta; Jesusta katiraiagkunalla chi kanuapi iaihuspa rigtakuna; Jesús chipi paikunawa manima iaihuspa rigta. ²³ Chikama sugkunaka, Tiberias puiblumanda sug kanuakunapi chi ladumalla chaiagrirkakuna; maipimi kikin Iaia Jesús, Taita Diusta: “Pai Siñur” nispa, tanda mikuchirka: chi ladumalla. ²⁴ Chipika, Jesusta ñi páita katiraiagkunata manima tarigrirkakuna. Chasa kawaspaka chi runakuna, chi chusa kanuakunapi iaihuspa, sug ladu chimba Kafarnaumma maskangapa rirkakuna.

Jesús, mana wañudiru tandami ka

²⁵ Chaiagrispaka, Jesusta tarigrirkakuna. Nispaka tapurkakuna:

—Iachachig taita, ¿ima uratak kaima chaimurkangi?

²⁶ Jesuska ainirka:

—Kasami nuka niikichita: mana maskawanakungichichu, imaurapas mana kawaska-sina kamkunapa ñawipi ruragmánda. Kamkuna sagsagta mikuskamandami maskawana-kungichu. ²⁷ Tukuriduru mikuita mana maskanakuichi. Maskaichi mana puchukariduru mikuita; chasaka, diltudupa kaugsangapa. Chi mikuita, kai Runa Tukuskami kamkunata karangapa kaikichita. Chasapami Taita Dios kikin nukata agllawarka.

²⁸ Chiura tapurkakuna:

—¿Imasatak nukanchi rurasunchi, Taita Dios imasa munakuskasina páita kawachingapa?

²⁹ Chiura, Jesuska ainirka:

—Pai nukata kachamuwagka, kamkunamanda munakumi, nukamanda suma iuiawan-gapa.

³⁰ Chiura, Jesusta tapurkakuna:

—¿Imasatak nukanchita kawachinkangi; chasaka, nukanchi kamta suma iuiaringapa? ¿Imaurapas mana kawaskasina ruraspachu kawachinkangi? ³¹ Nukanchipa ñugpamanda taitakuna, chusa sitaska alpapi kaugsanakuura, “maná” suti suma luarmanda mikuitasik mikudur karkakuna. Chasallatami ñugpamanda librupi willaraiá, kasa nispa: “Suma luarmanda tandami mikungapa karamurka”.

³² Jesuska ainirka:

—Kasami nuka niikichita: Moiseska, chi suma luarmanda tandata mana paikunata karamurkachu. Nukapa Taitami kai mana wañudiru tanda kamkunata suma luarmanda karamú. ³³ Chi Taita Dios karamuska tanda niraianni suma luarmanda uraikumug, kai alpamanda runakunata diltudupa kaugsai karangapa.

³⁴ —Taita waugki, imaurapas mana sakispalla chi tandata nukanchita karamui— nirkakuna.

³⁵ Jesuska ainirka:

—Nukami kani mana wañudiru tanda. Maikan nukawa samugkuna, mana iarkai iukan-gapa kankunachu. Chasallata, nukata suma iuiawagkuna mana imaurapas iakunaiai iukangapa kankunachu. ³⁶ Chasa nisppapas, ñami nirkaikichita: ña nukata kawawaspa-pas, chara manara suma iuiawangichichu. ³⁷ Tukui nukapa Taita agllapuaskakuna, nukawami samungapa kankuna. Maikanpas nukawa samuskakunaka, mana kanchama llugsichii tukungapa kankunachu. ³⁸ Nukaka, suma luarmanda mana uraikumurkanichu, nukapa iuiailawa imapas rurangapa. Imasa kachamuwag munakuskasina rurangapami samurkani. ³⁹ Kasami kachamuwag muná: pai agllaska nukawa samugkuna, ñi sug mana nukawa chingachii tukungapa. Puchukarii punchaka, tukui paikunata nuka kaugsachingapami muná. ⁴⁰ Kasami nukapa Taita muná: maikanpas paipa wambrata rigsiwaspa suma iuiawagkuna, mana puchukariduru kaugsaitami iukangapa kankuna. Paikunatami, puchukarii puncha, nuka kaugsachingapa kani.

⁴¹ Jesús niska karka: “Nukami kani suma luarmanda uraikumuska tanda”. Chimanda judiukuna, mana alli iuiaiwa paimanda rimanakurka, ⁴² kasa nispa:

—Kai runa, ¿manachu ka Josepa wambra Jesús? Paipa taita i mamanditapas, nukanchi rigsinchimi. Nigpika, ¿imawantak niku: “Suma luarmandami uraikumuska kani?”

⁴³Jesuska nirkakunata:

—Kamkunapura jiru iuiwaiwa mana rimanakuichi. ⁴⁴Nukapa Taita kachamuwag mana agllaggpika, ñi pipas mana nukawa samungapa pudinkunachu. Agllaskakunallatami, puchukarii puncha, nuka kaugsachingapa kani. ⁴⁵Santu Ispirituwa rimagkuna willaraiakapi, kasami niraia: “Tukuikunata, Dios kikinmi iachachingapa ka”. Maikanpas nukapa Taitata uiaspa, pai imasa iachachiskasina iachaikugkuna, nukawami samungapa kankuna.

⁴⁶—Ñi maikan, nukapa Taitata mana kawaska kankunachu. Paipagmanda samuska kagllami paita rigsí. ⁴⁷Kasami nuka niikichita: maikanpas suma iuiawagkuna, mana puchukariduru kaugsaitami iukankuna.

⁴⁸—Nukami kani mana wañuduru tanda. ⁴⁹Kamkunapa ñugpamanda taitakuna, chusa sitaska alpami “maná” suti mikuita mikuspapas, wañurkakunami. ⁵⁰Kai tandami niraia suma luarmandami uraikumuska. Maikanpas kai tandata mikugkuna mana diltudupa wañungapa kankunachu. ⁵¹Nukami kani chi mana wañuduru tanda suma luarmandami uraikumuska. Maikanpas kai tandata mikugkuna, imaurapas kaugsanakungapagllami kankuna. Chi nuka karangapa tandaka niraianmi nuka kikinpa aicha, kai alpamanda runakuna alli suma kaugsaita iukangapa.

⁵²Chiura judiukunaka, kikinpura tapurinakurka, kasa nispá:

—Kai runa, ¿imasatak paipa aichata karangapa ka, nukanchi mikungapa?

⁵³Jesuska nirkakunata:

—Kasami nuka niikichita: kai Runa Tukuskapa aichata mana mikugka, nukapa iawarta chasallata mana upiaggpika, alli suma kaugsaita mana iukangapa kangichichu. ⁵⁴Maikanpas, nukapa aichata mikuspa, nukapa iawarta upiaspa kagkunaka, mana puchukariduru suma kaugsaitami iukankuna. Paikunatami, puchukarii puncha, nuka kaugsachingapa kani. ⁵⁵Nukapa aicha kanmi sutipa mikui. Nukapa iawarpas, sutipami upiaduru ka. ⁵⁶Maikanpas, nukapa aichata mikuspa, nukapa iawarta upiaspa kagkuna, nukapimi kankuna. Nukapas, paikunapimi kani.

⁵⁷—Nukata kachamuwag kaugsa Taitamandami nuka kaugsai iukani. Chasallata maikanpas nukata mikuwagkuna, nukamandami kaugsai iukangapa kankuna. ⁵⁸Kaimi ka suma luarmandami uraikumuska tanda. Chi “maná” suti tandata, ñugpamanda taitakuna mikuspapas wañurkakunami; chi tandasina mana kanchu. Kai tandata maikanpas mikuspa, imaurapas kaugsallami kangapa kankuna.

⁵⁹Kafarnaum puiblpimi Jesús chasa nirka, judiukuna tandariduru wasi ukupi iachachikuspa.

Jesuska, mana puchukariduru kaugsaimanda rimagmi ka

⁶⁰Achka Jesusta katiraiagkuna, chasa uiaspaka, nirkakuna:

—Chi rimaikuna, iapa mana uiangasinami ka. ¿Pisik chasa uangapa munanga?

⁶¹Paita katiraiagkuna chasa mana alli iuiwaiwa paimanda rimanakuskata iachaspaka, Jesuska nirka:

—Chasa uiaspaka, ¿nukamanda mana allichu uiari? ⁶²Kai Runa Tukuska ñugpata kaskama, chimallata sikakuskata kamkuna kawaspaka, ¿imasatak iuiantrangichi? ⁶³Santu Ispiritullami alli suma kaugsaita kará. Aichaka mana balinchu. Chi rimaikuna nuka kamkunata rimaskaka kanmi Ispiritupi kaugsai. ⁶⁴Chasa kagpipas, maikankunaka mana nukawa iuanakungichichu—. Ñugpamandatami Jesús iacharka, pikuna mana paita iuiag kagkunamanda. Chasallata, pi paita apichingapa kagtapasmi iacharka.

⁶⁵Kasapasmi nirka:

—Chimandami nirkaikichita: “Nukapa Taita mana agllaggpika, ñi pipas mana nukawa samungapa pudinkunachu”.

⁶⁶Chiuramanda paita katiraiagkuna, achkakuna anchurispa, mana mas paita katingapa munarkakuna. ⁶⁷Chi chungá iskai pai agllaskakunataka, Jesús tapurka:

—¿Kamkunapaschu munanakungichi, nukata sakiwaspa, ringapa?

⁶⁸Chiura, Simón Pedroka ainirka:

—Taita waugki, kamta sakispaka, ¿piwatak risunchi? Kamllami mana puchukariduru suma kaugsaita rimag kangí. ⁶⁹Nukanchika, kammanda suma iuiaspa, ñami iachanchi, kam Taita Diospa tukuipi mas alli wambra kagta.

⁷⁰Jesuska nirka:

—¿Manachu nuka, chungá iskaikunata agllarkaikichita? Chasa agllaggpipas, kamkuna-puramanda sugka, iaia kukusinami ka—. ⁷¹Chasa nispa, Judas Iskariote suti Simonpa

wambramandami rimakurka, chi runa, chungá iskai agllaskakunapuramanda kaspá, paita apichingapa kagmánda.

7

Jesupa waugkindikuna, paita mana iuianakuskamanda

¹ Chiuramanda Jesús, Galilea alpa suiulla purikurka. Mana munarka, Judea alpapi kagringapa, judiukuna wañuchingapa paita maskanakugmánda. ² Judiukunapa sug atun punchakuna ña chaiakurka. Chi punchakuna iuiariduru karka, tambukuna ruraskallapi kausgaska. ³ Chimanda Jesupa waugkikunaka, paita nirkakuna:

—Kaimanda llugsispa, Judeama rii, chipi kamta katiraiagkunata kam ima rurakuskata kawachingapa. ⁴ Maikanpas rigsichiringapa munagkuna, mana pakalla rurankunachu. Kam chituku imapassik allilla rurangi; chita tukuikunapa ñawipi kawachigrii—. ⁵ Ñi kikin Jesupa waugkindikuna, paita mana iuianakuspami chasa kachangapa rimarinakurka.

⁶ Jesuska ainirka:

—Nuka ringapa puncha, manara chaiapuanchu. Ikuti kamkuna ringapaka, imaurapas allillami ka. ⁷ Kai alpapi tiaskakunallawa iuiagkuna, mana kamkunawa rabiai iukan-kunachu. Ikuti nukatami mana munawankuna, paikuna mana allilla ruraikunata piñaspa rimagmánda. ⁸ Kamkunaga riichi, chi atun punchakuna ialichingapa. Nuka ringapa puncha manara chaiapuangmánda, nukaka manara ringapa kani—. ⁹ Chasa nispaka, Galilea alpallapi chisiarka.

Jesús, Jerusalenpi atun punchakuna ialichigriskamanda

¹⁰ Ña paipa waugkikuna atun punchakuna ialichingapa riskauramandaka, Jesupas rirka. Pitapas mana kawarispaña pakallami rirka. ¹¹ Chikama judiukunaka, chi punchakuna paita maskanakuspa, paipura tapurinakurka:

—Chi runa, ¿maipisik ka?

¹² Chi achka runakuna, ajaimi paimanda rimanakurka. Sugkuna ninakurka:

—Iapa allimi ka.

Ikuti sugkunaka ninakurka:

—Manima. Tukui runakunata llullachispallami ka—. ¹³ Judiukunata manchaspami paimánda allilla mana kawariglla rimanakurka.

¹⁴ Chi atun punchakuna ña chaugpi ialikuuraka, Jesuska, Diospa atun wasi ukupi iai-kugrispa, iachachii kallarirka. ¹⁵ Paita uiaspaka, judiukuna iapa ujnarispa kikinpura tapurinakurka:

—Kai runa, ¿imasamandasik chituku iachá, ñi piwapas mana iachaikuspaña?

¹⁶ Chiuraka, Jesuska nirka:

—Nuka kikinpa iuiailawa mana iachachinakuikichitachu. Nukata kachamuwagpa iuiaiwami iachachinakuikichita. ¹⁷ Maikanpas Taita Dios imasa munaskasina rurangapa munag iachangapami ka, nuka iachachikuska, Taita Diospa iuiaiwa kagta. Mana nukapa iuiailawa kanchu. ¹⁸ Maikanpas kikinpa iuiailawa rimag, kikinmandallami atuniachi-ringapaglla maskari. Ikuti kachamuwagta atuniachingapa munagka, sutipa kaskatami allilla willá, ñi imapipas mana llullaspalla. ¹⁹ ¿Manachu Moisés, kamkunapa ñugpamanda taitakunata Taita Dios imasa rurangapa willarka? Chasa willaraiagpipas, ñi pi mana chasa rurangichichu. Nukataka, ¿imapatak wañuchiwangapa munanakungichi?

²⁰ Chiura, chipi kagkuna ainirkakuna:

—Sug kuku waira iaikuskami kangi. ¿Pikunatak kamta wañuchingapa munanakú?

²¹ Chiuraka, Jesuska ainirka:

—Nuka sug runata warda puncha aliachiskamandami tukui kamkuna ujnaringichi. ²² Moiseska, kamkunata kasa rurangapami nirka: pusag punchaiug tukui kari wam-brakunata marka churachingichi. Chasa niraiagpipas, Moisés mana kallarig karkachu. Paimanda mas ñugpamanda taitakunami chasa rurangapa sakiska karka. Pusag puncha iukagmandami, warda puncha kagpipas, kamkuna kari wambrakunata chi marka churachingichi. ²³ Chasaka, warda puncha kagpipas, chi marka churachingichimi, Moisés imasa niraiaskasina iuiaspa. Nigpika, ¿imapatak warda puncha sug runata nuka allilla aliachiskamanda, kamkuna nukawa jiru iuianakungichi? ²⁴ Mana allilla iachaspalla, mana imapas rimanakungichi. Maskangichi, allilla iuiarispa rimangapa.

Jesús, Taita Dios kachamuska kaskamanda

²⁵ Nigpika sugkuna Jerusalenpi kausanakug, paipura tapurinakurka:

—¿Manachu kai runata wañuchingapa maskanakú? ²⁶ Pai tukuikunapa ñawipi rimakugpi-pas, paitaka mana imapas ninkunachu. Nukanchipa taitakunaka paimanda, ¿sutipacha Taita Dios agllaska Cristo kagta sumaglla iuiankuna? ²⁷ Nukanchika, paita allillami

rigsinchi maimanda kagta. Ikuti Taita Dios agllaska runa samungapa kagtaka, mana pipas iachangapa kankunachu maimanda samukugta.

²⁸ Chasa uiaspaka Jesuska, Diospa atun wasipi iachachikuspa, sinchi kaparirka, kasa nispa:

—¿Sutipachu kamkuna rigsiwangichi? Nuka maimanda kagta, ¿sutipachu iachangichi? Nukapa iuiailawa mana samurkanichu. Nukata kachamuwag, mana imapipas llulla kanchu. Paitaka, kamkuna mana rigsingichichu. ²⁹ Nukaka, paita allillami rigsin. Paipagmandami samuska kani. Paimi kachamuwarka.

³⁰ Jesús chasa niura, munanakurka paita apingapa. Pai wañungapa puncha manara chaiaska kagmandami mana pipas paita apii pudirkakuna.

³¹ Chipi kagkuna, achkakuna paita suma iuiarispami kikinpura tapurinakurka:

—Taita Dios agllaska samuura, ¿kai runamandapas maschu suma ruraikuna kawachig-samungapa ka?

Fariseokuna, Jesusta apingapa munanakuskamanda

³² Fariseokunaka uiarkakuna imasa chipi kagkuna Jesusmanda iapa rimanakugta. Chimanda paikuna i iaia sasirdutikuna, alwasilkunata kacharkakuna, Jesusta apingapa.

³³ Chiura, Jesuska nirka:

—Kunauramanda, kamkunawa mana unai kangapa kanichu. Nispaka, nukata kachamuwaskapagmami ringapa kani. ³⁴ Chiura kamkuna, nukata maskawaspapas, mana tariwangapa kangichichu. Nuka maipi kaskama, kamkunaka mana chaiagrii pudingapa kangichichu.

³⁵ Chiura judiukuna, kikinpura tapurinakurka:

—Kai runa, ¿maimatak ringapa ka; chiwanka, nukanchi paita mana tarii pudingapa? ¿Manachu munaku, sug alpakunapi judiukuna kaugsanakuskama ringapa; chipika, mana judiu kagkunatapas iachachigringapa? ³⁶ ¿Imatak niraiá kasa niskata: “Kamkuna nukata maskawaspapas, mana tariwangapa kangichichu. Nuka maipi kaskama, kamkunaka mana chaiagrii pudingapa kangichichu?”

Kaugsa iakusina, Jesús karangapa niskamanda

³⁷ Chi atun punchakunamanda mas atun puncha ialichingapa chaiaura, Jesuska, saiarispa, sinchi kaparirka, kasa nispa:

—Maikanpas Taita Diosmanda iakunai iukagpika, nukawa samuichi, upiagsina rurangapa. ³⁸ Ñugpamanda librupi, kasami willaraiá: “Maikanpas nukata suma iuiawagka, paipa sungumanda llugsispa, kaugsa iakusinami iukangapa ka”.

³⁹ Jesús chasa rimaskaka, Santu Ispiritumandami nikurka. Maikanpas Jesusta suma iuiagkuna, Santu Ispiritutami chaskingapa niraiarka. Jesusta manara suma atuniachiska kagmandami Santu Ispirituta manara kachamuska karka.

Jesusmanda sug rigcha sug rigcha iuianakuskamanda

⁴⁰ Chasa uianakug, maikankunaka ninakurka:

—Kai runa, sutipami Santu Ispirituwa rimag ka.

⁴¹ Sugkunaka ninakurka:

—Kaimi sutipa Taita Dios agllaska kangapa ka.

Ikuti sugkunaka nirkakuna:

—Taita Dios agllaska kagpika, Galileamanda mana kangapa kagtami niraiá. ⁴² Ñugpamanda librupi, ¿manachu willaraiá, Davidpa iawarmanda, David kaugsaska Belén puiblumanda, Cristo kangapa kagta?

⁴³ Chasaka, sug rigcha sug rigchami chipi kagpura Jesusmanda iuiarinakurka. ⁴⁴ Sugkuna paita apingapa munanakuspapas, ñi pipas mana tuparirkakuna.

⁴⁵ Kachaska alwasilkunaka, iaia sasirdutikuna i fariseokunapagma kutirkakuna. Chaiagriuraka, paikuna tapurkakuna:

—¿Imapatak mana Jesusta pusamurkangichi?

⁴⁶ Chiura, alwasilkuna ainirkakuna:

—Chasa rimai, ñi maikan chi runasina mana imaurapas uiaska karkanchichu.

⁴⁷ Fariseokunaka, paikunata nirkakuna:

—¿Kamkunapaschu, chi llullaiwa tuntiachii tukurkangichi? ⁴⁸ Judiú taitapura i fariseopura, ñi pipas paita mana uianchichu. ⁴⁹ Chi ianga runakuna, Moisés ima niskata mana iachaikuspami maldisiska kankuna.

⁵⁰ Chiura Nikodemo, fariseollata kaspá, ñugpata Jesusta rimakuska kagka, nirka:

⁵¹ —Moisés ima nukanchita willaraiaskapi, ¿manachu kasa niraiá: maikan runatapas, pai ima ruraskamanda mana tapuchispalla i uiaspalla, mana justisiai rurai pudirinchu?

⁵² Chiura ainirkakuna:

—¿Kampaschu Galileamanda kangí? Ñugpamanda librupi iachaikui. Kawankangimi, Galileamanda ñi sug Santu Ispirituwa rimag mana llugsingapa kagta.

[⁵³ Chasa rimanakuspaka, tukuikuna kikinkunapa wasima rirkakuna.

8

Kasada warmi, sug kariwa apiriskamanda

¹ Jesuska, Olivos suti lumama rirka. ² Kaiandi tutataka, Diospa atun wasima ikuti chaiag-rirka. Chi puiblupi tukui kaugsanakug paipagma kaillaiaagriuraka, tiarispá, iachachii kallarirkakunata.

³ Chasa iachachikuuraka, Moisés ima niskata iachachig taitakuna i fariseokunaka, sug kasada warmi sugpa kariwa apiriskata paipagma chaiachigrirkakuna. Tukuikunapa chaugpipi saiachigrispaka, ⁴ Jesusta nirkakuna:

—Iachachig taita, kai warmita sugpa kariwa pandarikuskatami apirkanchi. ⁵ Moisés ima willaraiaskapi, kasami niraiá: “Maikan warmipas chasa rurakugta apispa, rumiwa piaspá, wañuchingapami niraiá”. Kamka, ¿imatak ningi?— ⁶ Chasa tapunakurka, pai rimaskata imapipas pandarigpika, uiaspa, justisiakunata willagringapa.

Jesuka, kumurispá, maki diduwa alpapi iskribii kallarirka. ⁷ Paikuna tapui apanakuraka, saiarispá, nirkakunata:

—Maikan ñi imaurapas mana pandarispalla kaugsag, kallarichu, sug rumi aisaspá, ñugpa warmita piangapa.

⁸ Chasa nispa, ikuti kumurispá, alpapi maki diduwa iskribii kallarirka.

⁹ Chasa uiaspaka, mas rukukunamanda kallarispá, tukuikunami sug sug llugsispa anchurirkakuna. Jesusta chi warmillawa sakirkakuna. ¹⁰ Chiura Jesuska, saiarispá, tapurka:

—Pani, ¿maipitak kammanda willagkuna kankuna? ¿Pipas manachu justisiaspa, kamta wañuchingapa nirkakuna?

¹¹ Chiura ainirka:

—Taita turi, ñi pipas manima.

Chasa ainiura, Jesuska nirka:

—Ñi nukapas mana justisiangapa niikichu. Riilla. Kunauramanda, mana mas pandaringi.]

Jesús, runakunapa iuiiakunata punchaiachig kaskamanda

¹² Chiuramanda Jesús, Diospa atun wasi ukupi kagkunata ikuti iachachispa, nirka:

—Nukami kai alpamanda runakunapa iuiiakunata punchaiachig kani. Maikanpas nukata katiraiawag, mana amsapisina puringapa kanchu. Paipa iuiiakunata punchaiachiiwa kaspá, alli suma kaugsaitapasmí iukangapa ka.

¹³ Chasa uiaspa, fariseokunaka paita nirkakuna:

—Kam kikinmandallami chasa willarikungi. Kam ima rimaska willakuska, iangami ka.

¹⁴ Jesuska ainirkakunata:

—Nuka kikinmandalla willarikuska, mana ianga kanchu; sutipami ka. Nuka maimanda samuska kagta i maima ringapa kagta, nukallami iachani. Ikuti kamkunaka mana iachangichichu, nuka maimanda samuska kagta ñi maima ringapa kagta. ¹⁵ Kam kikinkunapa iuiailawami imapas kawangichi. Ikuti nukaka, mana pitapas chasa iuiarispá kawanichu. ¹⁶ Nuka, mana sapalla kanichu. Nukapa Taita kachamuwag, nukawami ka. Chimandaka, maikantapas nuka iuiarispá kawagpika, chi iuiariskaka sutipami ka.

¹⁷ —Moisés kamkunamanda willaraiaskapi, kasami niraiá: “Iskai runakuna chasallata willanakugpika, mana llulla kanchu”. ¹⁸ Chasaka, nuka kikinmandami willarini. Nukapa Taita kachamuwagpasmí nukamanda chasallata willag ka.

¹⁹ Chiura tapurkakuna:

—Kamba taitaka, ¿maipitak ka?

Jesuka ainirka:

—Kamkunaka, nukata ñi nukapa Taitata mana rigsingichichu. Nukata rigsiwagka, nukapa Taitata rigsiginami ka.

²⁰ Diospa atun wasi ukupi, kulki churadirupi kaspami Jesús chasa iachachikurka. Paita manara wañungapa punchá chaiankama, ñi pipas mana maki churarkakuna, apingapa.

“Nuka maima ringapa kaskama, kamkuna manima katiwangapa pudingapa kangichichu”

²¹ Kasapasmi Jesús nirka:

—Nuka ringapami kani. Chiura maskawangapami kangichi. Maskawanakuspapas, kamkuna pandariskakunata mana pasinsiai tukuspallami wañungapa kangichi. Nuka maima ringapa kaskama, kamkuna manima katiwangapa pudingapa kangichichu.

²² Chiura judiukunaka, kikinpura tapurinakurka:

—¿Imatak? ¿Kikinllachu wañuchiringapa iuiaku? ¿Chimandachu niku: “Nuka maima ringapa kaskama, kamkuna manima katiwangapa pudingapa kangichichu?”

²³ Jesuska nirka:

—Kamkuna, kai alpamandallami kangichi. Ikuti nukaka, awa suma luarmandami kani. Kamkuna, kai alpamandami kangichi. Nukaka, manima. ²⁴ Nirkaikichitami: “Kamkuna pandariskakunata mana pasinsiai tukuspallami wañungapa kangichi”. Nuka pi kagta mana iuiawaspami kamkuna pandariskakunata mana pasinsiai tukuspalla wañungapa kangichi.

²⁵ Chiura tapurkakuna:

—Kam, ¿pitak kangí?

Chiura, Jesuska ainirka:

—Ñugpamandatami nuka ña kamkunata willarkaikichita. ²⁶ Kamkunamandaka iukanimi achka rimanga; chasallata, kamkuna achka pandariskakunata iuiachispa kawachingapa. Nukata kachamuwagka, ñi imapi mana llullaspallami rimá. Imasa paita uiaskasinami nuka kai alpapi kaugsanakuskata rimaikichita.

²⁷ Chasa uiagkuna mana iacharkakuna, Jesuska paipa Taita Diosmanda rimakugta.

²⁸ Chimanda, paika nirka:

—Kai Runa Tukuskata kamkuna awapi atarichiwaspami rigsiwangapa kangichi nuka pi kagta. Chasallata, nuka kikinpa iuiailawa mana imapas ruranychu. Ima nukapa Taita iachachiwaskatami rimani. ²⁹ Nukata kachamuwag, nukawami ka. Pai imasa munakuskasinami nuka imaurapas rurani. Chimandami mana sapallata sakiwá.

³⁰ Jesús chasa rimaskata uiagkuna, achkakunami paiwa suma iuiarispa tukurkakuna.

Taita Diospa wambrakunamanda i iaia kukupa wambrakunamanda

³¹ Chiura Jesuska, paiwa suma iuiarig judiukunata nirka:

—Kamkuna, nuka ima rimaskata imaurapas ruragpikunaka, sutipami nukapa iachakugkuna kankangichi. ³² Sutipa kaskatami rigsinkangichi. Sutipa kaskata rigsispaka, kispichiimi tukunkangichi.

³³ Chiura nirkakuna:

—Nukanchika kanchimi ñugpa taita Abrahampa wambrapa wambrakuna. Imaurapas ñi maikan runakunapagma mana wataskasina kaska kanchichu. Nigpika, ¿imapatak kamka nikungi: “Kispichiimi tukunkangichi?”

³⁴ Chiura, Jesuska ainirka:

—Kasami nuka niikichita: maikanpas pandarichu: chi pandariikunawaka wataskasinami kangichi. ³⁵ Lutrin, mana patrunpa wambrasina chillapi kaugsakungapa niraianchu. Patrunpa wambrami imaurapas chillapi kangapa niraiá. ³⁶ Chiwanka, Taita Diospa wambra kamkunata kispichigpika, sutipami kispichiska tukunkangichi. ³⁷ Iachanimi, kamkuna Abrahampa wambrapa wambrakuna kagtakuna. Chasa kagpapas, nukapa rimaita mana uiawarkangichichu. Chi nispami kamkuna munanakungichi wañuchiwangapa. ³⁸ Nukapa Taita imasa kawachiwaskatami rimani. Kamkunapas chasallatami kamkunapa taitata imasa uiaskasina rurangichi.

³⁹ Chiura, paikuna ainirkakuna:

—Nukanchipa atun taita, Abrahammi ka.

Jesuska nirka:

—Kamkuna, sutipa Abrahampa wambrapa kati wambrakuna kagpikunaka, Abraham imasa ruraskasinami ruranturangichi. ⁴⁰ Ikuti kunauraka, nuka imasa Taita Diusta uiaskasina sutipa kaskata rimakugtami wañuchiwangapa munanakungichi. Chasaka, Abraham mana rurarkachu. ⁴¹ Kamkunapa taita imasa ruraskasinami kamkunapas rurankungichi.

Chiura nirkakuna:

—Nukanchi mana kanchichu sapalla warmipa wambrakuna. Diosmi ka nukanchipa taita.

⁴² Jesuska nirka:

—Dius kamkunapa taita kagpika, nukatami kuiawantrangichi. Nukaka, Taita Diospagmanda llugsispami samurkani. Nuka kikinpa iuiailawa mana samurkanichu. Taita Diosllatatami nukata kachamuwarka. ⁴³ ¿Imawantak nuka ima rimakuskata mana iachaikungapa munangichi? Mana munangichichu, nuka ima willakuskata uiawangapa. ⁴⁴ Kamkuna, iaia kukutami taitasina iukangichi. Imasa pai munakuskasinami kamkuna ruraspa

kangichi. Paika, ñugpamandata wañuchigmi niraiá. Paipa iuiiaipi llullalla tiagmandami manima sutipa kaskata rimag ka. Pai rimaúra, tukuipi kikinpa llullaillami rimá. Pai, llullachig kaspá, tukui llullakunapa taitami niraiá. ⁴⁵ Ikuti nukaka, kamkunata ñi imapi mana llullaspalla willakugtaka mana munawangichichu. ⁴⁶ Ñi pipas mana nukata kawachiwangapa pudingichichu, imapipas pandarig kagta. Nuka ñi imapi mana llullaspalla nikugpika, ¿imapatak mana nukawa iuiaringichi? ⁴⁷ Diuspa kagpika, Taita Diuspa rimaikunatami uía. Kamkuna, mana Diuspa kaspami mana paipa rimaikunata uangapa munangichi.

Abraham manara tiagpita, Cristoka ña tiarka

⁴⁸ Chiura, judiukuna nirkakuna:

—¿Manachu nukanchi allilla ninchi: “Kam, Samaria alpamandami kangi. Kuku waira iai-kuskami kangí?”

⁴⁹ Jesuska ainirka:

—Nuka mana kuku waira iaikuska kanichu. Nukapa Taitamanda imapipas allillami rimani. Kamkunaka, mana allilla iuiarispami jiru nukamanda rimangichi. ⁵⁰ Nuka kikinmanda mana maskanichu, iapa atuniachirii tukungapa. Sugmi nukata atunia-chiwangapa ka. Paimi sutipa kaskata tukuipi kawag ka. ⁵¹ Kasapasmi nuka niikichita: maikanpas nukapa rimaita uiaspa rurag, mana imaurapas wañungapa kanchu.

⁵² Chiura, judiukuna nirkakuna:

—Kunaura masmi iachanchi, kam kuku waira iaikuska kagta. Abraham i Santu Ispirituwa ñugpamanda rimagkunapas wañurkakunami. Kamka ningimi: “Maikanpas nukapa rimaita uiaspa rurag, mana imaurapas wañungapa kanchu”. ⁵³ Nukanchipa wañuska taita Abrahammandapas, ¿maschu atun kangí? Santu Ispirituwa ñugpamanda rimagkunapasmi chasalata wañurkakuna. Kamka, ¿ima kagtatak iuiakungi?

⁵⁴ Chiura, Jesuska ainirka:

—Nuka kikin atuniachiriika, ñi imapa mana balinchu. Nukapa Taitami nukata suma atuniachiwá. Paimandallatata, ¿manachu kamkunapas ningichi: “Nukapa Taita Diusmi ka?” ⁵⁵ Paita, kamkuna mana rigsingichichu. Ikuti nukaka, paita allillami rigsini. “Paita mana rigsini” nuka nigpika, kamkunasina llullallatami kantrani. Nuka, paita allillami rigsini. Chasa rigsispaka, paipa rimaita uiaspa, ruragmi kani.

⁵⁶ —Kasapas. Kamkunapa atun taita Abrahamta alli iuiachirirka, nuka samungapa puncha paipa suma iuiailapi kawaspá. Chasa kawaspaka, iapa kuntintarirka.

⁵⁷ Chiura, judiukuna nirkakuna:

—Kam, manara pichka chungá watallapas iukaspaka, ¿imawantak ningi, Abrahamta kawaska?

⁵⁸ Chasa niura, Jesuska ainirka:

—Kasami nuka niikichita: Abraham manara tiagpita, nukaka ñami tiarkani.

⁵⁹ Chasa ainigmandaka, rumi aisarkakuna, piaska wañuchingapa. Jesuska, chipi kag-kunawa chapuriska, pakalla Diuspa atun wasimanda lugsirka.

9

Wawita tiagsamuskauramandata mana ñawi kawagta, Jesús ambiskamanda

¹ Jesús ialikuspaka, sug runa wawita tiagsamuskauramandata mana ñawi kawagtami kawarka. ² Chi runata kawaspaka, Jestusta katiraiaigkunaka tapurkakuna:

—Iachachig taita, ¿imawantak kai runa, mana ñawi kawag tiagsamurka? ¿Paichu imapi mana allilla rurarka? Mana kagpika, ¿paipa atunkunachu imapi pandarirkakuna?

³ Chiura, Jesuska ainirka:

—Chasa tiagsamuskamanda, mana tukurkachu pai ñi paipa atunkuna mana allillata ruragmá. Taita Dius kikinmi chasa sakirka; chiwanka, paipa iapa iachaita kai runawa kawachingapa. ⁴ Chara punchasina kaglapimi nukata chaiawá, kachamuwag imasa niwaskasina rurangapa. Ña tutasina tukuuraka, ñi pipas mana imapas rurangapa pudirangapa kanchu. ⁵ Nuka, kai alpapi kankama, kai alpapi kaugsanakuskapa iuiaikunata punchaiachigmi kani.

⁶ Chasa nispaka, alpapi tukaspa, turuiachispa, mana kawag ñawita kakurka. ⁷ Chasa llunchispaka, nirka:

—Siloé suti kuchaiachiska iakupi maillarigrii—. (Siloé niraianni “Kachaska”.)

Chiura, chi runaka rirka. Maillarigriglapika, allillami ñawi kawagsamurka. Nispaka, paipagma rirka.

⁸ Paipa ladu suiu kaugsagkuna i chi runa limusna mañaspa ñugpa kaskata rigsigkuna, paita kawaspaka, tapurinakurka:

—Kai runa, ¿manachu ka limusna mañaspalla tiakug?

⁹ Sugkuna aininakurka:

- Paimi ka.
Ikuti sugkuna ninakurka:
—Manima. Ñalla paisina rigchami ka.
Chi runaka nikurka:
—Aja, nukami kani.
¹⁰ Chiura tapurkakuna:
—Nigpika, ¿imawantak ñawi aliaska kangi?
¹¹ Chasa tapuura, chi runaka ainirka:
—Jesús suti runami, alpata tukawa turuiachispa, nukapa ñawita kakuwaspa, niwarka:
“Rii. Siloé iakupi maillarigrii”. Nuka maillarigrispaka, musugllami ñawi kawagsamurkani.
¹² Chiura tapurkakuna:
—Chi runaka, ¿maipitak ka?
Chi runaka ainirka:
—Mana iachanichu.
¹³ Chiura, chi runata fariseokunapagma pusarkakuna. ¹⁴ Warda punchami Jesús, chasa alpata tukawa turuiachispa, ñawita kakurka, pai kawangapa. ¹⁵ Chimanda fariseokuna, chi runata tapuchirkakuna:
—¿Imasamandatak allilla ñawi kawakungi?
Chiura ainirka:
—Alpata tukawa turuiachispa, nukapa ñawipi churawarka. Nukaka maillarigrirkani. Chiurallami kawariwarka.
¹⁶ Chasa ainiura, sug fariseokuna nirkakuna:
—Chi aliachig runa warda puncha mana samaspalla trabajag, mana Taita Dios kachamuska kangapa kanchu.
Ikuti sugkunaka ninakurka:
—Pandaridurllatata runa kaspaka, ¿imawantak chasa mana imaurapas kawaskasina suma rurangapa pudí?
Chasa rimanakuspaka, iskaima tukurkakuna. ¹⁷ Chimanda, ikuti chi ñawi ambiriskata tapuchirkakuna:
—Chi runa kamba ñawita aliachiskamanda, kamka, ¿imatak ningi?
Chiura ainirka:
—Paika, sutipa Santu Ispirituwa rimagmi ka.
¹⁸ Chi judiukunaka mana iuianakurka, pai mana ñawi kawag kaspaka, ña aliachiska kagta. Chimandami paipa atunkunata kaiarkakuna. ¹⁹ Nispaka tapuchirkakuna:
—¿Kaichu ka kamkunapa wambra? ¿Paimandachu ningichi: paimi mana ñawi kawag tiagsamurka? ¿Imasamandatak kunaura kawaku?
²⁰ Chiura, atunkunaka ainirkakuna:
—Nukanchi iachanchimi, paika nukanchipa wambra kagta. Mana ñawi kawagmi tiagsamurka. ²¹ Chasa kunaura kawagsamugtaka mana iachanchichu: ¿pimi ñawita kawachigsamurka? Kikinta tapuchiichi. Ñami wiñaska ka. Pai kikinmi willanga.
²² Judiukuna, ñugpa rimanakuska karkakuna: “Maikanpas ‘Jesús, Taita Dios agllaskami ka’ nigpikunaka, judiukuna tandariduru wasikunamanda llugsichiimi tukungapa kankuna”. Chasa llugsichii niraigmandami chi runapa atunkuna judiukunata mancharkakuna. ²³ Chimandami ainirkakuna: “Ñami wiñaska ka. Kikinta tapuchiichi”.
²⁴ Nigpika, chi ñawi ambiriskata ikuti kaiaspa, nirkakuna:
—Diuspa ñawipi, nukanchita sutipa kaskallata willarii. Nukanchi iachanchimi, chi runa mana alli ruradur kagta.
²⁵ Chasa niura, paika ainirka:
—Pai mana alli ruradur kagta mana iachanichu. Kasallami iachani: nuka, ñugpata mana ñawi kawag kaspaka, kunaauraka allillami kawani.
²⁶ Chiura, ikuti tapuchirkakuna:
—¿Imatak kamta rurarka? ¿Imasatak ñawi aliachirka?
²⁷ Paika ainirka:
—Timpumi willarkaikichita. ¿Manachu uiawarkangichi? ¿Imapatak ikuti uiawangapa munanakungichi? ¿Kamkunapaschar paita katiraiagkuna tukungapa munanakungichi?
²⁸ Chiura, paita kamispa, nirkakuna:
—Kam, chita katiraiagchar kangi. Ikuti nukanchika, Moisés ima iachachiskata katiraiagkunami kanchi. ²⁹ Taita Dios Moísesta rimaskatami nukanchi allilla iachanchi. Chi kamta aliachigmandaka, nukanchi mana iachanchichu maimanda samuska kagta.
³⁰ Chi runaka ainirka:

—Nukapa ñawita aliachig maimanda samuska kagta kamkuna mana iachagpikunaka, ujnachiwanakungichimi. ³¹ Ñami iachanchi, kai alpapi mana allilla ruragkunata, Taita Dius mana uianchu. Ikuti maikan paita suma kuiaspa, pai ima munakuskata ruragkunataka uianllami. ³² Kai alpapi runakuna tiaskaauramandata, ñi imaurapas mana uiariska kanchu, maikanpas mana ñawi kawag tiagsamuska kaskata aliachiskamanda. ³³ Chi runa, Taita Dius mana kachamuska kagpika, ñi imapas manachar chasa rurangapa pudintra.

³⁴ Paikunaka nirkakuna:

—Kam, tiagsamuskaauramandata pandaridurmi kangi. ¿Kunaaurachu tinlla kam nukanchita iachachingapa munakungi?—. Chasa nispaka, paita chimanda llugsichirkakuna.

³⁵ Chasa iachaspaka Jesuska, chi llugsichii tukuska runawa kawanakuspa, nirka:

—Kai Runa Tukuskamanda, kam, ¿sumachu iuiangi?

³⁶ Chiura ainirka:

—Taita waugki, niwai: ¿pitak ka, nuka paimanda suma iuiangapa?

³⁷ Chiura, Jesuska nirka:

—Kamwa rimakug, nukami kani. Paitami kawakungi.

³⁸ Chasa niura, chi runaka nirka:

—Kam taita waugkitami suma iuiakuiki—. Chasa nispa, paita kungurirka.

³⁹ Chiura Jesuska, chipi kagkunata nirka:

—Nuka, kai alpama samurkanimi, runakunata iuiachispa kawachingapa; chiwanka, suma iuiawagpikuna, mana kawaspapas, ñawi kawagsina tukungapa; ikuti mana suma iuiawagpikunaka, kawaspapas, mana ñawi kawagsina tukungapa.

⁴⁰ Chasa uiaspaka sug fariseokuna, paiwa sugllapi kaspa, tapurkakuna:

—¿Nukanchipaschu mana kawagsina kanchi?

⁴¹ Chasa tapuura, Jesuska ainirka:

—Kamkuna, sutipa mana kawanakuskasina kagpika, manachar ñi ima pandariipas kuantrangichi. Kunauraka ningichimi: “Nukanchika, tukui allillami kawanchi”. Chiamandami kamkuna iapa pandariikuna iukangichi.

10

Ubijakunata allilla suma kawagmanda

¹ Kasapasmi Jesús nirka:

—Kasami nuka niikichita: maikanpas, ubijakunapa kinchaska punguta iaikungataka, kincha awata iaikugpika, sisai u chapaspa wañuchigmi ka. ² Pungu tiaskata iaikugmi ubijakunata allilla kawag ka. ³ Paitami punguta kawag iaikuchí. Paipa rimaita, ubijakunapasmi rigsinkuna. Pai kikinpa ubijakunata, sug sug imasa suti kaskasina kaiaspami chimanda llugsichí. ⁴ Tukui paipa ubijakunata llugsichispaka, pai kikinmi ñugpankunata. Chi ubijakunaka, paipa rimaita rigsispa, katichinkunallami. ⁵ Ikuti mana rigsiskataka mana katichinkunachu. Sugpa rimaita mana rigsispaka, mitikunkunallami.

⁶ Jesús chasa iuiái apingasina parlakugpipas, chipi kagkuna mana iacharkakuna imamanda chasa rimakugta. ⁷ Chimanda Jesús, ikuti nirka:

—Kasami nuka niikichita: nukami ubijakunapa iaikungapa pungusina kani. ⁸ Nukapa ñugpa samugkunami karkakuna sisai u chapaspa wañuchigsina ruragkuna. Ikuti Taita Diuspa ubijasina kagkuna, mana paikunata uiarkanakachu.

⁹ —Nukami pungusina kani. Maikanpas nukawa iaikugka, kispichiimi tukungapa kankuna; imasami ubijakuna, mana manchaspalla llugsispa, iaikuspa, alli ugsa mikuspa kankuna: chasa. ¹⁰ Sisaikunaka samunkunami, sisangapa, wañuchingapa i tukui puchukan-gapa. Ikuti nukaka samurkanimi, kamkuna mas iapa suma kaugsaita iukangapa.

¹¹ —Nukami kani ubijakunasina almakunata allilla suma kawag. Sutipa allilla suma ubijakunata kawag, wañungapa chaiagpipas sakirinmi. ¹² Ikuti maikan kulki ganangapaglla kawagka, sacha alku samukugta kawaspaka, ubijakunata sakispa mitikunllami, paipa ubijakuna mana kagmanda. Chiura sacha alku, sug ubijakunata mikugri; sugkunataka mitikuchí. ¹³ Chi kulki ganangapaglla iuiaiwa kaspami ubijakunamanda ñi ima mana llaki.

¹⁴ —Nukami kani ubijakunasina almakunata allilla suma kawag. Nukapakunata rigsinimi. Paikunapas, nukata rigsiwankunami. ¹⁵ Chasallata, nukapa Taita rigsiwá. Nukapas, nukapa Taitata rigsinimi. Nukapa ubijasinakunamanda wañungapa chaiawagpipas, sakingapami kani.

¹⁶ —Sug ubijasinakunapasmi iukani, mana kai kuralmanda. Paikunatapasmí chaia-waku, nukapagma kaiangapa. Paikunapas, nukapa rimaita rigsiwangapami kankuna. Chasaka, tukuikunami sugllapi tukungapa kankuna. Nuka kikinmi tukuikunata suglla allilla suma kawag kangapa kani.

¹⁷ —Nukapa kaugsaita karangapami kani, wañuchii tukungapa. Nispaka, ikutimi kaugsaringapa kani. Chimandami nukapa Taita kuiawá. ¹⁸ Ñi pipas mana nukapa kaugsaita kichuwangapa kanchu. Nuka kikinllami karangapa kani, wañuchii tukungapa. Nuka kikin karangapa pudinimi, wañuchii tukungapa. Chasallata, nuka kikin pudinimi ikuti kaugsaringapa. Chasami nukapa Taita pasangapa kachamuwarka.

¹⁹ Jesús chasa rimakuskata uiaspaka, judiukunaka ikuti iskaima tukurkaka. ²⁰ Achkakuina ninakurka:

—Pai, kuku waira iaikuskami ka. Upa tukuskami ka. ¿Imapatak chara uianakusunchi?

²¹ Ikuti sugkunaka ninakurka:

—Kuku waira iaikuska, manachar chasa rimakuntra. Kuku waira iaikuska kagpika, manachar pudintra, mana ñawi kawagkunata ambingapa.

Judiukuna, Jesusta wabutiskamanda

²² Chiuramanda judiukuna, sug atun pucha Jerusalenpi ialichinakurka; Diuspa atun wasita mana judiu kagkuna jiru ruraskakunata anchuchigsina iuiarispa, chasaka, ikuti sumaglla allilla tukungapa. Tamia punchakunami karka. ²³ Chi wasi ukupi, Salomonpa suti kaska kanchapimi Jesús puririkurka. ²⁴ Chiura judiukunaka, paita muiuchispa, tapurkakuna:

—¿Imaurakamatak nukanchita charikunkangi, kammanda mana iachaspalla kangapa? Kam kikin Cristo kagpika, nukanchita willarii.

²⁵ Jesuska ainirka:

—Ñami willarkaikichita. Mana uiawarkangichichu. Nukapa Taita imasa rurangapa kachamuwasikasina ruraskakunami nukamanda willaku. ²⁶ Kamkuna mana uiawangichichu, mana nukapa ubijasinakuna kaspá. ²⁷ Ikuti nukapa ubijasina kagkuna, nukapa rimaitami uiawankuna. Nukapas, paikunata allillami rigisini. Paikuna, nukatami kati-chiwankuna. ²⁸ Nukaka, paikunata mana puchukaridiru suma kaugsaitami karani. Chi kaugsai iukaspaka, ñi imaurapas mana puchukaringapa kankunachu. Ñi pipas nukapa makimanda mana paikunata kichuwangapa kankunachu. ²⁹ Nukapa Taita, tukuikunamanda mas atunmi ka. Paimi nukapa makipi paikunata sakiwarka. Paipa makimandaka, ñi pipas mana paikunata kichui pudingapa kankunachu. ³⁰ Nukaka, nukapa Taitawa sugllami kanchi.

³¹ Jesús chasa niuraka, judiukuna ikuti rumi aisarkakuna, piaspa wañuchingapa.

³² Paika nirka:

—Nukapa Taita imasa munakuskasina ruraspami kawachirkaikichita, nuka achka allilla ruragta. ¿Maikan allilla ruraskamandatak nukata rumiwa wañuchiwangapa munanakungichi?

³³ Chiura, judiukuna ainirkakuna:

—Chi allilla ruraskakunamandaka mana kamta rumiwa wañuchingapa munanakunchichu. Kam ianga runa kaspá, Taita Diussina tukuspa, jiru llullaspa niskamandami wañuchingapa kanchi.

³⁴ Jesuska nirka:

—Moisés ima kamkunamanda rurangapa niraiaskapi, ¿manachu kasa willaraiá: “Niikichitami: “Taita Diussinami kangichi?”. ³⁵ Chasaka, Diuspa Rimaita uiagkunami Taita Diussina kankuna. Kasapas. Ñugpamanda librupi willaraiaskaka, ñi ima mana llullancho. ³⁶ Nukataka, Taita Dios kikin aglawaskamandami kai alpama kachamuwaska samurkani. Nuka: “Taita Diuspa wambrami kani” nigmandaka, ¿imapatak niwanakungichi: “Taita Diussina tukuspa, jiru llullaspami nikungi”? ³⁷ Nukapa Taita imasa munakuskasina nuka mana ruragpika, mana nukawa iuiawaichi. ³⁸ Ikuti nukapa Taita imasa munakuskasina ruragpika, kamkuna, mana nuka rimaskata iuiawasapapas, chi nuka allilla ruraskakunata kawaspa, suma iuiawaichi. Chasa iuiawasapapa, iachankangichimi nukapa Taita nukawa kagta i nukapas nukapa Taitawa suglla kagta.

³⁹ Chasa uiaspaka judiukunaka, ikuti Jesusta apingapa munanakurka. Paika, paikunapa makimanda llugsispa, mitukurka.

⁴⁰ Chimanda, Jordán iaku sug ladu chimba, Juan ñugpata baugtisadiru kaskama ikuti rirka. Chipika, sug punchakuna chisiagrirka. ⁴¹ Chiura achka runakuna, paipagma chaiagrispa, ninakurka:

—Juanka, ñi ima kawachiipas mana rurarkachu. Ikuti tukui ima kai runamanda willaskaka, sutipami chasa tukuku—. ⁴² Chasa nispaka, achka runakunami chipi Jesusta suma iuiarirkakuna.

11

¹ Betania puiblupi, Lázaro suti runa unguiwa ña wañukurka. Chi runapa panikuna, María i Marta sutikuna, sugllapi kaugsanakurka. ² Chi Mariami karka Iaia Jesusta suma asna asitiwa tallispa, paipa chakikunata kikinpa agchawa tustachig. Chi Mariapa turi Lazaromi wañukurka. ³ Chi panikunaka, Jesuspagma kacharkakuna, kasa ningapa:

—Taita turi, kamba kuiaska Lázaro, iapa ungugmi ka.

⁴ Chasa uiaspaka, Jesuska nirka:

—Chi unguiwa mana wañungapa niraiianchu. Taita Diusta suma atuniachingapami ungug ka. Chi unguiwaka Taita Diuspa wambratapasmí suma atuniachii tukungapa ka.

⁵ Jesús, Martata, ñañandita i Lazarota iapami kuiarka. ⁶ Chasa kuiaspapas, Lázaro ungug kagta iachaspa, chara iskai punchami unaiarka. ⁷ Chiuramandaka, paita katiraiagkunata nirka:

—Ikuti Judea alpama risunchi.

⁸ Paita katiraiagkunaka nirkakuna:

—Iachachig taita, mana iapa unai ka, kamta judiukuna rumiwa wañuchingapa munanagugta. ¿Imapatak ikuti chima ringapa munakungi?

⁹ Jesuska ainirkakunata:

—Mana manchanakuichi. Puncha, ¿manachu chungá iskai ura iuká? Punchapi purig, kai alpata punchaiachigwa kaspaka, ¿imasatak takariipa? ¹⁰ Ikuti maikan tutapi purikugka takaringami, kikin mana punchaiachigwa purikuspa.

¹¹ Chasa nispaka, kasapasmi nirka:

—Nukanchipa kuiaska Lázaro, ñami puñurirka. Paita nuka rigchachingapami ringapa kani.

¹² Chiura, katiraiagkuna nirkakuna:

—Taita waugki, pai puñurirka kagpika, ñachar askaiaku.

¹³ Jesuska, Lazaromanda nikurka: “Puñukumi”, sutipa wañuska kagmanda. Ikuti katiraiagkunaka iuianakurka: “Lazaroka, sutipachar puñuilla puñuku”. ¹⁴ Chasa iuianakugmanda, Jesuska mana pakaspallami nirkakunata:

—Sutipami Lázaro wañuska ka. ¹⁵ Nuka mana chipi kagriskamanda, kamkunamandami kuntintariwá. Chipi kamkuna, nuka ima ruraskata kawaspaka, sumami iuiariwangapa kanchichi. Kunauralla, akushi paipagma.

¹⁶ Chiura Tomás, Dídimó suti, sugllapi katiraiagkunata nirka:

—Akushi nukanchipas, paiwa wañugringapa.

¹⁷ Jesús Betaniama chaiagriuraka, Lázaro ña wañuska, chusku punchasi pambaska karka.

¹⁸ Betaniama Jerusalemamanda karu mana kanchu. Sug kimsa chungá kuadrasinallami ka.

¹⁹ Chimanda achka judiukuna, Marta i Mariapagma chaiagriska karkakuna, paikunapa turi wañuskamanda iapa llakiiwa kaskata kungachingapa.

²⁰ Martaka, Jesús chaiakugta iachaspaka, tupangapa paipagma rirka. María, wasillapi suiakurka. ²¹ Jesusta tupagrispaka, Marta nirka:

—Taita turi, kam kaipi kagpika, nukapa turi manami wañupuá. ²² Nukaka iachanimi: kam ima Taita Diusta mañaskaka, kamta uianllami.

²³ Chiura, Jesuska nirka:

—Kamba turi ikutimi kaugsaringapa ka.

²⁴ Martaka nirka:

—Puchukarii puncha, wañuskakuna kaugsaringapa kaura, nukapa turipas kaugsaringapa kagta; chita iachanimi.

²⁵ Chasa niura, Jesuska nirka:

—Nukami kani wañuska kaskakunata kaugsachig. Nuka kikinmi kaugsai karani. Maikanpas nukata suma iuiawagkuna, wañuska kaspapas, mana mas wañungapami kaugsaringapa kankuna. ²⁶ Tukui kaugsagkuna nukata suma iuiawaspa kagkunaka, mana diltudupa wañungapa kankunachu. Chitaka, ¿kam chasachu suma iuiangi?

²⁷ —Ari, taita turi— ainirka—. Sumami iuiani, kam Taita Diuspa wambra, pai agllaska, kai alpama samuska kagta.

²⁸ Chasa nispaka, rirka, ñañandi Mariata kaiangapa. Kaiaspaka, pakallami nirka:

—Iachachig taita Jesús, kaipimi ka. Kamtami kaiaku.

²⁹ Chasa uiangallawaka, Mariaka, utkalla atarispá, Jesusta kawangapa rirka. ³⁰ Jesús, manara chi puibluma chaiagrispalla, Martawa kawanakuskallapimi suiakurka.

³¹ Judiukuna Mariawa sugllapi llakiiwa kaskata kungachingapa kagkunaka, pai atarispá, wasimanda kalpa llugsigta kawaspaka, katichirkakuna. Iuianakurka: “Pambairaiaskamachar riku, chipi wakangapa”.

³² Mariaka, Jesuspagma chaiagrispa, paita kawaspaka, kungurispá, nirka:

—Taita turi, kam kaipi kagpika, nukapa turi manami wañupuá.

³³ Jesuska, María i judiukuna paiwa chaiagrispa wakanakuskata kawaspaka, sungu nanagtami iapa sinchi llakirirka. ³⁴ Nispaka tapurka:

—¿Maipitak pambarkangichi?

—Taita turi— ainirkakuna—, akushi kawangapa.

³⁵ Chiura, Jesuska wakarka. ³⁶ Chasa kawaspaka, judiukuna nirkakuna:

—¡Chitukuchar Lazarota kuiarka!

³⁷ Sugkuna chipi kagkunaka nirkakuna:

—Pai mana ñawi kawag runata aliachigka, ¿manachu pudirka, chara kaugsakugllapi, Lazarotapas wañuita kispichingapa?

³⁸ Jesuska, ikuti sinchi llakirirka, Lázaro pambaraiaska punguma chaiagriirka. Chi pungupi, sug atun rumi kilpaskami karka. ³⁹ Kawagrispaka, Jesuska nirka:

—Rumita anchuchiichi.

Wañuskapa pani Martaka nirka:

—Taita turi, ñami chusku puncha pambaska ka. Ñachar jiru asnariku.

⁴⁰ Jesuska nirka:

—¿Manachu nirkaiki: “Kam suma iuiawaspaka, Taita Diospa suma iachaitami kawangapa kangi”?

⁴¹ Chasa uiaspaka, chi pungumanda kilparaiaska rumita anchuchirkakuna. Chiura Jesuska, awama kawaspaka, nirka:

—Taitiku, kam uiawaskamanda niikimi: “Pai Siñur”. ⁴² Nuka iachanimi, kam imaurapas uiawadur kagta. Tukui kaipi nukawa muiugta kagkunamandami niiki, kam nukata kachamuwaska kagta paikuna suma allilla iuiawangapa—. ⁴³ Chasa nispaka, sinchi rimaiwa kaparirka— Lázaro, kanchama llugsimui.

⁴⁴ Chasa kaparigllapi, chi wañuskaka, kuiurirka, llugsii kallariirka, chaki i makikuna linsukunawa wataskalla, uma i ñawipas chasallata maituriskalla. Chiura, Jesuska nirka:

—Paskaichi, allilla puringapa.

Jesusta wañuchingapa, judíu taitakuna iuiarinakuskamanda

⁴⁵ Achka judíu Mariapagma chaiagriska kagkunaka, Jesús chasa ruraskata kawaspaka, paíta suma iuiarirkakuna. ⁴⁶ Ikuti sug judiukunaka, pai ima ruraska kawaskata fariseokunata willagrirkakuna. ⁴⁷ Chasa willagriura, iaia sasirdutikuna i fariseokunaka tukui judiukunapa taitakunata tandachirkakuna. Sugllapi kaura, rimanakurka:

—¿Imasami chi runata ruranchi? Mana imaurapas kawaskasina mas achkami ruraku.

⁴⁸ Paita nukanchi sakisunchi chasa rurakungapa; tukuikunami paiwa tukungapa kankuna. Chimandami Romamandakunapas samungapa kankuna, nukanchi Taitikupa suma atun wasita urmachingapa. Kai alpapi kaugsanakuskatapasmi puchukangapa kankuna.

⁴⁹ Sug paipura, Kaifás suti, chi wata iaia sasirduti kaspaka, nirka:

—Kamkuna, ñi imapas mana iachangichichu. ⁵⁰ Iuiariichi: ¿manachu allilla kantra, suglla runa nukanchipa alpapi kaugsanakuskamanda wañungapa; chasaka, tukuikuna mana puchukai tukungapa?

⁵¹ Chasa, pai kikinpa iuiailawa mana rimarka. Chi wata pai iaia sasirduti kaspami Santu Ispirituwa sutipa kaskata willarka, chi alpapi tukui kaugsanakuskamanda Jesús wañungapa kagta. ⁵² Chi alpapi kaugsanakuskamandallaka, mana; tukui Taita Diospa wambrakuna sugpi sugpi kaugsanakuskapas suglla tukungapami wañungapa chaiarka.

⁵³ Chi punchamandaka rimanakui kallariirkakuna, imasapipas Jesusta wañuchingapa.

⁵⁴ Chimanda Jesuska, judiukunata mana kawaringapaka, pakallallami purikurka. Efraín suti puiblupi, chusa sitaska alpa kuchu kuchumi kagrirka. Chipika, paíta katiraiagkunawanta sug punchakuna chisiagriirka.

⁵⁵ Judiukunapa paskua atun puncha ñami chaiakurka. Manara paskua chaiagpi, chi alpa suikunamanda achkakuna Jerusalemma chaianakugrirka, tukui pandariikunata maillariskasina rurangapa; chasaka, Diospa ñawipi allilla kawaringapa. ⁵⁶ Chipika, Jesusta maskanakurka. Diospa atun wasipi kagkunapas, kikinpura tapurinakurka:

—¿Imatak iuianakungichi? Kai atun puncha, ¿paipas samungacha?

⁵⁷ Iaia sasirdutikuna i fariseokuna niska karkakuna:

—Maikanpas Jesús maipi kaskata iachaspaka, willagsamungichi, paíta apichingapa.

12

Jesupa chakikunapi, María suma asna asiti talliskamanda

¹ Paskuapa sugta puncha pisikuura, Jesuska Betania puibluma rirka Lázaro kaugsakuskama. Chi Lázaro wañuskatami kaugsachiska karka. ² Jesús chipi chaiagriuraka, suma mikui mikungapa kaiarkakuna. Marta, mikui ianuska ialichikurka. Lazaropas, Jesuswa sugllapi mikunakurka. ³ Mariaka, chipi mikunakunkama, sug librasina nardo

suti suma asna asiti iapa bali kulkiwa randiskata charirispa, Jesuspa chakikunapi tallirka. Nispaka, kikinpa agchawa tustachirka. Chasa talliura, chi wasi ukupi iapa suma asnaimi tukugsamurka.

⁴ Chiura Judas Iskariote, Jesusta katiraiagpura, Jesusta apichingapa iuiakugka, nirka:

⁵ —¿Imapatak chi asitita kimsa patsa puncha ganaska bali kulkimanda mana katurka? Chiwa pudirirka, mana ñi imapas iukaskakunata chi kulkikunata karangapa—. ⁶ Paipa iuiapai chi Judaska, mana iukagkunamanda mana iuiakurka. Kikin tukui paipurakunapa kulki wakachidur kaspapa, pai kikinmanda sisai kaspami chasa rimakurka.

⁷ Jesuska nirka:

—Ianga kawai. Chika, nukata pambawangapa punchapami wakachiraiarka. ⁸ Ñi ima mana iukagkunata imaurapasmi iukangapa kangichi. Ikuti nukataka sug ratullami kawawanakungichi.

⁹ Jesús Betania puiblupi kagta iachaspaka, iapa achka judiukuna chima chaiagrirkakuna. Jesusta kawangapaglla, mana; Lázaro wañuska kaugsariskata kawangapawantami rirkakuna. ¹⁰ Chimanda, iaia sasirdutikuna iuiarirkakuna, Lazarotapas wañuchingapa. ¹¹ Lázaro ikuti kaugsariska kagmandaka, achka judiukuna, chi taitakunata sakispa, Jesuswa tururkakuna.

Jerusalén puibluma, Jesús iaikugrirkamanda

¹² Chi kaiandi, iapa achka runakuna paskua atun puncha ialichingapa chaiagriska karkakuna. Jesuspas Jerusalenma chaiagrirkugta iachaspaka, chimanda llugsirkakuna ringapa, ¹³ ramus palmakuna kuchuspa, paita tupangapa. Tupagriskapa, kaparii kallarrirkakuna:

—Taita Diusta iapa suma kagtami ninchi.

Atun Taita Dios kachamuska

Israelmanda runakunapa atun mandag samug, paipa iapa kuiaskami kangi.

¹⁴ Jesuska, sug maltu buruta tarispa, tiarirka. Chiwanka, imasa ñugpamanda librupi willaraiaskasina tukugsamurka. Kasami niraiá:

¹⁵ Sión lumamanda warmikuna, mana manchanakuichi.

Kawaiichi. Kamkunapa atun mandagmi samuku.

Sug burapa maltu wawa burupimi tiarirka samuku.

¹⁶ Jesusta katiraiagkuna, kawanakuspapas, mana iacharkakuna pai ima rurakugta. Taita Dios paita suma atuniachiskauramandami, paimanda imasa willaraiaskasina chasa ruraskata iuiarigsamurkakuna.

¹⁷ Lázaro wañuska pambaraiaskata Jesús kaugsachispa kaiagta kawagkunaka, tukui-kunata willanakurka. ¹⁸ Chi imaurapas mana kawaskasinata ruraskamanda iachaspami achkakuna paita tupagringapa llugsirkakuna. ¹⁹ Chasa kawaspaka, fariseokuna kikinpura rimarinakurka:

—Kawaiichi. Ñi imapas mana rurangapa pudinakunchi. Tukuikunami paillata katinakú.

Sug mana judíu kagkuna, Jesusta kawangapa munanakuskamanda

²⁰ Sug griego suti runakunapasmi Jerusalenma riska karkakuna, paskua atun puncha ialichinakuskapi Taita Diusta kunguringapa. ²¹ Chi runakunaka, Felipepagma kaillaigrispa, nirkakuna:

—Waugki, Jesusta kawaspa rigsingapami munanakunchi—.

(Felipe, Galilea alpa i Betsaida puiblumandami karka.)

²² Chiura Felipeka, Andresta willagrirkakuna. Nispa pai iskandikuna, Jesusta willagrirkakuna, nispa:

—Kamta munanakú rigsingapa.

²³ Jesuska ainirka:

—Kai Runa Tukuskata suma atuniachingapa puncha ñami chaiamuku. ²⁴ Kasami nuka niikichita: trigu similla mana alpapi urmaspa wañugsina tukugpika, chasallami kidá, ñi ima mana tukuspalla. Ikuti alpapi urmaspa wañugsina tukuspakar, wiñariura, chi simillamanda achkami tiari. ²⁵ Chasallata, maikanpas kikinmandalla kaugsai munag, kikinmi puchukaringapa ka. Ikuti maikan kai alpapi kikinpa kaugsaita nukamanda iuiarispa, mana kispichigpika, mana puchukariduru suma kaugsaitami taringapa ka. ²⁶ Maikan nuka ima munaskata rurangapa munagka katichiwachu. Chasaka, nuka maipi kaskapi, chillapitami chi runapas kagrangapa ka. Maikan nuka ima munaskata ruragta, nukapa Taitapasmi kuiangapa ka.

Jesús imasa wañungapa kaskata, pai willaskamanda

²⁷ Kasapasmi Jesús nirka:

—Kunaura, sungu nanagtami llakiwaku. Chimanda, ¿kasachu nisa: “Taitiku, kai llaikiita kunaura anchuchiwai”? Mana. Chasapami samurkani—. ²⁸ Chasa nispa, Taita Diusta nirka— Taitiku, kam iapa suma atun kagta kawachirii.

Chiura, suma luarmanda rimai uiarigsamurka, kasa nispa:

—Nuka iapa suma atun kagta kamwa ñami kawachirirvani. Mas nispa, ikutimi kamllawanta kawachiringapa kani.

²⁹ Chipi kagkuna, chasa uiaspaka, sugkunaka nirkakuna:

—Sinchimi triwinarka.

Ikuti sugkunaka nirkakuna:

—Sug anjilmi paita rimarka.

³⁰ Jesuska nirkakunata:

—Chi rimai uiariskaka, nukamanda mana uiarirkachu. Kamkunamandami uiarigsamurka. ³¹ Kunaurami kai alpapi kaugsagkuna justisiai tukungapa kankuna. Kunaurami kai alpapi mandag iaia kuku llugsichii tukungapa ka. ³² Nukaka, alpamanda atarichii tukuspa, tukuikunatami nukapagma kaillaiachingapa kani—. ³³ Pai imasa wañungapa kaskatami chasa willakurka.

³⁴ Jesús chasa niuraka, chipi kagkunaka nirkakuna:

—Ñugpamanda librupi kawasapaka, iachanchimi, Taita Dios agllaska Cristoka ñi imaupas mana wañungapa kagta. Nigpika, ¿imapatak kamka nikungi: “Runa Tukuskata chaikumi, atarichii tukungapa”? Chi Runa Tukuska, ¿pimandatak nikungi?

³⁵ Chiura, Jesuska ainirkakunata:

—Mailla punchakunallami kai punchaiachig, kamkunapa chaugpipi kangapa ka. Kai punchaiachig kamkunawa kankama, nukawa puriichi; chasaka, mana kamkunata tutaiai apigsamungapa. Tutapi purig mana iachanchu maipi rikugta. ³⁶ Kai punchaiachig kamkunawa kankama, suma iuiawaichi. Chasaka, punchaiachig Taita Diospa wambrakunami kankangichi.

Chasa nisapaka Jesús, paikunapagmanda anchurispa, mana kawarirka.

Judiukuna, imapa Jesusta mana allilla iuianakuskamanda

³⁷ Chituku achka suma mana imaurapas kawaskasina judiukunapa ñawipi ruragpipas, Jesuswa mana tukurkakuna; ³⁸ chasaka, Isaías suti Santu Ispirituwa rimag imasa willaskasina tukugsamungapa. Kasami niraiá:

Taitiku,

¿pikunatak munarkakuna,

nukanchi ima willaskata suma uangapa?

Maillakunalla.

Chasallata, atun Taita Diospa iapa iachaita,

¿pikunatak kawachirka?

³⁹ Paikuna mana uangapa, Isaías ñugpami willaska karka, kasapas nispa:

⁴⁰ Taita Diosmi paikunapa ñawita tutaiachigsina rurarka.

Iuiaikunatapasmí kichurka.

Chasaka paikuna,

mana ñawiwa kawagsina,

mana iuiái iukagsinami tukungapa kankuna.

Mana munankuna, nukawa tigramungapa.

Tigramugpika, nukami ambintranikunata.

⁴¹ Paipa iuiái Jesús suma atun kagta ñugpata kawaspami Isaías chasa paimanda willarka.

⁴² Chasa willaraiaska kagpipas, judiukunapa achka taitakunapasmí Jesuswa tukurkakuna. Chasa tukuspapas, dimanchaimi mana kawariilla Jesusmánda rimarkakuna. Mana kagpika, fariseokunaka tandariduru wasimandami paikunata llugsichintrakuna. ⁴³ Jesuswa tukuspapas, masmi munarkakuna, kikinkunamandalla suma atuniachirii tukungapa, Taita Dios suma atuniachiita sakispa.

⁴⁴ Jesuska, kaparispa, nirka:

—Maikanpas nukawa tukuskakunaka, mana nukallawa iuianakunchu. Nukata kachamuwagtapasmí iuká iuianakunga. ⁴⁵ Chasallata nukata kawawanakugka, kachamuwagtapasmí kawanakú.

⁴⁶ —Kasapas. Nuka, kai alpapi kaugsanakuskapa iuiaikunata punchaiachingapami samurkani; chasaka, maikanpas nukawa tukugpikunaka, tutapisina mana kaugsanakungapa. ⁴⁷ Maikan uiawasapapas, nuka ima rimaskata mana ruragpika, pai pandariskakunata nuka mana kawakunichu. Mana samurkanichu, kai alpapi kaugsagkuna pandariskakunata kawangapa. Paikunata kispichingapami samurkani. ⁴⁸ Maikan nuka

ima rimaskata mana allilla uiaspa wabutiwagpika, sugmi pai pandariskakunata kawachingapa ka. Chi nuka rimaskakunata mana uiawagmandami puchukarii puncha tukui pandariskakunata kawachii tukungapa ka. ⁴⁹ Nukapa iuiailawa mana rimakunichu. Nukapa Taita kachamuwagmi willawarka, imasa nuka rimaspa iachachingapa kagta. ⁵⁰ Nuka iachanami, pai niskata uiaspa, mana puchukariduru suma kaugsaita chaskingapa tiagta. Chimandami nukapa Taita imasa willawaskasina kamkunata willaikichita.

13

Jesusta katiraiagkunapa chakikunata, pai maillaskamanda

¹ Paskuapa rurangapa suglla puncha pisikuura, Jesús ña iacharka, kai alpamanda paipa Taitapagma ringapa chaiakugta. Kai alpapi paiwa kagkunata iapa kuiaspa, wafunkamami munarka.

² Paita katiraiagkunawa mikunakunkama, iaia kuku, ñami Judas Iskariote suti Simonpa wambrapa sungupi iuiachiska karka, Jesusta apichingapa. ³ Jesús ña iacharka, Taita Dios paipa makipi tukui karaska kagta; chasallata, Taita Diospagmanta samuspa, Taita Diospagmallata kutingapa kagta. ⁴ Nispaka, mikunakuskamanda atarispas, kikin kataraiaska katangata anchuchirispas, tustachiduru linsuta aisaspas, chumbillirirka. ⁵ Sug uchulla batiaipi iaku tallispa, paita katiraiagkunapa chakikunata maillai kallarirka. Chakikunata maillaspaka, chumbilliraiaska linsuwami chakichispa aparka.

⁶ Simón Pedropa chakita maillangapa chauraka, Pedroka tapurka:

—Taita waugki, ¿kamchu nukapa chakikunata maillawankangi?

⁷ Jesuska ainirka:

—Nuka chasa rurakuskata, kam kunaure mana iachangichu. Kipamami ima niraiaskata iachangapa kangki.

⁸ Pedroka nirka:

—Kam, ñi imaupas mana nukapa chakikunata maillawangapa kangichu.

Jesuska ainirka:

—Nuka kamta mana maillagpika, kamka mana nukapa kangapa kangichu.

⁹ Chiura, Simón Pedro nirka:

—Taita waugki, chasa kagpika, chakikunallata mana maillawai. Makikuna umawanta armachiwai.

¹⁰ Jesuska nirka:

—Maikan ña armaska kaskata mana ikuti maillai ministinchu. Chasa armaska, ñi ima mana mapa kanchu. Chasallata, kamkuna armaskasinami kangichi; nigpika tukuikunaka, manima—. ¹¹ Jesús, pi paita apichingapa kagta iachaspami nirka: “Nigpika, tukuikunaka mana armaskasina kangichichu”.

¹² Ña tukuikunapa chakikunata maillaspa, paipa kataridiruta katarispas, ikuti sugllapi tiarigrirka. Nispaka, nirkakunata:

—Nuka ima kamkunata ruraska, ¿iachangichichu ima niraiagta? ¹³ Nukata, kamkuna niwangichimi: “Iachachig taita” i “Iaia Jesús”. Chasaka, allillami niwangichi. Chasami kani. ¹⁴ Nuka, kamkunapa iaia i iachachig taita kaspapas, kamkunapa chakikunatami maillarkaikichita. Chimandami kamkunatapas chasallata chaiaku, kam kikinpura maillanakungapa. ¹⁵ Nuka, kamkunata ñami kawachirkaikichita, imasa kam kikinpura ruranakungapa kagta. ¹⁶ Kasami nuka niikichita: lutrin, taitakunamanda mas atun mana kanchu. Chasallata kachamuska runa, kachamugmanta mas atun mana kanchu. ¹⁷ Chi tukui ima iachachiskata suma ruraspaka, Taita Diospa iapa kuiaskami kapuankangichi.

¹⁸ —Tukui kamkunamanda, nuka mana chasa ninakuikichitachu. Nuka agllaskakunamanda ñami iachani. Chiwanka, ñugpamanda librupi imasa willaraiaskasina tukugsamungapa ka. Kasami niraiá: “Nukawa tanda sugllapi mikugpas, nukapa kuntrami tukurka”. ¹⁹ Kunaure, manara chasa tukugsamugpimi willaikichita; chasa tukugsamururaka, kamkuna, suma iuiariwaspa, nuka pi kagta rigsiwangapa. ²⁰ Kasami nuka niikichita: maikanpas nuka kachaskata chaskigpika, nukata chaskiwagmi niraiá. Chasa chaskiwaspaka, nukata kachamuwagtapasmi chaskig niraiá.

Judas Iskariote Jesusta apichingapa kagta, Jesús willaskamanda

²¹ Chasa nispaka Jesuska, sungu nanagta llakirispas, imasa pasaringapa kagta willarka, kasa nispa:

—Kasami nuka niikichita: kam kikinpuramanda sugmi apichiwangapa ka.

²² Chiura paita katiraiagkuna, ñawima kawarinakuspa iuianakurka: “¿Pimandasik chasa rimaku?”. ²³ Jesusta katiraiagpura mas kuiaskaka, paita kimirispas tiakurka. ²⁴ Pai kimiraiaskataka, Simón Pedro ñawiwa siñas rurarka, tapuchingapa: ¿pimandami Jesús chasa rimaku? ²⁵ Chiura chi runaka, Jesuspagma mas kimirispas, tapurka:

—Taita waugki, willawai: ¿pitak ka?

²⁶ Chiura, Jesuska ainirka:

—Nuka sug piti tanda jukuchispa, karasa; paimi ka—. Chasa nispaka, tanda jukuchispa, Judas Iskariotetami kararka. Chika karkami Simonpa wambra.

²⁷ Chi tandata chaskispa mikuuraka, chiuralla iaia kukuka Judaspa sunguma iaikurka.

Nispaka Jesuska, paita nirka:

—Kam ima rurangapa kaskata utkalla rurai.

²⁸ Ñi maikan Jesuswa mikunakugpura mana iacharkakuna, imamanda pai chasa nikugta. ²⁹ Sugkuna iuianakurka: “Judas kulki wakachidur kagmanda, atun punchapipa ima ministiskakuna randingapachar kachaku”. Ikuti sugkunaka iuianakurka: “Ñi ima mana iukaskakunatachar karangapa kachaku”. ³⁰ Judas chi tandata mikungallawa llugsiura, ña tutami karka.

Musu mandaita, Jesús iachachiskamanda

³¹ Judas ña llugsiura, Jesuska nirka:

—Kunaurami kai Runa Tukuskata suma atuniachiska tukuku. Nukawami Taita Diuspa suma atuniachiska tukuku. ³² Taita Diuska, nukawa atuniachiska tukuspa, nukatapismi atuniachiwangapa ka. Mana unaimi atuniachiwangapa ka.

³³ —Nukapa kuiaskakuna, kamkunawa mana unai kangapa kanichu. Chiuramandaka, kamkunata iapa llakiimi tukungapa ka. Imasami judiukunata nirvani: chasallatami kunaura kamkunatapas niikichita: “Nuka maima ringapa kaskama, kamkunaka mana rii pudingapa kangichichu”.

³⁴ —Kamkunata sug musu mandaitami sakiikichita: kam kikinpura kuianakungapa. Imasami nuka kamkunata kuiarkaikichita: chasallata kam kikinpurapas kuianakuspa kaugsangichi. ³⁵ Chasa kuianakugpika, tukuikunami iachangakuna, kamkuna nukata katiraiawagkuna kagta.

Jesusta mana rigsinihu, Pedro ningapa kaskamanda

³⁶ Chiura, Simón Pedroka tapurka:

—Taita waugki, ¿maimatak rikungi?

Chiura, Jesús ainirka:

—Nuka maima ringapa kaskama, kunaura kam mana katiwai pudingapa kangichu. Kipamami katichiwankangi.

³⁷ Pedroka tapurka:

—Taita waugki, ¿imawantak kunaura nuka mana kamta katingapa pudiiki? Kammanda wañuchiipasmi tukunrani.

³⁸ Chasa niura, Jesuska ainirka:

—Nukamanda wañungapa munakugpipas, kasami nuka niiki: gallu manara kantagpimi kamka kimsa biaji nukamanda ningapa kangi: “Paita mana rigsinihu”.

14

Jesumanda, Taita Diuspagma chaiagringapa kaskamanda

¹ Kasapasmi Jesús nirka:

—Mana sungupi iapa irkiaspa kaichi. Imasami Taita Diusta suma iuiangichi: nukatapapas chasallata suma iuiawaichi. ² Nukapa Taitapagpi achka kaugsadirumi tia. Mana chasa tiagpika, timpumi willaikichita. Kunaura, paipagmami ringapa kani, kamkunamanda kaugsadiruta allichigringapa. ³ Chi kaugsadiruta ña allichigrispaka, ikutimi samusa, kamkunata pusangapa; chasaka, nuka maipi kaskapi, kamkunapas kaugsagringapa. ⁴ Nuka maima rikuskamaka, kamkuna ñami iachangichi imasa chaiagringapa.

⁵ Chasa uiaspaka, Tomás nirka:

—Taita waugki, nukanchi mana iachanchi kam maima rikugta. ¿Imasatak iachasunchi maikan ñambi ringapa kagta?

⁶ Chiura, Jesuska ainirka:

—Nukami kani chaiagridiru ñambisina. Ñi imapi mana llullag, kaugsai karagpasmi kani. Nukallawami nukapa Taitapagma chaiagridiru ka. ⁷ Nukata rigsiwaspaka, nukapa Taitatapasmu rigsigsina kangichi. Kunauramandatami ña paita rigsispaka kawanangichichu.

⁸ Chasa uiaspaka, Felipe nirka:

—Taita waugki, kamba taitata nukanchita kawachii. Chillami munanchi.

⁹ Chiura Jesuska, paita ainirka:

—Nuka, ña unaimi kamkunawa kani. Nigpika, ¿manarachu kam nukata rigsiwangi? Maikanpas nukata kawawag, nukapa Taitatapasmu ña kawag niraiá. Nigpika, ¿imawantak kam niwakungi: “Kamba taitata nukanchita kawachii”? ¹⁰ ¿Manarachu suma iuiangi, nukapa

Taita nukawa i nukapas Taitawa suglla kagta? Nuka ima kamkunata rimakuskaka, nukapa iuiailawa mana rimakunichu. Nukapa Taita, nukawa suglla kaspami nuka tukui ima ruraskata rurag ka. ¹¹ Suma iuiawaichi, nukapa Taita nukawa i nukapas nukapa Taitawa suglla kagta. Mana nukata iuiawasppapas, nuka ima rurakuskallata kawaspa, chasa kagta iuiariichi.

¹² —Kasami nuka niikichita: maikanpas nukata suma iuiawag, nuka imasa ruraskasinallatami rurangapa ka. Nukapa Taitapagmami nuka rikuni. Chimanda maikan suma iuiawag, imaurapas mana kawaskasina mas sumami mainigtapas rurangapa ka. ¹³ Kamkuna nukamanda iuiarispa mañagpikunaka, tukuimi chaskinkangichi, nukapa Taitata paipa wambrawa mas suma atuniachingapa. ¹⁴ Imapas kamkuna nukamanda iuiarispa mañagpikuna, nukapasmi karasakichita.

Santu Ispirituta, Jesús kachamungapa niskamanda

¹⁵ —Kamkuna nukata kuiawaspaka, nuka imasa niskasinami rurankangichi. ¹⁶ Nukaka, nukapa Taitata mañapusakichitami, kamkunata sug sumaglla iuiachigta kachamungapa. Paimi imaurapas kamkunawa kangapa ka. ¹⁷ Pai Santu Ispiritumi tukuipi sutipa kaskata willangapa ka. Kai alpapi tiaskakunallawa iuiagkuna, paita mana iachaspa i mana rigsispa, mana paita chaskingapa kankunachu. Ikuti kamkunaka, paita rigsingichimi. Pai, kamkunawami ka. Kamkunapa iuiaipipasm kaugsagsamungapa ka.

¹⁸ —Chasaka, kamkunata wagchusina mana sitaikichitachu. Kamkunapagma ikutimi samusa. ¹⁹ Kai alpapi tiaskakunallawa iuiagkuna, sug ratullami kawawanakú. Nispaka, mana mas kawawangapa kankunachu. Kamkunakar, ikutimi kawawangapa kangichi. Nuka kaugsalla kagmanda, kamkunapas kaugsallami kangapa kangichi. ²⁰ Chi punchamandami iachankangichi, nukapa Taitawa nuka suglla kagta; chasallata, kamkuna nukawa i nukapas kamkunawa suglla niraiagta.

²¹ —Maikanpas nuka ima niskata iachaspa suma ruragkunami sutipa nukata kuiawag kankuna. Nukata kuiawagkunataka, nukapa Taitapasmi kuianga. Nukapas, paikunata nuka kuiag kagta kawarisami.

²² Chiura sug Judas, mana Iskariote kagka, tapurka:

—Taita waugki, ¿imatak nikungi, kai alpapi tiaskakunallawa iuiagkunata mana kawarispalla, nukanchillata kawaringapa?

²³ Chiura, Jesuska ainirka:

—Maikan nukata kuiawagkunaka, nuka imasa niskatami rurangakuna. Paikunataka, nukapa Taitapasmi kuianga. Kuiaspaka, samusunchimi, paikunapi kaugsadiru rurangapa. ²⁴ Ikuti nukata mana kuiawagkunaka, nuka ima nunkata mana rurangapa kankunachu. Chi rimaikuna kamkuna uiawanakuskaka, nukapa iuiailawa mana kanchu. Nukapa Taita kachamuwaska, paipa iuiaitami willanakuikichita.

²⁵ —Nuka, chara kamkunawa kankamallami tukui chi rimaikunata willanakuikichita.

²⁶ Santu Ispiritutaka nuka mañaskamandami nukapa Taita kachamungapa ka. Pai Ispiritu kamkunata sumaglla iuiachig, samuspaka, tukui imasa kaskasinami iachachigsamungapa ka. Nuka kamkunata kunaura tukui ima willaskatapasmi ikuti iuiachingapa ka.

²⁷ —Kamkunata sakiikichitami, nukasinallata sumaglla kaugsangapa, parijuma mana manchanakuspalla. Chi suma kaugsai mana kanchu imasa kai alpapi tiaskakunallawa iuiagkuna kaugsankuna: chasa. Chimanda, mana llakispa manhaspa kangichi. ²⁸ Ñami willarkaikichita: “Nukaka rikunimi. Chasa kagpipas, kamkunapagma ikutimi samusa”. Kamkuna sutipa kuiawagpika, nukapa Taitapagma rikugmanda uiaspa, iapami kuntintarinrangichi. Nukapa Taita, nukamanda mas atunmi ka. ²⁹ Kunaura, manara chasa chaigpimi willaikichita; chasa pasariuraka, kamkuna, nuka ima willaskata iuiarispa, suma iuiawangapa.

³⁰ —Kasapas. Iaia kuku kai alpapi mandag samukugmandami nuka kamkunawa mana iapa rimangapa kani. Chi iaia kukuka mana iukanchu nukawa ñi imapas kawanga. ³¹ Pai chasa samukugpipas, nukataka chaiawakumi, kai alpapi kaugsagkunata kawachingapa, nukaka nukapa Taitata kuiagta; chasallata, nukapa Taita imasa niwaskasina nuka rurag kagta.

—Atariichi. Kaimanda akushi.

15

Jesús, ubas alli sachasina kaskamanda

¹ Kasapasmi Jesús nirka:

—Nukami kani ubas alli sachasina. Nukapa Taitaka, chi suma sachata almagsinami ka. ² Sachata almag, malki mana muii apariskakunata kuchunmi. Ikuti malki muii iukaskakunataka ladu ladu malkikunata anchuchispa, suma almaspami saki; chasaka, mas suma

muiukuna tiaringapa. ³ Kamkuna, nuka ima rimaskata uiawaspaka, ñami alli malkikunata almaskasina kangichi. ⁴ Nukawa kaichi. Nukapas, kamkunawami kasa. Imasami malki, kikin sachama mana llutaraiagpika, ñi ima muiuu mana tiaringapa ka: chasallatami kamkuna, mana nukawa sugllapi kagpika, chi mana muiuiug malkikunasina kantrangichi.

⁵ —Nukami kani chi ubas alli sachasina. Kamkunami chi malkikunasina kangichi. Maikan nukawa sugllapi kag, nukapas paiwa kagpika, paika achka mikui muiuu iukagsinami ka. Mana nukawa sugllapi kaspaka, ñi imapas mana pudingapa kangichichu. ⁶ Imasami malki sachamanda anchuchiska, ña tusta kauraka, tandachispa, ninapi sitankuna rupan-gapa: chasallatami maikan mana nukawa sugllapi kagkunaka, sitai tukungapa kankuna.

⁷ —Kamkuna nukawa sugllapi kaspaka, nuka imasa niskata ruraspaka, tukui ima mañaskaka chaskinkangichimi. ⁸ Kamkuna achka mikuisina iukaskawa nukapa Taitata sumami atuniachipungapa kangichi. Chasaka, nukapa iachaikugkuna kagtami kawachingapa kangichi.

⁹ —Imasami nukapa Taita, nukata kuiawá: chasallatami nukapas, kamkunata kuiaichita. Chiwanka, sumaglla kaugsanakungichi, nukapa kuiaskakuna kangapa. ¹⁰ Nukapa Taita ima niwaskata nuka ruraspaka, paipa kuiaskami kani. Chasallata kamkunapas, nuka ima niskata ruraspaka, nukapa kuiaskakunami kankangichi. ¹¹ Chasa niikichitami, nuka kamkunawa iapa suma alli iuiachiiwa kangapa. Chasaka kamkunapas, nukawa iapa suma iuiachiiwami tukuipi allilla kankangichi.

¹² —Kasa rurangapami niikichita: imasami nuka, kamkunata kuiaichita: chasallata kamkunapas, kam kikinpura kuianakuspa kaugsangichi. ¹³ Maikanpas paipa kuiaska iacharidukunamanda wafugpika, tukuikunamandapas mas kuiagmi ka. ¹⁴ Nuka ima niskata kamkuna ruraspaka kagmandami nukapa kuiaska iacharidukuna kapuangichi.

¹⁵ —Lutrinkuna mana iachankunachu, taitakuna ima ruranakugta. Chimandami kamkunata mana niikichita: “Lutrinkuna”. Kunauramanda, nukapa kuiaska iacharidukunami kapuangichi. Nukapa Taitata tukui imasa uiaskasinami kamkunata willaspa iachachirkaikichita.

¹⁶ —Kamkuna mana nukata agllawarkangichichu. Nukami kamkunata agllarkaikichita. Chasaka, kamkuna maima riskapi, malki suma muiuiugsina kaspaka, allillami ruragrangichi. Chi alli ruraskakunaka, ñi imaurapas mana puchukaringapa kanchu. Chiwanka, tukui ima nukapa Taitata nukamanda iuiarispa mañagpikunaka, paimi kamkunata karangapa ka. ¹⁷ Kasa rurangapami niikichita: kam kikinpura kuianakuspa kaugsangichi.

Kai alpapi tiaskakunallawa iuiagkuna, Jesusta katiraiagkunatapas mana munagmanda

¹⁸ —Kai alpapi tiaskakunallawa iuiagkuna kamkunata mana munagpika, iuiaringichi: paikuna ñugpami nukata mana munawarkakuna. ¹⁹ Kamkuna kai alpapi tiaskakunallawa iuiagkunasina kagpi, paikuna kikinpurasinami kamkunata kuiantrakuna. Kamkuna mana kangichichu kai alpapi tiaskakunallawa iuiagkunasina. Nukami kamkunata kai alpapi kaugsanakusapuramanda agllarkaikichita. Chimandami kai alpapi tiaskakunallawa iuiagkuna, kamkunata wabutispa, mana munankuna. ²⁰ Nuka ima rimaskata iuiariichi: “Lutrin, paipa taitakunamanda mas atun mana kanchu”. Nukata mana munawagkuna, kamkunatapasmi mana munangapa kankuna. Nuka ima rimaskata uiaspa ruragkunaka, kamkuna imasa rimaskakunatapasmi chasallata uangapa kankuna. ²¹ Ikuti mana uiagkunaka, nukata kachamuwagta mana rigispami kamkunata chasa tukui imapas jiru rurangapa kankuna, kamkuna nukawa tukugmanda.

²² —Nuka mana samuspa, paikunata rimagsamunimi; paikuna, pandariskapas, manachar pandariska niraiantra. Chimanda, kunaura mana pudinkunachu ningapa: “Nuka mana iacharkanichu”. ²³ Maikanpas nukata mana munawag, nukapa Taitatapasmi mana munag ka. ²⁴ Mana pipas kawaskasinata, paikunapa ñawipi, nuka mana ruragsamunimi; paikuna, pandariskapas, manachar pandariska niraiantra. Chimanda kunaura, nuka ima ruraskata kawaspapasmi nukata mana munawankuna. Chasaka, nukapa Taitatapasmi mana munapuankuna. ²⁵ Imasa paikunamanda ñugpamanda librupi willaraiaskasinami tukugsamuku. Kasami niraiá: “Iangami nukata mana munawarkakuna”.

²⁶ —Kasapas. Sumaglla iuiachigtami nukapa Taitapagmanda kachamusakichita. Pai Santu Ispíritu kanmi ñi imapi mana llullaspalla sutipa kaskata willag. Nukapa Taitapagmanda samuspa, nukamandami tukuipi allilla willangapa ka. ²⁷ Chiuramandami kamkunapas, nukawa ñugpamandata kaspaka, suma allilla iuiarispa, nukamanda willangapa kangichi.

16

¹—Chimandami ña nirkaikichita, kamkuna chasa pasarikuuraka, nukamanda ñi imapi mana sug rigcha iuiawanakungapa. ²Kamkunata judiukuna tandariduru wasikunamandami llugsichingapa kankuna. Chi punchakuna chaiaura, maikanpas kamkunata wañuchispaka, iuianakungami: “Taita Dios imasa munaskasinami allilla rurakuni”. ³Nukapa Taitata ñi nukata mana rigsispami chasa rurangapa kankuna. ⁴Nuka willaspami sakiikichita, chasa chaiaura, nuka ima willaskata iuiaringapa.

Santu Ispíritu ima rurangapa kaskamanda

—Nuka mana ñugpa willarikaikichitachu, kamkunawa kaspá. ⁵Ikuti kunaauraka, nukata kachamuwagpagmami ringapa kani. Ñi pipas mana tapuwangichichu: “¿Maimatak rikungi?”. ⁶Nuka chasa rimaskamandami kamkuna, iapa irkiaspa, sungu nanagta llakiiwa kangichi. ⁷Chasa kagpipas, sutipa kaskatami kasa niikichita: nuka, kamkunamanda allillapami rikuni. Nuka mana rigpika, kamkunata sumaglla iuiachig Santu Ispíritu mana samungapa kanchu. Nuka rispaka, paita kamkunapagmami kachamusa.

⁸—Pai samuspaka, kai alpapi tiaskakunallawa iuiagkunata iuiachingapami ka mana allilla ruranakugta. Imasa chaiaskasina allilla rurangapami iuiachingapa ka. Kasapas. Taita Dios justisiag kagtami iachachingapa ka. ⁹Nukata rigsingapa mana munawagmandami paikunata iuiachingapa ka mana allilla ruranakugta. ¹⁰Nukapa Taitapagma riura, kamkuna mana mas nukata kawawangapa kangichichu. Chimandami pai, imasa chaiaskasina allilla rurangapa iuiachingapa ka. ¹¹Iaia kuku kai alpapi mandag ñami justisiai tukuska ka. Chasa Taita Dios justisiag kagtami pai tukuipi iuiachispa iachachingapa ka.

¹²—Kamkunata willangapa, achkami iukani. Chasa iukagpipas, kamkuna kunaaura manima tukuimanda iachaikui pudingapa kangichichu. ¹³Santu Ispíritu ñi imapi mana llullaspalla sutipa kaskata willagmi samungapa ka. Paika, samuspa, tukui imasa sutipa kaskatami kamkunata allilla suma iuiachispa iachachingapa ka. Mana rimangapa ka pai kikinpa iuiailawa. Taita Dios ima niskata uiaskatami kamkunata willangapa ka. Imasa mas kipama chaiangapa kaskatapasmi willangapa ka. ¹⁴Nuka rimaskata chaskiwaspami kamkunata mas allilla iachachigsamungapa ka. Chasamandami pai nukata suma atunia-chiwangapa ka. ¹⁵Nukapa Taita tukui ima iukaska, nukapami ka. Chimandami niikichita: “Nuka rimaskata chaskiwaspami kamkunata mas allilla iachachigsamungapa ka”.

Llakiiwa kagkuna, alli iuiachiiwami tukungapa kankuna

¹⁶Kasapasmi Jesús nirka:

—Sug mana unaiilla, nukata mana kawawangapa kangichichu. Sug ratumaka, ikutimi kawawangapa kangichi.

¹⁷Chiuraka paita sug katiraiagkuna, kikinpura tapurinakurka:

—Nukanchita chasa rimaika, ¿imatak niraiá? “Sug mana unaiilla, nukata mana kawawangapa kangichichu. Sug ratumaka, ikutimi kawawangapa kangichi”. Kasapasmi nirka: “Nukapa Taitapagmami ringapa kani”. ¹⁸Chi mana unaiilla, ¿imasik niraiá? Chasa rimai ima niraiagta mana iachanchichu.

¹⁹Jesúska, paikuna chasa tapungapa iuianakuskata iachaspa, nirka:

—Kasami nirkaikichita: “Sug mana unaiilla, nukata mana kawawangapa kangichichu. Sug ratumaka, ikutimi kawawangapa kangichi”. Chasa rimaikunamandaka, ¿manachu kamkunapura tapurinakungichi: “¿Imatak niraiá?”? ²⁰Kasami nuka niikichita: kamkuna, iapa llakirispami wakanangichi. Ikuti kai alpapi tiaskakunallawa iuiagkunaka, sumami kuntintaringakuna. Kamkunapa llakiiwana iukaskaka, iapa alli iuiachiiwami tukungapa kangichi.

²¹—Maikan warmi, wawita iukangapa puncha chaiakuuraka, sinchi llakiiwami ka. Nispaka, wawita tiagsamuuraka, chi llakii iukaskata ñi ima mana iuiari. Sug wawita kai alpama chaiachigsamuskamandami alli iuiachiri. ²²Chasallata kamkuna, kunaaura sutipami iapa llakiiwa kangichi. Nuka kamkunata ikuti kawarigsamuuraka, iapa alli iuiachiiwami tukungapa kangichi. Chi alli iuiachiitaka, ñi pipas kamkunapa sungumanda mana kichungapa pudingapa kankunachu.

²³—Chi puncha, ñi imamandapas mana tapuchiwangapa kangichichu. Kasami nuka niikichita: nukamanda iuiarispá, tukui ima nukapa Taitata kamkuna mañagpika, paika tukuimi karamungapa ka. ²⁴Kunankama kamkuna, nukamanda iuiarispá, manara imapas mañaska kangichichu. Chasa mañaiichi, chaskingapa. Chiwanka, kamkunapa iapa alli iuiachiiwami tukungapa kangichi.

Jesusta katiraiagkuna mas nispa allilla iachangapa, pai niskamanda

²⁵Kasapasmi Jesús nirkakunata:

–Iuiiai apingasina parlukunallowami rimarkaikichita. Ñami chaiamuwangapa ka, mana parlukunallowa chasa rimangapa. Chiurami tukui allilla nukapa Taitamanda willasakichita. ²⁶ Chi punchami, nukamanda iuiarispa, nukapa Taitata mañangapa kangichi. Mana niikichitachu: nukami kamkunamanda nukapa Taitata mañapusakichita. ²⁷ Nukapa Taita kikinmi allilla kamkunata kuiá, kamkuna nukata kuiawaspa, nuka Taita Diuspagmanda llugsispa samuska kagta suma iuiawagmanda. ²⁸ Sutipami niikichita: nukapa Taitapagmanda llugsispami kai alpama samurkani. Kunauraka, ikuti kai alpata sakispa, nukapa Taitapagmami ringapa kani.

²⁹ Chiura, Jesusta katiraiagkuna nirkakuna:

–Kunaurami nukanchita allilla willakungi, mana iuiiai apingasina parlukunallowa. ³⁰ Kunaurami iachanchi, kam tukui iachagta. Chimandami mana ministingi, ñi pipas kamta tapuchingapa. Chasamandami suma iuianchi, kam Taita Diuspagmanda llugsispa samuska kagta.

³¹ Chiura, Jesuska nirka:

–¿Sutipachu kunaura suma iuiawangichi? ³² Chaiamungapa puncha ñami chaiamurka; kamkunaka, kam kikinkunapagmami mitikungapa kangichi. Chasaka, nukata sapallami sakiwangapa kangichi. Chasa kagpipas, nukaka mana sapalla kanichu. Nukapa Taitami nukawa ka. ³³ Chasami rimaikichita, kamkuna kai alpapi iapa llakiiwa kaspapas, nukawa suma iuiarispa, mana llakiiwa kagsina kangapa. Chasa iapa llakiiwa kaspapas, mana manchanakungichi. Nukaka, iaia kuku kai alpapi mandagta ñami mitikuchirkani.

17

Paita katiraiagkunamanda Taita Diusta, Jesús mañaskamanda

¹ Chasa nispaka Jesús, awasinama kawaspa, kasami nirka:

–Taitiku, nukapa puncha ñami chaiamurka. Nuka kamba wambra kagta suma atuniachiwai; chasaka, nukapas kamta atuniachingapa. ² Kam, tukuikunatami nukapa makipi churarkangi, tukui kam agllapuskakunata mana puchukariduru suma kaugsaita nuka karangapa. ³ Kam sutipa suglla Taita Dios kagta i nuka Jesucristo kam kachamuwaska kagta rigsikgunami chi mana puchukariduru kaugsaita iukankuna.

⁴ –Nukaka, kam tukui imasa niwaskasina rurai puchukaspami kai alpapi suma atuniachirkaiki. ⁵ Kunaura, Taitiku, imasami, ñi imapas manara tiagpita, nuka kamwa suma atuniachiska karkani: chasallata kunaura, nukata kamllawanta suma atuniachiwai.

⁶ –Kammi, kai runakunata kai alpapi kaugsagpuramanda agllaspa, nukapa makipi churarkangi. Paikunata, kam imasa kaskasinami nuka willarkani. Paikuna, kambami karkakuna. Kammi nukapa makipi churarkangi. Kamba rimaita allilla uiaspa, mana kungarisपालami kankuna. ⁷ Chiwa, kunaura iachankunami, tukui ima nuka iukaskaka kam karawaskata, nuka chaskiska kagta. ⁸ Kam ima niwaskata paikunata willarkanimi. Paikuna, nuka ima willaskata suma iuiaspa, sutipami iachankuna, nuka kambagmanda llugsispa samuska kagta. Kam nukata kachamuwaska kagtapasmi sumaglla iuianakú.

⁹ –Paikunamandami nuka mañakuiki. Mana mañakuikichu kai alpapi tiaskakunallowa iuiagkunamanda. Kam nukapa makipi churaskakunamandami mañakuiki, paikuna kam kikinpa kagmanda. ¹⁰ Tukui nukapakuna, kambami ka. Chasallata tukui kambakuna, nukapami ka. Paikunapimi nuka suma atuniachiska tukuni.

¹¹ –Nuka, ña mana kai alpapi kangapa kanichu. Paikunakar, charami kai alpapi kangapa kankuna. Nuka rikunimi, kamwa kangapa. Tukuipi mas alli Taitiku, kam nukapa makipi churaska runakunata kamba iapa iachaiwa charipuaikunata; chasaka, imasami nukanchi, suglla kanchi: chasallata paikunapas, suglla iuiaiwa kangapakuna. ¹² Nuka, paikunawa kankama, kam nukapa makipi churaskakunata kamba iapa iachaiwa allillami kawaspa charirkanikunata. Paikuna, ñi sug mana chingarkachu. Chi chingaringapa niraiaska runallami chingarka, imasa ñugpamanda librupi willaraiaskasina tukugsamungapa.

¹³ –Kunauraka nuka, kambagmami rikuni. Kai alpapi chasami rimakuiki, paikunapas, suma kuntintarispa, nukapa alli iuiachiiwa tukungapakuna. ¹⁴ Paikunata, kam imasa niwaskasinami willarkani. Imasami nuka, mana kai alpamanda kani: chasallatami paikunapas, mana kai alpapi tiaskakunallowa iuiagkunasina kankuna. Chimandami kai alpapi tiaskakunallowa iuiagkuna, paikunata mana munankuna. ¹⁵ Mana mañakuikichu: kam, kai alpamanda paikunata llugsichipuui. Tukui mana allilla ruraikunamanda kispichipuangi, paikunamanda mañakuiki. ¹⁶ Imasami nuka, mana kai alpamanda kanchu: chasallatami paikunapas, mana kai alpapi tiaskakunallowa iuiagkunasina kankuna. ¹⁷ Tukuipi sutipa kaskata paikunata sumaglla iuiachipuui, paikuna kamballa kangapa. Kamba rimai, tukuipi sutipami ka. ¹⁸ Imasami kam, nukata kai alpama kachamuwarkangi:

chasallatami nukapas, paikunata kachakuni, kai alpapi willaspa puringapa. ¹⁹ Paikuna allilla kangapami nuka ikuti niiki: “Kamballami kani”; chasaka paikunapas, kamba mana llullaspalla sutipa rimaiwa kamballa kangapakuna.

²⁰ —Kaipi kagkunamandalla mana mañakuikichu. Paikuna nukamanda willaskakunawa tukui suma iuiawanakugmandapasmi mañakuiki; ²¹ chasaka tukuikuna, suglla niraiangapa. Imasami kam Taitiku nukawa suglla kangi i nuka kamwa suglla kani: chasallata paikunapas, nukanchiwa suglla niraiangapami mañakuiki. Chasaka, kai alpapi tiaskakunallawa iuiagkunapas iachangakunami, nukaka kam kachamuwaska kagta.

²² —Kam imasami nukata suma atuniachiwarkangi: chasallatami nukapas, paikunata atuniachirkani; chasaka, imasami nukanchi, suglla kanchi; chasallata paikunapas, suglla niraiangapa. ²³ Nuka paikunawa sugllapimi kani; kampas nukawa sugllami kangi; chasaka paikunapas, tukuipi suglla niraiangapa. Chasaka, kai alpapi tiaskakunallawa iuiagkunapas iachangakunami, kam nukata kaima kachamuwaska kagta. Kasapasmi iachangkuna: kam imasami nukata kuiawangi: chasallatami paikunapas kuiangi.

²⁴ —Taitiku, kam nukapa makipi churawaskakunamanda, kasami munani: nuka suma luarpi kaura, paikunapas chipi nukawa kagrichukuna; chipika, nuka suma atuniachiska kaskata kawawangapa. Kai alpa manara tiagpita kam, nukata kuiawaspami suma atuniachiwarkangi.

²⁵ —Tukuipi allilla rurag Taitiku, kai alpapi tiaskakunallawa iuiagkuna mana kamta rigsgpipas, nukami allilla rigsiiki. Kaipi kagkunaka iachankunami, kam nukata kachamuwaska kagta. ²⁶ Paikunata, kam imasa kaskasinami nuka willarkani. Masmu paikunata willangapa kani; chiwasna, imasami kam kuiawangi: chasallata, pai kikinpurapas kuianakuspa kausangapa; chasaka, nuka paikunawa suglla tukuska kangapa.

18

Jesusta apiskakunamanda

¹ Chasa nispaka Jesús, paita katiraiagkunawa llugsispa, Kedrón suti iaku sug ladu chimba rispa, sug wirta tiaskama iaikugrirkakuna. ² Chi wirtata Judas, Jesusta apichingapa kag, allillami rigsirka. Chipimi karka Jesuswa tukui katiraiagkunawa tandaridiru. ³ Chimanda Judaska, suldadukunata, i iaia sasirdutikuna i fariseokuna kachaska alwasilkunata pusaspa, chi wirtama chaiagrirkakuna, lintirna, nina sindi i wañuchinakudiru charispa.

⁴ Jesuska, tukui imasa pasangapa kagta iachaspa, chaianakuskata kaillaiaspa, tapurka:

—¿Pitatak maskanakungichi?

⁵ Chiura ainirkakuna:

—Nazaret puiblumanda Jesusta.

—Nukami kani— Jesús nirka.

Judas paita apichigpasmi chi alwasilkunawa karka. ⁶ Jesús “Nukami kani” niura, chipi kagkunaka, katima kutirrispa, alpama urmarkakuna.

⁷ Ikutimi Jesuska tapurkakunata:

—¿Pitatak maskanakungichi?

Chiura ainirkakuna:

—Nazaretmanda Jesusta.

⁸ Chasa ainiura, Jesuska nirka:

—Ñami nirkaikichita: “Nukami kani”. Nukata maskawanakugpika, kai nukapa runakunata ianga kawaichi richukuna—. ⁹ Chasaka nirkami, ñugpamanda librupi imasa willaraiaskasina tukugsamungapa. Chipika, kasami niraiá: “Kam nukata mingawaskakunaka, ñi sug mana chingachirkanchi”.

¹⁰ Chiura Simón Pedroka, ispada charikuskata surkuspa, Malko suti iaia sasirdutipa lutrinta piaska, alli ladu rinrita ialigta kuchurka. ¹¹ Jesuska, Pedrotta nirka:

—Kamba ispadata churachidirullapita wakachii. Nukata chaiawakumi, nukapa Taita imasa niwaskasina iapa llakii iukangapa.*

¹² Chiuraka suldadukunata mandag i judiukunapa alwasilkuna, tukuikuna, Jesusta apispa, watarkakuna. ¹³ Nispaka, Anaspagma ñugpa chaiachigrirkakuna. Anaska, Kaifaspa suigrumi karka. Kaifaska, chi wata iaia sasirdutimi karka. ¹⁴ Chi Kaifasmi, judiukunata iuiachispa, kasa niska karka: “Kai alpapi tukui kausanakuskamanda chaiakumi, suglla runa wañungapa”.

Jesusta mana rigsinichu, Pedro musuglla niskamanda

¹⁵ Jesusta chaiachinakugriura, Simón Pedro i sug katiraiagpura katichinurka. Iaia sasirdutipa wasi kancha ladulla Jesusta iaikuchigrirura, chi sug katiraiagpas iaikurka,

* **18:11** “Winja kupata upiangapa”, iapa llakii iukangapami niraiá.

iaia sasirdutipa rigsidu kaspá. ¹⁶ Pedro, kancha pungullapi saiakurka. Ikuti iaia sasirdutipa rigsiduka, ukupi kaspá, llugsispa, pungu kawag warmita rimaspa, Pedrota iaikuchirka. ¹⁷ Chiura chi warmika, Pedrota tapurka:

—¿Manachu kampas, Jesusta katiraiagpura kangí?

—Mana kanichu— ainirka.

¹⁸ Iapa chiri kagmanda, iaia sasirdutipa lutrinkuna i alwasilkuna, kilimsa nina sindichispa, kununakurka. Pedropas, paikunawa kunukurka.

Iaia sasirduti kaskapi, Jesús kaskamanda

¹⁹ Iaia sasirdutika, Jesusta katiraiagkunamanda i pai ima iachachikuskamanda paita tapuchirka. ²⁰ Chiura, Jesuska ainirka:

—Tukui kawanakuurami nuka rimakurkani. Imaurapas tandariduru wasikunapi i Diuspa atun wasi ukupi, maipi tukui judiukuna tandariduru kaskakunapimi iachachikurkani. Pakallaka, ñi imapas mana rimakurkanichu. ²¹ ¿Imapatak nukata chasa tapuchiwakungí? Uiwagkunata tapuchii, nuka ima paikunata rimagta. Paikuna iachankunami nuka ima rimaskata.

²² Jesús chasa niura, sug alwasil paipa ladu saiakug, paita puñitiwa piaspa, nirka:

—¿Chasachu atun taitata ainiduru?

²³ Chiura, Jesuska ainirka:

—Imapi nuka mana allilla rimaska kagpika, chita willawai. Nuka allilla rimakugpika, ¿imapatak piawakungí?

²⁴ Nigpi Anaska, Jesusta wataskalla kacharka, Kaifás suti iaia sasirdutipagma.

Jesusta mana rigsínichu, Pedro parisma niskamanda

²⁵ Chikama Simón Pedro, nina kunuspa saiakurka. Paita kawaspaka, tapurkakuna:

—Kampas, ¿manachu Jesusta katiraiagpura kangí?

Paika ainirka:

—Mana kanichu.

²⁶ Chiura iaia sasirdutipa sug lutrin, Pedro rinrita kuchuska runapapuraka, tapurka:

—Jesús kadiru wirtapi, ¿manachu nuka kamta kawarkaiki?

²⁷ Ikuti Pedro ainirka:

—Chipika, nukaka manima karkanichu.

Chasa nigllapi, gallu kantarka.

Mandag Pilatos kaskapi, Jesús kagriskamanda

²⁸ Kaifaspagmanda Jesusta aparkakuna Romamanda mandagpa suma tiaridiruma. Iapa tutatami karka. Judiukuna, chi ukuma mana iaikurkakuna; chasaka, paskua puncha mikudiruta mikui pudingapa. Mana judíu runakunapa wasima iaikuspaka, mapakunasinami paikunamandaka niraiarka. ²⁹ Chimanda mandag Pilatoska, kanchama llugsispa, tapurkakunata:

—Kai runa, ¿ima mana allilla ruraskamandatak willawangapa samunakungichi?

³⁰ Chiura ainirkakuna:

—Kai allilla rurag kagpika, manachar kambagma apamuntranchi.

³¹ Pilatoska nirka:

—Chasa kagpika, kamkuna iachaichi. Imasa kamkunapa ñugpamanda librupi niraiaskasina paita ruragriichi.

Chasa niura, judiukuna nirkakuna:

—Nukanchita mana lisinsiaraiianchu, ñi pitapas wañuchingapa—. ³² Chasa nirkakuna, Jesús kikin imasa pai wañungapa kagta, ñugpa willaskasina tukugsamungapa.

³³ Pilatoska, pai suma tiaridiruma ikuti iaikuspaka, Jesusta kaiaspa, tapuchirka:

—Kam, ¿judiukunapa atun mandagchu kangí?

³⁴ Chiura, Jesuska ainirka:

—¿Kamba iuiailawachu chasa ningi? Mana kagpika, ¿sugkunachu kamta chasa nukamanda nirkakuna?

³⁵ —Nuka, mana judíu kanichu— Pilatos ainirka—. Kamba alpamanda runakuna i iaia sasirdutikunami kamta kaima apamurkakuna. ¿Imatak ruraspá purikurkangí?

³⁶ Chiura, Jesuska ainirka:

—Nukapa mandai, kai alpamanda mana kanchu. Kai alpamanda nukapa mandai kagpika, nukapa runakunachar michawantrakuna, judiukuna mana apiwangapa. Kai alpamanda, nukapa mandai mana kanchu.

³⁷ Chiura, Pilatos tapurka:

—Chasa kagpika, ¿atun mandagchu kangí?

—Kam allillami ningi— Jesuska ainirka—, “Nuka, atun mandagmi kani”. Chasapami nuka kai alpama samurkani, ñi imapi mana llullaspalla sutipa kaskata willangapa. Maikan sutipa kaskata uiangapa munagkuna, nuka ima rimaskata uiawankunami.

³⁸ Chasa uiaspa, Pilatoska nirka:

—Kam chi sutipa kaskata willakuska, ¿imatak niraiá?

Jesusta wañuchigriichi, Pilatos niskamanda

Chasa nispaka Pilatos, kanchama ikuti llugsispa, judiukunata nirka:

—Chi runata mana tarinichu, ñi imapas pandariska kagta. ³⁹ Kamkuna imasa kustumbri kaskasina, sug runata kacharingapami chaiawá, paskua puncha chaiakugmanda. Nig-pika, ¿munankangichichu, judiukunapa atun mandagta nuka kacharingapa?

⁴⁰ Judiukunaka, ikuti kapariksa, nirkakuna:

—Paitaka, mana. Barrabasta kacharii—. Barrabás, iapa sisaimi karka.

19

¹ Chiura Pilatoska, Jesusta mana llakispalla iapa asutichirka. ² Chiuramanda suldadukunaka, ispinakunalla llaugtu simbaspa, paita umapi churachirkakuna. Sutipa mandagsina kawaringapa, pichi katangapas katachirkakuna. ³ Nispaka, paita kamispa, kaillaiaspa, nii kallarrirkakuna:

—Puangi, kam judiukunapa atun mandag. ¿Allillachu kapuangi?—. Chasa nispaka, paita puñitiwa piaska richirkakuna.

⁴ Chiuramanda Pilatoska, ikuti kanchama llugsispa, judiukunata nirka:

—Kawamuichi. Kai kanchamami pusamukuni, kamkuna kawangapa: paita mana tarinichu, ñi ima pandariska kagta.

⁵ Chiura Jesús, ispinakunalla llaugtu churachii tukuska, pichi katanga katarispa, kanchama llugsirka. Chiura, Pilatoska nirkakunata:

—Kawamuichi kai runata.

⁶ Jesusta kawaspa, iaia sasirdutikuna i alwasilkunaka kaparirkakuna:

—Kruspi churai. Kruspi churaspa wañuchii.

Chasa uiaspa, Pilatoska nirka:

—Kamkuna paita apaichi, kruspi churangapa. Nukaka mana tarinichu, pai ñi ima pandariska kagta.

⁷ Chiura, judiukunaka ainirkakuna:

—Nukanchipa mandaraikaskapi niraiami, maikanpas Taita Diospa wambra tukuska nigta wañuchingapa.

⁸ Chasa rimaskata uiaspaka, Pilatos masmi mancharirka. ⁹ Chi wasi ukuma ikuti iaikus-paka, Jesusta tapurka:

—Kam, ¿mairandatak kangí?

Jesuska, mana imapas ainirka.

¹⁰ Ikuti Pilatos tapurka:

—¿Imapatak nukata mana ainiwangi? ¿Manachu iachangi, nuka kamta kacharingapa u kruspi churachingapa pudigta?

¹¹ Chiura, Jesuska ainirka:

—Awa luarnigmanda kamta mana kuagpika, manachar pudintrangi ñi imapas nukata rurawangapa. Chimanda kambagma apamuwagkuna, kammanda mas atun pandarii-kunami iukankuna.

¹² Chiuramanda, Pilatos maskakurka, imasapipas Jesusta kispichingapa. Judiukunaka, mas sinchi mas sinchi kaparirkakuna:

—Chi runata kacharigpika, kamka Romapi iaia mandagwa manachar kankangi ñi paipa rigsidsinallapas. Maikanpas atun mandag tukungapa munag, Romapi iaia mandagta llugsichingapami muná.

¹³ Chasa uiaspa Pilatoska, Jesusta llugsichispa, atun mandag justisiai ruradirupi tiarig-rirka. Chi tiaridiru suti karkami “Rumiwa alpa pambaiachiska”. Hebreo rimaiwaka suti karkami “Gabata”. ¹⁴ Paskua atun punchapa allichidiru puncha, chara tutatami karka.* Tiarigrispaka, Jesusta kawachispa, judiukunata nirka:

—Kawamuichi kamkunapa atun mandagta.

¹⁵ Paikunaka kaparirkakuna:

—Anchuchii. Anchuchii. Kruspi churaspa wañuchii.

Chiura, Pilatos tapurka:

—¿Kamkunapa atun mandagtachu kruspi klabachisa?

Chiura, iaia sasirdutikunaka ainirkakuna:

* **19:14** Griego rimaiwa: sugtama urami karka.

—Romamanda iaia mandagllami nukanchika iukanchi. Ñi sug mas mandag mana iukan-chichu.

¹⁶ Chiura Pilatoska, Jesusta kruspi klabangapa kacharka. Chimanda, Jesusta llugsichispa aparkakuna.

Jesusta kruspi klabagriskakunamanda

¹⁷ Jesuska, krusta markaspa, Uma Tullu suti pambama rii kallarirka. (Chi pamba, hebreo rimaiwa suti karkami Gólgota.) ¹⁸ Chipi chaiagriuraka, paita kruspi klabarkakuna. Sug iskaikunatapas paiwa sugllapi kruspi atarichirkakuna, sug sug kada ladu, Jesuska chaugpipi.

¹⁹ Pilatos kasa iskribiska churangapa kacharka: “Nazaretmnda Jesús, judiukunapa atun mandag”. Chasa willaraiaskataka krus uma awa ladu churarkakuna. ²⁰ Jesusta kruspi churaskamanda, Jerusalén puibluma mana karullami karka. Chi willaraiaska, hebreo, latín i griego rimaipimi iskribiraiarka. Chitaka, achka judiukuna kawarkakuna. ²¹ Chimanda iaia sasirdutikunaka, Pilatosta nigrirkakuna:

—Mana chasa churakui: “Judiukunapa atun mandag”. Chasapaka, kasa niraiachu: “Pai kikinmi nirirka: ‘Judiukunapa atun mandagmi kani’.”

²² Pilatoska ainirka:

—Nuka churaska kaska, churaskami ka.

²³ Suldadukunaka, Jesusta kruspi churaspa, paipa katangakunata chuskuma churarkakuna; chasaka, suldadupura sug sug apangapa. Jesús churaraiaska kusmasinaka, awamandata urakama tukui awaskallami karka, ñi imapi mana siraska. ²⁴ Chimanda suldadukunaka, paipura rimarirkakuna:

—Kaitaka mana llikichisunchi. Suirtipi pugllasunchi. Chasaka kawasunchimi: pitami chaiá—. Ñugpamanda librupi, kasami willaraiarka: “Nukapa katangakunata paipurami rasiunarirkakuna. Nuka churaraiaska kusmasinataka suirtipimi pugllarkakuna”. Chasami suldadukuna rurarkakuna.

²⁵ Jesusta klabaspa atarichiskapi, paipa mama ñañandimi sugllapi saianakurka. María suti Kleofaspa warmi i María Magdalenapas, chillapita paikunawa karka. ²⁶ Paipa mama i paipa sug iapa kuiaska katiraiag sugllapi saianakugta, Jesús kawarka. Chasa kawasapaka, mamandita nirka:

—Kamba wambrata kawai.

²⁷ Chasallata, chi katiraiagtaka nirka: —Kamba mamata kawai.

Chiuramandaka, paipa wasima Jesuspa mamata pusarka, chipi kaugsangapa.

Jesús wañuskamanda

²⁸ Jesuska ña iacharka, tukui imasa kikinmnda willaraiaskasina puchukarikugta. Chi-mandami, ñugpamanda librupi imasa willaraiaskasina tukugsamungapa, nirka:

—Iakunaiawakumi.

²⁹ Chipi tiarka winja binu sug uchulla mangapi jundachiska. Chi binutaka sug ispunja-wa aisaspa, hisopo suti birbina sachasina chaglla puntapi churaspa, Jesuspa simima atarichirka, chupachingapa.

³⁰ Chi binuta chupaspaka, Jesuska nirka:

—Tukuimi imasa willaraiaskasina tukugsamurka—. Chasa nispaka, uma kumurispa, paipa ispirituta Taita Diusta mingasa, wañurka.

Jesuspa kustillapi, lansawa tugsiskamanda

³¹ Warda punchapa tukui suma allichidiru puncha karka. Kaiandika warda puncha kag-manda, judiukuna mana munarkakuna, kuirpukunata kruspi sakingapa. Chi kaiandi iapa atun warda puncha kagmanda, paikunaka Pilatosta mañagrirkakuna:

—Kruspi churaskakunata chakikunata pakichispa, chimanda anchuchii.

³² Pilatoska: —Chasa ruraichi— nirka. Chiura suldadukunaka, rispa, Jesuswa sugllapi klabaraiaskakunapagma chaiagrispaka, sugpa chakikunata pakichirkakuna. Sugtapas chasallata rurarkakuna. ³³ Ikuti Jesuspagma kaillaiaspaka, ña wañuska kagta kawarkakuna. Chiwa, chakikunata pakichingataka, ³⁴ sug suldadu, lansawa kustillapi tugsirka. Tugsigllapi, iawar i iakumi llugsirka.

³⁵ Sutipa chasa kawagmi willaku; chasaka kamkunapas, sutipa kagta iachangapa. Nuka kikinmi iachani, sutipa willakugta. ³⁶⁻³⁷ Ñugpamanda librupi, kasami willaraiá: “Ñi sug tullu, mana pakichiska kangapa kanchu”. Kasapas. “Pai kikinunami ialigta tugsiskata kawangapa kankuna”. Imasa willaraiaskasinami tukugsamurka.

Jesús pambai tukuskamanda

³⁸ Chiuramanda Arimatea puiblumanda José suti runaka, Pilatosta mañagrirka, Jesuspa kuirputa apangapa. Chi José, judiukunata manchaspaka, pakalla Jesuswa rimanakudirumi

karka. Chasa mañagriuraka, Pilatos paita apangapa sakirka. Chiura Joseka, rispa, Jesusta krusmanda uraikuchigrirka.

³⁹ Nikodemo ñugpata Jesuspagma tuta ridurpas chaiagrirka. Mira i aloes suti suma asna chapuska, mai patsa librasina chaiachigrirka. ⁴⁰ Chi iskandi runakuna, Jesuspa kuirputa apaspaka, chi suma asnakunawa suma linsukunawa maiturkakuna, imasa judiukuna ruradur kaskasina.

⁴¹ Jesús kruspi klabaraiaskamanda mana karullapi tiarka sug wirta. Wirtapika tiarka rumi piñapi atun utkuchiska, wañuskata pambangapa. Chi ukupi ñi pita manara pambaska karka. ⁴² Chi utkuchiska manancha karullapi kagmanda, chipi Jesuspa kuirputa churagrirkakuna. Chi chisi judiukunapa warda puncha ña kallaringapa kagmanda, utkalla chasa rurarkakuna.

20

Jesús kaugsariskamanda

¹ Simana kallarii puncha u dmingu amsamsa chara tuta kagpita, María Magdalenaka Jesús pambaraiaskama rirka. Chaiagripaka, chi atun utkuchiska pungupi kilparaiaska rumita tim anchuchiska kaskata kawagrirka. ² Chasa kawaspaka, kalpalla rirka Simón Pedro i Jesuspa sug iapa kuiaska katiraiagpagma. Chaiagripaka, paikunata nirka:

—Iaia Jesuspa kuirputa pambaraiaskamanda apaskami ka. Mana iachanchichu maipi paita churagtakuna.

³ Chiura Pedro i chi sug katiraiagpura, llugsispa, Jesús pambaraiaskama kalparkakuna. ⁴ Iskandi, sinchi kalpanakurka. Sugka, Pedromanda mas ñugpa kalpaspa, chaiagrirka. ⁵ Nispaka, kumurispa, ukusinama kawarka. Chi ukupika, suma linsu maituraiaskakuna tiarka. Chasa kawaspapas, mana iaikurka.

⁶ Simón Pedrocka, kati chaiagrispa, ukuma iaikugrirkalla. Paipas, chi suma linsu maituraiaskakunata chipi churaska kaskata kawarka. ⁷ Sug linsu Jesuspa umata maituraiaskapas kawarka. Chi linsu, sugkunawa mana sugllapi tiarka. Sugpimi patariska tiarka.

⁸ Chiura chi sug katiraiag Pedromanda ñugpa chaiagrigrpas, ukuma iaikurka. Chi linsukunata kawaspaka, iuiarirka: “Sutipami kaska”. ⁹ Paikuna manara iuiarirkakuna, ñugpamanda librupi imasa willaraiaskata: “Chaiakumi, Cristo wañuspapas, ikuti kaugsaringapa”. ¹⁰ Chasa kawaspaka, chi iskandi katiraiagkuna kikinpa wasima kutirkakuna.

María Magdalenata, Jesús kawariskamanda

¹¹ Mariaka, Jesús pambaraiaskapi kancha ladulla wakaspa saiakurka. Wakakuspa, kumurispa, ¹² ukusinama kawarka. Chipika, iskai anjil iura churariskakuna karkakuna. Paikuna, Jesuspa kuirputa churaska kaskapi tianakurka, sugka uma ladu, sugka chaki ladu. ¹³ Paikunaka, Mariata tapurkakuna:

—Kam warmisita, ¿imapatok wakakungi?

Chiura, María ainirka:

—Nukapa iaiaatami apapuarkakuna. Nuka mana iachanchichu maipi churapuagrigtakuna.

¹⁴ Chasa ainispaka, katima tigrarka. Chiura, Jesús saiakuskata kawarka. Chasa kawaspapas, mana iacharka Jesús kagta. ¹⁵ Chiura, Jesuska tapurka:

—Kam warmisita, ¿imapatok wakakungi? ¿Pitatak maskakungi?

Mariaka, “Wirta kawagchar ka” iuiaspa, ainirka:

—Turi, kam paita apaska kagpika, willawai: ¿maipitok churagrirkangi?, nuka apagringapa.

¹⁶ Chiura, Jesuska nirka:

—María.

Chasa uiangallawa, tigrarispa, hebreo rimaiwa nirka:

—Rabuni—. (Rabuni niraianmi “Nukapa iachachig”).

¹⁷ Chiura, Jesuska nirka: Mana llamkawai. Manara nukapa Taitapagma sikanichu. Nukapa waugkikunata willagrii: “Nukapa i kamkunapa Taitapagmami sikangapa kani. Nukapa i kamkunapa Taita Diusmi ka”.

¹⁸ Chasa uiaspa, María Magdalenaka Jesusta katiraiagkunata kalpalla willangapa rirka: —Iaia Jestustami kawarkani—. Nispaka, imasa Jesús niskasina willarkakunata.

Jesús, paita katiraiagkunata kawariskamanda

¹⁹ Chi dmingullatata chisima, Jesusta katiraiagkuna, judiukunata dimanchai pungukunata suma wichkarispa, chi ukuma karkakuna. Maikan punguta mana iaikuspalla, Jesuska, paikunapa chaugpipi saiarigsamuspa, nirkakunata:

—¿Allillachu kapuangichi?—. ²⁰ Chasa nispaka, makikunata i kustillata kawachirkakunata. Iaia Jestusta kawaspaka, paikuna iapa kuntintarirkakuna.

²¹ Ikuti —¿Allillachu kapuangichi?— nispaka, Jesuska nirkakunata— Nukapa Taita imasami nukata kachamuwarka: chasallatami nukapas, kamkunata kachaikichita.

²² Chasa nispaka, paikunata samai churaspa, nirka:

—Santu Ispirituta chaskiichi. ²³ Maikan pandariskakunata kamkuna pasinsiaska nikipa, pasinsiaskami tukungapa kankuna. Ikuti maikan pandariskakunata kamkuna mana pasinsiasakaka, chasallatami mana pasinsiai tukungapa kankuna.

Jesús kaugsariskata, Tomás kawaskamanda

²⁴ Jesús ñugpa kawariura, Tomás, Dídimo suti, chunga iskai Jesús agllaskakunapura, mana sugllapi karka. Paitaka, sug katiraiagkuna nirkakuna:

—Iaia Jesustami kawarkanchi.

²⁵ Chiura, paika nirka:

—Klabuskuna makikunapi utkuchiskakunata nuka mana kawasa; chipi nukapa didu mana churaspa; kustilla utkuchiskapipas nukapa maki mana ñitisa; chasa mana kawaspa, mana iuiangapa kanichu chasa kagta.

²⁶ Pusag puncha ialiuira, Jesusta katiraiagkuna chasallata wasipi tandariska karkakuna. Chiuraka Tomaspa, sugllapi karka. Pungukuna suma wichkarispa kagpipas, Jesuska, paikunapa chaugpipi saiarigsamuspa, nirkakunata:

—¿Allillachu kapuangichi?— ²⁷ Chasa nispaka, Tomasta kaiaspa, nirka— Kamba diduta kaipi churai. Nukapa makikunata kawai. Kamba makita suniamuspa, nukapa kustillapi ñitii. Mana iuiawag kangataka, suma iuiawag kai.

²⁸ Chiura, Tomás ainirka:

—Nukapa Iaia i nukapa Diosmi kangi.

²⁹ Chiura, Jesuska nirka:

—Kam, nukata kawawaspami suma iuiawarkangi. Mana kawawaspalla nukamanda suma iuiawagkunaka, Taita Diospa iapa kuiaskami kangapa kankuna.

Kai libru, imapa iskribiraiaskamanda

³⁰ Jesusta katiraiagkunapa ñawipi, achka mana imaurapas kawaskasina pai ruraskaka, kai librupi mana tukui willaraianchu. ³¹ Kaipi willaraiaskaka kanmi, Jesús, Taita Dios agllaska Cristo i paipa wambra kagta, kamkuna iachaspa iuiaringapa; chasa iuiarispaka, paiwa mana wañudiru kaugsaita iukangapakuna.

21

Kanchis Jesusta katiraiagkunata, pai kawariskamanda

¹ Chiuramanda, Tiberias suti kucha patallapi, Jesuska paita katiraiagkunata kasami ikuti kawarirka. ² Simón Pedro, Tomás Dídimo, Galilea alpa i Kaná puiblumanda Natanael, Zebedeopa wambrakuna i sug iskai katiraiagkunapas, sugllapi karkakuna. ³ Chiura, Simón Pedroka nirka:

—Nukaka chalwagrisa.

—Nukanchipas munanchimi kamwa ringapa— nirkakuna. Chasa nispaka, tukuikuna, kanuapi iaikuspa, rirkakuna. Chi tutaka, ñi sug chalwa manima apirkakuna.

⁴ Ña pakarikuuraka, Jesús kucha patapi kawarigrirkakunata. Paita kawaspapas, katiraiagkuna mana iacharkakuna Jesús kagta. ⁵ Chiuraka, paika tapurkakunata:

—Musukuna, ¿ñachu chalwa apingichi?

Chiura ainirkakuna:

—Manima.

⁶ Chiura, paika nirka:

—Kanua alli ladu ataraiata sitaichi, apingapa.

Sitagllapi, iapa achka chalwa apirkakuna. Iapa llasa kagmanda, mana pudirkakuna, kanuama ataraiata sikachingapa. ⁷ Chiuraka chi Jesuspa iapa kuiaska katiraiag, Pedrota nirka:

—Iaia Jesusmi ka.

Iaia Jesús kagta uiaspa, Simón Pedroka, llatan kaspas, paipa katangata churarispa, iakuma saltarka, Jesuspagma ringapa. ⁸ Kanuamanda kucha patama chaiagringapaka, mana iapa karu karkachu. Kimsa chungas tupusinallami karka. Chimanda sugkuna, chalwa junda ataraiata iakupi aliupispa, kanuawanta patama chaiachigrirkakuna. ⁹ Kanuamanda alpama llugsiuraka, kilimsa nina sindi awalla sug chalwa kusarikugta i tanda tiaskapas kawarirka.

¹⁰ Chaiagriura, Jesuska nirkakunata:

—Kunaura apiska chalwakunata apagriichi.

¹¹ Chiura Simón Pedroka, kanuapi iaikugrispa, ataraiata alpama aliurka. Ataraiapika, patsa pichka chungá kimsa atun chalwakunami tiarka. Chituku achka chalwakuna junda tiagpipas, ataraia mana llikirirka. ¹² Chiuramanda, Jesuska nirkakunata:

—Samuichi mikungapa.

Iaia Jesús kagta iachaspaka, ñi maikan katiraiagkuna mana tapurkakuna: “Kam, ¿pitak kangi?”.

¹³ Kaillaiaspaka, Jesuska, tanda i chalwata aisaspa, katiraiagkunata kararka. ¹⁴ Jesús wañuspa kaugsariskauramanda, ña kimsamami paita katiraiagkunata kawarigirirka.

Jesús, Simón Pedrowa rimanakuskamanda

¹⁵ Ña mikuskauramandaka, Jesuska Simón Pedrota tapurka:

—Jonaspa wambra Simón, ¿kaikunamandapas maschu nukata kuiawangí?

Chiura, Pedro ainirka:

—Ari, taita waugki. Kam iachangimi, nuka imasa kamta kuiagta.

Chiura, Jesuska nirka:

—Nukapa kuiaska ubija wawakunasinata kawapuangi.

¹⁶ Nispaka, ikuti tapurka:

—Jonaspa wambra Simón, ¿nukata kuiawangichu?

Chiura, Pedro ainirka:

—Ari, taita waugki. Kam iachangimi, nuka imasa kamta kuiagta.

Chiura, Jesuska nirka:

—Nukapa ubijakunasinata kawag kapuangi.

¹⁷ Kimsama ikuti nirka:

—Jonaspa wambra Simón, ¿nukata kuiawangichu?

Chiura Pedroka, Jesús paita kimsama: “¿Nukata kuiawangichu?” tapukugmandaka, irkiarka. Llakiiwa nirka:

—Taita waugki, kam, tukui allillami iachangi. Sumagllami iachangi, nuka imasa kamta kuiagta.

Chiura, Jesuska nirka:

—Nukapa ubijakunasinata kawapuangi. ¹⁸ Kasami nuka niiki: kam chara musu kauraka, kam kikinmi, chumbillirispa, maima munaskama ridur karkangi. Ikuti kam rukuiaska kauraka, makitami chutachinkangi. Sugmi, kamta chumbilichispa, kam maima mana munakuskama apanga—. ¹⁹ Jesús, chasa nispaka, willakurkami Pedro imasa wañungapa kagta; chasa wañuspaka, Taita Diusta suma atuniachingapa. Chasa nispaka, kasapasmí nirka— Nukata katiwai.

Jesusa iapa kuiaska katiraiagmanda

²⁰ Katima tigraspaka, Pedro kawarka, Jesús iapa kuiaska kati kati katiraiagta. Pai runa karkami paskua atun puncha mikudiru mikunakuura, Jesusta kimirispa tapug, kasa nispá: “Taita waugki, ¿pitak kamta apichingapa ka?”. ²¹ Paita kawaspaka, Pedroka Jesusta tapurka:

—Taita waugki, paipas, ¿imatak pasanga?

²² Jesuska ainirka:

—Nuka ikuti samunkama kaugsakuchu nigpika, kamtaka, ¿imatak ministí? Kam, upalla nukata katiwai.

²³ Chasa niskata mana allilla uiaspa, Jesuswa tukuskakuna rimanakuskata iacharirka, kasa nigta: “Kai Jesusta katiraiag, ñi imaurapas mana wañungapa kanchu”. Chasaka, Jesús mana nirkachu. Kasami nirka: “Nuka ikuti samunkama kaugsakuchu nigpika, kamtaka, ¿imatak ministí?”.

²⁴ Pai Jesusta katiraiagmi imasa kawaskasina willaku. Kai libruta iskribigpas, paillata-tami ka. Iachanchimi, ñi imapipas mana llullaspalla sutipa kaskata pai willagta.

²⁵ Sug rigcha sug rigcha allikunaka, achkami Jesús rurarka. Chi tukui ima ruraskakunamanda sug suglla iskribiraiagpika, iuianimi: kai alpapi manachar pagtantra, chi iskribiraiaskakunata maipi wakachinga.

JESUS AGLLASKA RUNAKUNA IMA RURASKAKUNATA SAN LUCASMI WILLA

Santu Ispirituta, Jesús kachamungapa willaskamanda

¹ Nukapa kuiaska Teófilo:

Nuka ñugpata willaraiaskapi, Jesús tukui ima ruraska i iachachiska, kallariuramandata pai imaura suma luarma sikankama willarkaiki. ² Manara suma luarma sikaspalla, sug runakunata agllaspa kacharka, paimanda Alli Willaita willaspa puringapa. Nispaka, Santu Ispirituwami iachachirkakunata imasa rurangapa kagta.

³ Ña wañuskauramanda kaugsarispa, chusku chungu punchami ikuti ikuti kawarirakunata, pai sutipa kaugsariska kagta allilla iachangapakuna. Chi punchakuna, Taita Dios imasa suma mandakuskasina iachachikurka.

⁴ Chara pai agllaska runakunawanta kaspa, Jesuska nirkakunata:

—Ñami willarkaikichita: nukapa Taita, kikinpa Santu Ispirituta karangapami nirka. Paíta kachamunkama, Jerusalén puiblupi suiangichi. Mana maimapas rinakungichi. ⁵ Iakullawami Juan baugtisarka. Kamkunakar, mailla punchakuna ialliuramanda, Santu Ispirituwami baugtisasi tukungapa kangichi.

Suma luarma, Jesús sikaskamanda

⁶ Paikuna ikuti tandariska kaskapi, Jestusta tapurkakuna:

—Taita waugki, ¿kai punchakunachu kuankangi, nukanchi Israelmanda runakuna ikuti kai alpapi mandangapa?

⁷ Chiura, Jesuska ainirka:

—Kamkuna mana iachangapa kangichichu, ima ura, ima puncha nukapa Taita chasa rurangapa kagta. Paillami iachá, ima puncha chasa tukugsamungapa kagta. ⁸ Kamkunapa sungupi Santu Ispiritu iaikugsamuuraka, paipa iapa iachaitami chaskingapa kangichi. Chi iachaiwaka, kai Jerusalenpi, Judea i Samaria alpakanapi i tukui karu suiupasmi nukamanda willagrangapa kangichi.

⁹ Chasa nispaka, paikuna kawanakugllapi, Jesús suma luarma sikai kallarirka. Puii ukupi chingarirka. Mana mas paikunata kawarirka.

¹⁰ Jesús suma luarma sikakuskata kawanakuuraka, diupilla iskai runasina rigchakuna iura katanga churariskakuna paikuna saianakuskata kawarigsamurkakunata. Chi runakunaka nirkakuna:

¹¹ —Galileamanda runakuna, ¿imapatka awasinama kawanakungichilla? Pai Jesús ña suma luarma sikaska, ikutimi samungapa ka; imasami kamkuna sikai kawarkangichi: chasallata.

¹² Chasa uiaspaka, chi runakunaka chi Olivos suti lumamanda Jerusalenma kutirkakuna. (Chi lumamanda Jerusalenma manancha karumi ka; imasami warda puncha lisinsiaska ka puringapa: chilla karumi ka.) ¹³ Jerusalenma chaiagrispaka, kidaridiru wasima iaikuspa, chi awa ladu ukuma sikarkakuna. Chipi tandaridupura karkakunami Pedro, Juan, Santiago, Andrés, Felipe, Tomás, Bartolomé, Mateo, Alfeopa wambra suti Santiago, Simón suti kananeo runakunawa purigpura i Judas suti sug Santiagopa wambra.*

¹⁴ Tukui paikuna, suglla iuiawi Taita Diusta mañaspa karkakuna, mana kungarispa. Sug warmikunapasmi paikunawa sugllapi karkakuna. Jesuspa mama María i Jesuspa waugkindikunapasmi chipi karkakuna.

Matías suti runata, Jesusmanda willadur kangapa agllaskakunamanda

¹⁵ Chi punchakuna, mai patsa iskai chungu runakunami chi ukupi sugllapi karkakuna. Tukuikuna chasa kauraka, Pedroka, chaugpipi saiarispa, kasami nirka:

¹⁶⁻¹⁷ —Taitakuna i mamakuna, uiamuichi. Judasmandaka, atun taita David, Santu Ispirituwa ñugpamanda librupi willaraiaskaka, imasa niskasinami tukugsamurka. Chi Judaska, nukanchipurami karka. Nukanchisinallata, paipas agllaskami karka, Jesusmanda willadur kangapa. Chi Judasmi, Jestusta katuspa, apigkunata pusaspa kawachigrirka. ¹⁸ Chasa Jestusta katuspaka, alpasik randirka. Nispaka, chi alpapi urai singa urmaspa, tugiarkasi, chunchullukuna llugsigta. ¹⁹ Chasa iachariskauramandaka, Jerusalenpi tukui kaugsanakugmi chi alpata paikunapa rimaiwa sutichirkakuna Akéldama—. (Chi niraianmi “Iawar alpa”.)

²⁰ —Chi Judasmandaka, Salmo suti librupi kasami willaraiá: Paipa wasi sitai tukuchu,

* 1:13 u waugki.

ñi pipas mana chipi kaugsangapa.

Paipa trabaju sakiskataka, sug apichu.

²¹ Chasa willaraiaskamandaka, kunaura nukanchitami chaiaku, sug runa agllangapa. Iaia Jesús nukanchiwa kaura, sug kaipi kagkunapasmí nukanchiwa puridur karkakuna. ²² Iaia Jesusta Juan baugtisaskauramandata, pai suma luarma sikaurapasmí chi runakunapas nukanchiwa sugllapi karkakuna. Chi runapurataka, sugllata agllasunchi, paipas Jesús kaugsariskata nukanchiwa willadur kangapa.

²³ Pedro chasa niura, pai kikinpura iskai runakunata agllarkakuna. Sug runa suti karka José Barsabás. Paita nirkakuna: “Alli José”. Sugka, Matiasmi suti karka. ²⁴ Chi iskandikunata agllaspaka, Taita Diusta mañaspa, nirkakuna:

—Taitiku, kammi kangi tukuikunapa sunguta rigsíg. Chimanda, nukanchita kawachii: kai iskandikunamandaka, pitatak agllankangi, ²⁵ Jesusmánda willadur kangapa; paika, Judaspa kuinta tungungapa. Chi Judas, Jesusta katuspami, paimanda willadur kaskata sakispa, wañuspa, maima paita chaiakuskama rirka.

²⁶ Taita Diusta chasa mañaspaka, suirtipimi maskarkakuna. Chiuraka, Matiasmandami llugsírka. Chiuralla, paitaka chaiarka, chungá sug Jesús kikin agllaskakunawa sugllapi tungungapa.

2

Santu Ispíritu samuskamanda

¹ Pentecostés suti atun puncha chaiamuura, Jesuswa tukui tukuska runakuna, sugllapi tandariska karkakuna. ² Diulpilla, chi ukupi tianakuska suiu, suma luarmanda sinchi waira pukukugsinami uiarigsamurka. ³ Chiura, puka nina sindisinami kawarigsamurka. Nispaka, tukuikunapa uma awa ladu sug sug tiarigsamurka. ⁴ Santu Ispiritumi tukuikunapa sungupi iaikugsamurka. Chiura, Santu Ispíritu imasa iuiachiskasina mana iachaska rimai kunawapas rimai kallarirkakuna.

⁵ Chi punchakuna, tukui alpanigmanda Jerusalemá chaiaska karkakuna Taita Dioswa suma iuiaspa kaugsag judiukuna. ⁶ Chi sinchi uiariskata uiaspaka, iapa achkakuna, Jesuswa tukuskakuna kidariduru wasima tandarigrirkakuna. Chipika, tukui alpamanda paikunapa rimaita uiaspa, mana iacharkakuna, imamanda chasa tukugsamugta. ⁷ Iapa mancharispa ujnarispa, rimarinakurka, kasa nispa:

—Kai tukui rímanakug, ¿manachu Galilea alpamanda runakuna kankuna? ⁸ Nigpika, ¿imasamandata tukui nukanchi, sug rigcha sug rigcha uchulla kauramandata rimai-kunata allilla uianakunchi? ⁹ Kaipi kanchimi Partia suti puiblukunamanda runakuna; sugkunaka Mediamandakuna; ikuti sugkunaka Elam alpanigmanda, Mesopotamianigmanda, Judeanigmanda, Kapadosianigmanda, Pontonigmanda, Asia alpa sulíunigmanda, ¹⁰ Frijianigmanda, Panfilianigmanda i Ejiptonigmanda. Libia alpa i Sirene sug ladunigmandakunapasmí kanchi. Roma puiblunigmanda kaipi kaugsanakugpasmí kanchi. ¹¹ Chi tukuikunamandaka, sugkunaka sutipa judiumi kanchi. Sugkunaka, judiukuna imasa iachachiskata ruragkunami kanchi. Chasallata sugkunaka, Kreta i Arabia alpakananigmandami kanchi. Mainigmandakuna kaspapas, nukanchi kikinpa rimaiwa tukui ima Taita Dios iapa suma ruraskata willanakuskatami uianakunchi.

¹² Ñi imaurapas mana kawaskasina uiaskasina kagmánda, tukuikuna, iapa ujnarispa, parijuma tapurinakurka, kasa nispa:

—¿Imamandasik chasa pasariku?

¹³ Ikuti sugkunaka, un¿aspa ninakurka:

—Iapa machaskakunami rímanakú.

San Pedro imasa rimaskamanda

¹⁴ Chiura Pedroka, paipura chungá sug Jesús agllaskakunawa sugllapi saiarispa, sinchi rímag samurkakunata, kasa nispa:

—Uiamuichi, judiukuna i tukui kai Jerusalemé kagkuna. Rinri allilla churamuichi uiawangapa. Kasami rimangapa kaikichita. ¹⁵ ¿Imapatak uianakungichi, nukanchi machaska kagtakuna? Kaituku chara tutata, las nuibillami chara ka. ¹⁶ Joel suti Santu Ispirituwa rímag, kai punchakunamanda kasami ñugpamandata willaska karka:

¹⁷ Taita Dios níkumi:

“Tukurii punchakuna ña chaiakuura,

tukuinigmanda runakunapa sunguma nukapa Ispiritutami karangapa kani.

Chiuraka kamkunapa kari i warmi wambrakuna,

Santu Ispíritu iuiachiskatami willangapa kankuna.

Kamkunapa musukuna,

muskui ukupisina ima pasaringapa kaskata kawangapami kankuna.

Rukukunapas, muskui ukupisina chasallatami kawangapa kankuna.

¹⁸ Chi punchakuna,

kari i warmi nukamanda allilla ruragkunatami
paikunapa sunguma nukapa Ispirituta karangapa kani.

Chiura paikunaka,

Santu Ispiritu iuiachiskatami willangapa kankuna.

¹⁹ Awa ladu, tukui imapas ujnarigta rigchakunami kawachigsamungapa kani.

Kai alpa luarpipas, iawarwa, ninawa i puiiwa kawachigsamungapami kani nuka atun
kagta.

²⁰ Indi tutaiangapami ka;

killapas, iawarsinami tukungapa ka,

atun Taita Diospa atun puncha chaimungapa kaura.

Chi tukurii punchaka,

tukui suma allilla kaskatami kawachingapa ka.

²¹ Maikanpas atun Taita Diusta mañagkunaka kispichiimi tukungapa kankuna”.

²² —Kamkuna Israelmanda runakuna, kaitapas uiawaichi. Nazaretmanda Jesusta Taita
Diospa iuchaitami karaska karka, kamkunapa ñawipi ujnachigta mana imaurapas kawas-
kasina rurangapa. Chasawaka, pai Jesús Taita Dios agllaska kagtami kamkunata kawa-
chirka. Chitaka, kam kikinkuna allillami iachangichi. ²³ Taita Dios, ñugpamandata imasa
iuiakuskasinami sakirka, pai Jesús kamkunawa kangapa. Chiura kamkunaka, mana alli
runakunapa makipimi kuarakangichi, kruspi klabaspa wañuchingapa. ²⁴ Wañuchigpipas,
paita mana pudirkachu, wañui chariringapa. Wañui charikuskata, Taita Dios kikinmi paita
kaugsachigsamurka. ²⁵ Chasallatami ñugpamanda taita Davidpas, pai Jesusmanda kasa
willarka:

Atun Taita Diusta nukapa ñugpa ladu imaurapasmi kawakuni.

Pai, nukapa alli ladullami ka;

chasaka, nuka ñi imata mana mancharispalla kangapa.

²⁶ Chimanda, nukata iapa allimi iuiachiwaku.

Suma alli iuiachiiwami nuka rimakuni.

Kasapas. Nukapa kuirpu wañuspaka, kuntintullami samakungapa kani,

²⁷ nukapa almata wañuskakunawa kaskapi mana sakipuungapa kagmanda.

Chasallata, nuka kamballa kagmanda,

mana sakiwankangichu,

nukapa kuirpu ismungapa.

²⁸ Iachachiwarkangimi imasa ruraspa kaugsangapa kagta.

Kam nukawa kagmanda, iapa suma allimi iuiachiriwá.

²⁹ —Taitakuna i mamakuna, nuka sutipami ñugpamanda taita Davidmanda kasa niiki-
chita. Pai wañuspaka, pambaimi tukurka. Pambaraiaskapi kaskataka, nukanchi charami
kawanchi. ³⁰ Chasa kagpipas, pai David, Santu Ispirituwa rimagmi karka. Paitaka, Taita
Dios jurarka, kasa nispa:

Sutipami niiki:

kamba sug wambratami kuangapa kani,

kam imasa mandakuskasina atun mandag kangapa.

³¹ Chasami David, ñugpa iachaspa, willarka, Cristo kaugsaringapa kagta, mana wañuska-
kunawa kaskapi Taita Dios sakingapa, paipa kuirputapas mana ismungapa sakingapa
kagta.

³² —Pai Jesustami Taita Dios kaugsachirka. Chasa kawaspaka, nukanchi tukui paimanda
willagkunami kanchi. ³³ Pai Jesustaka, Taita Dios atuniachispa, kikinpa alli ladumi
tiarichigrirka. Chipika, imasami Taita Dios niska karka: chasa Jesusta Santu Ispirituta
kuarka. Chimandaka kikin Jesuska, nukanchipagma chi Santu Ispirituta kachamurka.
Chitamami kamkunapas kunaura kawanakungichi i uianakungichi.

³⁴ —Kikin David wañuspaka, paipa kuirpu manara suma luarma rinchu. Davidllatami
kasa nirka:

Atun Taita Diosmi nukapa iaiata nirka:

“Nukapa alli ladu tiarii,

³⁵ nuka tukui kamta mana munagkunata apagrispa,

kamba chaki sarudiru ukuma churankama”.

³⁶ —Chimanda, Israelmanda tukui runakuna, kasa iachaichi: pai Jesusta kamkuna
kruspi klabachiskata, sutipami Taita Dios atuniachirka, tukui kunapa iaia Cristo niraian-
gapa.

³⁷ Chasa uiaspaka, chipi kagkuna sungu nanagta llakirirkakuna. Nispaka, Pedrota i pai-
pura Jesús kikin agllaskakunata tapurkakuna:

—Niwaichi, taita waugkikuna: ¿imaták nukanchi rurasunchi?

³⁸ Chiura, Pedroka ainirka:

—Kamkuna pandariskakunata sakispa, Taita Dioswa tukuichi. Jesucristopa sutiwa baugtisariichi. Chasaka, kamkunapa pandariikunata pasinsiaskami tukunkangichi. Chiwanka, Santu Ispiritutami chaskinkangichi. ³⁹ Chasallatami Taita Dios nirka, kamkunata, kamkunapa wambrakunata i karupi kaugsagkunatapas karangapa kagta. Tukuikunatami nukanchipa atun Taita Dios ni: “Nuka tukui kaiaskakunatami Santu Ispirituta karangapa kani”.

⁴⁰ Sug rigcha sug rigcha rimaspami Pedro, Jesusmanda willakurka. Kasapasmí iuiachikurka, nispa:

—Kai mana allilla iuiagkunawa mana sugllapi kangichi.

⁴¹ Pedro ima rimaskata suma uiagkuna baugtisai tukurkakuna. Chi punchalla, sug kimsa waranga runakunami Jesuswa kaskakunawa sugllapi tukurkakuna.

⁴² Chiuramanda tukui baugtisariskakuna, Jesús agllaskakuna ima iachachinakuskata uiaspa ruranakurka, ñi ima mana sakispalla. Suglla iuiaipimi kaugsanakurka, Jesús imasa rurangapa niskasina tandarisa, tanda sugllapi mikuspa. Chasallata, Taita Diusta mañaspa rimaspami kaugsanakurka.

Imasa musuglla Jesuswa suma iuiarisa kaugsanakuskamanda

⁴³ Chiurakuna Jesús agllaskakunaka, achka sumaglla mana imaurapas kawariskasinatami ruranakurka. Tukui chasa kawagkuna, iapa mancharispami ujnarinakurka.

⁴⁴ Jesucristowa tukui suma iuiagkunaka, suglla iuiaiwa kaugsanakurka. Paikuna tukui ima iukaska, tukuikunapami niraiarka. ⁴⁵ Alpa u imapas iukagkunaka, katuspami churanakurka, ministinakumanda tukuikuna aidarinakungapa. ⁴⁶ Tukui punchakuna, Diospa atun wasipi suglla iuiaiwami tandarinakurka. Wasi suiupasmí iaikuspa purinakurka, Jesús niskasina tanda sugllapi mikuspa. Tukui sugllapi tandarisa mikuspa karkakuna, suma kuntintarisa, ñi piwapas mana atuniachirispalla. ⁴⁷ Taita Diustami ninakurka: “Kam, iapa suma atunmi kangí”. Jerusalenpi kaugsagkunaka, tukuikunami paikunata sumaglla kawanakurka. Tukui punchakuna, atun Taita Dioska achkakunatami kaiakurka. Chasaka Jesuswa tukuskakuna, tukui punchakunami mas achka miranakurka.

3

Sug runa mana purig ambiriskamanda

¹ Suura chaugpi chisima puncha, Taita Diusta risadiru ura ña tukukugmanda, Pedro i Juan rinakurka Diospa atun wasima. ² Chi pungupi tiakurka sug runa, tiagsamuskauramanda mana puringapa pudig. Chi runata tukui punchakuna aparisa apadur karkakuna, Diospa atun wasipi iapa suma suti pungu suiu tiarichingringapa. Chi pungupi, tukui ukuma iaikunakuskata kulki mañaspa tiakudur karka. ³ Chi runaka, Pedro i Juan ña ukuma iaikunakuskata kawaspaka, kulki mañarkakunata. ⁴ Chiura Pedroka, Juanwa paita allilla kawaspaka, —Kawamuwai— nirka.

⁵ Chi runaka, allilla kawarkakunata, “Karawangapami kankuna” iuiarisa. ⁶ Chiura, Pedroka nirka:

—Kulki ñi kuri mana iukanichu. Nuka ima iukaskata karasaki. Nazaretmanda Jesucristowami niiki: atarisa puririi—. ⁷ Chasa nispa, alli ladu makita apispami atarichirka.

Atarichigllapi, chakikuna i ñudukuna allilla tukugsamurkakuna. ⁸ Chiuraka, saltaspa saiarirka. Puriimi kallairirka. Nispa, saltaspa kalpaspá, Taita Diusta kuiaspá, Diospa atun wasi ukuma paikunawa iaikugrirka.

⁹ Tukui chipi kagkuna, chi Taita Diusta kuiaspá purikuskata kawaspaka, ¹⁰ rigsirkakuna: “Paimi ka chi mana puringapa pudig, Diospa atun wasipi iapa suma suti pungu suiu kulki mañaspa tiakudur”. Chasa paita pasariskata kawaspaka, tukuikuna iapa mancharispa ujnarrirkakuna.

¹¹ Chi ambiriska runa, Diospa atun wasi ukupi, Salomonpa kanchapi Pedro i Juanta apispa charikurka. Chipi kag tukui runakuna, iapa ujnarrisa, kalpa kaillaiagrirkakuna.

¹² Paikunata kawaspaka, Pedroka kasami nirka:

—Kamkuna Israelmanda taitakuna, ¿imapatak kai runata nukanchiwanta ujnarrispa kawanakungichi? Nukanchipa iachaiwa ñi nukanchipa risaiwa mana kai runa purig tukugsamurkachu. ¹³ Nukanchipa Abraham, Isaak i Jakob ñugpamanda taitakunapa Taita Diosmi paipa wambra Jesusta sumaglla atuniachigsamurka. Paitami kamkuna wañuchingapa kuarkangichi. Pilatos paita kacharingapa munakuura, kamkunaka nirkangichimi: “Mana kacharikui”. ¹⁴ Pai tukui suma allilla ruragta wabutispa, mañarkangichimi, sug runa wañuchidurta kacharingapa. ¹⁵ Pai tukuikunata kaugsai karagtami wañuchingapa: “Ari” nirkangichi.

—Chasa kagpipas, Taita Dioska paita kaugsachirkami. Chasa sutipa kawaspami nukanchi paimanda willagkuna kanchi. ¹⁶ Jesuswa suma iuiagmandami kai kamkuna kawaska i rigsiska runata aliachispa wapuiachigsamurka. Chasa suma iuiagmandami tukui kamkunapa ñawipi aliachiska tukugsamurka.

¹⁷ —Ñami iachani, taitakuna: kamkuna i kamkunapa taitakuna, pi Jesús kagta mana allilla iachaspallami paita wañuchingapa: “Ari” nirkangichi. ¹⁸ Chiwanka, imasa Taita Dios, ñugpata tukui paipa Ispirituwa rimagkunawa pai agllaska Cristomanda willaska: imasa willaraiaskasinami paita pasarigsamurka. ¹⁹ Chimanda kamkuna, pandariskakunata sakispa, Taita Dioswa tukugsamuichi. Chasaka, kamkunapa pandariikuna pasinsiariimi tukunkangichi. ²⁰ Nigpika Taita Dios kikin, pai agllaska Jesustami kachamunga, allilla iuiachii punchakuna kamkunata tukungapa. Taita Dios ñugpamandatami niraiarka, pai Jesusta kamkunamanda kachamungapa. ²¹ Paita chaiakumi, suma luarpi chara kangapa, Taita Dios tukui imasa kaskasina sumaglla churankama. Chasami Taita Dios, paipa Ispirituwa alli rimagkunawa ñugpamandata willarka.

²² —Pai Jesusmanda, ñugpamanda taita Moiseska sutipami kasa rimarka:
Atun Taita Dios kikinmi ni:

“Kam kikinpuramanda

Santu Ispirituwa sug rimagmi llugsingapa ka”.

Paika, nukasinami kangapa ka.

Pai tukui ima rimakuskata suma uiangichi.

²³ Maikan chi rimagta mana uiagkunaka,

Israelmanda llugsichispa,

puchukaimi tukungapa kankuna.

²⁴ —Tukui Santu Ispirituwa rimagkuna, Samuel rimaskauramandata, kai punchakuna imasa pasaringapa kaskataka timpumi willaraiarka. ²⁵ Kamkuna, chi ñugpamanda rimagkunapa wambrakunapa kati wambrakunami kangichi. Kamkunamandami Taita Dios, kamkunapa ñugpamanda taitakunawa allilla iuiarirka. Abrahamta kasami nirka:

Tukui alpamanda runakunapasm

kamba wambrapa wambrapa sug kati wambramanda

nukapa iapa kuiaska kapuangapa kankuna.

²⁶ —Taita Dioska, pai kikinpa wambrata kaugsachispa, kamkunapagmami ñugpa kachamurka; chasaka, tukui kamkuna pandariikuna sakigpika, paipa iapa kuiaska kangapakuna.

4

Judiu taitapura tandariska kaskapi, Pedro i Juan kaskamanda

¹ Pedro i Juan chi runakunata chara rimanakugllapika, iaia sasirdutikuna, Diospa atun wasipi kawag taita i saduseo suti taitakunaka chima chaiagrirkakuna. ² Pedro i Juan iachachinakurka, Jesús kaugsariskamanda, tukui wañuskakunapas kaugsaringapa kagtakuna. Chi taitakuna, mana chasa iuiaspami iapa rabiawa piñarisa chaiagrirkakuna.

³ Pedro i Juanta apispaka, ña chisi kagmanda, kaiandikama karsilpi churagrirkakunata.

⁴ Pedro chasa rimaskata uiagkunaka, achka runakuna Jesuswa suma iuiarirkakuna. Ña pichka warangasina mirarkakuna.

⁵ Kaiandika, judiukunata mandag taitakuna, Moisés ima niskata iachachig taitakuna i sug taitakunapas, chi Jerusalenpi tandarigrirkakuna. ⁶ Chipi karkakuna iaia sasirduti, Anás suti, Kaifás, Juan, Alejandro i tukui chi iaia sasirdutipa kagkunapas. ⁷ Chasa tandariska kauraka, Pedro i Juanta chaiachigrispa, chaugpipi saiachispa, tapuchii kallarirkakuna:

—¿Pitak kamkunata kachamurka, u pipa iachaiwatak kamkuna chasa ruranakungichi?

⁸ Chiura Pedroka, Santu Ispirituwa iuiapi junda kaspa, kasami nirka:

—Israelmanda runakunapa taitakuna, ⁹ kamkunaka nukanchita kaiangichi, kai runamanda tapuchingapa, imasa pai ambiriska tukugsamugta. ¹⁰ Tukui kamkunata i tukui Israelmanda runakunata kasami niikichita: Nazaretmanda Jesucristowami kai runa kamkunapa ñawipi ambiriska saiaku. Pai Jesustami kamkuna kruspi klabachirkangichi. Pai wañuskatakata, Taita Diosmi kaugsachigsamurka. ¹¹ Kasami ñugpamanda librupi willaraiá: Wasichigkuna wabutiska rumi, wasita charigmi tukugsamurka.

Chasallata, pai Jesusta kamkuna wabutiska, tukuikunapa iaiami tukugsamuska ka. ¹² Kai alpapi manima tianchu ñi sug maikanpas nukanchipa pandariikunata kispichingapa. Jesús sapallatami Taita Dios kachamurka, nukanchita kispichingapa.

¹³ Chiura chi taitakunaka, Pedro i Juan mana manchaspalla rimanakuskata uiaspa, ianga runakuna mana iachagkuna kagta iachagsamuspa, iapa ujnirirkakuna. Jesuswa purigkuna kaska kagtami iuiarirkakuna. ¹⁴ Chi ambiriska runapas, paikuna kaskapi saiakurka. Chasa kawaspaka, mana iacharkakuna ima paikunata ninga.

¹⁵ Pedro i Juanta kanchama llugsichirkakuna. Nispaka, kikinpura tapurinakurka, ¹⁶ kasa nispá:

—¿Imatak chi runakunata rurasunchi? Jerusalemni tukui kaugsagkunami ña iachankuna, paikuna sug mana imaurapas kawaskasinata ruragtakuna. Chita, nukanchi mana piñarii pudingapa kanchichu. ¹⁷ Sugkuna chasa ruraskamanda mana uangapaka, kasa manchachispa nisunchi: “Kunauramanda, ñi pitapas mana Jesusmanda willanakungichi”.

¹⁸ Chi taitakuna chasa iuiarispá, Pedro i Juanta ikuti kaiarkakuna. Kasa manchachispa-ni nirkakunata:

—Kunauramandaka, mana mas Jesusmanda rimaspa iachachispa puringichi.

¹⁹ Chasa uiaspa, Pedro i Juanka ainirkakuna:

—¿Imasatak iuianakungichi? Diuspa ñawipi, ¿allillachu ka, kamkunata uangapa; u Taita Diustachu uiasunchi? ²⁰ Nukanchitaka chaiakumi, imasa kawaska i uiaskata willaspa puringapa.

²¹⁻²² Chiura, ikuti manchachispa, kacharirkakuna. Chi runa mana imaurapas kawaskasinawa ambiriska, chusku chungá wata ialimi iukarka. Chasa ambiriskamandaka, tukui runakuna Taita Diusta iapa suma atun kagta ninakurka. Chimanda chi taitakuna, Pedro i Juanta ñi ima pandariipas mana tarirkakuna, asutingapa.

Jesuswa suma iuiagkuna, Taita Diusta ima mañaskakunamanda

²³ Paikunaka, ña kacharii tukuspaka, kikinpurakunapagma rirkakuna. Chaiagrispaka, chi iaia sasirdutikuna i sug taitakunapas paikunata imasa manchachispa llugsichiskamanda willagrirkakuna. ²⁴ Chasa uiaspaka tukuikuna, suglla iuiaiwa Taita Diusta rimarkakuna, kasa nispá:

—Tukui manduiug Taitiku, sug luar, kai alpa luar i lamar iakukunata, tukuimi kam rurarkangi. ²⁵ Kammi [Santu Ispirituwa] nukanchipa ñugpamanda taita David kammanda allilla ruragta kasa rimachirkangi:

¿Imapatak mana judíu kagkuna kaparispá killachirinakú?

¿Imapatak iangalla imapas rurangapa iuiarinakú?

²⁶ Kai alpapi atun mandagkuna
i paikunapa kati mandagkuna,
suglla iuiaiwami tandarirkakuna,
atun Taita Diusta
i pai agllaska Cristota wabutingapa.

²⁷ —Chasa ñugpamandata willaraiaskaka, sutipami tukugsamurka. Kai atun puiblupi, Herodes i Ponsio Pilatos, judíu i mana judíu kagkunawami tandarirkakuna, kamba tukuipi alli wambra Jesusta kam agllaskata wabutingapa. ²⁸ Chasa, kam tukui imasa ñugpamandata rurangapa niraiaskataka, chi taitakunami rurarkakuna.

²⁹ —Kunauraka, Taitiku, paikuna ima manchachiskakunata kawamui. Nukanchi kamba lutrinsinakunata iachaita karamui, kamba rimaita mana manchaspalla willaspa puringapa. ³⁰ Chasallata karamui, kamba iapa iachaiwa ungugkunata ambispa, imakunapas kawachispa, kamba tukuipi alli wambra Jesuswa tukui imaurapas kawaskasinapas rurangapa.

³¹ Chasa Taita Diusta mañai puchukaura, chi wasi ukupi tandariskakunapika kuiuirigamurka. Chiura tukui chipi kagkuna, Santu Ispirituwa iuiapi jundami tukugsamurkakuna. Chiuramanda, Diuspa Rimaita mas sinchimi rimaspa mana manchaspalla purii kallarirkakuna.

Tukui ima iukaska, tukuikunapa niraiaskamanda

³² Jesuswa tukuskakuna, iapa achkakuna kaspapas, tukuikunami suglla iuiaiwa karkakuna. Ñi pipas mana ninakurkachu: “Kai, nukapami ka”. Tukui ima iukaskapas, tukuikunapami niraiarka.

³³ Iaia Jesús kikin agllaskakuna, paipa iapa iachaiwami paimanda willanakurka, kaugsariska kagta. Tukui Jesuswa tukuskakunaka, Taita Diuspa sumaglla iuiachiiwami kaugsanakurka.

³⁴ Jesuswa tukuskapurakunamandaka, ñi maikantapas mana ñi ima pisirkakunatachu. Maikanpas alpa u wasi iukaskakunaka, iacharkakunami katunga. ³⁵ Nispaka, chi katuska kulkita apaspa, Jesús agllaskakunatami iacharkakuna kuagringa. Chaskispaka, tukui imasa ministiskasina karaspami richidur karkakuna. ³⁶ Chipre alpamanda sug runa, José suti, Levipapurakunamanda, paikunawa kaugsakurka. Chi runata, Jesús agllaskakuna

sutichiska karkakuna Bernabé. (Chi niraianni “Sumaglla iuiachig’).³⁷ Chi runaka, alpa iukaskata katuspaka, kulkita apaspa, Jesús agllaskakunata kuagrirka.

5

Ananías warmindi pandariskakunamanda

¹ Chiurakuna Ananías suti runapas, warmindi Safirawa paikuna alpa iukaskata katurkakuna. ² Chi runaka, alpa katuskata chaugpi kulkimi pakalla wakachirirka. Warmindipas, allillami iacharka. Sug chaugpi kulki kaskataka Jesús agllaskakunata kuagrirka, “Tukui kulki katuskatami kuanakuikichita” llullaspa.

³ Chiura Pedroka, Ananiasta nirka:

—¿Imawantak iaia kuku, kamba iuaipi iaikurka, Santu Ispirituta llullachingapa? Chi alpa katuska kulkita, chaugpimi pakalla wakachirirka. ⁴ Alpata manara katuura, ¿manachu kamba karka? Chasallata katuskauramanda, chi kulki, ¿manachu kamba karka? Nigpika, ¿imapak chasa iuiaringi llullachigsamungapa? Mana runapurata llullachikungichu. Taita Diustami llullakungi.

⁵ Chasa uiaspaka, Ananías wañuskami urmagsamurka. Pai wañuskata iachagsamugkuna, tukuikuna iapami mancharigsamurkakuna. ⁶ Nigpi sug musukuna chi ukupi tianakugka, saiarispa, kuirputa maiturkakuna. Maituspaka, paita aparkakuna pambangapa.

⁷ Mai kimsa urapikar, Ananiaspa warmika iaikugsamurka, imasa pasariskata mana iachaspalla. ⁸ Chaigriuraka, Pedroka paita tapurka:

—Willawai: ¿kaimandallachu alpata katurkangichi?

Chiura ainirka:

—Sutipa, chimandallami katurkanchi.

⁹ Chiura, Pedroka nirka:

—¿Imapak iuiaririrka, atun Taita Diuspa Ispirituta llullachingapa? Uiamui. Kamba kusata pambangapa apagkuna, kanchallapimi samunakú. Kunauraka, kamtapasmi apangapa kankuna, pambangapa.

¹⁰ Chasa nigllapi, chi warmipas Pedropa chakikunallapi wañuska urmagsamurka. Musukuna, iaikuspaka, tim wañuskatami tarirkakuna. Nispaka, chasallata llugsichispa, aparkakuna. Kusa pambaraiska ladullapi paitapas pambagrirkakuna. ¹¹ Chiura tukui Jesuswa tukuskakunaka, iapa mancharirkakuna. Chasallata ima pasariskata iachagkunapas, tukuikunami mancharirkakuna.

Jesús agllaskakuna, achka mana imaurapas kawaskasina ruraskakunamanda

¹² Chi punchakuna Jesús agllaskakuna, Jerusalenpi kaugsanakugpa ñawipi achka mana imaurapas kawaskasina suma ruraspami karkakuna. Tukui Jesuswa tukuskakuna, Diuspa atun wasipi, Salomonpa suti atun pungu ladullapimi tandaridur karkakuna. ¹³ Chi puiblupi kaugsanakugka, paikunata iapami kuiarkakuna. Paikunata kuiaspapas, sugkuna manchanakuspami paikunawa sugllapi manara tukurkakuna. ¹⁴ Chasa kagpipas, tukui punchakuna, kari i warmikuna, iaia Jesuswa suma iuiarispa, paiwa mas miraspami rinakurka.

¹⁵ Jesús agllaskakuna iapa suma runanakuskata kawaspa, chi puiblupi kaugsanakugka, ungugkunata wasikunamanda chakanapi llugsichispa, kalli suiu churadur karkakuna; chasaka, Pedro ialikuura, paipa sumbrallatapas chaskispaka ambiringapa. ¹⁶ Jerusalén ladukunapi kaugsanakugpas, chasallata achka ungugkunata i kuku waira iaikuskakunatapas chimallatata apadur karkakuna. Chiura, tukuikunami aliaska tukugsamudur karkakuna.

Judiú taitakuna, Jesús agllaskakunata mana allilla ruraskakunamanda

¹⁷ Chasa kawaspaka, iaia sasirduti i saduseo suti paiwa purigkunaka, mana allilla iuiawa rabiariispa, ¹⁸ Jesús agllaskakunata apichispa, karsilpi churarkakunata. ¹⁹ Chiuralla atun Taita Diuspa anjilka, tuta rispa, wichkaraiska pungukunata paskaspa, paikunata chimanda llugsichigrirkakunata. Llugsichispaka, nirkakunata:

²⁰ —Riichi. Diuspa atun wasi ukupi runakunata mana manchaspalla willagriichi, kasa nispa: “Jesucristo, sug rigcha musu kaugsaitami apamurka”.

²¹ Chasa uiaspaka, kaiandi tutata Diuspa atun wasi ukupi iaikugrispa, iachachiimi kallairirkakuna.

Chi tutatallatata, iaia sasirduti i paiwa purigkuna, Israelmanda tukui taitakunawa tandarigrirkakuna. Ña tandariskakuna kauraka, alwasilkunata karsilma kacharkakuna, Jesús agllaskakunata pusangapa. ²² Chima chaigrispaka, chi alwasilkuna manima paikunata tarigrirkakuna. Nispaka, iaia sasirdutipagma kutirkakuna willangapa. ²³ Kasasi nirkakuna:

—Chi karsil pungukuna suma wichkaskatami tarigrirkanchi. Suldadukunapas, tukui pungukunatami kawanakurka. Nukanchi pungukunata paskauraka, ñi pipas chi ukupi mana karkakunachu.

²⁴ Chasa uiaspaka, Diuspa atun wasipi kawag taita i iaia sasirdutikuna, iapa mancharispa, tapurinakurka:

—Chikunawa, ¿imasik pasaringa?

²⁵ Chasa tapurinakugllapi, sug runaka paikunapagma chaiagirka, kasa nispa:

—Kamkuna karsilpi churaska runakunaka, kaskallami Diuspa atun wasi ukupi iachachinakú.

²⁶ Chasa uiaspaka, Diuspa atun wasipi kawag taitaka alwasilkunawa rirkakuna, Jesús agllaskakunata pusangapa. Achka uianakugta kawaspami mancharispa, kasa nirkakuna: “¡Amalai nukanchita rumiwa piantrakuna!”. Chimandami mana imapas paikunata ruras-palla pusarkakuna.

²⁷ Chasa pusaspa, chi taitakuna tandariska kaskapi iaikuchigrirkakuna. Chipika iaia sasirduti, Jesús agllaskakunata nirka:

²⁸ —¿Manachu uiarkangichi nukanchi niskata: “Mana mas chi Jesusmanda iachachispa purinakungichi”? Kamkunaka, uangataka, Jerusalempi tukui runa kaugsanakuskatami iachachispa upasina purinakungichi. Kamkuna munanakungichimi, nukanchita juchachispa, chi runata nukanchi wañuchigta.

²⁹ Chiura, Pedro i paipura Jesús agllaskakunaka ainirkakuna:

—Nukanchita chaiakumi, Taita Dios imasa pai niskata uangapa, maituku runakuna uiarinakugpipas. ³⁰ Nukanchipa ñugpamanda taitakunapa Taita Diosmi Jesusta kaugsa-chirka. Pai Jesusmandami kamkuna mañarkangichi, kruspi klabaskakunawa warkuchispa wañuchingapa. ³¹ Taita Dioska, paita kaugsachispaka, suma luarpi atuniachispa, kikinpa alli ladumi tiarichigrirka, tukuikunapa iaia mandag i kispichig kangapa; chasaka, Israel-manda runakuna tukui pandariikunata sakiskakunata pandariikuna pasinsiai tukungapa.

³² —Nukanchika, chasa allilla kawaspami pai Jesusmanda willagkuna kanchi. Santu Ispiritupasmi paimanda tukuipi allilla willag ka. Taita Dios, paita suma uiagkunatami Santu Ispirituta karamú.

³³ Chasa Jesús agllaskakunata uiaspaka, chi taitakuna, iapa rabiariispa, wañuchingapami munanakurka. ³⁴ Chasa iuianakugpipas, paipurakuna tiarka Gamaliel suti sug fariseo. Chi runa, Moisés ima niskata iachachig taitami karka. Paita, tukui runakuna sumaglla kuiaspami uiadur karkakuna. Chi runaka, saiarispa, nirka:

—Kai runakunata sug mana unailla kanchama llugsichiichi—. Llugsichiuraka, chipi kaska taitakunata nirka— ³⁵ Kamkuna Israelmanda taitakuna, chi runakunata manara imapas ruras-palla, allilla iuiaringichi. ³⁶ Kasa iuiariichi: unai ña ka; Teudás suti runasik atuniachirikurka, kasa nispa: “Taita Dios kachamuskami kani”. Chiurakuna, sug chusku patsa runakunasik paiwa tukurkakuna. Paita wañuchiuraka, tukui chi paita katiraiagkuna, sugma sugma rispa, puchukarirkakuna.

³⁷ —Chiuramanda, ikuti kasapasmi tukugsamurka: runakuna maituku kaugsanakuskata iachangapa tapuchinakuura, Judas suti Galileamanda runami chasallata atun tukurka. Paipas, achka runakunatami kaiaspa purichikurka. Paitapasmi wañuchirkakuna. Chiura tukui paiwa gagkunapas, sugsinama sugsinama rispami puchukarirkakuna.

³⁸ —Chimandami kamkunata kunaura niikichita: chi runakunata ianga kawaichi. Ñi imapas paikunata mana ruraichi. Paikuna imasa ianga runakunapa iuiailawa kagpikuna, paikunapas chasallatami puchukaringakuna. ³⁹ Ikuti paikuna imasa Taita Diospa iuiaiwa ruranakugpika, kamkunaka mana puchukai pudingapa kangichichu. ¡Ujalallapas kamkunawa Taita Dios rabiargsamuchu!

Chasa uiaspaka, tukui chi taitakunaka Gamaliel rimaskata suglla iuiai iuiarirkakuna. ⁴⁰ Chiuramanda, Jesús agllaskakunata kaiaspaka, asutichispa, nirkakunata:

—Mana mas Jesusmanda rimanakungichi—. Chasa nispa, kacharirkakunata.

⁴¹ Jesús agllaskakunaka, chi taitakunapagmanta llugsispaka, kuntintarispa rirkakuna, kasa nispa: “Jesusmanda nukanchi nanaiwa llakii pasarkanchi. Chimandami iapa alli iuiachiiwa rinakunchi”. ⁴² Chiuramanda, antis mas mana sakispalla, tukui punchakuna, Diuspa atun wasi ukupi i sug wasikunapipas Jesucristomanda mas rimaspa i iachachispa purii kallarirkakuna.

6

Kanchis aidagkunata agllaskakunamanda

¹ Chi punchakuna, Jesuswa tukuskakuna miraspa miraspa rinakurka. Chiura griego suti rimaiwa kagkuna, hebreo sutiwa rimagkunamanda piñachirri kallarikakuna, kasa nispa:

–Tukui punchakuna, mikui karanakuura, nukanchipurapa sapalla kidaska warmikuna manima sumaglla chashinakunchu.

² Chasa uiaspaka, chunga iskaí Jesús kikin agllaskakunaka, paiwa tukui tukuskakunata tandachispa, nirrakuna:

–Manachar alli ka, nukanchi Diospa Rimaita willanakungataka, mikui karanakuskapi unaianakungapa. ³ Chimanda, taitakuna i mamakuna, kam kikipura kawaspa, kanchis runakunata maskaichi, mikui i imakunapas kawag tiangapa. Paikuna kachukuna tukuipi alli runakuna, achka iachagkuna, Santu Ispiritupa iuiaita iukagkuna. ⁴ Chasa tukugsamug-pika, nukanchika Taita Diusta mañaimi apanakusunchi. Paipa Rimaita mana sakispallami iachachinakusunchi.

⁵ Chasa uiaspaka, tukuikuna suglla iuiaimi tukurkakuna. Nispaka, Esteban suti Santu Ispiritupa iuiaita iukagtami agllarkakuna. Paika, Iaia Jesusllawami suma iuiakurka. Chasallata, Felipe, Prócoro, Nikanor, Timón, Parmenas i Nikolás suti runakunatami agllarkakuna. Chi Nikolás, Antiokia puiblumandami karka. Ñugpata judiukuna imasa iachachinakuskata uiaspami paikunawa tukuska karka.

⁶ Chi agllaska runakunataka Jesús kikin agllaskakunapa ñawima pusarkakuna. Chiura paikunaka, umapi maki churaspa, chi runakunamanda Taita Diusta mañarkakuna.

⁷ Chi punchakuna, Diospa Rimaita mas achkakunami uianakurka. Chi Rimaita uiaspa, Jesuswa tukuskakuna masmi Jerusalenpi miranakurka. Achka sasirdutikunapasmí, Jesus-manda rimaita uiaspa, pai Jesuswa suma iuiarikakuna.

Estebanta apiskakunamanda

⁸ Estebanka, Taita Diospa suma kuiaskami karka. Taita Diospa iapa iachaiwa runakunapa ñawipi askurinti ujnachingasina mana imaurapas kawaskakunatami rurakurka. ⁹ Sug runakuna, Estebanwa piñachirri kallarikakuna. Chi runakunaka karkakunami randiska kaskakunata kachariska suti tandaridiru wasimanda. Sugkunaka karkakunasi Sirene alpamanda i Alejandría puiblumanda; sugkunaka, Silisia i Asia alpakunanigmanda. ¹⁰ Chi runakuna Estebanwa piñachirinakuuraka, paika Santu Ispiritu karaska iachaiwami iapa suma rimakurka. Chiwanka chi runakuna, paipa rimaita mana ainii alli kapurkakunata.

¹¹ Chimandami paikuna, pakalla sug runakunata kulki kararkakuna, Estebanmanda llulaspas, sutipa kagsina kasa ningapa:

–Chi runata uiarkanchimi, Moisesmanda i Taita Diosmanda jiru rimakugta.

¹² Chasakunawaka, chipi kagkunata, Moisés ima niskata iachachig taitakunata i sug taitakunatapas Estebanmanda mana allilla tukuipi rimarkakuna. Nispaka, Esteban kaskama chaiagrirkakuna. Paita apispaka, judíu taitakuna tandariska kaskamami aparkakuna. ¹³ Nispaka, paimanda willangapa sug runakunata chaiachigrirkakuna. Chi runakunaka, Estebanmanda llulaspas, kasami nirrakuna:

–Kai runa, kai Diospalla kaska wasimanda i Moisés ima rurangapa willaraiaskamanda imaurapasmi kamirikunlla. ¹⁴ Pai rimakuskataka, nukanchi uiarkanchimi: “Chi Nazaret-manda Jesús, kai Diospa atun wasita puchukangapasi ka”. Kasapasmi uiarkanchi: “Chi Jesús iachachirkasi: Moisés ima nukanchita rurangapa niskata sakispa, sug rigchasi rurasunchi”.

¹⁵ Chi taitakuna i tukui chipi tianakugkunata, Estebanpa ñawika sug anjilpa ñawisinami kawarigsamurkakunata.

7

Esteban kispiringapa rimariskamanda

¹ Chiura iaia sasirdutika, Estebanta tapurka:

–Kammanda rimanakú; chika, ¿sutipachu ka?

² Chiura, Estebanka ainirka:

–Taitakuna, uiawaichi. Nukanchipa ñugpamanda atun taita, Abraham suti, chara Mesopotamia suti alpapi kaugsakuura, manara Arán puiblupi kaugsakugpita, nukanchipa suma atun Taita Dioska paita kawarirka, ³ kasa nispa: “Kamba alpakunata i tukui kambapurakunata kaimanda sakispa, rii. Nuka, sug mas suma alpami kawachisaki”.

⁴ –Chasa uiaspa Abrahamka, chi Kaldea alpamanda llugsispa, Arán puibluma rirka kaugsangapa. Chimandaka, paipa taita wañuura, kai alpapi kamkuna kunaura kaugsanakuskama chaiagsamurka. ⁵ Kai alpapi kaugsakugpipas, Taita Dios manara paita ima alpapas kararka, ñi mai chaki churangapagllapas. Niillakar nirkami: “Sutipami kai alpata

karasaki, kam wañuuraka, kamba wambrapa wambrakuna kaugsangapakuna". Taita Dius chasa niura, Abrahampa warmi manarami ñi sug wambra iukaska karka.

⁶—Kasapasmi Taita Diuska nirka: "Kamba wambrapa wambrakuna, sug karu alpapimi kaugsagringapa kankuna. Chipika chinigmanda runakunami, chusku patsa wata paikunata mana llakispalla trabajachingapa kankunata. ⁷ Chiuramandaka, chi alpamanda runakunata trabajachipuagkunataka, nukami randichipungapa kani. Chasa pasariskauramandami kamba wambrapa wambrakuna, chinigmanda llugsimuspa, kai alpallapita kunguriwagsamungapa kankuna".

⁸—Taita Diuska, Abrahamwa iuiaripa, paita nirkami, kari wambrakunata marka churangapa; chasaka, Taita Diuspalla kagta niraiangapa. Chimandami Abraham, Isaak suti paipa wambra pusag puncha iukagsamuskata chasa rurarka. Chasallatami Isaak, paipa wambra Jakobta rurarka. Paipa chungu iskai kari wambrakunatapas, Jakob chasallata rurarka. Chi runakunami karkakuna nukanchi Israelmandakunapa ñugpamanda achala taitakuna.

⁹—Iachanchimi, chi Jakobpa wambrakunaka, José suti waugkindiwa mana allilla iuiai-wa rabia iukaspapa, paita katugtakuna, Ejipto suti alpama rinakuska apangapa. Chasa pai katui tukugpipas, Taita Diuska mana sakirka. ¹⁰ Chiwanka, tukui llakiiwa kaskatapasmi kispichirka. Suma iachaimi paita kararka. Chasallata, Ejiptopi iaia mandagpa ñugpa ladu José kaura, Taita Diuska chi mandagta iuiachirka, Josewa sumaglla kangapa. Chi mandag kikinmi Joseta churarka, Ejiptopi tukui kaugsanakuskata i paipa wasimandakunawantapas mandag kangapa.

¹¹—Chiuramandaka, iapa iarkai iapa llakiiwami chi Ejipto suiu tukurka, chasallata Kanaan alpa suiupas. Chiura nukanchipa ñugpamanda taitakuna manami tarinakurka ima mikungapa. ¹² Jakobka iachagsamurkami, Ejiptopi trigu mikui iukagtakuna. Chasa iachaspaka, paipa wambrakunata u nukanchipa ñugpamanda taitakuna niskata, paikunatami kacharka, musuglla chima ringapa.

¹³—Paikuna ña iskaima Ejiptoma riuraka, Joseka paipa waugkindikunatami rigsichirirka. Chiuramandaka, chi alpapi iaia mandagpas iachagsamurkami, José pipa wambra kagta. ¹⁴ Nispaka, José kacharka, taitandi Jakobta i tukui paipurakunata pusagringapa. Paipurakuna, kanchis chungu pichka runakunami karkakuna. ¹⁵ Chasamandami Jakob, Ejiptopi kaugsai kallarigrirka. Chipimi wañurka. Nukanchipa ñugpamanda taitakunapas, chillapitami wañurkakuna. ¹⁶ Paikuna wañuuraka, Sikem suti puiblumami aparkakuna, pambangapa. Chipimi ñugpata Abraham, Amorpa wambrakunata sug piti alpa kulkiwa randiska tiarka, chipi wañuskakunata pambangapa.

¹⁷—Abrahamta Taita Dius imasa niskasina tukugsamungapa ña chaiakuuraka, Jakobpa wambrakunapa kati wambrakuna, Ejiptopi iapa miraspa miraspami rinakurka. ¹⁸ Ejiptopi Josemanda ña kungariska kauraka, sug iaia mandagmi mandai kallarirka. ¹⁹ Chi mandagka, nukanchipa ñugpamandakunata llullachispa, mana llakispallami trabajachii kallarirkakunata. Nispaka, tukui taitakunatami nirka, kari wambra tiaskakunataka sitangapa, iapa miranakugmanda.

²⁰—Chiurakunaka, Moisesmi tiagsamurka. Paika, Diuspa ñawipi sumami kawarirka. Paipa atunkunaka, kimsa killami wasi ukupi pakalla wiñachinakurka. ²¹ Paita sitagrii chaiauraka, kikin iaia mandagpa sipas warmi wambrami, sitaskata tarispa, paipagma aparka. Chiuramanda, pai kikinpa wambratasinami wiñachirka. ²² Chiwanka Moisés, tukui Ejiptomanda iachaikunatami iachaikurka. Chasaka, tukuipi iacha suma rimag, alli iuiag pagtami tukurka.

²³—Ña chusku chungu wata iukaura, Moiseska iuiarirkami, pai kikinpa Israelmanda runakunapagma chaigringapa. ²⁴ Chipi chaigriuraka, sug Ejiptomanda runa, Israelmanda sug runata kaspiwa mana llakispalla piakurka. Chasa kawaspa, Moiseska, chi Israelmanda runata michaspa, chi Ejiptomandata wañugta piagirka. Chasami randichipurka. ²⁵ Chasa rurakuspa, kasami iuiakurka: "Israelmanda runakuna iachagsamungapami kankuna: 'Kai Moisesmandami Taita Dius nukanchita kispichigsamungapa ka.'" Moisés chasa iuiakugpipas, Israelmandakunaka manami iuianakurka, paika kispichig kangapa kagta.

²⁶—Chi kaiandi, Israelmanda iskai runakuna makanakuskatami Moisés tarigrirka. Tarigrispaka, pasinsiachispami nirka: "Kamkuna, waugkindikunami kangichi. ¿Imapatak rabiachirinakuspa makanakungichi?"

²⁷—Chi paipura makanakui kallarigka, Moiesta tangaspa, nirka: "¿Pitak kamta mandag churarka; chasaka, nukanchita justisiangapa?" ²⁸ Imasami kaina Ejiptomanda runata wañuchirkangi: chasallatachar nukatapas wañuchiwangapa munakungi".

²⁹ —Chasa uiaspa, Moiseska mitikurka. Madián suti alpama chaigrispaka, chi luar-manda ajinusinami kaugsakurka. Chipika, sug warmimi tarirka. Paiwa kaspá, iskaí wamburami iukarkakuna.

³⁰ —Chusku chungá watapika, Moisés, Sinaí suti chusa sitaska alpapi purikugirka. Chipika sug anjil, nina sindi sacha rupakuskasinami kawarirka. ³¹ Chasa rupakuskata kawas-paka, Moisés iapa unarigsamurka. Nispaka, kaillaiaspa rirka, mas allilla kawangapa. Chi-ura, atun Taita Diospa rimaimi uiarirka, kasa nispá: ³² “Nukami kani kamba ñugpamanda taitakunapa Dios. Abraham, Isaak i Jakobpa Taita Diosmi kani”.

—Chasa uiaspaka Moisés, iapa mancharispa chugchurirka. Kawangapapas, mana pudikurka. ³³ Chiura, atun Taita Dioska nirkami: “Kamba chakipi churaraiaaskakunata surkurii. Kam sarukuska alpaka, nukapallami ka. ³⁴ Nukapa runakuna Ejipto alpapi iapa llakii iukaskakunatami kawakuni. Paikuna iapa llakiiwa wakanakuskatapasmaí uiakuni. Chi-mandami uraikumurkani, paikunata kispichingapa. Nukami niiki: samui. Uiiwai. Kam-tami Ejiptoma kachangapa kaiki”.

³⁵ —Chi Moisesdami Israelmanda runakuna wabutiska karka. “¿Pitak kamta mandag churarka; chasaka, nukanchita justisiangapa?” niska karka. Chi Moisesmi Taita Dios, mandag i kispichig churarka, paipa anjilwa nina sacha rupakuskapi kawachispa. ³⁶ Chi Moisesmi Israelmanda runakunata Ejiptomanda llugsichigrirka. Chi Ejiptomanda llugsichigrispa, Puka Kucha suti atun iakupimi ialichirkakunata. Nispaka, chusa sitaska alpapi chusku chungá watami purichirkakunata. Chi purinakuskapi, ñi imaurapas mana kawaskasinatami kawachirkakunata.

³⁷ —Chi Moisesllatatami Israelmanda runakunata nirka: “Taita Dios kikinmi ni, kam kikinpuramanda Santu Ispirituwa sug rimagmi llugsingapa ka. Paika, nukasinami kangapa ka”.

³⁸ —Chi Moisesllatatami Israelmanda tukui runakunawa chusa sitaska alpapi sugllapi karka. Taita Diospa anjilpasmi paiwa karka. Chi anjil, Sinaí awa lumapi paita i nukanchipa ñugpamanda taitakunatapasmaí rimarka. Chi Moisesmi Taita Diospa kaugsai karag rimaikunata uiaspa chaskirka; chasaka paipas, nukanchita karagsamungapa.

³⁹ —Chi Moisesdami nukanchipa ñugpamanda taitakuna mana uangapa munarkakuna. Paita wabutispa, ninakurkami: “Tukuikuna, Ejiptoma kutisunchi”. ⁴⁰ Moisés mana paikunawa kagmanda, Aarón sutita nirkakuna: “Chi Moisés nukanchita Ejipto alpamanda llugsichimuskata, nukanchi mana iachanchichu ima tukugta. Chimanda, sug diuskuna rurai, nukanchita ñugpangapa”. ⁴¹ Chi punchakunami uchulla wagrasiina kawari paikunapa dius niraiangapa rurarkakuna. Nispaka, animalkunata wañuchispa rupachispa, chi ianga diustami kungurispa mucharkakuna. Chi pai kikinkunapa makiwa ruraskata kawas-paka, iapami kuntintarirkakuna.

⁴² —Chimanda Taita Dioska, paikunapagmanda anchurirka. Paikunata sakirka, awamanda istrillakunata dius nispá, kungurichukuna. Chimandami Santu Ispirituwa rimag ñugpamanda librupi willarka, kasa nispá:

Kamkuna Israelmandakuna,
chi chusku chungá wata chusa sitaska alpapi purinakuura,
¿nukatachu animalkunata wañuchispa rupachispa kunguriwarkangichi?
Manima.

⁴³ Molok suti ianga diuspa linsu wasitami aparispa purinakurkangichi.
Chasallata, Refán suti ianga diuspa istrillasina kawariskatapasmaí purichirkangichi.
Chi imajinkunata kam kikinkunapa makiwa ruraskakunatami mucharkangichi, dius nispá.

Chimandami nuka,
kamkunata llugsichispa,
Babilonia suti sug ladu alpama kachangapa kaikichita.

⁴⁴ Kasapasmi Esteban nirkakunata:

—Chi chusa sitaska alpapi, nukanchipa ñugpamanda taitakuna, sug linsu wasimi purichinarkuna. Chi wasipika, Taita Dios paikunawa kagtami niraiarka. Chi wasimanda, Taita Dios, Moiseska niska karka: “Imasami kai wasita kawachiiki: chasallatami wasichipuan-kangi”. ⁴⁵ Chi wasitaka, nukanchipa ñugpamanda taitakunatami Moisés sakirka. Chi wasita kai alpamami chaiachigsamurkakuna. Josué suti taita kai suii ñugpata kaugsanakuskata puchukakuuraka, chi linsu wasi paikunawa tiarka. Chi sug runakunata, Taita Diosmi kai alpamanda llugsichirka nukanchipa ñugpamanda taitakunapa ñawipi. Chi linsu wasi, David suti atun mandag kaugsankamami tiarka.

⁴⁶ —Pai Davidta, Taita Dios suma kuiarka. Pai Davidka munakurka, suma wasi wasichipungapa; chipika, Jakobpa Taita Dios kagsamungapa. ⁴⁷ Chasa munakugpipas, paika manima; paipa wambra Salomón sutimi wasichipurka. ⁴⁸ Wasichipugpipas, runa ruraska

wasikunapika, tukuimanda mas atun Taita Dios mana chipika kaugsancho. Chimandami Santu Ispirituwa rimagka ñugpamanda librupi kasa willarka:

⁴⁹ Atun Taita Dioska, kasami ni:

“Sug luar, nuka mandangapa tiaridirumi niraiá.

Alpaka, nukapa chaki sarudirumi ka.

Nigpika, ¿imasa wasitak munanakungichi saiachipuungapa?

¿Maikantak nuka samadiru kapuanga?

⁵⁰ ¿Manachu tukui, nuka kikin ruraska ka?”.

⁵¹ Kasapasmi Esteban nirkakunata:

—Kamkuna, imaurapas upasinami karkangichi. Mana Taita Diusta rigsigsina, mana rinri uiagsina i mana sunguiugsinami kangichi. Kamkunapa ñugpamanda taitakunasina, kamkunapas chasallatami kangichi. Imaurapas Santu Ispirituwa mana munangichichu.

⁵² Kamkunapa ñugpamanda taitakuna, Santu Ispirituwa rimagkunata, ¿maikankunata tak mana llakichispa wañuchirkakuna? Chi rimagkunaka willaskami karkakuna, alli iuiag Cristo samungapa kagta. Chi alli iuiag runa ña samuuraka, kamkunaka apichispami wañuchii nirkangichi. ⁵³ Taita Dios ima rurangapa niskataka kamkunapa ñugpamandakunata anjilkunawami willarka. Chasa willagpipas, Taita Dios imasa munaskata mana rurangichichu.

Estebanta wañuchiskakunamanda

⁵⁴ Chasa uiaspa, chi taitakunaka, iapa rabiarispa, kirukunapas uiarigta mukurirkakuna, Estebanta wañuchingapa nispa. ⁵⁵ Paika, Santu Ispirituwa iuiaita iukaspas, sug luarma Taita Dios iapa suma punchalla kaskatasi kawarka. Chasallata, Taita Diospa alli ladu Jesús saiakugtasi kawarka. ⁵⁶ Chasa kawaspaka, nirka:

—Kawaichi. Suma luar, paskaskami ka. Runa Tukuska Jesuska, Taita Diospa alli ladu saiakugtami kawakuni.

⁵⁷ Chasa rimagllapi, tukuikuna, rinri taparispa, sinchi kaparispa, sugllasina kalparkakuna, paita apingapa. ⁵⁸ Nispaka, chi puiblumanda paita llugsichirkakuna, rumiwa piaspa wañuchingringapa. Estebanmanda kuntra willagkuna, manara rumiwa pai kallarispa, kataridirukunata Saulo suti musuta mingagrirkakuna. ⁵⁹ Chasa Estebanta rumiwa pianakuuraka, paika Iaia Jesusta nirka:

—Taitiku, nukapa ispirituta kamtami mingaiki—. ⁶⁰ Nispaka, kungurispa, sinchi kaparirka, kasa nispa— Taitiku, paikuna kai mana suma rurawaskakunamanda, paikunata mana imapas iuiaripuangi—. Chasa nispaka, wañurka.

8

Jesuswa tukuskakunata, Saulo puchukangapa munakugmanda

¹ Saulopas niska karka: “Estebantaka wañuchiimi chaiá”.

Chi punchallata, Jerusalemipi Jesuswa tukuskakunata puchukangapa iuiaiwa wasi wasi maskai kallarirkakuna. Chimanda tukui Jesuswa tukuskakunaka, Judea i Samaria suti alpa suiu mitikui kallarirkakuna. Chiwanka Jesús kikin agllaska runakuna, sapallami Jerusalemipi kidarkakuna. ² Taita Dioswa alli iuiarispa kag runakunaka, iapa wakaspas, Esteban wañuskata pambarkakuna. ³ Ikuti Sauloka, Jesuswa tukuskakunata puchukangapa iuiaillawami purikurka. Wasi wasi iaikuspa, kari i warmikunata aliuspa llugsichispa, karsilipi churachikurka.

Samaria alpapi, Alli Willaita willaskakunamanda

⁴ Jerusalemmanda llugsigkuna, tukuipimi Diospa Rimaita willaspa purii kallarirkakuna. ⁵ Chiura Felipeka, Samaria suti alpapi chaiagrispa, sug puiblupi rimai kallarirka, Jesús, Taita Dios agllaska Cristo kagta willaspa. ⁶ Chasa uiaspaka achkakuna, sugllasina tukuspa, ima Felipe rimakuskata allilla uiai kallarirkakuna, ñi pipas mana kawaskasina rurakugmanda. ⁷ Chiurakuna kuku wairakuna, achkakunapagmanda kaparispa llugsichii tukurkakuna. Sugkuna kuiuringapagllapas mana pudiskakunata, chasallata mana chakiwa puringapa pudiskakunatapas, achkakunatami aliachispa sakirkakuna. ⁸ Tukui chasa kawaskakuna, iapa alli iuiachiwa kuntintarirkakuna.

⁹ Chipi tiarka sug runa, Simón suti. Chi runa, ña unaimandata chi puiblupi paipa mana alli iuiaiwa ruraspa kaugsakurka. Kikinlla nikurka: “Nuka, tukuikunamanda mas iapa iachami kani”. Chasaka, tukui chipi kaugsanakuskata ujnachispasi kaugsakurka. ¹⁰ Paita manchariskasinasu suma iuianakurka. Atun taitakunapas paimanda ninakurka: “Paimi Taita Diospa iapa iachaiwa suma ruraku”. ¹¹ Ña unaimandata paipa mana alli iuiaiwa tukuikunata ujnachispa charikurka.

¹² Chasapi kaugsanakuspapas, Felipe Jesucristomanda i Diospa suma mandaita willag-samuskata uiaspaka, Jesuswa suma iuiarirkakuna. Nispaka, kari i warmi baugtisaríi tukurkakuna. ¹³ Kikin Simonpasmí, Jesucristomanda uiaspaka, suma iuiarigsamurka. Baugtisaríi tukuspaka, Felipewa puríi kallarírka. Felipe imaurapas mana kawaskasina rurakuskata kawaspa, iapa ujnarispa kawakurka.

¹⁴ Chiuramandaka, Jesús kikin agllaska runakuna Jerusalenpi kaskama iacharig-samurka, Samariamanda runakunapas Diospa Rimaita suma uianakugta. Chasa iacharig-samuuraka, Pedro i Juanta chi puibluma kacharkakuna. ¹⁵⁻¹⁶ Chi Samariamandakuna, manara Santu Ispirítuta chaskiska karkakuna. Iaia Jesuspa sutillawami baugtisariska karkakuna. Chasa kagmanda, Pedro i Juanka, chaiagrispa, Taita Diustami mañarkakuna, Santu Ispirítullatata paikunawa tukugsamuchu. ¹⁷ Nispaka, umapi maki churarkakunata. Chasawa, Santu Ispirítutami chaskirkakuna.

¹⁸ Simonka kawarka, paikuna maki churaura, Santu Ispirítuta chaskigtakuna. Chasa kawaspaka, paikunata kulki munachispa, ¹⁹ nirka:

—Nukatapas chasallata iachai karawaichi; chiwanka, nuka maikantapas maki churaspa, Santu Ispirítuta karai pudingapa.

²⁰ Pedroka ainírka:

—Kamba chi kulki kam kikinwantami puchukaringapa kangichi. Taita Dios kikin paipa Ispirítuta karangapa kachamuskata, ¿kamba kulkiwachu munakungi randingapa?

²¹ Kamka, kai nukanchi suma ruranakuskapi mana pudingichu chapuringapa. Diospa ñawipi, kam mana allilla iuiawami kangí. ²²⁻²³ Kawakuikimi, kam nukanchita llakirispa kawakugta. Kam kikin mana allilla ruraskakuna wataskasinami charinakú. Chasapaka, chi pandariikunata sakispa, atun Taita Diusta nii: “Nuka imasa umapi mana allilla iuiakuskata pasinsiawai”.

²⁴ Chiura, Simón ainírka:

—Atun Taita Diusta nukamanda mañapuaichi, nukata imasa niwaskasina mana pasari-wachu.

²⁵ Chi Jesús agllaskakuna, Iaia Jesusmanda Suma Rimaita chi puiblupi willaspaka, Samaria alpapi sug achka puiblukunatapas willaspa ialirkakuna, Jerusalenma kutinakuspa.

Etiópía alpamanda runa, Jesuswa tukuskamanda

²⁶ Felipetaka, atun Taita Diospa anjil nirka:

—Atarispa, alli makisinama rii. Jerusalenmanda Gaza suti puibluma ñambita rii—. (Chi ñambi, chusa sitaska alpallatami riraiá.)

²⁷ Chiura Felipe, atarispa, rírka. Chi ñambipika, Etiópía suti alpamanda sug runawa tupanakurka. Chi runa karka Kandase suti atun mandag warmipa aidag, kulkita wakachig. Jerusalenma riska karka, Taita Diusta kunguringapa. ²⁸ Kikinpa alpama kutikuspaka, kaballu aliudiru augtupi tiakuspa, Isaías suti Santu Ispirítuwa ñuggpamanda rimag ima willaraiaskata kawakurka. ²⁹ Felipewa chi runawa tupanakuura, Santu Ispirítuka paita nirka:

—Chi augtuma kaillaiagrii.

³⁰ Chiura Felipe, kalpa kaillaiagrispa, uiarka chi runa imasa uiarikuskata. Nispaka, tapurka:

—Chi kawakuskata, ¿iachangichu ima niraiagta?

³¹ Chiura, chi runaka ainírka:

—Ñi pipas mana iachachiwankunachu. Nigpika, ¿imasatak nuka iachasa?—. Nispaka, Felipeta mañarka— Diosmanda sikamui, sugllapi nukawa tiaringapa.

³² Nigpika, kasa willaraiaskatachu chi runa kawakurka:

Imasami ubija, wañuchii tukungapa apanakuura

i milma rutungapa kaura,

mana kapari:

chasallatami paika, wañuchii tukungapa apanakuura,

mana ñi ima rimarírka.

³³ Justisiakunaka, paita wabutispa, mana uiaspallami wañuchirkakuna.

Pai musu kagpita, kaugsaitami anchuchipurkakuna.

Chimandami wambra, mana paita tiapú.

³⁴ Chasa kawaspa willaura, chi runaka Felipeta tapurka:

—Diusmanda willawai: chi rimag, ¿kikinmandachu chasa rimarka; u sugmandachu nirka?

³⁵ Chasa willaraiaskata kawaspaka, Felipe chiuralla Jesusmanda willaspa, iachachii kallarírka.

³⁶ Chasa ñambi rinakuskapika, iaku tiaskapi chaiagrirkakuna. Chiura, chi runaka nirka:

—Kaipi iakumi tia. ¿Manachu nukatapas pudirintra baugtisawangapa?

[³⁷ Chiura, Felipe nirka:

—Jesucristowa kam suma iuiariska kagpika, baugtisariimi pudingi.

Chiura, chi runaka ainirka:

—Sumami iuiakuni, Jesucristo sutipa Taita Diospa wambra kagta—.]³⁸ Chasa nispaka, nirka— Augtuta saiachi.

Saiachiura, iskandikuna iakuma uraikuspaka, chi mandag runataka Felipe baugtisarka.

³⁹ Iskandikuna iakumanda llugsiura, atun Taita Diospa Ispirituwa diulpilla Felipeta aisaspa aparka. Chi mandag runa, paita mana mas kawarka. Chi runaka, iapa suma kuntintulla paipa ñambi rii kallarirka. ⁴⁰ Felipeka, Azoto suti puiblupi kawarigrirka. Chimandaka, puiblukuna suiu purispa, Jesusmanda Alli Willaita willaspa ialirka, Sesarea suti puibluma chaiankama.

9

Saulo, Jesuswa tukuskamanda

¹ Chiurakunaka Saulo, Iaia Jesuswa tukuskakunata wañuchispa puchukangapa iuiaillawami purikurka. Chasa iuiarispaka, iaia sasirduti iskribiska karta mañagrirka, ² Damasko suti puiblu judiukuna tukui tandariduru wasikunapi iaikui pudingapa; chikunapika, maikan kari i warmikuna Iaia Jesuswa tukuskakunata tarispa, apispa, Jerusalemata wataspa apangapa. ³ Chasa mañaspaka, ñambi rikuskapi, ñalla Damaskoma chaiagrangapa kaura, diulpilla awanigmanda paita punchaichigsamurka. ⁴ Punchaichigllapi, Sauloka alpapi urmagsamurka. Chiuraka, paita rimai uiarigsamurka, kasa nispa:

—Saulo, Saulo, ¿imapatok puchukawangapa iuiaillawa purikungi?

⁵ Chiura, Saulo tapurka:

—Kam Taitiku, ¿pitak kangi?

Chasa tapuura, chi rimagka ainigsamurka:

—Nukami kani Jesús. Nuka kikintami puchukawangapa iuiaillawa purikungi.

[⁶ Chasa uiaspaka, Saulo, dimanchai chugchuspa, tapurka:

—Taitiku, ¿imatak nuka rurangapa munakungi?

Chiura, Iaia Jesuska ainirka:]

—Atarispa rii. Chi puibluma iaikugrii. Chipimi kamta ningakuna, ima rurangapa chaiagta.

⁷ Saulowa sugllapi rinakugka, rimaita uiarkakuna. Kawaika, ñi pitapas mana kawarkakuna. Chimanda, iapa manchariska karkakuna.

⁸ Sauloka, alpamanda atariuraka, ñi ima mana ñawi kawangapa pudirka. Nigpika, paita makimanda apispa, Damaskoma pusarkakuna. ⁹ Kimsa punchami chipi karka, mana ñawi kawangapa pudi. Chi punchakuna, ñi ima mana mikuspalla upiaspallami karka.

¹⁰ Chi puiblullapita kausgurka Jesuswa tukuska runa, Ananías suti. Chi runataka Iaia Jesús, muskui ukupisina kawarispa, nirka:

—Ananías.

—Kaipimi kani, Taitiku— ainirka.

¹¹ Chiura, Iaia Jesuska nirka:

—Atarispa, Derecho suti ñambima rii. Judaspa wasima chaiagrii. Chipika, Tarso puiblumanda sug runa Saulo sutimi kanga. Chi runapas, kunauro Taita Diustami mañaku.

¹² Ananías suti runa iaikuspa, maki churagtami muskui ukupisina kawarka, ikuti kawai pudingapa.

¹³ Chasa uiaspa Ananiaska, Iaia Jestusta nirka:

—Taitiku, achkakunatami chi runamanda uiaspa kani, Jerusalemata kammandalla iuiarispaka kagkunata puchukangapa munakugta. ¹⁴ Chi runaka, kunauro iaia sasirdutikuna kachamusikasi samuku, kaipi tukui kamwa suma iuiarispaka kagkunata apispaka, wataspa apangapa.

¹⁵ Iaia Jesuska nirka:

—Kamka riilla. Paita, nukami agllarkani, mana judíu kaskakunata, paikunapa mandakunata i Israelmanda runakunatapas nukamanda willapuangapa. ¹⁶ Nukami paita kawachingapa kani, imasa pai kikin, nukamanda iapa llakiikuna iukangapa kagta.

¹⁷ Chasa uiaspa Ananiaska, Saulo kaskamami nirka. Chipi iaikugrispaka, Saulota maki churaspa, nirka:

—Waugki, Iaia Jesús, kam kikinta ñambipi samukuskata kawarirka; pai Jesusllatami nukata kachamuwarka, kam ikuti kawai pudingapa. Chasallata, Santu Ispiritupa iuiaitamí chaskingapa kangí.

¹⁸ Chasa nigllapika, Saulota ñawi wichkaraiaskamandami mapakunasina urmagsamurka. Chiura, ikuti allilla kawai pudirka. Nispaka, atarispa, baugtisarirka. ¹⁹ Mikuuraka, ikuti animupas chaiagsamurka.

Saulo, Alli Willaita willai kallariskamanda

Chiuramanda Saulo, Jesuswa tukuskakuna Damaskopi kaugsanakugwa sug punchakunami chisiarka. ²⁰ Chi punchakuna, judiukuna tandariduru wasikunapi Jesusmanda willai kallarirka, kasa nispa:

—Jesus, Taita Diuspa wambami ka.

²¹ Tukui paita uiagkuna, ujnarispa, ninakurka:

—Kai, ¿manachu ka Jerusalenpi Jesuswa tukuskakunata puchukangapa munakug? Pai kikinisi kaima samurka, Jesuswa tukuskakunata wataspa, iaia sasirdutikunapagma apanagapa.

²² Sauloka, mana manchaspalla, ñugpamanda librupi imasa willaraiaskasina iachachikurka, Jesús, Taita Dius agllaska Cristo kagta. Chasa iachachikuskamanda, Damaskopi kaugsag judiukuna, paipa rimaita ainingapa mana pudirkakuna.

Judiukuna paita wañuchingapa, Saulo kispiskamanda

²³ Achka punchakuna ialiuira, chi judiukuna, suglla iui ai tukuspa, rimanakurka, Saulota wañuchingapa. ²⁴ Pucha i tuta, chi puiblumanda llugsiduru pungukunapi chapaspa saianakurka, paita apispa wañuchingapa. Chitaka, Saulo iachagsamurka. ²⁵ Chasa iachaspaka, sug tuta Jesuswa tukuska runakuna, paita atun saparupi jundachispa, puiblu kincha awanigmanda alpama uraikuchimurkakuna. Chasapika, wañui kispirka.

Jerusalén puiblupi, Saulo kagriskamanda

²⁶ Jerusalén puibluma chaiagrispaka, Saulo munakurka, Jesuswa tukuskakunawa sugllapi kangapa. Chasa munakugpipas, tukuikuna paita manchanakurka. Saulo manima Jesuswa tukuska kagta iui anakurka. ²⁷ Chasa iui anakugpipas, Bernabeka, Saulopagma chaiagrispaka, Jesús kikin agllaskakunapagma pusarka. Paikunapagma chaiachigrispaka, willarka imasa Saulo, Damaskoma ñambipi rikuura, Iaia Jesús kawarispa, paita rimagta; chasallata Damaskopi mana manchaspalla Jesusmanda willakugta.

²⁸ Chiuramandaka Saulo, chi Jesuswa tukuskakunawa Jerusalenpi purii kallarirka. Chipika, mana manchaspallami Iaia Jesusmanda willai purikurka. ²⁹ Paika, judiukuna griego rimaiwa rimanakuskawa sinchi sug rigcha sug rigcha Jesusmanda rimanakurka. Chimandaka, chi runakuna iuiarinakurka, paita wañuchingapa. ³⁰ Chasa iachagsamuspa, Jesuswa tukuskakunaka paita pusarkakuna Sesarea puibluma. Chimandaka, Tarso puibluma paita kacharkakuna.

³¹ Chiurakuna, Judea, Galilea i Samaria alpakuna suiu, Jesuswa tukuskakuna sumaglla kaugsanakurka, mana pitapas manchaspalla. Pai kikinpura mas alli suma iui ai iuiachinakurka. Atun Taita Diusta suma manchaspaka kuianakurka. Santu Ispiritu paikunata sumaglla iuiachiskawa masmi miranakurka.

Eneas suti runa ambii tukuskamanda

³² Chikama Pedroka, Jesuswa tukuskakunata kawaspa purikurka. Purikuskapika, Lida suti puibluma chaiagirka, chipi kaugsanakuskatapas kawangapa. ³³ Chipika, Eneas suti sug runawa tupanakurka. Chi runa, mana kuirpu kuiuringapa pudi, pusag wata ungug sirikurka. ³⁴ Chi runataka, Pedro nirka:

—Jesucristomi kamta ambiku. Atarispa saiarri. Kam puñudiruta allichii.

Chasa nigllapi, Eneas atarispa saiarirka. ³⁵ Chasa kawaspa, Lida i Sarón puiblkunamanda tukui runakuna Iaia Jesuswami tukurkakuna.

Dorkas suti warmi ikuti kaugsariskamanda

³⁶ Jope suti puiblupika tiarka Jesuswa tukuska sug warmi. Chi warmi suti karka Tabita u Dorkas. (Chi niraianmi taruka.) Iapa allilla ruraspa, tukui ministidukunata aidaspa kaugsag warmimi karka. ³⁷ Chi warmika, Lida puiblupi Pedro kaura, sinchi ungui iukaspa, wañurka. Paita armachiskauramandaka, awa ladu wasi atun ukupi ialichispa churagrirkakuna.

³⁸ Jopemanda Lida puibluma mana iapa karu ringapa kanchu. Jesuswa tukuska Jopepi kaugsanakugka, allillami iacharkakuna, Pedro Lidapi kagta. Chimandaka, iska i runakunata Lidama kacharkakuna, “Utkalla Jopema samuchu” ningapa.

³⁹ Chaiagrispa willagrirkakuna. Chiura Pedroka, chi runakunawa rirka. Jopema chaiachigrispaka, paita pusarkakuna wañuska kaskama. Chi ukupi iaikugriuraka, tukui chipi kag sapalla kidaska warmikuna wakaspa kallarirkakuna, Dorkas kaugsaura kikin ruraska i katanga iukachiskakunata kawachingapa. ⁴⁰ Pedroka, tukuikunata kanchama

llugsichirka. Llugsichispaka, kungurispaka, Taita Diusta mañarka. Mañaskauramandaka, chi warmi wafuskata kawaspaka, nirka:

—Tabita, atarii.

Chiuralla, ñawi kawagsamurka. Pedrota kawaspaka, atarispaka, tiarirka. ⁴¹ Chiura Pedroka, makimanda apispaka, saiachirka. Nispaka, Jesuswa tukuskakunata i chi warmikunata kaiaspa, kaugsa kagtami kawachigsamurka. ⁴² Chasa pasariskakama, Jope puiblupi tukui kaugsanakuskapagpimi iacharigsamurka. Chimanda, achkakunami laia Jesuswa tukugsamurkakuna. ⁴³ Chiuramanda Pedro, achka punchakuna chi puiblupi chisiarka, Simón suti wagra kara jujuspa kurtidurpagpi.

10

Kornelio suti suldadukunata mandag, Jesuswa tukuskamanda

¹ Sesarea puiblupi tiarka sug mana judiu runa, Kornelio suti. Pai, Italiamanda suti suldadukunata mandagmi karka. ² Taita Diusta suma kuiaspa manchagmi karka, chasallata paipa wasipi tukui kagkunapas. Achka kulkiwa judiu ministidukunata aidadurmi karka. Tukui punchakuna, Taita Diusta mañadur karka. ³ Chi runataka, sug chaugpi chisima kaura, Taita Diuspa anjil, muskui ukupisina diulpilla iaikuspa, allilla kawarirka. Chi anjilka, paita nirka:

—Kornelio.

⁴ Chasa kawaspaka, Kornelio iapa mancharigsamurka. Nispaka, tapurka:

—Kam taitaka, ¿imatata munakungi?

Chiura, anjilka ainirka:

—Taita Dius, kam ima mañakuskatami uiarka. Chasallata, iapa ministidukunata kulki karakuskatami kawarka. ⁵ Kunauraka, kamba runakunata kachai Jope puibluma, Simón Pedro suti runata pusagringapa. ⁶ Chi runa, sug Simón suti wagra kara jujuspa kurtidurpa wasipimi ka. Chi Simonpa wasi, lamar iaku patallapimi saiaku.

⁷ Chi anjil rigllapi, Kornelioka, iskai paipa lutrinkunata i sug suldadu Taita Diuswa iuiarig paipa iapa kuiaspa kagtami kaiarka. ⁸ Chi runakunataka tukui ima anjil rimaskata willaspa, Jope puibluma kacharka.

⁹ Kaiandika, chi runakuna Jopema kaillaianakugriura, Pedroka, ña chaugpunchasina kaura, wasi awa ladu trujasinama sikarka, Taita Diusta mañangapa. ¹⁰ Paitaka iarkai apirka. Mikui munakurka mikungapa. Mikui ianunakunkama, paita muskui ukupisina kawarigsamurka, ¹¹ sug luar paskaska kagta. Chipika, sug atun linsusina tukui chusku puntakunata wataska uraikumukugsina kawarirka. ¹² Linsu ukupika, sug rigcha sug rigcha chusku chakiiug sachukumanda animalkuna, kulibrakuna i piskukuna tiagtasi kawarirka. ¹³ Chiuraka, Pedrota rimai uiarigsamurka:

—Atarispaka wañuchii, maikantapas kam mikungapa.

¹⁴ Pedroka ainirka:

—Taitiku, nuka mana munanichu. Nuka, ñi imaurapas chi mapasina niraiaskakunata mana mikuska kanichu.

¹⁵ Ikuti chi rimaika uiarigsamurka:

—Kikin Taita Diusmi kasa ni: “Maillaskasinami kankuna”. Chimandami niiki: kam mana iuiakui, chara mapasina kagta.

¹⁶ Kimsa biaji chasallata chasallata kawachispa rimagsamurka. Chiuramandaka linsu, awasinama tukuiwa sikarka.

¹⁷ Chasa kawaspaka, Pedro iapa iuiarii kallarirka: “Chi kawariwaska, ¿imasik niraiá?”. Chasa iuiarikunkama, Kornelio kachaskakunaka, Simonpa wasimanda tapuspa tapuspa, wasi punguma chaiagrirkakuna. ¹⁸ Chipi chaiagriskapa, tapurkakuna:

—Simón Pedro, ¿kaipichu kaugsá?

¹⁹ Pedro chara imasa kawaskamanda iuiakuura, Santu Ispirituka paita nirka:

—Kimsa runakunami kamta maskanakú. ²⁰ Nuka kachamuskami kankuna. Chimanda uraikuspa, paikunawa riilla, mana manchaspalla.

²¹ Chiura Pedroka, uraikuspa, chi runakunata nirka:

—Nukami kani kamkuna maskanakuska. ¿Imapatak samunakungichi?

²² Chiura ainirkakuna:

—Kornelio suti suldadukunata mandagmi nukanchita kachamurka. Pai runa, alli iuiag, Taita Diusta suma kuiaspa manchagmi ka. Paita, tukui judiukunami munankuna. Paitaka, Taita Diuspa tukuipi alli anjilsi nirka: “Kachai Pedrota pusagringapa, samuchu. Samuraka, uiankangimi imasami rimagsamú”.

²³ Chasa uiaspaka, Pedroka iaikuchirkakunata, pusada mañachingapa.

Kaiandika, paikunawa rirka. Jopemanda Jesuswa sug tukuskakunapas, sugllapi rirkakuna. ²⁴ Sug kaiandika, Sesarea puibluma chaiagrirkakuna. Chipika Kornelio, paipapurakunawa chaianakudiruwa tandachispa, paipa wasipi suianakurka. ²⁵ Chi wasima Pedro ña chaiagrikuraka, Kornelio tupangapa rirka. Tupanakuspaka, paita kungurirka. ²⁶ Pedroka atarichirka, kasa nispa:

—Saiarii. Nukapas, kamsina ianga runami kani.

²⁷ Chiuramanda, paiwa rimanakuspa, wasi ukuma iaikugrirkakuna. Chipika, achka runakuna tandariska kaskakunata kawaspa, ²⁸ Pedroka nirkakunata:

—Kamkuna allillami iachangichi: nukanchi judiukunata michanmi, sugkunawa ianga rimanakungapa, piur paikunapa wasima iaikugringapa. Chasa kagpipas, Taita Dios kikinmi willawarka, mana pitapas mapasina kagta kawangapa. ²⁹ Chimandami, kamkuna pusamuwangapa chaiagrigllapi, mana ñi ima piñarispalla samurkani. Chasamandami iachangapa munani: ¿imapatka kaiawanakungichi?

³⁰ Chiura, Kornelioka ainirka:

—Kasaurallatata, ña chusku punchami tukú; kai nukapa wasi ukupimi karkani. Mana mikuspalla, chisima Taita Diustami mañakurkani. Nigpika diulpilla sug runa, puncha katanga churariskami kawariwagsamurka. ³¹ Chi runaka niwarkami: “Kornelio, Taita Dios, kam ima mañakuskatami uiarka. Chasallata, iapa ministidukunata kulki karakuskatami kawarka. ³² Kunauraka, kamba runakunata kachai Jope puibluma, Simón Pedro suti runata pusagringapa. Pai runa, sug Simón suti wagra kara jujuspa kurtidurpa wasipimi ka. Chi Simonpa wasi, lamar iaku patallapimi ka”.

³³ —Anjil rimawagllapimi kacharkani, kamta maskagringapa. Kam, allillami rurarkangi, nukawa samungapa. Kunaura, tukuikunami kanchi Diospa ñawipi. Munanakunchimi, tukui ima atun Taita Dios kamta niskata uiangapa.

³⁴ Chiura, Pedroka nirka:

—Kunaura nuka sutipami iachani, Taita Diospa ñawipi, tukuikuna sug rigcha sug rigcha mana tiagta. ³⁵ Maikan runakunapas Taita Diusta suma kuiaspa manchaiwa iuiarispa allilla ruragkunata, chi runakunatami sutipa sumaglla kawá.

³⁶ —Taita Dios, ñugpamanda achala taita Israelpa wambrakunapa kati wambrakunata Jesucristowami rimagsamurka, runakuna paiwa sumaglla kaugsai tiangapa. Pai Jesús, tukuikunapa iaiami ka. ³⁷ Kamkuna, allillami iachangichi, Galilea alpa suiu, nispaka Judea alpa suiupas imasa pasarikuskata, Juan willaspa baugtiaspa purikusauramandata. ³⁸ Iachangichimi, imasa kikin Jesús, Nazaret puiblumanda kaspera, Taita Diusta Santu Ispirituwa chaskigsamugta; chasaka, tukui allilla pudingapa. Taita Dios paiwa kagmanda, allilla ruraspami purikurka. Maikanta iaia kukuwa pagtariskatapas anchuchispami purikurka.

³⁹ —Nukanchika, Judea alpa suiu i Jerusalén puiblupi tukui ima Jesús suma ruraskata kawaspa, sutipa willagkunami kanchi. Paitaka, kruspi klabaspami wañuchirkakuna. ⁴⁰ Paita chasa wañuchigpikunapas, Taita Dioska kimsa punchapika ikutimi kaugsachirka. Nispaka sakirka, nukanchita ikuti kawarigsamungapa. ⁴¹ Tukui runakunata mana kawarirkachu. Nukanchillatami kawarigsamurka. Nukanchitami Taita Dios ñugpamandata agllarka, chasa kawaskata willagkuna kangapa. Nukanchikar, Jesús ña wañuska kaugsarikauramandata paiwa mikuspa upiaspami karkanchi. ⁴² Chiuramanda paika, nukanchitami kachamurka, tukui runakunata kasa willangapa: pai Jesustami Taita Dios churarka, tukui kaugsai i wañuskakunata justisiangapa. ⁴³ Paimandami Santu Ispirituwa tukui ñugpata rimagkuna willaska niraiarka, kasa nispa: “Maikan paiwa suma iuiarigkuna, paikuna pandariskakunata pasinsiaimi tukungapa kankuna”.

⁴⁴ Pedro rimakugllapimi kikin Santu Ispiritu, tukui kaskakunapa sungupi iaikugsamurka. ⁴⁵ Jesuswa tukuska judiukuna Pedrowa chaiagriskakunaka, chi mana judiu kagkunapas Santu Ispirituta chaskigta kawaspa, iapa ujnarirkakuna. ⁴⁶ Chi runakuna, mana iachaska rimaikunawa rimanakuskata i Taita Diusta iapa suma kagta ninakuskata uiaspami chasa ujnarirkakuna.

Chiuramanda, Pedroka nirka:

⁴⁷ —Kai runakunapas, Santu Ispirituta ñami chaskirkakuna, nukanchisinallatata. Nigpika, ¿imamandata manara baugtisingakuna?—. ⁴⁸ Chasa nispa, nirka— Jesucristopa sutiwa baugtisiariichi.

Chiuramanda chipi kagkuna, Pedrotta mañarkakuna, paikunawa sug punchakuna chisiangapa.

11

Jerusalenpi Jesuswa tukuskakunata, Pedro willagriskamanda

¹ Jesús kikin agllaskakunata i Judeapi kaugsag Jesuswa tukuskakunata iacharigsamurka: mana judíu kagkunapas, Diuspa Rimaíta sumami uiarkakuna. ² Pedro ikuti Jerusalemna chaiagriuraka, Jesuswa tukuska sug judiukuna mana munanakurka, paikunapa ñugpamandakuna ima rurangapa iachachiskata sakingapa. Chimandami, paita piñaspa, ³ nirkakuna:

—¿Imapatak mana judíu kagkunata chaiakugringi? ¿Imapatak paikunawa sugllapi miku-kugringi?

⁴ Chiura Pedroka, pai ima pasaskata suumandata willai kallarirka, kasa nispa:

⁵ —Nuka Jope suti kaska puiblupi Taita Diusta mañakuuraka, muskui ukupisina kasami kawarkani. Sug atun linsusina tukui chusku puntakunata wataska, awamanda nuka kaskamami uraikumukurka. ⁶ Allillami kawarkani. Chi ukupika, sug rigcha sug rigcha chusku chakiiug sachukumanda animalkuna, kulibrakuna i piskukuna tiagtami kawarkani. ⁷ Chasa kawakuuraka, kasa rimaimi uiariwagsamurka: “Pedro, atarísapa wañuchii, maikantapas kam mikungapa”.

⁸ —Nukaka ainirkani: “Taitiku, nuka mana munanichu. Nuka, ñi imaurapas chi mapasina niraiaskakunata mana mikuska kanichu”.

⁹ —Chi suma luarmanda rimaika, ikuti uiariwagsamurka: “Kikin Taita Diusmi kasa ni: ‘Maillaskasinami kankuna’. Chimandami niiki: kam mana iuiakui, chara mapasina kagta”.

¹⁰ —Kimsa biaji chasallata chasallata kawachispa rimawagsamurka. Chiuramandaka chi linsu, awasinama tukuiwa sikarka.

¹¹ —Chiurallatata, kimsa runakuna Sesareamanda kachaskakunami nuka kaska wasima chaiagirrakuna, maskawagringapa. ¹² Chiura, Santu Ispirituka niwarkami: “Paikunawa riilla, mana manchaspalla”. Sugta nukanchi waugkindikuna kaipi kagkunapasmi nukawa rirkakuna. Chasa Sesareama chaiagrispaka, chi runakunata kachagpa wasipi iaiug-rirkanchi. ¹³ Chiura chi runaka, kasami nukanchita willai kallarirka: “Sug anjil nukapa wasipi saiakugtami kawarkani. Chi anjilka niwarka: ‘Kamba runakunata kachai Jope puibluma, Simón Pedro suti runata pusagringapa. ¹⁴ Pai runami rimagsamungapa ka, kam i tukui wasipi kagkuna imasa kispiringapa kagtakuna’.”

¹⁵ —Nuka chasa uiaspa, rimai kallariuraka, Santu Ispiritumi paikunapa sungupi iai-kugsamurka; imasami ñugpata nukanchipagma samuska karka: chasallata. ¹⁶ Iaia Jesús imasa nukanchita niskata chiurami uiariwagsamurka. Kasami niska karka: “Juan, iakullawami baugtisarka. Ikuti kamkunaka, Santu Ispirituwami baugtisai tungungapa kangichi”. ¹⁷ Nigpi, imasami nukanchi Iaia Jesucristomanda suma iuiaskakunata, Taita Dius paipa Ispirituta karagsamurka: chasallatami paikunatapas kararka. Nigpika nuka, ¿imatatak kani, Taita Dius kikin munakuskata: “Mana” ningapa?

¹⁸ Chasa uiaspa, Pedrotá piñaspa kagkunaka, upallaspa, Taita Diusta nirkakuna:

—Kam, iapa suma atunmi kangí—. Kasapasmi nirkakuna— Sutipami Taita Dius, mana judíu kagkunatapas kará; chasaka paikuna, pandariikunata sakispa, mana puchukaridiru suma kaugsaita iukangapa.

Antiokia puiblupi Jesuswa tukuskakunamanda

¹⁹ Estebanta judiukuna wañuchiskauramanda, tukui Jesuswa tukunakuskata wañuchingapa maskai kallariirkakuna. Chimanda sugkuna, Fenisia i Chipre suti alpakunama mitukurkakuna. Sugkunaka, Antiokia suti puiblumami chaiagirrakuna. Maimapas chaiagrispaka, judíu kagkunallatami Jesusmánda willanakurka. ²⁰ Ikuti sugkunaka, Antiokiamá chaiagrispaka, mana judíu kagkunatapasmi rimaspa, Iaia Jesusmánda willai kallariirkakuna. Chi runakuna, Chipremánda i Sirene puiblumandami karkakuna. ²¹ Chi runakunaka, atun Taita Diuspa iapa iachaita iukaspami Jesusmánda suma willanakurka. Chasa uiaspaka, achka runakunami, ñugpamanda iuiaikunata sakispa, Iaia Jesuswa suma iuiariirkakuna.

²² Jerusalemni Jesuswa tukuska runakunata chasa iacharigsamurka. Chiura, Bernabemá chi Antiokiamá kacharkakuna. ²³⁻²⁴ Pai runaka karkami iapa allí, tukuipi Jesuswa suma iuiag. Santu Ispiritupa iuiaitami iukarka. Paika, chi puibluma musuglla chaiagrispa, kawarka imasa Taita Dius paikunata sumaglla kawaska kagta. Chimandami paika sumaglla kuntintarirka. Nispa, tukui paikunatami suma iuiachispa nirka:

—Iaia Jesusta mana sakingichi. Paillawa iuiarispa kaugsangichi—. Chi punchakunaka, iapa achka runakunami Iaia Jesuswa tukugsamurkakuna.

²⁵ Chiuramanda Bernabeka, Tarso puibluma rirka, Saulota maskangapa. ²⁶ Chipi tarigrispaka, Antiokiamami paita pusarka. Chipi chaiagrispaka, sug intiru watami Jesuswa tukuskakunawa chisiagirrakuna. Achkakunatami Jesusmánda iachachirkakuna. Chi

Antioquia puiblupimi Jesucristowa tukuskakunata musuglla sutichii kallarirkakuna: “cristiano”.

²⁷ Chi punchakuna Santu Ispirituwa sug rimagkuna, Jerusalemanda chi puibluma chaiagrirkakuna. ²⁸ Chipi chaiagrigrupura sug, Agabo sutika, tukuikuna uianakuskapi saiarispa, Santu Ispirituwami rimarka, kasa nispa:

–Tukui alpapimi iapa iarkai tukugsamungapa ka—. (Imasa willaskasinami nispaka tukugsamurka, Klaudio suti Romapi iaia mandag kaura.)

²⁹ Chasa willaskata uiaspaka, Jesuswa tukuskakunaka nirkakuna:

–Manara iarkai chaiagpi, nukanchi kulki kachasunchi, Judeapi kaugsag Jesuswa tukuskakunamanda. Imasa pudiskasina, tukuikuna karangapa kachasunchi.

³⁰ Chasami rurarkakuna. Chi kulki tandachispaka, Bernabeta i Saulota kacharkakuna, paikuna, Judea alpama rispa, Jesuswa tukuska iacha taitakunata kuagringapa.

12

Santiago wañuchii i Pedro karsilmanda kispichii tukuskamanda

¹ Chi punchakuna, mandag Herodeska Jerusalemipi Jesuswa tukuskakunata puchukan-gapa iuiawi apichii kallarirka. ² Juanpa waugki Santiago sutitami ispadawa wañuchir-kakuna. ³ Chasa Herodes ruragmanda, judiukunaka ajai kuntintarigsamurkakuna. Chi-manda, Pedrotapasi apichirka. Tanda mana libadurawa mikudiru punchakunami paita apirkakuna. ⁴ Paita apichispaka, karsilpimi churachirka. Chi karsilpika, chusku chusku suldadukuna trukarispapa trukarispami kawanakurka. Herodes iuiakurka, paskua atun pucha ialiuira, Pedrotta llugsichispa, judiukunata kawachingapa, manara wañuchispalla.

⁵ Pedro karsilpi kaskata, suldadukuna allilla kawanakurka. Ikuti Jesuswa tukuska-kunaka, iapami Taita Diusta mañanakurka, Herodespa makimanda kispichii tungungapa.

⁶ Herodes kaiandi judiukunata kawachingapa iuiakuura, chi tutaka Pedro, iskai sulda-dukunapagma kadinakunawa wataska puñukurka. Sug suldadukunaka, karsil pungupi saianakurka. ⁷ Chiuraka diulpilla atun Taita Diospa anjil, karsilpi kawarigsamurka. Chi-ura, tukupi punchaiagsamurka. Chi anjilka, Pedrotta takachispa rigchachirka, kasa nispa:

–Utka atarii.

Chasa nigllapi, kadinakunaka Pedropa makimanda urmarkakuna. ⁸ Chiura, chi anjilka nirka:

–Chumbillirii. Chakikunapi churaridirutapas churarii.

Pedro chasa rurauraka, nirka:

–Kamba katariduru katangata katarispa, katiwai.

⁹ Chiuralla Pedro, anjilta katichispa, llugsirka, anjil chasa sutipa kagta mana iuiakuspa-lla. Iuiakurka: “Muskuichar muskukuni”. ¹⁰ Uku ladu kawag suldadukunata ialirkakuna. Ikuti sug pungupi kawanakuskatapasi ialirkakuna. Kanchama llugsingapa iru punguma chaiagriura, chi pungupasmi kikinlla paskarirka.

Llugsispa, sug kallima chaiagriura, chi anjil, Pedrotta sapalla sakirka. ¹¹ Chiura Pe-droka, muskuimanda rigcharigsina tukuspa, nirirka: “Kunaurami iachani, atun Taita Dioska paipa anjilta kachamuwagta, Herodespa makimanda i tukui judiukuna imasa jiru rurawungapa uianakuskatapasi kispichiwangapa”. ¹² Chasa iuiarispaka, María suti Juan Marcospa mamapagmamami rirka. Achka runakuna, chipi tandariska karkakuna, Taita Diusta mañaspa. ¹³ Chipi chaiagrispaka, kanchanigmanda punguta takachirka. Chiura sug sipas, Rode sutika, kaillaiagrirka kawangapa. ¹⁴ Pedropa rimaita uiaspaka, iapa kuntintarispapa, mana punguta paskaspalla, kalpalla rispa, ukupi kagkunata willagrirka:

–Pedromi pungupi saiaku.

¹⁵ Sugkunaka ainirkakuna:

–Uma tuntiariskami kangi.

–Sutipami uiarkani— chi sipaska nirka.

Chasa nikugpipas, nirkakuna:

–Pedro mana kangachu. Paipa anjillami kangapa ka.

¹⁶ “Pedroka manachar ka” ninakunkamaka, paika punguta mas sinchimi takachikurka. Punguta paskauraka, Pedrotta kawaspaka, iapa ujnarirkakuna. ¹⁷ Paika, makiwa kawachispa, upallachirkakunata. Nispaka, willarka imasa atun Taita Dios karsilmanda llugsichiska kagta. Kasapasmi nirka:

–Santiagota i waugkikunata chasa willapuagriichi—. Chasa rimaspaka, llugsispa, sug-sinama rirka.

¹⁸ Pakariuraka, suldadukuna, kawagrispa, mana iacharkakuna Pedro ima tukugta. Chi-manda, paipura iapa mancharirkakuna. ¹⁹ Herodeska kacharka, Pedrota maskagringa-pa. Mana maipipas taririgmanda, chi suldadu kawagkunata tapuchispaka, wañuchichirkakunata.

Mandag Herodes imasa wañuskamanda

Chiuramandaka Herodes, Judeamanda llugsispa, Sesarea puibluma kaugsangapa rirka. ²⁰ Chipika, Tiro i Sidón suti puiblukumamanda runakunawa iapa rabiariirka. Chi runakuna, Herodes mandakuska alpamandami tukui mikuikuna chaskinakurka. Chimandami iuiariirkakuna, Herodespagma ringapa. Herodes kaugsaskama chaiagrispaka, Blasto suti kati mandagta sumaglla rimarkakuna. Rimaauraka, chi runa, Herodesta mañapugrirka, Tiro i Sidonmanda runakunawa pasinsiachirinakungapa. ²¹ Herodeswa rimanakungapa niska puncha chaiauraka, pai Herodeska, iapa ujnachingasina kawari sumaiachiska katanga churarispapa, paipa suma mandadirupi tiarispapa, paikunata rimai kallarirka. ²² Chasa uiaspaka, chi runakuna kaparii kallarirkakuna:

—Kai rimag, runa mana kanchu. Diusmi ka.

²³ Paikuna chasa kaparigllapi, atun Taita Diuspa anjilka Herodesta sug ungui kachamurka, Taita Diusta pai atuniachingataka, pai kikinlla atuniachirispapa kagmanda. Chi ungui chaiauskawami wañurka, kaugsapita kurukuna mikui tukuspa.

²⁴ Iaia Jesusmanda willaskaka, mas sugnigta sugnigta iacharigsamurka. Chasa willaskata suma iuiarigkuna, masmi miraspapa rirkakuna. ²⁵ Bernabé i Sauloka, kulcita Jerusalemipi sakigrispapa, chimanda Juan Marcosta pusaspapa, ikuti kutirkakuna Antiokia puibluma.

SAN PABLO, DIUSPA RIMAITA WILLASPA PURI KALLARISKAMANDA

13

Bernabé i Saulo, Chipre alpapi kaskamanda

¹ Antiokia puiblupi Jesuswa tukuskakunapura, sugkuna karkakuna Santu Ispirituwa rimagkuna; sugkunaka, Diuspa Rimaita iachachigkuna. Chi runakuna suti karkakuna: Bernabé, Simón (paita, Iana nidur karkakuna), Sirene suti puiblumanda Lusio, atun mandag Herodeswa wiñaska Manaén suti i Saulo. ² Tukui chi runakuna, sugllapi karkakuna, mana mikuspalla, atun Taita Diusta mañaspapa i iapa suma atun kagta nispapa. Chiura, Santu Ispiritumi iuiachigsamurka:

—Nukami Bernabé i Saulota agllarkani, paikunaka tukuikunata willaspapa puringapapa. Chimanda, paikunata kachamuwaichi.

³ Chiura, mana mikuspalla, paikunamanda Taita Diusta mañaspapa, maki churarkakuna. Nispapaka, kacharkakunata.

⁴ Chiura Bernabé i Sauloka, imasa Santu Ispiritu kachaskasina Seleusia suti lamar iaku patamami rirkakuna. Chimandaka, barkupimi rirkakuna Chipre suti islama. ⁵ Salamina suti patamami chaiagririrkakuna. Chipika, judiukuna tandariduru wasikunapi Diuspa Rimaita willaimi kallarigrirkakuna. Juan Marcos, paikunawa sugllapi aidaspapa rikurka.

⁶ Chi alpa suui purinakuspa, Pafos suti puibluma chaiagririrkakuna. Chipika, sug judiu runa, Barjesús sutita tarigrirkakuna. Chi runa, mana alli iacha karka. Tukuikunata llullachispami kaugsakurka, “Nukami Santu Ispirituwa rimadur kani” nispapa. ⁷ Chi iachaka, chi alpapi mandag Serjio Paulo sutiwa sumaglla kaugsakurka. Chi mandag runa karkami iapa iuiaiug. Diuspa Rimaita uangapapa munakuspa, kacharka, Bernabé i Saulota pusangapapa. ⁸ Ikuti chi iachaka, paikunawa mana allilla tukuspa, mandagtaka nikurka:

—Imasa paikuna willanakuskata mana uiasunchi—. (Iacha kagmanda, suti kapurkakunata Elimas. Elimas niraianni iacha.)

⁹ Sauloka (Pablopas suti), Santu Ispirituwa iuiapi junda kaspapa, iachata suma kawaspapa, ¹⁰ nirka:

—Kam kangimi iapa llulla. Iaia kukusina iapa mana allilla iuiagmi kangi. Tukui allilla iuianakugwa kuntrami kangi. ¿Imapatak Taita Diuspa Rimaiakunata wabutispapa pandachikungilla? ¹¹ Kunaaurami atun Taita Dius, pai rabiariiska kamta kawachingapapa ka. Achka punchakunami indi punchaiachikuskata mana kawai pudingapapa kangi.

Chasa nigllapi, chi iachata ñawi tutaiagsamurka. Chasaka, mana kawai pudigsamurka. Nispapaka maskakurka, sug runa makimanda aisaspapa pusangapapa. ¹² Chasa kawaspapaka, chi mandag runa, iapa ujnarispa, Iaia Jesusmanda imasa iachachikuskata suma iuiariirka.

Pablo i Bernabé, Pisia alpapi kaskamanda

¹³ Pablo i paiwa purigkunaka, chi Pafos iaku patamanda barkupi llugsispa, Panfilia alpapi Perje suti puibluma chaiagririrkakuna. Chima chaiagriuraka, Juan Marcos, paikunata

sakispa, Jerusalemna kutirka. ¹⁴ Paikunaka, Perje puiblumanda llugsispa, Pisidia alpapi Antiokia suti puibluma chaiagrirkakuna. Chipika, warda puncha chaiaura, judiukuna tandariduru wasima iaikugrispa, tiarigrirkakuna. ¹⁵ Moisés ima rurangapa niraiaskakuna i Santu Ispirituwa imasa willaraiaskakunata uiachispaka, chipi taita kagkuna Pablo i Bernabeta mañarkakuna, kasa nispa:

—Taita waugkikuna, kamkuna, ima rimaita kaiپی kagkunata iuiachingapa munanakus-paka, kunaura rimaichi.

¹⁶ Chiura Pabloka, atarispա, makiwa upallachispa, nirka:

—Tukui Israelmanda taitakuna i mamakuna i Taita Diusta suma kuiaspa manchagkunapas, kasa uiawaichi.

¹⁷ —Nukanchi Israelmanda runakunapa Taita Dios, ñugpamanda taitakunata agllaspa, sumaglla kawarka, achka mirangapakuna, paikuna Ejipto alpapi ialigkunasinalla kaug-sanakunkama. Nispaka, paipa iapa iachaiwami chimanda llugsichirkakunata. ¹⁸ Chasa llugsichispaka, chusa sitaska alpapi mai chusku chungա wata paikuna mana allilla rurana-kugpipas, mana sitarkachu.

¹⁹ —Paikuna Kanaán alpama chaiagriuraka, Taita Dios, kanchis atun puiblupi kaugsanakuskata tukuikunata puchukarka. Chi alpataka nukanchipa ñugpamandakunata kararka. ²⁰ Sug chusku patsa pichka chungա wata ña ialiuramanda, alli iachag justisiakunatami churarka, Samuel suti Santu Ispirituwa rimag tiagsamunkama. ²¹ Samuel paikunawa kaura, paikunaka mañai kallarirkakuna, sug atun mandag tiachu. Chiura Taita Dios, ñugpamanda taita Benjaminpa iawarmanda kaska Sis suti runapa wambra Saul sutitami agllarka. Paika, chusku chungա watami atun mandag karka. ²² Chiuramanda, Saul mana allilla rurakugmanda, kichuspaka, Davidtami churarka, atun mandag kangapa. Pai Davidmandami Taita Dios kikin, Samuelwa rimarka, kasa nispa:

Isaipa wambra Davidmi nuka munaskasina runa kapuá.

Paimi tukui nuka imasa munaskasina rurapuungapa ka.

²³ —Davidpa wambrakunapa kati wambrakunamandami sug runa samurka, Israelmanda runakunata kispichingapa. Chasami Taita Dios, Davidmanda niska karka. Chi samuska runa suti kanmi Jesús.

²⁴ —Jesús manara kawarinkama, Juan Bautistaka tukui Israelmanda runakunata kaiakurka: “Pandariikunata sakispa, baugtisariichi”. ²⁵ Juan ña wañuchii tukungapa kauraka, nirkami: “Nuka mana kanichu kamkuna imasa nukamanda uianakuskasina. Nukapa katika, sugmi samungapa ka. Paita nuka mana pudinichu, kungurispa, paipa chakikunapi churaraiaska wataskata paskapungapagllapas”.

²⁶ —Taitakuna i mamakuna, ñugpamanda taita Abrahampa wambrapa kati wambrakuna i Taita Diusta suma kuiaspa manchagkunapas, chi kispichiimanda willaika, tukui kamkunamandami willaraiá. ²⁷ Jerusalemپی kaugsagkuna i paikunapa taitakunapas manima rigisirkakuna Jesús pi kagta. Tukui warda punchakuna Santu Ispirituwa rimagkuna willaskakunata uiaspapas, mana iacharkakuna ima niraiagta. Chimandami Jesusta mana rigsispalla wañuchichirkakuna. Chasawaka, imasa chi ñugpamanda librupi willaraiaskasinami tukugsamurka. ²⁸ Jesusta wañuchingapa munanakuura, ñi ima pandarii mana tarirkakuna. Chasa kagpipas, mandag Pilatosta rabiawa mañarkakuna, paita wañuchingapa. ²⁹ Pai kikin Jesusmanda tukui imasa ñugpamanda librupi willaraiaskasina tukugsamuraka, kruspi klabaraiaskamanda uraikuchispa, pambarkakuna. ³⁰ Chasa wañuskata, Taita Dios kikinmi paita kaugsachigsamurka. ³¹ Chiuramandami, Galilea alpamanda Jerusalemna paíwa sugllapi purinakuska kagkunata achka biañarkakuna, paita kwarigsamurka. Chi tukui kawagkunami kunaura runakunata paimanda willanakú.

³² —Nukanchipas, kasami kamkunata willanakunchi: Taita Dios imasami nukanchipa ñugpamanda achala taitakunata nirka, pai rurangapa: ³³ chika, kunaurami tukugsamurka, Jesús kikin kaugsariska. Chasallatami willaraiá, iskaima Salmopi kasa nispa:

Kam, nukapa wambrami kangi.

Nukami kuna puncha kaugsai karaiki.

³⁴ Kasapasmi niraiá:

Nuka imasami Davidta niska karkani:

chasa sutipami allilla rurangapa kani.

Chasa niska, kasami niraiá: Jesús wañuska kaskata kaugsachirka, paipa kuirpu mana ismungapa; chasaka, mana mas wañungapa. ³⁵ Chimandami ikuti sug Salmopipas kasa willaraiá:

Mana sakingapa kangichu,

kamba tukuipi iapa alli wambrapa kuirpu ismungapa.

³⁶ Davidka, Taita Dios imasa niskasina allilla ruraspա kaugsakuspapas, paika wañurkami. Nispaka, paipa ñugpamanda taitakunawami sugllapi pambarkakuna. Paipa kuirpupasmi

sugkunasinallatata ismurka. ³⁷ Ikuti Taita Dius kaugsachiskaka, paipa kuirpu manima wañuspa ismungapa kanchu.

³⁸ —Chimanda, taitakuna i mamakuna, kasa uiawaichi. Pai Jesusmandami kamkunapa pandariikunata pasinsiai tukungapa kangichi. Tukui ima Moisés rurangapa niraiaskawa mana pasinsiai tiagpipas, ³⁹ Jesuswa suma iuiariskawaka tukui mana pandarigmi niraiangichi. ⁴⁰ Chimanda, allilla iuiaringichi. ¡Ujalallapas kamkunata Santu Ispirituwa rimagkuna niskasina tukugsamuchu!

⁴¹ Uiawaichi, unzaspa rimadurkuna.

Mancharispami puchukaringapa kangichi.

Nukaka, kamkuna kawanakuura,

mana imaurapas kawaskasinami rurangapa kani.

Chasa ruraskata sugkuna willagpikunaka,

kamkuna manachar iuiarintrangichi chasa kagta.

⁴² Paikuna chi rimaikunata puchukaspa, tandariduru wasimanda llugsinakuuraka, paikunata mañarkakuna, kasa nispa:

—Ikuti sug warda puncha chaiaura samungichi, mas chi rimaikunallatata nukanchita willangapa.

⁴³ Chimanda llugsispa rinakuskapi, achka judiukuna i mana judiu paikuna iachachiskata ruragkunapas, Pablo i Bernabewa sugllapi rinakurka. Chi runakunata rimaspa iuia-chinakurka, Taita Diusta suma kuiaspa kaugsangapa, mana kungarispalla.

⁴⁴ Warda puncha ikuti chaiauraka, ñalla tukui chi puiblupi kaugsagkuna tandarirkakuna, Diuspa Rimaita uangapa. ⁴⁵ Sug judiukunaka, chituku achka runa chipi tandarirkakunata kawaspa, mana allilla iuiarista, rabiarkakuna. Pablota kamispa, nii kallarikakuna:

—Chasa mana kanchu. Kam llullakungimi.

⁴⁶ Pablo i Bernabeka, mana mancharispalla nirkakunata:

—Nukanchita chaikum, ñugpa kam judiukunata Diuspa Rimaita willagsamungapa. Kamkunaka, chi rimaita wabutista, mana munangichichu uangapa. Mana puchukariduru suma kaugsaitapasm kamkuna wabutinakungichi. Kunaoramandaka, mana judiu kagkunatami nukanchi Diuspa Suma Rimaita willagringapa kanchi.

⁴⁷ —Chasallatami atun Taita Dius nukanchita mingarka, kasa nispa:

Mana judiukunapa iuiaikunata punchaichigmi kapuangapa kang;

chasaka, kai alpa suiu kaugsanakuskata willangapa,

kispirichukuna.

⁴⁸ Chasa uiaspaka, mana judiu kagkunapas, kuntintarista, nirkakuna:

—Diuspa Rimaita, iapa sumami nukanchita uiarirka—. Mana puchukariduru suma kaugsaita iukangapa agllai tukuskakunami Iaia Jesuswa suma iuiarirkakuna. ⁴⁹ Tukui chi alpapi, Iaia Jesusmanda willai allillami iacharikurka.

⁵⁰ Pablo i Bernabé rimanakuskata mana uangapa munag judiukunaka, Taita Diusmanda iuiarista chipi kaugsag mamakunata i chi puiblupi kaska taitakunatapas iuiachig-rirkakuna, kasa nispa:

—Pablo i Bernabeta kaimanda imasapipas llugsichipuaichi.

Chasa mañaskawaka, llugsichingapa pudirkakuna. ⁵¹ Pablo i Bernabeka, llugsispa rinakuskapi, paikunapa chakipi alpa llutariskata chabsirkakuna; chasawaka kawachingapa chimanda runakuna iapa pandariska kagtakuna. Nispaka, Ikonio suti puibluma rirkakuna. ⁵² Antiokia puiblupi kaugsag Jesuswa tukuskakuna, Santu Ispirituwa iuiaipi junda kaspa, iapa suma alli iuiaia kuntintarirkakuna.

14

Pablo i Bernabé, Ikonio puiblupi kaskamanda

¹ Ikonio puiblupi chaigrispa, Pablo i Bernabeka judiukuna tandariduru wasipi iaug-rirkakuna. Chipi tukui suma rimauraka, achka judiukuna Iaia Jesuswa suma iuiarirkakuna. Mana judiu kagkunapas, achkakunami paiwa tukugsamurkakuna. ² Ikuti Jesuswa mana iuianakug judiukunaka, mana judiu kagkunata ninakurka:

—Pablo i Bernabé, mana allilla iachachinakunchu.

³ Unaimi chi puiblupi chisiarkakuna. Iaia Jesuswa iuiarista, mana manchaspallami paimanda willanakurka. Iaia Jesús kikinmi paikunata karamurka, imaurapas mana kawaskasina ruraspawachingapa; chasawaka, paikuna Taita Diuspa suma kuiaimanda rimanakuska sutipa kagta iachangapa. ⁴ Chiwanka, chi puiblupi kaugsagkunaka iskaima

tukurkakuna; sugkuna, Jesús agllaskakunawa; ikuti sugkunaka, mana Jesuswa iuianakuska judiukunawa. ⁵ Chi mana Jesuswa iuianakug judiukunaka, mana judíu kagkunawa i chi puiblupi kaska taitakunawa sugllasina iuiarirkakuna, kasa nispa:

–Pablo i Bernabeta chaiakumi, kamispa, rumiwa piaspaspa wañuchingapa.

⁶ Chasa iachaspa, paikunaka mititirkakuna Likaonia suti alpama. Chi alpapi chaiagrispaka, Listra i Derbe suti puiblupunapi i chi suiu ⁷ Cristomanda Alli Willaita willaspa purigrirkakuna.

Listra puiblupi, Pablota rumiwa piaskakunamanda

⁸ Listra puiblupika tiarka sug runa, tiagsamuskauramandata mana chaki kuiuchingapa pudig. Manima imaurapas saiariska karka. Chi ungugka, Pablo ima rimakuskata uiaspa, chi ladullapi tiakurka, ⁹ kasa iuiarispaspa: “Chi Jesuswami aliachiwangapa ka”. Chasa iuiakuskata kawaspaka, ¹⁰ Pablota sinchi rimaspa nirka:

–Kamba chakiwa allilla saiaríi.

Chasa nigllapi, chi runa saltaspa saiarirka. Nispaka, purii kallarirka.

¹¹ Pablo ima ruraskata tukui kawagkunaka, Likaoniamandakunapa rimaiwa kaparii kallarirkakuna, kasa nispa:

–Nukanchipagma diuskunami uraikumirkakuna, runakunasina tukuspa–. ¹² Bernabemanda ninakurka: “Zeus iaia diuschar ka”. Pablo rimaiwa kagmanda, paimanda ninakurka: “Ermes diuschar ka”.

¹³ Chi puibluma iaikuduru pungui tiarka Zeusta iuiariduru wasi. Chiuraka Zeusta kungurig sasirdutika, wagrakunata tugtukuna llaugtuchispa, apaspa, tukui chipi kagkunawa munanakurka, wagrakunata wañuchispa rupachingapa; chasaka, Pablo i Bernabeta diustasina kunguringapa. ¹⁴ Chi Jesús agllaskakunaka, chasa kawaspa iachaspaka, iapa llakii tukurkakunata. Chimanda, kikinkunapa katangakunata llikichirirkakuna. Nispaka, paikuna kaskapi chaugpirispa chaugpirispa rirkakuna, kasa kaparispa:

¹⁵ –Waugkikuna, ¿imapak chasa runanakungichi? Nukanchipas, kamkunasinna ianga runakunami kanchi. Kamkunata kai Alli Willaita willangapami samurkanchi, kamkuna kai ianga kawariska ruraikunata sakispa, sutipa kaugsa Taita Dius tiaskawa tukugsamungapakuna. Paimi ka sug luarta, kai alpa luarta i lamar iakuta rurag. Tukui ima chikunapi tiaskakunapas, paillatatami ruraska ka. ¹⁶ Ñugpataka, tukui runakunatami sakiska karka, kikinkunapa imasa iuiariskasina kaugsangapa. ¹⁷ Chasa kaugsangapa sakispapas, paika allilla ruraspami kawachiduru karka, pai suma kaugsag kagta. Tamia kachamuduru; chasallata, tarpuskakuna wiñachispa suma pallai karamuduru; chasaka nukanchi, mikuspa, alli iuiachiillawa kaugsanakungapa.

¹⁸ Chasa iuiachinakugpipas, mana munanakurka uiangapa. Munanakurkami chi wagrakunata wañuchispa, rupachispa, diustasina kunguringapaglla.

¹⁹ Chi punchakuna, Antiokia i Ikonio puiblukunamanda judiukuna chi Listra puibluma chaiagrirkakuna. Chaiagrispaka, Listramanda runakunata imasa rimaspapas iuiachirkakunata, Pablota rumiwa piaspaspa wañuchingapa. Chasa piaspaka, iuianakurka: “Wañuchirkanchimi”. Chasa iuianakuspa, paita aliupasa, puiblu manancha karullapi sitagrirkakuna. ²⁰ Jesuswa tukuskakunaka, katichispa, Pablo kaskapi chaiagrispa muiuchirkakuna. Chiura paika, allilla tukuspa, atarirka. Nispaka, ikuti puibluma iaikugrirkakuna. Kaiandika, Bernabewa llugsispa, Derbe suti puibluma rirkakuna. Chipi chaiagrispaka, ²¹ Alli Willaita willai kallarirkakuna. Chasa uiaspaka, achka runakuna Jesuswa tukugsamurkakuna.

Chimandaka, Listra, Ikonio i Antiokiana kutirkakuna. ²² Chi puiblukunapika Jesuswa tukuskakunata suma rimaspa, nirkakunata:

–Iaia Jesuswa allilla iuiarinakuspalla kangichi, mana sakispalla–. Kasapasmí nirkakunata– Nukanchita chaiakumi, achka llakii iukangapa, Dius suma mandakuskapi manara iaikugrinkama.

²³ Chi puiblukunapi Iaia Jesuswa tukuskakunamanda agllarkakuna, maikanpas iacha taitakuna kangapa. Mana mikuspalla Taita Diusta mañaspa chisiarirkakuna. Nispaka, chi agllaskakunamanda mañapurkakunata, kasa nispa:

–Iaia Jesús, kai kamwa iuiarinakugta sumaglla kuiaspa kawapuangi.

Pablo i Bernabé, Siria alpapi Antiokia puibluma kutiskakunamanda

²⁴ Písidia alpa suiu ialispaka, Panfilia alpama chaiagrirkakuna. ²⁵ Chi alpapika, Perje puiblupi Iaia Jesusmanda Alli Willaitami willai kallarirkakuna. Nispaka, Atalia suti lamar iaku patama rirkakuna. Chimandaka, barkupi iaikuspa, Antiokia puibluma kutirkakuna.

²⁶ Chi puiblumanda paikuna manara llugsigllapi, chipi Jesuswa tukuskakuna paikunamanda Taita Diusta mañaska karkakuna, paipa kuiaiwa sumaglla kawapuachu. Ña tukui puchukaspaka, chimallatata kutirkakuna. ²⁷ Chipi chaiagrispaka, Jesuswa tukuskakunata

sugllapi kangapa tandachigrirkakuna. Nispaka willarkakuna, tukui imasa Taita Dios paikunawa suma ruragtakuna. Kasapasmi willarkakuna:

—Mana judíu kagkunatapasmai Taita Dios agllarka, Jesuswa suma iuiaringapa.

²⁸ Unaimi chi Jesuswa tukuskakunawa chisiarkakuna.

15

Jerusalenpi, Jesuswa tukuskakunapa taitakuna tandariskakunamanda

¹ Antiokiapi Pablo i Bernabé chisianakuura, sug runakuna Judea alpamanda chi pui-bluma chaiagrirkakuna. Chipika, Jesuswa tukuskakunata iachachii kallarirkakuna, kasa nispa:

—Kamkuna, Moisés imasa niskasina mana marka churachirigpika, mana kispiriskami niraiankangichi.

² Pablo i Bernabeka, chasa iachachinakuskata uiaspaka, sinchi nirkakunata:

—Mana allilla kanchu—. Chimandami paikunawa piñachirinaku tiarka.

Chimandaka chipi Jesuswa tukuskakuna, Pablo i Bernabeta i kikinpuramanda sugkunapas agllarkakuna, Jerusalenma tukuska kagtakuna. Tukui chi uiagkunapas, kuntintarisa uiarkakuna.

³ Antiokiapi Jesuswa iuianakug kachai tukuskakunaka, Fenisia i Samaria suti alpa suiu ialigrirkakuna, chi alpa suiu Jesuswa tukuskakunata willaspa imasa mana judíu kagkunapas Taita Dioswa tukuska kagtakuna. Tukui chi uiagkunapas, kuntintarisa uiarkakuna.

⁴ Paikuna Jerusalenma chaiagriuraka, Jesuswa tukuskakuna, pai agllaskakuna i iacha taitakunapas sumaglami chaskirkakuna. Chiura, Pablo i Bernabeka willarkakuna, tukui imasa Taita Dios paikunawa ruraskamanda. ⁵ Chasa uiaspaka, sug fariseokuna Jesuswa ña tukuska kagkunaka, saiarispa nirkakuna:

—Chi mana judíu Jesuswa tukuskakunataka chaiakumi ningapa, judiukunapa marka churachirichukuna i Moisés imasa niskasina ruraspaka kausachukuna.

⁶ Chasa uiaspa, Jesús agllaskakuna i iacha taitakunaka tandarirkakuna, chi rimanakuskamanda allilla iuiaringapa. ⁷ Na unai rimanakuura, Pedroka saiarispa nirka:

—Taita waugkikuna, ñami iachangichi: Taita Dios, ña unaimi kam kikinpuramanda nukata agllawarka, mana judíu kagkunapas, Alli Willaita uiawaspa, Jesuswa suma iuiaringapa. ⁸ Taita Dios tukuikunapa iuiaita rigsiga, Santu Ispirituta nukanchita karaska kagmi chasallata paikunatapasa kararka; chasaka, paikunatapasa chaskiska kagta kawachingapa.

⁹ Paikuna Jesuswa suma iuiariskakunamandami paikunatapasa pandariikunata pasinsiarka. Chasawami kawachirka, paikunawa i nukanchiwa mana sug rigcha sug rigcha kagtakuna. ¹⁰ Chasa kagmandaka, *zimapatak* kunauraka Taita Dios ima ruraskamanda mana allilla rimanangungichi? Ñi nukanchipa ñuwpamanda taitakuna ñi nukanchipas mana pudinurkanchichu, Moisés tukui ima niskata ruraspaka kausangapa.

¹¹ Kasami suma iuianchi: Iaiá Jesús nukanchita iapa suma kuiaskamandallami nukanchi kispichiriska kanchi. Chasallatami chi mana judíu kagkunapas kispichiriska kankuna.

¹² Chasa uiaspaka tukui chipi kagkuna, ñi ima mana ainispalla, upallami tianakurka. Bernabé i Pablo imasa willanakuskatami uiái kallarirkakuna. Paikuna willanakurka imasa, mana judíu kagkunapagpi, ñi imaurapas mana kawaskasina Taita Dios paikunawa ruragta.

¹³ Paikuna ña rimai puchukaura, Santiagoka nirka:

—Taita waugkikuna, uiamuichi. ¹⁴ Simón Pedromi nukanchita willaku, imasami Taita Dios, sug mana judíu kagkunatapasa agllai kallarirka, paipa runakuna tukungapa. ¹⁵ Chasallatami Santu Ispirituwa ñuwpamanda rimagkuna willarkakuna, kasa nispa:

¹⁶ Chiuramandami nuka, kutimuspa, Davidpa wasi urmaskata ikuti sumaglla saiachigsina ruragsamusa.

Chi waglichiska wasita ikutimi saiachigsina rurasa.

¹⁷ Chasawaka kawaringami, tukui puchuska runakunapas atun Taita Diusta maskanakungapa kagtakuna.

Chasallata, tukui nuka agllaska mana judíu kagkunapas samungapami kankuna, paita maskangapa.

¹⁸ Atun Taita Diosmi paipa rimaita mana ialingapa ni.

Imasami ñugpamandata willaska karka:
chasami tukungapa ka.

¹⁹ Kasapasmi Santiago nirka:

–Chimandami nukapa iuiiipi nini: mana judíu kagkuna Taita Dioswa tukuskakunata mana nisunchi, Moisés imasa sakiskata rurachukuna. ²⁰ Kasalla nisunchi: “Ianga dius niraiaskakunata kamariku karaska aichata mana mikuchukuna; mapasinami niraiá. Kari warmiwa mana pandarichukuna. Sipiska wañuchiskakunapa aichata mana mikuchukuna. Iawartapas mana upiachukuna”. ²¹ Moisés ima niskata iachachigkunaka, tukui puiblu suiumi ñugpamandata tia. Chi willaraiaskataka judiukuna tandariduru wasikunapi tukui warda punchakunami willanakú.

²² Chasa uiaspa, Jesús agllaskakuna, iacha taitakunapas i Jesuswa tukui tukuskakunaka iuiarigsamurkakuna, paikunapuramanda iska runakunata agllaspa, Pablo i Bernabewa Antiokia puibluma kachangapa. Chimanda, Judas Barsabás i Silas sutikunatami agllarkakuna, paikuna taitakuna kagmanda.

²³ Chi runakunawa, kasa willaraiaska kartatami kacharkakuna:

“Kam taitakuna i mamakuna, mana judíu kagkuna, Antiokia puiblupi i Siria i Silisia alpakuna suiu kausagkunata, nukanchi Jesús agllaskakuna i iacha taitakunami, ‘Puangi’ ninchi.

²⁴ “Kaipimi iacharigsamurka, kaimanda sug runakuna nukanchi mana kachaskakuna kamkunapagma rigtakuna. Paikunapa rimaiwaka kamkunata manchachispa i tuntiachispa sakirkakuna. ²⁵ Chimandami tukui nukanchika, suglla iuiiwa tukuspa, allilla iuiarirkanchi, nukanchipuramanda iska runakuna agllaspa, kamkunapagma kachangapa. Nukanchipa iapa kuiaska Bernabé i Pablowami sugllapi kachanakunchi. ²⁶ Paikuna, wañuita mana manchaspallami maipipas purinkuna, nukanchipa Iaia Jesucristomanda willaspa. ²⁷ Chasa iuiarispami Judas i Silasta kamkunapagma sugllapi kachanakunchi, paikuna tukuimanda kamkunata allilla willagringapa.

²⁸ “Santu Ispiritumi nukanchita iuiachirka, kasa ningapa: kai ministiskakunallata kamkuna rurangapa: ²⁹ ianga dius niraiaskakunata kamariku karaska aichata mana mikungapa; iawarta mana upiangapa; sipiska wañuchiskakunapa aichatapas mana mikungapa; kari warmiwa mana pandaringapa. Nukanchi ima rimaskata allilla uiaspaka, allilla ruraspami kausankangichi. Kipakama”.

³⁰ Chi kachai tukuskakunaka, Antiokiama chaiagrispa, tukui Jesuswa tukuska chipi kausanakuskata sugllapi tandachispa, chi kartata kuarkakuna. ³¹ Chi kartata kawaspaka, tukuikuna chi sumaglla iuiachiiwami iapa kuntintarirkakuna. ³² Judas i Silaspas, Santu Ispirituwa rimagkuna kaspas, chi Jesuswa tukuskakunata sumaglla rimaspa, animuchirkakuna, kasa nispa:

–Ñi imaurapas mana Jesusta kungaringichi.

³³ Paikuna, achka punchakuna chipi chisiarkakuna. Chiuramanda chi Jesuswa tukuskakunaka, sumagllami “Pai Siñur” nispa, kuntintulla kacharkakuna paikunata kachaskakunapagma. [³⁴ Silaska iuiarirka, mas punchakuna chipi chisiangapa. Chasaka, Judasllami Jerusalenma kutirka.] ³⁵ Pablo i Bernabepas, chi Antiokia puiblupi sug punchakuna chisiarkakuna. Paikuna, miraspa, achkakuna tukuspa, Iaia Jesusmanda Alli Willaita willaspa iachachispami karkakuna.

DIUSPA RIMAITA WILLASPA, PABLO PARISMA PURISKAMANDA

Bernabé, Pablopagmanda sugma riskamanda

³⁶ Sug punchakuna ialiuira, Pabloka Bernabeta nirka:

–Iaia Jesusmanda Alli Willaita tukui puiblukunapi willaskakunama ikuti risunchi, paiwa tukuskakuna imasa kaskata ikuti kawangapa.

³⁷ Bernabé chiura munakurka, Juan Marcosta paikunawa sugllapi pusangapa. ³⁸ Chi Marcos, ñugpata Panfilia alpapi paikunata sakispa, mana mas paikunawa ringapa munaska karka, Alli Willaita willangapa. Chasa kagmanda, Pablotaka iuiarirka, mana Marcoswa sugllapi puringapa. ³⁹ Paipura piñachinakurka. Chimandami chiuramanda mana sugllapi purirkakuna. Bernabé, Marcosta pusaspa, barkupi iaikuspa, Chipre alpama rirkakuna. ⁴⁰ Ikuti Pabloka, Silasta agllarka. Jesuswa tukuskakuna paikunamanda atun Taita Diusta mañaskauramanda, chimanda llugsirkakuna. ⁴¹ Siria i Silisia alpakuna suiu, Jesuswa tukuskakunata suma iuiachispa purigrirkakuna.

16

Pablo, Timoteota paiwa puringapa agllaskamanda

¹ Derbe puibluta ialispa, Lистра puibluma chaiagrirkakuna. Chipika, Timoteo suti runawa tarinakurka. Chi runa, Jesuswa tukuska karka. Paipa mama, judiami karka, Jesuswa suma iuiag. Taitandika, mana judiumi karka. ² Lистра i Ikonio puiblukunapi kaugsag Jesuswa tukuskakuna, Timoteomanda sumagllami rimanakurka. ³ Pablota munakurkami, Timoteoka nukawa purigrichu. Tukui judiukuna chi suiu kaugsagkuna iacharkakuna, chi runapa taita mana judiu kagta. Chimanda Pablota, judiukunapa marka Timoteota churachirka; chasaka, judiukuna sumaglla allilla iuiawi kawanakungapa.

⁴ Tukui puiblukunapi ialinakuspa, Jesuswa tukuskakunata willarkakuna, imasa Jesús kikin agllaskakuna i iacha taitakuna Jerusalenpi rimagtakuna, mana judiukuna imasa kaugsangapa chaiagta. ⁵ Chasaka Jesuswa tukuskakuna, tukui punchakunami mas suma iuiai aparkakuna. Chiwami mas miraspa miraspa rirkakuna.

Masedonia alpamanda runa, muskui ukupi Pablota kawariskamanda

⁶ Santu Ispíritu mana Pablota sakirka, Asia alpa suiu Diospa Rimaita willagrungapa. Chimanda, Frijia i Galasia suti alpakunapi ialirkakuna. ⁷ Misia suti alpama chaiagrispaka, Bitinia suti alpama ialingapa munanakurka. Chasa munanakuggipapas, Jesuspa Ispirituka mana sakirkakunata, chima iaikungapa. ⁸ Chimanda, Misiapi ialispa, Troas suti lamar iaku patama chaiagrirkakuna.

⁹ Chipika sug tuta puñukuspa, Pablota muskurka, Masedonia suti alpamanda sug runa saiakugta. Chi runaka, mañaspa, Pablota nirka:

—Kai Masedonia alpama ialimui. Nukanchita aidagsamui.

¹⁰ Pablo muskui ukupi chasa kawaskawaka iuiariranchi: “Taita Dios, nukanchita sutipami kaiaku, Masedoniamanda runakunata Alli Willaita willagrungapa”. Chasamanda allichiriranchi, chima ringapa. ¹¹ Barkupi iaikuspaka, dirichumi riranchi Samotrasia suti islama. Kaiandika, Neápolis suti patama chaiagriranchi. ¹² Chimandaka, chakiwa riranchi Filipos suti puibluma. Chi puiblu kanmi Romamandakuna mandadiru. Chi Filipos puiblu, Masedonia alpa suiumanda mas atunmi ka. Mailla punchakunami chipi chisiariranchi.

¹³ Chi puiblumandaka, sug warda puncha chaiaura, iaku pata patami puringapa riranchi, iuiaspa: judiu runakuna tandaridiruchu tarinchi; chipika, Taita Diosmanda iuiaringapa. Chipimi tiarigriranchi. Nispaka, Alli Willaita warmikuna tandariskakunata willai kallariranchi. ¹⁴ Sug paipura, Lidia suti, Tiatira suti puiblumanda chipi karka, suma puka tila katudur, Taita Diusta suma manchiwa iuiarispa kaugsadur. Pai warmi Pablota uiakuuraka, atun Taita Dios suma iuiaita kararka, imasa willakuskata allilla chaskingapa. ¹⁵ Chasaka, tukui paipurakuna chi wasimanda baugtisarirkakuna. Nispaka, nukanchita mañaspa, nirka:

—Nuka Iaia Jesuswa sutipa tukuska kagta iuiawaspaka, samuichi. Nukapa wasipi chisiagsamuichi—. Chimandami nukanchita chaiarka, chipi kidaringapa.

Karsilta kawag runa, Jesuswa tukuskamanda

¹⁶ Chiuramanda, kasami pasarirka. Nukanchi Taita Diusta rimadiruma rinakuskapi, sug lutrinsina sipaswami tupanakurkanchi. Chi sipas, kuku waira iaikuskami karka. Chasaka, imapas mana iachariskatami willadur karka. Chi willaikunawaka iapa achka kulkimi paipa mandagkunamanda ruradur karka. ¹⁷ Chi sipaska, Pablota i nukanchita katichiraiarka, kasa kaparispa:

—Kai runakuna kankunami tukuimanda mas atun Taita Diospa lutrinsinakuna. Pai-kunami kamkunata willangapa kankuna, imasa kispiringapa kagtakuna.

¹⁸ Achka punchakunami chasallata kaparispa kaparispa katichiraiarka. Chimanda Pablota, rabiarispa, tigrarispa, kuku wairata nirka:

—Jesucristopa sutiwami niiki: “Kai sipasmanda llugsii”.

Chasa rimagllapi, llugsirka.

¹⁹ Chi sipasta mandagkunaka, chasa kawaspa, nirkakuna:

—Kunauramanda, nukanchi mana maschar kulki chaskisunchi—. Chasa rimarispa, Pablota i Silasta apispa, atun kallima aparkakuna justisiakuna kaskama. ²⁰ Justisiakunapa ñawipi saichispaka, nirkakuna:

—Kai judiu runakuna kaspa, nukanchipa puibluta iapami killachispa purinakú. ²¹ Sug rigcha iuiaikunatami iachachinakú. Nukanchita mana chaiakunchu, Romamanda kaspa, paikuna iachachiskata iachaikuspa rurangapa.

²² Chiura tukui chipi kagkuna, Pablota i Silasta piñaspa kamispa aparkakuna. Justisia-kunapas nirkakuna:

—Paikunata katanga anchuchispa, kaspi chagllawa asutiichi—. ²³ Achka asutispaka, karsilpi wichkarkakuna. Karsilpi kawagtaka nirkakuna— Paikunata allilla kawangi—.

²⁴ Chasa uiaspa, chi kawagka mas ukuma paikunata wichkagrirka. Chipika, paikunapa chakikunata kabildusina kaspi utkupi churaspa, wataspa sakirka.

²⁵ Chaugpi tutaka Pablo i Silas, Taita Diusta suma kantaspa iuiarinakurka. Sugkuna karsillapita kagkunapas, kantanakuskata uianakurka. ²⁶ Diulpillakar, alpa iapa sinchi kuiurigsamurka. Karsil saiakuska rumikunapas, chugchurigtami kuiurigsamurka. Chasa kaura, tukui pungu paskarirkakuna. Kadinakunapas, tukui karsilpi kagkunapa makikunamanda urmarkakunata.

²⁷ Karsilta kawag, rigcharispa, tukui pungukuna paskaraiaskata kawaspaka, iuiarirka: “Karsilpi kagkuna, tukuikunachar mitikuwarkakuna”. Chasa iuiarispaka, dimanchai ispada aisarka, wañuchiringapa. ²⁸ Pabloka, sinchi kaparirka, kasa nispa:

—Mana imapas rurarikui. Tukuikunami kaipi kanchi.

²⁹ Chiura karsilta kawag, punchaiachidiru mañaspa, Pablo i Silaspagma kalpalla chaiagrirka. Dimanchai chugchuspa, paikunata kungurigrirka. ³⁰ Kanchama llugsichispaka, tapurka:

—Taita waugkikuna, ¿imatak nuka rurasa, kispiriska kangapa?

³¹ Chiura, paikunaka ainirkakuna:

—Iaia Jesuswa suma iuiarispami kispiriska kankangi, kam i kamba wasipi kaugsanakuskakunapas—. ³² Chiura, paita i wasipi tukui kagkunata Iaia Jesusmanda Alli Willaita willagrirkakuna.

³³ Chiurallatata, chara tuta kagllapi, chi karsilta kawagka, Pablo i Silaspa asutii tukuska nananakuskata maillaspa ambirka. Chi wasillapita tukui kaugsagkuna baugtisarirkakuna. ³⁴ Nispaka, atun ukuma pusaspa, mikui kararkakunata. Pai i wasipi tukui kagkuna, Taita Dioswa suma iuiarispa, iapa kuntintulla tukurkakuna.

³⁵ Tutata justisiakuna, alwasilkunata kacharkakuna, karsilta kawagta ningapa:

—Chi runakunata kacharii.

³⁶ Chiura chi kawag, Pablota nirka:

—Justisiakuna niwarkakunasi, kamkunata kacharingapa. Chimandami niiki: mana manchaspalla riichi.

³⁷ Pabloka, alwasilkunata nirka:

—Nukanchi Romamanda runakuna kagpipas, chi justisiakuna, nukanchita mana imamandapas tapuchispallami tukuikunapa ñawipi asutirkakuna. Nispaka, karsilpimi nukanchita wichkachirkakuna. Kunauraka, ¿imapatak pakalla nukanchita llugsichingapa munanakú? Kikinkuna samuchukuna, nukanchita llugsichingapa.

³⁸ Imasa uiaskasina alwasilkuna, justisiakunata willagrirkakuna. Paikunaka, Romamanda runakuna kagta uiaspaka, iapasi mancharirkakuna. ³⁹ Kikin justisiakuna, karsilpi chaiagrispaka, Pablo i Silasta: —Pasinsiawai— nigrirkakuna. Paikunata llugsichispaka, sumaglla mañarkakuna— Kai puiblumanda llugsipuaichi.

⁴⁰ Karsilmanda llugsispa, Pablo i Silaska Lidiapa wasima rirkakuna. Chipika, Jesuswa tukuskakunata kawaspa, nirkakunata:

—Mana llakispa manchaspaka kaichi—. Chasa nispaka— Kaiakama— nispa, rirkakuna.

17

Tesalónika puiblupi, judiukuna killachinakuskamanda

¹ Anfipolis i Apolonia suti puiblukunata ialigrispaka, Tesalónika suti puibluma chaiagrirkakuna. Chipika, judiukuna tandariduru wasi tiarka. ² Imasami Pablo kustumbri iukarka: chasami kada warda puncha chi wasima iaikudur karka. Kimsa warda punchakuna, ñugpamanda librupi willaraiaskamanda chipi judiukunawa rimanakui tiarka. ³ Suma willaspa iachachikurka, kasa nispa:

—Taita Dios agllaska Cristotami chaiarka, llakiiwa wañui pasangapa; nispaka, pai kikin ikuti kaugsarigsamungapa—. Kasapasmi nikurka— Chi Jesusmanda nuka kamkunata willakuskaka, paimi Taita Dios agllaska Cristo ka.

⁴ Chiura sug judiukuna, Jesuswa suma iuiarispa, Pablo i Silaspa tukurkakuna. Mana judiu kagpura, iapa achka Taita Dioswa iuiagkuna i mama warmikunapas chasallata Jesuswa suma iuiarirkakuna. ⁵ Ikuti mana Jesuswa iuiag judiukunaka, mana chasa munaspa, paikunawa rabiarirkakuna. Nispaka, ñi ima mana rurai iukaska runakunatami tandachirkakuna. Chikunataka kacharkakuna, kalli suiu kaparispa killachispa purinakungapa. Jasón suti runapa wasimami chaiagrirkakuna, Pablo i Silasta maskaspa, chi mana alli runakunapagma apangapa. ⁶ Paikunata mana tarispaka, Jasonta i Jesuswa sug tukuskakunawantami aliuserpa, chi puiblupi tiaska taitakunapagma aparkakuna, kasa kaparispa:

—Kai runakunami kankuna tukui alpa suiu mana suma rimaikunawa waglichispa purigkuna. Kunaura, ña kaimami chaiagsamurkakuna. ⁷ Kai Jasonpa wasipimi kidariska kankuna. Tukui paikunami, Romamanda iaia mandag imasa niskapa kuntra rimaspa, ninkuna: “Sug atun mandagmi tia, Jesús suti”.

⁸ Chasa kapariuraka, chi taitakunata i tukui uiagkunata mana suma uiarirkakunata. ⁹ Chiura chi taitakunaka, Juranta i paiwa kagkunata manara kacharispalla, kulki mañar-kakuna, mana mas chasa rurangapa.

Berea puiblupi, Pablo i Silas kagriskamanda

¹⁰ Jesuswa tukuskakunaka, chi tutalla Pablo i Silasta kacharkakuna Berea suti puibluma. Chima chaiagrispaka, judiukuna tandariduru wasima iaikugrirkakuna. ¹¹ Chi judiukunaka, Tesalónika puiblupi kaugsanakuskamanda mas alli iuiaiwami karkakuna. Pablo imasa willakuskata uiaspa, iapa sumaglla chaskirkakuna. Tukui punchakuna, ñugpamanda librupi willaraiaskapi sumaglla kawanakurka: ¿sutipachu Pablo rimaska chasa niraiá? ¹² Chiwanka achka judiukuna, iaia Jesuswa suma iuiarirkakuna; mana judiu kagkunapas, achka mama warmikuna i karikunapas.

¹³ Tesalonikamanda mana Jesuswa iuiag judiukunaka, Berea puiblupipas Diuspa Rimaita Pablo willakugta iachagsamurkakuna. Chasa iachagsamuspaka, chi puibluma chaiagrirkakuna, chipi kaugsanakuskata pandachispa i killachispa puringapa. ¹⁴ Chiuralla Jesuswa tukuskakunaka, Pablota pusarkakuna lamar iaku patama chaiankama. Silas i Timoteo, chi Berea puiblupi chisiarkakuna. ¹⁵ Pablowa rigkunaka, Atenas suti atun puibluma chaiagrirkakuna. Paikuna ña kutinakuuraka, Pabloka nirkakunata:

—Silas i Timoteota nipuangi, utkalla samuchukuna, nukawa sugllapi kangapa.

Atenas puiblupi, Pablo kaskamanda

¹⁶ Atenas puiblupi Silas i Timoteota suiakunkama, chi puiblupi Pablo kawarka, achka paikunapa diuskunasina iukagtakuna. Chimanda, paita iapa llaki chaiagsamurka. ¹⁷ Judiukuna tandariduru wasima iaikuspaka, judiukunawa i Taita Dioswa iuiag mana judiu kagkunawa parijuma Jesusmanda sinchi rimanakurka. Chasallata atun kallinigta sugkunawapas tukui puncha rimanakurka. ¹⁸ Iacha Epikúreo i Estoikos sutikunawa iachaikugkunawapasmi Pablo chasallata rimanakurka. Pablo nikurka:

—Jesús wañuskaka kaugsarirkami. Chasallatami nukanchipas, tukui wañuskakuna kaugsaringapa kanchi.

Chasa nigmanda, paipura tapurinakurka:

—¿Imasatak kai iapa rimaduru rimaku?

Ikuti sugkunaka, mana iachaspalla ninakurka:

—Paika, mainigmanda sug diuskunamanda willakugsinami uiari.

¹⁹ Chimanda, Pablota mañar-kakuna, Areópago suti atun tandariduru wasima ringapa, kasa nispa:

—Munantranchi, kam sug rigcha iachachikuskata iachangapa. ²⁰ Sutipami nukanchi ñi imaurapas mana uiaskata kam rimakungi. Chimandami munanchi, kam willakuska ima niraiaskata iachangapa—. ²¹ Atenas puiblumanda tukui kagkuna i sugnigmanda chaiag-riskakuna chipi kaugsanakugpas munankuna, kunaura ima pasarikuskallawa rimaspa i uiaspa chisianakungapa.

²² Chi wasima chaiagrispaka, Pabloka, tukuikunapa chaugpipi saiarispa, kasami nirka:

—Atenasmanda kam taitakuna, nuka kawaikichitami diuskunawa iapa suma iuiaiwa kagtakuna. ²³ Nuka kamkunapa puiblupi purikuspa, kamkunapa diussina imajinkunatami kawakurkani. Sug altarpimi tarirkani kasa willaraiaskata: “Sug mana rigsiska diusmanda”. Chi Diustami kamkuna mana rigsispalla kunguringichi. Chi Diusmandami nuka willangapa samukuni.

²⁴ —Chi Diusmi kai alpa i chipi tukui ima tiaska rurarka. Pai chasa ruraspaka, sug luarpi i kai alpa luarpi iaia mandag kaspas, runakuna saiachiska paita iuiariduru wasikunapi mana kaugsancho. ²⁵ Runakunapa makiwa ruraskataka, paika ñi ima mana ministinchu. Chasallata, mana paita ñi imapas pisincho. Pai kikinmi nukanchita karamú kausai, samai kachangapa i tukui ima ministiska.

²⁶ —Pai Taita Diusmi, suglla runamandalla miraspa, kai tukui alpapi runakuna tianchi. Manara runakunata wiñachispalla, ñami niska karka, maituku watakuna i maipi chaiskapai paikuna kaugsangapa kagta; ²⁷ chasaka, kikinkuna Taita Diusta maskangapa; chiwanka, mana kawakugsina kaspapas, paita iuiarispa taringapa.

—Sutipami Taita Dius tukui nukanchimanda mana karullapi ka. ²⁸ Paimandami kaugsancho. Paimandami purinchi. Paimandami tianchi. Chasallatami kumpuramanda sug iachagkunapas nirkakuna: “Nukanchipas, suglla Taita Dius wiñachiskami kanchi”.

²⁹ Sutipami nukanchi, Taita Dios wiñachiska kaspa, mana iukanchi iuiaringa: Taita Dios kanchu runapa iachai iuiawi kurita u kulkita u rumita suma ruraska kagsina.

³⁰ —Kamkuna ñugpata mana paita rigsispalla ima ruraskakunata, Taita Dios munanmi kungaringapa. Ikuti kunaauraka, tukui alpapi kaugsanakuskatami rimaku, kasa nispa: “Pandariikunata sakispa, nukawa samuichi”.³¹ Kikin Taita Duska ñami iachá, ima puncha kai alpamanda tukui runakunata justisiangapa chaiagta. Pai kikinmi sug runata agllarka, imasa chaiaskasina justisiai rurangapa. Chi runa wañuskata kaugsachispami tukuikunata kawachirka, sutipa pai chasa justisiai rurangapa kagta.

³² Wañuskata kaugsachiskamanda rimaskata uiaspaka, sugkuna iapa asirkakuna. Ikuti sugkunaka nirkakuna:

—Kam rimakuskataka ikuti suurami uiasunchi.

³³ Chasa rimai puchukaspaka, Pablo, paikunapagmanda llugsispa rirka. ³⁴ Chasa kagpipas, sugkuna, paiwa tukuspa, ima willaskata suma iuiarirkakuna. Chi suma iuiarigpuramanda, Areopagopi kagkunapura Dionisio sutimi karka. Dámaris suti warmi i sugkunapas, Iaia Jesuswa suma iuiarigsamurkakuna.

18

Korinto puiblupi, Pablo kagriskamanda

¹ Chiuramanda Pabloka, Atenas puiblumanda llugsispa, Korinto suti puibluma chaiagrirka. ² Chipika taririrka sug judíu, Akila suti. Pai karka Ponto suti alpamanda. Klaudio suti iaia mandag, paipa iachaiwa ña churaska karka, tukui judíu Roma puiblupi kaugsanakug chimanda llugsingapa. Chimandami Akila, Priskila suti kikinpa warmiwa manara unai Italia alpamanda llugsispa, Korintoma chaiagriska karkakuna. Pabloka, paikunawami tarinakurka. ³ Akila warmindi, tilda linsu siradurkunami karka. Pablopas, chasallata rurag kaspa, paikunawa sugllapi trabajaspaka kaugsai kallarirka. ⁴ Tukui warda punchakunaka, judiukuna tandaridiru wasima iaikuspa, chipi kagkunawa parijuma ainichirinakuspa karkakuna. Pabloka munakurka, judiukuna i mana judíu kagkunata pai rimakuska-wa allilla iuiachingapa.

⁵ Silas i Timoteo, Masedonia alpamanda chaiagriuraka, Pabloka mana trabajaspalla kallarrirka, judiukunata Diuspa Rimaita willaspa iachachiilla. Paikunata willakurka, Jesús sutipa Taita Dios agllaska Cristo kagta. ⁶ Ikuti paikunaka, Pablota mana suma rimaiwa kamiwanta aininakurka. Chimanda Pabloka, kikinpa katangata chabsispa, paikunata nirka:

—Kam kikinkunapa mana allilla ruraikunallowami diltudupa wañungapa kangichi. Nukawaka mana llakirinakungichi. Kunaauramandaka, mana judíu kagkunapagmami ringapa kani, paikunata iachachingapa.

⁷ Chimanda llugsispa, Tisio Justo suti runapagma chaiagrirka. Chi runaka karka Taita Diuswa suma iuiag. Paipa wasi, judiukuna tandaridiru wasi ladullapimi karka. ⁸ Chi tandaridiru wasimanda taita, Krispo suti, paipa wasipi tukui kaugsanakugpasmi Iaia Jesuswa suma iuiarirkakuna. Chasallata Korintomanda achka runakunapas, Pablo ima willakuskata uiaspa, Iaia Jesuswa tukugsamuspa, baugtisarirkakuna.

⁹ Sug tuta Iaia Jesuska, muskui ukupisina Pablota kawarigsamurka, kasa nispa:

—Mana manchaspalla nukamanda willangi, mana upallaspalla. ¹⁰ Nukaka, kamwami kangapa kani. Chimanda, ñi pipas mana kamta ima jiru rurangapa pudingapa kankunachu. Kai puiblupi achka runakunami nukawa tukungapa kankuna.

¹¹ Chimandami Pablo, Diuspa Rimaita iachachispa, chi puiblupi sug wata sugta killa chisiarka.

¹² Galión suti runa chi Akaia alpata mandag kaura, judiukunaka, sugllasina tukuspa, Pablota apirkakuna. Nispaka, chi mandagpagma apaspa, ¹³ nirkakuna:

—Kai runa iachachispami puriku, Taita Diusta imasa nukanchipa ñugpamanda rurangapa willaraiaskasinata nukanchi kungaringapa. Sug rigcha iuiaikunawami iachachispa puriku.

¹⁴ Pablo ña ainingapa kaura, Galionka judiukunata nirka:

—Kam judiukuna, kai runa ima mana allillata rurag kagpi u maikanta wañuchiska kagpika, allichar kantra, nuka kamkunata uiangapa. ¹⁵ Ikuti kai runa sug rigcha rimai u sug runakunamanda iachachikugpi, u imasa kamkunapa ñugpamanda librupi willaraiaskasina mana iachachikugpika, kam kikinpura iachaichi. Nukaka mana munanichu, chikunata justisiai rurangapa.

¹⁶ Chasa nispaka, chi judiukunata wasimanda llugsichirka. ¹⁷ Chiura tukui mana judíu kagkunaka, Sóstenes suti judiukuna tandaridiru wasimanda taitata apirkakuna. Mandag

Galionpa wasi pungu ladullapimi paita makai kallarirkakuna. Chi mandagtaka ñi ima mana iuiachirka.

¹⁸ Chiuramanda Pabloka, achka punchakunami chi puiblupi chisiarka. Chasa chisias-paka, Jesuswa tukuskakunata: “Sug punchakama” nispa, barkuma iaikugrirka, Siria alpama ringapa. Akila i Priskilapas, paiwa sugllapi rirkakuna. Manara barkuma iaikug-rispalla, Senkrea suti patama chaiagrispa, Pabloka tukui agchata kuchuspa aspichirirka. Chasaka, Taita Diusta pai kikin imasa niskasinami rurarka.

Siria alpama, Pablo kutiskamanda

¹⁹ Efeso suti puibluma chaiagrispaka, Akila warmindita chipi sakispa, judiukuna tandariduru wasima iaikugrispa, paikunawa sugllapi rimanakui kallarirka. ²⁰ Chi judiukuna, Pablota mañanakurka mas sug punchakuna chipi paikunawa kangapa. Pabloka mana munarka. ²¹ “Sug punchakama” nispa, paikunata nirka:

—Nukanchipa Taitiku lisinsia kuawagpika, imaurapas ikutimi kamkunawa samusa—. Chasa nispa, Efesomanda lamar iakupi ikuti rirka Sesarea puibluma. ²² Chipi chaiagrispaka, ñambi apispa, Jerusalemna chaiagrirka. Chipika, Jesuswa tukuskakunata: “Puangi” nigrirkakunata. Chimandaka, Antiokia puibluma rirka. ²³ Achka punchakuna chipi kaspaka, llugsirka. Nispa, Galisia i Frijia alpapunapi Jesuswa tukuskakunata kawaspa, suma iuiachispa ialirka.

DIUSPA RIMAITA WILLASPA, PABLO KIMSAMA PURISKAMANDA

Efeso puiblupi, Apolos kaskamanda

²⁴ Chikama, Apolos suti judiu runami, Alejandria puiblumanda kaspaka, Efeso puibluma chaiagrirka. Chi runa, ñugpamanda librupi willaraiaskakunata allilla iachaspa, sumami iachachidur karka. ²⁵ Iaia Jesús ima iachachiskata iachaspaka, pai tukui iachaskatami Jesusmanda allilla rimaspa iachachidur karka. Chasa kagpipas, Juan iakuwa baugtisaska-mandallami iacharka. ²⁶ Efesoma chaiagrispaka, judiukuna tandariduru wasipi mana manchaspallami willai kallarirka. Paita uiaspaka, Priskila i Akilaka, sapallata pusaspa, Taita Dios imasa kaugsangapa niskata mas allillami iachachii kallarirkakuna.

²⁷ Chiuramandaka chi Apolos, Akaia suti alpama ringapa iuiakurka. Chiura Jesuswa tukuskakunaka, paita nirkakuna:

—Iapa allillami ka—. Chasa nispa, Akaia alpapi kaugsag Jesuswa suma iuiarigkunata iskribispa kacharkakuna, kasa nispa— Paita sumaglla chaskipuangichi.

Apolos chipi chaiagrigrmandaka, Jesuswa suma iuiarigkunamanda iapa alli tukug-samurka, Taita Dios paikunata iapa kuiaskamanda. ²⁸ Tukuikunapa ñawipi, judiukunata mana manchaspalla nikurka:

—Ñugpamanda librupi willaraiaskakunata, kamkuna manara allilla iachaikurkangichi-chu—. Chi willaraiaska kawachispa, nikurka, Jesús sutipa Taita Dios agllaska Cristo kagta.

19

Efeso puiblupi, Pablo kagriskamanda

¹ Korinto puiblupi Apolos kankama, Pabloka, sachuku ialispa, Efeso puibluma chaiagrirka. Chipi chaiagrispaka, Jesuswa sug tukuskakunata tarigrispa, ² tapurka:

—Kamkuna, Jesuswa suma iuiarigsamuura, ¿Santu Ispiritutachu chaskirkangichi? Paikunaka ainirkakuna:

—Mana iachanchichu, Santu Ispiritu tiagta.

³ Chiura, Pabloka tapurka:

—Nigpika, ¿ima iuiarispatak baugtisariska kangichi?

Chiura ainirkakuna:

—Juan iachachiskata iuiarispami baugtisarii tukuska kanchi.

⁴ Chiura, Pabloka nirka:

—Pandariskakunata sakigkunatami Juan iakuwa baugtisarika, tukui runakunata kasa nispa: “Nukapa kati samungapa kagtami iukangichi suma iuiaringa”. Chika, Jesusmandami niraiá.

⁵ Chasa uiaspaka, Iaia Jesuspa sutiwami baugtisarirkakuna. ⁶ Pablo paikunata maki churauraka, Santu Ispiritu paikunapa sungupi iaikugsamurka. Iaikugsamugllapi, mana iachaska rimaikunawapasma rimai kallarirkakuna. Chasallata, Santu Ispiritu iuiachikuskatami willai kallarirkakuna. ⁷ Chikuna, mai chungu iska runakunami karkakuna.

⁸ Pabloka, chi puiblupi judiukuna tandariduru wasima iaikuspa, kimsa killami mana manchaspalla chipi iachachikurka. Taita Dios imasa suma mandakuskamanda chipi

kagkunawa rimanakurka. Pabloka munakurka, paikunata pai rimakuskawa allilla iuia-chingapa. ⁹ Ikuti sugkunaka, paita uangataka, rinri taparisa, tukuikunapa ñawipi Iaia Jesusmanda iachachikuskata wabutirkakuna. Chasa kagmanda, Pabloka paiwa tukuskakunawanta anchurirka. Nispaka, tukui punchakuna Tirano suti runapa iachachiduru wasipi iachachii kallarirka. ¹⁰ Iskai watami chipi iachachikurka. Chiwanka, judiukuna i mana judii kagkunapas, chi Asia alpa suiu kaugsagkuna, tukuinigmandami pudirkakuna, Iaia Jesusmanda rimaita uangapakuna.

¹¹ Taita Diuska, iapa imaurapas mana kawaskasina Pablowami ruradur karka. ¹² Pablopa ima pañuilu u katanga churariduru kaskata ungugkunapagma apadur karkakuna, ambiringapa. Chiwanka, ungugkunapa kuirputa llamkagllapimi ima unguikunapas aliadur karkakunata. Chasallata ruraura, kuku wairakunapas mitikudur karkakuna.

¹³ Chasa kawaspas, sug judiukuna sinchikunasina ambispa puridurkunaka, Iaia Jesuspa sutiwa rimai kallarirkakuna, kuku wairawa kaskakunata kasa nispas:

—Pablo willakuska Jesuspa sutiwami niiki: llugsiichi—. ¹⁴ Eskeva suti iaia sasirdutipa kanchis wambrakunami chasa ruranakurka.

¹⁵ Chi kuku wairaka, paikunata kasa ainirka:

—Jesusta i chi Pablo pi kagta, nuka rigsini. Ikuti kamkunataka mana rigsii kichitachu. ¿Pikunachar kangichi?—. ¹⁶ Chasa nispaka, chi kuku wairaiug runa, tukui kanchiskunata saltaspa, apirkakunata. Pai richirkakunata. Lisiachispa llatan sakiuraka, iukarkakuna chi wasimanda mitikungakuna.

¹⁷ Chasa pasariskata iachaspaka, Efeso puiblupi tukui judiukuna i mana judii kagkuna iapa mancharirkakuna. Chasawaka, Iaia Jesús masmi atuniachi tukugsamurka. ¹⁸ Iaia Jesuswa achka suma iuiarigkunapas, paikuna ima ñugpata mana allilla ruraskakunamanda tukuikunapa ñawipi willarigrirkakuna. ¹⁹ Chasallata achka jiru iachakuna, paikunapa librukunata sugllapi tandachispa, tukuikunapa ñawipi rupachirkakuna. Chi rupachiska librukunaka karkasi pichka chungas waranga bali kulkisina. ²⁰ Chasapi, Iaia Jesuspa iapa iachaiwa paimanda Alli Willaita tukuipi iacharigsamurka. Chi willaita suma iuiarigkuna, mas miraspami rirkakuna.

²¹ Chasa pasariskauramanda, Pablotaka iuias chaiarka, Masedonia i Akaia alpapunapi ialispa, Jerusalem chaiagringspa. Kasapasmi nirka:

—Chimandaka iukanimi, Roma atun puibluma ringa—. ²² Chasa nispaka, iskai paita aidaspa katiraiagkunata, Timoteo i Erasto sutikunata, Masedonia alpama ñugpa kacharkakunata. Pai kikinka, mas achka punchakunami chi Asia alpapi unaiarka.

Efeso puiblupi killachinakuskamanda

²³ Chi punchakuna Efeso puiblupi, iapa achka runakuna, paipura sinchi rimanakuspa killachinakurka, Iaia Jesusmanda iuiachiikunawa paikunata manima sumagmanda. ²⁴ Tukui runakunawa killachidur, Demetriomi suti karka. Chi runa, kulkita ruradurmi karka Artemisa suti ianga mama diuspa uchullita iglisiasina ruraskata walkariduru. Paiwa ruragkunapas, achka kulkimi wakanaridur karkakuna. ²⁵ Paika, chi runakunata i tukui chasa ruragkunapas sugllapi tandachispa, nirkakunata:

—Kam waugkikuna iachangichimi: kai nukanchipa trabajuwami sumaglla kaugsanchi. ²⁶ Allillami kawangichi i iachangichi: kai Efesopi i ñalla tukui Asia alpapi, chi Pablo, iapa achkakunatami llullachispa, sug rigcha iuiachigsamurka, kasa nispas: “Chi runakuna ruraskaka, mana diuska kanchu. Iangami kankuna”. ²⁷ Tukuikuna chasa iuiarigkunaka, nukanchi kulkita trabajaskaka ñi imapa mana balichar tukugsamuntra. Nukanchipa Artemisa atun mama diusta iuiariduru wasitapaschar wabutii tukuntra. Kunankama kai Asiapi i tukui alpapi, Artemisatami chara kungurinkuna. Kunauramandaka, tukuikunami Pablopa kausa sakingapa kankuna.

²⁸ Chasa uiaspaka chipi kagkunaka, iapa rabiarispa, kaparii kallarirkakuna:

—Tukui Efesopi kaugsagkunapa Artemisa, atun mama diusmi kangi.

²⁹ Chimandami chi puiblupi tukui kaugsanakug, tuntiariagsamuspa, paikunapa tandariduru wasima upakunasina kalpa iaikugrirkakuna. Masedonia alpamanda Gaio i Aristarko suti Pablowa purigkunata apispami iaikuchigrirkakuna. ³⁰ Pablo munakurka, chituku achka runakunata rimagringspa. Chasa munakugpipas, paiwa tukuskakunaka mana sakirkakuna. ³¹ Asia alpapi sug mandag taitakunapas, Pablopa rigsidukuna kaspas, kacharkakuna, paita mañangapa, chi wasima mana iaikukuchu.

³² Chi wasi ukupi kagpura, iapa tuntiachinakurka. Sug sug rigcha, sug sug rigchami kaparispa rimanakurka. Ñalla tukuikunata mana iacharikurka, imapa sugllapi tandariska kagtakuna. ³³ Chiuraka chi tandariskakunapa chauppimanda sug judiukunaka, Alejandro suti runata iuiachispa, ñugpa ladu tangaspa aparkakuna, pai tukuikunata rimangapa. Chiura Alejandro, chipi kagkunata makiwa kawachispa upallachingspa munakurka.

³⁴ Tukai chipi kagkunaka, Alejandro judíu kagta iachaspa, sugllasina tukuspa, iskai urasina kaparinakurka, kasa nispá:

—Tukai Efeso puiblupi kaugsagakunapa Artemisa, atun mama diusmi kangí.

³⁵ Chipi mandagpa iskribingapa aidagka, tukuikunata rimaspa upallachispaka, kasami nirka:

—Kam Efesomanda kagkuna, ¿manachu tukuikuna iachankuna: nukanchi Efesomandakuna iukanchimi, Artemisa atun mama diusta iuiaridiru wasita i kikinpa imajin awa luarnigmanda urmaskata mana imapas pasaringapa kawanga? ³⁶ ¿Pitak ningapa ka, mana chasa kagta? Chimanda, kamkunata chaiakumi, upalla kangapa. Mana imapas ruraichi, mana allilla iuiarispalla. ³⁷ Kaima pusamuska runakunaka mana kankunachu nukanchipa mama diusta iuiaridiru wasipi sisaikunasina ñi paita kamidurkunasina. ³⁸ Demetrio i paiwa sugllapi kagkunaka pipa kuntra ima willangapa iukagpikunaka, chimandami justisiai ruragkuna tia. Chipimi parijuma imamandapas rimanakungapa tiagpika, justisiata rimankangichi. ³⁹ Kamkuna rimanakuskapi mana allilla tukugpika, mañankangichimi, tukuikuna tandarísapa, allilla rimanakungapa. ⁴⁰ Kuna puncha ima pasariskataka, mandagkuna sutipami pudinkuna nukanchimanda iuiangakuna: “Mandaita wabutispami sug rigcha runanakú”. Kunaura pasariskata, nukanchi mana pudingapa kanchichu rimangapa, kaituku achka runakuna killachinakuskamanda.

⁴¹ Chasa nispaka, tukuikunata llugsichirka.

20

Masedonia i Gresia alpakunama, Pablo ikuti riskamanda

¹ Chi killachinakui ña ialiuira, Pablola, Jesuswa tukuskakunata kaiaspa, suma iuiachirkakunata. “Sug punchakama” nispaka, Masedonia alpama rirka. ² Chi alpapi chaiagrispa, Jesuswa tukuskakuna chipi kaugsanakuskata unai rimaspa, suma iuiachirkakunata. Nispaka, Gresia suti alpama rirka. ³ Chipika, kimsa killami kagrirka. Chimanda Siria alpama iakupi ringapa kaura, allilla iachagsamurka, judiukuna paita wañuchingapa munanangkta. Chiura nirka:

—Masedonia alpatami chakiwa kutingapa kani—. ⁴ Pablola rinakurka Berea puiblumanda Pirropa wambra Sopater suti, Tesalónika puiblumanda Aristarko i Segundo sutikuna, Derbe puiblumanda Gaio i Timoteo; Asia alpamanda Tikiko i Trófimo suti runakunapasmi sugllapi rinakurka. ⁵ Chi runakuna, ñugpaspa, Troas puiblupi nukanchita suiagrirkakuna. ⁶ Nukanchika, mana libadurawa tanda mikudiru punchakuna ialichispa, Filipos puiblumanda iakupi llugsirkanchi. Pichka punchapika Troas puibluma chaiagrispa, chi sugkunawa tarinakurkanchi. Chipika, kanchis punchami chisiarkanchi.

Troas puiblupi, Pablo kaskamanda

⁷ Simana kallarii puncha u duminguka, tukuikuna sugllapi tandarirkanchi, Iaiá Jesús imasa niskasina tanda sugllapi mikungapa. Chiura Pablola, kaiandi ringapa iuiakuspa, chaugpi tutakamami iachachirka. ⁸ Awa ladu ukupi tukui nukanchi kaskapika, achka sira lamarakunami sindinakurka. ⁹ Sug musu, Eutiko suti, bintanapimi tiakurka. Chi musu, Pablo tuta unai rimakuskata uiakuspaka, dipuñui singukuspa, chi kimsa pisu awamandamami urmarka. Pai alpama urmaska wañuskatami atarichigrirkanchi. ¹⁰ Pablopas, urakuspa, chi musuta aisaspa, markarísapa, nirka:

—Mana llakinakuichi. Kaugsami ka.

¹¹ Chasa nispaka, ikuti sikaspa, Jesús imasa niskasina tanda pitispa mikurka. Mikuspaka, ikuti iachachii kallariirka, ñalla pakarinkama. Nispaka, rirka. ¹² Chi wañuska musutaka kaugsami aparkakuna. Chiwanka tukuikuna, alli iuiachiiwa kuntintarirkakuna.

Mileto puibluma, Pablo riskamanda

¹³ Nukanchika, Pablola ñugpaspa, Aso suti puibluma iakupi rirkanchi, chipi paiwa tupanakugringapa, pai imasa niskasina. Paika, chakiwa ñambi chima rirkurka. ¹⁴ Sutipami chi puiblupi ikuti sugllapi tururkanchi. Nispaka, paita barkullapita pusaspa, Mitilene suti patama chaiagrirkanchi. ¹⁵ Kaiandika, iakupi ikuti rispa, Kío suti alpa ladullapimi ialirkanchi. Sug kaiandika, chi iaku sug ladu chimba rispa, Samos sutipi saiarigrirkanchi. Ikuti sug punchamaka, Mileto sutima chaiagrirkanchi. ¹⁶ Pablo iuiaríska karka, Efeso puibluta mana iaiukuspalla ialingapa; chasaka, chi Asia alpapi mana iapa unaiangapa. Pai munakurkami, utkalla Jerusalemna chaiagringapa; chasaka, Pentecostés atun puncha chipi ialichigringapa.

Efesomanda Jesuswa tukuskakunapura iacha taitakunata, Pablo rimaskamanda

¹⁷ Mileto puiblumandaka Efeso puibluma kacharka, Jesuswa tukuskakunapura iacha taitakunata kaiangapa. ¹⁸ Paikuna Efesomanda ña chaiagriuraka, kasami nirkakunata:

—Kamkuna ñami iachangichi, nuka kai Asia alpama chaiamuskauramandata, tukui punchakuna imasa kamkunawa sumaglla kagta. ¹⁹ Nuka, mana iapa atun tukuspalla, Iaia Jesús imasa niwaskasinami ruraspa kani. Judiukuna nukata mana allilla rurawangapa munanakugmandami llakispa wakaspa purikuni. ²⁰ Iachangichimi, nuka ñi imapipas mana sakispalla, kamkunata sumaglla rimaspa aidaspa kagta. Tukuikunapa ñawipi, kamkunapa wasikunapipasmi rimaspa iachachispa karkani. ²¹ Judiukunata i mana judíu kagkunatapasmi rimakurkani, kasa nispa: “Tukui pandariskakunata sakispa, Taita Dioswa tиграichi. Chasallata, nukanchipa Iaia Jesuswa suma iuiarichi”.

²² —Kunauraka, Santu Ispiritu watawaspa apawakugsinami Jerusalenma rikuni. Chipika mana iachanichu, ima nukata pasariwangapa kagta. ²³ Kaillami iachani: tukui puiblukunama chaiagriskapi, Santu Ispirituwa iuiagkunami kasa willawanaku: sug runakuna suiawanakunsi, nukata maki watawaspa, karsilpi churawaspa, llakii pasachiwangapa. ²⁴ Chasa kagpipas, nuka kikinpa kaugsaimanda mana llakiwanchu. Kasallami nuka munani: nukata imasami rurangapa chaiawaku: chasami imapipas rurangapa munani. Chiwanka, imasami Iaia Jesús, nukata mingawarka, Taita Dioswa suma kuiaimanda willaita willaspa puringapa: chikunatami rurangapa munani.

²⁵ —Kasapas. Kamkunapagpimi purikurkani, Taita Dios imasa suma mandakuska-manda willaspa. Nuka iachanami, kunauramandaka kamkuna manima ikuti kawawangapa kagtakuna. ²⁶ Chimandami nuka kuna puncha allilla rimaikichita: maikanpas nuka iachachiskata mana allilla ruragmanda Taita Dios justisiai ruragpika, nukawaka mana llakirinakungichi. ²⁷ Tukui Taita Dios ima munaskatami willarkaichita, ñi ima mana pakaspalla. ²⁸ Kam kikinkuna, suma iuiaripuangichi. Chasallata, tukui kamkunawa sugllapi Jesuswa iuiarigkunata suma kawapuangichi. Kamkunata, Santu Ispiritu churarka, paikunata suma kawag taitakunasina kangapa. Jesuswa tukui tukuskakuna, maipi kaskapipas, kikin Iaia Jesuspa iawarwa randiskasinami niraianchi.

²⁹ —Nuka kasami iachani: imasami mana alli sacha alkukuna, ubijakunapagma iaikuspa, mana sakispalla puchukankuna: chasallatami, nuka riskauramandaka, sug rigcha iuiachigkuna, kamkunawa iaikuspa, Jesuswa suma iuiarinakuskata wagllichingapa samungapa kankuna. ³⁰ Kam kikinpurapasmi sugkuna, sug rigcha iachachispa puringapa kankuna. Chasaka Jesuswa suma iuiagkunapas, tuntiachi tukuspa, paikunata katichingapami kankuna. ³¹ Chimanda, rigchariskasinalla kangichi, kasa iuiarispa: nukaka, tukui kamkunamanda kimsa wata tuta i puncha mana samaspalla wakaspami suma iuiachirkaikichita.

³² —Kunaura, Taita Diustami kamkunamanda mañapuikichita, paipa suma kuiaimanda Suma Rimaiwa kamkunata kawapuachu; chi Rimaita tukui suma uiagkuna, wiñachiskasina kangapa. Chasaka, paipalla kagkunawa, kikin Taita Dios suma luarpi karangapa niraiaskata tukuikuna chaskigringapa.

³³ —Nuka mana munarirkanichu ñi pipa kulki, ñi pipa kuri ñi pipa katanga. ³⁴ Kam kikinkuna, allillami iachangichi: nuka kikinpa makiwami trabajarkani, nuka i nukawa purigkunamanda ima ministiriskakunapas iukangapa. ³⁵ Chasa ruraspaka, tukuipimi iachachispa kawachirirkaikichita: chasaka, kamkunapas iukangichimi, chasa trabajaspaka, ministiriskakunatapas aidanga. Iaia Jesús kasa rimaskata iuiarichi: “Maikan karagka, chaskigkunamandapas mas alli iuiachiwa kuntintullami tukugsamú”.

³⁶ Chasa rimaspaka, Pablo i tukui chipi kagkunaka, kungurispa, Taita Diusta paipuramanda mañai kallarirkakuna. ³⁷ Chiura tukuikuna, iapa wakaspa, paita ugllaspa muchar-kakuna. ³⁸ “Nukata mana ikuti kawawangapa kangichichu” niskamandami tukuikuna iapa llakirirkakuna. Nispaka, Pablawa rirkakuna barku saiakuskama.

21

Jerusalenma, Pablo riskamanda

¹ Paikunata sakispaka, barkupi dirichumi rirkanchi, Kos suti alpama chaiagta. Kaiandika, Rodas suti alpama rirkanchi. Chimandaka, Pátara sutima chaiagrirkanchi. ² Chipika, ikuti sug barku Fenisia suti alpama chimbangapa rikuskata tarigrirkanchi. Chi barkupi iaikuspa, chi puiblumanda lugsirkanchi. ³ Ialínakuspaka, Chipre alpata kawarkanchi. Chi alpata lukisinama sakispaka, Siria alpama rirkanchi. Tiro suti patapi saiarigrirkanchi. Chi barkupi ima apanakuskata iukarkakunami chipi sakinga. Chimandami nukanchipas barkumanda uraikurkanchi.

⁴ Chipika, Jesuswa tukuskakunawa kawanakurkanchi. Kanchis punchami paikunawa chisiarkanchi. Paikuna, Santu Ispirituwa Pablota iuiachinakurka, kasa nispa:

—Mana Jerusalenma rikui.

⁵ Chasa iuiachinakugpipas, chi punchakuna ialiuuraka, nukanchi chimanda llugsir-kanchi. Tukui nukanchiwa iuiagkuna, warmindi i wambrakunawanta puiblumanda llugsispa, nukanchita sakigrirkakuna. Iaku patapika tukuikuna, kungurispa, Taita Diusta tukuikunamanda mañanakurkanchi. ⁶ Nispaka, parijuma: “Sug punchakama” ninakuspa, barkupi ikuti iaikurkanchi. Paikuna, wasima kutii kallarrirkakuna.

⁷ Nukanchika, chi Tiro puiblumanda Tolemaida suti puibluma chaiagrirkanchi. Chipika, iakupi purii puchukarkanchi. Chi puiblupika, Jesuswa tukuskakunata: “¿Allillachu kapuangichi?” nispaka, suglla puncha paikunawa karkanchi. ⁸ Kaiandika, Sesarea puibluma rirkanchi. Chipi chaiagrispaka, Felipe suti Diuspa Rimaita willadurpagma iaikugrirkanchi. Jerusalemipi Jesuswa tukuskakunapuramanda kanchis runakuna ñugpa agllaskami karka. Paipa wasipimi kidarirkanchi. ⁹ Pai, chusku manara kasaraska warmi wambrakunami iukarka. Chi warmikunaka, Santu Ispirituwa rimagkunami karkakuna.

¹⁰ Nukanchi ña achka punchakuna chipi kauraka, Agabo suti Santu Ispirituwa rimagmi Judea alpamanda chaiagrirka. ¹¹ Chi runaka, nukanchi kaskapi iaikugrirka. Pablota siñidurta aisaspa, pai kikinpa chaki makiwanta watarispa, nirka:

—Kasami Santu Ispiritu ni: “Kai siñidur iukagta, kasami judiukuna Jerusalemipi watangapa kankuna. Nispaka, mana judiu kagkunapa makipimi paita ialichigringapa kankuna”.

¹² Chasa uiaspaka, nukanchi i chipi kaugsagkunapas, Pablota maimi ninakurkanchi:

—Mana Jerusalemma rikui.

¹³ Chiura, Pablota ainirka:

—¿Imapatak kamkuna wakaspa llakichiwanakungichi? Nukaka suiakunimi, Jerusalemipi wataskalla kangapa: mana. Munakunimi, Iaia Jesusmanda wañuchiipas tungupaga.

¹⁴ Chasa uiaspa, mana paita sug rigcha iuiachingapa pudispaka, tukuikuna upalla saki-rirkanchi, kasa nispaka:

—Nukanchipa Taitiku imasa munaskasina tukupuachu.

¹⁵ Chi punchakuna ialiskauramanda, imakuna ministiriska allichirispaka, Jerusalemma rirkanchi. ¹⁶ Sesareamanda Jesuswa sug tukuskakunapas, nukanchiwa sugllapi rirkakuna Chipre alpamanda Mnasón suti ña unai watakuna Jesuswa suma iuiagpagma. Paipa wasipimi kidarigrirkanchi.

Santiagowa Pablota rimanakuskamanda

¹⁷ Nukanchi ña Jerusalemma chaiagriuraka, Jesuswa tukuskakuna iapa kuntintarisipami nukanchita chaskirkakuna. ¹⁸ Kaiandi Pablota, nukanchiwa sugllapi tukuspa, Santiago-pagma chaiagrirkanchi. Jesuswa tukuskakunapura tukui iacha taitakunapasmi chipi tandarigrirkakuna. ¹⁹ Pablota: “¿Allillachu kapuangichi?” nispaka, suiumandatami willai kallarrirka, Taita Diuspa tukui munai mana judiu kagkunapagpi imasa paiwa tukug-samuskamanda.

²⁰ Chasa uiaspa, chipi kagkunaka Taita Diusta nirkakuna:

—Kam, iapa suma atunmi kangi—. Nispaka, Pablota nirkakuna— Kam taita waugkika iachangimi, maituku waranga waranga judiukuna Iaia Jesuswa suma iuiarigsamugta-kuna. Tukui paikuna, Moisés imasa rurangapa niraiaskata mana sakispallami rurana-kú. ²¹ Paikunaka, kammanda kasa iachachikuskatasi uiarkakuna: judiukuna sug alpaku-napi kaugsanakuskata iachachikungisi, Moisés ima rurangapa niraiaskata sakingapa; chasallata, kamkunapa kari wambrakunata mana judiukunapa marka churachingapa ñi ñugpamandakuna iachachiskakunawa mana ruraspaka kaugsangapa. ²² Paikuna chasa uiaskamandaka, nukanchika, ¿imatak nisunchi? Paikuna iachangapami kankuna kam kaipi chaiamugta. ²³ Chimanda, kasa rurai. Nukanchipura chusku runakunami munana-kú, imasa paikuna Taita Diusta: “Kasami ruraspa” niskata rurangapa. ²⁴ Paikunata pusaspa, imasa rurangapa willaraiaskasina Diuspa ñawipi paikunawa sugllapi maillari-grichi. Nispaka, ufrinda rupachingapa pagapungi. Chasallata, agcha kuchuchispa aspichiringapa pagapungi. Chasawaka, tukui judiukuna iachangakunami, kammanda uiaskakuna manima sutipa kagta. Chasapika kawachinkangimi, Moisés ima niraiaskata kamps rurag kagta.

²⁵ —Kasapas. Mana judiu runakuna Iaia Jesuswa suma iuiarigkunataka ñami kasa nispaka kacharkanchi: “Ianga dius niraiaskakunata kamariku karaska aichata mana mikungichi. Iawarta mana upiangichi. Sipiska wañuchiskakunapa aichata mana mikungichi. Kari warmiwa mana pandaringichi”.

Diuspa atun wasipi, Pablota apiskakunamanda

²⁶ Chasa sug kaiandi, Pablo, chi chusku runakunata pusaspa, imasa rurangapa willaraiaskasina Diuspa ñawipi maillarigrirkakuna. Chasa ruraspaka, Diuspa atun wasi ukuma iaikurka, willangapa: ima punchami paikuna maillaringapa puchukaringapa ka; chi punchaka, tukui paikunamanda ufrindata rupachigringapa.

²⁷ Ña chi kanchis puncha ialingapa kaura, Asia alpamanda samuska judiukunaka, Pablota Diuspa atun wasi ukupi rigsigsumurkakuna. Paita rigsigsumuspaka, tukui chipi kagkunata kaparispa, iapa sinchi uiarigsumurkakuna. Pablota sumaglla apispaka, ²⁸ kaparii kallarikakuna:

—Israelmanda runakuna, aidawagsamuichi. Kaimi ka chi runa, tukui alpapi nukanchi kikinkunamanda, Moisés tukui ima rurangapa niraiaskamanda i kai Diuspa atun wasimanda kuntra rimaspa purig. Sutipami niikichita: kasapasmi rurarka: mana judiu kagkunatapasmi kai Diuspa atun wasi ukuma iaikuchirka. Chasa mana allilla ruraskawaka, kai Taita Diuspalla kaska wasitami mapaiaichigsamurka—. ²⁹ Mas ñugpaka, Efeso puiblumanda Trófimo suti mana judiu Pablota sugllapi kallipi purinakugtasi kawaska karkakuna. Chasa kawaspasi ianga iuianakurka, Pablo chi runata Diuspa atun wasi ukuma iaikuchidur kagta.

³⁰ Tukui chi puiblupi kagkuna, iapa sinchi uiarinaturka. Chimandami tukuinigmanta kalpalla sugllapi chaiagrirkakuna. Pablota apispaka, Diuspa atun wasi ukumanda alijspa, kanchama llugsichirkakuna. Llugsichigllapi, chi wasi pungukunata lim wichkarkakuna.

³¹ Pablota ña wañuchingapa iuiaiwa charinakuuraka, Romamanda suldadukunata mandagpagpi iacharigrirka, tukui Jerusalenpi kagkuna ajai uiarinakugta. ³² Chasa uiangallawa, chi mandagka, suldadukunata i kapitankunata tandachispa, chi achka runakunapagma kalpalla rirkakuna. Chi mandag suldadukunawa rinakugta kawaspaka, Pablota piagkuna sakirkakuna. ³³ Chiura mandagka, Pablopagma chaiagrispa, paita apichispa, nirka, iskai kadinakunawa watachukuna. Nispaka, chipi kagkunata tapurka:

—Kai runa, ¿pitak ka? ¿Imatak ruraturka?

³⁴ Chiuralla sug sug rigcha, sug sug rigcha kaparinaturka. Chituku achka uiarinakugmanta, chi mandagka ñi imapas mana pudirka iachangapa. Chimanda, suldadukunata nirka:

—Kai runata apaichi kamkuna kadiruma.

³⁵ Chi wasi iskalirama chaiagriura, suldadukunaka iukarkakuna, Pablota markaspa sikachingakuna, judiukuna tangaspa katichinakugmanta. ³⁶ Chi tukui katiraiagkuna, sinchi kaparispa ninaturka:

—Wañuchiichi.

Jerusalenpi kagkunapa ñawipi, Pablo kispiringapa rimariskamanda

³⁷ Suldadukuna kadiruma pungupi iaikuchingapa kaura, Pablota paikunata mandagta nirka:

—¿Pudirinchi rimangapa?

Chi mandagka tapurka:

—¿Pudingichu griego rimai? ³⁸ ¿Manachu kam kangu kai mana unai punchakuna chi Ejiptomanda nukanchita killachii rurag runa? ¿Manachu sug chusku waranga wañuchig runakunata chusa sitaska alpama pusarkangi?

³⁹ Chiura, Pablota ainirka:

—Nuka, judiu runami kani. Silisia alpapi, chi Tarso iapa uiariska puiblumandami kani. Diusmandami mañai: sakiwai, kai tukui runakunata nuka rimangapa.

⁴⁰ Chi mandag “Aja” niura, Pablota, chi iskalira awa ladu saiarispa, makiwa upallaichi nigsina kawachirka. Tukuikuna upallagsamuura, paika, hebreo rimaiwa rimaspa, nii kallarikka:

22

1—Taitakuna, uiawaichi. Nuka kikin kispiringapa kaskatami willaikichita.

² Hebreo rimaiwa uiaspaka, chipi kagkuna masmi upallarkakuna. Chiura Pablota, kasami nirkakunata:

³—Nuka, Silisia alpapi, Tarso puiblupi tiagsamuska judiu runami kani. Kai Jerusalenpi, taita Gamaliel iachachikuskawami wiñagsamurkani. Paiwa, tukui imasa nukanchipa ñugpamanda taitakuna ima rurangapa niraiaskata iachaikuspami atarirkani. Chimanda, tukui kamkuna kuna puncha kaipi kagkunasinami, nukapas Taita Dius imasa niskata allilla ruraspaka kani.

⁴—Ñugpata nuka kikinpas, Jesusmanta Alli Willaita mana munaspa, kari i warmi Jesuswa iuiagkunata apispa, wataspa, karsilma churachispami wañuchichiiwanta karkani. ⁵ Iaiasasirduti i judiu taitakuna, tukui paikunapas nukamanda chasallatami willangapa pudinkuna. Paikunami, Damaskopi judiu kaugsanakuskamanda karta iskribispa, kachawarkakuna. Chi kartawami Damaskoma rikurkani, maikan Jesuswa tukuskakunata kadinawa wataspa, kai Jerusalenma apamungapa; chasawaka, paikuna justisiai tukungapakuna.

⁶—Nuka ñambi rikuskapi, ñalla Damaskoma chaiagringapa kauraka, chaugpunchasina kaura, diulpilla awanigmanda ajai sinchi punchaiachiiwami nukapa muiugta tukuwagsamurka. ⁷Chiwanka, alpamami urmarkani. Chiura, sug rimaika uiariwagsamurka, kasa nispa: “Saulo, Saulo, ¿imapatak puchukawangapa iuiailawa purikungi?”.

⁸—Nukaka tapurkani: “Kam Taitiku, ¿pitak kangí?”.

—Chasa tapuura, ainiwagsamurka: “Nukami kani Nazaretmanda Jesús. Nuka kikintami puchukawangapa iuiailawa purikungi”.

⁹—Nukawa sugllapi rinakugka, chasa punchaiachikuskata kawaspapas, chi rimawakug-taka manima uiarkakuna. ¹⁰Chiura, nuka tapurkani: “Taitiku, nukaka, ¿imatatak iukani ruranga?”.

—Chiura, Iaia Jesuska ainiwarka: “Atarispá, Damaskoma rii. Chipimi kamta ningakuna, ima rurangapa kagta”.

¹¹—Chi sinchi punchaiachiiwa ñawi tutaiachiimi tukurkani. Chimanda chi nukawa purigkunaka, makimanda charispa, Damaskoma chaiachiwagirrakuna.

¹²—Chi puiblupi kaugsakurka Ananías suti Moisés tukui ima niraiaskasina allilla rurag runa. Judiukuna tukui chipi kaugsakgunapas, paimanda iapa suma rimadur karkakuna.

¹³Chi runaka, nuka kaskama chaiagrispa, niwarka: “Waugki Saulo, ñawiwa kawai”.

—Chasa niwagllapi, nuka, paita kawangapa pudirvani.

¹⁴—Chiura, chi runaka niwarka: “Nukanchipa ñugpamanda taitakunapa Taita Diusmi kamta agllarka, pai imasa munakuskata kam iachangapa; chiwanka, tukuikunamandapas mas alli runata kam kawangapa; chasallata, pai Jesús rimaskata uangapa. ¹⁵Kam kikinka, tukui runakunata ima paimanda kawaska i uiaskata willagmi kankangi. ¹⁶Kunauraka, ¿imatatak suiakungi? Atarispá, baugtisarii; chasaka, Iaia Jesusmanda iuiarispá, kam pandariskakunata pasinsiai tukungapa”. Chasami Ananías niwarka.

¹⁷—Nuka Jerusalemma kutiskauramandaka, Diuspa atun wasipi mañakuspa, muskui ukupisina ¹⁸Iaia Jestusami kawagsamurkani. Paika, nukata kasami niwarka: “Utkalla kai Jerusalemmanda llugsispa rii. Kai puiblupi kaugsakgkuna, kam nukamanda ima willakuskata manima uangapa kankunachu”.

¹⁹—Nukaka ainirkanimi: “Taitiku, paikuna allillami iachankuna, nuka tandariduru wasikunapi iaikuspa, kamwa suma iuiarigkunata karsilpi churachispa i asutichispa purikugta. ²⁰Kammanda willag Estebanta wañuchinakura, nuka kikinpasmi, chipi kaspa, wañuchikugsina ruraspá karkani. Nuka kikinmi chi wañuchinakugpa kataridirukunata kawapug karkani”.

²¹—Nuka chasa nigpipas, Iaia Jesuska niwarka: “Rikui kaimanda. Karumi kachangapa kaiki, mana judiukunapagma”.

Suldadukunata mandagwa Pablowa rimanakuskamanda

²²Pablo chasa rimakunkama, chipi kagkunaka upalla uianakurka. Mana judiukunamanda rimagta uiaspaka, tukuikuna, sinchi kaparispá, nii kallarirkakuna:

—Chi mana allilla iuiagta wañuchii. Chiins mana kaugsakuchu—. ²³Chasa kaparispá, rabiawa kikinkunapa kataridirukunata awama bulachispa, alpa wairapi sitanakurka.

²⁴Chasa kawaspaka, chi mandagka suldadukunata nirka:

—Kamkuna kadiruma chi runata iaikuchispa, mana llakispalla asutiichi, pai kikin willarinkama: imamandami paita chasa kaparinakú.

²⁵Ña asutingapa wataska charinakuura, Pabloka chipi saiakuska kapitanta tapurka:

—Kamkunapa willaraiaskapi, ¿allillachu ka, Romamanda runata asutingapa, manara imapas tapuchispalla?

²⁶Chasa uiaspa chi kapitanka, mandagpagma iaikuspa, willagirka:

—Chi runa, Romamandasi ka. Manachar chaiaku, paita asutingapa.

²⁷Chasa willaura, chi mandagka, Pablopagma iaikuspa, paita tapurka:

—Niwai: ¿sutipachu kam Romamanda kangí?

Chiura, Pablo ainirka:

—Sutipami chasa kani.

²⁸Chiura, chi mandagka nirka:

—Nukaka, achka kulkimi iukarkani paganga, chi Romamanda runa tukungapa.

Pabloka ainirka:

—Nukaka, nukapa taitakunamandami Romamanda kani.

²⁹Chasa kagmanda, paita asutingapa kagkuna mana asutispalla anchurirkakuna. Chi mandagpas, Romamanda runata kadinawa watachiska kagta iachaspaka, iapami mancharirka.

Judú taitakuna sugllapi tandariska kaskapi, Pablo kaskamanda

³⁰ Kaiandi, chi mandagka munakurka suma iachangapa: imamandami judiukuna, Pablomanda mana allilla rimanakú. Chimanda, Pablota kacharisipaka, iaia sasirdutikuna i tukui judíu taitakunataka nirka, sugllapi tandarichukuna. Nispaka, Pablota pusaspa, chi tukui tandariskakunapi chaiachigrirka.

23

- ¹ Chi tukui taitakunata allilla kawaspa, Pablota nirka:
 –Taitakuna, nuka, Diuspa ñawipi kuna punchakama suma allilla iuiawami kaugsakuni.
² Chasa niura, Ananías suti iaia sasirdutika Pablota ladullapi saianakuskata nirka:
 –Chi runata simipi piaichi.
³ Pablota ainirka:
 –Kamtami Taita Dius piangapa ka. Kam, mana suma llunchiska wasita iuraiachiskasinami kangí. Kam tiakungimi, Moisés imasa niraiaskapi iachaspa, justisiai rurawangapa. Nigpika, ¿imapatak imasa justisiai rurai niraiaskasina mana allilla ruraspa piachiwakungi?
⁴ Pablota ladullapi saianakugka, paita nirkakuna:
 –¿Chasachu Taita Dius agllaska iaia sasirdutita, kam kamikungi?
⁵ Chiura, Pablo ainirka:
 –Taitakuna, nuka mana iacharkanichu, pai iaia sasirduti kagta. Ñugpamanda librupi willaraiaskapi, kansami niraiá: “Kamba alpapi mandagta mana kamingi”.
⁶ Chipi tandarigpura, sugkuna saduseo; ikuti sugkunaka, fariseo karkakuna. Chasa iachaspa, Pablota kaparirka:
 –Taitakuna, nukapas fariseomi kani. Fariseokunapa wambrami kani. Iachaniami, wañuskakuna ikuti kaugsaringapa kagtakuna; chimandami nuka suma iuiaiwa kaugsani. Chimandachar justisiai tukungapa pusamuwarkangichi.
⁷ Chasa nigmanda, fariseokunawa i saduseokunawa parijuma rabiachinakugsina ainichirinakurka. Chasamanda chipi kagkuna, iskaima tukurkakuna. ⁸ Saduseokuna iachachidurkunami kankuna: wañuskakuna mana massi kaugsaringapa kankuna. Chasallata, anjilkuna i mana kawarig kaugsagkuna mana tiagtami iachachinkuna. Ikuti fariseokunaka ninkunami: saduseokuna mana tianchu niskata tianmi. ⁹ Chasaka, iapa uiaríi chaiagsamurka. Chiura fariseopuramanda sug iachachig taitakunaka, atarispá, rabiawa kaparirakuna:
 –Kai runata ñi ima pandariska mana tarirkanchichu. Nukanchi, ¿imaták iachasunchi? Maikan ispiritu u anjilpaschar paita chasa rimagsamurka.
¹⁰ Chasa tukui tandarigpurami mas sinchi kaparispa ainichirinakurka. Chasa kawaspa, suldadukunata mandagka, mancharispa, iuiakurka: “Pablota, ¡ujalallapas piti piti rurachukuna!”. Chasa iapa uiarinakugmanda, suldadukunata nirka:
 –Chi runakunapa chaugpimanda Pablota llugsichiichi. Nispaka, kamkuna kadiruma ikuti pusaichi.

Judiukuna, Pablota wañuchingapa iuiariskakunamanda

- ¹¹ Chi tuta Iaia Jesuska, Pablota muskuipi kawarigsamurka, kasa nispa:
 –Mana manchakui. Imasami kai Jerusalenpi nukamanda willarkangi: chasallatami kamta chaiangapa ka, Romapipas nukamanda willagringapa.
¹² Kaiandi pakariura, sug judiukuna, Diuspa ñawipi juraspa, suglla iuiaiwa rimarinakurka, kasa nispa:
 –Pablota manara wañuchinkamaka, ñi ima upiai ñi mikui mana mikungapa kanchichu—. ¹³ Chusku chungá ialí runakunami chasa iuiaiwa rimanakurka. ¹⁴ Chi runakunaka, iaia sasirdutikuna i judíu taitakunapagma chaiagrispa, nirkakuna— Nukanchi, Diuspa ñawipimi jurarkanchi, Pablota manara wañuchinkama, ñi ima mikuiipas mana amullingapa. ¹⁵ Chimandaka, kasa rurasunchi: kamkuna, tukui taitakunawa sugllapi tandarispa, chi suldadukunata mandagta mañagríngichi, Pablota kaia pusamuchukuna kamkunapagma; chasaka, paita mas allilla tapuchingapa. Nukanchika, allichirispami kasunchi. Pablo manara kamkunapagma chaiamugpi, ñambillapimi wañuchingapa kanchi.
¹⁶ Pablota panipa wambraka, paikuna chasa rimarinakuskata allilla iachaspaka, suldadukuna kadiruma rirka, Pablota tukui willagringapa. ¹⁷ Chasa uiaspa Pablota, sug kapitanta kaiaspa, nirka:
 –Kai musuta kamba mandagpagma pusapuai. Pai, ima willagsamungapami suiaku.
¹⁸ Chiura chi kapitan, mandagpagma chi musuta pusaspa, nigrirka:
 –Chi karsilpi kaska Pablo, kaiawaspa, mañawarkami, kai musuta kambagma pusamungapa. Kamta imachar willangapa ka.
¹⁹ Chiura chi mandagka, musuta makimanda apispa, sugsinama sapalla pusaspa, tapuchirka:

—¿Imatak willawangapa kangi?

²⁰ Chiura, chi musu ainirka:

—Judiukuna, suglla iuiawasi rimanakurka, kamta kasa mañagsamungapa: kaia, Pablota judíu taitakunapagma pusangapa; chaiachigrispaka, paita mas allilla tapuchingapa. ²¹ Paikuna chasa nigsamuggipas, mana paikunata uiakungi. Chusku chungala iali runakunasi pakalla chapangapa kankuna, ñambipi paita wañuchingapa. Paikuna, Diuspa ñawipisi jurarkakuna, Pablota manara wañuchinkama, ñi ima upiai ñi mikui mana mikungapa. Kunaura, allichiriskasi suianakú, kam imasa ainiskata iachangapa.

²² Chasa willaura, chi mandagka musuta kacharka, kasa nispa:

—Kam kaipi ima willawaskata ñi pitapas mana willakungi.

Atun mandag Felixpagma Pablota kachaskamanda

²³ Chasa nispa, iskai kapitankunata kaiaspa, nirka:

—Chakiwa ringapa iskai patsa suldadukunata kaiangichi. Kaballupi ringapa kanchis chungakunata i iskai patsa lansa iukagkunatapas allichingichi, kunantuta las nuibi Sesarea puibluma ringapa. ²⁴ Chasallata, sug kaballukuna Pablomandapas allichichukuna; chasaka, atun mandag Felixpagma allilla kawari chaiagringapa.

²⁵ Chasa nispa, sug karta iskribirka, kasa nispa:

²⁶ “Nuka, Klaudio Lisias, kam atun mandag Felixtami niiki: ‘¿Allillachu kapuangi?’.

²⁷ “Kai runata, judiukuna apispa, ña wañuchingapa charinakuskatami nukaka, pai Romamanda kagta iachaspa, nukapa suldadukunawa michaspa kispichigrirkani. ²⁸ Nispaka, imamanda paita wañuchingapa rimanakuskata iachangapa, judiupuramanda taitakunapagmami paita pusarkani. ²⁹ Chipika, nuka mana tarirkanichu, ñi ima justisiai willaraiaskapi pandarig kagsina wañuchii tukungapa u karsilpi churai tukungapa chaiagta. Paikunapa ñugpamandakuna willaraiaska sakiskapi mana chasallata rurakuskamandallasi wañuchingapa munanakurka. ³⁰ Paita wañuchingapa suianakugta iachagsamuskallowami paita kambagma kacharkaiki. Paimanda mana alli kagta willanakuskatapasmi kaiarkani, paikuna ima ningapa kaskata kam kikinpa ñawipi willagríchukuna.

“Kaiakamami niiki”.

³¹ Chi suldadukunaka, imasa niskasina tutawanta Pablota pusarkakuna Antípatris suti puibluma. ³² Kaiandika chakiwa rinakug suldadukunaka, paikuna kadiruma kutirkakuna, kaballupi rinakugllawa Pablota sakispa. ³³ Chikunaka, Sesarea puibluma chaiagrispa, atun mandag Felixta karta kachaskata kuagrirkakuna. Pablotalapas chipi sakirkakuna.

³⁴ Chi kartata kawaspaka, chi mandagka Pablota tapurka:

—Kam, ¿maikan alpamandatak kangi?

Chiura, Pablo ainirka:

—Silisiamandami kani.

³⁵ Chasa uiaspaka, nirka:

—Kammanda mana alli kagta willagkuna chaiagsamuurami kamta uiasaki—. Chasa nispa, kacharka, Herodespa atun wasipi charinakungapa.

24

Atun mandag Felixpa ñawipi, Pablo kispiringapa rimariskamanda

¹ Pichka punchapika, iaia sasirduti Ananías, sug judíu taitakunapas i Tértulo suti paikunamanda rimag chipi chaiagrirkakuna. Nispaka, mandag Felixta Pablomanda willai kallarirkakuna. ² Pablota Felixpa ñawima chaiachigriura, Tertuloka, paimanda willaspa, kasami ailastimai kallarirka:

—Iapa atun mandag Félix, kam sumaglla kawaskamandami nukanchi suma allilla kaugsanakunchi. Kam allilla iuiariskamandami kai alpapi kaugsagkunamanda kam imasa kawaskasinawa suma tukurka. ³ Nukanchi chasa maipipas suma chaskispa, tukui-manda kamta iapami “Pai Siñur” ninchi.

⁴ —Kunaura, nuka mana iapa unaiachingapa, kaillami mañai: kamba suma pasinsia iukaspa, sug mana unaila uiawai. ⁵ Kaipi saiaiku chi runaka; ialig ungui churagsinami ruraku. Tukui judiukuna kaugsanakuskapimi sug rigcha sug rigcha iuiachispa puriku, iapa killachinakugta. Pai, chi Nazaret puiblumanda runawa iuiarigkunapa iaia tukuskami puriku. ⁶ Jerusalenpi Diuspa atun wasitapas ianga wasitasinami mapaiachingapa munakurka. Chasamandami paita apirkanchi, [nukanchita imasa niraiaskasina justisiai rurangapa. ⁷ Chiura Lisias suti mandagka, chaiagrispa, nukanchipa makimanda rabiawami paita kichugrirka. Chasa kichuspaka, nukanchita nirkami, kamba ñawipi paimanda

mana alli kagta willagsamungapa.] ⁸ Kam kikin, paita tapuchispami iachapuankangi, tukui nukanchi paimanda willanakuskaka sutipa kagta.

⁹ Judiukuna chipi kagkunapas nirkakuna:

–Tértulo ima willakuska, chasami ka.

¹⁰ Chi atun mandagka Pablota makiwa rimangapa kawachiuraka, Pablota rimai kallarirka, kasa nispá:

–Nuka iachanimi, achka watakuna kam sutipa kai alpapi sumaglla kawaspa, justisiai rurag kagta. Chimandami nukaka, mana manchaspalla, kam kikinpa ñawipi kispiringapa iuiani. ¹¹ Kam pudipuankangimi, pitapas tapuchispa, kasa iachapuungapa: nukaka, chungá iskai punchallami Jerusalenma chaiagriska karkani. Chimaka riskami karkani, Taita Diusta kungurigringapa. ¹² Ñi maikanwa piñachinakuskata ñi runakunata sug rigcha sug rigcha iuiachikuskata mana tariwarkakunachu. Ñi Diospa atun wasi ukupi, ñi judiukuna tandariduru wasikunapi ñi puiblu ñambikunapi mana maipipas chasa rurakuskata tariwarkakunachu. ¹³ Kunaúra nukamanda ima juchachiwaskakuna sutipa kagsina mana kawachingapa pudingapa kankunachu.

¹⁴ –Nigpika, nuka kasami willariiki. Chi Jesuswa iuiagkuna mana allilla kagsina paikuna nigpikunapas, nukaka, chi Jesuswa suma iuiaspa, nukanchipa ñugpamanda taitakunapa Taita Diosmanda allilla ruragmi kani. Chasa, tukui ima Moisés willaraiaskamanda i Santu Espirituwa rimagkuna ima willaraiaskakunamandapas suma iuiaspa ruragmi kani. ¹⁵ Imasami kai kikin runakuna, Taita Dioswa iuiankuna: nukapas chasallatami iuiani, allilla i mana allilla rurag wañuskakunatapas kaugsarii tiangapa kagta. ¹⁶ Chimandami nuka munani, Diospa ñawipi i runakunapa ñawipipas imaurapas sumaglla allilla iuiaiwa kaugsangapa.

¹⁷ –Unai watakunapimi ikuti nukapa alpama kulki tandachiskakunawa chaiagrirkani, mana iukagkunata karangapa; chasallata, Taita Diusta kamariku sakipungapa. ¹⁸ Nuka chasa rurakuuraka, Asiamanda sug judiukuna Diospa atun wasipimi kawawarkakuna. Chipika, nuka Diospa ñawipi maillariskasinami tukuska karkani. Iapa achkakunawa mana karkanichu. Ñi piwapas mana uiarikurkanichu. ¹⁹ Chi Asiamandakunami iukankuna, kamba ñawipi nukamanda willagsamungakuna, nuka mana allilla imapi ruraska kagpi. ²⁰ Chasallata, imasami judiu taitakuna tandariska kaskakunapi nuka kaura, mana allilla ima ruraska kagta kawawarkakuna: kaiipi kagkuna, chasallata kamta willachukuna. ²¹ Kasallami, paikunapa chaugpipi saiarispa, kaparirkani: “Wañuskakuna ikutimi kaugsaringapa kankuna; chimandami nuka suma iuiani. Chimandachar kunaúra justisiai tukungapa pusamuwarkangichi”.

²² Atun mandag Felixka, Jesuswa tukuskakuna imasa kaskakunamanda allilla iachaspa, chipi kagkunata nirka:

–Lisias suti suldadukunata mandag chaiamuurami kamkuna ima ninakuskaka allilla tapuchispa iacharigsamunga—. Chasa nispaka, chi rimanakuskamanda suurakama sakirka.

²³ Chiwa, sug kati mandagta kacharka, Pablota mana wataspalla wichkangapa, kasa nispá:

–Maikan paipura ima ministiska sakipungapa samugpikunaka, ianga kawangi.

²⁴ Sug punchakuna ialiuira, Félix warmindi Drusila sutiwa ikuti Pablopagma chaiagrirkakuna. Chi warmika, judiami karka. Chaiagrispaka, Pablota pusangapa kacharka. Chaiachigriura, Pablota Jesucristomanda willai kallarirka pai imasa iuiakuskasina. ²⁵ Nii kallarrirka imasa allilla ruraspá kaugsangapa chaiagta, kikin mana allilla iuiaskakunata sakin-gapa; nispaka, imasa Taita Dios justisiai rurangapa kagta.

Felixka, chasa uiaspaka, iapa mancharirka. Nispaka, Pablota nirka:

–Kunaúra, upalla ripuai. Nuka luar iukaurami ikuti kaiasaki.

²⁶ Chiuramandaka, Félix iuiakurka: “Pablo kulki karawantra, nuka kacharingapa”. Chasa iuiakuspami paita ikuti ikuti kaiiakurka, paiwa rimanakungapa. ²⁷ Iskai wata ialiuira, Félix, atun mandag kaskamanda llugsirka. Paipa kuintaka, Porsio Festo suti runami atun mandag tururka. Felixka, judiukunata kuntintachingapa iuiarispami Pablota karsilpi sakirka.

25

Atun mandag Festo kaskapi, Pablo kaskamanda

¹ Festoka, atun mandag tukuspaka, kimsa punchapi Sesarea puiblumanda rirka Jerusalenma. ² Chipi chaiagriuraka, iaia sasirdutikuna i sug judiu taitakunapas, Pablomanda mana allilla ruraska kagta willai kallarirkakuna. ³ Kasami mañarkakuna:

—Pablota Jerusalemna chaiachimungapa kachapuai—. Chasa mañaspaka, iuianakurka, Pablota Jerusalemna ñambi pusanakuskapi, paita wañuchingapa.

⁴ Chiura, Festoka ainirka:

—Pablo, Sesarea puiblupimi wichkaraiá. Nuka kikinmi chima utkalla ringapa kani. ⁵ Chimanda kam kikinpura taitakuna, nukawami chima risunchi. Pai ima mana allilla ruraska kagpika, chipimi nukata willawankangichi.

⁶ Mai pusag u chunga punchalla unaiaspas, Festo, Jerusalemmanda Sesarea puibluma kutirka. Chaiagriska sug kaiandilla, pai, mandag tiaridirupi tiarispas, Pablota pusangapa kacharka. ⁷ Ña Pablo chipi chaiagriura, Jerusalemmanda chaiagriska judiukunaka paita muiugta saiarigrirkakuna. Achka mana allilla ruraska kagta paimanda willai kallarirkakuna. Chasa willanakuspapas, mana pudirkakuna, sutipa kaskata ñi imapipas taringapa.

⁸ Pablota, kikin kispiringapa, kasami ainirka:

—Nuka, judiukunapa ima rurangapa niraiaskamanda, Diuspa atun wasimanda, ñi Romapi iaia mandagmanda ñi imapipas mana allilla mana ruraska kanichu.

⁹ Festoka, judiukunata kuntintachingapa iuiarispas, Pablota tapurka:

—¿Jerusalemna ringapachu munangi; chipika, nuka kamta tukui tapuchingapa?

¹⁰ Chiura, Pablota ainirka:

—Kaipimi kani Romamanda iaia mandagpa mandadiru ukupi. Kaillapimi tapuchiwai iukangi. Kam kikinpas allillami iachangi, nuka, judiukunata ñi imapipas mana jiru ruraska kagta. ¹¹ Sutipa nuka wañuchingasina pandarii iukagpika, iukanimi wañuchii tukunga. Ikuti paikuna ñi ima nukamanda willaska mana sutipa kagpika, kam mana pudingichu, nukata paikunapa makima ialichiwanga. Chimanda mañaikimi: Romapi iaia mandagpagma kachawai.

¹² Pablo chasa niura, Festoka, paita allilla iuiachigkunawa rimanakuspa, nirka:

—Iaia mandagpagma ringapa mañarkangi. Paipagmami ringapa kangi.

Atun mandag Agripa, Pablota kaskamanda

¹³ Sug punchakuna ialiskauramandaka, sug alpata atun mandag, Agripa suti, Berenise suti paipa warmiwa Sesarea puibluma chaiagrirkakuna, Festota: “Puangi” ningapa. ¹⁴ Paikuna ña achka punchakuna chipi chisianakuura, Festoka chi atun mandagta Pablomanda willarka, kasa nispas:

—Kaipimi ka sug runa, Félix karsilpi sakiska. ¹⁵ Nuka Jerusalemni kagriuraka, iaia sasirdutikuna i sug judú taitakunapas, chi runamanda willawaspas, mañawanakurka, justiaspas wañuchingapa. ¹⁶ Nukaka, paikunata ainirkani: “Romamanda mandakuska alpakunapi kasa rurangapami niraiá: maikan runamandapas mana alli ruraska kagta willaura, chi runa manara willagkunapa ñawipi kispichiringapa willarigpika, manara paita wañuchingapa pudirinchu”.

¹⁷ —Chimanda, paikuna nukapagma chaiagsamuuraka, nuka, mana unaiachispalla, kaiandi mandag tiaridirupi tiarispas, kacharkani, chi runata pusagringapa. ¹⁸ Chaiachimuura, paimanda willawaskakunaka, nuka ima iuiakuskasina mana rimarkakunachu. ¹⁹ Kasallami willawanakurka: pai kikinkuna ima iuianakuskamanda i sug wañuska Jesús sutimanda. Pablota nikurkami, chi Jesuska ikuti kagsariska kagta. ²⁰ Nuka chasa willanakuskata uiaspaka, mana iachariwarka ima ruranga. Chimanda, Pablota tapurkani: “¿Jerusalemna ringapachu munangi; chipika, nuka kamta tukui tapuchingapa?”. ²¹ Chiura, Pablota mañawarkami: “Nukata Romapi iaia mandagpagma kachawai, pai tapuchiwachu”. Chimandami paita kacharkani, karsilpi churangapa, imaura iaia mandagpagma kachangapa chaiankama.

²² Chasa uiaspa, Agripaka Festota nirka:

—Nukikinpasmí munantrani, chi runata uiangapa.

Chiura, Festo ainirka:

—Kaiami paita uiasunchi.

²³ Kaiandi, Agripa Berenisewanta, saldudukunata mandagkuna i chi puiblupi mas atun taitakunapas, Festo mandadiru atun ukuma iapa sumaglla churariska iaikugrirkakuna. Chiura, Festoka kacharka, Pablota pusagringapa. ²⁴ Nispaka, Pablo ña iaikugriura, nirka:

—Atun mandag Agripa i tukui nukanchiwa kaipi kagkunapas, kai runata kawaichi. Paimanda, Jerusalemni i kai Sesareapipas, tukui judiukunami kaparispas mañawanakurka, paita wañuchingapa. ²⁵ Ikuti nukaka mana kawagsamunichu, ñi imapipas jiru ruraskamanda, paita wañuchingapa chaiakugta. Paika, nukata mañawarkami: “Romapi iaia mandagpagma kachawai, pai tapuchiwachu”. Nigpi, chimandami iuiariwarka, chi mandagpagma paita kachangapa. ²⁶ Nuka, paimanda mana imapas allilla iachanichu, iaia mandagpagma willai kachangapa. Chimandami kam atun mandag Agripapa ñawima i tukui kaipi kagkunawa paita pusamungapa kachani; chasaka, kam paita tapuchiupaura,

nuka paimanda imasa uisakata willai kachangapa. ²⁷Nukata mana allilla chaiawakunchu, maikan karsilpi kaskata kachangapa, pai ima ruraskata mana willaspalla.

26

Atun mandag Agripa kaskapi, Pablo kispiringapa rimariskamanda

¹ Chasa niura, Agripaka Pablota nirka:

—Kunaurami pudingi, kam kikinmanda allilla imasa chaiaskasina rimaringapa.

Chiura Pablota, maki atarichispa, nii kallarrirka:

²⁻³ —Atun mandag Agripa, kam allillami iachangi, tukui nukanchi judiukunapura imasa kustumbri iukaskakunamanda i nukanchi kikinpura imamanda rimanakuskamandapas. Chimandami nukata iapa alli iuiachiwá, kamba ñawipi judiukuna tukui ima nukata juchachispa niwanakuskamanda rimaringapa. Nukami mañaiki: mana rabiariispalla uiawai.

⁴ —Tukui judiukuna allillami iachankuna, nuka imasa uchullamandata nukapa alpapi i Jerusalempi kaugsagta. ⁵ Nuka, musu kauramandatami fariseo kani. Judiupuramandapas fariseokunaka, Taita Dius ima rurangapa niskata mas allilla ruragkunami kanchi. Chitapasmi judiukuna nukamanda allilla iachankuna. Paikuna, munaspaka, pudinkunami, nukamanda chasallata willangakuna.

⁶ —Kunauraka, Taita Dius nukanchipa ñugpamanda taitakunata pai agllaska Cristota kachamungapa niskata nuka suma iuiagmandami justisiai rurawangapa munanakú.

⁷ Nukanchipa chungá iskai ñugpamanda atun taitakunapa wambrakunapa wambrakunawa puncha i tuta Taita Diusta kungurispa iuiarispami suianakunchi, Taita Dius imasa niskata pai kikin ruragsamungapa. Nuka chasa iuiarispá suiakugmandami judiukunaka mana allilla kagta nispa juchachiwanakú. ⁸ Kamkunaka, ¿imapatak iuianakungichi, Taita Dius, wañuskakunata kaugsachingapa mana pudigta?

⁹ —Ñugpata nukapas, mana iachaspa, iuiarkani: “Chaiawakumi, chi Nazaret puiblumanda Jesuswa tukuskakunata mana llakispalla jiru paikunata rurangapa”. ¹⁰ Chasami Jerusalempi rurarkani. Taita Diusmandalla sumaglla kaugsagkunata, achkakunatami karsilpi churachirkani. Iaia sasirdutikunata chasa rurangapa mañaspami chasa rurarkani. Chi Jesuswa tukuskakunata wañuchinakuura, nukapas chasallata iuiaiwami paikunawa karkani. ¹¹ Judiukuna tukui tandariduru wasi ukuma iaikuspa, achka biajimi Jesuswa suma iuiagkunata asutichirkani; chasaka, Jestusa kungaringapakuna. Iapa rabiawami paikunata kalpachidur karkani. Sug alpakanapi kaugsanakuskapagmapasmi chaiagridur karkani, Jesuswa tukuskakunata apingapa.

¹² —Nuka chasallata rurangapa iuiaiwami Damasko puibluma rikurkani. Iaia sasirdutikuna iskribiska karta kuawaskawami chasallata apingapa rikurkani. ¹³ Ñambi rikuskapika, chaugpuncha diulpillami awanigmanda indimandapas mas sinchi sindi punchaiachiwagsamurka. Chi punchaiachii, nukata i nukawa rinakuskatami muiuchigsamurka. ¹⁴ Tukuikunami alpama urmarkanchi. Chiuraka, hebreo rimaiwa uariwagsamurka, kasa nispa: “Saulo, Saulo, ¿imapatak puchukawangapa iuiailawa purikungi? Imasami wagrata tawinawa takaura, tawinawa aitaspa, nanachiri: chasalatami kam kikin rurarikungi?”

¹⁵ —Chiura, nuka tapurkani: “Kam Taitiku, ¿pitak kangi?”

—Chasa tapuura, Iaia Jesuska ainiwarka: “Nukami kani Jesús. Nuka kikitami puchukawangapa iuiailawa purikungi. ¹⁶ Chasa kagpipas, atarispá saiarí. Kasamandami kamta agllaspa kawariiki: nuka ima niskata uiawaspa rurangapa; chasallata, nuka kikinmanda kam ima kawaska i kunauramanda kam ima kawangapa kaskata kawaspa willaspa puringapa. ¹⁷ Nuka kikinmi judiukunamanda i mana judiu kagkunamandapas kispichisaki. Paikunapagma kachasakimi, ¹⁸ paikunapas, amsapisina kaugsanakugmanda Taita Diuspa suma iuiaita apispa, punchaiachigsinawa sumaglla kaugsangapakuna; chiwanka, iaia kikuwa mana alli kaugsaita sakispa, Taita Diuswa tukugsamungapakuna. Chasa nukawa suma iuiarispaka, pandariikunata pasinsiaimi tukungapa kankuna; chasapika, tukui nukamandalla sumaglla kaugsagkunawa Taita Dius niskata chasingapa”.

¹⁹ —Atun mandag Agripa, Iaia Jesús chasa suma luarmanda kawariwauramandataka, pai tukui imasa niwaskasinami nuka suma uiaspa rurani. ²⁰ Damasko puiblupimi kallarrirkani; nispa, Jerusalempi i Judea alpa suiu; nispa, mana judiu kagkunapagpipasmi willaspa purirkani, paikuna pandariskakunata sakispa, Taita Diuswa tigrangapa; chiwanka, mana allilla ruraikunata sakispa, alli ruraikunawa kaugsangapa.

²¹ —Chasa kagmandami judiukunaka, Diuspa atun wasi ukupi apiwaspa, munanakurka wañuchiwangapa. ²² Chasa kagpipas, Taita Dius kispichiwagmandami kunankama atunkunata i uchullakunata willai apakuni. Moisés i Santu Ispirituwa rimagkuna ñugpamanda willarkakuna ima tukugsamungapa kagta; chillatami nukapas willakuni. ²³ Ñugpamandatami paikuna willaska karkakuna, Taita Dius agllaska Cristoka, iapa llakii

nanai iukaspa, wañuchii tukungapa kagta. “Paika, tukui wañuskakunamanda ñugpami kausaringapa ka. Chiuramandaka, paimanda willaimi tiangapa ka; judiu i mana judiu kagkunapa iuiaikunata suma punchaiachiimi tiangapa ka”.

²⁴ Pablo kispiringapa iuiaiwa chasa rimakuuraka, Festoka paita kaparirka, nispa:

—Kam, upami tukurkangi. Iapa iachaikukuspami kamba uma tuntiarirkangi.

²⁵ Pabloka ainirka:

—Atun mandag Festo, nuka mana upaiaska kanichu. Allilla iuiaipimi nuka, sutipa kaskata rimanakuikichita. ²⁶ Pai atun mandag Agripapas, tukuimi chikunata allilla iachá. Nuka mana iuianichu, chasa pasariskata, pai mana iachagta. Pakallapi chasa mana pasarirkachu. Chasa kagmandami nuka, paipa ñawipi mana manchaspalla rimani.

²⁷ Atun mandag Agripa, Santu Ispirituwa ñugpamanda rimagkuna imasa willaskakunata, ¿manachu suma iuiangi? Iachanimi, kampas chita suma iuiagta.

²⁸ Chiura Agripaka, Pablota ainirka:

—Maillamandami nukatapas Jesucristowa tukuskakunawa kangapa iuiachiwangi.

²⁹ Chasa ainiura, Pabloka nirka:

—¡Chasa Taita Dios munapuantra! Maillamanda u achkamanda imapas, kamllapas mana; jamalai kuna puncha kaipi tukui kagkunapas, nukasina iuiantrangichi! Nuka kai kadinakunawa wataskasinaka, mana.

³⁰ Pablo chasa niuraka, atun mandag Agripa, atun mandag Festo, Berenise i tukui chipi tianakugkunapas saiarirkakuna. ³¹ Rinakuskapika, kikinpura rimarinakurka, kasa nispa:

—Chi runata ñi imapipas mana chaiakurkachu, wañuchii tukungapa ñi karsilpi kangapa.

³² Chasa rimarinakuskapi, Agripaka Festota nirka:

—Iaia mandagpagma kachai tukungapa mana mañanmi, alli karkami, paita kacharingapa.

27

Roma atun puibluma, Pablo kachai tukuskamanda

¹ Nukanchita Italia suti alpama ringapa ña chaiaura, Pablota i sugkuna karsilpi kaskunatapas Augusta suti batallunpa kapitan Julio sutitami mingarkakuna. ² Chasaka, nukanchita chaiarkami, Adramitio sutimanda barkupi iaikungapa. Chi barku, Asia alpapi iaku pata pata sugpi sugpi iaikuspa ringapa karka. Masedonia alpa i Tesalónika puiblumanda Aristarko suti runapasmi nukanchiwa sugllapi rirkanchi. ³ Sug kaiandika, Sidón patamami chaiagrirkanchi. Chipika kapitan Julioka, suma llakirisa, Pablota sakirka, paipa rigsidukunapagma ringapa, ima ministiskakuna paita karachukuna.

⁴ Chimanda nukanchi, lllugsispa, iakupi rinakuuraka, sinchi waira sugsinama tanga-nakugmanda, muiuspa, Chipre alpa mana waira tiaska ladutami ialirkanchi. ⁵ Silisia i Panfilia alpakuna pata pata lamar iakupi ialispaka, Lisia suti alpapi Mira sutimami chaiagrirkanchi.

⁶ Chipi kapitanka, Alejandriamanda Italiama rikuska barkutami tarirka. Chimami nukanchita ialichirka. ⁷ Achka punchakuna waira arkgamanda, iapa allimanda rispa, Gnido suti sug ladu chimba chaiagrirkanchi. Iapa sinchi wairakugmanda, mana chima pudirkanchi iaikugringapa. Chiwanka, Salmón suti puibluta karumandalla kawaspaa ialispa, Kreta alpa mana waira tiaska ladutami rirkanchi. ⁸ Waira arkgamanda, iapa allimanda rispa, Alli Saiariduru suti patamami chaiagrirkanchi. Chi patamanda Lasea suti puibluma mana iapa karu kanchu.

⁹ Iapa waira arkai tukuspa, iapa unaiaspami rinakurkanchi. Atun tamiami ña chaiamungapa karka. Chimandami ña mana alli karka, iakupi ringapa. Chimanda Pabloka, chipi kagkunata iuiachikurka, kasa nispa:

¹⁰ —Taitakuna, mana alli pasangasinami kawariwaku. Kai barkupi ima apanakuska, kikin barku i nukanchi kikinkunapas pudinchimi puchukaringakuna.

¹¹ Suldadukunata mandagka, Pablo chasa nikuskata mana munarka uangapa. Barkupi pusag i chi barku duifullatami chi mandag munarka uangapa. ¹² Chi patapi tamia punchakuna ialichingapaka, manima kawarirkakunata, allilla kangapa kagsina. Chimandami ñalla tukuikuna ninakurka:

—Kaimanda llugsisunchi. Pudirintrapash, Fenise suti patapi chaiagrispa, tamia punchakuna chipi ialichingapa—. Chi puiblupi, Kreta alpapi kaspaa, tamia punchakuna mana iapa chima sinchi waira piagriduru karka.

Lamarpi askurinti sinchi waira piaskamanda

¹³ Masama ringapa munanakuskasinama waira samugmanda, paikunaka iuiarirkakuna: “Allimi ka, chima ringapa”. Nispaka, barkuta saiachidiruta aisaspaa, Kreta alpa pata pata rii kallarirkanchi. ¹⁴ Mailla rinakugllapika, iapa sinchi waira, diulpilla chi

alpanigmanta atarirka. ¹⁵ Chiwanka, barkuta sugsinama tangai kallarirka. Waira imasa apakuskata mana sinchiachingapa pudirirkachu. Chiwanka, apai tukurkanchi masama tangakuskama. ¹⁶ Kauda suti uchulla isla waira piakuska wasa ladu ialinakuspaka, kispichidiru uchulla kanuata nukanchipa barku aliukuskata iapa mana alli pasaspami pudirkanchi, apispa barkuma iaikuchingapa. ¹⁷ Chita iaikuchispaka, barku muigta wasakunawa watarakuna, mana pakiringapa. Nispaka, Sirte suti iakupi piñakuna tiaskawa mana takarigringapa, barkuta purichidiru linsuta uraikuchispa, sakirkakuna; chasalla, masamapas wairawa apai tukungapa.

¹⁸ Sug kaiandi mas sinchi waira chaimugmanta, barkupi ima apanakuskata iakuma sitai kallarirkakuna. ¹⁹ Kimsa punchama rinakuspa, barkuta shamaichingapaka, kikin-kunapa makiwa chi ukupi ima tiaskata sitarkakuna. ²⁰ Iapa achka punchakunami indi ñi istrillakuna mana kawarirka. Iapa manchangasina iaku, nukanchita sinchi piakurka. Chasapika, mana iuianakurkanchi: “Kaugсами llugsisunchi”.

²¹ Ña achka punchakunami mana mikuska karkanchi. Chimanda Pabloka, chipi kag-kunapa chaugpipi saiarispa, nirka:

—Taitakuna, ¿manachu nuka nikurkani: “Kreta alpamanda mana llugsisunchi”? Chasaka, manami kasa llakiiwa kanchi. ²² Kunaauraka, kasami niikichita: sinchi sungu iuiarisunchi. Kam kikipuramanda ñi pipas mana wañungapa kangichichu. Kai barkullami puchukaringapa ka. ²³ Nuka, Taita Diuspami kani. Paipa lutrinsinami kani. Chimandami sug anjil pai kachamuskaka, kunantuta kawariwarka. ²⁴ Kasami niwarka: “Mana manchakui. Iukangimi, Romapi iaia mandagpa ñawima chaiagringa. Kammandami tukui kamwa rinakuskatapas Taita Dius wañuita kispichingapa ka”. ²⁵ Chimandami nini: taitakuna, mana manchanakuchi. Taita Diusllawami nukaka suma iuiani. Paipa anjil imasa willawaskasina, chasami tukungapa ka. ²⁶ Iukanchimi, sug isla alpama imasapas chaiagringa.

²⁷ Ña chungu chusku puncha i tutakuna wairallawa apai tukunakuspaka, Adriático suti lamar iakupi ialinakurkanchi. Ña chaugpi tuta kangasinaura, barkuta pusanakugta rigcharkakunata, ña sug alpama chaianakugringsina. ²⁸ Tupudiru kachariuraka, sug chungu tupusinami jundu karka. Chimanda mailla karulla riskapika, ikuti tupudiru kacharirkakuna. Chipika, kanchis tupulla ña tukugsamurka. ²⁹ Iaku uku piñapi takaringapa manhaspa, barkuta saiachidiru chusku llasa irukunatami barku wasa ladu kacharirkakuna, saiachingapa. Chasa kacharispaka, askurintimi iuianakurka: “¡Amalái utka pakaripuantra!”.

³⁰ Barkuta pusagkunaka, alpama mitikungapa iuiaiwa uchulla kanuata iakuma uraikuchii kallarirkakuna, kasa llullaspa:

—Barku ñugpa ladu saiachidiru irukunatami iakuma uraikuchingapa kanchi.

³¹ Pabloka, kapitanta suldadukunawanta kasami nirka:

—Kai nukanchita pusagkuna rigpikunaka, kamkunaka wañuita mana kispiringapa kangichichu.

³² Chasa niura suldadukunaka, chi uchulla kanuata chariraiaska waskakunata kuchuspa, urmachirkakuna.

³³ Pakarii suianakunkama, Pabloka tukuikunata nirka:

—Maillapas mikuichi. Ña chungu chusku punchami, suiaspa, mana mikuspalla kangichi.

³⁴ Chimandami niikichita: maillapas mikuichi; chasaka, mas wapulla tukungapa. Kam kikinkunapa umamanda ñi sug agcha mana kichui tukungapa kangichichu.

³⁵ Chasa nispaka, sug tanda apispa, tukuikunapa ñawipi “Pai Siñur” Taita Diusta nispa, tandata chaugpispa, mikuimi kallarirka. ³⁶ Chasa kawaspa, tukuikunata alli iuiachigsamurkakunata. Chiura, paikunapas mikui kallarirkakuna. ³⁷ Chi barkupi, iskai patsa kanchis chungu sugtakunami karkanchi. ³⁸ Ña sagsagta mikuspaka, triguta iakuma sitarkakuna, barkuta shamaichingapa.

Barku puchukariskamanda

³⁹ Ña pakariuraka, mana iacharirkakunata maikan alpama chaianakugrigta. Chi barkumanda sug suma plaiami kawarkanchi. Chasa kawaspa, barkuta pusagkuna iuiarirkakuna: “Pudintranchipash, chi plaiama barkuta chaiachigringapa”. ⁴⁰ Chasa iuiarispaka, barkuta saiachidiru irukunata kacharispaka, iaku ukuma urmachirkakuna. Barkuta kaima chima pusag palakuna wataraiaskakunata paskarkakuna, mana muruchulla ringapa. Ñugpa ladu purichidiru linsuta awama churarkakuna; chi linsuwaka, waira tangaspa, alpama chaiachigringapa. ⁴¹ Ña kailla rinakuskapika, iskandi ladu iaku jundu chaugpipika awalla ñutu alpa tiaskapimi pambarigrirka. Chiura chi barku ñugpa

ladu, pambarispaka, urai singa kasilla kidagsamurka. Ikuti kati ladutaka, iapa sinchi iaku piakugrispa, pakichiimi kallarirka.

⁴² Chasa tukugsamugmanda, suldadukunaka nirkakuna:

—Kaipi prisu apanakuskata, tukuikunatami wañuchii chaiaku. Mana kagpika, iakupi waitaspami mitikungakuna.

⁴³ Ikuti paikunata kapitanka, Pablota kispichingapa iuiaspa, nirka:

—Chasa mana chaiachu—. Kasapasmi nirka— Waitangapa pudigkunaka, ñugpa iakuma saltaichi, tustama llugsingapa. ⁴⁴ Ikuti mana pudigkunaka, barkumanda pakiriska tablakunapi u imapipas wangurispas llugsiichi.

Chasapimi tukuikuna alpama kaugsa llugsirkanchi.

28

Malta alpapi, Pablo kaskamanda

¹ Chasa kispiriskauramanda, iachagsamurkanchimi chi alpa, Malta suti kagta. ² Chi alpapi kaugsagkunaka, tukui nukanchita iapa allillami chaskirkakuna. Tamiawa iapa chiri kagmanda, achka nina churaspami nukanchita kunungapa kaiarkakuna. ³ Pablo chamisa tandachispa, chi ninapi sitakuura, sug kanidur kulibraka, nina rupakuskanigmanda mitikukuspa, paipa makipimi saltaspa wangurirka. ⁴ Makipi chasa wanguriskata kawaspaka, chipi kaugsanakug kikinpura nirkakuna:

—Kai runaka, wañuchidurchar ka. Iakumanda kispigpipas, justisiag diusmi kawaku. Chimandami wañungapa ka.

⁵ Pabloka, chi kulibrata ninama chabsirispa sitarka. Ñi imapas mana paita turkurka.

⁶ Chipi kawanakugka, iuiaspa suianakurka: “Maki pungingami; diulpillami wañuska urmanga”. Ña unai suianakuspaka, kawarkakuna ñi ima mana tukugta. Chiura, sug rigcha iuarispa, nirkakuna:

—Kai, diuschar ka.

⁷ Mana iapa karullapi kaugsakurka chi alpata mandag, Publio suti. Chi runapa wasipi kimsa punchami iapa sumaglla karkanchi. ⁸ Chi mandagpa taita, iapa rupaiwa i iawar ialichiiwami sirikurka. Chasa iachaspaka, Pabloka ungupagma rirka. Nispaka, Taita Diusta mañapuspa, umapi maki churaspa, aliachirka. ⁹ Chasa iachariura, chi alpapi kaugsanakug, tukui ungugkunata Pablopagma pusarkakuna, “Ambipuai” mañangapa. ¹⁰ Tukui ambirigkunaka, nukanchita sumagllami: “Pai Siñur” nirkakuna. Nukanchi ña chi alpamanda llugsinakuura, nukanchita tukui ima ministiskami kararkakuna.

Romama, Pablo riskamanda

¹¹ Kimsa killa ialiuraka, nukanchita chaiarkami, sug barku Kástor i Pólux suti diuskunapa imajin tiaskapi iaikungapa. Chi barku, Alejandria puiblumanda chaiagrispa, tami punchakuna kagmanda, chi Malta alpallapita chisiaska karka. ¹² Chi barkupi llugsispaka, Sirakusa suti patama chaiagrirkanchi. Chipika, kimsa punchami karkanchi. ¹³ Chimanda llugsispaka, alpa pata pata ialispa, Rejio sutima chaiagrirkanchi. Kaiandika, alli makinigmanda suma waira chaiagsamurka. Chi wairawaka sug kaiandi Puteoli sutimami chaiagrirkanchi. ¹⁴ Chipika, Jesuswa tukuskakunawami kawanakurkanchi. Paikunaka, nukanchita mañarkakuna:

—Kaillapi nukanchiwa chisiaichi sug kanchis puncha—. Chimanda, chakiwa Romama rirkanchi.

¹⁵ Romapi kaugsag Jesuswa tukuskakunaka, nukanchi chaianakugta iachaspa, Foro de Apio i Kimsa Tabirna sutikunama llugsirkakuna, nukanchita tupangapa. Chi runakunata kawaspa, Pabloka, Taita Diusta “Pai Siñur” nispa, alli iuiachiiwami tukugsamurka.

¹⁶ Nukanchi ña Romama chaiagriura, kapitanka Pablota sakirka, sug wasipi suldadu kawakungapa.

Romapi, Pablo kaskamanda

¹⁷ Kimsa puncha ialiura, Pabloka chipi judiukuna kaugsanakuskapura taitakunatami kaiarka. Paikuna ña tandariska kauraka, nirka:

—Taitakuna, nuka, nukanchipa runakunata ñi imapi jiru mana ruraska kanichu. Chasallata, nukanchipa ñugpamanda taitakuna imasa willaraiaskamanda sug rigcha ñi ima mana iachachiska kanichu. Chasa kagpipas, nukata Jerusalemipi karsilpi chariwaspa, Romamanda taitakunapa makimami Sesareama kachawarkakuna. ¹⁸ Chi taitakunaka, nukata tukui tapuchiwaspa, mana tariwarkakunachu nuka ima jiru ruraska kagta, wañuchii tukungapa. Chimandami kachariwangapa munanakurka. ¹⁹ Judiukuna iapa juchachiwanakugmandami iukarkani mañanga: “Kachawai, Romapi iaia mandagpa ñawipi tapuchiwachukuna”. Chasa mañaspapas, nukapa waugki judiukunamanda kuntra mana

imapipas rimangapa kanichu. ²⁰Chimandami kaiarkaichita, kamkunawa kawanakuspa willangapa. Tukui Israelmanda runakunawa Taita Dios agllaska Cristota suiakugmandami nuka kaipi kasa kadinawa chariwanakú.

²¹Chiuraka ainirkakuna:

—Nukanchi, Judea alpamanda ñi ima kartapi kammanda mana iacharkanchichu. Chasallata nukanchipura chaiauspaka, ñi maikanpas kammanda ñi ima mana allilla ruraskamanda mana willankunachu. ²²Ikuti kamsina chi Jesuswa iuiarigkunamandaka iacharikumi tukuipi kuntrasinalla rimanakugta. Chimandami munanchi, kam ima iuiakugta iachangapa.

²³Chipika iuiarirkakuna, ima puncha tukuikuna tandarispá rimanakungapa. Chi puncha chaiauraka, achka judiukuna Pablo kaskama tandarigrirkakuna. Chiura paika, tutatamandata kallarikka, chisiagta Taita Dios imasa sumaglla mandakuskamanda willangapa. Imasa Moisés niskawa i Santu Ispirituwa ñugpamanda rimagkuna willaskawa Jesusmanda iuiachikurka.

²⁴Chipi uiagpura sugkunaka, Pablo ima rimakuskata suma uiagsamurkakuna. Ikuti sugkunaka mana munarkakuna. ²⁵Chasaka, sugllasina mana iuiarispalla llugsirkakuna. Lluginakuura, Pabloka kasami nirka:

—Isaías suti runawa Santu Ispiritu, kamkunapa ñugpamanda taitakunata allillami rimarka, ²⁶kasa nispa:

Kai alpapi kaugsanakuskata nigrii:

“Rinriwa uiaspapas, mana uiagsinami tukunkangichi.

Ñawiwa kawaspapas, mana kawagsinami tukunkangichi”.

²⁷Kai runakunapa iuiái,

iana tutapi kagsinami tukugsamurkakuna.

Rinri tapariskasinami tukugsamurkakuna.

Ñawi wichkaskasinami tukugsamurkakuna.

Chasaka paikuna,

mana ñawiwa kawagsina,

mana rinriwa uiagsina,

mana iuiái iukagsinami tukungapa kankuna.

Mana munankuna,

nukawa tigramungapa.

Tigramugpika,

nukami ambintranikunata.

²⁸—Chimanda, kasa iachaichi: Taita Dios, mana judú kagkunapagmami kacharka, pai imasa kispichingapa kaskamanda willangapa. Paikunami allilla uiangapa kankuna.

²⁹Pablo chasa niura, judiukunaka, kikipura iapa rimarispá ainichirinakuspa, llugsirkakuna.

³⁰Pabloka, iskai intiru watami pai pagakuska wasipi chisiarka. Tukui paipagma chaigriskakunata sumami chaskikurka. ³¹Taita Dios imasa sumaglla mandakuskamanda willaspa, Iaiá Jesucristomanda iachachispa karka, mana manchaspaña. Pai ima iachachikuskata, ñi pi mana pudirkakunachu ningapa:

—Ama chasa rurakui.

ROMA PUIBLUPI CRISTOWA TUKUSKAKUNATA SAN PABLO KARTA KACHASKAMANDA

¹ Nuka, Jesucristopa lutrinsinami kani. Taita Dios agllaska kachamuskami kani, paimanda Alli Willaita willaspa puringapa. ² Santu Ispirituwa rimagkunawami ñugpamanda librupi niska karka, chi Alli Willaita willagsamungapa. ³⁻⁴ Chi Alli Willaiwami ninchi, nukanchipa Iaia Jesucristo, sutipa Taita Diospa wambra kagta. Pai Jesucristo runa tukuskapa, atun mandag Davidmi paipa ñugpamanda achala taita kapurka. Pai wañuskataka, Taita Dios kikinmi, Santu Ispirituwa iapa iachaiwa kaugsachispa, kawachirka paipa wambra kagta. ⁵ Taita Diosmi, Jesucristowa nukanchita iapa kuiaspa, agllaspa kacharka, Alli Willaita willaspa puringapa; chasaka tukui puiblu niraiaskakunamanda kaugsagkuna, paimanda uiaspa, paiwa suma iuiarispa, pai ima niskata ruraspa kaugsangapa. ⁶ Kamkunapas chasallata agllaskakunami kangichi, Jesucristopa kangapa.

⁷ Romapi kaugsanakuskatami kai karta kachaikichita. Tukui kamkunata, Taita Dios iapa kuiaspa agllarkami, paimandalla kaugsangapa. Nukanchipa Taita Dios i Iaia Jesucristo, kamkunata kuiaspa, suma iuiaiwa kawapuachu.

San Pablo, Romama chaiagringapa munakuskamanda

⁸ Kamkuna Jesucristowa suma iuiarigkuna kaskamanda, tukui alpapimi iacharí. Chi-mandami, tukuiamanda ñugpa, tukui kamkunamanda nukapa Taita Diusta: “Pai Siñur” nini, Jesucristota iuiarispa. ⁹ Taita Dios ima niskata nuka tukui iuiaiwa ruraspa, paipa wambramanda Alli Willaita willagmi kani; paimi iachá, nuka kamkunamanda paita mana kungarispa mañakugta. ¹⁰ Paitami tukui mañakuni, pai munagpika, nuka imasapas kamkunapagma chaiagringapa. ¹¹ Iapami munanakuikichita kawagringapa; chiwanka, Santu Ispirituwa imapas kamkunata karaspa, tukui allilla charingapakunata. ¹² Chasallata, nuka kamkunawa, Jesucristowa iuiagkuna kagmanda, parijuma sumaglla iuiachinakungapami kagringapa munakuni.

¹³ Taitakuna i mamakuna, nuka munanimi, kamkuna kasa iachangapa: achka biajimi nuka munakurkani, kamkunapagma chaiagringapa. Chasa munakuspapas, imaman-dachar arkarispa, kunankama manara pudiriwá ringapa. Kamkunawa kagrispa, munakanimi, achka runakuna manara Cristowa tukuskakunata tandachungapa, paimandalla kangapakuna; imasami sug alpakanapi rurarkani: chasallata. ¹⁴ Chaiawakumi, tukui griegokunata i augkakunata Alli Willaita willagringapa. Chasallata iachagkunata i ñi ima mana iachagkunatapas Alli Willaita willagringapami chaiawaku. ¹⁵ Chimandami munakuni, nukanchipa Taitiku chasa munagpika, kamkuna Romapi kaugsanakuskatapas Alli Willaita willagringapa.

Alli Willaita uiaspa suma iuiarigkuna kispiringapa pudiskamanda

¹⁶ Nukata ñi imapi mana manchawanchu, Alli Willaita willaspa puringapa. Tukui chita uiaspa suma iuiarigkunata, Taita Diosmi pudí kispichingapa. Ñugpa, judiukuna; nispaka, mana judiu kagkunapasmi pudinkuna kispichii tukunga. ¹⁷ Chi Alli Willaiipi kasami niraiá: chita uiagkuna, Cristowa suma iuiarispa Taita Diospa ñawipi mana pandarig niraiankuna. Chasallatami ñugpamanda librupi willaraiá, kasa nispa:

Taita Diospa ñawipi alli

kawarig runaka,

paiwa suma iuiarispa

kaugsanga.

Tukui runakuna, pandarig kaskakunamanda

¹⁸ Runakuna Taita Diusta mana manchaspalla, tukui jiru ruraspalla kaugsagkuna, sutipa Alli Willaita mana uangapa munankunachu. Chi runakunawa Taita Dios, pai iapa rabiarispa kagtami suma luarmanda kawachimungapa ka. ¹⁹ Chi runakuna, Taita Diosmanda ima iacharskata allillami iachankuna. Taita Diosllatatami paikunata kawachimurka. ²⁰ Taita Diusta mana kawaspapas, pai wiñachiskakunata kawaspami paimanda allilla iachankuna pai tiagta. Kai alpa tiaskauramandata, chi alpallawantami allilla kawachí, Taita Dios ñitudupa tukui pudig tiagta. Chimandaka, paikuna mana ningapa pudinkunachu: “Nukanchi mana iacharkanchichu”. ²¹ Taita Diosmanda chasa iachaspapas, mana paita nirkakunachu: “Kam, iapa suma atun Taita Diosmi kangí” u “Pai Siñur”. Chasapaka, ianga iuiaikunallowami kankuna. Chiwanka, paikunapa iui aika mana iuiaiugmi tukuska kankuna. Iana tutapisinami kaugsanakú. ²² “Nukanchi, iachami kanchi” nigpikunapas, paikuna upami tukuska kankuna. ²³ Taita Dios mana wañugta:

“Kam, iapa suma atunmi kang” ningataka, wañunga runakunasina rigcha ruraskatami iuiarispa munanakú. Chasallata, piskukunasina, chusku chakiiugkunasina i kulibrakunasina rigcha ruraskakunatapasmí iuiarispa kausganakú.

²⁴ Chimandami Taita Dios paikunata sakirka, imasa jiru iuiaskasina ruraspa kausgan-gapa. Chasa sakii tukuspami, pai kikinpura tukui pingaipa ruranakuspa kausganakú.

²⁵ Taita Diosmanda sutipa Alli Willaita uangataka, llulla willaikunatami paikuna uianakú. Chasallata, Taita Dios wiñachigta kungurispá, pai ima niskata munangataka, pai wiñachiskakunatami iuiarispa munanakú. Pai Taita Diusta nukanchi nisunchi: “Kam, imaurapas iapa suma atunmi kang. Chasa kachu”.

²⁶ Chimandami Taita Dios paikunata sakirka, iapa pingaipa jiru iuiaikunata ruraspa kausganapakuna. Chasaka paikunata warmikuna, kariwa kausganakuskata sakispa, kikin warmipura mana ruradirukunatami ruranakuspa kausganakú. ²⁷ Chasallata karikunapas, warmiwa kausganakuskata sakispa, askurintimi munanakú, kikin karipura mana ruradirukunata ruranakungapa. Karipuralla pingaiachig ruradirukunatami ruranakuspa kausganakú. Chasa pandarigkuna, pai kikinunapa kuirpupimi llakii nanai iukangapa kankuna.

²⁸ Paikuna mana Taita Diusta rigsingapa munaskamandami pai Taita Dios sakirka, paikuna jirulla iuiangapa; chasaka, mana chaiaskakunata ruraspa kausganapakuna.

²⁹ Paikuna, chasa tukui sug rigcha sug rigcha jiru iuiaikunawa junda kaspá, jirumi tukui ruranakuna. Kikinmandallami sugkunapata munarinkuna. Tukui jiru ruran-gapa iuiaspallami purinakú. Sugkunata jiru iuiaspallami kawankuna. Wañuchinkunami. Piñachirinakuspallami rimanakú. Lllalachinkunami. Sugkunamanda wasami rimanakuna.

³⁰ Sugkunamanda iangami juchachinkuna. Taita Diusta mana munankunachu. Ainirinkun-ami. Atun tukuspa, nirinkunami: “Nuka, sugkunamanda masmi kani”. Maskankunami, imasa sug rigcha jirupas ruran-gapa. Paikunapa taitata i mamata mana uiankunachu.

³¹ Mana munankunachu alli iuiái apingapa. Paikuna ruran-gapa niskata mana ruran-ku-nachu. Mana pitapas kuiankunachu. Mana pitapas pasinsiankunachu. Ni mailla mana pimandapas llakinkunachu. ³² Chasa jiru ruragkunatami Taita Dios niska ka: paiku-nata wañungapami chaiá. Taita Dios chasa niskata iachaspapas, mana sakinkunachu, chasakunata ruran-gapa. Sugkunapas chasallata jiru ruranakuskata paikuna kawaspa, alli iuiachiiwami tukunkunata.

2

Taita Dios sutipa kaskata justisiag kaskamanda

¹ Chimandami kam, pi kaspapas, mana sug runakunata ningapa chaiá: “Jiru ruragmi kang”. Kasa iuiarii: kam kikinpas, chi runakuna ruranakuskasinallatata ruragmi kang. Chimanda, paikunata chasa nispa kagpi, kam kikinta Taita Diosmi justisianga.

² Iachanchimi, Taita Dios chasa jiru ruranakuskata diltudupa ninama sitaura, imasa sutipa kaskata justisiai ruradur kagta. ³ Chimanda kamps sugkunata: “Jiru ruragmi kang” nispa, kam kikin chasallata rurag kaspapas, ¿imasatak iuiakungi, Taita Dios mana kamtapas diltudupa ninama sitangapa kagta? ⁴ Taita Dios iapa suma kuiaspa, mana utkalla piñarig kagmanda, chasataka, ¿manachu munakungi? ¿Manachu iachangi, Taita Dios chasa kamta kuiaspa kaiakugta, kam jiru ruraikunata sakispa, paiwa tukugsamungapa? ⁵ Chasa kaiakugpipas, kamba iuiái muruchu rumisina kaspá, mana paiwa tukungapa munangi.

Chimanda, Taita Diusta rabiachiskata pai rabiarispa, alli justisiangapa kawachirig puncha chaiaurapa wakachirigsinami rurakungi. ⁶ Chiurami Taita Dios, tukuikunata imasa ruraskasina allilla u mana allilla kaskata kawachingapa ka. ⁷ Maikanpas alli ruraikunata mana sakispalla, suma puncha luarpi diltudupa kagrangapa maskagkunataka: “Allimi kang” nispa, mana puchukariduru suma kausaitami karangapa ka. ⁸ Ikuti maikanpas kikinmandalla iuiarispa, sutipa willaskata mana uiaspa, jiru ruragkunawaka askurinti iapa rabiariispami kangapa ka. ⁹ Tukui jiru ruragkunapa almakunaka, iapa llakispa irkimi kangapa kankuna. Ñugpa, judiukuna; nispaka, mana judú kagkunapasmí chasallata llakispa kangapa kankuna. ¹⁰ Ikuti tukui allilla ruragkunataka: “Allimi kang” nispa, karangapami ka, suma puncha luarpi sumaglla kausagringapa. Ñugpa judiukunata;

nispaka, mana judú kagkunatapasmí chasallata karangapa ka.

¹¹ Taita Diospa ñawipi, ñi pipas mana tianchu sug rigcha. ¹² Chimanda, Moisés ima ruran-gapa willaskata mana iachaspalla jiru ruragkunaka, Moisés willaskapi ima niraiaskamanda mana justisiai tukuspami puchukaringapa kankuna. Moisés willaskata iachaspapas, jiru ruragkunaka, Moisés willaskapi ima niraiaskamanda justisiai tukuspami chasallata diltudupa ninama sitai tukungapa kankuna. ¹³ Moisés ima willaskata uiaspapas mana ruragta, Taita Dios mana ningapa kanchu: “Kam, mana pandarigmi kang”.

Moisés

willaskata uiaspa allilla ruragkunami allillapi kankuna. ¹⁴ Mana judíu kagkunaka, Moisés imasa willaskasina paikunapa suma iuiailawa allilla ruraspa kagpikunaka, paikunapa alli iuiaimi Moisés willaskasina allilla tukugsamú. ¹⁵ Paikuna, allilla ruraskawami kawachinkuna, Moisés imasa willaskasina paikunapa iuiaipi charinakugta. Pai kikinkunapa alli iuiaillatatami chita kawachí. Chiwanka, paikunapa iuiariillawa kawarispami willaringapa kankuna, allilla u mana allilla ruraspa kaugsagtakuna. ¹⁶ Tukui runakuna imapas pakalla iuiaskata i ruraskata, Taita Diosmi Jesucristowa kawachingapa ka; chiurami willaringapa kankuna. Chasallatami nuka willaska Alli Willaipi niraiá.

Judiukuna, Moisés ima willaskata mana ruraskamanda

¹⁷ Maikan kampura nichu: “Judiumi kani; Moisés ima rurangapa willaskatami iuiarini”. “Taita Diospallami kani” iuiaripa, atunmi tukungi. ¹⁸ Taita Dios ima munaskata allillami iachangi. Moisés willaskata iachaikuspa, iachangimi allilla ruraíta agllangapa. ¹⁹ Kasapasmí iuiarikungi: “Nawiwa mana kawagsinakunata, nukami allilla pusag kani. Iana tutasinapi kaugsagkunapa iuiaikunata punchaiachigsinami kami. ²⁰ Moisés willaskata iukaspá, Taita Diosmanda sutipa kaskatapasmí iachani. Chasaka, mana iuiai-iugkunata iuiachigmi kani. Wambrasinakunata iachachigpasmí kani”. ²¹ Kam chasa: “Sugkunata iachachigmi kani” iuiarispaka, ¿imapatak kam kikin mana allilla iuiaringi? “Mana sisakungi” nikuspaka, kam kikin, ¿imapatak sisangi? ²² “Mana sugpa warmiwa siriringi” nikuspaka, ¿imapatak kam kikin, sugpa warmiwa siriringi? Ianga diuskunata mana munaspaka, ¿imapatak kam kikin, chi diuskunata iuiariduru wasikunapi ima tiaskata sisagsina rurakungi? ²³ Moisés willaskata iukaskawa atun tukuspaka, ¿imapatak chipi ima niraiaskata wabutispa, Taita Diusta kamigsina jiru rurakungi? ²⁴ Chasallatami ñugpamanda librupi willaraiá, kasa nispá:

Kam judiukunamandami

mana judíu kagkuna Taita Diusta kamispa kankuna.

²⁵ Moisés tukui ima niskata kam ruragpika, judiukunapa marka kamba kuirpupi churaraíaskaka allillami ka. Ikuti Moisés niskata kam mana ruragpika, chi marka mana churaskasinami niraiangapa ka.

²⁶ Chimanda maikanpas chi marka mana churaska kagka, Moisés imasa niskasina allilla rurakugpika, ¿manachu chi marka churaraíaskasina niraiagsamú? ²⁷ Maikan chi marka kuirpupi mana churaska kaspapas, Moisés imasa niskasina allilla ruragka, paimi kawachingapa ka, kam jiru rurag kagta. Kam, chi marka churaraíaska kaspá, Moisés niskata iachaspapas, mana allilla ruragmi kangi. ²⁸ Sugkunapa kawaillapi alli iuiag kagta kawarigka, mana alli judíu niraianchu. Chasallata, judiukunapa marka kuirpupi churaraíag, chillawa mana niraianchu, sutipa judíu kagta. ²⁹ Paipa suma alli iuiái iuiaskawami alli judíu niraiá. Chasallata, tukui jiru iuiaikunata anchuchirig, chimi judiukunapa marka iukagsina niraiá. Chi marka mana niraianchu Moisés imasa willaskasina ruraskawa. Santu Ispirituwami chasa marka churagsina niraiá. Chasa niraiagkunata, kai alpamanda runakunaka mana ningapa kanchu: “Allimi kangi”. Taita Diosmi: “Allimi kangi” ningapa ka.

3

¹ Chasa niraiagpika, judíu kagpika, ¿imapitak alli ningapa niraiá? Chasallata judiukunapa marka churaska kagpika, ¿imapitak mas allilla kapunga? ² Achkapimi mas allilla kapunga. Kaiwami kallarika: Taita Dios, pai iuiachikuskasina rimaitami judiukunata mingagsamurka. ³ Sug judiukuna paipa rimaita mana uangapa munagpikunaka, chika, ¿imatak niraiá? ¿Niraianchu, Taita Dios kikin, pai ima rurangapa niskata sakingapa kagta? ⁴ Chikar, ñi imapas manima. Tukui runakuna llulla kagpipas, Taita Dioska, imaurapas pai rurangapa niskata sutipami rurangapa ka. Chasallatami ñugpamanda librupi willaraiá, kasa Taita Diusta nispá:

Kam ima niskakunata rurag kagmanda, niikimi:

“Kam, allimi kangi”.

Chasallata, kam tukui ima ruraskata kawariskaka, tukuiipi allillami kapungapa kangi.

⁵ Kunauraka, runakunapa iuiaiwami rimani. Sugka nichu: “Nukanchi mana allilla ruraskakunamandami Taita Dios alli justisiag kagta kawachiri; chika, ¿imatak niraiá? ¿Niraianchu, Taita Dios, nukanchiwa rabiarispa, pandarikugta?”. ⁶ Ñi imapipas manima. Taita Dios kikin pandarii iukagpika, ¿imasatak pudintra, kai alpapi, kaugsagkunata allilla justisiangapa?

⁷ Kasapas iuiarispa nichu: “Nukapa llullai balintra, Taita Dios mana llulla kagta mas suma iacharingapa. Chasakuna baligpika, ¿imawantak niwangapa ka, nuka pandariska kagta? ⁸ Chasapaka, nukanchi jiru ruraspalla kaugsanakusunchi. Chasapika, paimanda tukui allillami tukugsamungapa ka”. Chasallatami sugkuna, nukanchi iachachinakuskata juchachispa kankuna. Paikunatami chaiaku, diltudupa ninama sitangapa.

Tukuikuna, pandarig kaskamanda

⁹ Chasa kagpika, nukanchi judiukuna, ¿sugkunamanda mas allichu kanchi? Ñi imapas manima. Ñami nirkaikichita, judíu i mana judíu kagkuna, tukuikunami pandariiwata watakasina kankuna. ¹⁰ Chasallatami ñugpamanda librupi willaraiá, kasa nispa: Mana pandarig,

ñi sug mana tianchu.

¹¹ Taita Dios ima niskata,

ñi pipas mana iuiarig tianchu.

Taita Diusta maskagpas,

ñi sug mana tianchu.

¹² Tukuikunami, Taita Dios ima niskata sakispa,

sug rigcha ianga iuiaita katirkakuna.

Allilla ruragka, mana tianchu ñi sugllapas.

¹³ Paikunapa simi kanmi wañuskata pambadiru paskaraiaskasina.

Chi ukuma wañuska ismuska asnarikugsinami ka.

Paikunapa kalluwami llullankuna.

Paikunapa simiwa jiru rimaska, kulibra kanigsinami rurankuna.

¹⁴ Paikuna ima rimaskapipas,

jiru millaillawami kaminkuna.

¹⁵ Paikunapa chakiwa kalpankunami, wañuchispa, iawar kawangapaglla.

¹⁶ Paikuna maipi puriskapipas,

tukuíta llakichispa,

puchukaspami purinkuna.

¹⁷ Mana iachankunachu, imasa sumaglla kaugsangapa.

¹⁸ Mana imaurapas iuiarinkunachu, Taita Diusta manchangapa.

¹⁹ Kasami iachanchi: Moisés tukui ima niskapi, chi niskawa watakasina kagkunata ima rurangapa willaraiá; chasaka tukui kai alpapi kaugsagkuna, Taita Diospa ñawipi upalla kaspá, paikuna jiru runanakuskata kawachii tukungapa. ²⁰ Moisés niskata uiaspa ruraskakunallowaka, mana pandarig, ñi pipas mana niraiangapa kanchichu. Moisés niskawami iachagsamunchi, nukanchi pandarig kagtakuna.

Cristowa suma iuiarispa, mana pandarig niraiaskamanda

²¹ Kunauraka, Moisés ima rurangapa willaskata sakispa, Taita Dios iachachinmi, imasa nukanchi mana pandarig niraiangapa. Moisés i Santu Ispirituwa rimagkunapas, chasallatami ñugpata willaska karka. ²² Jesucristowa suma iuiarispami Taita Diospa ñawipi mana pandarig niraianchi. Maimanda runakunapas, tukui paiwa iuiarigkunami mana pandarig niraianchi. ²³ Tukuikunami pandarinchi. Chimandaka, Taita Dios atun suma-iachiskamanda iapa karupisinami karkanchi. ²⁴ Pai Taita Dioska, tukuikunata suma kuiaspa, Jesucristowami kispichí, nukanchi paita ñi ima mana karagpipas; chasaka nukanchi, mana pandarigkuna niraiangapa. ²⁵ Chasapika, Taita Dios nirka, Jesucristo wañuchii tukuspa, paipa iawar ichariskawa nukanchipa pandariikunata anchuchingapa. Paiwa suma iuiarigmandami pasinsiai tukurkanchi. Ñugpamanda maituku pandarii rurag-pikunapas, Taita Dios, nukanchimanda iapami llakii iukarka. Chasawami tukui chi pandariikunata kungarirka. Chasaka, Jesucristo wañuskawami kawachirka, pai imapipas imasa chaiaskasina allilla rurakugta. ²⁶ Kunaura kaugsagkunatapasmí kawachí, pai imapipas imasa chaiaskasina allilla rurakugta. Paillatatami nukanchita ni: “Jesuswa suma iuiarispami mana pandarig niraiangichi”.

²⁷ Chasa kagpika, ¿pudinichichu, Taita Diospa ñawipi atun tukungapa? Mana pudinchichu. ¿Imamanda? ¿Moisés ima niskata ruraskamanda? Manima. Jesuswa suma iuiarispami mana pudinchi, Taita Diospa ñawipi atun tukungapa. ²⁸ Chasamandami ninchi: maikanpas Jesucristowa suma iuiarispami mana pandarig niraianchi, Moisés ima niskata mana ruragpipas.

²⁹ Taita Dioska, ¿judiukunapallachu ka? ¿Manachu ka mana judíu kagkunapa Diospas? Ari, mana judíu kagkunapa Diospasmi ka. ³⁰ Taita Dios, sugllami tia. Paimi ka judiukunapa marka i mana marka churaskakunatapasmí nig: “Jesuswa suma iuiarispami mana pandarig niraiangichi”. ³¹ Chasa suma iuiarigpikunaka, Moisés ima rurangapa willaska, ¿iangachu

tukugsamú? Ñi imapas manima. Chasapaka, ninchimi: “Masmi Moisés willaska, allilla ka”.

4

Ñugpamanda taita Abraham, Taita Dioswa suma iuiariskamanda

¹ Chasa kagpika, ¿imasatak niipa, nukanchipa ñugpamanda achala taita Abraham mana pandarig niraiagta? ² Abraham paipa allilla ruraikunallawa mana pandarig niraiagpika, pai pudirkami, “Runapuramanda tukuipa mas allimi kani” iuiaringa; ikuti Taita Diospa ñawipika, chasaka manima. ³ Ñugpamanda librupi, kasami Abrahammanda willaraiá: Abrahamka, Taita Dios ima niskata iuiarispami karka: “Chasami tukunga”.

Chimandami pai mana pandarig niraiá. ⁴ Maikanpas ima ruraskamanda kulki chaskigpika, mana niraiianchu kuiaspalla karaska. Paita chaiaskata chaskiskami niraiá. ⁵ Ikuti maikanpas, ñi ima mana ruraspapas, Taita Dios pandarigkunata chaskigwa suma iuiarichu: chasa iuiarigmandami pai mana pandarigsina niraiá. ⁶ Ñugpamanda achala taita Davidmi pandariska runamanda nirka: “Taita Dios paita: ‘Mana pandarigmi niraiapuangi’ nigpika, iapa allí iuiachiiwami kanga”. Kasami nirka: ⁷ Jiru ruraskakunata pasinsiai tukuspa, pandariikunata anchuchiskakunaka, iapa allí iuiachiiwami tukunkunata.

⁸ Maikan runa pandariskamanda, atun Taita Dios mana imapas nispa sakigpika, iapa allí iuiachiiwami kangapa ka.

⁹ ¿Judiukunapa marka churaskakunallatachu chasamanda allí iuiachiiwa tukungakunata? ¿Chi marka manara churaskakunatapaschu chasallata allí iuiachiiwa tukungakunata? Ñami ninchi: “Abraham Taita Dioswa suma iuiariillawa kagmandami pai mana pandarig niraiá”. ¹⁰ ¿Imauratak paita nirka, mana pandarig niraiagta? ¿Judiukunapa marka ña churaska u manara churaska kaurachu chasa nirka? Churaska kaura, manima; manara churaska kagpitami chasa nirka. ¹¹ Chasa niskaumandami Abraham judiukunapa marka churachirirka. Chi markawa kawachirirkami, Taita Dioswa suma iuiariillawa kagmanda, pai mana pandarig niraiaska kagta. Chimandami Abraham, Taita Dioswa suma iuiarigmanda, tukui paikunapa ñugpamanda achala taita niraiá, judiukunapa marka mana churaska kagpipas; chasaka paikunapas, mana pandarig niraiangapa. ¹² Judiukunapa marka churaska kagkunapa ñugpamanda achala taitapasmi niraiá. Imasami Abraham, manara judiukunapa marka churachirirka, Taita Dioswa suma iuiarirka kausakurka: chasallatami paikunatapas kausangapa chaiá.

Taita Dios karangapa niskata, Abraham suiakuskamanda

¹³ Taita Dios, Abrahamta nirka: “Kamba wambrapa wambrakunapa kati wambrakunatami kai alpata karangapa kani”. Mana chasa nirkachu, Moisés ima niskata Abraham ruraskamanda. Taita Dioswa suma iuiariillawa kagmandami chasa nirka. Chasa iuiariskamandami paita nirka, mana pandarig niraiagta. ¹⁴ Moisés niskallata ruraspa, Taita Dios niskata chaskingapa kagpika, iangami Taita Dioswa suma iuiarintranchi. Taita Dios niskapas, iangami tukontra. ¹⁵ Moisés niskata iachaspapas mana ruragkunawa, Taita Dios iapami rabiari. Ikuti Moisés niskata mana iachagkunaka, chí niskamanda mana pandariska niraiianchu.

¹⁶ Chimanda, Abraham Taita Dioswa suma iuiariskamandami pai Taita Dios nirka, chasa karangapa, Chasaka, Abrahamta wambrapa wambrakunapa tukui kati wambrakunata, Taita Dios, suma kuiaspa, sutipami ima niskataka karangapa kankunata. Chika mana niraiianchu, Moisés niskata ruragkunamandalla. Maikanpas Abrahamsina Taita Dioswa suma iuiarigkunamandapami niraiá; Paimi tukui nukanchipa ñugpamanda achala taita ka. ¹⁷ Chasallatami ñugpamanda librupi willaraiá, Abrahamta kasa nispa: “Achka alpaku-napi kausagkunapa iaia taita tukungapami agllarkaiki”. Taita Dios chasa niskatami Abraham suma iuiarirka. Taita Diosllatami ka wañuskakunata kausagchig i ñi ima mana tiaskakunatapas wiñachig.

¹⁸ Chasa Taita Dios, Abrahamta niska karka: “Kamta agllarkaikimi, achka alpaku-napi kausagkunapa iaia taita tukungapa” i “Kamba wambrapa wambrapa kati wambrakuna, iapa achkakunami tukugsamungapa kankuna”. Chasa, Taita Dios niska mana tukungasina kagpipas, Abrahamka suma iuiaspallami suiakurka. ¹⁹ Pai ñalla patsa wata iukaspa, ñi sug wambra mana iukaska karkakuna. Chasallata paipa warmi, chusami karka. Chasa kagpipas, Taita Dios ima niskata iuiaspallami Abraham suiakurka. ²⁰ “Taita Dios ima niskata mana chasa tukugsamungachu” iuiaringataka, paiwa mas sumami iuiarirka suiakurka. “Kam, iapa suma atunmi kangi” nispa iuiarirka. ²¹ Pai, iuiariillapimi

iuiakurka: “Imasami Taita Dius rimarka: chita tukuimi chasa tukugsamungapa ka”.²² Chasa iuiarillawa kagmandami Taita Dius paita nirka: “Mana pandarigmi niraiangi”.²³ Chasa willaraiaskaka mana niraiianchu Abrahammandalla.²⁴ Nukanchimandapasmi chasa willaraiá. Taita Dius nukanchipa Iaia Jesucristo wañuskata kaugsachigwa suma iuiarigkunatapasmi ningapa ka: “Mana pandarigkunami niraiangichi”.²⁵ Nukanchipa pandariikunamandami Jesucristo wañuchii tururka. Nukanchi mana pandarig niraiiangapami pai, wañuspa, kaugsarirka.

5

Mana pandarig niraiaspaka, ima chaskiskamanda

¹ Nukanchi Iaia Jesucristowa suma iuiariskapi mana pandarig niraiaspaka, paimandami Taita Diuswa pasinsichinakuska niraiianchi. ² Paiwa suma iuiariskapimi pai kikinwa Taita Diuspa suma kuiaita chaskigsamurkanchi. Taita Dius nukanchita kuiaskawami allilla iuiarispa kanchi. Nukanchi paiwa suma puncha luarpi kagringapami suianakunchi. Chasa suianakuspaka, alli iuiachiiwami kanchi.

³ Kasapas. Ima llakiikuna chaiaggipas, alli iuiachiiwami kanchi. Kasami iachanchi: chi llakiikunawaka iachachigta imapipas mana sambaiaspalla kaugsangapa. ⁴ Mana sambaiaspalla kaugsanakuskataka, Taita Dius ningami: “Allillami kaugsakungi”. Taita Dius chasa nukanchita nigpika, iapa suma iuiaiwami suianakusunchi. ⁵ Chasa iuiaiwaka mana ianga suianakusunchi. Santu Ispiritutami Taita Dius nukanchita karamurka. Santu Ispirituwami iachanchi, Taita Dius nukanchita iapa kuiag kagta.

⁶ Nukanchi imasapipas mana kispirii pudinagumandami, Taita Dius kikin agllaska puncha chaitaura, Cristo pandarigkunamanda wañugsamurka. ⁷ Maikan alli runamanda, maikanpas manachar wañuntra. Maikan iapa alli runamanda tiantrami maikan paimanda wañungapa. ⁸ Ikuti nukanchi ñi imapi mana alli runakuna kagmandami Cristo wañugsamurka. Chasapimi Taita Dius kawachigsamurka, imasa nukanchita sutipa iapa kuiagta.

⁹ Chasa Cristo wañuskamandami kunaura mana pandarig niraiianchi. Chasa kagmandami Cristollatata, tukurii puncha Taita Dius rabiakuskata nukanchita kispichigsamungapa ka. ¹⁰ Nukanchi manara Taita Diusta munag kaurami nukanchiwa i pai kikinwa pasinsichigsamurka, paipa wambra wañuskamanda. Chasa pasinsichinakui tukuskamanda, Cristopa kaugsaiwami tukurii puncha nukanchita kispichingapa ka.

¹¹ Kasapas. Iaia Jesucristowa nukanchi ña pasinsichinakui tukuspa, paillawantami Taita Diuswa alli iuiachiwa kanchi.

Adanmanda i Cristomandu

¹² Suglla runamandami kai alpapi pandariikuna tukugsamurka. Pai pandariskamandaka, wañuipasmi chaiagsamurka. Chasallatami tukuikuna pandarirrakuna. Chimandami tukui runakunata wañui chaiarka. ¹³ Moisés ima rurangapa willaska manara tiagpitami ña kai alpapi pandariikuna tiarka. Chasa pandarigpikunapas, manara Moisés willaska tiagmanta, Taita Dius chi pandariskakunata mana justisiangapa iuiarkachu. ¹⁴ Mana iuiachigpipas, Adán pandariskauramandata Moisés kaugsankama, tukui pandarigkunami wañurkakuna. Adán, Taita Dius ima niskata mana uiarkachu. Sugkunaka, sug rigcha pandariikuna ruraspami wañurkakuna.

Adanta kawaspa, niraiarkami katima sug runa samungapa kagta. ¹⁵ Chasa niraiaggipas, Adán pandariskawa i Taita Dius nukanchita karamuskawaka manima alli kanchu imasa ninga. ¹⁶ Ari, suglla runa pandariskawa i Taita Dius karamuskawa manima alli kanchu imasa ninga. Chasa, Adán suglla pandarii ruraskamandami Taita Dius, justisai ruraspa, wañuita kachamurka. Ikuti Taita Dius nukanchita kispichigta kachamurka; paiwaka, nukanchi achka pandariikuna rurasapas, mana pandarig niraiangapa. ¹⁷ Suglla runa pandariskamandami wañui chaimurka, tukui runakunata mandagsina kangapa. Ikuti Taita Diuska, nukanchita iapa kuiaspami pasinsia, mana pandarig niraiangapa. Tukui chasa niraiagkunaka, suglla Jesucristomanda paiwa mandangapami kaugsagringapa kanchi.

¹⁸ Chasamanda, imasami, suglla runa pandarii ruraskamanda, tukui runakunata wañui chaiarka: chasallata, suglla mana pandarig runa wañuskamanda, tukui paiwa iuiarigkuna, mana pandarig niraiaspa, kaugsagringapakuna. ¹⁹ Imasami, suglla runa Taita Dius niskata mana ruraskamanda, tukui runakuna pandarig niraiagsamurkakuna: chasallata, suglla runa Taita Dius niskata allilla ruraskamandami achka runakuna mana pandarig niraiangapa kankuna.

²⁰ Moisés ima rurangapa willaskaka tukugsamurkami, maikan pandariikuna kagta iacharingapa. Pandariikuna maituku achka tiagpipas, Taita Diuska paipa suma kuiaitami

mas allipa kawachirka. ²¹ Imasami runakuna, pandariikunawa mandai tukunkuna wañunkama: chasallatami Taita Diospa suma kuiaiwama mandai tukunkuna; chasawaka, mana pandarig niraiaspas, nukanchipa Iaia Jesucristowa mana puchukaridiru suma kaugsaita iukangapa.

6

Pandaringapa wañuskasina kaspaka, Cristowa kaugsariskamanda

¹ Chasa kagpika, ¿kasachu nisunchi: “Pandariilla apasunchi; chasaka, Taita Diospa suma kuiaita mas nukanchita kawachingapa?” ² Ñi imapas manima. Mana mas pandaringapa wañuskasinami kanchi. Chasa kaspaka, mana iukanchichu, ikuti pandarispa kaugsanakunga. ³ Tukui baugtsai tukuskakuna, Jesucristowa tukuspa, paiwa wañuskasinami niraianchi. Chita, ¿manachu iachangichi? ⁴ Chimanda, nukanchi baugtsai tukuspa, paiwa pambai tukuskasinami niraianchi, sugllapi wañuskasina niraiangapa. Chasaka, imasami Taita Diospa iapa suma iachaiwa Cristo wañuskata kaugsachirka: chasallata nukanchipas, musu kaugsaita iukaspas, kaugsasunchi.

⁵ Nukanchi Cristowa sugllapi wañuskasina niraiaspaka, paisinallatami kaugsarisunchi, paiwa sugllapi kagringapa. ⁶ Kasami iachanchi: nukanchi ñugpa kaugsaska, Cristowa kruspi klabaskasinami niraiarkanchi; chiwanka, nukanchipa pandaringapa iuiakuna puchukarispa, pandariwama mana wataraiaskasina kaugsangapa. ⁷ Maikan pandariikunamanda wañuskasina kagpika, wataraiaskamanda kachariskasinami tukú. ⁸ Nukanchi Cristowa sugllapi wañuskasina niraiaspaka, kasami iuiarinchi: kaugsarispa, paiwa sugllapi kagringapa. ⁹ Kasapasmi iachanchi: Cristo, wañuska kaugsarispa, mana imaurapas ikuti wañungapa kagta. Wañui, mana ikuti paita chaiai pudingapa kanchu. ¹⁰ Tukuikunapa pandariikunamandami Cristo sug biyajilla wañurka. Kaugsariskauramandaka, Taita Diosmandallami kaugsaku. ¹¹ Chasamanda kamkunapas, mana mas pandaringapa wañuskasina tukungichi. Jesucristowa iuiarispa, Taita Diosmandalla kaugsangichi.

¹² Chimanda, kamkunapa ismunga kuirpupi pandariikuna mandagsina mana tiachu. Chasa tiagpika, imasa jiru iuiaskasina ruragkunami tukunrangichi. ¹³ Chasallata, kamkunapa kuirpupi ima iukaskawa mana sakiriichi; chikunawaka, jiru rurangapa. Chasapaka, wañuspa, kaugsariskasina niraiaspas, Taita Diospa lutrinsina tukuichi. Kamkunapa kuirpupi ima iukaskakunatapas paita iukachiriichi; chikunawaka, tukuipi allilla rurangapa. ¹⁴ Chasaka pandariikuna, kamkunapa kuirpupi mana mandagsina tiangachu. Moisés ima rurangapa willaskawa mana wataskasina kangichichu. Taita Diospa suma kuiaipimi wataraiaskasina kangichi.

Taita Dios ima niskata rurangapa, paipa lutrinsina tukusunchi

¹⁵ Chasa kaspaka, ¿kasachu nisunchi: “Moisés niskawa ña mana wataskasinami kanchi. Taita Diospa suma kuiaipi wataraiaskasinami kanchi. ¿Chimandachu pandarisunchi?” Ñi imapas manima. ¹⁶ ¿Manachu kasa iachangichi? Maikan, patrumpa lutrin tukuspa, iukanmi pai ima niskata ruranga. Pandariikunawa wataskasina tukugpika, paita wañuimi chaiana. Ikuti Taita Dios ima niskata rurangapa paipa lutrinsina tukugpika, allilla ruraspami kaugsanga. ¹⁷ Kasamandami Taita Diusta: “Pai Siñur” nipuikichita: kamkuna, pandariikunawa wataskasina kaspapas, kunaauraka Cristomanda iachachiskata uiaspa, tukui iuiawami pai ima niskata ruraspa kaugsanakungichi. ¹⁸ Pandariikunawa wataraiaskamanda kachariskasina tukuspaka, Taita Diospa lutrinsinami tukurkangichi, allilla ruraspa kaugsangapakuna. ¹⁹ (Kamkuna, nuka iachachiskata manara allilla iuiai apingichichu. Chimandami runakuna uiangasina rimaspas iachachinakuikichita.) Ñugpata, kamkunapa kuirpupi ima iukaskawami sakirirkangichi, wataskasina, jiru mana chaia ruraspa kaugsangapa. Kunaauraka chasallata, kamkunapa kuirpupi ima iukaskata Taita Diusta iukachiriichi; chikunawaka, allilla ruraspa, paimandalla sumaglla kaugsangapa.

²⁰ Kamkuna pandariikunawa wataskasina kaugsanakuspaka, Taita Diospa lutrinsina mana karkangichichu, imaipas allilla ruraspa kaugsangapa. ²¹ Chi jiru ruraskamanda, ¿imatak chaskirkangichi? Chasa ruraskakunamandaka, kunaura kamkunata iapa pingaipami iuiachiku. Chasa ruragkunaka, wañuillami chaskinkuna. ²² Ikuti kunaauraka, pandariikunawa wataraiaskamanda kachariskasina tukuspa, Taita Diospa lutrinsinami tukurkangichi. Chasa, paipalla kaspas, mana puchukaridiru suma kaugsaitami chaskigringapa kangichi. ²³ Pandarispa ruragka, wañuitami chaski. Ikuti Taita Dioska, nukanchipa Iaia Jesucristowa mana puchukaridiru suma kaugsaitami kará.

7

Moisés ima rurangapa willaskamanda kachariskasina tukuskamanda

¹ Kam taitakuna i mamakuna, Moisés ima rurangapa willaskata allillami iachangichi. ¿Manachu kasapas iachangichi? Maikanpas chi willaskawa mandai tukugka, kaugsankamallami chita rurá. ² Kusaiug warmika, kusa kaugsankamami imasa Moisés niskasina iuká, kusawa wataskasina kanga. Ikuti kusa wañugpika, Moisés niskata wataraiaskasina kaskamanda kachariskasinami tukú. ³ Kusa chara kaugsakugpita, chi warmi sug kariwa sugllapi kaugsagrígipika, iapa atun pandariimi rurá. Ikuti kusa wañugpika, Moisés niskata wataraiaskasina kaskamanda kachariskasinami tukú. Nispaka, sug kariwa kasaragpika, ñi ima pandarii mana niraiianchu.

⁴ Chasallata, nukapa kuiaska taitakuna i mamakuna, Cristo wañuskamanda, kamkunapas, wañuskasina niraiaspa, Moisés ima rurangapa willaskamanda kachariskasinami kangichi; chasaka, sug kusa niraiagsina Cristowa tukungapakuna. Cristo wañuspa kaugsarigwami kunaúra tukunchi; chasaka, Taita Diosmanda tukuipi allilla ruraspá kaugsangapa. ⁵ Nukanchipa kuirpupi iuiailawa ruraspá kaugsanakuspaka, Moisés ima rurangapa willaskawami iuiachii tukurkanchi, nukanchi imasa munaskasina pandarispa kaugsangapa. Chasa kaugsaspaka, Taita Diospa ñawipi wañuskami niraiarkanchi. ⁶ Ikuti kunaúrika, Cristowa wañuska niraiagsamuspa, Moisés ima rurangapa willaskamanda kachariskasinami tukurkanchi; chasaka, Taita Diospa lutrinsina allilla ruraspá kaugsangapa. Ñugpa willaraiaska niskamanda, manima; Santu Ispirituwa musu kaugsaita iukaspami paipa lutrinsina allilla ruraspá kaugsanakunchi.

Pandaringapa iuiái, nukanchipa kuirpupi tiaskamanda

⁷ Chasa kagpika, ¿nisunchichu, Moisés ima rurangapa willaska, pandarii niraiagta? Ñi imapas manima. Mana chasa kagpipas, Moisés willaska mana tiagpika, manami iachangapa karkani ima ruraikuna pandarii niraiagta. Moisés niskapi willaraiá: “Sugkuna iukaskakunata mana munaringi”; mana chasa willaraiagpika, manami iachangapa karkani sugkunapata munarii, pandarii niraiagta. ⁸ Chasa kagpipas, Moisés niska tiaskamandaka, pandarii kaskata iachagsamuskawami iuiachiriwarka, tukui ima sugkuna iukaskata munaringapa. Moisés niska mana tiagpika, chi pandariikuna wañuskasinami niraiiantra. ⁹ Nuka ñugpata Moisés ima rurangapa niskata mana iachaspallami kaugsakurkani. Moisés niskata nuka iachagsamuuraka, pandariikuna nukapa iuiái kaugsarigsinami tukugsamurkakuna. ¹⁰ Chiura nukaka, Taita Diospa ñawipi wañuskami tukurkani. Chasaka, Moisés niskata chaskispa, kaugsaita iukangataka, wañuska kagsinami tukurkani. ¹¹ Chasaka, Moisés niska tiaskamanda, chita iachaspa, pandariikunawami pandachii tukurkani. Chi niskapi pandarispami wañuskasina tukurkani.

¹² Moisés tukui ima rurangapa willaskaka, ñi ima mana pandariipi niraiianchu. Tukuipi allillami ka. Tukuipi allipami niraiá. ¹³ Chasa kagpika, ¿chi alli willaskawachu wañuskasina tukurkani? Ñi imapas manima. Pandariskawami wañuskasina tukurkani. Chi alli willaskawami pandarii ima kaskata iachagsamurkani. Chasa iachaspami, pandarispa, wañuskasina tukurkani. Chasaka, Moisés willaskawami kawachí, pandariikuna ruraika, iapa mana allilla kagta.

¹⁴ Iachanchimi, Moisés ima rurangapa willaska, Santu Ispiritu iuiachiska kagta. Ikuti nukaka, kai kuirpupi kaugsankama, katuskasina kaspá, pandariikunawa wataraiaskasinami kani. ¹⁵ Nuka mana iachanichu ima rurakugta. Nuka ima allilla rurangapa munakuskata mana ruragmi kani. Ikuti ima mana rurangapa munakataka, chitami rurani. ¹⁶ Nuka ima mana munakuskata ruraskawami iuiarini, Moisés niska alli kagta. ¹⁷ Chasa kagpipas, nuka kikin mana munanichu, chi jiru ruraikunata rurangapa. Pandaringapa iuiái nukapa kuirpupi tiaskawami chikunata munachiwá rurangapa. ¹⁸ Iachanimi, nukapa kuirpupi mana ñi imapas alli iuiái tiagta. Ima allilla rurangapa iuiái samuwagpipas, mana pudinichu chita rurangapa. ¹⁹ Allilla rurangapa munakuskata mana rurani. Ikuti jiru rurangapa mana munakuskataka, chitami rurani. ²⁰ Chasa nuka mana rurangapa munakuskata ruragpika, nuka kikin mana munanichu, chi jiru ruraikunata rurangapa. Pandaringapa iuiái nukapa kuirpupi tiaskawami chikunata munachiwá rurangapa.

²¹ Chimandami iachani, nuka allilla rurangapa munakuura, pandaringapa iuiái, nukapa kuirpupi tiagta. ²² Nukapa iuiaipika, Taita Dios ima niskatami allilla rurangapa iuiáni. ²³ Chasa kagpipas, nukapa kuirpupika sug rigcha jiru mandai tiagtami kawani. Chi jiru mandai nukapa kuirpupi tiaspaka, suma iuiái kaska mandaskawa makanakugsinami tukugsamú. Chi jiru mandaika, wataskasinami chariwaku. Chasaka, pandariikuna rurangapagllami munachiwá.

²⁴ ¡Ai nukajim, imachar pasasa! ¿Pitak pudí, kai kuirpu diltudupa wañuima chaiachi-wakugriskata kispichiawangapa? ²⁵ Taita Diosllami pudí, nukanchipa iaia Jesucristowa

kispichiwangapa. Chimandami Taita Diusta: “Pai Siñur” nini. Chasaka, nukapa iuiwaiwa Taita Dius niskatami rurag kani. Ikuti nukapa kuirpuwaka imapipas pandarisipami kani.

8

Santu Ispiritu iuiachiskasina kaugsasunchi

¹ Kunaura, Jesucristowa tukuskakunaka, manima diltudupa ninama sitai tukungapa kankunachu. ² Santu Ispiritu iuiachiska mandaiwaka kaugsaitami kará; chi mandaiwami jiru pandariikunata Jesucristomanda kispichiska kanchi; chasaka, mana diltudupa wañuima chaiaingrapa. ³ Nukanchi pandarigkuna kaskamanda, Moisés ima willaskawa mana rurangapa pudiriskata, Taita Diosmi rurarka. Pai kikinpa wambrata kachamusipami chasa rurarka. Cristoka, pandarigkunapa kuirpuwasina aichaiug tukuspa, nukanchipa pandariikunamandami wañugsamurka. Chasaka, Cristopa kuirpuwami nukanchipa pandariikunata puchukaspa chingachirka; ⁴ chasaka, Moisés ima niskata nukanchi rurai pudingapa. Nukanchipa kuirpupi iuiailawa ruraspa mana kaugsanakunchichu. Santu Ispiritu ima iuiachiskallowami chasa kaugsanakunchi.

⁵ Maikanpas kikinpa kuirpupi iuiailawa kaugsag, kai alpapi ima tiaskakunallowami iuiaspalla kanga. Ikuti Santu Ispiritu iuiachiskallowa kaugsagka, chasallata Santu Ispiritu-manda allilla iuiaspallami kanga. ⁶ Kai alpapi ima tiaskakunallowa iuiagkuna, diltudupa wañuimami chaiaingrakuna. Ikuti Santu Ispirituwa allilla iuiagkunaka, sumaglla kaugsaitami tarinkuna. ⁷ Kai alpapi ima tiaskakunallowa iuiagkuna, Taita Diustami mana munankuna. Pai ima nikuskata mana uiagkunami kankuna. Mana pudinkunachu, pai ima nikuskata uangapa. ⁸ Maikanpas kikinpa kuirpupi iuiailawa kaugsagkuna, Taita Diusta mana pudinkunachu kuntintachingapa.

⁹ Taita Diospa Ispiritu kamkunapa iuiaiipi sutipa kaugsakugpika, kam kikinkunapa kuirpupi iuiailawa mana kaugsangapa kangichichu. Santu Ispiritu ima iuiachiskallowami kaugsangapa kangichi. Maikanpas Cristopa Ispirituta mana iukaspa, Cristopa mana kanchu. ¹⁰ Cristo kamkunapa iuiaiipi kaugsakugpika, kamkunapa kuirpu pandariskamanda wañungapa kagpipas, kamkunapa ispirituka kaugsami ka, kamkuna mana pandarig niraiaskamanda. ¹¹ Taita Dius, Jesucristo wañuskata kaugsachigpa Ispiritu kamkunapa iuiaiipi kaugsakugpika, kikin Taita Dioska kamkunapa wañuska kuirputapasmi diltudupa kaugsachingapa ka. Paipa Ispiritu kamkunawa kaugsakuspami chasa kaugsachingapa ka.

¹² Chasamanda, taitakuna i mamakuna, mana iukanchichu, nukanchipa kuirpupi iuiakuskallowa kaugsanga. Santu Ispiritu ima iuiachiskallowami kaugsai iukanchi. ¹³ Kam kikinkunapa kuirpupi iuiakuskallowa kaugsanakugpika, diltudupami wañungapa kangichi. Ikuti Santu Ispirituwa kamkunapa jiru rurangapa iuianakuskata sakigpikunaka, diltudupa kaugsaitami tarinkangichi.

¹⁴ Taita Diospa Ispiritu ima iuiachikuskata tukui katiraiagkuna, chikunami Taita Diospa wambrakuna niraianchi. ¹⁵ Kamkuna, wataraiangasina ispirituta mana chaskirkangichichu, ikuti manchaiwa kaugsangapa. Taita Diospa Ispiritutami chaskirkangichi; chasaka, paipa wambrakuna tukungapa. Santu Ispirituwami, Taita Diusta kaiaspa, ninchi: “Taitiku”. ¹⁶ Kikin Santu Ispiritumi nukanchipa ispirituta iuiachispa willá, Taita Diospa wambrakuna kagta. ¹⁷ Paipa wambrakuna kagmanda, Taita Dius iukaskaka Cristo kikinpami ka; chiwanka, nukanchipapasmi niraiá. Nukanchi kai alpapi Cristosina llakii pasagpika, paiwa suma puncha luarpimi kagrisunchi.

Sug luarpi, iapa suma punchapi kagringapa kaskamanda

¹⁸ Kasami nini: kai punchakuna kaugsanakunkama iapa llakiikuna pasagpikunapas, nispaka Taita Dius sug luarpi iapa sumami nukanchita kawachingapa ka. Chasa iuiarigpika, chi llakiikuna mana imapas niraiangapa kanchu. ¹⁹ Taita Diospa wambrakuna, sumagllami sug luarpi kawarigringapa kanchi. Tukui ima Taita Dius wiñachiskakunapas, askurinti munaspami suianakú, chi puncha chaiungapa. ²⁰ Tukui ima Taita Dius wiñachiskakuna, runa pandariskamanda maldisiimi tukurka. Chi wiñachiskakuna kikinpa munaimandaka, manima; Taita Dius chasa munagmandami chasa tukugsamurka. ²¹ Chasa tukugpipas, Taita Dius pai ima wiñachiskata chasa maldisiskata kispichingapa kagtami iuianchi; chasaka, mana puchukaringapa. Taita Diospa wambrakuna, kispichiska, suma puncha luarpi kaugsai kallariagriurami tukui ima pai wiñachiskakunapas maldisiskata kispichiskallatata tukungapa kankuna.

²² Kasami iachanchi: imasami unguringapa warmi, uchulla iukangapa puncha chaiura, nanaimanda wakai kallari: chasallatami tukui ima Taita Dius wiñachiskakuna,

kunankama wakanakugsina apanakú. ²³ Kasapas. Nukananchi kikinkunapasmi, Santu Ispirituwa kaspá, iuiáipi uchinanakugsina llakii iukanchi. Santu Ispirítuta iukagmanda nukanchita kawachinmi, suma luarpi imapas chaskigringapa kagtakuna. “Nukapa wambrakunami kangichi” Taita Dios nukanchita kaiangapa puncha chaiangapa, askurinti iuiáillami suianakunchi. Chi punchami nukanchipa kuirputapas sumaiachiska kangapa ka. ²⁴ Chasa suianakuskawami kispichii nukurkanchi. Ima suianakuskata ña makipi charinakuspaka, ¿imatá mas suianakusunchi? ²⁵ Ikuti ima iukangapa suianakuska manara chaiamugpika, iukanchimi chi iuiáita upalla suianakungá.

²⁶ Nukananchi sambaiaskasina kaura, Santu Ispiritullatatai aidá. Mana iachanchichu, imasa chaiakuskasina Taita Diusta mañangapa. Chasa kagpipas, kikin Santu Ispirítumi nukanchimanda paita mañá. Mana rimai pudigsinami wakaspá mañá. ²⁷ Taita Dios, tukuikunapa iuiáita iachagmi iachá, Santu Ispirítu ima mañakugta. Santu Ispirítu, Taita Dios ima munakuskasinami Taita Diuspalla kagkunamanda mañá.

Cristowa, nukanchi tukuipi binsigkuna kaskamanda

²⁸ Kasami iachanchi: allilla u mana allilla pasarigpipas, Taita Diosmi chasa ni, paita kuiagkunamanda allillapa tukungapa. Pai imasa munaskasina kawaspami nukanchita kaiarka. ²⁹ Pai ñugpamandata rigsigkunatami agllarka, pai kikinpa wambrasina kangapakuna; chasaka paipa wambra, achka waugkindi i panindikunamanda mas atun kangapa. ³⁰ Taita Dios ñugpamandata agllaskakunatami kaiá. Kaiaskakunataka ninmi: “Kamkuna, mana pandarigkunami niraiapuangichi”. Chasa niraiaskakunataka, paipa suma puncha luarpami pusá, sumaiachingapa.

³¹ Chasa kagpika, ¿imatá nisunchi? Taita Dios nukanchiwa kagpi, ¿pitak pudinga, nukanchimanda kuntra kanga? Ñi pipas manima. ³² Taita Diosmi kikinpa wambra mana michaspalla kachamurka, tukuikunamanda wañuchii tukungapa. Nigpika, ¿manachu paiwa nukanchita tukui allilla chasallata karangapa ka? ³³ Taita Dios kikin agllaskakunata, ¿pitak pudinga, paikuna ima pandariikuna iukagta ningapa? Ñi pipas manima. Taita Dios kikinmi timpu paikunamanda niska karka: “Cristo wañuchii tukuskamandami mana pandarig niraiangapa kankuna”. ³⁴ Nigpika, ¿pitak pudinga, nukanchita diltudupa ninama sitangapa? Ñi pipas manima. Jesucristo, wañuchii tukuspa kaugsarispami Taita Diospa alli ladu kagri; paimi nukanchimanda tukui sumaglla mañaku. ³⁵ Cristo nukanchita iapa kuiagmanda, ¿pitak pudinga, nukanchita paiwa kaskamanda anchuchingapa? Llakii, ñi nanai, ñi iarkai, ñi mana katanga iukai, ñi manchai, ñi jiru iuiaspa kalpachigkuna ñi wañuchigkuna, ñi pipas mana pudingapa kanchu, Cristowa kaskamanda nukanchita anchuchingapa. ³⁶ Chasallatami ñugpamanda librupi willaraiá, kasa Taita Diusta nispa: Kammandami nukanchita chisiagta suianakú wañuchingapa.

Ubijata wañuchingapa munanakugsinami nukanchita kawanakú. ³⁷ Tukui chi llakii pasagpikunapas, Cristo nukanchita kuiagmandami tukuipi suma binsispa llugsinchi. ³⁸ Chasallata, allillami iachani, Taita Dios, nukanchipa Iaiá Jesucristowa nukanchita kuiagta. Pai kuiagmandami mana imawapas pudiringapa ka, Cristowa kaskamanda nukanchita anchuchingapa. Chasa, ñi wañuiwa ñi kaugsaiwapas, ñi anjilkunawa ñi kuku wairakunata mandagkunawapas, ñi kunaúra ñi kipama ñi imaurapas, ³⁹ ñi sug luarpi ñi kai alpa ukupi ima tiaskakunawapas, ñi Taita Dios sug ima ruraskakunawapas mana pudiringapa kanchu, Cristowa kaskamanda anchuchingapa, Taita Dios nukanchita kuiagmanda.

9

Taita Dios, Israelmanda runakunata agllaskamanda

¹ Nuka, Cristowa iuiarispa kaskamandami sutipa kaskata niikichita, mana llullaspalla. Santu Ispirítu iuiachiwakuskawa, nukapa iuiáipi chasallatami mana llullaspalla kasa niikichita. ² Nuka, imaurapas iapa llakiiwami kani. Nukapa llakii, sungu nanagtami llakispa kani. ³ Nukapa waugkindi judiukunamandami chasa llakiiwa kani. Paikuna Cristowa tukuntrakuna iuiarispa, Taita Diusta mañantrani, nuka kikinka, Cristomanda anchuchii tukuspa, maldisiskapas tukungapa. ⁴ Paikuna, ñugpamanda achala taita Israelpa iawarmi kankuna. Taita Diosmi paipa wambrakunatasina charirka; chasaka, paipa sumaiachiska kangapakuna. Paikunawami Taita Dios ikuti ikuti allilla tukugsamurka; chasaka, sugllapisina kangapa. Paikunamandami Moisés imasa ruraspá kaugsangapa niraiaskata chaskirka. Chimandaka iachachirkakunatami, imasa ruraskakunawa Taita Diusta kunguringapa chaiagta. Paikunatami Taita Dios nirka: “Nuka agllaska Cristo samungapa kaskata suiangichi”. ⁵ Paikunami kankuna nukanchipa ñugpamanda achala taitakunapa wambrakunapa kati wambrakuna. Paikunapuramandami Cristo runa tukugsamurka.

Paika, tukuipi iaia mandag Diusmi ka. Imaurapasmi paita iapa suma atun kagta nisunchi. Chasa kachu.

⁶ Mana ninichu, Taita Dius, Israelmanda runakunata karangapa niskata mana karagta. Ninimi: ñugpamanda achala taita Israelpa wambrakunapa kati wambrakuna, mana tukuikuna, Diuspa ñawipi paipa wambrakuna niraiagta. ⁷ Chasallata, ñugpamanda achala taita Abrahampa wambrakunapa wambrakunapas, tukuikuna, Diuspa ñawipi paipa wambrakuna mana niraiankunachu. Chasapaka, Taita Diusmi Abrahamta nirka:

Kamba wambra Isaakmandallami

achka wambrakuna niraiapungapa kang. ⁸ Chasa nispaka, Abrahampa wambrakuna kagmandalla, Taita Diuspa wambrakuna mana niraiangapa kankunachu. Taita Dius Abrahamta wambra karangapa niskamanda tiagsamuska wambra wambrakunallami paipa wambrakuna niraiangapa kankuna. ⁹ Kasami Taita Dius, Abrahamta nirka:

Ima killa chaimuurami kutimusa.

Chi killami kamba warmi Sara

kari wambra iukangapa ka.

¹⁰ Kasapas. Nukanchipa ñugpamanda achala taita Isaakpa warmi Rebeka, iskai kari wambrakunami suuralla iukarka. ¹¹⁻¹² Chi wawakuna manara tiagsamugpita, Taita Diuska Rebekata niska karka: “Ñugpa tiagsamuska wambra, kati wambra ima niskata ruragmi kangapa ka”, paikuna ima allilla u mana allilla manara ruragpikuna. Chasaka, Taita Dius kilinmi kawachi, maikan paita allilla kawariskata ñugpamandata agladur kagta. Chasa Rebekata nispaka, kawachirkami, allilla u mana allilla rurakugpipas, pai imasa munaskasina agllagta. ¹³ Chasallatami ñugpamanda librupi willaraiá, kasa nispá:

Jakobtami kuiarkani.

Ikuti Esautaka mana munarkanichu.

¹⁴ Chasa agllaskamandaka, ¿imatak nisunchi? Taita Dius chasa agllaspaka, ¿mana allil-lachu rurarka? Ñi imapas manima. ¹⁵ Moisetami Taita Dius kasa nirka:

Maikanmanda nuka llakiriskamandami llakirisa.

Chasallata, maikanta nuka kuiangapa munaskatami kuiasa. ¹⁶ Chasaka Taita Diuska, runakunata mana agllanchu, paikuna munanakuskamanda u ima allilla ruraskamanda. Taita Dius llakiriskamandallami pai pita munaskata agllá. ¹⁷ Chasallatami ñugpamanda librupi willaraiá. Kasami Taita Dius, Ejipto alpapi atun mandagta nirka:

Kasamandami kamta atun mandag kangapa churarkaiki:

nuka tukui pudig kagta kam nukamanda kawachingapa;

chasallata, tukui alpakanapi nuka Taita Dius kagta iacharigsamungapa. ¹⁸ Chasaka, maikanmanda Taita Dius llakiringapa munaskamandami llakiri. Chasallata maikanta iuiái tutaiachingapa munaskataka, paillami chasa pudí rurangapa.

¹⁹ Chimanda, kamka niwankangichar: “Chasa kaspaka, ¿imapatk Taita Dius, maikan runatapas ni: ‘Mana allilla ruragmi kang?’ Pai ima rurangapa munaskataka, ¿pisik pudinga: ‘Chitaka mana rurakui’ ningapa?”. ²⁰ Kam runa, ¿imatak kang, Taita Diusta imasa rurakuskata tapuchingapa? Alpata ruraska mangaka mana pudingapa ka, ruragta tapuchingapa: “¿Imapatk chasa rurawarkang?” ²¹ Alpata imapas ruragka, ¿manachu pudí, chi alpallatata sug kuashagsina atun punchakuna upiadiru ruranga; ikuti sugka, ianga punchakuna upiadiru ruranga?

²² Jiru ruraspa, diltudupa ninama sitai tungungapa kagkunata, Taita Diusmi suiarka, mana piñakuspalla; chasaka, pai rabiarispa, tukui pudig kagta kawachingapa. ²³ Chasallata, sugkunamanda llakii iukaspa, ñugpamandatami agllarka, paiwa suma puncha luarpi kagrangapa; chasaka, pai askurinti iapa atun suma kagta kawachingapa. ²⁴ Chi agllaskapi, nukanchipasmi kanchi. Judiupurakunapi i mana judíu kaskakunapipasmi agllarka. ²⁵ Chasallatami Oseas suti Santu Ispirituwa rimag willaska librupi willaraiá, kasa nispá:

Mana nukapa runakuna kaskatami ningapa kani:

“Nukapa runakunami kapuangichi”.

Mana kuiaskatami ningapa kani:

“Nukapa kuiaskami kapuangi”.

²⁶ Maipimi nirkani:

“Nukapa runakuna mana kangichichu”:

chillapitami ningapa kani:

“Taita Dius kausgappa wambrakunami kapuangichi”. ²⁷ Ikuti Israelmanda runakunamandaka, Isaías suti Santu Ispirituwa rimag, kasa nispami willá:

Ñugpamanda achala taita Israelpa wambrakunapa wambrakuna

kaskajusina achka mana kuintangasina kagpikunapas,
maillakunallami kispiringapa kankuna.

²⁸ Atun Taita Dios, kai alpapi ima rurangapa niskata
mana unaillami justisiagsamungapa ka. ²⁹ Isaiasllatatami ñugpata willaska karka, kasa
nispa:

Tukui manduiug atun Taita Dios mana sakinmi,
kati kati wambrakuna tiangapa;
nukanchipas, Sodoma i Gomorra suti puiblukunasinami ña puchukariska kanchi.

Achka judiukuna, Alli Willaita mana uiaskakunamanda

³⁰ Chasa kagmandaka, ¿imatak nisunchi? Mana judiu kagkuna, Taita Diospa ñawipi alli
kangapa mana maskanakugpipas, paikuna Cristowa suma iuiaripa kagmandami mana
pandarig tukugsamunkuna. ³¹ Ikuti Israelmanda runakunaka, Moisés ima rurangapa
willaskata katichiraiaspapas, mana pudirkakunachu, Taita Diospa ñawipi allilla tukun-
gapa. ³² ¿Imapatak mana chasa pudirkakuna? Cristowa iuiaringataka, Moisés ima ru-
rangapa willaraiaskallata katichiraiaspami mana pudirkakuna, Taita Diospa ñawipi allilla
tukungapa. Imasami runakuna, rumipi takaripa urmankuna: ñallapas chasallata Cristo
kruspi wañuskamanda, paikunata iapa mana sumami uiarigsamurka. ³³ Chasallatami
ñugpamanda librupi willaraiá, kasa nispa:

Kawamuichi. Sión lumapi,
atun rumisina runatami churani,
runakuna paita takaripa urmagsina tiangapa.
Ikuti maikanpas paiwa suma iuiaripa kagkunamandaka,
Taita Dios manami kungaringa.

10

¹ Taitakuna i mamakuna, tukui iuiaiwa iapa munaspami Taita Diusta mañakuni, Is-
raelmanda runakuna kispichii tukuchukuna. ² Paikunamanda willanimi: askurintimi
munanakú, Taita Dios ima niskata rurangapa. Chasa munanakugpipas, pai ima mu-
nakuskataka manara allilla iachankunachu. ³ Manara iachankunachu, imasamanda Taita
Dioswa mana pandarig niraiagtakuna. Mana chasa iachaspami munanakú, kikinkunapa
allilla ruraikunallawa mana pandarig niraiangapakuna. Chasa iuiaspami Taita Dios ima
niskata mana munarkakuna suma uiangapa. ⁴ Moisés tukui ima rurangapa niraiaskaka,
Cristopimi puchukarirka; chasaka tukuikuna paiwa suma iuiarigkuna, mana pandarig
niraiangapa.

⁵ Moisés ima niskata ruraspa, mana pandarig niraiangapa kaskamandaka, Moisés kik-
inni kasa nirka: “Tukui ima niskata ruragkunami kaugsai iukagta niraiangapa kankuna”.
⁶ Ikuti Cristowa suma iuiaripa, mana pandarig niraiangapa kaskamandaka, kasami
willaraiá: “Kamba iuiaipei mana ningi: ‘¿Pitak sug luarma sikanga?’,” Cristota nigringapa:
“Uraikumui”. ⁷ “Chasallata, kamba iuiaipei kasapas mana ningi: ‘¿Pitak alpa ukuma
uraikunga?’,” Cristota nigringapa: “Wañuskakunapagmanda llugsimui”. ⁸ Chasapaka, kasami
willaraiá:

Diospa Rimai, kamba ladullapimi ka.

Kam kikinpa simiwami pudingi rimanga.

Kam kikinpa iuiaiwami pudingi iuiaringa.

Chi Rimaitami willanchi, Cristowa suma iuiaringapa. ⁹ Kamkunapa simiwa willaspami
iukangichi, Jesús nukanchipa iaia kagta ninga. Kamkunapa iuiaiwami iukangichi suma
iuiaringa, pai wañuskata, Taita Dios kaugsachiska kagta. Chasa iuiaiwa kagmandami
kispichii tukungapa kangichi. ¹⁰ Kamkunapa iuiaiwa Jesucristowa suma iuiariskaman-
dami mana pandarig niraiangichi. Simiwa Jesucristomanda willagmandami kispichii
tukungapa kangichi.

¹¹ Chasallatami ñugpamanda librupi willaraiá, kasa nispa: “Paiwa suma iuiaripa kagku-
namanda, Taita Dios manami kungaringa”. ¹² Judiukuna i mana judiu kagkuna, sug
rigcha sug rigcha mana niraianchu. Jesucristo, tukuikunapa iaiami niraiá. Tukui paiwa
suma iuiaripa mañagkunata, mana michaspallami ima mañaskata karamú. ¹³ Chasallatami
willaraiá, kasa nispa:

Atun Taita Dioswa tukui suma iuiaripa mañagkuna
kispiriskami tukungapa kankuna.

¹⁴ Paiwa mana iuiarispalla kaugsanakuspaka, ¿imasatak paita mañangakuna? Paimanda ñi
ima mana uiaspaka, ¿imasatak paiwa iuiaringakuna? Ñi pipas mana paikunata Alli Willaita
willagrigpikunaka, ¿imasatak iachangakuna? ¹⁵ Paikunapagma Taita Dios ñi pitapas mana
kachagpika, ¿pitak willagringa? Chasallatami willaraiá, kasa nispa:

Maikanpas Alli Willaita willangapa chaimugpika,
iapa allimi uiarigsamú.

¹⁶ Maituku Alli Willaita willanakugpipas, mana tukuikuna munankunachu, chi willaita uiangapa. Chasallatami Isaiás kasa niska karka:

Taitiku, ¿pikunatak munarkakuna,
nukanchi ima willaskata suma uiangapa?

Maillakunalla. ¹⁷ Chasamanda, Alli Willaita uiaspami Cristowa iuiarii pudinchi. Chi Alli Willaita, pai kikin Cristo kachamuskami niraiá.

¹⁸ Chasa niraiagpipas, nuka tapuni: ¿manachu Alli Willaita uiarkakuna? Chitaka allillami uiarkakuna. Chasallatami willaraiá, kasa nispá:
Chi rimai, tukui kai alpapimi uiarigsamurka.

Maipi runakuna tiaskapipasmi iacharigsamurka.

¹⁹ Kasapasmi tapuni: chasa kaggpika, Israelmanda runakunaka, ¿manachu chasa iacharkakuna ima niraiagta? Ñugpata, Moiseska kasami nirka:

Atun Taita Diusmi ni:

“Mana nukapa runakuna kaskata nuka agllaska kagmandami iuiachingapa kaikichita,

paikunata mana allilla iuiaspa kawangapa.

Nuka, mana iuiaiiug runakunata agllaspa kagmandami rabiachingapa kaikichita”.

²⁰ Isaiaspas, mana manchaspallami kasa nirka:

Atun Taita Diusmi ni:

“Mana maskawanakugmi tariwarkakuna.

Mana nukamanda tapunakuskatami kawarirkani”.

²¹ Ikuti Israelmanda runakunamandaka kasami nirka:

Nuka ima niskata mana uiawaspa piñarispalla kagkunataka chisiagtami iskandi makikunawa chaskingapa suiakurkani.

11

Israelmanda runakuna, maillakuna Cristomanda agllai tukuskakunamanda

¹ Chasa kagmandaka, ikuti tapusa: Taita Dius, ¿pai agllaska runakunatachu wabutirka?

Ñi imapas manima. Nukapasmi Israelmandapura kani. Nukapa ñugpamanda achala taita, Abrahammi karka. Paipa wambra Benjaminpa iawarmi kani. ² Taita Diuska, pai ñugpamanda agllaska runakunata mana wabutirkachu. Ñugpamanda librupi, Elías suti Santu Ispirituwa rimagmanta willaraiaskata, ¿manachu iachangichi? Paika, Taita Diusta mañakuspa, Israelmanda runakuna mana allilla kagtakuna willaspa, kasami nirka:

³ Taitiku, kamba Santu Ispirituwa rimagkunatami wañuchirkakuna.

Kammanda rupachidiru altarkunatapasmi waglichirkakuna.

Nukallami chara kausga kani.

Nigpika, nukatapasmi wañuchiwangapa munanakú. ⁴ Chiura Taita Diuska, kasami paita ainirka:

Baal suti ianga diuspa ñugpa ladu mana kunguringapa,

kanchis waranga runakunatami nukamanda wakachirirkani.

⁵ Kuna punchakunapas, chasallatami Taita Dius, Israelmanda runakunata suma kuiaspa, maikankunata agllaku. ⁶ Taita Dius, paipa iapa suma kuiaiwami agllaku; mana kanchu paikuna ima allilla ruraskamanda. Allilla ruraskamanda Taita Dius agllakugpika, pai suma kuiaska, ñi imapaschar mana niraiandra.

⁷ Chasa kagmandaka, ¿imatak nisunchi? Israelmanda runakuna maskarinakurka, mana pandarig tukungapa. Nigpika, manima chasa tarirkakunachu. Taita Dius agllaskakunallami mana pandarig tukugsamurkakuna. Ikuti chi sugkunataka paikunapa iuiái tutaichiskasinami tukugsamurkakunata. ⁸ Chasallatami ñugpamanda librupi willaraiá, kasa nispá:

Taita Dius, paikunata iapa puñuipisina iukangapami iuiachirka;

chiwanka, ñawiwa kawasppapas,

mana kawagsina tukungapa;

rinriwa uiasppapas,

mana uiagsina tukungapa.

Kunankamami chasa runakuna tiankuna. ⁹ Davidpas, kasami chi runakunamanda nirka:

Moisés ima rurangapa willaska,

paikuna suma achka mikui iukagsinami ka.
Chi willaraiaskapi urmangapa waskakunasina
u tugllasinami tukupungapa kankunata.

Chi tugllapi urmagkunataka
diltudupa ninamami sitai tukungapa kankuna.

¹⁰ Paikunapa ñawi wichkaskasinami tukugsamungapa ka;
chasaka, mana kawagsina tukungapakuna.

Wasa pakiskasinami
patariska imaurapas kangapa kankuna.

Mana judiu kagkuna, kispiringapa pudiskamanda

¹¹ Mana kagpika, ikuti tapusa: judiukuna chasa Cristomanda takarigsina ruraspa, ¿diltudupachu urmaskasina tukurkakuna? Ñi imapas manima. Kikin judiukuna Cristota mana uiaskamandami mana judiu kagkunaka pudinkuna kispiringapa; chiwanka judiukuna, chasa kawaspa, paikunasinallatata Cristowa tukugsamungapakuna. ¹² Judiukuna Cristota mana uiaspa sitai tukugmandami mana judiu kagkunaka, Taita Dioswa iapa iukagsina tukugsamurkakuna. Tukui judiukuna Taita Dioswa ikuti tukugsamuuraka, askurinti iapa suma allillami tukugsamungapa ka.

¹³ Kunauraka, kamkuna mana judiu kagkunatami kasa niikichita. Cristo kikinmi nukata kachamuwarka, mana judiu kagkunata Alli Willaita willaspa puringapa. Chimandami, nukapa suma alli iuiaita suma iuiarispa, chita willaspa purikuni, ¹⁴ kasa munaspa: jamalai nuka kikinpa runakunapas munantrakuna, kamkunata kawaspa, Cristowa tukugsamungapakuna; chasaka, kispiringapakuna! ¹⁵ Taita Dios, judiukunata wabutispa, mana judiukunatami agllarka; chasaka, tukuikuna paiwa pasinsiachirispaga kangapakuna. Judiukunata Taita Dios ikuti kaiauraka, ¿imatak niraiangapa ka? Wañuska kaspaga, kausgariskami niraiangapa ka. ¹⁶ Kasapas. Ñugpa ruraska tanda Diuspalla niraiangapa kagpika, tukui tanda rurangapa chapuskapasmipi paipalla niraiangapa ka. Chasallata, sacha angu Diuspalla niraiangapa kagpika, malkikunapasmipi paipalla niraiangapa ka.

¹⁷ Alli olivos sachamanda sug malkikunata kuchuskasinami sug judiukunaka tukurkakuna. Ikuti kamka, mana judiu kaspaga, sachukupi wiñaska olivos malkisinami kangi. Chi malkita apaspa, alli olivos kuchuska malkima tarpuskasinami llutaspa kangi. Chasaka, chi alli olivos sacha angukunawa Diuspa kausaiwami kallarikangi. ¹⁸ Chimanda, ¡ujalallapas iuiakungi: “Alli olivos sachamanda kuchuska malkisinakunamanda mas allimi kani!” Chasa iuiaspaga, iuiarii, kamka mana anguta charig kagta. Chasapaga iuiarii: angukunami kamta charig kankuna.

¹⁹ Kasachar niwantrangi: “Chi malkikuna kuchugsinami tukurka, nukata chima tarpugsina llutaspa rurawangapa”. ²⁰ Ari. Judiukuna mana Cristowa iuiarigmandami chi sacha malki kuchugsina tukugsamurka. Ikuti kamka, paiwa suma iuiariskamandallami chi kuchuskama tarpuskasina llutaspa tukugsamurkangi. Chimanda, mana atun tukungi. Chasapaga, Taita Diusta suma kuiaspa manchaspalla iuiakungi. ²¹ Imasami Taita Dios, chi sacha kikinpa malkisinakunata mana chillapi sakirka: kampsami chasallata pudingi pasanga, mana allilla kagpika. ²² Chimanda iuiarii, Taita Dios iapa alli kagta; chasallata, iapa rabiariig kagta. Paita mana uiagkunata iapa rabiariigmi ka. Ikuti kamwaka iapa allimi ka. Chasa kagmanda, kamka iukangimi, mana kungarispalla, Taita Dios kamwa iapa alli kagta iuiarispalla kanga. Kungarigpika, kampsami chi sachamanda malki kuchuskasinami tukunkangi. ²³ Chi judiukuna Cristowa mana iuiarigkuna paita uiagsamugpikunaka, Taita Dios, chi sachamallatatami paikunata ikuti tarpugsina llutaspa ruragsamunga. Taita Diosmi pudí, chasallata ruragsamungapa. ²⁴ Sachukupi wiñaska olivos sachamanda malkita kuchuspa, alli olivos sachama tarpugsina llutaspami kamta rurarka. Mana chasa rurangapa pudiringasina kagpipas, allillami chasa rurarka. Taita Dios, kamta chasa ruraspaga, ¿manachu mas allilla pudinga, chi alli olivos sachama judiukunata ikuti tarpugsina llutaspa ruranga? Ari.

Israelmanda runakunatapas, Taita Dios kispichingapa kaskamanda

²⁵ Taitakuna i mamakuna, munakunimi, manara pipas iachaskata kamkuna iachangapa; chasaka, kamkuna mana iuianakungapa: “Nuka, tukuimi iachani”. Israelmanda runakuna maikankunata iuiai tutaiachiskasinami tukurkakunata; chika, mana judiukunata maituku achka agllaska, Cristowa tukugsamunkama. ²⁶ Chasa tukugsamuurami tukui Israelmanda runakuna kispiringapa kankuna. Chasallatami ñugpamanda librupi willaraiá, kasa nispa:

Sión lumamanda, kispichigmi samungapa ka.
Paika, ñugpamanda achala taita Jakobpa wambrakunapa wambrakuna jiru ruraskakunatami

kispichigsamungapa ka.

²⁷ Nuka ñugpata paikunawa iuiarispa rimaskaka, kasami tukungapa ka:

paikuna mana allilla ruraskakunata nuka pasinsiaura.

²⁸ Israelmanda runakuna, Alli Willaita wabutispa, Taita Diusta manami munagsamurkakuna; chasaka, kam mana judiu kagkunamanda allilla tukungapa. Chasa kagpipas, paikunapa ñugpamanda achala taitakunata Taita Dios agllaskamandami paipa kuiaska chara kankuna. ²⁹ Taita Dios ima karaskata mana kichunchu. Pai kikin agllaskakunata mana wabutinchi. ³⁰ Chasallata, imasami kamkuna, ñugpata mana Taita Diusta uiarkangichi; ikuti kunaauraka, judiukuna paita mana uianakugmanda, pai kamkunamanda suma kuiaspa llakirirka: ³¹ chasallatami, judiukuna kunaura mana paita uiagkuna kagpipas, mas nispa paillatata ikuti judiukunamanda llakiringapa ka; imasami kamkunamanda llakirirka: chasallata. ³² Tukuikunatami Taita Dios sakirka, paita mana uiagkuna kangapa; chasaka, tukuikunata suma kuiaspa llakirirpa, pai kikin kispichingapakunata.

³³ Taita Dios, ña askurinti sumami kuiá. Ña askurinti iui aiachami ka. Pai ima iuiakuskata, ñi pipas mana iachangapa pudinchichu. Mana imapas pudinchichu, pai ima rurakuskata iachangapa ima niraiagta. ³⁴ Chasallatami ñugpamanda librupi willaraiá, kasa nispa:

Atun Taita Dios ima iuiakuskata, ñi pipas mana iachanchu.

Paita ñi pipas mana imapas iuiachinchu.

³⁵ Ñi pipas mana paita imapas ñugpa kararkachu,

pai kutichingapa. ³⁶ Tukuimi paimanda karaska tia. Paimi tukui rurarka. Pai kikinmandami tukui ruraska tia. Paita imaurapas iapa suma atun kagta nisunchi. Chasa kachu.

12

Taita Diosmandalla sumaglla kaugsangapa

¹ Taitakuna i mamakuna, Taita Dios suma kuiaspa llakiskamandami kasa mañaikichita: kam kikinakuna, Taita Diusta kamarikusina iukachiriichi, paimandalla kaugsangapa; chasaka, pai suma kuntintulla kamkunata kawangapa. Chasami kamkunata chaiaku, tukui iuiaiwa Taita Diusta suma atuniachingapa. ² Mana kaugsaiichi, kai alpamandakunallawa iuiarispa. Iukangichimi, Taita Dios kamkunapa iuiaita sug rigcha iuiachiskakunawa mas suma iuiarispa kaugsangakuna. Chasa kaugsaspaka, iachankangichimi, Taita Dios ima munakuskata rurangapa. Paipa ñawipi sumaglla kagta kawachispami tukuipi allilla ruraspaka iukangichi kaugsanga.

³ Taita Dios suma kuiawaskamandami tukui kamkunata kasa niikichita: imasa kikinmanda iui aiukaskamanda mas atun mana iukangichi iuianga. Chasapaka, imasami Taita Dios, pai imasa munaskasina sug sugta karamú, paiwa suma iuiarispa kangapa: chasallatami iukangichi iuiaringa. ⁴ Imasami suglla kuirpupi, chaki, maki, uma, imapas achka iukagpipas, sug sug rigcha, sug sug rigcha rurankuna: ⁵ chasallatami nukanchipas, achkakuna kaspapas, Cristowa suglla kagsina kanchi. Nukanchi tukuikunami suglla kuirpu niraianchi.

⁶ Taita Dioska, nukanchita sugta sug rigcha, sugta sug rigcha, pai imasa munaskasinami karamú, nukanchi kikinpura aidanakuspa kaugsangapa. Pai kikin Santu Ispirituwa rimangapa karamugpika, pai imasa iuiachiskasina willasunchi, paiwa suma iuiarispa. ⁷ Sugkunamanda tukuipi allilla rurangapa karamugpika, paikunamanda allilla suma rurasonchi. Sugkunata iachachingapa karamugpika, paikunata allilla iachachisunchi. ⁸ Sugkunata sumaglla iuiachingapa karamugpika, paikunata sumaglla iuiachisunchi. Kulki u imapas karangapa chaiagpika, mana karagsina iuiarispa karasonchi. Mandag kangapa chaiagpika, allilla iuiarispa suma mandachu. Ministiskakunata suma kwaspa, imapas karangapa chaiagpika, alli iuiachiiwa karasonchi.

Cristowa tukuskakuna, imasa Diosmandalla kaugsai iukaskamanda

⁹ Tukui iuiaiwa sutipa allilla kuianakuichi. Mana munaichi jiru ruraikunata. Ikuti tukui allilla ruraikunataka suma ruraspaka kaugsaiichi. ¹⁰ Waugkindikunasina parijuma kuianakuichi. Sugkunata: “Nukanchimanda mas allimi ka” kam kikinpuramanda iuiarispa kaichi.

¹¹ Ima ruraikunapas allilla ruraichi, mana killaspalla. Iaia Jesús imasa munakuskasina tukuipi allilla iuiarispa ruraichi.

¹² Paita suma iuiaiwa suiaspa, alli iuiachiiwa kaichi. Iapa llakiikuna chaiamugpika, mana llakiwa kagsina kawachiichi. Mana sakiichi, Taita Diusta mañaspa kaugsangapa.

¹³ Taita Diuspalla kagkunata ima ministiriska karaichi. Kamkunapa wasima pipas chagriypika, sumaglla “Iaikui” niichi. ¹⁴ Kamkunata jiru rurangapa iuiaspa kawagkunataka niichi: “Taita Dios, kamta iapa kuiaspa kawapuachu”. Paikunata mana randichingapa iuiachi. Chasapaka, Taita Diusta paikunamanda mañapuichi.

¹⁵ Alli iuiachiiwa kagkunawa kangapa chaiyppika, chasallata alli iuiachiiwa kaichi. Chasallata, wakanakuskawa kangapa chaiyppika, paikunawa llakii iukaichi.

¹⁶ Kam kikinpura sugllasina iuiarispaspa kaugsanakuiichi. Atun tukugsina iuiarispaspa mana kaichi. Chasapaka, uchulla kaskakunawa sugllapi tukuichi. Mana iuiarispaspa kaichi: “Nuka, tukuimi iachani”.

¹⁷ Kamkunata mana allilla ruragkunataka mana randichiichi. Iuiariichi, tukuikunapa ñawipi allilla ruraspaspa kaugsangapa. ¹⁸ Kamkunata imapas rurangapa chaiyppika, allilla ruraichi; chiwanka, tukuikunawa sumaglla kaugsanakungapa.

¹⁹ Nukapa kuiaskakuna, kamkunata mana munagkunataka mana chasallata randichiichi. Chasalla sakiichi. Taita Diosmi paikunata justisiangakunata. Chasallatami ñugpamanda librupi willaraiá, kasa nispa:

Atun Taita Diosmi ni:

“Nukami justisiasa.

Paikuna jiru ruragpikunaka,

nukatami chaiawaku,

chasallata paikunata rurangapa”. ²⁰ Ikuti:

Kamta mana munag iarkaiwa kagpika,

kam iukangimi mikui karanga.

Iakunaiwa kagpika,

iukangimi upiangapa karanga.

Kam chasa allilla ruragpika,

paitaka ñawi ruparispaspa,

pingaisinami iuiachinga. ²¹ Kamta ima jirukuna rurangapa iuiaita mana sakiringi. Chasapaka, alli ruraikunawa jiru iuiakunata binsingi.

13

¹ Tukuikunami iukanchi, mandagkuna ima niskata uianga. Mandagkunata Taita Dios mana churagpika, ñi pipas manachar tiantra. Kunaura mandagkunaka, Taita Dios churaskakunami kankuna. ² Chimanda, chi mandagkunata mana uiagkunaka, Taita Dios mandangapa churaskatami wabutinkuna. Chasa mana uiagkunaka justisiaimi tukungapa kankuna. ³ Mandagkunaka, alli ruragkunata manchachingapa mana kankunachu. Mana alli ruraspaspa kaugsanakuskata manchachingapami churaska kankuna. ¿Manachu munangichi, mandagkunata mana manchaspalla kaugsangapa? Chasa munaspaka, allilla ruraspaspa kaugsaiichi. Chasa kaugsagpika, mandagkuna kamkunata ningapami kankuna: “Alli runami kangí”. ⁴ Mandagkunaka, Taita Diusta aidagkunami kankuna, kamkuna allilla kaugsangapa. Kamkuna imapi mana allilla ruraspaspa, iukangichimi manchaspaspa kangakuna. Mandagkuna, Taita Diusta aidag kaspaspa, mana ianga barata charirinkunachu. Mana allilla ruragkunamandaka asutigkunami kankuna. ⁵ Chimandami chaiá, paikuna ima niskata uiangapa. Asutii tukungapaspa manchaspalla, manima; kamkunapa alli iuiapi iuiarispaspa iukangichi chasa uianga. ⁶ Paikuna mandagkuna kagmanda iukangichimi, paikunata kulki paganga. Mandagkuna, Taita Diusta aidagkuna kaspaspa, iukankunami imaurapas paikunata imasa chaiaskasina ruraspaspa kaugsangapa.

⁷ Tukui mandagkunata imasa chaiaskasina kuaichi. Impuistu chaskigta kulki kuaichi. Rama * mañagtaka rama kuaichi. Suma kuiangapaspa chaiaskataka suma kuaichi. Suma rimai iukaskataka suma rimaichi.

⁸ Mana pitapas dibiiichi. Iukaichi dibisinaka, kam kikinpura sumaglla kuianakuspa kaugsangapaglla. Sugkunata kuiagkuna, tukui ima Moisés niskata allilla ruragkunami niraiankuna. ⁹ Chi niskapi, kasami willaraiá: “Mana sugpa warmiwa kariwa siriringi. Mana pitapas wañuchingi. Mana sisangi. [Mana pimandapas llullangi.] Sugkuna iukaskakunata mana munaringi”. Sug mandaikunapasmi tia. Chasa tiagpipas: “Kam kikintasinami iukangi, tukui runakunatapas kuianga”; chasa ruragpika, tukui ima Moisés niskata allilla ruragkunami niraiankuna. ¹⁰ Chasa kuiagkuna, mana pitapas jiru rurangapaspa iuiankunachu. Chimandami, chasa kuianakuspa kaugsanakugmanda, tukui ima Moisés niskata allilla ruragkuna niraiankuna.

* 13:7 Rama kuangapaspa niraianimi imasa chaiaskasina kuntribusiun kuangapaspa.

¹¹ Kasapas iuiariichi: kuna punchakuna imasa kagta. Nukanchi Iaia Jesucristowa suma iuiaringapa kallariska, kunaurami kispichii puncha sutipa ña chaiamuku. Chimanda, puñunakugsina niraiagkuna rigchariichi. ¹² Tuta ña pakarii tukugsinami chaia-muku. Chimanda, iana tutapisina mana allilla ruraikunata sakisunchi. Wañuchinakudiru katanga churarigsina tukusunchi; chasaka, punchapisina kaugsangapa. ¹³ Punchapi purinakugsina, tukuipi allilla ruraspa kaugsanikusunchi. Mana kaugsasunchi, iapa mikuspa i machagta upiaspa. Chasallata, maikan kari warmiwa pandarispa i jiru ruraikunata ruraspa mana kasunchi. Mana piñachirinakuspalla i sugkunata jiru iuiaiwa mana kawaspalla kasunchi. ¹⁴ Chasapaka, Iaia Jesucristopa iuiaita churarigsina tukungichi. Mana iuiangichi, kam kikinkunapa kuirpupi ima jiru iuiaskasina rurangapa.

14

Cristowa sug tukuskakunata mana piñasunchi

¹ Manara Cristota allilla rigsigkunata sumaglla chaskiichi, mana imapipas llakichinakuspalla. ² Cristowa tukuskakuna, maikankuna iuiankunami, tukui mikui, mikudiru kagta. Ikuti sugkunaka, manara Cristota allilla rigsisa, iuiankunami, aicha mikuspaka, pandarig niraiagta. ³ Tukui mikuikunata mikugka, aicha mana mikugta mana wabutichu. Chasallata aicha mana mikugka, tukui mikuikunata mikugta mana ñi imapas nichu. Taita Diosmi iskandikunata ni: “Allillami ka”. ⁴ Kam, ¿imapatak sug patrunpa lutrinta ningi: “Mana allilla ruraspami kangi”? Pai allilla u mana allilla rurakuskata, kikin patrunmi iuká kawanga. Chasa kagpipas, Iaia Jesusmi paita aidanga, allilla tukugsamungapa. Chimandami mikug u mana mikug kaskakunata pai ningapa ka: “Allillami ka”.

⁵ Kasapas. Sugkuna iuiankunami, sug puncha, sugkunamanda mas atun wardadiru tiagta. Ikuti sugkunaka iuiankunami, ñi imapas mana atun wardadiru puncha tiagta. Kamkuna imasa mas suma rurangapa iuiariskata ruraspa kapuaichi. ⁶ Maikanpas wardadiru puncha samakuspaka, Iaia Jesusmanda iuiarispa samachu. Tukui mikuikunata mikugka, Taita Diusta: “Pai Siñur” nispa, Iaia Jesusmanda iuiarispa mikuchu. Aicha mana mikupgas, Iaia Jesusmanda iuiarispa mana mikuchu. Paipas, Taita Diusta: “Pai Siñur” nichu.

⁷ Ñi pipas mana kaugsanchichu nukanchimandalla. Chasallata wañuipas, mana nukanchimandalla wañunchichu. ⁸ Kaugsanakunkama, Iaia Jesusmandami kaugsanakunchi. Wañuurapas, Iaia Jesusmandami wañunakunchi. Chasapika, kaugsanakuspa wañuurapas, Iaia Jesuspallami kasunchi. ⁹ Iaia Jesucristo, wañuspaka, kikinmi kaugsarirka; chasawaka, wañuskakunata kaugsagkunatapas iaia mandag kangapa.

¹⁰ Nigpika kamka, ¿imapatak Cristowa tukuskakunata nikungi: “Kam, mana allilla ruraspami kangi”? ¿imapatak paikunata wabutikungi? Tukuikunami iukanchi, Taita Diospagma chaiagringa. Chipimi allilla u mana allilla ruraskakunata kawachii tukusunchi. ¹¹ Chasallatami ñugpamanda librupi willaraiá:

Atun Taita Diosmi kasa ni:

“Nukapa kaugsaiwami sutipa kasa nini:

Tukuikunami nukapa ñugpa ladu kunguriwangapa kankuna.

Tukuikunami niwangapa kankuna:

‘Kam, tukuimanda mas alli, mas suma, tukuikunapa iaiami kangí.’” ¹² Chasaka, tukuikunami iukanchi, Taita Diospa ñawipi ima ruraskakunata willarigringa.

¹³ Chimandami iukanchi, parijuma mana pitapas ninakunga: “Mana allilla ruraspami kangí”. Chasapaka, kasa iuiarisunchi: Cristowa tukuskakunata mana imapipas pandachispa, pandariipi urmachisunchi. ¹⁴ Iaia Jesusmanda iuiarispa, iachanimi, ñi ima mikui, Diospa ñawipi mapasina mana kagta. Ikuti maikanpas: “Mapami ka” iuiarigpika, chasa iuiarigmanda mapami niraiapunga. ¹⁵ Kam, sug waugki pandarig niraiaska mikuita paipa ñawipi mikukugpika, mana parijuma kuianakugsinami tukungi. ¡Amalai kam chasa mikukuskata kawaspaka, chi runa Cristowa iuiakuskata sakintra, Cristo paimanda wañugpipas! ¹⁶ Chimanda, kamkuna tukui mikuikunata mikug kagpipas, mana tiachu ñi pipas kwaspa, ningapa: “Chika, mana allilla kanchu”. ¹⁷ Taita Dios ima niskata ruraspa kaugsangapaka mana niraianchu kasa u chasa mikuspa upiaspa kaugsangapa. Santu Ispirituwa alli iuiachiiwa allilla ruraspa, sumaglla kaugsangapami niraiá. ¹⁸ Chasa kaugsaspa, Cristo ima niskata ruragka, Taita Diusta sumagllami kuntintachí. Chasa allilla ruragmandami maikan runapas ninkuna: “Pai, allimi ka”.

¹⁹ Chimanda maskasunchi, imapipas tukuikunawa sumaglla kaugsanakungapa; chasaka tukuikuna, alli suma iuiai iuiachinakuspa kangapa. ²⁰ Kam ima sugkunapa ñawipi mikuskamanda, ¡ujalallapas Taita Dios paikunata suma ruraska kaskata puchukagsina rurakungi! Tukui mikui, mikudirumi niraiá. Chasa niraiagpipas, kam ima mikukuskata

sug waugki, kawaspa, nichu mana allilla kagta: chiwanka, sutipami kammanda mana allilla tukunga. ²¹ Cristowa tukuskakuna mana pandaringapa, mas allilla kantra, aicha mana mikungapa, binu mana upiangapa, ñi imapas pandachigsina mana kangapa. ²² Kam ima mikudiru iuiakuskata Taita Diuspa ñawillapi iuiakungi. Maikanpas, mikukuspa, paipa iuiiwa mana tiachu imapipas mana allilla ruraska kagta: chi runaka, Taita Diuspa iapa kuiaskami ka. ²³ Ikuti maikanpas, mikukuspa tapurikuchu: “Kai mikui, çallilla u mana allillachu ka?”: paika, ña pandarigmi tukú. Ima ruraipipas alli kagta suma iuiaringataka, sug rigcha iuiaripa ruragpika, paika pandariipimi ña urmaska niraiá.

15

Iuiarisunchi, sugkuna allilla kangapa

¹ Nukanchi Cristowa suma iuiaripa kagkunaka iukanchimi, manara paita allilla rigsigkunata, paikuna ima iuianakuskamanda ñi imapas mana ninga. Nukanchi kuntintaripa kangapa mana iuiarisunchi. ² Tukuikunami iukanchi iuiaringa, sugkunapas allilla kangapa; chasaka paikunapas, alli suma iuiai iuiachii tukungapakuna. ³ Cristopas mana iuiakurkachu, kikinlla kuntintaripa kangapa. Nigpika, kasami ñugpamanda librupi paimanda willaraiá: “Kamta kamispa rimaskakunaka, nukatami chaiawarka”. ⁴ Taita Diusmi ñugpamandata tukui iskribichirka, nukanchita iachachingapa. Chi willaraiaskapi nukanchi iachakuspaka, iukanchimi, sumaglla iuiachirispalla, chi iuiailawa mana sakispalla suiangakuna. ⁵ Taita Diusmi sumaglla nukanchita iuiachimú, mana sakispalla kaugsangapa. Paimi kamkunata iuiachimú, kam kikinpura suglla iuiiwa kaugsanakungapa; imasami Jesucristo kaugsarka: chasallata. ⁶ Chasaka, sugllapi suglla rimagsina, nukanchipa iaia Jesucristopa Taita Diusta ningichi: “Kam, iapa suma atunmi kangí”.

Mana judíu kagkunata, Alli Willaita willaskamanda

⁷ Chasamanda, imasami Cristo, kamkunata suma chaskirka: chasallata kam kikinpura suma chaskinakuichi; chasawaka, Taita Diusta ninakungapa: “Kam, iapa suma atunmi kangí”. ⁸ Kasapasmi niikichita: Cristo samurkami, judiukunamanda allilla rurag kangapa; chasaka, Taita Dius ima nukanchipa ñugpamanda taitakunata niska tukungapa. Chiwami kawachirka, Taita Dius ima niskata sutipa rurag kagta. ⁹ Mana judíu kagkunamandapasmi Cristo samurka. Paikunamandapasmi Taita Dius llakirirka; chasa iachaspaka, paita: “Kam, iapa suma atunmi kangí” ningapakuna. Chasallatami Cristomanda ñugpamanda librupi willaraiá, Taita Diusta kasa nispa:

Mana judíu kagkunapa chaugpipipas

ningapami kaiki:

“Iapa suma atunmi kangí”.

Kamta suma atuniachispa kantangapami kaiki. ¹⁰ Kasapasmi willaraiá:

Kamkuna mana judíu kagkuna,

Taita Dius agllaska runakunawa alli kuntintaripa iuiachiriichi. ¹¹ Ikuti kasapasmi willaraiá:

Tukui kamkuna mana judíu kagkuna,

atun Taita Diusta niichi:

“Kam, iapa suma atunmi kangí”.

Tukui alpapi kaugsagkuna,

chasallata paita nisunchi. ¹² Ikuti Isaiaspas, kasami willarka:

Isai suti runapa iawarmandami tiagsamungapa ka,

mana judíu kagkunatapas

iaia mandag tukugsamungapa.

Paitami mana judíu kagkunapas suma iuiiwa suiangapa kankuna.

¹³ Taita Dius suma iuiiwa suiangapa iuiachig, paillatata tukui kamkunata iuiachichu, paiwa suma iuiaripa, alli iuiachiwa sumaglla kaugsanakungapa; chasaka, Santu Ispirituwa iapa iachaiwa paita imapipas suma iuiiwa suiaspalla kaugsangapa.

¹⁴ Nukapa taitakuna i mamakuna, nuka kamkunamandami allilla iuiani, tukuipi alli kaspá, allilla iachaiwa kagtakuna. Chiwanka pudingichimi, kam kikinpura sumaglla iuiachinakuspa kaugsanakungapa. ¹⁵ Nuka chasa iuiaspapas, kai kartapi mana manchaspallami imakunamanda rimarkaikichita, kamkunata iuiachingapa. Taita Dius, iapa kuiawaspa, mingawaskamandami chasa rimarkaikichita; ¹⁶ chasaka, Jesucristo ima niwaskata ruraspá, mana judíu kagkunata Taita Dius Alli Willaita karamuwaskata willangapa. Munakunimi, mana judíu kagkunata Taita Diuspa ñawipi sug kamarikutasina chaskiwangapa; chasaka paikuna, Santu Ispirituwa Taita Diuspalla kangapakuna.

¹⁷ Chimandami, Taita Dius ima munakuskata nuka ruraskamanda, Jesucristowa kaspá, iapa allí iuiachiwá kani. ¹⁸ Nuka kikinmandalla ñi imapas mana rimarinichu. Cristo kikinmi iuiachiwarka, nuka mana judíu kagkunata kaiangapa; chasaka paikunapas, Cristowa tukungapakuna. Chimandami nuka mana manchaspalla rimani. Rimaikunawa i ruraikunawa, ¹⁹ mana imaurapas ruraska ujnachingasina iwachiikunawa, Santu Ispirítupa iapa iachaiwami mana judíu kagkunata kaiangapa iuiachiwarka. Chiwanka, Jerusalemmanda kallaríspa, Iliria alpákama, tukuipimi Cristomanda Allí Willaita willaspa purirkani. ²⁰ Chasa kagpipas, sugkuna willai kallarískapi, mana; chasapaka munakurkani, Cristopa sutita manara iacharíska alpakanapi Allí Willaita willagringapa. ²¹ Chasallatami ñugpamanda librupi willaraiá, kasa nispa: Paimanda ñi ima mana iacharíska alpakanapimi chi Allí Willaita uiangapa kankuna. Paimanda ñi imaurapas mana uiagkunami iachagsamungapa kankuna.

Romama ringapa, San Pablo iuiakuskamanda

²² Chasa willai purikuspami, kamkunapagma ikuti ikuti chaiagringapa munakuspapas, mana pudirkani. ²³ Ikuti kunaauraka, ñami kai alpakanapi puchukarkani willaspa puringapa. Ña achka watamandatami munakurkani, kamkunapagma chaiagringapa. ²⁴ Chimandami iuiakuni, España suti alpama rikuspa, kamkunata kawaspa ialingringapa. Kamkunapagma chaiagriura, iapa allimi iuiachiwangapa ka. Kamkunaka, ima ministiskami karawankangichi, nuka Españama chaiagringapa. ²⁵ Kunaauraka, Jerusalemami rikuni, Taita Diuspalla kagkunata mailla kulkiwa aidagringapa. ²⁶ Masedonia i Akaia alpakanapi kaugsaspa Cristowa tukuskakunaka munakurkami, kulki tandachispa, Jerusalem kachangapa; chitaka, mana ñi ima iukaska Taita Diuspalla kagkunata karangapa. ²⁷ Paikunapa iuiailawami chasa aidangapa munarkakuna. Paikunatami chaiarka, chasa aidangapa. Taita Dius judiukunata Allí Willaita karamuskata chi mana judíu kagkuna chaskiskamandaka, iukankunami judiukunata ima ministiskakunata aidangkuna. ²⁸ Chimanda, chi tandachíska kulkita Jerusalemipi kaugsanakuskata nuka karagringapa puchukauraka, Españama rikuspa, kamkunapagpi iaikuspami ialigrispa. ²⁹ Kasami iachani: kamkunapagma nuka chaiagriura, Cristomi nukanchita mas suma kuiangapa ka.

³⁰ Taitakuna i mamakuna, nukanchipa Iaia Jesucristomanda i Santu Ispirítu karamuska kuiaimandami mañaikichita: nukamanda Taita Diusta suma mañaspa aidawaichi. ³¹ Mañapuaichi, Judea alpapi kaugsaspa Cristota mana uiagkunamanda Taita Dius michawachu. Chasallata mañapuaichi, Taita Diuspalla kagkunaka, Jerusalemipi nuka apakuska kulkita sumaglla mana piñarispalla chaskiwachukuna. ³² Chiwanka, Taita Dius munagpika, kamkunapagma allí iuiachiwá chaiagrispa, kamkunawa allilla samaringringapa mañapuaichi. ³³ Taita Dius sumaglla kaugsaita karag, tukui kamkunawa kapuachu. Chasa kachu.

16

San Pablo rigsiskakunata: "Puangi" niskamanda

¹ Nukanchipa mama pani Febeta allilla chaskipuaichi. Paika, Senkrea puiblupi Cristowa tukuskakunata aidagmi ka. ² Imasami chaiá, Taita Diuspalla kagkunata chaskingapa: chasallata paitapas chaskipuaichi, Iaia Jesusta iuarispa. Chi panika, achkakunata i nukatapas aidagmi ka. Allilla ruraskamanda, paita ima ministiskata karapuaichi.

³ Pani Priskata i paipa kusa Akilata: "Puangi" nipuaichi. Paikunapas, nukawa Jesucristomanda Allí Willaita willagkunami kankuna. ⁴ Paikuna, nukamanda asllamandalami kispirkakuna wañungapa. Chimanda paikunata, nukalla mana "Pai Siñur" ninichu. Tukui mana judiukuna, Cristowa tukuspa, maipi kagkunapasmi, "Pai Siñur" ninakú. ⁵ Priska i Akilapa wasipi Cristowa tukuskakuna sugllapi tandariskakunatapas: "Puangi" nipuaichi.

Nukapa kuiaska waugki Epenetotapas: "Puangi" nipuaichi. Paika, Asia alpapi tukuikunamanda ñugpa Cristowa tukuskami ka.

⁶ Pani Mariatapas: "Puangi" nipuaichi. Paika, kamkunapuramanda achka allillami rurarka.

⁷ Nukapa alpamanda nukawa wichkaraiaskapi kaska waugki Andronikota i Juniastapas: "Puangi" nipuaichi. Paikunamandaka, Jesús kikin kachaska runakunami ninkuna: "Iapa allimi kankuna". Nukamanda mas ñugpami Cristowa tukuska kankuna.

⁸ Iaia Jesuswa suma iuiarig kagmanda, nukapa kuiaska waugki Ampliatotapas: “Puangi” nipuaichi. ⁹ Waugki Urbano, nukanchiwa Cristomanda Alli Willaita willagtapas: “Puangi” nipuaichi. Nukapa kuiaska waugki Estakistapas: “Puangi” nipuaichi. ¹⁰ Waugki Apeles, Cristowa suma iuiarig kagta kawachirigtapas: “Puangi” nipuaichi. Waugki Aristobulopa wasipi kaugsanakuskatapas: “Puangi” nipuaichi. ¹¹ Nukapa alpamanda kaska waugki Erodiontapas: “Puangi” nipuaichi. Waugki Narsisopa wasipi Iaia Jesuswa suma iuiarigkunatapas: “Puangi” nipuaichi. ¹² Pani Trifenata i pani Trifosatapas: “Puangi” nipuaichi. Paikunapas, Iaia Jesusmanda allilla ruragkunami kankuna. Nukapa kuiaska pani Persidatapas: “Puangi” nipuaichi. Paika, Iaia Jesusmanda iapa sinchi ruragmi ka. ¹³ Iaia Jesús agllaska waugki Rufota i paipa mamatapas: “Puangi” nipuaichi. Paipa mamaka, nukapa mamasinami kapuá. ¹⁴ Waugki Asinkritota, waugki Flegonteta, waugki Ermesta, waugki Patrobasta, waugki Ermasta i tukui paikunawa waugkikunatapas: “Puangi” nipuaichi. ¹⁵ Waugki Filologota i pani Juliata, waugki Nereota i paipa panita, waugki Olimpasta i tukui paikunawa Taita Diuspalla kagkunatapas: “Puangi” nipuaichi.

¹⁶ Kam kikinpura Taita Diusmanda iuiarispa, “Puangi” muchanakuspa ninakuichi. Cristowa tukuskakuna maipi kagkunapas, tukuikunami kamkunata: “Puangi” ninakú.

¹⁷ Kam taita i mamakunata mañaikichitami: maikankunapas Cristowa tukuskakunata iskaima tungupapa piñachirinakuspa pandachigkuna kaskata kawapuaichi. Chasa pandachigkunaka, kamkuna Alli Willaita iachaikuskata tuntiachigsinami ruranakú. Paikuna kaskamanda anchuriichi. ¹⁸ Chasa ruragkunaka, nukanchipa Iaia Cristo imasa munakuskasina mana ruranakunchu. Pai kikinkuna iuiarispa munaskakunallatami ruranakú. Paikunapa miski simiwa, suma rimaiwami maikan manara allilla iachagkunapa iuiaita tuntiachinakú.

¹⁹ Kamkunaka Cristo ima niskata ruragkuna kagta, tukuikunami iachanchi. Chimandami kamkunamanda, nuka iapa alli kuntintulla kani. Kamkuna chasa kagpipas, munanimi, kamkuna iachakunasina mas suma ruraikunata agllaspa kangapa. Ikuti jiru rurangapaka, mana iachagsina kaichi. ²⁰ Taita Dios, kamkunata sumaglla kaugsaita karag, mana unaillami iaia kukuta kamkunapa chaki sarudiru ukuma pambangapa ka. Nukanchipa Iaia Jesús, kamkunata sumaglla kawapuachu.

²¹ Waugki Timoteo, nukawa Alli Willaita willagmi kamkunata: “Puangi” niku. Nukapa alpamanda kaska waugkikuna Lusio, Jásón i Sosipaterpasmi, “Puangi” ninakú.

²² Nuka kikin Tersio, kai kartata Pablomanda iskribig, Iaia Jestusta iuiarisiami, “Puangi” niikichita.

²³ Waugki Gaiomi kamkunata: “Puangi” niku. Paipa wasipimi nuka Pablo kaugsakuni. Tukui Cristowa tukuskakunapasmi kaipi tandarinkuna. Waugki Erasto kai puiblupi kulki wakachigpasmi, “Puangi” niku. Waugki Kuartopasmi “Puangi” niku.

²⁴ [Nukanchipa Iaia Jesús, tukui kamkunata sumaglla kawapuachu. Chasa kachu.]

Taita Diusta iapa suma atun kagta nispa, puchukariskamanda

²⁵ Taita Diusta nisunchi, iapa suma atun kagta. Paimi pudí, kamkunata tukuipi allilla charingapa. Chasallatami nuka, Jesucristomanda Alli Willaita iachachispa willani. Chi Willaita, kai alpa manara tiagsamuskauramandata, mana pipas iachaska kaskatami.

²⁶ Taita Dios, pailla iachaskata kunaura willangapa kachamurka. Ñugpamandata Santu Ispirituwa rimagkuna iskribiraiaskapipas, chi Willaita willaskami tiarka. Taita Dios kikin mana wañugmi chasa willangapa kachamurka; tukui kai alpapi kaugsagkunaka, chi Willaita iachaspa, suma iuiarispa, Taita Dios ima niskata ruraspa kaugsangapa.

²⁷ Taita Dios suglla tukui iachagta Jesucristowa nisunchi: “Kam, iapa suma atunmi kangí, maituku waranga waranga watakuna ialigpipas”. Chasa kachu.

KORINTO PUIBLUPI CRISTOWA TUKUSKAKUNATA SAN PABLO MUSUGLLA KARTA KACHASKAMANDA

1 Taita Dios nukata munawaskamanda, Jesucristo aglaska kachamuskami kani, Alli Willaita willaspa puringapa. Sóstenes suti waugkiwa kaspá, ² kamkuna Taita Dioswa tukuskakuna Korinto puiblupi kaugsagkunatami kai karta kachaikichita. Kamkuna, Jesucristowa suma iuiarigmandami Taita Diospalla kangichi. Taita Diosmi kamkunata agllarka, paimandalla kaugsangapakuna. Nukanchipa Iaia Jesucristomanda iuiarispa paita mañagkuna maipi kaskapipas, paikunatapasmí chasallata agllarka. Jesucristoka, paikunapa i nukanchipa iaiami ka.

³ Nukanchipa Taita Dios i Iaia Jesucristo, kamkunata suma kuiaspa, suma iuiaiwa kawapachu.

Taita Dios, Jesucristowa nukanchita suma allilla karamuskamanda

⁴ Taita Dios, Jesucristowa kamkunata iapa kuiaspami suma allilla karamurka. Chasamandami nuka, kamkunamanda imaurapas nukanchipa Taita Diusta: “Pai Siñur” nini. ⁵ Kamkunaka Cristowa tukuskakunamanda, Taita Dios tukuipipasmi suma iuiaipapa allillata karamurka; chasaka kamkuna, mas suma allilla iachaspa, sugkunata iachachingapa. ⁶ Chasawaka, imasami Cristomanda willarkaikichita: chasallatami tukuipi allilla tukugsamurka. ⁷ Chasa, Santu Ispíritu sug rigcha sug rigcha karamuikunaka mana imapas kamkunata pisigsamunchu. Chasa sumaglla kaugsaiwami suianakungichi, nukanchipa Iaia Jesucristo ikuti samunkama. ⁸ Paimi kamkunata allillapi charinga, tukurii punchakama. Chasaka, nukanchipa Iaia Jesucristo samug puncha, mana pipas kamkunamanda ningachu: “Mana alli runami karka”. ⁹ Taita Dios ima rurangapa niskata chasami ruragka. Paimi kamkunata agllarka, paipa wambra nukanchipa Iaia Jesucristowa suglla iuiaiwa tukuspa kaugsanakungapa.

Korintopi kaugsag Cristowa tukuskapura, sug rigcha sug rigchama tunakuskamanda

¹⁰ Taitakuna i mamakuna, nukanchipa Iaia Jesucristomandami kasa mañaikichita: tukui suglla iuiaiwa tukugsamuchu, mana sug rigcha sug rigcha rimanakuspalla. Tukuipi suglla iuiaiwa sugllapi iuiarispa kaugsapuaichi. ¹¹ Pani Kloepa familiakunami willawagsamurkakuna: kam kikinpura piñachirinakuspasi sug rigcha sug rigchama tunakungichi. ¹² Sugkuna ninakungichisi: “Nukanchi, Pablowami kanchi”. Sugkunaka ninakungichisi: “Nukanchika, Apoloswami kanchi”. Ikuti sugkunaka ninakungichisi: “Nukanchika, Pedrowami kanchi” i “Nukanchika, Cristowami kanchi”. ¹³ Kamkuna chasa ninakugpipas, ¿Cristo pitichiskachu ka? ¿Nuka Pablochu kamkunamanda kruspi klabai tukurkani? ¿Nukapa sutiwachu kamkuna baugtisai tukurkangichi? Manima. ¹⁴ Kamkunata ñi pitapas nuka mana baugtisarkaikichitachu. Chimandami Taita Diusta: “Pai Siñur” nini. Iskaikunallatami baugtisarkani: Krispo i Gaiollata. ¹⁵ Chimanda, mana pipas pudinchu ningapa: “Pablopa sutiwami baugtisai tukurkani”. ¹⁶ Kunaurami iuiariwá: Estefanaspa wasipi kaugsanakuskatapasmí baugtisarkani. Sugkunata nuka baugtisaska, mana iuianichu. ¹⁷ Cristoka mana kachamuwarkachu baugtisangapa. Alli Willaita willangapami nukata kachamuwarka. Mana kachamuwarkachu, iapa ailastimaiwa iachasina iachachingapa. Cristo kruspi wañuchii tukuskamanda iachaskallawami munani, paiwa suma iuiarigsamuchukuna.

Taita Dios tukui pudig i iachag kagta, Cristo kawachiskamanda

¹⁸ Cristo kruspi wañuchii tukuska, chi rimaika, diltudupa puchukaringapa kagkunataka sug upa rimaisinami paikunataka uiarí. Ikuti nukanchi kispichii tukungapa kagkunataka, Taita Dios iapa pudig kagtami chi rimai uiarí. ¹⁹ Ñugpamanda librupi, Taita Dios niskaka kasami willaraía:

Iachagkunapa iachaita

nukami puchukangapa kani.

Iuiaiugkunapa iuiaikunatapasmí wabutingapami kani.

²⁰ Kai alpamanda iachaikunaka, Taita Diospa ñawipi upakunapa iuiaisinami niraiá. Chimandaka iachakuna, iachachigkuna i kai alpamanda iachaiwa sug rigcha sug rigcha rimanakugka, iangami ka; ñi imapa mana balinchu. ²¹ Taita Dioska, tukuipi iachaspa, mana sakirkachu, kai alpapi kaugsagkuna kikinunapa iachaiwa paita rigsingapa. Chasapaka munanmi, Alli Willaita willaskawa, paiwa suma iuiarigkunata kispichingapa, sugkunataka chi Alli Willaita upakunapa rimaisina uiarigpipas.

²² Judiukuna mañanakú, paikuna mana imaurapas kawaskasina ruraskata kawangapa. Mana judíu kagkuna, suma iachaiwa rimanakuskata uiangapami maskanakú. ²³ Chasa

maskanakuskataka, nukanchimi willanakunchi, Cristo kruspi wañuchii tukuska kagta. Chasa willauraka, judiukunataka iapa mana sumami uiarinkunata. Mana judiu kagkunataka upakunapa rimaisinami uiarinkunata. ²⁴ Chasa kagpipas, Taita Dios kikin agllaska judiu i mana judiu kagkunapas, Cristomanda uiaspa, Taita Dios tukuipi allilla pudig i iachag kagtami ninchi. ²⁵ Taita Dios mana iuiiugsina ruraskata kawarigpipas, maikan runakuna mas iacha ruraskamanda mas allillami ka. Chasallata, pai mana pudigsina ianga ruraskata runakunapa ñawipi kawarigpipas, maikan iacha mas allilla pudiskamanda mas allilla ruraskami ka.

²⁶ Taitakuna i mamakuna, iuiaripuaichi: kamkuna, Taita Dios kikin agllaskakunami kangichi. Kai alpapi tiaskakunallawa iuiagkunapa ñawipi, maillakunallami iacha kangichi. Chasallata, maillakunallami atun i mandagsina kangichi. ²⁷ Kai alpapi tiaskakunallawa iuiagkunapa ñawipi, upakunasinatami Taita Dios agllarka; chasaka, iachakunata tuntia-chingapa. Mana pudigkunasinatami Taita Dios agllarka; chasaka, pudigkunata tuntia-chingapa. ²⁸ Tukuipi wabutiskakunasinatami Taita Dios agllarka. Ari, mana imapapas balig niraiaskakunatami agllarka; chasaka, balig niraiagkuna mana baligsina tukungapa. ²⁹ Chasawaka, Diospa ñawipi ñi pipas mana ningachu: “Nukami mas atun kani”. ³⁰ Pai Taita Dios munagmandami kamkuna Jesucristowa tukuska kangichi. Cristowami Taita Diospa iachaita nukanchi chaskinchi, mana pandarig niraianchi i kispichiska kanchi, paimandalla kaugsangapa. ³¹ Chasamanda, imasa ñugpamanda librupi willaraiaskasina, kasami niraiá: “Maikanpas atun tukuspa iuiarigka iuiarichu: ‘Atun Taita Diospalla kaspami atun kani’.”

2

Jesucristo kruspi wañuchii tukuskamanda Alli Willaimanda

¹ Taitakuna i mamakuna, nuka kamkunapagmami rirkani, Diospa Rimaita ñi pipas mana iachaskata willangapa. Chitaka, iapa ailastimaiwa iachasina mana willarkaikichitachu. ² Nuka kamkunawa sugllapi kaura, Jesucristollawami iuiakurkani, sug rigchaka mana uiaspalla. Ari, Cristota kruspi wañuchii tukuskallawami iuiakurkani. ³ Nuka iapa manchaiwa chugchuspa i sambaiaskasinami kamkunapagma chaigrirkani. ⁴ Nuka rimaiwa willakuura, mana iapa iachasina iuiachinurkaikichitachu. Santu Ispirituwa i paipa iapa iachaiwami iuiachinurkaikichita. ⁵ Chasaka kamkuna, mana runakunapa iachaiwa Jesucristowa tukugsamurkangichichu. Taita Diospa iapa iachaiwami Cristowa tukugsamurkangichi.

Santu Ispirituwa, Taita Dios nukanchita kawachiriskamanda

⁶ Allilla wiñaskasina Cristowa iuiarigkunatami Taita Diospa iachaita willanchi. Chi iachaika, kai alpamandakunapa mana kanchu. Chasallata, kai alpapi mandagkuna mana chita iachankunachu. Chi runakunapa iachaika, ñami puchukaringapa kankuna. ⁷ Taita Diospa iachaitami nukanchi willanchi. Chi iachaitaka, ñi pi ñugpamandakunapas manara iacharkakunachu. Kai alpa manara tiagpita, Taita Dios niska karka, chi iachaiwa nukanchi diltudupa suma puncha luarpi kagringapa. ⁸ Chi iachaitaka, ñi maikan kai alpapi mandagkuna mana iacharkakunachu. Chita iachaspaka, manami suma atun Iaia Jesusta kruspi klabankuna.

⁹ Chasamandami ñugpamanda librupi willaraiá, kasa nispa:

Ñi pipas mana kawaskasina,
uiaskasina i iuiariskasinatami
Taita Dios wakachiraiá,
maikan paita kuiaskakunata karangapa.

¹⁰ Chi mana pipas iachaskataka, nukanchitami Taita Dios paipa Ispirituwa iachachirka. Santu Ispiritu, kawakuspa, tukuimi iachá. Taita Dios kikin ima iuiakuskatapasmu tukui iachá.

¹¹ Ñi maikan runapas, sug runa ima iuiakuskata mana iachangapa pudinchu. Chi kikin runapa iuiái ispiritullapimi iachá. Chasallata ñi pipas, Taita Dios ima iuiakuskata mana iachangapa pudinchichu. Diospa Ispiritullami iachá. ¹² Nukanchika, kai alpamandalla iuiakunata mana chaskirkanchichu. Taita Dios kachamuska Ispiritutami chaskirkanchi; chasaka Taita Dios, nukanchita suma kuiaspa, pai ima karamuskakunata iachangapa. ¹³ Chikunataka kai alpapi kaugsagkunapa iuiaimandalla iachachiska rimaikunawa mana willanchichu. Santu Ispiritu iachachiska rimaikunawami willanchi. Chasaka, Santu Ispiritu ima iuiachiskata Santu Ispirituwa kagkunatami willanchi.

¹⁴ Maikanpas kai alpapi tiaskakunallawa iuiagka, Diospa Ispiritu karamuskakunata mana chaskingapa munanchu. Chi karamuskakunamandaka “Upakunapami ka” nispami

wabutí. Chi iachaikunataka mana iachangapa pudinchu. Santu Ispíritu iuiachiskallawami chikunata iachangapa pudirí. ¹⁵ Santu Ispirituta iukagka, tukuipimi kawaspa iachá, alli u mana alli kagtakuna. Ikuti paimandaka, ñi pipas kai alpamanda iuiaiwa mana pudinkunachu ninga, alli u mana alli kagta. ¹⁶ Chasallatami ñugpamanda librupi willaraiá, kasa nispa:

Atun Taita Diuspa iuiaita,
¿pitak rigsí?

¿Pitak paíta imapas iachachingapa pudí? Ñi pi.

Chasa willaraiaǵpipas, nukanchika Cristo iuiachiskatami iuianchi.

3

Taita Diusta aidag taitakunamanda

¹ Taitakuna i mamakuna, nuka mana pudirkaikichitachu, Santu Ispiritullawa iuianakuskataka rimangapa. Runakunapa iuiailawa kagkunatasinami iukarkaikichita rimanga. Kamkuna, Cristowa tukuska kaspaspa, wawakunasina manara iachagkunami kangichi. ² Chimanda, llullu wawakunata lichilla upiachingsinami iachaikuíta iachachirkaikichita. Ña atunkuna mikudiru kagsina iachaikunata manara pudirkanichu, kamkunata iachachingapa. Kunankama manara pudingichichu, chi iachaikunata iachangapa. ³ Charami runakunapa iuiailata iukangichi. Chimandami kam kikinpura jiru iuiaiwa kawanakuspa i piñachirinakuspa kaugsanakungichi. Chasa kaugsanakuspaka, ¿manachu runakunapa iuiailawa kaugsanakungichi? ⁴ Sugkuna ninakungichisi: “Nuka, Pablowami kani”; “Nuka, Apoloswami kani”; chasa ninakuspaka, ¿manachu runakunapa iuiailawa ninakungichi?

⁵ Pablo i Apoloska, ¿imatak kanchi? Iaia Jesús ima niskata willagkunallami kanchi. Nukanchita uiaspallami kamkuna paiwa iuiarirkangichi. Imasami Iaia Jesús, nukanchita sug sugta mingarka: chikunatami ruranchi. ⁶ Nukaka, chagra tarpuginsinami ruraspa, Alli Willaita willarkaikichita. Apoloska, chi tarpuskasinata iaku tallichingsinami paipa rimaiwa rurarka. Nukanchi chasa ruraskapi, Taita Diusmi chi rimaikunata wiñachi. ⁷ Chasaka, ñi tarpug ñi iaku tallichig mana imapas kagsinami niraianchi. Taita Diusmi tukuipi ka. Paimi chi rimaikunata wiñachig ka. ⁸ Tarpug i iaku tallichigka, iwallami Diuspa ñawipi niraianchi. Imasami sug sug, alli u mana alli rurarkanichi: chimandami imasa chaiskasina chakisunchi. ⁹ Nukanchika, Taita Diusta aidagkunami kanchi. Kamkunaka, Taita Dius alpapi tarpuspa wiñachingapa chagrasinami kangichi.

Chasallata, Taita Dius saiachikuska wasisinapasmi kangichi. ¹⁰ Taita Dius, suma kuia-waspa, alli iuiaitami karawarka. Chiwanka, alli iachagsina, wasichingapa kallariska rumita churagsinami Alli Willaita willarkaikichita. Sug iachachigka, chi kallariska rumi awapi wasi saiachikusinami paipa rimaiwa ruraku. Sug sugta chaiakumi iuiarispa, allilla iachachingapa; chasaka, chi awalla wasichikuska allilla kidagsina tukungapa.

¹¹ Wasita kallariska rumi, ña churaskami ka. Chika, Jesucristo kikinmi niraiá. Chi kallariska rumi tiaskapika mana pudirinchu, sug rumipas churangapa. ¹² Chi kallariska rumi awapika, kaikunawami wasi saiachingapa pudirí: kuriwa, kulkiwa, iapa suma rumikunawa, kaspikunawa, ugsawa, wirukunawa. ¹³ Chasawa saiachigkuna ruraskataka ninawa rupachispami iacharingapa ka, maikanwa allilla ruraska kagta. Chasallata, justisiai puncha chaiaura, sug sug imasa allilla u mana allilla iachachiskakunata ninallowantami rupachispa iacharingapa ka. ¹⁴ Maikanpas, ima ruraska ninawa mana rupagpika, suma luarpi allimi tukugsamunga. ¹⁵ Ikuti maikanpas, ima ruraska rupagpika, ñi imapas mana chaskingachu. Tukui chingachiskami niraianga. Chasa kagpipas, pai kikinka ninapi ialispami kispiringapa ka.

¹⁶ Kamkuna, Taita Dius kikin kaugsadirumi niraiangichi. Paipa Ispiritumi kamkunawa sugllapi kaugsaku. Chita, ¿manachu iachangichi? ¹⁷ Taita Dius kaugsadiru, paimandallami ka. Chi kaugsadiru, kam kikinkunami kangichi. Nigpika, maikanpas Taita Dius kaugsadiru niraiaskata paipa mana suma iuiaiwa wagllichigpika, chi runata Taita Dius kikinmi puchungangapa ka.

¹⁸ Mana pipas pandaringichi. Maikanpas kikinpa iuiaipei iuiakuchu: “Nuka, kai alpapi mas iachami kani”: chasa iuiakugka iukanmi iuiaringa: “Diuspa ñawipi, ñi ima mana iachanichu”. Chasa iuiarispaka, sutipa iachagmi tukungapa ka. ¹⁹ Kai alpamanda iachaikunaka, Diuspa ñawipi upakunapa iuiaimi niraiá. Chasallatami ñugpamanda librupi willaraiá, kasa nispa:

Taita Dius sakinmi,
iachagkuna pai kikinkunapa iachaiwa wanguskasina urmangapa.

²⁰ Kasapasmi niraiá:

Iachagkunapa iuiaitapas,

atun Taita Diosmi iachá,
ianga kagta.

²¹ Chasamanda, ñi pipas mana iuiaringichi: “Kai runawa chi runawa purikuspa, nuka mas atunmi kani”. Tukui iachachig taitakunami kamkunapa kanchi. ²² Pablo, Apolos i Pedro, kamkunapami niraianchi. Chasallata, kai alpa, kaugsai i wañui, kuna puncha i samug punchakuna, tukuiami kamkunamanda allillapa niraiá. ²³ Kamkuna, Cristopami niraiangichi. Cristo, Taita Diospami ka.

4

Jaia Jesús kachaska runakunata, pai ima rurangapa mingaskamanda

¹ Nukanchimanda kasa iuiaringichi: “Paikuna, Cristota aidagllami kankuna”. Taita Dios ñugpamandakunata mana willaskata kunaura iachachingapami nukanchita mingarka.

² Kasapas. Maikan mingai tukuskakunaka iukanchimi, nukanchita mana rurangapa kachamuskata suma ruranga. ³ Kamkuna u maikan justisia runakunapas ninakuchu, nuka mana allilla rurakugta: chasa ninakugpipas, nukata mana llakiriwanchu. Ñi nuka kikin mana nirinichu, allilla u mana allilla rurakugta. ⁴ Nuka kikinmanda kuntra mana ima iuiachiriwaggpipas, chi mana niraianchu, nuka mana pandarig kagta. Iaia Jesusmi niwangapa ka, nuka allilla u mana allilla ruraska kagta. ⁵ Chimandami kamkunapas iukangichi, iaia Jesús manara samunkama, mana maikantapas ninga, allilla u mana allilla kagta. Paimi, samuspa, iana tutapisina ima pakalla kaskakunatapas punchaiachigsamungapa ka. Nukanchipa iuiailapi munaskatapas, paimi kawachingapa ka. Chiurami Taita Dios kadaunta ningapa ka, allilla u mana allilla ruraska kagta.

⁶ Taitakuna i mamakuna, nukamanda i Apolosmandami chasa rimarkaikichita, kamkuna tukui allilla kagapa. Chasaka kamkuna, nukanchita iachaikuskawaka Diospa Rimaita iachaspa, chitamí rurankangichi, mana imapas iapasalla. Chasaka, mana sug runamanda atun tukuspa ninkangichichu: “Paika, mas allimi ka”, sug runataka wabutispa. ⁷ Kam chasa niskataka, ¿pitak “Sugkunamanda mas allimi kangi” niku? Kamta tukui ima Santu Ispíritu karamuskaka, ¿manachu Taita Dios karamuska ka? Pai tukuita karamuska kagpika, ¿imapatak kam kikin ruraskasina iuiaspa, atun tukukungi?

⁸ Kamkuna, ña tukui ima munaska iukaspami, “Santu Ispíritu karamuskawa iapa iukagsinami kanchi” iuiaringichi. Chasawaka iuiaringichimi, nukanchita mana ministispalla, “Nukanchi, Diospa suma mandakuskapi atun mandagsinami kanchi”. ¡Amalai Diospa suma mandakuskapi sutipa mandagkuna tukugsamuntrangichi; chasaka nukanchipas, kamkunawa sugllapi mandagkuna kangapa! ⁹ Nukapa iuiaipika, Taita Dioska nukanchita Cristo kachamuska runakunataka kati ladumi churarka; imasa nukanchita wañuchii tungupana niraiagsina: chasa. Nukanchita chasa pasariskata, kai alpapi kaugsakgkuna i anjilkunapasmí kawanakú. ¹⁰ Nukanchi, Cristomanda kaspaka, upasinami niraianchi. Ikuti kamkunaka, “Cristowami iachag kanchi”, chasami iuiaringichi. Nukanchi, ñi imapas mana pudigsinami kanchi. Ikuti kamkunaka, “Tukui pudigmi kanchi”, chasami iuiaringichi. Kamkuna, “Suma atunmi kanchi”, chasami iuiaringichi. Ikuti nukanchika, wabutiska kagtami iuiarinchi. ¹¹ Nukanchi kunankama iarkaimanda, iakunaimanda, mana katangawami kanchi. Piaipasmi tukunchi. Wasipasmi mana iukanchi. ¹² Nukanchi kikinunapa makiwami saikugta trabajanchi. Nukanchita mana munasa kamigkunata ninchimi: “Kamkunata, Taita Dios iapa kuiaspa kawapuachu”. Nukanchita puchukunaga munagkunata mana ainirispalla, upallami kanchi. ¹³ Nukanchita juchachigkunata sumaglla iuiachispami paikunata rimanchi. Nukanchita ninkunami, kai alpapi ñi imapa mana baligta. Tukuiuna sitaskami kunankama kanchi.

¹⁴ Kamkunata pingaiachingapa, mana chasa niikichitachu. Nukapa kuiaska wambranatasinami iuiachingapaglla chasa niikichita. ¹⁵ Kamkuna, chungwa waranga Cristomanda iachachigkunata iukaspapas, achka taitakunaka mana iukangichichu. Nukami, Alli Willaita kamkunata willaspa, Jesucristowa iuiarigkunapa taitasina tukurkani. ¹⁶ Chimandami mañaikichita: nuka imasa kaugsakuskasina kaugsapuachi.

¹⁷ Chasa mañaspami Timoteota kachaikichita. Paika, Iaia Jesuswa suma iuiarig kaspera, nukapa kuiaska wambrasinami kapuá. Paika, kamkunapagma chaiagrispa, nuka Jesucristowa suma iuiarig kaspera imasa kaugsakuskatami iuiachigringapa ka. Imasami nuka, maipipas tukui Cristowa tukuskakunata iachachini: paipas chasallatami kamkunata iachachigringapa ka. ¹⁸ Kam kikinpura sugkunaka, nuka mana kamkunapagma chaiagrigmanda, iuiarinakú: “Nuka, mas atunmi kani”. ¹⁹ Chasa iuiarinakugpipas, Iaia Jesús munagpika, nukaka utkallami kamkunapagma chaiagringapa kani. Chiuraka, chi atun tukugkuna ima rimanakuskata mana uiasachu. Paikuna ima rurai pudinakuskatapasmi kawagriska. ²⁰ Dios suma mandakuskaka, mana rimailawa kawachirinchu. Taita Dios

tukuipa suma rurai pudig kaskawami kawachi. ²¹ Nuka kamkunapagma chaiagriuraka, zimatak munangichi: asutigringapa u iapa kuiaspa, mana piñaspalla kawagringapa?

5

Sug runa paipa mama ningawa kaugsakugta justisiaskamanda

¹ Kamkunapura sug runaka, mama ningawa sugllapi kaugsanakugtami uiani. Chi atun pandariitaka, Taita Diusta mana rigsikgunapasmi mana munankuna. ² Kamkunapura chasa jiru ruraspa kaugsanakugpika, zimapatak atun tukuspa iuianakungichi? Chasapaka iukangichimi, wañuskamanda llakispa, wakanakugsina kanga. Chi jiru ruragta iukangichimi, kamkunawa kaskamanda llugsichinga. ³ Nukaka, mana kamkunawa chipi kaspapas, nukapa iuiaipika kamkunawami kani. Nuka, mana kamkunawa kaspapas, chi jiru ruragtami nini, llugsichu. ⁴ Chimanda kamkunaka, nukanchipa Iaia Jesucristopa ñawipi iuiarisa, sugllapi tandariichi. Nukapa iui aika, kamkunawami kagringapa ka. Nukanchipa Iaia Jesuspa iapa iachaipimi tandarigapa kangichi. ⁵ Chiura, chi jiru ruragta iaia kukuta kuapuaichi, pai kuirputa nanachingapa. Chasawaka pudinmi, chi jiru ruraskata sakispa, Iaia Jesuswa tigramunga; chiwanka, pai samuuraka, kispiringapa.

⁶ Chi jiru ruragpa chaugpipi kaugsaspa, mana iukangichichu atun tukuspa kanga. ZManachu iachangichi: imasami asllita libadurawa achka mukutapas puchkuchi: chasalatami chi jiru rurag pudí, tuikuinatapas wagllichinga? ⁷ Mana bali libadurata sitagsina ruraichi. Chi jiru ruraspa kaugsakuskata llugsichiichi. Chasa llugsichispaka, judiukunapa paskua pucha mikudiru mana libadurawa musu tanda ruraskasinami tukunkangichi. Chi paskua pucha chaiaurami Taita Diusta karaska Ubija, Cristo niraiaska, nukanchimanda wañuchii tukurka. ⁸ Chimanda, paskua atun pucha ialichigsina, pandariwa i jiru iuiawi mana kaugsasunchi. Pandariikunawa kaugsakugka niraianni mana bali libadurawa tanda kagsina. Chasapaka, tukuipi alli iuiawami iukanchi kaugsanga, mana llullaspalla. Chasa kaugsakugka niraianni mana libadurawa tanda kagsina.

⁹ Sug kartapi, kasami nirkaichita: “Kari warmiwa jiru ruraspa kaugsanakuskawa mana sugllapi tukuichi”. ¹⁰ Chasa nispaka, mana munarkanichu ningapa, manara Iaia Jesusta rigsisa kari warmiwa jiru ruraspa kaugsanakugwa, sugkunapata munarigkunawa, llullachispa kulki surkugkunawa i ianga diuskunata kungurisa muchagkunawa sugllapi mana tungunapa. Paikunawa mana sugllapi tungunapa pudirigpika, kai alpapi kaugsagkunamanda anchuringapachar chaiantra. ¹¹ Chasapaka, kasami munarkani ningapa: maikanpas, “Jesuswa tukuskami kani” nispaka, kari warmiwa jiru ruraspa kaugsagwa, sugkunapata munarigwa, ianga diuskunata kungurisa muchagwa, sugkunata juchachigwa, machagwa, llullachispa kulki surkugwa, chasa kagkunawa mana sugllapi tukuichi. Ñi mikungapagllapas mana paikunawa sugllapi tandariichi. ¹² Nukata mana chaiawakunchu, Iaia Jesusta manara rigsiskakunata justisiangapa. Jesuswa tukuskakunatami iukangichi justisianga. ¹³ Ikuti manara paita rigsiskakunataka, Taita Diosmi justisianga. Chasamanda, chi jiru ruragta kamkunawa kaskamanda llugsichiichi.

6

Cristowa tukuskapura rabiachinakuskamanda

¹ Kam kikinpura imapipas rabiachinakuspa kagpi, zimapatak mana Taita Diusta rigsig justisiakunata willanakugringichi? Iukangichimi Taita Diuspalla kagkunata willankuna. ² ZManachu iachangichi, Taita Diuspalla kagkunaka, kai alpapi tiaskakunallawa iuiagkunata justisiangapa kagtakuna? Nigpika, zimapatak mana pudingichi, chi asllita rabiachinakuskata kam kikinpura pasinsiachinakungapa? ³ ZManachu iachangichi, mana alli anjilkunatapas nukanchi justisiangapa kagtakuna? Chasa justisiangapa kaspaka, pudisunchimi kai kaugsaipei ima rabiachinakuskata pasinsiachingapa. ⁴ Chimanda, kam kikinpura kai kaugsaipei imajmandalla rabiachinakuskapika, zimapatak Cristowa tukuskapura mas uchulla niraiagpipas justisiangapa mana willanakungichi? ⁵ Kamkunata pingaiachingapami chasa niikichita. Kam kikinpura, zManachu sugllapas iachag tia, waugkindi rabiachinakuskata pasinsiachingapa? ⁶ ZImapatak waugkindi rabiachinakuskata mana Cristota rigsikgunata justisiangapa willanakugringichi?

⁷ Kam kikinpura chasa rabiachinakuwa tiagmandaka, imapipas mana allilla tukusamunchu. Maikan kam kikinpura sug waugkindita mana allilla ruragpika, zimapatak mana ianga kawangichi? Maikan imapas kichugpika, paita chasalata ianga kawaichi. ⁸ Ikuti kamkunaka, waugkindipurami mana allilla ruranakungichi i kichunakungichi.

⁹ ZManachu iachangichi, Dios suma mandakuskapi, mana alli ruragkuna manima iai-kugringapa kagtakuna? Mana pandariichi. Kari warmiwa jiru ruraspa kaugsagkuna, ñi ianga diuskunata kungurisa muchagkuna, ñi sugpa warmiwa kariwa siririgkuna,

ñi karikuna warmisina tukuspa kaugsagkuna, ñi karipura warmiwasina pandarigkuna, ¹⁰ ñi sisaikuna, ñi sugkunapata kichungapa munarigkuna, ñi machagkuna, ñi sugkunata juchachigkuna, ñi llullachispa kulki surkugkuna, Dios suma mandakuskapi manima iaikugringapa kankunachu. ¹¹ Kamkunapura maikankunaka, ñugpata chasami kaugsanakurkangichi. Chasa kaugsanakugka, chi pandariikunata sakigmanda, ñami maillariskasina tukugsamurkangichi. Taita Diospallami kunaora kangichi. Iaia Jesucristota iuiarispa, nukanchipa Diospa Ispirituwa mana pandarigkunami niraiagsamurkangichi.

Iaia Jesusmi ka nukanchipa kuirputapas mandag

¹² Maikankuna, kasami ninkuna: “Nuka imasa munaskasina ruraspami kaugsangapa pudini”. Chasa pudirigpipas, tukui ima munaska ruraika mana allilla kanchu. “Nuka imasa munaskasina ruraspami kaugsangapa pudini” nigpipas, mana sakiringapa chaianchu, ima mana alli ruraikunawa wataskasina tukungapa. ¹³ Kasapasmi ninkuna: “Mikuika, wigsamandami ka; wigsaka, mikuimandami ka”. Chasa nigpipas, Taita Diosmi iskandikunata puchukangapa ka. Chasallata, nukanchipa kuirpuka mana kanchu, kari warmiwa jiru ruraspa kaugsangapa. Iaia Jesusmanda kaugsangapami chi kuirpu ruraska ka. Iaia Jesusmi ka nukanchipa kuirputapas mandag. ¹⁴ Imasami Taita Dios, Iaia Jesús wañuskata kaugsachirka: chasallatami paipa iapa iachaiwa nukanchipa kuirputapas kaugsachingapa ka.

¹⁵ ¿Manachu iachangichi, kamkunapa kuirpukuna, Cristopa kuirpumanda niraiagsina kagtakuna? Chimanda, ¿Cristopa kuirpumanda niraiaskatachu anchuchispa, karisapa warmiwa suglla tukusa? Ñi imaupas chasaka manima. ¹⁶ ¿Manachu iachangichi, maikanpas karisapa warmiwa suglla tukugka, suglla kuirpusina kagta? Chasallatami ñugpamanda librupi willaraia, kasa nispa:

Kari warmiwa iskandikuna,
suglla kuirpusinami tukunkuna.

¹⁷ Ikuti maikanpas Iaia Jesuswa suglla tukugka, suglla ispirituwami paiwa tukugsamunchi.

¹⁸ Chimanda, mana iuiachi, chi jiru pingaipa rurangapa. Tukui sug rigcha pandariikunata mana kikinpa kuirpupi ruraska niraianchu. Ikuti maikanpas kari warmiwa jiru pingaipa pandariskaka, chikar kikinpa kuirpupimi pandariska rurá. ¹⁹ ¿Manachu iachangichi, kamkunapa kuirpu, Santu Ispiritu kaugsadiru kagta? Santu Ispiritutami Taita Dios kamkunata karamurka. Pai Santu Ispiritumi kamkunapi kaugsaku. Chimanda, kam kikinkuna mana kangichichu kam kikinkunamanda. ²⁰ Jesucristo wañuskawami Taita Dios kamkunata iapa balimanda randiska kangichi. Chimandami chaiá, kamkunapa kuirpuwapas Taita Diusta suma atuniachispa kaugsangapa.

7

Kasadukunamanda i mana kasadukunamanda

¹ Kamkuna tapungapa kachamurkangichi; chikunataka kunaaurami ainingapa kaikichita. Karikuna mana kasaranga, allillami ka. ² Chasa kagpipas, kari warmiwa jiru ruraspa kaugsanakungapa munaikuna tiagmandami chaiaku, karikuna, kasaraspas, kikinpa warmiwa kaugsanakungapa; warmikunapas, chasallata kasaraspas, kikinpa kusawa kaugsanakungapa. ³ Kusaka, kikinpa warmita imasa chaiaskasina suma kuiachu. Warmipas chasallata kusata imasa chaiaskasina suma kuiachu. ⁴ Warmipa kuirpuka, mana pai kikinpa kanchu; kusapami ka. Kusapa kuirpupas, mana pai kikinpa kanchu; warmipami ka. ⁵ Chimanda, kusawa warmindiwa mana micharinakungichi. Iskandikuna sugllapi iuiarispa pudingichimi, sug punchakuna kuianakuskata sakispa, kamkunapa tukui suma iuiaiwa Taita Diusta imapas mañangakuna. Nispaka, ikutimi iukangichi sugllapi kuianakunga. Mana kagpika, iaia kuku pudinmi, kamkunata jiru pingaipa pandariikunapi urmachingakunata.

⁶ Nuka chasa niskawa, mana niikichitachu: “Kasaraichi”. Iuiachigsinallami niikichita. ⁷ Nukapa iuiaipika nintraikichitami: tukuikuna nukasina kaichi, mana kasaraska. Chasa nigpipas, Taita Dioska kadaunta sug rigcha sug rigcha kaugsangapami ni.

⁸ Manara kasaraskakunata i sapalla kidaska warmikunataka kasami niikichita: kamkuna nukasina mana kasaraspas kaugsagpikunaka, allillami ka. ⁹ Chasa kagpipas, kamkunapa iuiai munaikunata mana arkangapa pudigpika, allillami ka kasaranga. Chi iuiailawa puchukarikugtaka mas allillami ka kasaranga.

¹⁰ Ña kasaraskakunataka, nuka mana niikichitachu. Iaia Jesusmi kasa ni: warmika, kusata mana sitachu. ¹¹ Kusawa sitanakuspa kaugsangapa chaiagpika, mana sug kari iukachu. Chasapaka, kikinpa kusawa ikuti kaugsagsamuchu. Kusapas chasallata mana warmita sitachu.

¹² Ikuti sugkunataka mana Iaia Jesús niskata, nukami kasa niikichita: maikan waugkipa warmi, manara Cristota rigsiska kagpipas, paiwa kaugsangapa munagpika, pudinmi kaugsangakuna. ¹³ Chasallata maikan warmipa kusa, manara Cristota rigsiska kagpipas, paiwa kaugsangapa munagpika, pudinmi kaugsangakuna. ¹⁴ Manara Cristota rigsiska kusaka, paiwa tukuska warmimanda Taita Diuspalla tukuskami niraiá. Chasallata manara Cristota rigsiska warmipas, paiwa tukuska kusamandami Taita Diuspalla tukuska niraiá. Mana chasa kagpika, wambrakunapas mana Cristowa tukuskakunasinachar niraiantra. Kunauraka, Taita Diuspallami niraiankuna. ¹⁵ Chasa kagpipas, maikan mana Cristota rigsisk warmi u kusa sitanakungapa munagpika, sitanakuchu. Sitaska waugki u panika, ña mana wataskasina kanchu. Taita Diuska, kamkunata agllarkami, sumaglla mana piñachinakuspalla kaugsangapa. ¹⁶ Kam warmi, ¿imasatak iachankangi, kamba kusata Cristomanda kispichii tukungapa kagta? Chasallata kam kusapas, ¿imasatak iachankangi, kamba warmita Cristomanda kispichii tukungapa kagta?

¹⁷ Imasami Iaia Jesús, kadaunta kararka: chasatami kaugsangapa chaiá. Taita Dius kamkunata agllaura, imasami karkangichi: chasallapita kaugsanakuichi. Chasallatami tukui-kunapi Cristowa tukuskakunata iachachini. ¹⁸ Maikanpas, Taita Dius agllaura, ña judiukunapa marka churaska kagka, chasapi kidachu. Chasallata maikanpas, Taita Dius agllaura, chi marka mana churaska kagka, mana churachirikuchu. ¹⁹ Judiukunapa marka churaska u mana churaska, ñi ima mana niraianchu. Taita Dius ima niskakunatami allilla ruraspas kaugsangapa chaiá. ²⁰ Sug sug, imasami Taita Dius agllaura kaugsanakurka: chasallapita kaugsanakuchu.

²¹ Chasallata, Taita Dius kamta agllaura, lutrin kaspaka, alli iuiachiwa kangí. Chasa kasapas, patrunmanda kacharichii pudigpika, mas allimi kanga. ²² Iaia Jesuswa tukungapa Taita Dius agllaura, lutrinka Iaia Jesusmanda kaugsangapami kachariska tukugsamú. Chasallata maikanpas, Taita Dius agllaura, mana patrunpa lutrinsina kagka Iaia Jesuspa lutrinsinami tukugsamú. ²³ Jesucristo wañuskawami Taita Dius kamkunata iapa balimanda randiska kangichi. Chimanda, runakunapa iuiaiwa wataskasina mana tukugsamuichi. ²⁴ Taitakuna i mamakuna, sug sug imasami Taita Dius agllaura karkangichi: chasallapita kaugsanakuichi, Taita Diusmandalla sumaglla kaugsaspa.

²⁵ Mana kasadukunamandaka tapungapa kachamurkangichi. Iaia Jesús, mana imapas niwarkachu. Chasa kagpipas, Iaia Jesús nukata llakiriwaspa, “Allillami rurangi” niwagmandami nuka mana langa rimaikichita. Chimanda, nuka iuiakuskatami kasa niikichita. ²⁶ Nukapa iuiaiipi nintraikichitachar: kai punchakuna iapa llakiiwa kaugsangapa chaiaskamanda, sug sug imasa kaugsakuskapi kupauchi. ²⁷ Kam kari, warmiiug kaspaka, mana iuiakungi sitangapa. Mana warmiiug kaspaka, mana kasarangapa iuiakungi. ²⁸ Kasaraspaka, mana pandaringichu. Chasallata, maikan sipas kasaraspaka, mana pandarinchu. Chasa kagpipas, kasaragkunaka llakiimi iukangapa kankuna, kaugsankama. Chasa llakiikuna mana iukangapami chasa iuiachinakuikichita.

²⁹ Taitakuna i mamakuna, kasami niikichita: sug ratullami kai alpapi kaugsangapa kanchi. Chimanda, kunauramanda kusakunata chaiá, mana warmiiug kagsina kaugsangapa; chasaka, Iaia Jesús ima niskata tukui iuiaiwa rurangapa. ³⁰ Llakiwa wakagkunapas, mana llakiwa kagsina kaugsangapami chaiá. Atun puncha kusikuspa sumaglla ialichigkunapas, mana chasa kagsina kangapami chaiá. Randigkunapas, mana kikinpa kagsina iuiaspami kangapa chaiá. ³¹ Chasallata, kai alpapi maituku ima iukaskapas, ñi ima mana iukagsina iuiaspami kangapa chaiá. Kai alpapi imasa kawariskakuna, ñami tukurispas riku.

³² Kamkunata munaikichitami: mana llakiillawa sumaglla kaugsanrangichi. Mana kasaraska kari, Iaia Jesusllawa iuiarispa, paita kuntintachingapagllami kaugsangapa chaiá. ³³ Ikuti kasaraska karika, kai alpapi ima tiaskamanda iuiarispa, paipa warmitapas kuntintachingapami kaugsá. ³⁴ Chiwa iskandima –Iaia Jesusmanda i warmindimandapas– iuiarispa kaugsangapa chaiá. Chasallata, mana kasaraska warmi u sipas, Iaia Jesusllawa iuiarispa kaugsangapami chaiá. Chasaka, paipa kuirpu i ispiritu, Taita Diuspallami kanga. Ikuti kasaraska warmika, kai alpapi ima tiaskamanda iuiarispa, paipa kusatapas kuntintachingapami kaugsá.

³⁵ Chasa nispaka, piñai mana piñaikichitachu. Kamkuna allilla kaugsangapami chasa iuiachiikichita; chasaka, Iaia Jesusmanda tukui iuiaiwa allilla kaugsangapa.

³⁶ Maikanpas, paita animuriska warmimanda iuiakuspa nichu: “Ña watakuna iukaspaka, allillami ka, nukanchi kasarangapa”: chasa iuiarispa, allillami ka kasarangapa. Kasaraskapika, ñi ima pandariipas mana tianchu. ³⁷ Ikuti maikanpas, suma iuiarispa, kikinlla nichu: “Nukata mana ministiwanchu animuskawa kasarangapa”: chi runaka, kikinpa iuiaiwa chasa munagpika, allillami ka. ³⁸ Chasaka, maikanpas paita animuriskawa kasaragka allillami rurá. Maikanpas mana kasaragka, mas allillami rurá.

³⁹ Kusaiug warmika, kusa kaugsankama, paiwa wataskasinami niraiá. Kusa wañugpika, ña mana wataskasina kaspá, pudinmi maikan munaskawa kasaranga. Iaia Jesuswa tukuska runallawantami chaia kasarangapa. ⁴⁰ Nuka chasa nigpipas, nukapa iuiaipika, mana ikuti kasaraggpika, mas allillami kaugsaiapa. Nukapas, Diuspa Ispirituwa kagta iuiaspami chasa niikichita.

8

Ianga diuskunata kamariku karaska aichamanda

¹ Kunauraka, ianga diuskunata kamariku karaska aichamandami willangapa kaikichita. Sutipami tukuikuna allilla iachanchi, ianga dius mana imapas niraiagta. Chasa iachaiwaka atuniachiskasinami iuiarispa tukunchi; chika mana allilla kanchu. Parijuma kuaianakuiwami Cristowa suma iuiarig wiñagsina tukugsamunchi. ² Maikanpas ña allilla iachag kagta iuiarisppapas, imasa allilla iachangapa chaia skataka manara allilla iachanchu. ³ Ikuti maikanpas Taita Diusta kuiagka, Taita Diuspa rigsiskami niraiá.

⁴ Chasamanda, ianga diuskunata kamariku karaska aichata mikungapa kaskamanda kasami niikichita: kai alpai ianga diuskunata, mana imapas niraianchu. Suglla Taita Dius tiagtami iachanchi. ⁵ Sugkuna nichukuna: “Sug luarpi i kai alpa luarpi achka diuskuna i achka iaiakunasi tia”: ⁶ chasa ninakugpipas, nukanchimandaka suglla Taita Diusmi tia. Paika, tukui ruragmi ka. Nukanchipas, paipami kanchi. Chasallata, suglla Iaia Jesucristomi tia. Paimandami tukui imapas tiagsamú. Nukanchipas, paimandami kaugsanchi.

⁷ Chasa willaskakunata, tukuikuna manara iachankunachu. Maikankuna, ianga diusta kungurispa muchag kaskakuna, aicha mikuspa, iuiankuna: “Sug diusta kamariku karaska aichatami mikuni”. Chasa mikuspaka, manara Cristota allilla rigsispami paikunapa iuiainakuna mapaiachigsina rurarinkuna. ⁸ Chasa rurarigpipas, Taita Diuska mana chaskigsina ruranchu nukanchi ima mikuskata. Chi aichata mikugpi u mana mikugpika, paipa ñawipika mana niraianchu mas alli u mana alli. ⁹ Chi aichata mikungapa pudirigpipas, ñajala Cristota manara allilla rigsikuna, kamta chasa kawaspa, chasallata mikuspa, sug diusta muchagsina ruragkunata iuiarispa pandarichukuna! ¹⁰ Kam, allilla iachag kaspá, ianga diusta iuiariduru ukupi mikukugpika, Cristota manara allilla rigsigka, kamta chipi kawaspa, ¿manachu paipas munaringa, ianga diusta kamariku karaska aichata mikungapa? Chasaka paipas, ianga diusta iuiarigsinami ruranga. ¹¹ Chiwanka kam, allilla iachag kaspá, chi manara Cristota allilla rigsigta puchukagsinami rurangi, Cristo paimanda wañuchii tukuska kagpipas. ¹² Cristota manara allilla rigsigkunata chasa pandachispa, paikunata mana allillami rurangi. Chasa ruraspaka, Cristotami pandaringi. ¹³ Chimanda, nuka ima mikuskawa nukapa waugkindita pandachigpika, nuka ñi imaurapas mana mas chi aichata mikusachu. Chasa kawaspaka, paika mana pandaripuanguachu.

9

Iaia Jesús kachaskakuna, ima sugkunata mañangapa pudiskamanda

¹ ¿Manachu pudini, nuka ima munaskasina rurangapa? ¿Manachu nukanchipa Iaia Jesús kikin kachamuwaska runa kani? ¿Manachu nukanchipa Iaia Jesusta kawarkani? ¿Manachu kamkuna, paimanda nuka rurakuskata allilla kawachipuag kangichi? ² Sugkunaka, nukamanda nichukuna: Iaia Jesús mana kachamuwaskasi kani. Ikuti kamkunaka, nukamanda allillami iachapuangichi. Kamkuna Iaia Jesuswa tukuspami kawachipuangichi, Iaia Jesús kikin kachamuwaska kagta.

³ Wasa rimawagkunataka kasami ainini: ⁴ nukanchi Alli Willaita willaspa purigkunaka, ¿manachu pudinchi, mikui i upiai chaskispa kaugsanga? ⁵ ¿Manachu pudinchi, Jesuswa tukuska warmiwa kasaraspá pusangapa; imasami sugkuna Iaia Jesús kikin kachaskakuna, paipa waugkindikuna i Pedro, warmindita pusankuna: chasa? ⁶ ¿Bernabé i nukallachu iukanchi trabajaspá kaugsanakunga? Manima.

⁷ Ñi maikan suldadu tukuspa, mana kikinpa kulkiwa kaugsangapa kanchu. Pipas ubas u ima mikui tarpuspa iukaskata, ¿manachu pukuura pallaspa mikungapa pudí? Ubijakuna iukagpas, ¿manachu lichi kapispa upiangapa pudí? ⁸ ¿Nuka kikinpa iuiailawachu nuka chasa rimakuni? ¿Manachu Moisés iskribiska sakiskapipas chasallata willaraiá? ⁹ Kasami Moisés niska librupi willaraiá: Triguta saruspa iskug wagrata mana simita watangi.

Taita Diuska, mana wagrakunamandalla chasa willarkachu. ¹⁰ ¿Manachu nukanchimanda chasa willarka? Ari, nukanchi allilla kangapami chasa willarka. Chasaka, tarpungapa

alpata allichig i triguta iskuchigpas, ima rasiunpas chaskingapa iuiaspami chasa trabajankuna. ¹¹ Chasamanda, nukanchi kamkunapa umapi tarpugsina Alli Willaita willaspaka, ¿manachu iukanchi, pallagsina kai alpapi ima ministiskakunamanda kamkunata chaskinga? ¹² Sug iachachigkuna kamkunata imapas chaskii pudigpikunaka, nukanchika, ¿manachu maspas pudintranchi chaskingapa?

Nukanchi chasa pudispapas, mana imapas mañanchichu. Chasapaka, ima llakiiwa kaspapas, upallami kanchi; chasaka, Cristomanda Alli Willaita mana imapipas arkagsina rurangapa. ¹³ ¿Manachu iachangichi, Taita Diospa atun wasipi aidagkuna, chi wasima ima kamariku apaskakunata mikuspa kaugsanakugta? Altarpi aidagkunapas, chi altarma ima mikui apaskakunata mikuspami kaugsanakú. ¹⁴ Iaia Jesuska chasallatami nirka: Alli Willaita willagkuna, chi Willaimanda ima mikui karaskawami kaugsanakunga. ¹⁵ Chasa kagpipas, nukaka, Alli Willaita willaskamanda, ñi pitapas mana imapas mañakunichu. Kunaurapas, mana chasa níkichitachu, kamkuna imapas karawangapa. Nuka manara pitapas mañaspallami munantrani wañungapa; chiwanka, chi Willaimanda ñi ima mana mañaspalla kaspas, alli iuiachiullawa wañungapa.

¹⁶ Alli Willaita nuka willakuskaka, mana kanchu nuka kikin atuniachiringapa. Nukata chaiawanmi, tukuikunata willaspa puringapa. Alli Willaita nuka mana willaspaka, jai, imachar pasariwantra! ¹⁷ Nukapa iuiailawa Alli Willaita willakugpika, iukantraniami imapas kamkunata mañanga. Nukata chaiawagmandami, Taita Dios mingawaskallata willakuni. ¹⁸ Chasa willaspa puriskamanda, ¿imatak mañaspa kani? Mana imapas mañaspallami willaspa purini. Alli Willaita willaspa puriskamanda, ima mañangapa pudispapas, mana imapas mañanichu.

¹⁹ Nuka, ñi pipa lutrin mana kanichu. Chasa kaspapas, tukuikunapa lutrinsinami tukuspa purini; chasawaka achka runakuna, nuka Cristomanda rimaskata uiawaspa, paiwa tukungapakuna. ²⁰ Judiukunawa nuka kauraka, judiusinami tukuni, paikuna Cristowa tukungapakuna. Chasallata, Moisés ima rurangapa willaskata uiagkunawa nuka kauraka, nuka chí willaraiaskawa mana kaugsaspapas, chi willaskata uiagsinami tukuni; chasaka paikunapas, Cristowa tukungapakuna. ²¹ Moisés niskata mana iukagkunawa nuka kauraka, paikunasinami tukuni; chasaka paikunapas, Cristowa tukungapakuna. Nuka chasa tukuspapas, Taita Dios ima rurangapa niskatami iuiái apani. Chiwanka, Cristo ima niskatami ruraspa kaugani. ²² Cristota manara allilla rigsigkunawa nuka kaura, paikunasinami purini; chasaka paikunapas, Cristowa tukungapakuna. Maikanwa nuka kaurapas, paikunasinami tukuspa purini; chasaka, imasapipas maikankunallapas kispirispa, Cristowa tukungapakuna. ²³ Imasa purispapas, Alli Willaita willaspami purikuni; chasaka, Taita Dios ima karangapa niskata nukapas chaskiringapa.

²⁴ ¿Manachu iachangichi: kalpanakugpura puglaiipi, achkakuna kalpanakuskamanda sugllami primiuta chaskí? Chimanda kamkunapas, primiuta chaskingapa kalpanakugsina kaugsaiichi. ²⁵ Maikan pugllangapa allichirikugta chaiakumi, tukui ima mana chaia kaskata sakingapa. Chasawaka, allilla llugsigpika, pudinmi tukuriduru primiuta chaskinga. Ikuti nukanchika, mana tukuriduru primiuta chaskingapami kalpanakugsina kaugsanchi. ²⁶ Chimandami nukaka, maima chaiagringapa mana rigsispalla kalpakugsina mana rurakuni. Chasallata, nuka makanakuskapi wairallata piakugsina mana rurakunichu. ²⁷ Chasapaka, nuka kikinpa kuirputami asutispasina charini, mana pandaringapa. Chasaka, nuka ima allilla munaskatami ruraspa. Mana kagpika, pudinimi, sugkunata allilla iuiachikuspapas, nuka kikinka ñi ima primiutapas mana chaskinga.

10

“Tanga diuskunata mana iuiaringichi”

¹ Taitakuna i mamakuna, mana kungaringichi nukanchipa ñugpamanda achala taitakunata ima pasariskata. Tukui paikuna, Taita Dios pusakuska puiui ukupimi rinakurka. Chasallata tukuikuna, Puka Kucha suti kaskapimi ialirkakuna. ² Chi puiuiwa i iakupi ialispami tukuikuna baugtisaska niraiarkakuna, Moiseswa tukungapa. ³ Tukuikunami Taita Dios kachamuska mikuita mikurkakuna. ⁴ Chasallata tukuikunami Taita Dios kachamuska upiaita upiarkakuna. Paikuna chusa sitaska alpapi purinakuskapi, sug atun rumisina kawarimi paikunawa purikurka. Chika, kikin Cristollatami karka. Chi rumimandami iaku llugsirka, tukuikuna upiangapa. ⁵ Chasa kagpipas, ñalla tukuikunami Taita Diusta mana kuntintachirkakuna. Chimandami, chi chusa sitaska alpapi purinakuspa, ñallapas tukui wañurkakuna.

⁶ Chasami paikunata pasarirka, nukanchi chasapi allilla iuiaringapa. Paikuna, mana allillata munarkakuna; ¡ujalallapas nukanchita chasallata munarigsamuchu! ⁷ Paipura

sugkuna, ianga diuskunata iuiarirkakuna; ¡ujalallapas kamkuna, chasallata iuiarinakungichi! Kasami paikunamanda willaraiá:

Paikuna, mikungapa i upiangapami tiarirkakuna.

Nispa atarirkakuna,

jiru pugllaikuna pugllangapa.

⁸ Paipura sugkuna, kari warmiwa pandarirkakuna; ¡ujalallapas nukanchi, chasallata pandarinakusunchi! Chasa pandarigkunaka, sug punchallami is kai chungá kimsa waranga wañurkakuna. ⁹ Sugkunaka, Taita Diusta ninakurka: “Abir: ¿pudingichu?”; ¡ujalallapas nukanchi, chasallata Cristota ninakusunchi! Chasa ñugpata nigkunataka, kulibrakuna kanispami wañuchii tukurkakuna. ¹⁰ Sugkunaka, Taita Diosmanda mana allilla rimanakurka. Chasa rimanakusunchi, sug wañuchig anjilmi puchukagsamurkakunata. ¡Ujalallapas kamkuna, imapipas chasa rimanakungichi!

¹¹ Nukanchipa ñugpamanda achala taitakunata chasami pasarirka, nukanchi chasapi allilla iuiaringapa. Chasa ñugpamanda librupimi willaraiá, nukanchi kai tukurii punchakuna kaugsagkuna, chasa pasariskata iachaspaka, mana pandaringapa. ¹² Chimanda maikanpas “Nuka, allimi kani” iuiarispá kag, ¡ujalallapas imapipas pandarichu! ¹³ Kamkunata ima pandariipi urmachingapa iuiakuna chaiapika, chikunata nukanchi runakuna, Taita Diospa iapa iachaiwami pudinchi bisinga. Taita Dioska, pai tukui ima niskatami rurá. Paika mana sakingapa kanchu, mana bisingasina jiru iuiakuna chaiangapa. Kamkunata ima jiru iuiaipas chaiaura, paillatami sumagla iuiaitapas iuiachingapa ka; chiwanka, jiru iuiakunata bisingapa.

¹⁴ Chimanda, nuka kuiaskakuna, sakiichi, ianga diuskunata iuiaringapa. ¹⁵ Allilla iuiaiugkunatami rimanakukichita. Nuka ima rimakuskataka, kam kikinkunami iukangichi iuiaringakuna. ¹⁶ Bindisaska kupamanda, “Pai Siñur” Taita Diustami ninchi. Chi kupapi upiaspa, ¿manachu Cristopa iawarwa suglla tukugsina niraianchi? Chasallata, tandata chauppi chauppi pitichispa, nukanchi mikuska, ¿manachu Cristopa kuirpuwa suglla tukugsina niraianchi? ¹⁷ Nukanchi, maituku achkakuna kaspapas, suglla tandata tukuikuna mikuspa, suglla tukugsinami niraianchi.

¹⁸ Israelmanda runakuna ima ruraskakunamanda iuiariichi. Taita Diusta kamarikusina karaska animalkunapa aichata mikugkunaka, ¿manachu chi kamarikuwa suglla tukugsina niraiankuna? ¹⁹ Chasa nispa, mana niikichitachu ianga diuskuna ima niraiagta, ñi chi diuskunata kamariku karaska aichaka, sug aichakunamandapas mas bali kagta. ²⁰ Kasami niikichita: Taita Diusta manara rigsikuna, ianga diusta kamariku karaskaka, kuku wairakunatami karankuna. Chasa kagmandami mana munani, kamkuna chasa ruraspa, kuku wairakunawa suglla tukungapakuna. ²¹ Mana iukangichichu, kuku wairakunawa suglla tukugsina kangapa kupapi upiangakuna; nispa, ikuti Iaia Jesuswa suglla tukugsina niraiangapa kupapipas upiangakuna. Chasallata, mana iukangichichu, kuku wairakunawa suglla tukugsina niraiangapa mikungakuna; nispa, ikuti Iaia Jesuswa suglla tukugsina niraiangapapas mikungakuna. ²² Chasa iskandima runakugmandaka, ¿munanchichu Iaia Jesusa rabiachingapa? ¿Nukanchi paimanda mas pudigkunachu kanchi? Manima.

Tukuipi Taita Diusta atuniachii iukaskakunamanda

²³ Maikankuna, kasami ninkuna: “Nuka imasa munaskasina ruraspami kaugsangapa pudini”. Chasa pudirigpipas, tukui ima munaska ruraika mana allilla kanchu. “Nuka imasa munaskasina ruraspami kaugsangapa pudini” nigpipas, tukui ima munaska rurai-ka, nukanchimanda allillapa mana kanchu. ²⁴ ¡Ujalallapas kam kikinkunamandalla ima ruraspapas kaugsangichi! Sugkunamandapasmi iukangichi allilla ruraspapas kaugsan-akungu.

²⁵ Aicha katudirupi randiska aichata mikuichi, mana imapas iuiarispalla i tapuspalla. ²⁶ Kai alpa i tukui ima alpapi tiaskapas, atun Taita Diospa kaskamandami pudingichi tukui mikungu. ²⁷ Maikan manara Cristota rigsik mikungapa kunbidapika, riichi. Ima karaskata mikungichi, mana imapas iuiarispalla i tapuspalla. ²⁸ Ikuti “Kai aicha, sug diusta kamariku karaskami ka” maikan nigpika, chita mana mikungichi. Chasa willagmanda i paipa iuiaimandami mana iukangichi mikungakuna. ²⁹ Kam kikinpa iuiaimandaka mana chasa niikichitachu. Chi willag iuiakumi, chi aichata mikuspa, sug diusta iuiarigsina ruragta; chimandami chasa niikichita.

Chasa kagpipas, sugka nichu: “Nuka ima rurai munakuskataka, ¿imapatáka mana chasa rurai pudini, sug runa sug rigcha iuiakugmanda? ³⁰ Nuka Taita Diusta: ‘Pai Siñur’ nispa mikugpika, ¿imapatáka nuka mikuskamanda pipas piñawanga?’” ³¹ Kamkuna ima mikuspa, upiaspa u ruraspa, tukuipi Taita Diusta: “Pai Siñur; iapa suma atunmi kangí” nispa kangichi. ³² Kasapasmi iukangichi kaugsanga: mana imapipas pandachispalla judiukunata, ñi mana judiu kagkunata ñi Taita Dioswa tukuskakunata. ³³ Chasa munaspami nuka

kaugyani, tukuikunata tukuipi kuntintachispa kangapa. Nukamandalla mana imapas ruraspaga kaugyakunichu. Tukui sugkunamandami allilla ruraspaga kaugyakuni; chasaka paikunapas, Cristowa tukuspa, kispiringapa.

11

¹ Imasami nuka, Cristosina allilla kaugyaspa kani: chasallata kamkunapas, nukata kawawaspa, allilla kaugyangichi.

Warmikuna, umapi katarichukuna, niskamanda

² Kamkuna imapipas iuiariwanakuskamanda i nuka willaspa iachachiskakunata kati-chinakuskamanda, niikichitami: “Allillami ruranakungichi”. ³ Chasa nisppapas, munanami kamkunata kasa iachachingapa: Cristoka, tukui karikunapa iaiami ka, uma kagsina. Chasallata, imasami Taita Dios, Cristopa iaia ka: chasallata kusapas, paipa warmipa iaiami ka. ⁴ Maikan karipas, Taita Diusta mañakuspa u Santu Ispiritu iuiachiskata willakuspa, paipa umata ima katangapas churarispa kaggpika, Cristota unzagasinami rurá. ⁵ Maikan warmipas, Taita Diusta mañakuspa u Santu Ispiritu iuiachiskata willakuspa, paipa umata mana katarispaka, chasallata paipa kusata unzagasinami rurá. Paipa umata mana katariskaka, agcha rutuskasinami niraiá. ⁶ Maikan warmi umata mana katarigpika, tukui agchata rutuchichu. Maikan warmita agcha limpiu rutuskaka, pingaipami kawari. Chimanda, umapi imawapas katarichu. ⁷ Karika, Taita Diussina ñalla rigcha kaspa, pai suma atun kagta kawachigmanda, umata mana imapas tapparichu. Ikuti warmika, kusa suma atun kagtami kawachí. ⁸ Taita Dioska, ñugpa karita mana warmimanda surkuspa rurarkachu. Ñugpa warmitami karimanda surkuspa rurarka. ⁹ Chasallata Taita Dioska, ñugpa karita mana warmimanda allillapa rurarkachu. Warmitami karimanda allillapa rurarka. ¹⁰ Chimandami warmi iuká, umapi katariska kanga; chasaka, kusa iaia kagta niraiangapa. Anjilkunapas tiagmandami umapi katariska iuká kanga.

¹¹ Chasa kaggpipas, Iaia Jesupa ñawipi mana tianchu kari mana warmiwa, ñi warmi mana kariwa. ¹² Imasami ñugpa warmi, karimanda surkui tukuspa tiagsamurka: chasallatami kaurakuna karipas, warmimanda tiagsamú. Chasa kagmandami tukui iskandikuna Taita Diospa makimanda tiagsamunkuna.

¹³ Kam kikinkuna iuiariichi: warmi Taita Diusta mañakuspa, umapi mana katariska kaggpika, ¿allillachu ka u mana allillachu ka? ¹⁴ Kari paipa agchata suni wiñachirigpika, pingaipami kawari. Chita, ¿manachu iuiaringichi, pingaipa mana allilla kagta? ¹⁵ Ikuti warmika, paipa agchata suni wiñachiska iukagpika, sumagllami kawari. Chi suni agchata, Taita Diosmi karamurka; chiwanka, umata katariska kangapa. ¹⁶ Maikanpas nuka iachachiskata wabutigka, kasa iuiarichu: ñi nukanchi ñi Taita Dioswa tukuskakuna sugnigta kaugyakunapas, mana sug rigcha kaugyanchichu.

Iaia Jesuta iuiaringapa tandarinakuskapi, jiru ruranakuskamanda

¹⁷ Nuka kunaure ningapa kaskamandaka mana niikichitachu: “Allillami ruranakungichi”. Kamkuna sugllapi tandariska kaskapika, allilla rurangataka, tandaringichimi, mana allilla rurangapaglla. ¹⁸ Tukuimanda ñugpaka, kasami uiani: kamkuna, Taita Diusta iuiaringataka, kallaringichisi, sug rigcha sug rigcha rimaspa achkama tukunakunga. Chitaka, sug mailla sutipa kagtami iuiani. ¹⁹ Sug rigcha sug rigcha iuiaikunami tiangapa ka; chasawaka, kam kikinpura maikankuna Cristowa suma iuiarig kagkuna kawaringapa. ²⁰ Kamkuna, mana suglla iuiaiwa tandaringichichu. Chiwami kamkuna mana mikunakungichi, Iaia Jesusta allilla iuiarispa. ²¹ Kamkuna mikungapa tandariuraka, sug sug kikinpa mikuita mikuimi kallaringichi, sugkunata mana sugllapi kangapa suiaspalla. Chasapika sugkuna, iarkaimandami kankuna. Ikuti sugkunaka, machagtami upiankuna. ²² Chasa ruranakuspaka, ¿manachu Taita Dioswa tukuskakunata wasa churagsina ruranakungichi? ¿Manachu mana mikui iukagkunata pingaichigsina ruranakungichi? ¿Manachu wasi iukangichi, chipika mikungapa i upiangapa? ¿Imatak nisakichita? ¿Nisakichitachu: “Allillami ruranakungichi”? Chasa ruranakuskata niikichitami: “Mana allilla ruranakungichichu”.

²³ Iaia Jesús ima nukata willawaskatami kamkunatapas kasa iachachigsamurkaikichita. Iaia Jesusta apingapa tuta kaura, paika, tandata makipi charirispa, ²⁴ “Pai Siñur” Taita Diospa nispa, tandatami pitichirka, katiraiagkunata kasa nispa: “Kai, nukapa kuirpumi ka, kamkunamanda karaska kangapa. Nukamanda iuiarispa, chasallata rurangichi”. ²⁵ Ña mikusauramandaka, sug binu kupata chasallata charirispa, kasami nirka: “Kai binu kupa, nukapa iawarmi ka, Taita Dioswa i runakunawa ikuti pasinsiachirispa sumaglla tukungapa. Imaurapas chasallata upiaspaka, nukamanda iuiarispa rurangichi”. ²⁶ Chasamanda kamkuna, imaurapas chasallata tanda mikuspa, kupa binu upiaspaka, Iaia Jesús wafuskamandami willangichi, pai ikuti samunkama.

²⁷ Chasa kaskamandaka, maikanpas Iaia Jesús “Mikuichi” niska tandata mana suma iuiarisipalla mikugpika, “Upiaichi” niska kupa binuta mana suma iuiarisipalla upiagpika, Iaia Jesuspa kuirputa i iawarta saruginsami rurá. Paitaka, Taita Diosmi justisiangapa ka. ²⁸ Chimandami, manara tandata mikuspa i binuta upiaspalla, iukangichi iuiaringa, kikinpa iuiaii allilla u mana allilla kagta. ²⁹ Maikanpas Iaia Jesuspa kuirpu kaskata mana suma iuiarisipalla mikuchu upiachu: kikin justisiai tukungapami mikú i upiá. ³⁰ Chimandami kam kikinpura achkakuna, ungug i sambaiaska tiangichi. Sugkuna, chasamandami wañuska kankuna. ³¹ Nukanchi kikinpura allilla iuiarispa kagpikunaka, manachar chasa llakiikuna iukanranchi. ³² Chi llakiikunawami Iaia Jesús nukanchita iuiachí; chasaka, kai alpapi jiru ruraspa kausanakusina mana tukuspa, diltudupa ninama sitai tukungapa.

³³ Chimanda, taitakuna i mamakuna, sugllapi mikungapa tandaringapa chaiaura, suianakungichi, tukuikuna chaiankama. ³⁴ Sutipa iarkaimanda kagkunaka, kikinpa wasipi mikugrichukuna. Chasaka, Taita Dios mana justisiangakunatachu. Sug imakunaka, nuka kamkunapagma chaigrispami allilla iachachisakichita.

12

Santu Ispiritupa sug rigcha sug rigcha karamuikunamanda

¹ Taitakuna i mamakuna, Santu Ispiritupa sug rigcha sug rigcha karamuikunamandaka munanimi, kamkunata kasa iachachingapa.

² Ñami iachangichi: kamkuna, manara Cristota rigsigkuna kaspaka, sakirirkangichimi, mana rimag ianga diuskunapagma sugllapi tukuspa ringapa. ³ Chimandami munani, kamkuna kasa iachangapa: ñi pipas Diospa Ispirituwa rimagka mana pudinchu ninga: “Jesús, maldisisa kachu”. Santu Ispiritullawami maikanpas Jesusta ningapa pudí: “Nukapa iaiami kangi”.

⁴ Santu Ispíritu, nukanchita sugta sug rigcha, sugta sug rigchami karamú, suma iuiaiwa rurangapa. Chasa karamuspapas, suglla Ispiritumi tia. ⁵ Iaia Jesusmanda sug rigcha sug rigchami allilla ruranchi. Chasa ruragpipas, suglla Iaia Jesusmi tia. ⁶ Chasallata, sug rigcha sug rigchami pudinchi allilla rurangapa. Chasa pudirrippapas, suglla Taita Diosmi tia. Paimi tukuikunata karamú, tukuipi allilla rurangapa.

⁷ Tukuikunatami Taita Dios paipa Ispirituta karamú, nukanchiwa kagta kawachingapa; chasaka, tukuikuna parijuma aidanakungapa. ⁸ Maikankunataka paipa Ispirituwa karamunmi, paipa iachaiwa rimangapa. Chasallata sugkunataka paipa Ispiritullawantami karamú, paipa suma iuiaiwa iachachingapa. ⁹ Ikuti sugkunataka paipa Ispirituwami iuiachí, ima kagpipas, pai ima niskata suma iuiaringapa. Sugkunataka suglla Santu Ispirituwami karamú, ungugkunata ambingapa. ¹⁰ Chasallata karamunmi, sugkunaka imarapas mana kawaskasina rurangapa, i sugkunaka paipa Ispíritu iuiachiskata willangapa. Sugkunataka karamunmi, paipa alli Ispirituwa u mana alli kuku wairawa rimanakuskata rigsingapa. Chasallata sugkunataka iuiachinmi, mana iachaska rimaikunawa rimangapa i chi rimaikunawa rimaska ima niraiaskata allilla willangapa. ¹¹ Kikin suglla Santu Ispiritumi tukui chasa iuiachispa karamú. Pai imasa munaskasina tukuikunata sugta sug rigcha, sugta sug rigcha chi suma iuiaikunata karamú.

Tukui nukanchi, Cristopa suglla kuirpu tukuska niraiaskamanda

¹² Suglla kuirpupi, chaki, maki, uma, imapasmi iukanchi. Chasa achka iukaspapas, tukui suglla kuirpumi kanchi. Chasallata Cristowa tukuskakunaka, suglla kagsinami niraianchi. ¹³ Tukui nukanchi bautisaskakuna, judíu i mana judíu kagkunapas, patrunkuna i lutrin-kunapas, suglla Santu Ispirituwa kagmandami suglla kuirpusina niraianchi. Tukui nukanchi, chi suglla Ispirituta chaskigkunami tukurkanchi.

¹⁴ Nukanchipa kuirpupi mana suglla suti tianchu; achkami tia. ¹⁵ Chaki, kasa nintra: “Nuka, maki mana kanichu. Chimanda mana kuirpumanda kanichu”; chasa nigpipas, kuirpumanda kangapa mana sakinchu. ¹⁶ Chasallata, rinri nintra: “Nuka, ñawi mana kanichu. Chimanda mana kuirpumanda kanichu”; chasa nigpipas, kuirpumanda kangapa mana sakinchu. ¹⁷ Tukui kuirpu ñawilla kagpika, manachar uiangapa pudirintra. Chasallata, tukui kuirpu rinrilla kagpika, manachar asnangapa pudirintra. ¹⁸ Kuirpupi, Taita Dios tukuimi churarka, imasa munaskasina chaia kangapa. ¹⁹ Kuirpupi suglla suti tiagpika, manachar kuirpu kantra. ²⁰ Achka suti tiagpipas, suglla kuirpumi niraiá.

²¹ Chimanda ñawi, makita mana pudí ningapa: “Kamta mana ministikichu”. Chasallata uma, chakikunata mana pudí ningapa: “Kamkunata mana ministikichitachu”. ²² Kasapas. Kuirpupi mana balingasina kagkuna pudinmi, mas ministiska kangakuna. ²³ Kuirpupi tiaska mana munaskakunapasmi mas suma kuiaska kankuna. Chasallata, nukanchipa pingaikunata allillami kilpachirinchi. ²⁴ Ikuti mana pingaikunataka manapas kilpachirii chaianchu. Chasa kuirpupi, Taita Dios tukuipimi allilla rurarka; chasaka, mana

munaska kagkunapas mas suma kuiaska kangapa. ²⁵ Chasapika, mana sug rigcha sug rigcha iuiaikuna tiangachu. Kuirpupi tukui tiaskakunawa allilla iuiarispa aidanakuspa kangapami Taita Dios chasa rurarka. ²⁶ Kasapas. Kuirpupi imapas nanagpika, tukui kuirpupimi nanai sintirí. Imapipas suma kuiaskasina kagpika, tukuiumi alli iuiachirí.

²⁷ Imasami nirkaikichita: chasa kamkunapas, Cristopa sugla kuirpu tukuskami niraian-gichi. Paipa kuirpumanda imasa chaiaskasinami tukuikuna kangichi.

²⁸ Cristowa tukui tukuskakunapuramanda, Taita Dios ñugpaka churarkami, Cristo kikin kachamuska runakuna tiangapa; paikunaka, Alli Willaita willaspa puringapa; iskaimaka, paipa Santu Ispíritu iuiachiskata willagkuna tiangapa; kimsamaka, paipa Suma Rimaita iachachigkuna tiangapa; chimandaka, mana imaurapas kawaskata ruragkuna tiangapa; chimandaka, ungugkunata suma ambigkuna, sugkunata suma aidagkuna, Cristowa tukuskakunata mandagkuna i mana iachaska rimaiwa rimagkuna tiangapa.

²⁹ Mana tukuikuna, Cristo kikin kachamuska runa kankunachu.

Mana tukuikuna, Santu Ispíritu iuiachiskata willag kankunachu.

Chasallata, mana tukuikuna, iachachigkuna i mana imaurapas kawaskata rurag kankunachu.

³⁰ Ikuti chasallata, mana tukuikuna, ungugkunata suma ambig, i mana iachaska rimai-wa rimag i chi rimaiwa rimaska ima niraiaaskata allilla willag kankunachu.

³¹ Chimanda, Taita Diusta mañaiichi karamuchu, chasakunamanda mas allilla ruragkuna tiangapa. Chasa tiagpipas, imasa askurinti mas allilla kaugsangapa kagtami kunaura iachachingapa kaikichita.

13

Sugkunata kuiaimanda

¹ Tukui runakunapa i anjilkunapa rimaitapas nuka rimaspa, mana sugkunata kuiaspa kagpika, sug iru u platillu “Chilin Chilin” uiachirigsinallachar kantrani. ² Santu Ispíritu iuiachiskata nuka willantrani, i tukuimanda mana pipas iachaskawanta iachantrani, i Taita Dios ima niskata suma iuiarispa, lumakunata anchuchispa, sugma ialichingapa pudintrani; chasa kagpipas, sugkunata mana kuiaspa kagpika, ñi imapachar mana balin-trani. ³ Mana ñi imapas iukaskakunata tukui ima nuka iukaskata karantrani, i nuka kikinpa kuirputa Cristomanda kantrani rupachiwangapa; chasa kagpipas, sugkunata mana kuiaspa kagpika, iangallachar chasa rurantrani.

⁴ Sugkunata kuiai niraianmi ima ministiska kaskakunata aidangapa i paikunawa mana piñachirinakuspalla kaugsangapa; paikunata jiru iuiaiwa mana kawangapa; chimanda, mana atuniachirigisina iuiarispa kangapa; “Sugkunamanda masmi kani; iapa balimi kani”: chasaka mana iuiaringapa. ⁵ Sugkunata kuiai niraianmi mana imajmandalla subir-biaspa i rabiariispa kangapa; mana kikinmandalla iuiaspa ima iukaskatapas kangapa; i maikan jiru ruraspas rabiachiskakunata mana iuiaringapa. ⁶ Sugkunata kuiai niraianmi maikantapas ima llakii pasariskata iachaspaka, mana kuntintaringapa; ikuti maikanta ima allilla pasariskata iachaspaka, “Allillami ka” iuiarispa kuntintaringapa. ⁷ Chasa kuiag niraianmi Taita Dios ima niskata imapipas suma iuiarispa suiangapa; chasaka sugkuna, paiwa tukungapakuna; chimandaka, mana piwapas llakichirinakuspalla, ima llakiiwa kaspas, upalla kangapa.

⁸ Kuianakuika, imaurapasmi mana tukurispalla tiangapa ka. Ikuti Santu Ispíritu iuiachiskata willagkunaka tukuringapami kankuna. Mana iachaska rimaiwa rimagkuna i Diospa iachaiwa rimagkunapasmi chasallata tukuringapa kankuna. ⁹ Kunaura, ima-kunatapas maillallami iachanchi. Chasallata, Santu Ispíritu iuiachiskata chara maillami willanchi. ¹⁰ Tukui tukui allilla iacharigsamuuraka, chi mailla iachaika tukuringapami ka.

¹¹ Nuka uchulla kaura, imasa rimaspa, iuiaspa, iachaspa, uchullasinami iuiaspa karkani. Ikuti ña atun wiñaska kauraka, uchullasina iuiaikunata sakirkanimi. ¹² Chasallata, kuna-ura mana suma ispijupi kawarigsinami Taita Diusta iuiapi kawanchi. Mas nisipami ñawi ñawi paiwa kawanakusunchi. Kunaura, maillallami iachani. Mas nisipaka, imasami Taita Dios, nukata rigsiwá: chasallatami nukapas, allilla rigsiwiwa i iachaiwa paita kawasa.

¹³ Taita Dios ima niskata suma iuiariikuna, paita suma suaikuna i suma kuianakui, imaurapas tiangallami. Chi kimsandimanda mas ministiskaka kanmi kuianakui.

14

Mana iachaska rimaikunawa rimagkunamanda i Santu Ispíritu iuiachiskata willag-kunamanda

¹ Imaurapas kuianakuspa kaugsangichi. Chasallata munangichi, Santu Ispíritu karamuchu, allilla ruragkuna tiangapa. Santu Ispíritu iuiachiskata willangapa masmi iukangichi munanga. ² Maikanpas mana iachaska rimaiwa rimagka, sug runakunata mana rimanachu. Taita Diosllatami rimá. Santu Ispirituwa chasa rimagpipas, paita uiagkunaka mana imapas iachangapa pudinkunachu. ³ Ikuti Santu Ispíritu iuiachiskata willagka, sugkunata alli suma iuiachingapami willá. ⁴ Mana iachaska rimaiwa rimagka, kikinllatami alli suma iuiai iuiachiri. Ikuti Santu Ispíritu iuiachiskata willagka, Cristowa tukuskakunatami alli suma iuiai iuiachi.

⁵ Tuku kamkuna, mana iachaska rimaikunawa rimanakuntrangichi; nuka masmi munantrani, kamkuna, Santu Ispíritu iuiachiskata willantrangichi. Santu Ispíritu iuiachiskata willag, mana iachaska rimaiwa rimagmanda mas allillami ka. Mana iachaska rimaiwa rimaska ima niraiaskata willachu, Cristowa tukuskakunata alli suma iuiai iuiachingapa: chipas, allillami rurá. ⁶ Chasaka, taitakuna i mamakuna, nuka kamkunapagma chaiagrispa, mana iachaska rimaikunawa rimagpika, ñi imapas mana kamkunamanda allilla tukunchu. Ikuti imasa Taita Dios muskui ukupisina kawachiwaskata u allilla iachaskata iachachispa, paipa Ispíritu iuiachiwaskata willagpika, kamkunamanda mas allimi tuku.

⁷ Flaugta, arpa i sug rigcha uiachidirukuna, tukuikuna sugllasina uiarinakupika, mana iacharintrachu maikanta uianga. ⁸ Chasallata, sug puibluwa sug puibluwa wañuchinakuima llugsingapa bututu mana sinchi pukui uiarigpika, ñi pipas manachar allichirintrakuna, chi wañuchinakuima ringapa. ⁹ Chasallata kamkunapas, uiagkuna mana iachaska rimaiwa rimanakugpika, ¿imasatak iachangakuna ima niraiagta? Iangallami wairata rimagsina kantra.

¹⁰ Kai alpapi maituku rimaikunapasmí tia. Ñi maikan rimaipas, ianga mana pudí tianga. ¹¹ Chasa tiagpipas, maikan mana nuka iachaska rimaiwa rimawagpika, chi rimaika ima niraiaskata nuka mana iachaspaka, sug alpamanda kagsinami parijupa kantranchi. ¹² Chasa kaskamanda, kamkuna, Santu Ispíritu karamuskakunawa allilla ruragkuna tiangapa munaspaka, iukangichimi mas munangakuna, Cristowa tukuskakunata alli suma iuiai iuiachispa iuiaikunawa kangapa.

¹³ Maikanpas mana iachaska rimaiwa rimagka, Taita Diusta mañachu, chi rimaíta ima niraiaskata allilla iachangapa. ¹⁴ Mana iachaska rimaiwa Taita Diusta nuka mañakuspa kagpika, nukapa i spiritullawami mañakuni; nukapa iui aika, nukawa mana kagsinami ka. ¹⁵ Chasa kagpika, ¿imaták iukani ruranga? Iukanimi, nukapa i spirituwá Taita Diusta mañakuura, nukapa iui aiwapas sugllapi kanga. Chasallata nukapa i spirituwá kantakuura, iukanimi nukapa iui aiwapas sugllapi kantakunga. ¹⁶ Kamba i spiritullawa Taita Diusta: “Pai Siñur” nispa kagpika, mana iachagka, kam chasa nikuskata uiaspa, ¿imasatak pudinga kamwa ningapa: “Chasa kachu”? ¹⁷ Taita Diusta: “Pai Siñur” kam sumaglla nigpipas, chi sugka, uiaspapas, mana iachaspaka, ¿imasatak alli suma iuiai iuiachii tukunga? ¹⁸ Nukaka, tukui kamkunamandapas mas mana iachaska rimaikunawa rimagmandami Taita Diusta: “Pai Siñur” nini. ¹⁹ Chasa nisapapas, Cristowa tukuskakunawa nuka tandariska kaura, paikuna mana iachaska rimaiwa chungá waranga rimariskata rimai pudispapas, munanimi, paikuna iachaska rimaiwaka pichka rimaillata rimangapa; chasaka, paikunapas iachaikungapa.

²⁰ Taitakuna i mamakuna, mana wambrakunasina iuiachi. Chara uchulla kagsina kai-chi, ñi ima jiru rurangapa mana iuiaspalla. Ikuti Santu Ispiritupa karamuskawaka ña wiñai puchukaska runasina iuiachi. ²¹ Isaiás sakiska librupi, kasami willaraiá:

Atun Taita Diosmi ni:

“Mana iachaska rimaikunawa
i sug alpamandakunawami
kai alpapi kaugsagkunata rimasa.
Chasa rimagpipas,
mana uiawangapa kankunachu”.

²² Chasaka, mana iachaska rimaikunawa rimangapa, mana balinchu Cristowa iuiarigkunata iuiachingapa. Paita manara rigsigkunata iuiachingapami niraiá. Ikuti Santu Ispíritu iuiachiskata willangapaka, mana balinchu manara Cristota rigsigkunata. Balinmi, paíwa iuiarigkunata alli suma iuiai iuiachingapa.

²³ Cristowa tukuskakuna sugllapi tandariska kaura, tukuikuna mana iachaska rimai-kunawa rimanakugpika, maikan Cristomanda manara iachag u paita manara rigsig iaikuspa uiagpika, ¿manachu ninga: “Kamkuna, upami tukurkangichi”? ²⁴ Ikuti tukui kamkuna Santu Ispíritu iuiachiskata willanakugpika, maikan Cristota manara rigsig u paimanda manara iachag iaikuspa, tukuikuna ima willanakuskata uiaspaka, paí kikin pandaring kagtami iuiaringa. Justisiai tukungapa kagtapasmí iachanga. ²⁵ Paípa iuiai

ima tiaskatapasmi iuiaringa. Chiwanka, Taita Diustami kungurispa kumuringa, “Sutipami Taita Dios kamkunawa ka” nispa.

²⁶ Nigpika, kam taitakuna i mamakuna sugllapi tandariska kauraka, kasa rurangichi. Kampura sugkuna ima suma kantu birsiachu, ima iachachichu, ima muskui ukupisina Taita Dios kawachiska willachu, mana iachaska rimaiwa ima rimachu, chi rimaskaka ima niraiaskata iachaspa willachu: chasa ima rurasapas, tukuikuna mas alli suma iuiyai iuiachinakungapa kachu. ²⁷ Mana iachaska rimaiwa rimanakugpika, iskai u kimsakunallaka sug suglla suiumandata rimachukuna. Chasa rimanakuskata ima niraiagta iachangapaka, sugka tiachu, uiaspa willangapa. ²⁸ Chasa rimanakuskata ima niraiagta ñi pipas mana willai pudigpika, chi rimaikunawa mana rimanakuchu. Kikinmandalla iuiarispa, Taita Diosllata upalla rimachukuna. ²⁹ Chasallata, Santu Ispíritu iuiachiskata willagkunaka, iskai u kimsakunalla willachukuna. Sugkunaka, uiaspa, iuiarichukuna: “¿Sutipacha Santu Ispíritu iuiachiskata willaku?”. ³⁰ Chipi tianakuskata willakuura, Santu Ispíritu sug runata iuiachigpika, ñugpa willagka upalla kachu. ³¹ Chasaka, tukuikunami sug sug pudinkangichi, Santu Ispíritu iuiachiskata willangapa; chiwanka tukuikuna, uiaspa, iachaikuspa, sumaglla parijuma iuiachinakuspa kaugsangapa. ³² Santu Ispíritu iuiachiskata willakug pudinmi, pai kikin rimakuskata upallachiringa. ³³ Taita Dioska mana munanchu, killachinaku tiangapa. Sumaglla tukuipi kaugsanakungapami muná.

Imasami Taita Dioswa tukuskakuna maipipas tandariska kaskapi, ³⁴ warmikunaka upalla kankuna: chasallata kamkuna tandariska kaskapipas upalla kachukuna. Mana paikunata sakiska kanchu, tandariskakunata rimangapa. Paikunapa kusata suma uia-chukuna. Chasallatami Moisés sakiska librupi willaraia. ³⁵ Ima iachangapa munaspaka, kikinpa kusata wasipi tapuchukuna. Cristowa tukuskakuna sugllapi tandariska kaura, mana allilla kanchu, warmikuna rimangapa.

³⁶ Kasapas iuiariichi: Diospa Rimaita willangapaka, mana kamkunawa kallarirkachu. Mana kamkunamandalla chaiarkachu. ³⁷ Maikanpas iuiachu: “Santu Ispíritu iuiachiskata willag u paiwa iuiagmi kani”: chi runaka, kasa iachapuachu: Iaia Jesús kikin niskatami nuka Pablo willanakuikichita. ³⁸ Maikanpas nuka ima willakuskata mana munagpika, pai-tapasmi mana chaiaku munangapa.

³⁹ Chimanda, taitakuna i mamakuna, munapuaichi, Santu Ispíritu iuiachiskata willangapa. Mana iachaska rimaiwa rimagkunataka sakiichi rimangapa. ⁴⁰ Tukuipi allilla ima-pipas suiumandata ima rurangapa chaiaskata ruraichi.

15

Jesucristo kaugsariskamanda

¹ Taitakuna i mamakuna, Alli Willai timpu willaskatami iachachiikichita. Chi Alli Willaita uiaspaka, kunankama mana kungarispassi kaugsanakungichi. ² Chi Alli Willaita suma iuiarispani mana sakispalla kagkuna kispichiska niraiangichi.

³ Nuka kikin ñugpa iachaikuskatami kamkunata kasa iachachirkaikichita. Imasa ñugpamanda librupi willaraiaskasinami tukurka: Cristoka, nukanchipa pandariikunamandami wañuchii tukurka. ⁴ Wañuskata pambaska kaspá, ikuti imasa ñugpamanda willaraiaskasina, kimsa punchapimi kaugsarirka. ⁵ Ña kaugsariskauramandaka, Pedrotasi ñugpa kawarirka. Nispaka, pai kikin chunga iskai agllaskakunatapassi kawarirka. ⁶ Chiuramandaka, pichka patsa ialí katiraiagkunata sugllapi kaskakunatapassi kawarirka. Chi runakuna, maillakunami wañuska kankuna. Charami sugkunaka kaugsanakú. ⁷ Chiuramandaka, Santiagotasi kawarirka. Nispaka, tukui pai kikin agllaska runakunatapassi kawarirka.

⁸ Tukuikunamanda katimakar, nukatapasmi kawariwarka. Nuka sug sulluska tiagsamuska kagsinatapasmi Jesús kawariwarka. ⁹ Sugkunata Cristo kikin agllaskakunamanda mas uchullasinami nuka kani. Taita Dioswa kagkunata nuka puchukangapa kalpachidur kagmanda, nuka mana iukarkanichu, Cristo kikin agllaska runa tukugsamunga. ¹⁰ Chasa kagpipas, Taita Dios nukata iapa kuiawagmandami kunaura Cristo kachamuska kani. Taita Dios chasa kuiawaspa, tukui karawaskakuna mana ianga tukurkachu. Tukui sugkuna Cristo kachaskakunamanda masmi Alli Willaita willaspa purikuni. Chasa purispapas, nuka kikinpa iuiailawa mana willakunichu. Taita Dios kikin nukata iapa kuiawaspa iuiachiwagmandami chasa willaspa purikuni. ¹¹ Nuka i sugkuna Cristo kachaskakuna willaska, chillatatami tukuikuna willanchi. Chi willaskatami kamkuna, uiaspa, suma iuiaringichi.

Wañuskakuna, ikuti kaugsaringapa kaskakunamanda

¹² Cristo wañuspa, kaugsariska kagtami nukanchi willanchi. Nigpika, ¿imapatka kamkunapura sugkuna ninaku: “Wañuskakuna mana mas kaugsaringapa kankunachu?”

¹³ Wañuskakuna mana kaugsaringapa kagpika, Cristopaschar mana kaugsariska kantra. ¹⁴ Cristo mana kaugsariska kagpika, nukanchi Alli Willaita willaska iangachar kantra. Chasallata kamkunapas, iangachar paita iuiarispa kantrangichi. ¹⁵ Cristo mana kaugsariska kagpika, nukanchi nintranchi: “Taita Diusmi Cristota kaugsachirka”; chasa nispa, Taita Diusmanda llullami kantranchi. Wañuska runakuna mana kaugsaringapa kagpika, Taita Dius manachar Cristota kaugsachiska kantra. ¹⁶ Wañuskakuna mana kaugsaringapa kagpikunaka, Cristopaschar mana kaugsariska kantra. ¹⁷ Cristo mana kaugsariska kagpika, kamkuna iangachar paita iuiarispa kantrangichi. Kamkunapa pandariikunata manarachar anchuchiska kantrangichi. ¹⁸ Chasallata Cristowa iuiarispa wañuskakunapas, diltudupa puchukariskachar kantrakuna. ¹⁹ Nukanchipas, kai alpapi kaugsanakunkamalla Cristota iuiarispa kagpika, tukuikunamanda mas llakingasinachar kantranchi.

²⁰ Cristo, wañuspapas, sutipami kaugsarirka. Pai tukuikunamanda ñugpa kaugsariskamandami sug wañuskakunapas ikuti kaugsaringapa kankuna. ²¹ Imasami suglla runamanda kai alpapi wañui chaiamurka: chasallatami, suglla runa wañuspa kaugsariskamanda, tukui wañuskakuna kaugsaringapa kankuna. ²² Imasami Adanmanda, tukuikuna wañungapa niraianchi: chasallatami Cristomanda, tukuikuna kaugsachii tukugsamungapa kanchi.

²³ Imasa kadaunta chaiaskasinami kaugsachii tukungapa kanchi. Cristomi tukuikunamanda ñugpa kaugsarirka. Kipama, Cristo kai alpama ikuti samuuraka, paiwa tukuska kagkunami kaugsaringapa kanchi. ²⁴ Chiuramandami puchukarii puncha chaiamungapa ka. Chiura Cristoka, tukui mandagkunata, tukui iachagkunata i tukui justisiagkunata anchuchispaka, pai kikin, tukuipi mandag tukungapa ka. Tukui chi mandaikunataka paipa Taita Diustami ialichingapa ka. ²⁵ Pai Cristo, mandagmi kangapa ka, “imaura tukui paita mana munagkunata apagrispa, paipa chaki sarudiru ukuma churankama”. ²⁶ Tukui paita mana munagkunata chasa rurauraka, wañuitapasmii puchukangapa ka, mana mas wañui tiangapa.

²⁷ Taita Diusmi, tukuikunata kungurichispa, paipa sarudiru ukuma churarka. Chasa tukuikunata churaska kagpipas, kungurichig Taita Dius kikinka Cristopa ñugpa ladu mana kunguringapa kanchu. ²⁸ Chasapaka, tukuikuna Cristota kunguriuraka, pai kikin Taita Diuspa wambrapas, paipa Taita Diuspa ladumi kunguringapa ka –Taita Diusmi ka tukuikunata Cristopa ñugpa ladu kungurichig— chasawaka Taita Dius, tukuikunata tukuipi mandag iaia kangapa.

²⁹ Kasapas. Wañuskakuna mana mas kaugsaringapa kagpika, ¿imapatak sugkuna, wañuskakunapa kuinta baugtisarinakú? Chasa baugtisarispaka, iangachar rurankuna. ³⁰ Nukanchipas chasallata mana ikuti kaugsaringapa kaspaka, ¿imapatak imaurapas purinakunchi, wañuchiwangapa munanakugta iuiarispa? ³¹ Taitakuna i mamakuna, tukui punchakunami wañuita manchaiwa nuka purikuni. Imasami kamkuna nukanchipa Iaia Jesucristowa tukuskamanda, nuka sutipa iapa alli iuiachiwa kani: chasallatami sutipa kaskata willanakuikichita. ³² Nukaka Cristomanda Efeso puiblupi rabiag sachukumanda animalkunasinawa makanakurkani; kai alpapi tiaskakunallawa iuiaspa chasa makanakugpika, ñi imapa mana baligsinami ka. Wañuskakuna mana kaugsaringapa kagpika, imasami sugkuna ninkuna: “Mikuspa upiaspa kusikusunchi; sug punchakuna ñami wañusunchi”.

³³ Mana pandaringichi. “Mana allilla iachachigkunawa kamkuna sugllapi tukugpika, alli kaugsaitami paikuna pandachingakuna”. ³⁴ Suma iuiaiwa tukugsamuichi. Mana mas pandariichi. Kamkunapura sugkunaka, Taita Diusmanda mana imapas iachangichichu. Kamkunapa pingaipa kagmandami chasa niikichita.

Wañuskakuna, imasa kaugsaringapa kaskamanda

³⁵ Sug tapuchu: “Wañuskakunaka, ¿imasatak kaugsaringapa kankuna? ¿Ima kuirpuwatak tukugsamungapa kankuna?”. ³⁶ Chasa tapugka, upasinami rimá. Kam tarpuska ima simillapas ismuskauramandami, pangakuna llugsispa, wiñai kallari. ³⁷ Imapas ña wiñaska atuntaka mana tarpungichu. Trigu u maikan simillatami tarpungi. ³⁸ Chiuramandami Taita Diuska, pai imasa munaskasina wiñachi; sug sug simillakunamandaka sug rigcha sug rigchami wiñá: chasa.

³⁹ Tukui kuirpukunapas, mana suglla rigcha kawarinkunachu. Chasapaka, runakunapa kuirpuka, sug rigchami kawari; animalkunapa kuirpuka, ikuti sug rigcha; piskukunapaka, ikuti sug rigcha; chalwakunapaka, ikuti sug rigcha. ⁴⁰ Chasallata, awa luarpi i kai alpapi kuirpukuna tiagpipas, awa luarpi tiagkunaka, sug rigchami suma kankuna. Kai alpapi tiagkunaka, ikuti sug rigchami suma kankuna. ⁴¹ Indika, sug rigchami suma punchaiá.

Killaka, ikuti sug rigchami suma punchaiá. Istrillakunaka, ikuti sug rigchami suma punchaiankuna. Istrillapurapas, sug rigcha sug rigchami suma punchaiankuna.

⁴² Wañuskakuna kaugsariipas, chasallatami ka. Alpa ukuma pambaraiaskaka ismunni. Ikuti kaugsariskaka, mana mas ismungapa kanchu. ⁴³ Pambaraiaskaka, millaimi kawari. Ikuti kaugsariskaka, sumaiaskami kawaringapa ka. Pambaraiaskaka mana imapas pudinchu kuiuringapa. Ikuti kaugsarigka, tukui saludu i animuwami kangapa ka. ⁴⁴ Kai alpallata ruraska kuirpumi pambaraiá. Ikuti chi kuirpu kaugsariskaka, ispiritusinami sug luarmanda kangapa ka. Imasami kai alpallata ruraska kuirpu tia: chasallatami ispiritusina sug luarmanda kuirpupas tia.

⁴⁵ Kasami ñugpamanda librupi willaraiá:

Ñugpa ruraska runa, Adán suti,

kaugsai almawami Taita Dios wiñachirka.

Ikuti Cristo katima Adán niraiagka, diltudupa kaugsai Ispiritu iukaskatami karamú. ⁴⁶ Ispiritusina sug luarmanda kuirpu, mana ñugpa tukugsamuska kanchu. Alpallata ruraska kuirpumi ñugpa ruraska ka. Chiuramandami ispiritusina sug luarmanda kuirpuka tukugsamungapa ka. ⁴⁷ Ñugpa runa alpata ruraska kag, kai alpamandallami ka. Ikuti katima Runa Tukuska tiagsamuska, suma luarmandami samurka. ⁴⁸ Imasami chi ñugpa runa, alpata ruraska karka: chasallatami kai alpapi kaugsagakunapas, kai alpamanda niraianchi. Imasami Cristoka, suma luarmanda niraiá: chasallatami nukanchipas, paiwa kapa, suma luarpi paillawanta kagringapa kanchi. ⁴⁹ Imasami nukanchi, chi ñugpa runa alpata ruraskasina rigcha kanchi: chasallatami Cristo suma luarmanda niraiagsina rigchapas tukugringapa kanchi.

⁵⁰ Taitakuna i mamakuna, kasami niikichita: nukanchi kai kuirpupi kaugsankama, manara pudinchichu, Dios suma mandakuskapi kagringapa. Chasallata, nukanchi ismunga kuirpupi kaugsankama, manara pudinchichu, mana imaurapas ismungasina karangapa tiaskata chaskigringapa. ⁵¹ Kunaurami pipas mana iachaskata willangapa kaikichita. Mana tukuikuna wañungapa kanchichu. Chasa kagpipas, tukuikunami sug rigcha kawari tukugsamungapa kanchi. ⁵² Mana unaiilla, ñawichkarigllapi, katima bututu uiarigsamuurami sug rigcha kawari tukugsamungapa kanchi. Chi bututu uiarigllapimi wañuskakuna kaugsarii kallaringapa kankuna, imaurapas mana mas wañungapa. Chiurallatami nukanchi sug rigcha kawari tukugsamungapa kanchi. ⁵³ Kai ismunga kuirpu, ñi imaurapas mana ismugmi tukungapa ka. Chasallata kai wañunga kuirpu, ñi imaurapas mana wañugmi tukungapa ka.

⁵⁴ Kai ismunga kuirpu, mana ismug tukuska kaura, mana mas wañungapa; chiurami ñugpamanda librupi willaraiaskasina pasaringapa ka, kasa nispa:

Wañuita puchukaspaka,

tukui binsigsamuskami niraiá.

⁵⁵ Kunaura, kam wañuika,

¿maipitak tiapungi,

kam binsingapa iuiakuska?

¿Maipitak kam tugsispa wañuchidiru tiapungi?

⁵⁶ Nukanchi pandariskakunamandami wañuika tugsispa wañuchigsina tiagsamú. Moisés ima niskata nukanchi mana allilla ruraskamandami pandariskakuna niraianchi. ⁵⁷ Chasa kagpipas, Taita Dios kikinmi Iaia Jesucristowa paipa iapa iachaita nukanchita karamú; chasawaka, wañuita binsii pudingapa. Chimanda, paita nisunchi: “Pai Siñur”.

⁵⁸ Chasamanda, nukapa kuiaska taitakuna i mamakuna, Iaia Jesuswa suma iuiarispa kangichi, mana kungarispa. Pai ima kamkunata rurangapa niskata imaurapas mas animuwa allilla ruraspaga kangichi. Kasapasmi kamkuna allilla iachangichi: Iaia Jesuswa tukuska kaspaga, mana iangalla ruraspaga kangichichu.

16

Ministiskakunamanda kulki tandachiskamanda

¹ Taita Diuspalla kagkunapagma kachangapa kulki tandachingapaka, ñami imasa Galasia alpapi Cristowa tukuskakunata iachachirkani: chasallatami kamkunapas iukangichi rurangakuna. ² Tukui simana kallarii u dumingu punchakuna chaiaura, mailla maillapas kulki ganaskata wakachingichi. Chasaka, nuka chaiagriura, mana mañai iukasachu. ³ Nuka kamkunapagma chaiagrispaka, kamkuna agllaska runakunatami kartakunawa kachasa, kamkuna karaska kulkita Jerusalén puiblumapa apangapa. ⁴ Nukata ringapa chaiawagpika, paikuna nukawami Jerusalem ringakuna.

Sugma sugma ringapa, San Pablo iuiakuskamanda

⁵ Masedonia alpata ialigrispami kamkunapagma chaiagrisa. Chaiawakumi, Masedoniata ialigringapa. ⁶ Sug punchakuna u tamia ialinkamami kamkunawa kangapa chaiawanga. Chiuramandaka, kamkuna pudinkangichimi aidawanga, nuka maima rii iukaskama chaiagringapa. ⁷ Nuka mana munakunichu, kamkunata ñawiwa kawaspalla ialingapa. Iaia Jesús sakiwagpika, munakunimi achka punchakuna kamkunapagpi ua-iangapa. ⁸ Chasa munakuspapas, Pentecostés atun punchakamami kai Efeso puiblupi chisiangapa kani. ⁹ Suma alpasina tarpungapami kaipi tarirkani; chasapika, Alli Willaita nuka achkakunata umapi tarpugsina willangapa. Nukata mana munawagkunapasmi achkakuna kankuna.

¹⁰ Waugki Timoteo kamkunapagma chaiagrigpika, suma kaiaspa chaskipuangichi; chasaka, kamkunawa iacharidusina iuiarispanga. Paipas, nukasina Iaia Jesusmanda willagmi ka. ¹¹ Chimanda, ñi pipas paita mana wasa churapuangichi. Chasapaka, paita aidapuangichi; chasaka, nukapagma sumaglla chaiagsamungapa. Paita sug waugkikuna-wantami suiakuni.

¹² Waugki Apolostaka sumagllami mañarkani, sug waugkikunawa kamkunapagma richu. Chasa mañagpipas, kunaora mana munarkachu ringapa. Pai imaura pudiurasi kamkunapagma chaingapa ringapa ka.

Kaiakama, niskamanda

¹³ Rigcharaiagsina kaichi, kamkuna Cristowa suma iuiariskata mana sakispalla. Sinchi saiariskasina kaichi, mana ñi imatapas mancharispalla. ¹⁴ Tukui ima ruranakuskapipas, suma kuiaiwa kuiaspa rurangichi.

¹⁵ Kam taitakuna i mamakuna iachangichimi, waugki Estefanaspa wasipi kaugsagkuna, Akaia alpapi tukuimanda ñugpa Alli Willaita sumaglla chaskigtakuna. Paikunaka, Taita Diospalla kagkunata aidaspami kaugsanakú. Chimandami mañaikichita: ¹⁶ paikunata sumaglla uiapuaichi; chasallata, tukui paikunawa allilla ruranakuskatapas.

¹⁷ Estéfanos, Fortunato i Akaiko nukapagma samuskakunamandami iapa alli iuiachiwá. Paikunata kawaspaka, kamkuna karupi kaskata kawakugsinami iapa alli iuiachiwagsamurka. ¹⁸ Paikunaka, nukapa llakiikunata anchuchispa, sumagllami iuiachiwagsamurkakuna. Chasallatami kamkunatapas sumaglla iuiachingakuna. Paikunataka iukangichimi, “Pai Siñur” ningakuna.

¹⁹ Asia alpapi Cristowa tukuskakunami kamkunata: “Puangi” ninakú. Waugki Akila, warmindi Priska i paikunapa wasipi sugllapi tandarispaga Cristowa tukuskakunapasmi, Iaia Jesusmanda iuiarispalla, “Puangi” ninakú. ²⁰ Tukui waugkikuna i panikuna kaipi kagkunapasmi, “Puangi” ninakú. Kam kikinpura Taita Dioswa iuiarispaga muchanakuspa, “Puangi” ninakuichi.

²¹ Nuka Pablo, nuka kikinpa makiwami iskribiska, kai saludaita kachaikichita.

²² Maikanpas Iaia Jesusta mana kuiagka, maldisiska kachu. Nukanchiwa utkalla samui, Iaia Jesús.

²³ Nukanchiwa Iaia Jesucristo, kamkunata suma kuiaiwa kawapuachu. ²⁴ Tukuikunata-mi Jesucristowa sugllapi kuiaikichita.

KORINTO PUIBLUPI CRISTOWA TUKUSKAKUNATA SAN PABLO ISKAIMA KARTA KACHASKAMANDA

¹ Taita Dios nukata munawaskamanda, Jesucristo kachamuwaskami kani, Alli Willaita willaspa puringapa. Timoteo suti waugkiwa kaspá, kamkuna Taita Dioswa tukuskakuna Korinto puiblupi kaugsanakuskata i Taita Diuspalla tukui kagkuna Akaia alpa suiu kaugsanakuskatapasmí kai karta kachaikichita. ² Nukanchipa Taita Dios i Iaia Jesucristo, kamkuna kuiaspa, suma iuiiwa kawapuachu.

Taita Dios, imapipas llakiikunata samachigmanda

³ Nukanchipa Iaia Jesucristopa Taita Diusta nisunchi: “Kam, iapa suma atunmi kangí”. Paimi ka nukanchimanda llakiiug. Imapipas llakiikunata samachigmi ka. ⁴ Nukanchi ima iapa llakiíwa kaskata, paimi samachí; chasaka nukanchipas, sugkuna ima iapa llakii iukagpika, paipa suma iuiachiillawanta paikunata samachingapa. ⁵ Imasami nukanchita cháiá, Cristomanda iuiarispa iapa llakiíwa pasangapa: chasallatami Cristo, nukanchita chi llakiikunata samachí. ⁶ Nukanchi, iapa llakiíwa pasanakunchi; chasaka, kamkunapa llakiikunata samachispa kispichingapa. Cristo, nukanchita chi llakiikunata samachí; chasaka, kamkunapa llakiikunata samachispa, chiwanka nukanchisina iapa llakiikunawa pasanakuskata apai pudingapa. ⁷ Imasami kamkuna, nukanchisina iapa llakiikunawa pasanakungichi: chasallatami nukanchisina llakiikunata samachii tukunkangichi. Chasa iachaspami nukanchi kamkunamanda tukui allilla tukugsamungapa suianakunchi.

⁸ Nukanchi Asia alpapi kaura, iapa llakiimi iukarkanchi. Munanakunchimi: kam taitakuna i mamakuna chasa iachapuaichi. Askurimi mana awantangasina llakiíwami pasanakurkanchi. Chiwanka, iuanakurkanchimi: “Na mana maschar kaugsasunchi”. ⁹ Wañuchii tukungapa kagsinami iuanakurkanchi. Chasawami iachaikurkanchi, nukanchi kikinpa iuiaikunallawa mana imapas awantai pudingapa kagta. Taita Dios wañuskakunata kaugsachigwa iuiarispa pudingapa kanchi awantangapa. ¹⁰ Paimi chi iapa manchangasina wañuita nukanchita kispichirka. Nispaka, chasalata ikutimi kispichingapa ka. Ari, paillatami suianakunchi, ikuti ikuti nukanchita kispichigsamungapa, ¹¹ kamkunapas Taita Diusta nukanchimanda mañaspa kagpikuna. Achkakuna nukanchimanda Taita Diusta mañagpikuna, achkakunallatami, Taita Dios nukanchita suma iuiiwa kawakugmanda, paita: “Pai Siñur” ningakuna.

San Pablo, Korinto puibluma imapa mana riskamanda

¹² Kasamandami alli iuiachiíwa kanchi: nukanchipa iuiiwami iachanchi, nukanchi kai alpapi i maspas kamkunawa, suglla suma iuiiwa tukuipi allilla kaugsaspa kagtakuna. Mana chasa kaugsanakunchichu nukanchi kikinpa iuiailawa. Taita Dios kikin suma kuiaita karamuskawami chasa allilla kaugsanakunchi. ¹³⁻¹⁴ Kamkunapagma nukanchi kartakuna kachaskapika, nukanchi ima iuanakuskallatami ninakunchi, kamkuna iachangapa. Kamkuna, chikunata kawaspaka, kunankama maillami nukanchi ima iachachiskata allilla iachangichi. Munakunimi, kamkuna tukuipi allilla iuiai iachangapa. Chasaka, nukanchipa Iaia Jesús samug puncha chaiaura, imasami nukanchi, kamkunamanda iuiarispa, alli iuiachiíwa kanchi: chasallatami kamkunapas, nukanchimanda iuiarispa, alli iuiachiíwa kankangichi.

¹⁵ Kamkuna chasa kagmanda alli iuiaspa, nuka munakurkani, ñugpa kamkunapagma chagrangapa. Chiwanka munakurkani, iskai biaji kamkunata kawagrispa, kamkuna iapa allilla kangapa. ¹⁶ Kamkunapagta ialispa, Masedonia alpamami ringapa karkani; chimanda kutimuspa, ikuti kamkunata kawagsamungapa. Chimanda, kamkuna aidawangapami karkangichi, Judea alpama chagrangapa. ¹⁷ Nuka chasa iuiakuspaka, ¿manachu munakurkani chasa rurangapa? ¿Kamkuna iuiangichichu, nuka iskai iuiái iukagta; chasaka, kamkunata: “Kasami rurasa” nispaka, ikuti chiurallata: “Mana chasa rurasachu” ningapa? ¹⁸ Taita Dios, nukanchimanda iachanmi: nukanchi, kamkunata: “Kasami rurasa” nispaka, ikuti chiurallata sug rigcha rurangapa mana ninchichu. ¹⁹ Silvano, Timoteo i nuka, kamkunata Taita Diospa wambra Jesucristomanda willarkanchi; pai Jesucristoka, “Kasami rurasa” nispaka, ñi imaurapas mana ninchu: “Mana chasa rurasachu”. Pai niska, tukui chasami tuku. ²⁰ Tukui ima Taita Dios karangapa niska, Jesucristowami nukanchita karamú. Chimanda, chasa niskamanda nukanchi uiaspa, paimanda iuiarispa, ninchimi: “Chasa kachu”; chiwanka, Taita Diusta suma atuniachingapa. ²¹ Taita Diosmi Jesucristowa nukanchita i kamkunata tukuipi allilla charí. Paimi nukanchita agllarka. ²² Paimi Santu Ispirituwa nukanchita siñalarka, paipa kagta niraiangapa. Paillatami

Santu Ispirituta kachamurka, nukanchiwa sugllapi kangapa. Chasamandami iachanchi, nukanchi sug luarpi tukui sumaglla chaskingringapa kagtakuna.

²³ Taita Dios, nuka ima iuiakuskata iachanmi, nuka kamkunata ima nikuska sutipa kagta: kamkunata mana piñangamandami mana Korinto puibluma rirkani. ²⁴ Mana munanchichu, kamkunata ningapa: “Kasa u chasa Cristowa iuiariichi”. Kamkuna, ña sumami paiwa iuiaringichi, mana sakispalla. Chasapaka munanchimi, kamkunawa sugllapi aidanakungapa; chasaka kamkuna, alli iuiachiiwa kangapa.

2

¹ Chimandami iuiarirkani, manara ikuti kamkunapagma chaiagringapa; chasaka, mana kamkunata llakichingapa. ² Nuka chasa kamkunata llakichigpika, ¿pitak nukamanda llakintra, alli iuiachiwangapa? Kamkunallami, nukawa llakichii tukuspa, pudintragichi, nukata alli iuiachiwangapa. ³ Chimandami chasa karta kacharkaikichita. Chiwanka, nuka chaiagriura, kamkunawa mana llakirisa kasachu. Chasapaka, kamkunawa kuntintullami kasa. Sumami iuiani, nuka alli iuiachiiwa kagpika, tukui kamkunapas alli iuiachiiwa kangapakuna. ⁴ Kamkunamanda iapa llakispa wakaspami chi kartata kacharkaikichita. Mana kacharkaikichitachu, kamkuna kawaspaka, llakirigsamungapa. Nuka kamkunata iapa sumaglla kuiag kagta iachangapami kacharkaikichita.

Jiru rurag runata, San Pablo pasinsiaskamanda

⁵ Llakichiwagka, mana nukallata llakichiwarkachu. Tukui kamkunatapasmi maillallapas llakichirka. “Maillallapas” ninimi; iapaspalla llullagsina mana ninichu. ⁶ Chi runa jiru ruragta ña unaimi kamkuna kaskamanda llugsichiska ka; chika, allillami rurarkangichi, chasa sugkuna mana iuiagpipas. Kunaura, chilla. ⁷ Kunauramanda iukangichimi, paita pasinsiaspa, iuiachispa, paipa llakiita kungachinga. Mana kagpika, ¡ujalallapas iapa llakii iukaspaka, iuiarintra mana mas kaugsangapapas! ⁸ Chimandami suma mafiakichita: paita kawachipuaichi ikuti kuiagtakuna. ⁹ Paimandami ñugpa kartata kacharkaikichita, iachangapa: nuka tukui ima niskata, ¿kamkuna rurankangichichu u manachu rurankangichi? ¹⁰ Maikantapas kamkuna pasinsiagpikunaka, nukapasmi pasinsiani. Ima pasinsiangapa tiagpika, kamkuna kuiaska kagta iuiarispami Cristopa ñawipi pasinsiani. ¹¹ Chasami pasinsianchi. Mana kagpika, iaia kuku, nukanchiwa rikuginsami tukunga. Chi iaia kuku imapipas jiru rurangapa munag kagta allillami iachanchi.

Troas puiblupi, San Pablo llakiiwa kaskamanda

¹² Nuka Troas puiblupi Cristomanda Alli Willaita willangapa chaiagriuraka, iaia Jesús kikin, alli alpa suma tarpungapa tiagsinami kawachiwarka; chasapika, achkakunata Alli Willaita willangapa. ¹³ Chipi nuka kaura, waugki Tito mana kawariwarkachu. Chimandami nuka llakiiwa karkani. Chimanda, chipi kagkunata: “Kaiakama” nispa, Masedonia alpamami rirkani.

Nukanchi, Jesucristowa binsig kagkunamanda

¹⁴ Taita Diosmi nukanchita imaurapas paipa iapa iachai karamú, Jesucristowa iaia kukuta mitikuchingapa. Chasallata, nukanchita maimapasmi kachá, Alli Willaita willaspapurigringapa—chi Alli Willaika, iapa miski asnarigsinami ka—chita uiaspaka, sugkunapas paita rigsigsamungapa. Chimandami paita nini: “Pai Siñur”. ¹⁵ Imasami insinsu rupachitura, miski asnari: chasallatami Cristo, nukanchita kachamú, Taita Diosmanda miski asnarigsina paipa Alli Willaita willangapa. Chi Alli Willaitaka, *kispiringapa kagkuna i mana kispiringapa kagkunapasmi uiankuna. ¹⁶ Mana kispiringapa kagkunataka chi Alli Willaita uiaskawaka diltudupa wañuimi chaiangapa kankunata. Ikuti kispiringapa kagkunaka, diltudupa kaugsaimi chaskingapa kankuna. Chasa tukungapa kaskamandaka, ¿pitak tia, tukui chikunata allilla willangapa? Ñi pipas manima. ¹⁷ Nukanchika, Diospa Rimaita mana willanakunchichu, nukanchi kulkiringapa, achkakuna chasa ruragpikunapas. Taita Dios kachamuskakuna kaspami, Diospa ñawipi Cristomanda willanakunchi, mana imapipas llullaspalla.

3

Taita Dioswa i runakunawa ikuti sumaglla tukuskakunamanda Alli Willaimanda

¹ Chasa nispa, ¿ikuti nukanchi kikinkunachu ninakunchi: “Mas allimi kanchi”? Sugkunata cháiá, kikinkunamanda alli niska karta apamuspa kawachigsamungapa; chasaka, Diospa Rimaita iachachingapa. ¿Chasallatachu nukanchitapas chaiaku, karta kamkunata kawachigsamungapa i kamkunapagmandapas apaspa ringapa? Manima. ² Kam kikin-kunami niraiangichi nukanchimanda alli niska kartakuna kagsina. Nukanchipa iuiapi

* 2:15 griego rimaiwa: chi asnarigsina.

niska karta kagsinami kangichi. Kamkunata kawaspami tukui runakuna, nukanchi allilla iachachig kagtakuna kawangakuna. ³ Kamkuna kangichimi Cristo kachamuska karta, nukanchi iuiarispa iskribiska kagsina. Tintawa iskribiraiaskasina mana kangichichu. Kaugstag Taita Diospa Ispirituwami nukanchi iachachiska iskribiraiaskasina kangichi. Chasallata, rumi pambapi iskribiraiaskasina mana kangichichu. Kamkunapa iuiaipimi nukanchi iachachiska iskribiraiaskasina kangichi.

⁴ Taita Diusta Cristowa iuiarispami chasa ninchi. ⁵ Nukanchi kikinpa iuiailawa ñi imapas mana pudinchichu. Taita Diospa iapa iachaita nukanchita karamugmandami pudinchi. ⁶ Taita Dios kikinmi paipa iachaita karamurka; chasaka, paíwa i runakunawa ikuti pasinsiachirispas sumaglla tukuskamanda nukanchi willangapa. Chika mana niraianchu Moisés ñugpata willaskawa. Santu Ispiritu iuiachiskawami chasa niraiá. Moisés ima rurangapa willaraiaskapi niraianni, pandarigkuna wañuchii tukungapa. Ikuti Santu Ispirituka, suma kaugsaitami karamú.

⁷ Ima rurangapa rumipi willaraiaskata iapa punchawami Taita Dios, Moiesta kuagsamurka; chiwami Moiespa ñawipas iapa puncha kawarigsamurka. Chasataka Israelmanda runakuna, mana paipa ñawita kawangapa pudirkakunachu. Chi punchaiaskaka, mailla mailla wañurispas wañurispami rirka. Chi runakuna wañungapa willaraiaskatami ña iapa punchawa Moiesta kuagsamurka. ⁸ Ikuti kikin Santu Ispiritu karamuskaka iukanmi, askurinti mas iapa punchawa tukugsamunga. ⁹ Ari, justisiai tukungapa willaraiaskata iapa punchawami Moiesta kuagsamurka; mana pandarig niraiangapa Alli Willaita uiaspa iukanmi, Santu Ispirituwa askurinti mas iapa punchawa tukugsamunga. ¹⁰ Chi willaraiaskata Moisés chaskiura, iapa punchaiachigpipas, kunaúra askurinti iapa puncha Alli Willaimanda chi ñugpamandaka ñi imapas mana puncha niraianchu. ¹¹ Chi puchukaringapa willaraiaskata iapa punchawa Moiesta kuagsamurka. Ikuti mana imaurapas puchukariduru Alli Willaika iukanmi, chi willaraiaskamanda mas iapa punchawa tukugsamunga.

¹² Chasa tukugsamungapa kagta nukanchi allilla iachaspami, mana manchaspalla chi Alli Willaita willanakunchi. ¹³ Nukanchika, mana Moiesina ruranakunchichu. Paika, ñawita linsuwa kilparispami karka; chiwanka Israelmanda runakuna, paipa ñawi punchaiaskata mailla mailla wañurispas wañurispas rikuskata mana kawangapa. ¹⁴ Chasa kilpariska kaskata, paikuna mana iacharkakuna ima niraiagta. Kunaúrapas, Diospa ñugpamanda Rimaipi willaraiaskata uiaspapas, paikunapa iuiaiipi chi linsuta kilparaiaskasinami chara kankuna. Chasaka, mana allilla iachagsamungapa pudinkunachu. Cristollawa iuiariskapimi chi kilparaiaska linsuta anchuchigsina tukugsamú. ¹⁵ Ari, paikuna, Moisés willaraiaskata kawaspapas, kunankama paikunapa iuiaiipi linsuwa kilparaiaskasinami chara kankuna; chasaka, mana allilla iachagsamungapakuna. ¹⁶ Ikuti maikanpas Iaia Jesuswa tukugsamuuraka, chi kilparaiaska linsuta anchuchigsinami tukugsamú, allilla iachagsamungapakuna. ¹⁷ Atun Taita Dioska, ispiritumi ka. Paipa Ispiritu, wataskasina maipi kaskapi kaskakunata kacharigsinami ruragsamú. ¹⁸ Chimandami tukui nukanchika, ñawi kilparaiaskata anchuchigsina tukugsamuspa, Iaia Jesús suma punchalla kagta spijupisina sugkunata kawachirinakunchi. Chiwanka nukanchi, pai suma punchalla kagsinallatatami mailla mailla suma punchalla tukugsamunakunchi. Atun Taita Diospa Ispiritumi chasa nukanchita ruraku.

4

¹ Nukanchi, chasa iachaspaka, Taita Dios nukanchimanda llakirispas Alli Willaita willangapa mingaskata mana sambaiaspallami charinchi. ² Chi Alli Willaita willangapaka, tukui pingaipa pakalla jiru ruraikunata wabutispami sakinchi. Chasaka, mana sug rigcha iuiaspallami willanchi. Diospa Rimaitapas mana sug rigcha niraiaskata iachachinchichu. Chasapaka, sutipa kaskata willaspami, tukui runakunata kawachirispas, Diospa ñawipi suma iachachinchi. ³ Nukanchi willanakuska Alli Willaika, sugkunata linsuwa kilparaiaskasinami amsa tukú; chika kanmi diltudupa puchukaringapa kagkunamanda. ⁴ Kai alpamanda diussina iaia kukuka, manara Cristota rigsigkunapa iuiaita tuntiaichigsinami rurarka; chasaka, iapa suma punchaiachig Cristomanda Alli Willaiwa paikunapa iuiaita mana punchaiachigsina tukugsamungapa. Pai Cristoka, Taita Diospa ñawi kagsinami kawarigsamú. ⁵ Nukanchi kikinkunamandaka ñi ima mana willanakunchichu. Jesucristolla tukuikunapa iaia kagtami willanakunchi. Jesusmandalla iuiarispa, kamkunapa lutrinsinakunami kanchi. ⁶ Taita Diosmi nirka: “Iana tutapi, punchaiachu”. Taita Diosllatatami nukanchipa iuiaikunata punchaiachigsamurka; chi punchaiachiskawaka, pai tukuipi suma atun kagta nukanchi iachangapa. Chi punchaiachiimi Cristo kikinpa ñawipi kawachirigsamú.

Jaia Jesuswa suma iuiarispa kaugsaimanda

⁷ Nukanchipa kuirpu alpa mangasina kagpipas, chasa kuirpukunapi chi punchaiachig-sina Alli Willaitami chariraianchi; chasaka, nukanchipa iachaiwa mana kagta kawachingapa. Taita Diuspa iapa iachaiwa kagta kawachingapami chi Alli Willaita chariraianchi; ⁸ chasaka, iapa llakiikuna chaiagpipas, ñi imapipas mana sambaiaspalla kangapa. Chasallata, iapa llakiikunawa iuaikuna chaiagpipas, Cristowa suma iuiariskata mana sakispallami kaugsanchi. ⁹ Sug runakuna jiru rurangapa munanakugpipas, Taita Dius, nukanchita mana sapalla sakinchu. Urmagta piagpikunapas, mana puchukaringapa kanchichu. ¹⁰ Maima rispapas, nukanchipa kuirpupi llakiita apaspa, Jesús wañuchii tukuskatami kawachinchi. Chi llakiita apakuspapas, Jesús nukanchiwa kaugsakugtami mana sambaiaspalla kawachinchi. ¹¹ Chasaka, nukanchi kaugsanakunkama Jesusmanta willanakugmandami sugkunaka tukui punchakuna munanakú, nukanchita wañuchingapa; chiwanka nukanchi. Jesuspa kaugsaita nukanchipa wañunga kuirpupi kawaringapa. ¹² Chasamanda, nukanchita wañuimi katiraiá. Ikuti kamkunataka kaugsaimi katiraiá.

¹³ Kasami ñugpamanda librupi willaraiá:

Taita Diuswa suma iuiarirكاني.

Chimandami paimanda rimarkani.

Chasallata nukanchipas, Jaia Jesuswa suma iuiarinchi. Chimandami paimanda rimanchi, ¹⁴ kasa iachaspa: Taita Dius, Jaia Jestusta kaugsachig, nukanchitapas paiwami kaugsachingapa ka. Nukanchita kaugsachispaka, kamkunawantami pusangapa ka, pai kikinpa ñawipi kagringapa. ¹⁵ Tukui llakiikuna u ima nukanchita pasariska, kamkunamanda allillapami ka; chasaka mas achka runakuna, Taita Diuspa suma kuiaita chaskigsamungapa; chiwanka mas achkakuna, paita: “Pai Siñur” nispa, iapa suma atuniachingapa.

¹⁶ Chasamandami imaurapas mana sambaiaspalla kanchi. Nukanchipa kuirpu rukuiakugpipas, nukanchipa almataka kada punchami Taita Dius mas sumaiachiku. ¹⁷ Nukanchi kaugsanakunkama llakii iukaskakunaka, mana unallami ialí; ñi ima mana kagsinami iuiachi. Chi llakiikuna iukaskawa, nukanchi iapa alli suma iuiachi mana puchukaridiru kaugsaiwami kaugsagringapa kanchi. ¹⁸ Kawaridiru, tukuringallami. Ikuti mana kawaridiruka, mana imaurapas tukuringapa kanchu. Chimanda, kawaridirukunallawa mana iuianakusunchi. Mana kawaridirukunawami iukanchi iuianakungu.

5

¹ Kasapasm iachanchi: nukanchipa kuirpu, sug wasi mana unaiaspalla tukurigsina puchukariura, suma luarpika sug musu wasisina kuirpumi iukangapa kanchi. Chi wasisina kuirpu, mana runa ruraska kanchu. Taita Dius kikin ruraskami ka. Chi wasisina kuirpu suiakumi, nukanchi chipi diltudupa kaugsagringapa. ² Chimandami, kai kuirpupi kaugsanakunkama, wakanakugsina iuiarispa, munanakunchi nukanchipa suma luarmanda wasisina kuirpupi kaugsanakugringapa. ³ Chi musu kuirpupi churaraiaagsina kaspaka, mana kawarisunchichu mana kuirpuwa. ⁴ Kai karpa wasisina kuirpupi kaugsanakuspaka, llakiwa wakanakugsinami kanchi. Mana munanakunchichu, mana kuirpuwa kawarinakungapa. Musu kuirpupi churariskasina tukugsamungapami munanakunchi; chasaka kai wañungapa kuirpu, diltudupa musu kaugsaiwa allilla tukungapa. ⁵ Taita Diusmi nukanchita wiñachirka, chi musu kaugsaita chaskigringapa. Paillatami Santu Spirituta nukanchita karamurka; chiwanka, nukanchi chaskigringapa kaskata iachangapa.

⁶ Chimandami nukanchi imaurapas chasa tukungapa kagta iuiarispalla kanchi. Kasapasm iachanchi: nukanchipa kuirpupi kaugsankama, karupi kagsina manara Jaia Jesuswa sugllapi kangapa chaiagta. ⁷ Paiwa suma iuiarispami kaugsanchi, manara ñawi ñawi kawanakuspapas. ⁸ Chasa kaugsaspapas, paiwa sugllapi kagringapa kagta iuiarispallami kanchi. Kasapasm munanakunchi: ¡amalai mana mas kai kuirpupi kaugsaspa, Jaia Jesuswa sugllapi ña kaugsagrintranchi! ⁹ Chimanda, kai kuirpupi u suma luarmanda kuirpupi kaugsaspapas, Jaia Jestusta kuntintachingapagllami iuiaspa kaugsanakunchi. ¹⁰ Tukuikunami iukanchi, Cristopa ladu kawarigringa; chipika, allilla u mana allilla kaugsankama ruraskakunawa imasa chaiaskasina chaskingapa.

Taita Diuswa pasinsichirichi, niskamanda

¹¹ Chimandami, Jaia Jestusta sumaglla manchangapa chaiaskata iachaspa, runakunata allilla willanchi, paikunapas Jesuswa tukungapa. Nukanchi imasa kaskataka, Taita Diusmi allilla iachá. Munakunimi, kamkunapas nukanchi imasa kaskata allilla iachangapa. ¹² Kamkunata mana ninakunchichu: “Nukanchi, allimi kanchi”. Kamkuna, nukanchimanda “Allillami kankuna” iuiarispa, kuntintulla tukungapami chasa ninakunchi.

Chasaka, chi mana iuiaipi kaskata iuiaspalla kawaskallawa atun tukugkunata pudinkangichimi iuiachingakunata. ¹³ Nukanchi upasina kagta paikuna nigpikunaka, Taita Diosmandami chasa kanchi. Ikuti suma iuiaiiug rigcha kaspaka, kamkunamanda allillapami chasa kanchi. ¹⁴ Cristo, nukanchita iapa kuiaspa, imasa kaugsangapami iuiachi. Kasami iachanchi: Cristollami tukui runakunamanda wañurka. Chasamandami tukui nukanchi, Diospa ñawipi paiwa wañuska niraianchi. ¹⁵ Imasami Cristo, tukui kunamanda wañuspa, kaugsarirka: chasallatami nukanchipas, paiwa kaugsarispaka, kikinmandalla mana kaugsai niraianchi. Pai Cristomandallami kaugsai niraianchi. ¹⁶ Chimandaka, imasami kai alpamanda runakuna pimandapas iuianakú: chasaka mana iukanchichu kunauramanda iuianga. Cristomandapas kai alpamanda runakunasina nukanchi ñugpamanda iuianakuskaka, kunauramanda paimanda mana chasa iuiasunchi. ¹⁷ Maikan Cristowa kagkuna, ikuti musuiachigsinami tukugsamunkuna. Ñugpamanda ruku kaugsai, ñami ialirka. Ikuti sug rigcha kaugsaiwa musuiachigsinami tukugsamurka.

¹⁸ Taita Diosmi tukui chasa rurag ka. Paimi nukanchita kikinwa pasinsiachirka. Cristowami chasa rurarka. Paimi nukanchita mingarka, tukuikunata pai kikinwa pasinsiachingapa. ¹⁹ Pai Taita Dios, Cristowa kaspera, kai alpamanda runakunata kikinwa pasinsiachirka, paikunapa jiru ruraikunata mana iuiarisipalla. Paimi nukanchita mingarka, "Taita Dioswa pasinsiachiriichi" tukuikunata nispa puringapa. ²⁰ Chimandami nukanchika, Cristo kachamuska willagkuna kanchi. Taita Dios, nukanchiwa kamkunata mañagsinami ka. Cristomandami suma mañanchi: "Taita Dioswa pasinsiachiriichi".

²¹ Cristo kikin ñi ima pandarig mana kaggipas, Taita Dioska, nukanchimanda pandarig-sinallatatami paita kawarka; chasaka nukanchi, Cristowa mana pandarig niraiangapa.

6

¹ Nukanchi, Taita Dioswa aidanakugsina kaspera, kamkunata kasami mañanchi: Taita Dios kamkunata chasa iapa kuiaskamandaka, ñujalallas kamkuna ianga chaskingichi! ² Chasallatami ñugpamanda librupi willaraiá, kasa nispa:

Allipi kawachingapa puncha chaiaurami uirkaiki.

Kispichingapa puncha chaiaurami aidarkaiki.

Kunaurami chi allipi kawachingapa puncha chaiamuska ka. Kunaurami ka chi kispichingapa puncha.

³ Ñi pitapas mana pandachispa kaugsanchichu. Chasaka, ñi pipas nukanchi Alli Willaita willanakuskamanda mana ningapa kankunachu, mana alli kagta. ⁴ Chasapaka, tukui-pimi kawachinchi, nukanchi Taita Dios ima niskata rurag kagtakuna. Nukanchita iapa llakichigpipas, ima ministirigpipas, ima pasarigpipas, ⁵ asutigpipas, karsilpi churagpipas, nukanchita killachigpipas, saikugta trabajangapa chaiagpipas, mana puñuspalla i asllitalla mikuspa kaugsangapa chaiagpipas, tukui-pi mana sakispallami kawachinchi, Taita Dios ima niskata rurag kagtakuna. ⁶ Chasa kagtakunami kawachinchi, ñi ima jiru iuiaikuna mana iukaspa, sumaglla iachaiwa kaspera, ñi pitapas mana piñaspalla, tukui-kunawa sumaglla kaspera, Santu Ispirituta iukaspa, tukui suma iuiaiwa kuiaspa, ⁷ Diospa Rimai sutipa kagta willaspa, Diospa iapa iachaiwa allilla ruraspa; chasa kaugsanakuspami kawachinchi, Taita Dios ima niskata rurag kagtakuna. Chasa tukui-pi alli kaspera kaugsakawami pudinchi, mana allilla kaugsaita arkaspera binsingapa. ⁸ Nukanchita suurakuna kuiankunami; ikuti suurakunaka kaminkunami. Nukanchimanda suurakuna mana alli kagtakunami ninkuna; ikuti suurakunaka alli kagtakunami ninkuna. Nukanchita llulla kagtakuna nigpikuna, nukanchika sutipa kaskatami willanchi. ⁹ Nukanchimanda nichukuna, mana rigsisika kagtakuna: chasa nigpipas, nukanchi allilla rigsidunamami kanchi. Ña wañungasina kaspapas, kaugsallami kanchi. Wañunaiagta asutigpipas, mana wañunchichu. ¹⁰ Llakii iukaspapas, imaurapas alli iuiachiiwami kanchi. Ñi ima mana iukag kaspapas, Alli Willaita willaspa, achkakunata iukag kangapa karagsinami ruranchi. Mana ñi ima iukaspapas, Diospa ñawipi tukuikunata iukagmi niraianchi.

¹¹ Kamkuna Korintopi kaugsanakuskata mana imapas pakaspallami willanchi. Nukanchipa tukui iuiaikunawami kamkunata kuianchi. ¹² Kamkunata kuiaspa, mana sug rigcha kamkunamanda iuianchichu. Ikuti kam kikinkunaka, nukanchimanda sug rigcha iuiai-wami kangichi. ¹³ Chasa kagmandami nukapa wambrakunatasina mañaikichita: imasami nukanchi, kamkunamanda iuianchi: chasallata kamkunapas, nukanchimanda kuiaspalla iuiapuachi.

Taita Diospa wasisinami nukanchi niraianchi

¹⁴ Mana Cristota rigsikgunawa mana sugllapi tukunakungichi. Allilla ruragkunawa mana allilla ruragkunawa mana pudirinchi, sugllapi tukungapakuna. Chasallata, iuiaikunata punchachiskaka kagkunawa iana tutapisina kagkunawa mana pudirinchi, suglla

iuiai apanakungapa. ¹⁵ Cristowa iaia kukuwa mana pudirinchu, suglla iuiai kangapa. Chasallata, Cristowa suma iuiagwa manara paita rigsigwa, suglla iuiaiwa mana kangapa pudirinchu. ¹⁶ Ianga diuskunawa mana pudirinchu, Diuspa wasi ukupi sugllapi kangapa. Nukanchimi kaugsag Diuspa wasisina niraianchi. Chasallatami ñugpamanda librupi Taita Dius kikin willarka, kasa nispa:

“Paikunapa chaugpipi purispami kaugsangapa kani.

Paikunapa Taita Diusmi kangapa kani.

Paikunaka, nuka agllaska runakunami kapuangapa kankuna”.

¹⁷ Chimanda, kasapasmi atun Taita Dius ni:

“Nukata manara rigsiwaskakunapuramanda llugsimuichi.

Mana paikunawa sugllapi tukunakuichi.

Mapa niraiaskatapas mana tuparingichi.

Chasaka nuka, kamkunata sumagllami chaskisakichita.

¹⁸ Kamkunapa Taitami kangapa kapuikichita.

Kamkunaka, nukapa wambrakunami kapuangapa kangichi”.

Chasami tukui pudig atun Taita Dius ni.

7

¹ Chiwanka, kuiaska taitakuna i mamakuna, Taita Dius chasa nukanchimanda sumaglla rurangapa niskamanda, nukanchipa kuirputa i ispirituta tukui mapa niraiaskakunata anchuchirisunchi. Paipalla kangapa iuiarispas, paita sumaglla manchaspa kaugsasunchi.

Korintopi kaugsag Jesuswa tukuskakuna, Taita Diuswa ikuti tigraskamanda

² Nukanchi kamkunata sumaglla kuiangapa sakiriichi. Ñi pitapas mana llakichirkanchichu. Ñi pitapas mana wagllichirkanchichu. Ñi pitapas mana ñi ima kichurkanchichu.

³ Chasa rimaspaka, mana ninakuikichitachu, kamkunata nigsina: “Mana allimi kangichi”.

Ñami nirkaikichita, kamkunaka nukanchipa kuiaska kagtakuna, sugllapi sumaglla kaugsangapa, wañunkama. ⁴ Ñi ima mana pakaspallami rimanakuikichita. Nukaka, kamkunamanda iapa alli iuiachiiwami kani. Nukanchi ña iapa llakii pasaspapas, iapa suma kuntintullami kani.

⁵ Nukanchika, Masedonia alpama chaiagsamuuramandata mana samarii pudirkanchichu. Kaipika, tukuipimi llakiikunalla tarinakurkanchi. Nukanchipa muiundi kagkunawami killachinakuiwa kaugsanakurkanchi. Nukanchipa iuiaipika iapa manchaiwami karkanchi. ⁶ Chasa kagpipas, Taita Dius sambaiaska iuiaiwa kagkunata suma iuiachigka, Tito chaiagsamugmandami nukanchita chi llakiikunata sumaglla kungachirka. ⁷ Pai chaiagsamugmandallaka, mana; kamkunata kawagrispa, iapa kuntintarispa kagmandami nukanchitapas iapa alli iuiachirka. Pai Titomi nukanchita willagsamurka: kamkuna munanakungichisi, nukanchita ikuti kawangapa; iapa llakiiwasi kangichi; nukata juchachiwanakuskamanda michawangapa uiaspasi kangichi. Nuka chasa uiaspaka, masmi alli iuiachii tukuwagsamurka.

⁸ Nuka chi kartawa kamkunata llakichispapas, kunauraka ñi ima llakii mana iuiachiwanchu. Ñugpata chi kartawa sug ratulla kamkunata llakichiskata iachaspaka, nukapas llakiiwami karkani. ⁹ Ikuti kunauraka, alli iuiachiiwami kani. Kamkunata llakichiskamandaka, mana; kamkuna llakichii tukuspaka, Taita Diuswa ikuti tukugsamugkunamandami iapa kuntintulla kani. Taita Diuspa ñawipi kikin imasa munakuskasinasi llakirigsamurkangichi. Chasaka nukanchi, ñi imapipas mana kamkunata wagllichigsina rurarkanchichu. ¹⁰ Taita Dius imasa munaskasina kachamuska llakii iukagka, Taita Diuswami tukugsamú; chasaka, diltudupa wañuita kispiringapa. Chasa llakii iukaspaka, kipama mana ñi imapipas llakii iukangachu. Ikuti kai alpapi tiaskakunallawa iuiarispas llakii iukagka, mana diltudupa wañuita kispiringapa kanchu. ¹¹ Kamkuna, Taita Dius imasa munakuskasina chi llakiita iukaskamandaka, kunaura kawaichi imasa iapa alli tukugsamugta. Allillami iuiarirkangichi. Chi jiru ruraita micharig iuiaiwami tukugsamurkangichi. Allillami chi jiru ruragta piñarkangichi. Chi jiru ruraimanda allipami mancharirkangichi. Nispaka, munanakurkangichimi kawawangapa. Michawangapa iuiaipasmi iukarkangichi. Chi jiru ruragta allillami justisiarkangichi. Tukui chasa ruraskakunawami kawachirirkangichi mana pandariska kagtakuna.

¹² Nuka, chi kartata kamkunapagma kachaspaka, chi jiru ruragmanda ñi chi jiru rurai tukugmanda iuiarispalla mana kacharkaikichitachu. Kamkuna Diuspa ñawipi nukanchimanda iapa llakii iukagkunata kawachingapami chi kartata kacharkaikichita. ¹³ Kamkuna chasa allilla ruraskamandami nukanchi, uiaspa, iapa alli iuiachiiwa kanchi.

Kasapas. Tito iapa alli iuiachiwiwa chaiagsamuskata kawaspami nukanchita askurinti alli iuiachiwiwa kuntintarigsamurkanchi. Tukui kamkuna, paipa iuiaita sumaglla musuia-chigsinami ruragsamurkangichi. ¹⁴ Tito manara rigpitami nuka kamkunamanda: “Alli runakunami kankuna” paita willarkani. Pai kikinmi kawagrirka nuka imasa willaskasina sutipa kagta. Imasami nukanchi tukui ima kamkunata willaskakuna sutipa ka: chasallatami kamkunamanda Titota allilla willarkanchi. ¹⁵ Tukui kamkuna, suma mancharispa chugchurispa, pai Tito ima willaskata uiaspa, sumami rurarkangichi. Chasa iuiarisipami kamkunata iapa kuiá. ¹⁶ Kamkuna tukui ima uiaskata allilla ruranakugta iachaspami kamkunawa iapa alli kuntintulla iuiachiwá.

8

Alli iuiaiwa karai iukaskakunamanda

¹ Munanakunchimi, kam taita i mamakunata kasa willangapa: Taita Diuska, Cristowa tukuskakuna Masedonia alpapi kaugsanakuskatami kawachirigsamurka iapa suma kuiagta. ² Paikunata iapa llakiiikuna chaiagpipas, mana iapa iuiarisipalla, alli iuiachiullawami kankuna. Ñi ima mana iukaspapas, iukagsinami kulki karankuna, mana llakispalla. ³ Nuka kikin, chasa kawaspami willaikichita: paikuna, karai pudiskamanda masmi karankuna, ñi pipas manara nigpi. ⁴ Sinchimi nukanchita mañarkakuna, kasa nispa: “Kai karaskata chaskiichi; chika, Taita Diuspalla kagkunata aidaringapa”. ⁵ Nukanchi iuianakuskamandapas masmi kararkakuna. Ñugpami Taita Dios imasa munakuskasina Iaia Jesusta iukachirirkakuna. Mas nispaka, nukanchitapas kulkimi kararkakuna. ⁶ Chimandami Titota mañarkanchi, kamkunapagma ringapa; chasaka kamkuna, sumaglla kuiaiwa karangapa kaskakunata pai ikuti kallarisa, tandachii puchukangapa. ⁷ Kamkuna, Cristowa iapa suma iuiarispa, tukuipi suma rimaspa, tukui suma iachaspa, tukui suma ruraikunata ruraspa, nukanchita suma kuiaspami allilla ruranakugta kawachiringichi. Tukuipi allilla ruranakugta kawachiringapaka, kunaoramanda iukangichimi, chi mana imapas iukagkunata sumaglla kuiaspa, achka imapas paikunamanda karangakuna.

⁸ Chasa nispaka, mana niikichitachu: “Nuka ima nikuskata chasa ruraichi”. Sugkuna suma iuiaiwa karaskakunata kamkuna iachangapami chasa niikichita; chasa iachaspaka, kamkunapas, chasallata karaspa, tukui suma alli iuiaiwa kuianakuskata kawachiringapa. ⁹ Nukanchi Iaia Jesucristo imasa suma kuiai iukaskata ñami allilla iachangichi. Paika, iapa iukag kaspapas, kamkunata iapa kuiaspami mana imapas iukagsina tukugsamurka. Pai chasa tukugsamuskamandaka, kamkunaka, Diospa ñawipi mana ñi ima iukaspapas, iapa iukagsinami tukurkangichi.

¹⁰ Kamkuna ministiskakunamanda kulki tandachingapa kallariska, ña sug watami tukurka. Kallariilla mana kallarirkangichichu. Iapa munaspami kallarirkangichi. Chimanda, kamkuna allilla kangapami kasa iuiachiikichita: ¹¹ kunaura kamkuna kallariskata puchukapuaichi. Chiwanka, imasami iapa munaspa suma iuiaiwa kallarirkangichi: chasallatami suma iuiaiwa iukangichi, imasa pudiriskasina puchukangakuna. ¹² Mairkanpas alli iuiaiwa karangapa munaskataka, Taita Dios sumagllami kawá, achka u mana achka karagpipas. Taita Dios mana mañanchu, ima mana iukaskata karangapa.

¹³ Mana niikichitachu, kamkuna ima karaskawa sugkuna sumaglla kaugsangapa, nispa kam kinkinunaka pisi llakiiwa pasanakungapa. ¹⁴ Tukuikuna iwalla pasangapami chasa niikichita. Kunaurami kamkuna iukangichi; ima iukaskawaka, sugkunata ima ministiskakunata aidangapa. Chasallata suura, kamkuna ministikuura, paikuna iukaskatami karangakuna. Chasaka, kamkuna paikunawa imapipas iwalllami pasankangichi. ¹⁵ Chasallatami ñugpamanda librupi willaraiá, kasa nispa:

Achka tandachigtaka
mana puchupurkachu.

Ñi asllita tandachigkunatapas
mana pisipurkachu.

Titota i sugkunatapas kachakuskamanda

¹⁶ Imasami nuka, kamkunamanda suma iuiaiwa kani: chasallatami Taita Dios, Titotapas iuiachirka. Chimandami Taita Diusta: “Pai Siñur” nini. ¹⁷ Nuka Titota kamkunapagma ringapa mañauraka, Arimi ainiwarka. Kamkunata kawagringapa iuiaiwa kaspami pai kikinpa munaiwa kamkunapagma ringapa ka.

¹⁸ Sug waugkitapasmi Titowa kachanakunchi, kamkunapagma ringapa. Chi waugki Alli Willaita willaspa purigmandaka, Cristowa tukui tukuskakuna sugnigta kaugsanakuskapasmi ninkuna: “Alli runami ka”. ¹⁹ Kasapas. Tukui Cristowa tukuskakuna, paitami agllarkakuna, nukanchiwa rispa, paikunapa sumaglla kuiaiwa kulki karaskakunata apaspa, ministiskakunata karagringapa. Chi karaskata chaskigkunaka, atun Taita Diusta:

“Tapa suma atunmi kang” ningapa i nukanchi suma iuiiwa karaskata kawachingapami chasa karagringapa kanchi. ²⁰ Chi waugki, nukanchiwa richu, chi achka kulki tandachiskakunata ministiskakunata karagringapa: chasapika iuianchimi: ñi pipas mana sug rigchakuna iuiangapa pudingakunachu. ²¹ Munanakunchimi, Iaia Jesuspa ñawipi i runakunapa ñawipipas allilla ruranakugta kawachingapa.

²² Paikunawa sug waugkitapami kachanakunchi, kamkunapagma ringapa. Paitaka sug rigcha sug rigchapimi kawarkanchi, tukuipi allilla rurag kagta. Kunaura paika, kamkunata iapa alli iuiiwa kaspas, masmi suma munaku, allilla ruraspa kamkunawa kagringapa. ²³ Titomanda pipas tapugpikunaka, paimanda ainingichi: “Nukawa purigmi ka; kamkunamanda nukawa sugllapi allilla ruragmi ka”. Chi sug waugkikunamandaka pipas tapugpikunaka, paikunamandaka ainingichi: “Paikunapas, Cristowa tukuskakuna sugnigta kaugsanakuskatami kachamuska kankuna. Paikunapa suma kaugsaiwami Cristota suma atuniachigsina ruranakuna”. ²⁴ Paikunata kawachipuaichi, kamkuna sutipa kuiaspa kagtakuna; chasaka, Cristowa tukuskakuna sugnigta kaugsanakugapas iachangapa. Kasapas paikunata kawachipuaichi, nukanchi mana ianga kamkunamanda alli iuiiachiiwa kagtakuna.

9

Taita Diuspalla kagkunamanda tandachinakuska kulkimanda

¹ Taita Diuspalla kagkunamanda tandachinakuska kulkimanda mana chaiawakunchu, kamkunata ñi imapas willangapa. ² Kamkuna chasa tandachingapa munanakugta ñami iachani. Kai Masedonia alpapi Cristowa tukuskakunata, kamkunamanda alli iuiiachiiwa kaspas, ninimi: “Akai alpapi kaugsanakug sumaglla iuiiwa aidangapa niska, ña sug watami tukurka”. Kamkuna chasa suma iuiiwa kagkunata uiaspaka, achkakunami animurirkakuna, paikunapas karangapa. ³ Chasa kagpipas, chi waugkikunata kamkunapagmami kachakuni; chasaka, nukanchi kamkunamanda sugkunata willaska mana llullasina kangapa. Chiwanka kamkuna, karangapa iuiailawa suianakungichi. ⁴ Masedoniamanda maikankuna, nukawa rispa, kawagrichukuna kamkuna manara tandachispa suianakugta: chasa kawaspaka, nukanchika, kamkunamanda allilla iuiiwa kaspapas, pingaipami pasantranchi. Chasawaka kamkunaka, masmi pingaipa pasantrangichi. ⁵ Chimandami iuiarirani: “Chaiawakumi, chi waugkikunata mañangapa”; paikuna, ñugpa kamkunapagma rispa, kamkunata iuiachigrichukuna; chasaka, kamkuna ima karangapa niskata ña tandachiska kangapa. Mana munanchichu, nukanchi mañanakuskamanda kamkuna karachukuna. Kam kikinkunapa suma iuiailawa karangapami munanakunchi.

⁶ Kasa iuiariichi: asllita tarpug, asllitami pallá. Ikuti achka tarpugka, achkami pallá. ⁷ Tukuikuna iukangichimi, kam kikinkunapa iuiiwa imasa karangapa niskasina karangakuna. Mana karangichi llakispa u mañanakugmandalla. Alli iuiarispa kuntintulla karagtami Taita Dius kuiá. ⁸ Taita Diuska pudinmi, kamkunata ima ministiska ialigtapas karamunga. Chasaka, kamkuna iukaskawa pudingichimi, imaurapas sugkunata imapipas aidanga. ⁹ Chasallatami ñugpamanda librupi willaraiá, kasa nispa:

Mana imapas iukagkunata

ialigtami achka kará.

Pai allilla ruraskakunaka,

ñi imaurapas mana tukuringapa kanchu.

¹⁰ Taita Dius tarpungapa simillata i mikungapa mikuika karag, paillatami kamkunatapas tukui karangapa ka. Chi karaskakunaka, wiñachigsinami tukugsamungapa ka. Chasaka, kamkuna tarpugsina sugkunata karaskakunaka mas nispaka achka sumaglla pallangapasinami tukugsamungapa ka. ¹¹ Chasapika kamkuna, tukuipi iapa iukagsinami tukugsamunkangichi; chiwanka, sugkunata allilla iuiiwa karangapa. Chi kulki kamkuna tandachinakuskata nukanchi karagriuraka, chita chaskigkuna Taita Diusta: Pai Siñurmi ningapa kankuna. ¹² Chi kulki Taita Diuspalla kagkunata karaspaka, paikuna mana imapas iukagmandalla mana karangapa kanchichu. Paikunataka iuiiachingapami kanchi, Taita Diusta ikuti ikuti: “Pai Siñur” ningapakuna. ¹³ Kamkuna karaskata kawaspami iachangapa kankuna, Cristomanda Alli Willaita kamkuna iachaspa, allilla ruraspa kagtakuna. Chimandami paikuna, Taita Diusta ningapa kankuna: “Kam, iapa suma atunmi kang”. Kamkuna allilla iuiiwa paikunata i tukuikunata karaskamandapasmii paita iapa suma atun kagta ningapa kankuna. ¹⁴ Chasallatami kamkunamanda Taita Diusta mañangapa kankuna, kasa nispa: “Sumaglla kawapuachukunata”. Taita Dius kamkunata askurinti suma kuiiwa kawaskamandami paikunapas kamkunata kuiangapa kankuna. ¹⁵ Mana ima rimaiwapas parlai pudingasinawa nukanchita kispichingapa kachamuska-manda, Taita Diusta nisunchi: “Pai Siñur”.

10

San Pablota juchachinakuskata, pai ainiskamanda

¹ Cristo tukuikunata llakispa kawaspa, mana atuniachirispalla kagmandami nuka Pablo kikin kasa mañaikichita. Kamkunapura sugkunaka, nukamandasi ninkuna: nuka kamkunawa kagriura, manchaspallasi rimaikichita. Ikuti kamkunapagmanta karupi kauraka, askurinti sinchi piñaspasi iskribiikichita. ² Nukamanda chasa nigpikunapas, mañaikichitami: nuka ikuti kamkunapagpi chaiagriuraka, jujalallapas chaiawachu, chasa rimanakugta sinchi piñagringapa! Paikuna, nukanchimanda kai alpapi tiaskakunallawa iuianakugtami juchachinakú. Allichiriskami kani, chasa juchachiwanakuskata sinchi ainingapa.

³ Nukanchi, kai alpapi kaugsanakuspapas, mana kai alpamanda runakunasina makanakuspa kaugsanchichu. ⁴ Chasallata, kai alpamanda wañuchinakudirú mana iukanichichu. Taita Dios kikin karamuska pudig binsidirusinami iukanichi. Chikunawaka, iaia kuku arkaska patakunata urmachigsinami rurangapa pudinchi. ⁵ Chasallata, tukui atun tukuspa Taita Diusta rigsigsamungapa arkaska iuiaikunatami anchuchingapa pudinchi. Tukui nukanchipa mana alli iuiaita arkaskasinami charingapa pudinchi; chasaka, Cristo imasa niskallata rurangapa. ⁶ Tukui paita mana uiaskakunata justisiangapa allichiriskami kanchi, pai tukui ima niskata kamkuna allilla ruraspá tukugsamuura.

⁷ Kamkunapa ñawiwa kawaspallami imapas iuiaringichi, allilla u mana allilla kagta. Maikanpas Cristopa kagta iuiarigpika, kasapas iuiarichu: imasami paikuna, Cristopa kankuna: chasallatami nukanchipas kanchi. ⁸ Iaia Jesús kikin nukanchita kachamuskata nuka atun tukuspa sinchi rimakuspapas, nukata chimanda mana manchariwanachu. Mana kamkunapa iuiaita wagllichingapa nukanchita kachamurkachu. Kamkunata alli suma iuiái iuiachingapami kachamurka. ⁹ Mana iuiangichi, kamkunata manchachingapa nuka kartakuna kachaska kagta. ¹⁰ Nukapa kartakunamanda kasasi ninkuna: “Paika, ajai sinchimi kartapi rimá. Ikuti pai kikin kaipi kauraka, wañungasinami rimá. Pai rimaskapas, pipas ninkunami: “Asichingasinallami rimá.” ¹¹ Chasa nigkuna iachachukuna: imasami nukanchi, karupi kaspa, kartakunapi rimaspá kanchi: chasallatami, kamkunawa kaspa, ima ruraikunapas ruraspá kangapa kanchi.

¹² Chi runakuna iuiarinkuna: “Nuka, mas atunmi kani”. Nukanchika mana munanchichu, paikunasina tukungapa. Paikuna kikinpurami tapurinakú: “¿Pisik mas iacha kanchi?”; chikunaka, mana iuiaiiugkunami kankuna. ¹³ Nukanchika, atun iacha kagta nirispapas, mana ialigta atun tukungapa munanchichu. Taita Diosmi nukanchita iuiachiku, maikama Alli Willaita willaspá puringapa. Paillatami nukanchita kacharka, kamkunapagma chaiagringapa. ¹⁴ Chimandami, kamkunata kai kartakunapi iuiachispa, mana ialigta iskribinchi. Nukanchi manara kamkunapagma chaiagriska kagpika, sug rigchachar kantra. Nukanchi, tukuikunamanda ñugpami kamkunapagma chaiagriska kanchi, Cristomanda Alli Willaita willangapa. ¹⁵ Mana iskribinichichu, sugkuna Cristomanda ruraskakunawa atun tukuspa. Chasa iskribigpika, iapa ialigtami niraiantra. Kasapasmi nukanchi munanakunchi: kamkuna Cristowa mas suma kuianakuspa iuiarigsamugpikunaka, Taita Dios imasa munakuskasina nukanchi kamkunapura Alli Willaita mas willaspá mirangapakuna. ¹⁶ Chiwanka, kamkunapa alpamanda mas karupi kaugsanakuskatapas chi Alli Willaita willagringapa, sugkuna ñugpa willai kallariskakunawa mana atun tukuspalla.

¹⁷ Maikanpas kikinmandalla iuiarispa nirichu: “Nuka, mas atunmi kani”: chasaka, mana. “Atun Taita Diosmandallami atun kagsina kani” iuiarichu. ¹⁸ Maikanpas, kikinlla nirichu: “Nukami atun kani”: paitaka atun Taita Dios mana ninchu chasa kagta. Maikanta Taita Dios atun kagta niskatami atun niraiá.

11

Atuniachirispá llullaspá iachachigkunata ainiskamanda

¹ ¡Amalai nuka sug mana bali upasina rimakuskata uiawai pudinrangichi! Imasa rimakugpipas, uiawaichi. ² Taita Dios imasami munaku, kamkuna paipalla kangapa, mana pimandapas tukuspalla: chasallatami nukapas munakuni. Kamkunata Cristowa kasarangapa animuchigsinami rurarkani, manara kari rigsiska sipassina paita kawachingapa iuiarispa. ³ Chasa ruraspapas, nuka kasami manchaspá iuiarini: imasami iaia kuku kulibra, paipa iapa jiru iuiaiwa Evata llullaspá pandachirka: jujalallapas kamkuna chasallata sakirinrangichi, imapipas pandachii tukungapa! Chasa pandarigpikunaka, kantrami tukui kuiaspa iuiaiwa Cristomandalla kaugsanakuspa, paita kungaringapakuna. ⁴ Nukanchi kamkunata Jesusmanda ñugpa willagriskauramanda, maikan kati chaiagrispa, Jesusmanda sug rigcha willaskatami suma uiaspa kangichi. Santu Ispirituta

allilla chaskiska kaspapas, katima rimaskata uiaspa, sug rigcha ispiritutami sumaglla chaskingichi. Chasallata, sutipa Alli Willaita uiaspapas, mas nispaka sug rigcha willanakuskatapasmi sumaglla uianakungichi. ⁵ Chi Cristo kikin kachamuwaska kagta nirispa atun iachachigkunaka, ¿nukamanda mas iachachu kankuna? Chita iuianiami, mana chasa kagta. ⁶ Panda panda nuka rimaskata allillami iachani ima rimakugta. Imapipas, nukanchi imasa ruraskunawami kamkunata kawachirkanchi chasa allilla iachagta.

⁷ Kasapas. Nuka, Taita Dius karamuska Alli Willaitami willarkaikichita, mana imapas kamkunata mañaspalla. Kamkunata aidangapami, nuka kamkunawa sugllapi tukuura, ima rurai tiaskata ruraspaka karkani. Chiwanka, ¿pandarirkanchi? ⁸ Cristowa tukuskakuna sugnigta kaugsanakuskatami kulki chaskirkani, kamkunapagpi Alli Willaita willagringapa. Chasaka, kamkunamanda paikunata kulki kichugsinami rurarkani. ⁹ Kamkunawa kaura, nukata ima ministiska ñi pitapas mana mañarkanichu. Masedonia alpamanda waugkikuna, chaiagrispami nukata ima ministiska karawagrirkakuna. Chimandami kamkunata mana mañaspapa imapas llakichirkaikichita. Chasallatami mana mañaspapa imapas llakichingapa kaikichita. ¹⁰ Cristomanda sutipa Alli Willaita nuka iachaspami kasa niikichita: tukui Akaia alpapi ñi imapas mana mañarkanichu. Chasamanda nuka alli iuiachiwa kaskata, ñi pipas mana kichuwangapa kanchu. ¹¹ ¿Imapatak chasa rimarini? ¿Kamkunata mana kuaspachu chasa rimarini? Taita Diusmi allilla iachá, nuka sutipa kamkunata kuiagta.

¹² Nuka rurakuskaka mana sakispallami imapas mana mañaspalla rurakungapa kani. Chasaka, chi kulki mañaspapa iachachigkunaka mana imaurapas pudingakunachu, nukanchisina alli iuiachiwa kangapakuna. ¹³ Chi kulki mañaspapa iachachigkunaka, Cristo kikin mana kachamuska kankunachu. Llullaspapa iachachigkunami kankuna. Cristo kachamuskasina tukuspami llullaspapa purinakú. ¹⁴ Chasa iachachispa purinakugmandaka mana ujnaringasina kanchu. Kikin iaia kukumi alli anjilsina punchaiachiska kawarí. ¹⁵ Chasallatami kawarí: chi iaia kuku ima niskata ruragkunapas tukuipi alli iachachinakugsina tukugpikunaka, mana ujnaringasina kanchu. Chasa kagpipas, imasa jiru ruraskakunawami diltudupa puchukaringapa kankuna.

San Pablo imasa Iaia Jesusmanda iapa llakii iukaskamanda

¹⁶ Ikuti kasami niikichita: mana pipas iuiachukuna, nuka upasina kagta. Chasa iuiagpikunapas, nuka sug mailla atun tukuspa, upasina rimangapa kaskata uiawaiichi. ¹⁷ Chasa rimaspaka, Iaia Jesús munaskasina mana rimangapa kaikichitachu. Upasinami rimangapa kani, atun tukuspalla. ¹⁸ Achkakuna, kai alpapi imasa kaskamanda iuiarispa, atun tukuspami kankuna; chasallatami nukapas, atun tukungapa kani. ¹⁹ Kamkunaka, allilla iachagkunasina kaspapa, chi upa iuiaiugkunatapas suma kuntintullami uiangichi. ²⁰ Maikanpas imasa munaskasina kamkunata trabajachigpipas, kamkunapata kichugpipas, kamkunata llullachigpipas, atun tukuspa unzagpipas, ñawipi wagtagpipas, kamkunaka ñi imapas mana ainingichichu. ²¹ Ikuti nukanchitaka manchaimi apirka, chasa kamkunata rurangapa. Chasaka manchaspallami niikichita.

Chasa kagpipas, imasami sugkuna, kai alpapi kaskamanda iuiarispa, atun tukunkuna: chasallatami nukapas, upasina rimaspapa, atun tukuni. ²² Paikuna hebreo runa kagpikunaka, nukapas chasallatami kani. Paikuna Israelmanda kagpikunaka, nukapas chasallatami kani. Paikuna ñugpamanda achala taita Abrahamapa kagpikunaka, nukapas chasallatami kani. ²³ Paikuna Cristo ima niskata rurag kagpikunaka, upasina rimaspapa niikichitami: nukaka, paikunamanda masmi kani. Paikunamanda mas sinchi ruragmi kani. Paikunamanda mas achka biajimi karsilpi wichkaraiaska kani. Paikunamanda mas achka biajimi asutii tukuska kani. Achka biajimi wañui kispiska kani. ²⁴ Pichka biajimi judiukuna kimsa chungwa iskunkama asutiwarkakuna. ²⁵ Kimsa biajimi kaspi chagllawa asutiwarkakuna. Sug biajimi rumikunawa piawarkakuna. Nuka rikuska barkuka, kimsa biajimi iaku ukuma jundarirka. Sug biaji sug tuta i punchami lamar iakupi waitakurkani, wañungwa kispigta. ²⁶ Achka biaji ñambikunapi, iaku jundaska wañui kispiska, sisaikuna wañuchiwangapa kispiska, judiukuna i mana judiu kagkuna wañuchiwangapa kispiskami kani. Puiblukunapi i chusa sitaska alpapunapi wañuchiwangapa kispiska, lamar iakupi wañui kispiska, llullaspapa waugkikunasina wañuchiwangapa kispiskami kani. ²⁷ Nuka kikinpa makiwa saikugtami ima trabajkunapas rurarkani. Achka biajimi mana puñuspalla pakarirkani. Iarkaiwa i iakunaiwami karkani. Achka biajimi mana mikui mikurkani, Taita Diusta iuiarispa. Mana katangawa kaspapa, chiriwami karkani.

²⁸ Imasami nirkaikichita: tukui chikunawa i sug imakuna pasariwaskawa iuiarispa, tukui punchakunami Cristowa tukui tukuskakunamanda maipi kaugsanakuskamanda llakiiwa chisiakuni. ²⁹ Maikan Jesuswapa kaspapa paita katingapa sambaiagpika, ¿manachu

nukatapas sambaiawantra? Chasallata, pipas maikanta pandachigpika, ¿manachu nukata iapa llakiriwantra?

³⁰ Imapipas nuka atun tukungapa chaiawagpika, nuka kikinpa iuiwaiwa ñi ima mana rurai pudigsina kaskawami atun tukuska kagsina iuiasa. ³¹ Nuka mana llullaspalla willaskata, Iaia Jesuspa Taita Diusmi iachá. Paita imaurapas nisunchi: “Kam, iapa suma atunmi kangi”. ³² Damasko puiblupi nuka kagriuraka, atun mandag Aretas iukarka sug mandag; chi mandagka apiwangapami munakurka. Chimanda, chi puiblumanda tukui llugsiduru pungkunata chapangapami churarka, nuka mana llugsii pudingapa. ³³ Nigpika, nukata sug atun saparupi churawaspa, puibluta muiuchiraiaska atun pata kincha awanigmanda alpamami uraikuchiwarkakuna. Chasapimi paipa makimanda kispirirkani.

12

Iaia Jesús, ima muskui ukupisina San Pablota kawachiskamanda

¹ Nuka kikinlla atun tukuspa iuariskawaka ñi ima allilla mana surkunichu. Chasa kagpipas, Iaia Jesús ima muskui ukupisina kawachiwaskamanda i ima kawariwaskamandami iukani rimanga. ² Cristowa tukuska kag runatami rigsini.* Chi runaka, kimsa awa ialiska sug luarmani apai tukurka. Chasa pasariskaka, chungacha chusku watami ka. ¿Kuirpundiwachu u ispiritullawachu chi runa chasa apai tukurka? Chita mana iachanichu. Taita Diusllami iachá. ³ Chi runataka, ¿kuirpundiwachu u ispiritullawachu chasa apai tukurka? Chita mana iachanichu. Taita Diusllami iachá. ⁴ Chi runaka, paraiso suti suma luarmani apai tukurka. Chitaka allillami iachani. Chipika, pipas mana iachaska, pipas mana rimangapa lisinsiaska rimaikunatami uiarka.

⁵ Nukata chasa pasariwaskamandami atun tukuni.† Ikuti nuka kikinmandaka mana atun tukunichu. Nuka kikinpa iuiwaiwa ñi ima mana rurai pudigsina kaskawami atun tukuni. ⁶ Nuka atuniachiringapa munaspa, manachar upasina kantrani. Nuka, mana ñi imapi llullanichu. Chasa kagpipas, nuka kinkina mana atuniachirinichu. Chasaka maikanpas, nuka ruraskata kawawaspa, nuka rimaskata uiawaspa, mana iuiangachu, nuka imasa kagmanda mas atun kagta.

⁷ Nuka muskui ukupisina iapa suma luarmanda kawariskakunata kawaskamandami iaia kuku churawarka, nukapa kuirpupi tugsispa iapa nanai iukangapa. Chasa lisinsiaimi tiarka, nuka mana iapa atuniachiriska iuiwaiwa kangapa. ⁸ Kimsa biajimi Iaia Jesusta nuka mañarkani:

—Kai nanaita anchuchiwai.

⁹ Paika ainiwarka:

—Kamta, nuka achka kuiaimi iukaiki. Chillami chaiá. Maikanpas sambaiaspa mana pudigsina kaskapimi nukapa iapa iachaita mas allilla kawachini.

Chasamandami nuka, sambaiaspa mana pudigsina kaspapas, alli iuiachiiwa kani; chasaka Cristopa iapa iachai, nukawa kawachii tiangapa. ¹⁰ Chimanda nuka, sambaiaspa mana pudigsina u iapa ministiska u llakiiwa kaspapas, u kamiwanakugpipas u jiru rurawangapa munawanakugpipas; Cristomanda imapas kagpika, alli iuiachiiwami kani. Nuka sambaiaspa mana pudigsina kaura, Cristowami tukui pudig kani.

Korintopi kausgag Cristowa tukuskakunamanda, San Pablo llakikuskamanda

¹¹ Upasinami nuka kikinmanda rimarkani. Kamkunami iukarkangichi nukamanda ningakuna: “Pai, alli runami ka”. Chasa kamkuna nigpikunaka, nuka manami upasina rimani. Nuka iangasinalla kagpipas, chi “Cristo kikin kachamuwaskami kani” nirispa atun iachachigkuna, paikunaka ñi imapipas nukamanda mas atun mana kankunachu. ¹² Nuka kamkunawa kauraka, mana pipas kawaskasinakunawa, ujnaringasinakunawa i mana pipas pudiskasinakunawami, Cristo kikin kachamuwaska kagta mana sambaiaspalla kawachirirkani. ¹³ Imasami Cristowa tukuskakuna sugnigta kausganakuskawa karkani: ¿manachu kamkunawapas chasallata karkani? Chasallata ima kagpipas, kamkunata ñi imapas mana mañaspa llakichirkaikichitachu. Chasa mana mañaskamandaka, pasinsia-waichi.

¹⁴ Uiawaichi. Ña allichiriskami kani, kimsama kamkunata kawagringapa. Kai biajipas, mana imapas mañaspa llakichingapa kaikichitachu. Kamkunapataka ñi ima mana munarikunichu. Kam kikinunatami munanakuikichita. Uchulla wambrakunata mana chaiakunchu, taitamanda i mamamanda kulki tandachingapa. Taitata i mamatami chaiaku, wambrakunamanda tandachingapa. Chasallatami mana kamkunata chaiaku, nukamanda kulki tandachingapa. Nukatami chaiawaku, tukui ima kawangapa. ¹⁵ Nuka tukui ima iukaskatami alli iuiachiiwa kamkunamanda tukuchisa; nuka kikinpas

* 12:2 Chi runa, kikin San Pablomi niraiá. † 12:5 griego rimaiwa: Chi runamandami atun tukuni.

puchukarigsinapasmi tukusa; chasaka, kamkunapa alma allilla kispiringapa. Nuka chasa kamkunamanda iuiarispa kuiaspa ruragpipas, rigchawanmi, kamkunaka nukata mana munawagkunasina.

¹⁶ Kamkunata ñi imapas nuka mana mañaska kagpipas, sugkunaka, chasa iachaspa, ninakumi: “Pai, iachag tukuspami kamkunata llullachispa krichirka”. ¹⁷ ¿Maikanta kamkunapagma kachaspachu, kamkunata llullachispa, imapas kichurkaikichita? Manima. ¹⁸ Titota kamkunapagma ringapa mañaspa, kai sug waugkiwanta kacharkani; ¿Titochu, kamkunata llullachispa, imapas sisarka? ¿Manachu nukanchi iskandi, suglla iuiaiwa suma allilla ruraspa purirkanchi?

¹⁹ Kamkuna iuianakungichichar, kamkunapa ñawipi nukanchi allilla kangapa chasa rimanakugta. Chasa mana kanchu. Taita Diospa ñawipi Cristopa kaspami chasa allilla rimanakunchi. Nukapa kuiaskakuna, kamkunata alli suma iuiai iuiachingapami tukui chasa rimanakunchi. ²⁰ Kasapasmi llakiwaku: nuka kamkunapagma chaiagriura, nuka imasa munaskasina mana kamkunata tariringapa. Chiura, nuka kamkunata piñagpika, kamkuna imasa munawaskasina chasallata mana kawawangapa kangichichu. Kamkunata kasa tariringapami llakiwaku: kampa piñachirinakuspa, jiru iuiaiwa kawanakuspa, rabiachirinakuspa, parijuma minusarinakuspa, juchachinakuspa, wasa rimanakuspa, atun tukuspa, killachinakuspa kagpikuna. ²¹ Chasa kagpika, nuka kimsama kamkunapagma chaiagriuraka, iapami llakiriwangapa ka. Nukapa Taita Diospa ñawipi kamkunamanda pingaipami pasangapa kani. Kamkunapura achkakuna, ñugpamandata jiru ruraspa, kari warmiwa pandarispa, chasallata ima jiru iuiai munaikunata ruraspa kaugsanakugmanda; chimandaka, Taita Dioswa mana tigrangapa iuianakuskamanda wakangapachar chaiawangapa.

13

Korintopi kaugsanakuskata ikuti iuiachiskamanda

¹ Ña kimsamami kamkunata kawagringapa kaikichita. Nuka chaiagriura, “Maikan pandariska ninakugpika, iskai u kimsa kawagkunami willangakuna chasaka sutipa kagta. Chasaka, allillami kanga”. ² Imasami nuka, iskai bijajima kamkunawa kagriura nirkaikichita: chasallata kunaura, mana chipi kaspapas, ñugpata jiru ruraspa kaugsanakuskata i tukui kamkunata kasami ikuti niikichita: chasa kaugsanakugpika, nuka, kamkunapagma chaiagriura, mana llakispallami piñagringapa kaikichita. ³ Chasawami kamkuna imasa iuianakuskasina kawawankangichi, nuka, Cristowa kaspera, kamkunata chasa rimakugta. Cristo kikinka, kamkunawa mana kanchu mana pudigsina. Kamkunapa chaugpipi tukui pudigmi ka. ⁴ Paika, sambaiaspa mana pudigsina kruspi wañuchii tukuspapas, Taita Diospa iapa iachaiwami tukui pudig kaugsaku. Nukanchipas chasallata Cristowa sambaiaspa mana pudigsinami kanchi. Chasa kaspapas, Taita Diospa iapa iachaiwami Cristowa tukui pudig kaugsanakunchi; chasaka, kamkunamanda tukuipi allilla tukungapa.

⁵ Tukuikuna allilla iuiaripuaichi, ari u mana Cristowa suma iuiarinakugta. Iuiaripuaichi, imasa allilla u mana allilla kagtakuna. ¿Manachu iuiaringichi, Jesucristo kamkunawa kagta? Paiwa mana kaspami kamkuna mana suma iuiariwa kangichi. ⁶ Kasami munani: nukanchi allilla iachachig kagtakuna, kamkuna iachangapa. ⁷ Taita Diusta mañapuikichitami, kamkuna ñi ima jiru mana ruraspalla kaugsanakungapa. Nuka mana mañapuikichitachu; chiwanka, nukanchi allilla iachachig kagtakuna kawaringapa. Kamkuna allilla ruraspa kaugsanakungapagllami mañapuikichita, nukanchi ianga iachachig kawarigsina kaspapas. ⁸ Nukanchi mana pudinchichu ningapa, sutipa Alli Willai, mana alli kagta. Iukanchimi, Alli Willaita iachaspaka, sutipa kagta rimangakuna. ⁹ Chimanda, nukanchi sambaiaspa mana imapas pudigsina kagpi, ikuti kamkunaka tukui pudig kagpikuna, chasa iachaspa, nukanchita iapa allimi iuiachi. Kasapasmi kamkunamanda mañanchi: kamkuna tukuipi iapa alli tukungapakuna. ¹⁰ Nuka manara kamkunawa kagripami chasa ninakuikichita. Chiwanka, nuka kamkunapagma chaiagriura, mana chaiawangachu, kamkunata sinchi piñagringapa. Iaia Jesuska mana kachamuwarkachu puchukangapa. Alli suma iuiai kamkunata iuiachingapami kachamuwarka.

Kaiakama, niskamanda

¹¹ Kunaura, taitakuna i mamakuna, alli iuiachiwa kuntintaripuaichi. Tukuipi alli ruraspa kaugsapuaichi. Kam kikipura sumaglla iuiachirinakuspa kapuaichi. Suglla kagsina iuiarispa, sumaglla kaugsapuaichi. Taita Dios, kamkunata iapa kuiag i sumaglla kaugsaita karagmi kamkunawa kangapa ka. ¹² Kam kikipura Taita Dioswa iuiarispa, muchanakuspa, “Puangi” ninakuichi. ¹³ Taita Diosmandalla tukui kaipi sumaglla kaugsakuna, kamkunata: Puangimi ninaku.

¹⁴ Iaia Jesucristo, kamkunata sumaglla kawapuachu. Taita Dius, suma kuiaspa charipuachu. Santu Ispíritu, tukuikunawa sugllapi kaugsapuachu.

GALASIA ALPAPI CRISTOWA TUKUSKAKUNATA SAN PABLO KARTA KACHASKAMANDA

¹ Jesucristo kachamuskami nuka kani, Alli Willaita willaspa puringapa. Nukataka, mana runakuna agllawarkakunachu. Jesucristo i Taita Dios, pai wañuskata kaugsachigmi agllawarka. ² Tukui waugkindikunawa kaipi kaspá, kamkuna Galasia alpapi tukui Cristowa tukuskakunatami kai karta kachaikichita. ³ Nukanchipa Taita Dios i Iaiá Jesucristo, kamkunata kuiaspa, suma iuiáiwa kawapuachu. ⁴ Jesucristo, nukanchipa pandariikunamandami sakirirka, wañuchii tukungapa; chasaka, nukanchita kai alpapi tukui jiru mana alli kaskakunamanda kispichingapa. Chasami nukanchipa Taita Dios munarka. ⁵ Pai Taita Diusta nisunchi: “Iapa suma atunmi kangi, maituku waranga waranga watakuna ialgippas”. Chasa kachu.

Cristomanda Alli Willai, suglla tiaskamanda

⁶ Cristo kamkunata iapa kuiagmandami Taita Dios kamkunata agllarka. Kamkuna chituku mana unaiilla paita kungarinakugtami ujnariwá. Munanakungichisi, sug rigcha: “Alli Willaimi ka” niskata katichingapa. ⁷ Cristomanda sug rigcha Alli Willai mana tianchu; sugllami tia. Sugkunaka, kamkunata pandachispa, “Cristomanda Alli Willaitami willanakui-kichita” nisipami kamkunata sug rigcha krichinakú.

⁸ Sutipa Alli Willaitami nukanchi kamkunata willarkanchi. Chimanda, nukanchi kikin-kuna i sug luarmanda anjil, sug rigcha willaita kamkunata willanakupika, maldisiskami niraiá. ⁹ Nugpatapas chasami rimarkaikichita. Kuna rapasmi ikuti niikichita: kamkuna, sutipa Alli Willaitami uiaspa chaskirkangichi. Chimanda, maikan sug rigcha willaita kamkunata willanakupika, maldisiskami niraiangakuna.

¹⁰ Nuka chasa rimaspa, ¿runakunawa sumaglla kangapachu munani? Manima. Taita Dioswami munani, sumaglla kangapa. ¿Runakunata alli iuiachingapagllachu munani? Chasa kagpika, manachar Cristopa lutrinsina kantrani.

San Pablo imasa Alli Willaita willaspa purii kallariskamanda

¹¹ Taitakuna i mamakuna, kasapas iachaichi. Alli Willaita nuka willani; chika mana kanchu runapa iuiái. ¹² Ñi maikan runa, mana chita willawaspa iachachiwarkachu. Kikin Jesucristomi iuiachiwaspa iachachiwarka.

¹³ Ñugpata, imasa ñugpamanda judiukuna iachachinakuskatami nuka katichikurkani. Chita, ñachar kamkuna iachangichi. Nuka, iapa rabiawa mana allilla iuiaiwami munakurkani, Taita Dioswa tukuskakunata puchukangapa. Chitapas ñachar iachangichi. ¹⁴ Judiukuna imasa Taita Diosmanta iachachiskakunata nuka iachaikuspa, achka nukapa kumpañirukunamandapas mas achka iachaikuskami karkani. Chiwanka, iapa micharispami karkani. Munakurkani, nukapa ñugpamanda taitakuna ima iachachiskakunata ñi maikan judiupas mana sakichukuna.

¹⁵ Nuka chasa kagpipas, manara tiagsamugpitami Taita Dios agllawaska karka. Paipa iapa suma kuiaiwami kaiawarka. Pai munaora, ¹⁶ paipa wambratami rigsichiwarka; chasaka, nuka mana judiu kagkunata Jesucristomanda willaspa puringapa.

Chiura nukaka, mana pipagmapas rirkanichu tapungapa: “¿Imasatak rurasá?”. ¹⁷ Ñi Jerusalemna mana rirkanichu, Cristo agllaska runakuna nukamanda mas ñugpa kaskakunawa rimanakungapa. Chasapaka, Arabia suti alpamami rirkani. Chimandaka, Damasko puiblumami kutirkani.

¹⁸ Kimsa wata ialiurami Jerusalemna rirkani, Pedrota rigsingapa. Chunga pichka punchami paiwa karkani. ¹⁹ Sugkuna Jesucristo agllaskakunataka mana kawarkanichu. Iaiá Jesuspa waugki Santiagollatami kawarkani. ²⁰ Taita Diospa ñawipi nuka mana llullaspallami chasa willanakui-kichita.

²¹ Chiuramandaka, Siria i Silisia suti alpakunamami rirkani. ²² Judea alpapi Cristowa tukuskakunaka, nukata manara rigsiwarkakunachu. ²³ Paikuna, nukamanda kasasi uiarinakurka: “Ñugpata nukanchi Cristowa iuiagkunata limpiu puchukangapa munakudur, kuna uraka Cristomanda Alli Willaitami willaspa puriku”. ²⁴ Chasa nukamanda uiarinakuspaka, Taita Diusta: “Pai Siñur” ninakurka.

2

Iaiá Jesús ñugpata agllaska runakuna, San Pablota sumaglla chaskiskamanda

¹ Chunga chusku watapika, waugki Bernabewa ikuti Jerusalemna rirkani, Tito suti waugkitapas pusaspa. ² Taita Dius chasa iuiachiwagmandami rirkani. Chipika, Jesucristowa tukuskakunapura taita niraiaskakunallawa sugllapi tandarispaka, paikunata willarkani, nuka imasa Alli Willaita mana judiu kagkunata willaspa purikugta; chasaka iachangapa: nuka ñugpamandata Cristowa iuiarispa willaska: ¿allilla u mana allillachu ka? ³ Titoka, nukawa Jerusalemna riskaka, mana judiu karkachu. Chasa kagpipas, chi taita niraiaskakunaka mana nirkakunachu: “Paita chaianmi, judiukunapa marka churangapa”. ⁴ Ikuti chillapita sug runakunaka, “Cristowami kanchi” llullaspa, nukanchimanda pakalla iaikuspa, munanakurka, Titota chi markata churachingapa. Chikunaka, nukanchita shachingapami katiraiarkakuna. Imasa Jesucristowa tukuskakunaka Moisés ima rurangapa willaskata libriagsina kaskata kawangapami katiraiarkakuna. Moisés ima iachachiskapi nukanchita ikuti wataskasina charingapami munanakurka. ⁵ Chasa munanakugpipas, ñi sug ratullapas mana sakirirkanchichu, paikunapa iuiaiwa kangapa. Munanakurkanchimi, Cristomanda Alli Willai mana llullaspalla kamkunawa kagsamuchu.

⁶ Chi taita niraiaskakuna –taita kagpipas, nukamanda mana imapas niraianchu; Taita Diuspa ñawipika, ñi pipas mana tianchu sug rigcha– chi taita niraiaskakunaka, nuka Alli Willaita willaskata ñi imapi mana iapauarkakunachu. ⁷ Chasapaka, paikuna iuiarirkakuna: imasami Taita Dius, Pedrota mingarka, judiukunata Alli Willaita willangapa: chasallatami nukatapas mingawarka, mana judiukunata Alli Willailatata willangapa. ⁸ Kikin Taita Dius, imasami Pedrota kacharka, judiukunata willag kangapa: chasallatami nukatapas kachawarka, mana judiu kagkunata willaspa purigirangapa.

⁹ Santiago, Pedro i Juan karkakunami tukuikunapura atun taitakunasina. Paikunaka iuiarirkakunami, nukatapas Taita Dius kikin, kuiawaspa, mana judiu kagkunapagma kachamuwaska kagta. Nispaka, nukata i Bernabeta alli maki kuarkakuna; chasaka, paikunawa nukanchi sugllasina kagta niraiangapa. Kasami nukanchita nirkakuna:

–Kamkuna, mana judiu kagkunata willaspa purigriichi. Ikuti nukanchika, judiukunatami willaspa purisunchi.

¹⁰ Kasallapasmi nukanchita nirkakuna:

–Judea alpapi mana ñi ima iukaskakunamanda mana kungaringichi—. Nuka, paikunata aidangapami tukuipi allilla rurakuni.

San Pablo, San Pedrota piñagsina rimaskamanda

¹¹ Chiuramanda, Pedro Antiokia puibluma chaiagriuraka, nukaka ñawi ñawimi paita piñagsina rimarkani, pai mana judiu kagkunawa tiakuspa anchurigmanda. ¹² Santiago kachaska judiukuna manara chaiankama, pai Pedro, mana judiu kagkunawami mikuspa tiakurka. Ikuti chi judiukuna chaiagriuraka, paika sakispa anchurirka. Nispaka, judiukunallawami mikungapa tiarigrirka. “Mana judiukunata marka churangapami chaiá” nigkunata iachaspami, mancharispa, chasa mana allilla rurarka. ¹³ Chipi kag judiukuna Cristowa iuiarispa kagkunaka, Pedro anchurigta kawaspa, chasallatami anchurirkakuna. Bernabepas, chasallatami pandachii tukurka.

¹⁴ Nuka kawarkanimi, chi anchurig judiukunaka sutipa Alli Willaita niraiaskata mana katinakugta. Nuka, chasa kawaspa, tukuikunapa ñawipimi Pedrota nirkani:

–Uiamui. Kam, judiu kaspapas, ¿manachu mana judiusina kaugsakurkangi? Nigpika, ¿imapatak mana judiu kagkunataka ningapa kangi: “Judiukunasina kaugsangichi”?

¹⁵ Nukanchi, judiumi tiagsamurkanchi. Chiwami mana judiu pandarig kagkunasina mana kanchi. ¹⁶ Chasa kagpipas, kasami iachanchi: Moisés ima niskata uiaspa ruraskakunallawaka, pipas mana pandariikunata anchuchii tukunchichu. Jesucristowa suma iuiarisipami mana pandarig niraianchi. Chasa iachaspami nukanchipas Jesucristowa iuiarigsamunchi. Chasaka, ñugpata Moisés niskata uiaspalla, manima; Cristowa suma iuiarisipami mana pandarig niraianchi. Moisés niskata uiaspa ruraskakunallawaka, pipas mana pandariikunata anchuchii tukunchichu.

¹⁷ Chasaka ninchimi, Cristollawa mana pandarig niraiangapa. Chasa nispapas, iuirinchimi, nukanchipas pandariikunawa kagta. Chasa iuiarisipaka, ¿niraianchu Cristowa nukanchi pandarig kagtakuna? Manima. ¹⁸ Imasami wasi saiakuskata wagllichispa, nispaka chikunallawanta ikuti chillapita saiachigpi, mana iuiaipisina niraiá: chasallatami kamkuna, Moisés niskata sakispa, ikuti chillatata katichii kallarispa, ikuti pandariikunawa tukugsamungichi.

¹⁹ Nuka ñami wañuskasina niraiani, Moisés niskata mana uangapa. Chi niskallawantami nuka wañuskasina niraiani; chasaka, Taita Dius niskallata uiaspa, nuka kaugsangapa. Nuka, Cristowa sugllapi kruspi klabaskasinami niraiani. ²⁰ Chiwanka, nuka kikin mana

kaugsanichu. Cristomi nukawa sugllapi kaugsá. Nuka, kunaura kuirpupi kaugsakuspapas, Taita Diuspa wambrawa suma iuiariskallawami kaugsakuni. Paimi, nukata iapa kuiawaspa, nukamanda sakirirka, wañuchii tukungapa.

²¹ Chimandami Taita Diuspa kuiaita mana munani sakingapa. Ima Moisés niskata uiaspa ruraskakunallawa nukanchi pandariikunata anchuchii tukuntranchi; nigpika Cristoka, iangami wañuska niraiantra.

3

Moisés ima rurangapa willaskamanda i Cristowa suma iuiariskamanda

¹ ¡Ai, Galasiamanda runakuna, iapa upashkunasinami kangichi! Kam kikinkuna Jesucristota kawanakuskasinami pai kruspi klabai tukuskamanda willarkanchi. Nigpika, ¿pitak kunauraka kamkunapa iuiaita tuntiachiku? ² Kaillami tapuchingapa munaikichita: ¿Moisés ima niskata uiaspa ruraskakunawachu kamkuna Santu Ispirituta chaskirkangichi? Mana kagpika, Cristomanda Alli Willaita uiaspa, ¿paiwa suma iuiarispachu chaskirkangichi? ³ ¿Chituku upashkunachu kangichi? Kamkuna Santu Ispirituwa kallariskakunataka, kunauraka, ¿kam kikinkunapa iachaillawachu munanakungichi, tukuipi alli iuiag tukungapa? ⁴ Nigpika kamkuna, ¿iangachu Cristomanda iapa llakii pasarkangichi? Munantranimi, chasaka mana ianga tukuchu.

⁵ Taita Dius, Santu Ispirituwa mana imaurapas kawaskakunata kamkunapa ñawipi kawachimuura, ¿Moisés niskata uiaspa ruragmandachu chasa kawachimú? Mana kagpika, Cristomanda Alli Willaita uiaspa, ¿paiwa suma iuiariskamandachu chasa kawachimú?

⁶ Chasallatami ñugpamanda librupi willaraiá, kasa nispa: Abrahamka, Taita Dius imasa niskata iuiarispami karka:

“Chasami tukunga”.

Chimandami paika mana pandarig niraiá.

⁷ Chasa willaraiaskamanda, kasa iachaichi: Cristowa suma iuiarigkunaka, chikunami Abrahampa wambrawa niraianchi.

⁸ Ñugpamandatami Diuspa Rimaipi kasa niraiá: mana judú kagkuna Taita Diuswa iuiarigsamugkunatapasmí pandariikunata anchuchí. Chasaka Taita Dius, kai Alli Willaita Abrahamta nirka:

Kammandami tukui alpamanda runakunapas

Taita Diuspa iapa kuiaska tukugsamungapa kankuna.

⁹ Chasamandami, Abraham Taita Diuswa suma iuiarispaga kagmanda, Cristowa suma iuiarigkunapas, Abrahamwa pariju Taita Diuspa iapa kuiaska kanchi.

¹⁰ Maikanpas Moisés ima rurangapa willaskallata katichispa kaugsagkunaka, maldisiskami niraiankuna. Chasallatami ñugpamanda librupi willaraiá, kasa nispa:

Maikanpas librupi tukui ima willaraiaskata

mana uiaspalla ruragkuna

maldisiskami niraiankuna.

¹¹ Kasa sutipami ka: ñi pipas Moisés ima niskallata katichigkuna, Taita Diuspa ñawipi tukuipi alli mana kankunachu. Chasallatami ñugpamanda librupi willaraiá, kasa nispa:

Taita Diuspa ñawipi alli kawarig runaka,

suma iuiarispallami kaugsanga.

¹² Taita Diuswa suma iuiariskawaka, Moisés niskata katiraiaskaka ñi ima mana niraianchu. Tukui ima Moisés niskata suma allilla rurangapami chaiá. Chasallatami ñugpamanda librupi willaraiá, kasa nispa:

Tukui ima Moisés willaskata

ruragkunami kaugsangakuna.

¹³ Nukanchi mana tukui chi niskata ruragmandaka, maldisiskami karkanchi. Nigpika, Cristomi nukanchita kispichigsamurka. Cristo kikinmi nukanchimanda maldisii tukurka.

Chasallatami ñugpamanda librupi willaraiá: Maikanpas kaspipi wañungapa warkuchiska,

maldisiskami niraiá.

¹⁴ Jesucristo chasa wañuskamandami, Taita Dius Abrahamta ima sumaglla karangapa niraiaskata, mana judú kagkunapas chaskinkuna. Chiwanka nukanchi, Cristowa suma iuiarispaga, Taita Dius paipa Ispirituta karamungapa niskatami chaskinchi.

Moisés ima mandaskamanda i Taita Dius Abrahamta ima karangapa niskamanda

¹⁵ Taitakuna i mamakuna, kunaura imasa runakuna ruradur kagtakunami rimangapa kaikichita. Maikan runa iskriturapi firmaska kaskata, mana pipas pudinchu chita: “Mana allilla kanchu” ningapa, ñi ima niraiaskata iapangapa. ¹⁶ Taita Dios, Abrahamta nirka: Kamba wambramanda kati samug wambratami ima karangapa kani.

Achka wambrakunamanda mana niraianchu. Kamba wambramanda kati samugllatami chasa karangapa niraiá. Chika, Cristomi ka. ¹⁷ Kasapasmi niikichita: chi Taita Dios Abrahamwa iskriturapisina firmagsina rurarka; chimanda chusku patsa kimsa chunga watamanda Moisés niskawaka mana pudirinchu ningapa: “Chi Taita Dioswa Abrahamwa iskriturasina ruraska mana allilla kanchu”. Iukanmi, Taita Dios imasa niskasinalla kanga. ¹⁸ Moisés ima niskallata ruragpikunaka, Taita Dios karangapa suianakuskaka manachar niraiantira Taita Dios karangapa niskata suianakugta. Ikuti Abrahamka, Taita Dios ima karangapa niskata chaskirkami.

¹⁹ Chasa kagpika, Moisés ima rurangapa niraiaskaka, ¿imapatka bali? Balinmi imakunapi pandariikuna niraiaskata iachangapa. Chi Moisés ima rurangapa willaskataka Abrahamta karangapa niraiaskamami iapachigsamurka, imaura Taita Dios kachamungapa niska wambra samunkama. Taita Dios ima niskata, anjllkunami Moiesta willarkakuna, paika paipurakunata willangapa. Chasa Taita Dioska, Moiseswami runakunata rimadur karka. ²⁰ Ikuti iskaikunalla rimanakuskapika mana ministinchu, sug tiangapa. Chasa Abrahamtaka, Taita Diosllami rimarka.*

Moisés ima rurangapa willaskaka imapa sakiskamanda

²¹ Chasa kagpika, Moisés willaskawa i Taita Dios karangapa Abrahamta niskawa, ¿kun-trachu niraiankuna? Manima. Sug mandai tiantra, mana diltudupa wañungapa; chasa niskata ruragkunami mana pandarig niraiantirakuna. ²² Chasapaka, imasami ñugpamanda librupi willaraiá: tukui pandariskakuna wichkaraiaskasinami niraianchi. Chimandami Jesucristowa suma iuiarigkunaka, kispirispa, Taita Dios ima karangapa niskata chaskingapa kanchi.

²³ Manara Cristowa iuiaringapa puncha chaiamugpika, nukanchika Moisés ima rurangapa willaskawami wichkaraiaskasina karkanchi. Cristowa iuiaringapa punchakamami suianakurkanchi. ²⁴ Chi Moisés willaskawaka nukanchi, wambra iachaikunakugsinami karkanchi, Cristo samunkama; pai samuskauramandaka, paiwa suma iuiariskamanda mana pandarig niraiangapa. ²⁵ Nigpika, Cristowa iuiaringapa punchakunaka ñami chaimurka. Chiwanka, Moisés willaskata iachaikug wambrasina mana kanchichu.

²⁶ Tukui kamkuna, Jesucristowa suma iuiarispaka, Taita Diospa wambrakunami niraiangichi. ²⁷ Tukui baugtisariskakuna, Cristowa tukuspa, Cristopa iuiaita churariskasinami kangichi. ²⁸ Kunaura, judiu i mana judiu kagpipas, Taita Diospa ñawipi sugllasinami kangichi. Chasallata, lutrin i patrún, kari i warmi kagpipas, tukuikunami, Jesucristowa tukuspa, sugllasina kangichi. ²⁹ Chasa Cristopa kagmandami Abrahampa wambramanda kati samug wambrakuna niraiangichi. Chimandami, Taita Dios ima sumaglla karangapa niraiaskata kamkunapas chaskingapa kangichi.

4

¹ Kasami niikichita: maikan ima sakikuskata chaskingapa chaiakugpika, uchulla wambra kankama lutrininsinallatatami niraiá, paipa tukui niraiagpipas. ² Chi uchullamanda, maikan paita kawagkuna i charipugkunami iuká tianga, paipa taita niska puncha chiankama. ³ Chasallatami nukanchipas, uchulla wambrakunasina karkanchi. Kai alpapi iuiakunallowami wataskasina karkanchi.

⁴ Taita Dios niska puncha chaimuuraka, paipa wambrata kai alpamami kachamurka. Sug warmimandami tiagsamurka. Moisés ima niskasina allilla rurangapami samurka. ⁵ Moisés ima willaskata ruranakuskata kispichingapami samurka; chasaka nukanchi, Taita Diospa wambrakuna niraiagsamungapa.

⁶ Kamkunapas paipa wambra tukuska kagmandami Taita Dioska paipa wambrapa Ispirituta kachamurka, kamkunawa sugllapi kausangapa. Paipa Ispirituwami Taita Diusta ningichi: “Taitiku”. ⁷ Chasamanda, kunaura lutrinsina mana kangichichu. Taita Dios kuiagmanda, paipa wambrakunami niraiangichi. Paipa wambrakuna niraiagmanda, tukui ima karangapa niska, kamkunapami niraiá.

Cristowa tukuskakuna sug rigcha iuiaikunapi richukuna manchakuskamanda

⁸ Ñugpata, kamkuna manara Taita Diusta rigsieuraka, ianga dius kagkunata iuiaspa, chikunapa lutrininsinami karkangichi. ⁹ Ikuti kunauraka, sutipa Taita Diustami rigsingichi.

* 3:20 3.20 griego rimaiwa: Suglla Taita Diosmi tia.

Chasa kagpipas, Taita Dioska kamkunata ñugpamandatami allilla rigsirka. Nigpika kamkuna, ¿imapak ikuti munanakungichi, chi ñi imapapas mana balig dius niraiaskakunawa tigrangapa; chasaka, ikuti paikunapa lutrinkunasina tukungapa? ¹⁰ Charami kamkunaka, punchakunata, killakunata, watakunata i sug punchakunatapap judiukunasina wardangichi. ¹¹ Manchawakumi, nuka kamkunata iachachiska ianga kidapuachu.

¹² Taitakuna i mamakuna, nuka, kamkunasinami tukurkani. Chimandami mañai-kichita: kamkunapas, nukasina tukuichi. Kamkuna, nukata ñi imapipas jiru mana rurawaska kangichichu. ¹³ Kamkuna ñami iachangichi: nuka, ungug kaspami musuglla Alli Willaita willarkaikichita. ¹⁴ Nuka chi jiru unguwa kagpipas, kamkuna, mana wabuti-waspalla ñi wasa churawaspallami uiawarkangichi. Taita Dios kachamuska anjiltasinami sumaglla chaskiwarkangichi. Kikin Jesucristo kagtasinami kaiawarkangichi. ¹⁵ Nuka kamkunawa chi punchakuna kaura, alli iuiachiwami karkangichi. Ikuti kunaureka, ¿imapak mana alli iuiachiwa kangichi? Kamkunamanda kasami allilla iuiarispa niiki-chita: pudirigpika, nukata dikuiaai kam kikinunapa ñawi murutapaschar surkurispa kuwantrangichi. ¹⁶ Nigpika kunaureka, kamkunata sutipa kaskata rimagmanda, ¿kamkunawa kuntrachu tukuska kani? Manima.

¹⁷ Chi sug iachachigkunaka, kamkunawa munanakugsina kaspapas, mana alli iuiaiwami kamkunata munanakú. Kamkunata munanakumi, nukanchipa iuiaiwa mana sugllapi kachukuna; chasaka kamkuna, paikunallawa iuiarispa kangapakuna. ¹⁸ Allillami ka, sugkunawapas suma iuiaiwa munanakungapa; chasaka, paikunawapas allilla kangapa. Chasa kagpipas, nuka kamkunawa kankamalla, mana; munaniami, imaurapas tukuikuna allilla munanakuspa kaugsangapa.

¹⁹ Nukapa wambritukuna, imasami sug unguringapa warmita nanaikuna chaiá, wambra tiangapa: chasallatami nukapas, lakii ikuti ikuti iukani, kamkuna Cristosina tukunkama. ²⁰ ¡Amalai nuka, kunaureka kamkunawa sugllapi kantrani; chasaka, sug rigcha kamkunata rimangapa! Mana iachariwanchu, kamkunamanda ima iuianga.

Agar i Sara suti warmikunamanda iachachiskamanda

²¹ Kamkuna Moisés ima niskata rurasp kaugsangapa munanakugka, kasa willawaichi: ¿manachu iacharkangichi chi niskapi ima willaraiagta? ²² Kasami chi ñugpamanda librupi willaraiá: Abraham, iskaí wambtrakuna iukagta. Sug wambra iukarka sug warmi randiskapi. Ikuti sug wambra, pai kikinpa warmipimi iukarka. Paipa warmika, ñi pita mana randiska karka. ²³ Chi warmi randiskaka, kari munaskamandallami wawita iukarka. Ikuti mana randiska warmika, imasa Taita Dios niskasina kagmandami wawita iukarka.

²⁴ Chasa willaraiaskawaka nukanchita kasami iachachiku: chi iskaí warmikunaka niraianmi Taita Dioswa i runakunawa sug sug iuiaringapa. Sug iuiaridirutaka, Sinaí suti lumapimi Taita Dios rimamurka. Chi iuiaridiruwa tiagsamugkunaka, wataskasinami kaugsanakú. Agar suti randiska warmipimi chasa kagta niraiá. ²⁵ Agar niraianmi Sinaí luma. Chi luma, Arabia suti alpapimi ka. Chi Sinaí luma niraianmi kai alpapi tiaska Jerusalén puiblu. Chi puiblu i chimanda kagkunapas, Moisés ima niskata rurai iukaspá, wataskasinami niraiankuna. ²⁶ Ikuti suma luarpi tiaska Jerusalén puiblumanda kagkunaka niraianmi ñi pita mana randiskakuna kagta. Chi puiblu, nukanchipa mamasinami niraiá.

²⁷ Chasallatami ñugpamanda librupi willaraiá, kasa nispa:

Chusa warmi mana wambra iukadu, suma kuntintarii.

Mana imaurapas uchulla wawita iukag, alli iuiachiriiwa kaparigsamui.

Sitai tukuska warmika,

kusawa warmi kaugsanakusmandapas mas achka wambraimi iukanga.

²⁸ Taitakuna i mamakuna, kamkunaka Abrahampa kikin warmindipa wambra Isaak suti-sinami niraiangichi. Taita Dios kikin Abrahamta niskatami paipa wambtrakuna niraiangichi.

²⁹ Chasa kagpipas, ñugpata imasami kari munaskamandalla tiagsamuska wambra, Santu Ispirituwa tiagsamuska wambra jiru rurangapa munakurka: chasallatami kunaureka pasariku. ³⁰ Chasa pasarikugpipas, ¿imasatak ñugpamanda librupi willaraiá? Kasami willaraiá:

Randiska warmita

paipa wambrawanta

kaimanda llugsichii.

Chi randiska warmipa wambra mana pudinchu,

mana randiskapa wambrawaka

taita ima sakingapa kaskata

chaugpi chaugpi partinakungapa.

³¹ Taitakuna i mamakuna, nukanchika, randiska warmipa wambrakuna mana niraianchichu. Mana randiska warmipa wambrakunami nukanchi niraianchi.

5

Mana ikuti sakirisunchi, Moisés ima niskawa wataskakunasina tukungapa

¹ Cristomi nukanchita libriachigsamurka, Moisés ima rurangapa willaskata sakispa, mana wataskakunasina kaugsangapa. Chimanda, mana watai tukuskasina kaugsanakungichi. Mana ikuti sakiringichi, Moisés ima niskawa wataskakunasina tukungapa.

² Uiawaichi. Nuka Pablo, kasami kamkunata niikichita: kamkuna judiukunapa marka churachirigpikunaka, Cristoka mana imapapas balipungapa kangichitachu. ³ Kasapasm niikichita: maikanpas marka churachirigkunata chaianmi, Moisés tukui ima niskata ruraspaga kaugsangapa. ⁴ Kamkuna, Moisés ima niskata ruraskunallawa mana pandarig nirai ai iuiakunaka, Cristopagmanda anchuriskasinami niraiangichi. Taita Diospa kuaita mana munagsinami kangichi.

⁵ Ikuti nukanchika, Cristowa suma iuiariskawa Santu Ispirituwa suianakunchimi, mana pandarig niraiangapa. ⁶ Nukanchi Jesucristowa tukugkuna, judiukunapa marka churaska u mana churaska kagpipas, ñi ima mana niraianchu. Cristowa suma iuiarispa, kuiaspa kaugsaiwami allilla niraiá.

⁷ Kamkuna, allillami kaugsanakurkangichi. Nigpika, ¿imawantak kunaura sutipa Alli Willaita mana iuiaspa kaugsanakungichi? ⁸ Taita Dios mana kamkunata agllarkachu, sug rigcha iuianakungapa. ⁹ Imasami asllita libadurawa achka mukuta puchkuchi: jujalallapas chasallata kamkuna, chi jiru iuiiakunawa waglichiringichi! ¹⁰ Nuka, Iaia Jesusmanda iuiarispa, kasami suma iuiari: kamkuna, nukasina alli iuiarispa kaugsantrangichi. Chi kamkunata pandachispa puridur, pi kagpipas, diltudupa ninamami sitai tukungapa ka.

¹¹ Taitakuna i mamakuna, nuka chara judiukunapa marka churachingapa iachachikugpika, judiukunaka manachar jiru rurawangapa munawanakuntra. Chiwanka, Cristo kruspi wañuskamanda rimaitaka manachar wabutintrakuna. ¹² Chi kamkunata pandachispa puridurkunaka, jamalai kikin kapai rurarintrakuna!

¹³ Ari, taitakuna i mamakuna, Taita Dios, kamkunata agllarkami, mana wataskakunasina kaugsanakungapa. Chasa kagpipas, jujalallapas kamkuna iuianakungichi, imasa munaskasina ruraspaga kaugsangapa! Chasapaka, kam kikinpura kuianakuspa, lutrinsina aidanakuspa parijuma kangichi.

¹⁴ Kasami ñupamanda librupi niraiá:

Kam kikintasinami iukangi,
tukui runakunatapas kuianga.

Chi suglla niraiaskata allilla ruraspaga, tukui ima willaraiaskata ruragsinami niraiangapa ka. ¹⁵ Ikuti kam kikinpura rabiawa kaninakuspa mikunakugsina kaugsanakugpika, jujalallapas parijuma puchukarinakungichi!

Santu Ispiritu ima iuiachiskaka, jiru iuiaiwaka kuntrami ka

¹⁶ Chimandami kasa niikichita: Santu Ispiritu imasa iuiachiskasina ruraspaga kaugsanakungichi. Chasa kaugsanakugpika, kam kikinunapa jiru iuiaiwa mana rurangapa kangichichu. ¹⁷ Kai alpamanda jiru iuiaiwa kagkunaka, Santu Ispirituwa kuntrami kankuna. Chasallata Santu Ispiritu ima iuiachiskaka, jiru iuiaiwaka kuntrami ka. Ari, jiru iuiaiwa i Santu Ispirituwa iuiachiiwa kuntrami kankuna. Chimandami kamkuna mana iukangichi, ima jiru munaskata ruranga. ¹⁸ Santu Ispiritu imasa iuiachiskata ruraspaga, ña Moisés ima rurangapa willaskawaka mana wataskasina kangichichu.

¹⁹ Jiru iuiaiwa kagkunaka, kawariillami rurankuna: kari warmiwami pandarinkuna; mana chaia ima millaikunatapasm rurankuna; ²⁰ ianga diuskunatami muchankuna; mana alli iacha pukuspami rurankuna; parijuma piñachirinakuspa, ainichirinakuspa i rabiachirinakuspami kaugsankuna; sugkunata mana allilla iuiaiwami kawankuna; pai kikinunamandallami tukui munankuna; sugkunaka sumaglla kaugsanakuskata chaugpirigsina tukuspa, sug rigcha sug rigchami iachachinkuna; ²¹ sugkunapatami munarinkuna; wañuchinkunami; machaspa i iapa mikuspami kaugsankuna; chasallata sug rigchapasmi jiru rurankuna. Kamkunata timpumi willaska kaikichita; chita ikutimi niikichita: chasa ruraspaga kaugsanakugka, Taita Dios suma mandakuskapika manima iaikugringapa kankunachu.

²² Ikuti Santu Ispirituwa kaugsagkunaka, kasami rurankuna: kuianakumi; alli iuiachiiwami kankuna; sumagllami kaugsanakú; mana piñaspalla, sugkunamanda llakispa mi kawanakú, tukuipi allillami rurankuna; suma ruraikunata mana kungarinkunachu; ²³ mana atuniachirigsina iuiankunachu; ima mana allilla iuiarispa munai apigpipas, chita mana rurankunachu. Chasa allilla ruranakuskamandaka ñi maikan mandaikunapipas

mana michanchu. ²⁴ Cristowa tukuska kagkuna, tukui mana alli iuiyai munanakuskata kruspi wañuchiskasinami sakirkanchi. ²⁵ Santu Ispirituwa kaugsanakugpika, Santu Ispiritullatata nukanchita iuiachichu, imasa sumaglla ruraspa kaugsangapa. ²⁶ Mana kasunchi atuniachirinakuspa, ñi kikinpura rabiachirinakuspa ñi sugkuna iukaskata munarispa.

6

Nukanchi kikinpura aidanakusunchi

¹ Taitakuna i mamakuna, maikanpas pandarikuspa apirigpika, kamkuna Santu Ispirituwa kagkunaka, mana atun tukuspalla iuiarispa, paita: “Mana chasa rurakui” ningichi. Chasa nispaka, allilla iuiaringichi, kam kikinkunapas mana chasa pandariikunapi urmangapa. ² Kam kikinpura ima llakii iukaskata iuiachirinakuichi kungaringapa. Chasa iuiachirinakuspaka, Cristo ima niskatami ruranakungichi.

³ Maikanpas, atun tukuspa, iuiarispa nichu: “Nuka, atunmi kani”: chi runaka, mana chasa kaspaka, kikinllatami pandariku. ⁴ Sug sug, kikin imasa ruraspa kaugsakuskata iuiarispa tapuringichi: “¿Allilla u mana allillachu kaugsakuni?”. Chasa allilla kagta iuiarispa, kikinmandallami alli iuiachi tukunkangichi, mana pitapas kawaspalla. ⁵ Sug sugmi Diuspa ñawipi kawachinkangichi, kai luarpi imasa ruraska.

⁶ Maikanpas Diuspa Rimaita iachachigta iachaikugkunaka iukangichimi, tukui ima iukaskata kamkunata iachachigwa rasiunaringakuna.

⁷ Mana pandaringichi. Ñi pipas, Taita Diusta llullachingapa mana pudirinchi. Imasami tarpunchi: chasallatami pallasunchi. ⁸ Maikanpas jiru iuiaikunata tarpugsina ruragkunaka, chasa iuiaita ruraspaka, diltudupa wañuitami pallangakuna. Chasallata, maikanpas Santu Ispiritupa iuiachiikunata tarpugsina ruragkunaka, chasa iuiachiita ruraspaka, diltudupa suma kaugsaitami pallangakuna. ⁹ Chimandaka, allilla ruraspa kaugsagkuna mana sambaiasunchi. Chasa rurangapa mana sakigkunaka, pallangapa puncha chaiaura, chi diltudupa kaugsaitami chaskisunchi. ¹⁰ Chasa kagmanda, imaura pudiriura, tukui-kunamanda allilla ruraspa kasunchi. Cristowa iuiagkunamandami mas iukanchi, allilla ruraspa kanga.

Kaiakama, niskamanda

¹¹ Kawaichi. Kaituku atun litrakunawami nuka kikinpa makiwa iskribiikichita. ¹² Chi kamkunata judiukunapa marka churachingapa iachachigkuna munanakumi, sugkunapa ñawipi allilla kangapaglla. Paikuna Cristo kruspi wañuskamandalla willanakugpika, paikunapasmi kalpachii tukuntrakuna. ¹³ Ñi maikan marka churachii tukugkunapas mana pudinkunachu, Moisés tukui ima niskata ruraspa kaugsanakunga. Kasamandallami kamkunata marka churachingapa munanakú: kamkunapa kuirpupi chi marka churachiskawa pai kikinkuna mas atun tukungapa.

¹⁴ Ikuti nukaka, ñi imawapas mana atun tukungapa munanichu. Nukanchipa Iaia Jesucristo kruspi wañuskamandallami alli iuiachiwa kani. Cristo kruspi wañugmandami kai alpapas nukamanda wañuskasina tukupuá; nukapas, kai alpamanda wañuskasinami tukuni.

¹⁵ Judiukunapa marka churaska u mana churaska, ñi ima mana niraianchu. Nukanchi sug rigcha musu kaugsaiwami allilla niraiá. ¹⁶ Tukui ima nuka iachachiskata ruraspa kaugsanakugmi niraiá, Taita Diuspa sutipa Israelmanda runakuna kagta. Tukui chasa kaugsanakugmanta Taita Dius llakirichu, paikuna sumaglla kaugsanakungapa.

¹⁷ Kunauramanda mana pipas nukata uma nanachiwaspa kachukuna. Iaia Jesusmanda nuka willaskamandami nukapa kuirpupi nanachiwarkakuna. Chi nanachiwaskakunawami niraiami nuka Jesuspa kagta.

¹⁸ Taitakuna i mamakuna, Iaia Jesucristo, tukui kamkunata sumaglla kawapuachu. Chasa kachu.

EFESO PUIBLUPI CRISTOWA TUKUSKAKUNATA SAN PABLO KARTA KACHASKAMANDA

¹ Nuka, Taita Dius munaskamanda, Jesucristo kachamuskami kani, Alli Willaita willaspa puringapa. Kamkuna Jesucristowa iuiarispa, Taita Diuspalla kaspas, Efeso puiblupi kaugsanakuskatami kai karta kachaikichita. ² Nukanchipa Taita Dius i Iaia Jesucristo, kamkunata kuiaspa, suma iuiaiwa kawapuachu.

Taita Dius, Cristowa iapa sumaglla kawaspa karamuskamanda

³ Nukanchipa Iaia Jesucristopa Taita Diusta nisunchi: “Kam, iapa suma atunmi kangi”. Paimi, Cristowa tukui ima suma luarpi iukaspa, nukanchita iapa sumaglla kawaspa, karamú. ⁴ Paillatami, kai alpa manara tiagpita, Cristowa nukanchita agllarka; chasaka nukanchi, paimandalla kaugsaspa, paipa ñawipi ñi imapipas mana mapasina kangapa. ⁵ Ñugpamandata nukanchita kuiaspa agllarka, Jesucristowa paipa wambrakuna niraian-gapa. Chasami ñugpamandata munarka. ⁶ Paipa kuiaska wambra Jesucristomandami nukanchita iapa suma kuiarka. Chimandami Taita Diusta imaurapas ninchi: “Iapa suma atunmi kangi”.

⁷ Cristo wañuchii tukuspa, paipa iawarwami nukanchita randirka. Chiwanka, nukanchita iapa suma kuiaspa, mana allilla ruraikunata pasinsiarka. ⁸ Chasa kuiaspami nukanchita karamurka, suma iuiai apispa, suma iachaita iukangapa. ⁹ Chasaka, pai ima munaska pipas mana iachaskatami nukanchita rigsichirka. “Chasami Cristowa ruras” ñugpamandata niskatami kawachirka. ¹⁰ Pai chasa niskata rurai puchukangapa punchakuna chauraka, Cristota churangapami ka, tukui sug luarpi i kai alpa luarpi kagkunata suglla mandag kangapa.

¹¹ Nukanchi Cristowa tukuskakunamanda, Taita Dius ñugpamandata agllarka, pai ima iukaska nukanchipapas kangapa. Chasapasmipi pai munarka. Pai imasa munaskasinami tukui allilla rurá. ¹² Chasa agllaska kaspami nukanchi ñugpa Cristota iuiagkuna iukanchi Taita Diusta: “Iapa suma atunmi kangi” nispa kaugsanakunga.

¹³ Kamkunapas, chi kispiringapa kaskamanda Alli Willaita uiaspa, Cristomanda sutipa willaskatami suma iuiarirkangichi. Chiura, Santu Ispirituwami siñalai tukurkangichi, paipa kagta niraiangapa. Santu Ispiritutami ñugpamandata chasa karamungapa niska karka.

¹⁴ Santu Ispirituwami nukanchi kasa iachanchi: paipa kagkunata diltudupa kispichiura, pai ima iukaskata chaskingapami kanchi; chasaka tukuikunaka, Taita Diusta: “Iapa suma atunmi kangi” ningapa.

Taita Diuspa suma iachai, Cristowa tukuskakunata karachu, mañaskamanda

¹⁵ Kamkuna Iaia Jesuswa iuiarinakuskataka allillami iachani; chasallata, tukui paimandalla sumaglla kaugsagkunata kuianakugtapas. ¹⁶ Chasamanda mana sakinichu, kamkunamanda Taita Diusta: “Pai Siñur” ningapa. ¹⁷ Nukanchipa Iaia Jesucristopa iapa suma atun Taita Diusta mañapuikichitami, paipa suma iachai kamkunata karapuachu; chiwanka, pai ima iuiachimuskata kamkuna iachagsamungapa; chasallata, pai kikinta mas allilla rigsingapa. ¹⁸ Paita mañapuikichitami, kamkunapa iuiaikunata punchaiachi-puachu. Chiwanka, kasami iachankangichi: pai agllaskakuna suma luarpi ima chaskingapa suianakugta. Tukui ima chipi iapa suma iukaska, Taita Diuspalla kagkunamandami niraia.

¹⁹ Kasapasmipi iachankangichi: paipa iachaika, askurinti iapa atunmi ka. Chi iapa iachaiwami nukanchitapas paiwa suma iuiarigsamú. Chi iapa atun iachailawantami, ²⁰ Cristo wañuskata kaugsachispa, suma luarpi paipa alli ladu tiarichigrirka. ²¹ Chipika, mandagkunamanda, atuniachiska kagkunamanda, awa wairapi iapa pudi mandagkunamanda, tukuikunamandapas mas awapi mandag kangapami tiarichigrirka. Kuna puncha ima tiaskakunata, paimi mandag ka. Kati samug punchakuna ima tiangapa kaskakunatapasmipi chasallata mandag kangapa ka. ²² Taita Dius, tukuikunatami churarka Cristopa chaki ukuma kagsina, pai ima niskata rurangapa. Paitaka churarkami, uma kagsina, paiwa tukui tukuskakunapa iaia kangapa. ²³ Cristowa tukuskakuna niraianmi pai kikinpa kuirpu. Cristowa i paiwa tukuskakunawa, suglla kuirpusinami tukú, ñi ima manima pisi. Paimi ka tukui jundaipi junda, ñi imapas mana pisi.

2

Taita Diuspa suma kuiaimanda, nukanchi kispichii tukuskamanda

¹ Kamkunaka, ñugpata mana allilla ruraspa kaugsanakuspa, wañuskakunasinami niraikangichi. ² Kai alpapi tiaskakunallawa iuiaspa kaugsanakurkangichi, iaia kuku wairapi mandag munaskata ruraspalla. Chi iaia kuku, Taita Dios ima niskata mana uiagkunatami jiru rurangapa iuiachi. ³ Tukuikunami ñugpata chasallata kaugsanakurkangichi, imasa munaskasina jiru ruraspa. Nukanchipa aicha jiru munaikunata i sug rigcha sug rigcha iuiaikunata, chasakunata ruraspami kaugsanakurkangichi. Chasa kaugsanagugmandaka, Taita Dios, askurinti rabiarijsa, sugkunatasina nukanchitapas diltudupa ninama kachangapa karka. ⁴ Chasa kagpipas, Taita Dioska, nukanchimanda iapa llakispa kawaspami nukanchita suma kuiarka. ⁵ Chasaka, nukanchi kikin mana allilla rurasakunamanda Diospa ñawipi wañuska kaspapas, kaugsachiskami niraianchi, Cristowa sugllapi kangapa. Taita Diospa suma kuiaimandami kispichii tukurkangichi. ⁶ Nukanchita kaugsachispa, suma luarpi tiarichigsinami niraianchi, Jesucristowa sugllapi kangapa. ⁷ Chasaka, mana puchukariduru punchakuna chaiaura, paika, iapa suma llakispa, nukanchita Jesucristowa askurinti iapa suma kuiagtami kawachingapa ka.

⁸ Taita Dios suma kuiagmandami, kamkuna, paiwa suma iuiarijsa, kispichiska tukurkangichi. Mana kispirikangichichu kam kikinkunapa iuiailawa. Taita Dios kikin karaskallawami kispichii tukurkangichi. ⁹ Kam kikinkuna allilla ruraskamanda mana kispirikangichichu; chasaka, ñi pipas mana atuniachirisa ningapa: “Nuka kikinllami kispirikani”. ¹⁰ Taita Diosmi nukanchita chasa rurarka. Jesucristowami tiagsamurkangichi; chasaka, alli ruraikunata nukanchi ruraspa kaugsagsamungapa. Chi ruraikunaka, ñugpamandatami nukanchimanda allichiska suiakurka, nukanchi chasa allilla ruraspa kaugsagsamungapa.

Cristo, tukuikunawa pasinsiachig kagmanda

¹¹ Chimanda kamkuna mana judiu kagkunaka, imasa ñugpata kaskata iuiariichi. Judiu-kuna kuirpupi marka churagkunaka, kamkunamanda ninkunami, mana marka churaska kagtakuna. ¹² Kamkuna, ñugpata mana Cristowami karkangichi. Israelmanda runakunawa manara sugllapi karkangichichu. Taita Dios ima karangapa niskatapas, kamkuna manara chashingapa niraikangichichu. Ñi ima mana suiaspalla, mana Taita Dioswa iuiarijsapallami kai alpapi kaugsanakurkangichi. ¹³ Taita Diospagmanda karupi kaugsagsinami ñugpata karkangichi. Ikuti kunauraka, Jesucristowami Taita Diospagma kaillaiarkangichi. Cristo kruspi wañuska iawarmandami chasa kaillaiarkangichi.

¹⁴ Cristomi ka tukuikunawa pasinsiachig. Paimi judiukunawa mana judiu kagkunawa piñachirinakuskatapas pasinsiachigsamurka. Ima arkaraiaskata anchuchigsinami rurarka; chiwanka, iskandikuna sugllasina tukungapa. ¹⁵ Pai kruspi wañuskawami Moisés tukui ima rurangapa niskata lim puchukarka. Chasa ruraspa, pai kikinwa judiukunata i mana judiu kagkunatapas sugllasinami musuiachigsamurka. Chiwanka, iskandima piñachirinakuskatami pasinsiachirka. ¹⁶ Pai kikin, kruspi wañuspami, iskandima piñachirinakuskata pasinsiachispa, suglla kuirpusina rurarka. Chasa iskandikuna pasinsiachii tukuspa, Taita Dioswapami sumaglla tukurkakuna.

¹⁷ Pai Cristo, samuspa, chi suma pasinsiaita tukuikunatami willagsamurka. Kamkuna Taita Diospagmanda karupi kaskakunata, judiukuna mana karupi kaskakunatapasmis chasa willarka. ¹⁸ Judiu i mana judiu kaspapas, tukuikunami Cristowa pudinchi, suglla Santu Ispirituwa Taita Diospagma kaillaianga. ¹⁹ Chimanda, kunauraka kamkuna mana sug karu alpamanda samuskasina kangichichu. Taita Diospalla kagpurami tukuikuna kangichi. Taita Diospa wambrakunapasmi kangichi. ²⁰ Kamkuna, sug atun wasisinami kangichi. Jesucristo kikin agllaska runakuna i Santu Ispirituwa rimagkunaka, chi wasi kallariska rumikunasinami kankuna. Paikunapa awalla saiachiskasinami kangichi. Kikin Jesucristoka, chi wasita charig rumi kagsinami niraia. ²¹ Chasa paiwa sugllapi, chi inturu wasika, alli alli saiarispa, suglla suma wasisinami tukugsamú; chasaka, iaia Jesuswa Taita Diospalla kaska wasisina tukugsamungapa. ²² Kamkunapas chasallata Cristowa sugllasinami tukunakungichi. Chasaka, Diospa Ispiritu kaugsadiru wasisinami tukugsamunakungichi.

3

Mana judiu kagkunata Alli Willaita willaspa puringapa, San Pablo mingai tukusamanda

¹ Chimandami nuka Pablo, Jesucristomanda Alli Willaita kamkuna mana judiu kagkunata willaskamanda kai karsilpi wichkaraiani. ² Ñami iachangichi: Taita Dios, nukatami mingawarka, paipa suma kuiaimanda willangapa; chasaka, kamkuna allillapi kangapa. ³ Mana pipas iachaskatami Taita Dios nukata iuiachiwarka. Chita ñami sug kartapi mailla willarkaikichita. ⁴ Chi kartata kawaspaka, pudingichimi, chi Cristomanda mana pipas

iachaskata nuka iachagta iachagsamungapakuna. ⁵ Chi ñi maikan ñugpamandakunata-pas mana iachachiskata, Taita Diusmi kunaura, paipa Ispirituwa, paipalla kag agllaska runakunata i Santu Ispirituwa rimagkunata willagsamurka. ⁶ Kasami kunaura willarka: tukui mana judiukunapas Alli Willaita uiagkunaka, suma luarpi tukui ima iukaska, kamkunapapasmai niraiá. Kamkunapas, Cristopa kuirpusinallatatai niraiangichi. Chasallata Jesucristowa, Taita Dius ima karangapa niskatami kamkunapas chaskigringapa kangichi.

⁷ Nukaka, chi Alli Willaita willangapami mingai tukurkani. Taita Dius, suma kuiawaspa, paipa iapa iachaiwami chasa mingawarka. ⁸ Nuka kanimi Cristowa tukui tukuskakunamandapas mas uchulla. Nuka chasa kagpipas, Taita Dius iapa kuiawaspami mingawarka, mana judiu kagkunatapas Cristomanda willangapa. Cristo, nukanchimanda niraianni suma luarpi iapa achka mana kuintangasina iukag kagta. ⁹ Kai alpa manara tiaskauramandata, Taita Dius ima rurangapa niskata mana pipas iacharkachu; chitami kunaura nukata mingawarka, tukuikunata willangapa. Pai Taita Diusmi tukui rurag ka. ¹⁰ Chasami mingawarka, suma luarpi iapa pudig mandagkunata kunaura tukui Cristowa tukuskakunawa kawachingapa: Taita Dius, imapipas iapa iachami ka. ¹¹ Taita Dius, kai alpa manara tiaskauramandata chasa kawachingapami niska karka. Nukanchipa Iaia Jesucristowami chasa tukui rurarka.

¹² Cristowa suma iuiarispami nukanchi pudinchi, paiwa suglla tukuspa, Taita Diusta mana manchaspalla rimangapa, imapas mañaspa. ¹³ Chasamandami mañaikichita: nuka kamkunamanda kai karsilpi iapa llakii pasakugpipas, kamkuna mana sambaiangichi. Kamkuna allilla kangapami chasa pasakuni.

Cristo, nukanchita maituku kuiag kaskamanda

¹⁴ Chasamanda, Taita Diuspa ñawipimi kungurini, kamkunamanda mañangapa. ¹⁵ Pai Taita Dius kagmanda, sug luarpi i kai alpa luarpi tukuikunaka paipa wambrakunami niraianchi. ¹⁶ Taita Dius iapa suma achka iukagmandami paita mañapuikichita, paipa Santu Ispirituwa kamkunapa iuiaita paipa iapa iachai karamuchu. ¹⁷ Chiwanka, kamkuna paiwa suma iuiarigmandami Cristo kamkunapa iuiapi kaugsanga. Chasami kamkuna, Taita Diuspa suma kuiapi angukunawa muruchuiaska sachasina kankangichi. ¹⁸ Chasawaka, kamkuna i tukui Cristowa tukuskakunapas allillami pudinkangichi iachanga, Cristo nukanchita maituku kuiagta. Paipa kuiaika, ñi imapipas mana puchukarinchu. Ñi imawapas mana pudirinchi, paipa kuiaita tupungapa. ¹⁹ Ñi pipas mana iachanchichu, pai nukanchita maituku kuiagta. Kasapasmi Taita Diusta mañapuikichita: kamkuna, chi kuiaita iachaspa, Taita Diuspalla tukuipi kangapakuna.

²⁰ Taita Diuska, nukanchi ima mañanakuskamanda mas achkami pudí karamunga, mana iuianakuskasina. Nukanchipa iuiapi kaugsakug iapa iachaiwami chasa karamungapa pudí. ²¹ Tukui Jesucristowa tukuskakuna Taita Diusta nisunchi: “Kam, imaurapas iapa suma atunmi kangi. Chasami diltudupa kamta ninakungapa kanchi, maituku waranga waranga watakuna ialigpipas. Chasa kachu”.

4

Santu Ispirituwa, suglla iuiaiwa kaugsanakusunchi

¹ Chasamanda nuka Pablo, Iaia Jesusmanda kaipi wichkaraiaspa, kamkunata kasami mañaikichita. Imasami Taita Dius, kamkunata kaiarka, imapipas allilla kangapa: chita uiaspa, Taita Diusmandalla sumaglla kaugsanakungichi. ² Imapipas tukuiwa sumaglla mana atuniachirispa kangichi. Kam kikinpura kuianakuspa, sumaglla llakinakuspa, mana piñachirinakuspalla kaugsangichi. ³ Taita Diuspa pasinsiachiiwa kamkuna suglla niraiaspa, Santu Ispirituwa suglla iuiaiwa kaugsanakungichi.

⁴ Tukui Cristowa tukuskakuna, suglla kuirpumi niraianchi. Santu Ispiritupas, sugllami ka. Chasallata Taita Dius, tukui kamkunata suma luarmami kaiarka, suglla iuiaiwa suianakungapa. ⁵ Suglla Iaia Mandagmi tia. Chaianni, suglla iuiaiwa Jesucristowa iuiaringapa. Baugtisaiapas, sugllami tia. ⁶ Suglla Taita Diusmi tia. Paimi tukuikunapa Taita niraiá. Paimi tukuikunata mandag ka; tukuikunawa rurá; tukuikunapi kaugsá.

⁷ Chasa kaspapas, Taita Diuska, suma kuiaspa, Cristo imasa karamungapa iuiakuskasinami tukui nukanchita sug sug karamurka, tukuikuna allilla kangapa. ⁸ Chimandami ñugpamanda librupi kasa willaraiá:

Tukui apii tukuska runakunata pusaspami awama sikarka.

Runakunataka karamurkami, tukuikuna allilla kangapa.

⁹ Chi “awama sikaska”, ¿imatata niraiá? Niraianni, Cristo ñugpa kai alpa ukuma uraikugta.

¹⁰ Uraikuspaka, Cristollatata tukui sug luarmanda mas awamami sikarka; chasaka pai

kikin, tukui jundaipi junda mana ñi imapas pisi kangapa. ¹¹ Awama sikaspaka, kikinmi karamurka:

sugkunaka, pai kikin kachaska runakuna tukungapa, Alli Willaita willaspa puringapa;

sugkunaka, Santu Ispirituwa rimagkuna tukungapa;

sugkunaka, Diuspa Rimaita willaspa puringapa;

sugkunaka, Cristowa tukuskakunata iachachispa, suma kawagkuna kangapa.

¹² Chasaka, paipalla kagkunata allichirkami, paimanda allilla ruraspa, Cristopa kuirpu niraiaskakunata wiñachigsina tukungapa. ¹³ Chasawaka tukui nukanchi, Taita Diuspa wambrawa suglla suma iuiaiwa kaspá, paita allillami rigsishunchi. Chasapimi wiñachiskasina alli iuiaiwi tukusunchi. Cristosinami tukusunchi, ñi imapipas mana pandarispalla.

¹⁴ Chiura, mana kasunchichu uchulla wambrakunasina, ima sug rigcha sug rigcha iachachiskata uiagkuna. Chasa llulla iachachigkuna, waira aliupá apagsinami rurankuna, uianakuskata miski simiwa pandachingapa. ¹⁵ Chasapaka nukanchika, sutipa Alli Willaita kuiaiwa rimanakuspa, Iaia Cristo uma niraiagsinawa tukuipimi wiñanakunchi. ¹⁶ Imasami nukanchipa kuirpupi, maki, chaki, tukui kuirpu angukunawa suma wataskasina ka: chasallatami tukui Cristowa kagkuna, paiwa suglla kuirpusina kanchi. Chasa kaspaka, tukuikuna, sug sug imasa chaiaskasina parijuma allilla ruraspa, kuiaiwa allillapimi suglla kuirpusina wiñanakunchi.

Cristowa musuiachigsina iuiaikuna iukasunchi

¹⁷ Chasamanda, Iaia Jesus imasa niskasina, kasami kamkunata mingaspa ninakuichita. Mana mas kaugsaiichi Taita Diusta mana rigsishigkunasina. Paikunaka, mana Taita Dius tiagsinami kaugsanakú, mana allilla iuiarispalla. ¹⁸ Uma tuntiachiska iuiaiwami kaugsanakú. Paikunapa iuiái iana tutapisina tukuspami Taita Diusta mana rigsinkuna. Chiwanka, paipa kaugsaita karamuskamanda anchuriskami kankuna. ¹⁹ Paikunapa alli iuiaikunata wañuchigsina ruraspa, kallarikakunami, tukui jiru i mana allillakunata kusikuspa rurangapa. ²⁰ Kamkuna chasa kaugsangapaka, Cristo mana iachachirkachu. ²¹ Sutipami kamkuna, paimanda uiaspa, tukuipi sutipa Alli Willaita iachaikurkangichi. ²² Kasami kamkuna iachaikurkangichi: ñugpamanda mana alli kaugsaita sakingapa. Chasa kaugsagkuna, tukui jiru munai iuiaikunawa pandarisa, ismuskasinami niraiá. ²³ Chi mana allilla kaugsaita sakispaka, tukuipi suma iuiaita apiichi. Chasaka, musuiachiska iuiaikunami iukankangichi. ²⁴ Chi musu kaugsaita chaskiichi; chasaka, Taita Diussina alli tukungapa. Chi kaugsaita sutipa chaskiska kagkuna, Taita Diuspalla kaspá, imapipas allilla ruraspami kaugsankangichi.

²⁵ Chasaka, mana mas llullachingichi. Tukuikuna, suglla kuirpusina niraiaspa, iukangichimi ñi ima mana llullaspalla sutipa kaskallata rimanakunga.

²⁶ Rabiawa kaspapas, mana pandaringichi. Intiru puncha chisiagta mana rabiawa kangichi. ²⁷ Chasaka, mana sakirinkangichichu, iaia kuku kamkunata iuiachingapa.

²⁸ Maikan sisai kag, kunauramanda mana mas sisangichi. Chasapaka, kam kikinunapa makiwa trabajai kallaringichi. Chasa allilla trabajaspaka, pudingichimi, ministiskakunata mailla maillallapas karanga.

²⁹ Jiru rimaikunata mana rimangichi. Sumaglla imasa allilla chaiaskasina rimaikunata rimangichi. Chasaka, maikan uiaspaka, sumaglla iuiarisa, wiñachiskasinami kanga.

³⁰ Taita Diuspa Santu Ispirituta mana llakichingichi. Pai Ispirituwami siñalai tukungichi, imaura diltudupa kispichii puncha chaiamunkama. ³¹ Chimandaka, tukui mana alli iuiaikunata, piñaspa rabiariikunata, rabiariispa kapariikunata, mana alli kamispa rimaikunata, tukui mana alli ruraikunatapas sakiichi. ³² Kam kikinpura tukui sumaglla alli aidachirinakuspa kaugsangichi. Imasami Taita Dius, Cristowa kamkunapa pandariikunata pasinsiarika: chasallatami kam kikinpura iukangichi pasinsianakunga.

5

Taita Diuspa wambrakuna, imasa kaugsai iukaskakunamanda

¹ Chimanda, Taita Diuspa kuiaska wambrakuna kaspá, paisinallatata tukuipi sumaglla kaugsanakungichi. ² Imasami Cristo, nukanchita suma kuiarka: chasallata kam kikinpurapas sumaglla kuianakuspa kaugsangichi. Pai kikinmi sakirirka, nukanchimanda wañuchii tukungapa. Imasami judiukuna Taita Diusmanda ubijata wañuchispa rupachitura, kusnisina suma asná: chasallatami Cristo wañuchii tukugmanda, Taita Diuspa ñawipi sumaglla tukugsamurka.

³ Kamkunaka, ña Taita Diuspallami kangichi. Chimandaka, kari warmiwa pandariskamanda, sug rigcha jiru pandariskakunamanda i sugkunapata munariskakunamanda kamkunapura mana iacharichu. ⁴ Millai, jiru, upa parlukunatapas mana rimanakungichi. Chasa parlukuna, mana kamkunata chaianchu rimangapa. Chasapaka, Taita Diusta:

“Pai Siñur” nispallami iukangichi kaugsanakunga. ⁵ Kasami iachangichi: maikan kari warmiwa pandarig, sug rigcha jiru pandariikunapas rurag, sugkuna iukaskata munarig, Cristo i Taita Dios suma mandakuskapi mana pudingakunachu iaikugringapa. Chasa munarigkunaka, ianga diuskunata kunguriginami rurankuna.

⁶ ¡Ujalallapas ianga rimaikunawa llullachispa, kamkunata pandachichukuna! Chasa jiru ruraskakunamandaka, Taita Dios, pai ima niskata mana ruragkunawa askurintimi rabiariksamungapa ka. ⁷ Chimanda kamkuna, mana paikunawa iuianakungichi, chasa jiru ruranakungapa.

⁸ Kamkuna, ñugpata iana tutapisinami kaugsanakurkangichi. Ikuti kunaauraka, Iaia Jesusa kaspaka, punchapi kaugsaginami kangichi. Chimandami kamkunapas sugkunata punchaiachigsina kaugsai iukangichi. ⁹ Chasa kaugsagkunami, sugkunata tukuipi allilla sumaglla ruraspá, ñi imapipas mana llullaspalla kaugsankuna. ¹⁰ Iaia Jesús ima munakuskata iuiarispa, tukui allilla rurangichi.

¹¹ Iana tutapisina kaugsagkuna, Diospa ñawipi ñi imapa mana balimi rurankuna. Mana paikunawa sugllapisina jiru ruraspá kaugsanakungichi. Paikuna jiru ruranakuskamanda, piñaspá iuiachingichi. ¹² Paikuna ima pakalla ruranakuskamanda iachaspá rimagpika, pingaimi tukugsamungakunata. ¹³ Chi pakalla jiru ruranakuskamanda punchaiachig kawachiura, tukuimi iacharigsamungapa ka. ¹⁴ Cristo kikin punchaiachigsamuuraka, tukuimi punchaiachii tukungapa kankuna. Chimandami kasa niraiá:

Kam puñukug, rigcharii.

Wañuskasina kaspa, atarii.

Cristomi kamba iuiaikunata

punchaiachigsamungapa ka.

¹⁵ Chimanda, allilla iuiariichi, imasami iukangichi kaugsanga. Upakunasina mana kaugsanakuichi. Chasapaka, tukuipi alli iachagsina kaugsanakungichi. ¹⁶ Kaugsankama iukangichimi, tukuipi allilla ruraspá chisianakunga. Nukanchita chaiakumi, mana alli ruranakug kaskapi kaugsangapa. ¹⁷ Chimanda, upakunasina mana kangichi. Iaia Jesús ima rurangapa munakuskata iachaikuspa, chita ruraspá kangichi.

¹⁸ Mana machangichi. Machaska purigkunaka, tukuipimi mana allilla rurankuna. Chasapaka Santu Espíritu, kamkunapa iuiapi jundagsamuchu. ¹⁹ Taita Diusta tukui sug rigcha sug rigcha suma kantukuna birsiaspa, kam kikinpura sumaglla iuiachirinakuspa kangichi. Tukui iuiaiwami iukangichi, Iaia Jesusta kantaspa, “Tapa allimi kangí” nispa kangakuna. ²⁰ Imaurapas tukuimanda “Pai Siñur” Taita Diusta nispa kangichi, nukanchipa Iaia Jesucristota iuiarispa.

Cristowa tukuskakuna, imasa sugkunawa kaugsanakui iukaskamanda

²¹ Cristota suma manchaspá, kam kikinpura parijuma sumaglla uianakuspa kaugsangichi.

²² Warmikunata niikichitami:

imasami Iaia Jesusta uiangichi: chasallata kamkunapa kusata sumaglla uiangichi. ²³ Imasami Cristo, uma kagsina, tukui paiwa tukuskakunapa iaia ka: chasallatami kamkunapa kusapas, warmipa iaia ka. Cristo kikinmi ka tukui paiwa tukuskakunata kispichig. Tukui paiwa tukuskakunaka, paipa kuirpumi niraianchi. ²⁴ Imasami Cristowa tukuskakuna, paipa uianchi: chasallatami warmikunapas iukangichi, kamkunapa kusata imapipas uianga.

²⁵ Kusakunata niikichitami:

imasami Cristo, tukui paiwa tukuskakunata kuiaspá, nukanchimanda wañurka: chasallata kusakunapas, kamkunapa warmita sumaglla kuiaspá kaugsangichi. ²⁶ Nukanchimanda Cristo wañurka; chasaka, Diospa Rimaita uiaspa, iakuwa baugtisarispá, Taita Diosmandalla kaugsangapa; ²⁷ chasaka tukui Cristowa tukuskakuna, paipa ñawipi imapipas allilla sumaglla kawarigringapa, ñi imapipas mana mapasina kaspa, paipalla kangapa.

²⁸ Imasami kusakuna, kam kikinkunapa kuirputa kuidaringichi: chasallatami iukangichi, kamkunapa warmita sumaglla kuiaspá kanga. Maikanpas kikinpa warmita sumaglla kuiagpika, kikinllatata kuiagsinami niraiá. ²⁹ Ni pipas pai kikinpa kuirpuwaka mana rabiarinchu. Chasapaka, mikui karaspá, sumaglla kuidaspami kuirputa charí. Chasallatami Cristo, tukui paiwa tukuskakunata sumaglla kawaspá charí. ³⁰ Cristowa tukuskakunaka, paipa kuirpumi niraianchi.

³¹ Kasami Taita Dios ñugpata nirka:

Chimandami kari,

paipa taitata mamandita sakispa,

paipa warmiwa iskandikuna

sugllasina tukugsamungapa kankuna.

³² Chi rimaita, iapa atun kagmanda, ñi pipas mana iachagsamungapa kanchu. Chasa kagpipa, nuka kasami niikichita: Cristo i tukui paiwa tukuskakunawa suglla kagtami niraiá. ³³ Kasapasmi niraiá: tukui kusakuna, imasami kam kikinkuna kuiaspa kuidaringichi: chasallatami iukangichi, kamkunapa warmitapas kuianga. Warmikunaka, kamkunapa kusata sumaglla uiangichi.

6

¹ Wambrakunata niikichitami:

Jaia Jesusta kuiaspa, kamkunapa taita i mama tukui ima niskata allilla rurangichi. Chasa ruraspaka, allillami ka. ² “Kamba taitata mamandita sumaglla kuiangi”; chi ñugpa mandaiwami chasa uiagkunata, Taita Dios kasa karamungapa nirka:

³ Kam chasa kuiagpika, tukuipimi alli kankangi;

kai alpapi unaimi kaugsankangi.

⁴ Taitakunata i mamakunata niikichitami:

kamkunapa wambrakunata mana llakichingichi. Chasapaka, Jaia Jesuspa kuiaiwa paikunata iuiachispa, suma asutispa wiñachingichi.

⁵ Lutrunkunata niikichitami:

imasami Cristota manhaspa uiantrangichi: chasallata kamkunapa kai alpapi patrún niraiaskakuna tukui ima niskata allilla rurangichi. ⁶ Mana kawanakugmandalla allilla ruraspaka kangichi, “Sumami rurakungi niwachukuna” iuiaspalla. Imasami Cristo ima niskata allilla ruranturangichi: chasallatami iukangichi, kamkunapa patrún ima niskata tukui iuiaiwa allilla rurangkuna. Chasami Taita Dios muná. ⁷ Runakuna ima niskata ruragsinaka mana iuiangichi. Jaia Jesús ima niskata ruragsinami iukangichi, tukuipi imapas allilla rurangkuna. ⁸ Kasapasmi iachangichi: tukui lutrin u patrunkuna allilla ruragpikunaka, Jaia Jesuska imasa kadaunta chaiskasinami karagsamungapa ka.

⁹ Patrunkunapas, chasallata kamba lutrinkunawa alli kangichi. Mana manchachingichi, “Asutingapami kaiki” nispa. Iuiariichi, paikunata i kamkunata mandag Taita Dios suma luarpi kagta. Paipa ñawipi, ñi pipas mana tianchu sug rigcha.

Taita Dios karamuska tukui katangasinata churarisunchi

¹⁰ Kunauraka, kasapasmi niikichita: Jaia Jesuswa i pai tukui rurag iachaiwami sinchi wapu iukangichi tukunga. ¹¹ Taita Dios karamuska tukui katangasinata churariichi; chasaka, iaia kukupá llullachiikunata kispiringapa. ¹² Aichaiug iawariug runakunawaka nukanchi mana makanakunchichu. Kai iana tutaiaskasina alpapi iapa pudi mandag i atuniachirispá kuku wairakunawa, awa wairapi iapa pudig kuku wairakunawami makanakugsina kanchi. ¹³ Chimanda, Taita Dios karamuska tukui katangasinata churariichi; chasaka, mana alli punchakuna chaimuura, chi kukukunawa makanakuipi wapulla saiarispa mitikuchingapakuna.

¹⁴ Chasa paikunata mitikuchingapaka, sutipa Alli Willaita allilla chumbilliskasina kaichi. Alli ruraiillawa kaugsaspaka, pichupi iru katanga churariiskasina tukungichi. ¹⁵ Chakipi churariiskasina niraianmi sumaglla kaugsaimanda Alli Willaita willai. ¹⁶ Imaurapas Cristowa suma iuiarispalla kaichi; chasaka, michadiruta makipi chaririskasina kangapa. Chasa iuiarispaka, iaia kuku tukui kachaska flichá sindisina millai iuiaikunata kispiringapami kangichi. ¹⁷ Cristo kamkunata diltudupa kispichingapa iuiarispá kaichi; chiwanka, michadiruta umapi churariiskasina kangapa. Santu Ispiritu karamuska makanasinaka niraianmi Diospa Rimai. ¹⁸ Santu Ispiritu iuiachiska rimai-kunawa imaurapas Taita Diusta mañangichi i ruangichi. Chasa rurangapaka, sumaglla iuiaiwa allichiriskasina kaichi, mana sambaiaspalla. Tukui Diuspalla kagkunamanda paita mañapuichi.

¹⁹ Nukamandapas chasallata Taita Diusta mañapuichi, tukuipi nuka sumaglla riman-gapa; chasaka, pitapas mana manhaspalla, Alli Willaita mana pipas iachaskata nuka willangapa. ²⁰ Kikin Taita Diosmi nukata kachamuwarka, chi willaita tukuikunata willangapa. Chi willaillatata nuka willaskamandami kunaúra kaipi wataska wichkaraiani. Taita Diusta mañapuichi, nuka rimangapa chaiaura, mana manhaspalla Alli Willaita willangapa.

Kaiakama, niskamanda

²¹ Nukanchipa kuiaska waugki Tíkiko, Jaia Jesusmanda tukuipi alli ruragmi ka. Paika, kamkunapagma chaisgrispa, nuka imasa kaskamanda tukui ima rurakuskatami willag-ringa. ²² Kasamandami paita kamkunapagma kachakuni: nukanchi kaipi imasa kaskamanda willagringapa. Chasaka, kamkuna mana sambaiankangichichu.

²³ Taita Dios i Iaia Jesucristoka, kam taita i mamakunata sumaglla kaugsaita karaspa, kuiaspa, iuiachipuachu, paiwa suma iuiarispa kangapa. ²⁴ Mana tukurig kuiaiwa, nukanchipa Iaia Jesucristota tukui kuiagkunata, Taita Dios sumaglla kawapuachu.

FILIPOS PUIBLUPI CRISTOWA TUKUSKAKUNATA SAN PABLO KARTA KACHASKAMANDA

¹ Nukanchi Pablo i Timoteo, Jesucristopa lutrinsinakunami kanchi. Tukui kamkuna, Jesucristowa tukuspa, Taita Diuspalla kaspera, Filipos puiblupi kaugsagakunatami kai karta kachanchi. Kamkunata iachachig taitakunata, kamkunata aidag taitakunata i tukuikunatas, ² nukanchipa Taita Dios i Iaia Jesucristo, kuiaspa, suma iuiaiwa kawapuachu.

Cristowa tukuskakunamanda Taita Diusta mañaskamanda

³ Nuka, kamkunamanda imaurapas iuiarispa, nukapa Taita Diusta Pai Siñurmi nini. ⁴ Chasallata, paita kamkunamanda iuiarispa mañaura, imaurapas alli iuiachiiwami tukuikunamanda mañapuikichita. ⁵ Kamkuna, Cristowa tukuskauramandata aidawanakungichimi, paimanda Alli Willaita willaspa nuka puringapa. ⁶ Kasami allilla iachani: Taita Dios, kamkunawa allilla rurai kallarisa, chasami rurakunga, ikuti kikin Jesucristo samunkama. ⁷ Tukui kamkunata nuka suma kuiaspami alli ka, nuka chasa iuiangapa. Nuka karsilpi kaspapas, justisiyakunapa ñawipi mana manchaspallami saiarispa, nini: “Kai Alli Willai, sutipami ka”. Chasawaka, tukui kamkunapas nukawa Taita Diuspa suma kuiaitami chaskinakungichi, imapipas allilla rurawagmunda.

⁸ Taita Diosmi iachá, nuka kamkunata kuiagta; imasami Jesucristo nukanchita suma kuiá: chasallata. ⁹ Chimandaka, kasami paita mañapuikichita: kamkuna mas sumaglla kuianakuspa, tukui punchakuna kaugsanakungapa; chiwanka, allilla iachaspa i imapipas alli iuiaiwa kangapa. ¹⁰ Chasami iachankangichi, maikan mas suma ruraiakuna agllaspa, ruraspa kaugsanakungapa. Chasaka, Cristo ikuti samuura, kamkuna tukuipi alli mana imapipas pandariskami kawarinkangichi. ¹¹ Kamkuna allilla ruraspa kaugsaspaka, Jesucristowa tarpuskata pallaskasinami tukunkangichi. Chasaka, Taita Diusta suma atuniachispami pai alli kagta kawachinkangichi.

Cristo kikinmi nukapa kaugsai kapuá, niskamanda

¹² Taitakuna i mamakuna, kasapasmi nuka willaikichita: nuka kai karsilpi kagpipas, Alli Willaitaka mas sumagllami miraspa uiariku. ¹³ Kai iaia mandagpa wasipi i sugkunapagpipas, tukuikunami iachankuna, nuka Cristomandalla kaipi wataraiagta. ¹⁴ Chasallata, Iaia Jesuswa tukuskakuna, ñalla tukuikuna, nuka wichkaraiaigta iachaspaka, animurispa, Diospa Rimaia mana manchaspallami willanakú.

¹⁵ Sugkunaka, nukamanda mana allilla iuiaspa kawawagkuna, Cristomandallatami willanakú, “Nuka, Pablomanda masmi kani” kikinikuna iuiarispa. Ikuti sugkunaka, alli iuiaiwami paimanda sumaglla willanakú. ¹⁶ Paikunaka, nukata kuiawaspami Cristomanda willanakú, kasa iachaspa: Taita Diosllatata kai karsilpi chariwakugta; chasaka, Alli Willaita mana manchaspalla willakungapa. ¹⁷ Chi sugkunaka, “Nuka, Pablomanda masmi kani” kikinikuna iuiarispami Cristomandallatata willanakú. Chikunaka, kikinmandalla iuiarispami willanakú. Nuka karsilpi kaskatami mas llakichiwangapa munanakú. ¹⁸ Chasa munanakugpipas, nuka ninimi: “Paikuna iachachukuna”. Allilla u mana allilla iuiaiwa willanakugpipas, Cristomanda willanakugpika, nukataka allimi uiariwá.

Kasamandami mas alli iuiachiiwa kangapa kani: ¹⁹ kamkuna Taita Diusta mañapuas-kamanda i Jesucristopa Espíritu aidawaskamanda, iachanimi nuka kaimanda llugsingapa kagta. ²⁰ Suma alli iuiaiwami suiakuni, nukata Cristomanda tapuchiwanaakuura, nuka tukuipi allilla ainingapa. Chiwanka, sug biacijunasina, kunaaurapas mana manchaspallami ainisa. Chasaka, nuka kaugsangapa u wañungapa chaiawagpipas, munanimi, Cristota mas suma atuniachiska kapuachu. ²¹ Chasawaka, nuka kaugsankama, Cristo kikinmi nukapa kaugsai kapuá. Nukata wañui chaiamuwauraka, tukui alli sumagllami sug luarpi tukupuagringapa ka. ²² Nuka chara kaugsangapa chaiawagpika, Taita Diosmandallami imapas allilla ruraspa kaugsakusa. Chasa iuiarispapas, mana iachariwanchu, maikanta agllanga: kaugsaita u wañuita. ²³ Iskandinigmandami chariwanakú. ¿Wañungapachu munantrani; chasaka, Cristowa sugllapi kagringapa? Chasawaka, mas allilachar kantrani. ²⁴ Ikuti nuka kamkunawa mas unai kaugsakugpika, kamkunamandami mas allilla kantra. ²⁵ Chasa iuiarispaka, iachanimi, nuka mas unai kamkunawa kangapa kagta; chasaka kamkuna, Cristowa mas suma iuiarispa, alli iuiachiiwa kangapakuna. ²⁶ Chasa nuka ikuti kamkunawa kauraka, kamkuna Jesucristomanda mas suma alli iuiachiiwami tukunkangichi.

²⁷ Kasallami mañaikichita: Cristomanda Alli Willaita mana kungarispalla, allilla ruraspa kaugsapungichi. Chasaka, nuka kamkunata kawangapa rigpi u mana rigpipas, kamkunamanda iachasami, suglla iuiaiwa chi Alli Willaita mana sakisipalla kaugsanakugta.

Chasallata tukui kamkuna, sugllasina tukuspa, Alli Willaita suma iuiaspa charingichi. ²⁸ Kamkunata piñagpikunaka, mana imapipas paikunata mancharingichi. Chasa mana manchagpikunaka, paikunamanda niraianmi puchukaringapa rinakugta. Ikuti kamkunamandaka niraianmi kispiringapa kagtakuna. Tukui, Taita Diusmi chasa rurá. ²⁹ Taita Diusmi Cristomanda kamkunata kararka, paiwa suma iuiaringapaglla, mana. Paimanda llakii pasangapapasmi nirka. ³⁰ Kamkuna i nuka, sugllapisinami bingsingapa iuiaiwa llakii iukanchi. Nuka llakiita binsikugta kawawarkangichimi. Nuka kunaura llakiita binsikugtapas ñami iachangichi.

2

Cristosina mana atun tukuspa iuiaiwa kasunchi

¹ ¿Manachu Cristo, kamkunata suma kuiaspa iuiachi? Santu Ispíritu, ¿manachu kamkunawa sugllapi ka? ¿Manachu kam kikinpura kuianakuspa, llakiiwa kaskakunata sumaglla iuiachinakuspa kapuangichi? ² Chasa kagpika, nukata iapa sumami kuntintachiwankangichi, sugllasina tukuspa, sugllasina kuianakuspa i sugllasina iuiarispalla kaugsapuana-kugmanda.

³ Mana imapas rurangichi, “Nukanchi, sugkunamanda masmi kanchi” iuiarispá ñi kam kinkuna atun tukugsina iuiarispá kangapa. Chasapaka, mana atuniachirispalla, sugkunamanda iuiarispá kangichi: “Nukanchimanda mas allimi kankuna”. ⁴ Mana imapas maskangichi kam kinkunamandalla. Sugkunamandapasmi iukangichi, chasa allilla rurangapa iuiarispá kangakuna.

⁵ Iukangichimi, Jesucristo imasa iuiariskata iuiarispá kangakuna. ⁶ Paika, Taita Dius imasa kaskasinallatata kaspapas, mana nirka: “Atuniachirisami, Taita Diuswa iwallla kangapa”. ⁷ Chasapaka, pai kikin, tukuiipi suma atun Taita Diussina kaspapas, sakispa, nukanchisina aichaiug tukurka, sugkunamanda lutrinsina kangapa. Nukanchi nurasina ña kaspá, ⁸ mana atun tukuspa, Taita Dius ima munaskata rurarka, kruspi wafuchii tukugta.

⁹ Chimandami Taita Dius, paita tukuikunamanda mas atuniachirka. Paipa suti kaskatapas nirka, tukui sutikunamandapas mas atun kangapa. ¹⁰ Chimanda, Jesuspa sutita uiaspa, tukuikunami kunguringapa kankuna: sug luarpi, kai alpa luarpi i alpa ukuma kagkunapas. ¹¹ Tukuikunami ningapa kankuna: “Kam Jesucristo, tukuikunamanda Iaiami kangí”. Chasa nispaka, Taita Diustami suma atuniachingapa kankuna.

Tuta alpapi kaugsanakuskata punchaiachigsina kasunchi

¹² Chimandami niikichita, nukapa kuiaskakuna, imasami, nuka kamkunawa kaura, imaurapas nuka niskata rurarkangichi: chasallata, nuka mana kamkunawa kagpipas, nuka imasa nikuskata ruraspa kaugsanakungichi. Kamkuna diltudupa kispiringapa iuiarispá, manchaiwa chugchurigsina kaspá, tukui allilla ruraspa kangichi. ¹³ Taita Diusmi kamkunata iuiachiku, pai imasa munaskasina allilla iuiapi ruraspa kaugsanakungapa.

¹⁴ Ima ruraipipas, sugkunamanda mana wasa rimaspalla, mana piñachirinakuspalla kaugsangichi. ¹⁵ Chasaka, ñi pipas mana pudingakunachu, kamkunamanda imapas ninga. Taita Diuspa ñawipi, ñi imapipas mana mapasina tukuiipi alli wambrakuna kangichi, kai alpapi jiru mana allilla ruradurkunapa chaugpipi kaugsangapa chaiagpipas. Chasa kaspaka, paikuna tuta alpapi kaugsanakuskata punchaiachigsinami kankangichi. ¹⁶ Kamkunapa suma kaugsaiwami kawachinkangichi, Taita Diuspa Rimai iapa suma allilla kagta. Kamkuna chasa kaugsagpikunaka, Cristo samuura, nuka mana ianga kaugsaskata i willaskata iachaspa, iapa alli iuiachiiwami kangapa kani. ¹⁷ Kamkuna, Cristowa suma iuiarispá, Taita Diusmanda wagra ufrinda rupachispa miski asnachiskasinami allilla ruranakungichi. Kamkunapa ufrindapi churagsina, nukapa kaugsaita puchukangapa chaiawagpipas, nuka iapa alli iuiachiiwami kangapa kani. Ari, tukui kamkunawami iapa alli iuiachiiwa kangapa kani. ¹⁸ Kamkunapas, chasallata alli iuiachiiwa kuntintulla kangichi. Ari, tukuikuna nukawa alli iuiachiiwa kuntintulla kasunchi.

Waugki Timoteomanda

¹⁹ Iaiá Jesús munagpika, iuiakunimi, waugki Timoteota mana unaiilla kamkunapagma kachangapa; chasaka, pai kutimuspa, kamkuna imasa kaskata willawaura, sumaglla kuntintulla iuiachiwanga. ²⁰ Timoteomi nukasina kamkunamanda tukui allilla iuiarispá ka. Sug paisinaka mana iukanichu. ²¹ Ikuti sugkunaka, pai kinkunamandallami iuiarinkuna. Jesucristomandaka mana iuiarinkunachu. ²² Chasa kagpipas, Timoteo imasa alli kagta ñami iachangichi. Paika, nukapa wambra kagsinami ka; tukui pariju Alli Willaita willaspami puriku. ²³ Chimandami iuiakuni, paita kamkunapagma kachangapa, nukamanda iacharigllapi ima nukata justisiakuna rurawangapa kagtakuna. ²⁴ Chasa

kachaspapas, Iaia Jesustami mañakuni, nukapas rispa, utkalla kamkunapagma chaigringapa.

Waugki Epafroditomanda

²⁵ Allimi rigchawaku, waugki Epafroditotapas kamkunapagma ikuti kachangapa. Paimi nukawa sugllapi imapipas alli ruraspapurirka. Chasallata parijuma animuchigmi kapuá. Kam kikinkunami paita kachamurkangichi, nuka ima ministiskata kawapuangapa. ²⁶ Paika, ajaimi munaku, ikuti kamkunata kawagringapa. Paimanda unguiwa kagta kamkuna iachagta uiaspaka, iapami llakirirka. ²⁷ Chika, sutipami pai iapa ungug karka, ña wañungasina. Chasa kagmanda, Taita Dios paimanda llakirirkami. Paimandalla mana; nukamandapasmi llakirirka; chasaka, nuka mana mas llakiikuna iukangapa. ²⁸ Chimandami munakuni, mas utkalla kamkunapagma paita kachangapa; paita ikuti kawaspaka, kamkuna alli iuiachiwa kangapakuna. Chasaka, nukapa llakiikunata kungarigsinami iuiachiwanga. ²⁹ Paita alli iuiachiwa chaskipuangichi, Iaia Jesusta: “Pai Siñur” nispa. Paisina kaugsanakuskata munapuangichi. ³⁰ Cristo imasa munaskasina pai rurakuspami ñalla wañungapa karka. Paipa kaugsaita nukamanda llakispa, wañui kispigta churarka, kamkuna iapa karupi kaspa, nukamanda mana imapas rurangapa pudirigmanda.

3

Jesucristo, tukuikunamanda mas bali kaskamanda

¹ Kunaura, taitakuna i mamakuna, Iaia Jesuswa alli iuiachiillawa kapuaichi. Mana saikuwanchu, kamkunata chasallata ikuti ikuti rimakungapa; chasaka, kamkuna allilla kangapakuna.

² ¡Ujalallapas alkusina rabiawa kaugsaspa jiru ruragkunawa sugllapi kangichi! Paimunaka, judiukunapa markata kuirpupi churachigkunami kankuna. ³ Ikuti nukanchimi sutipa markata churaska niraianchi. Santu Ispirituwa Taita Diusta kungurispas, Jesucristowa alli iuiachirispami kanchi. Nukanchi imasa kaskasinallawa mana iuiarinchichu kispiringapa. ⁴ Chasa kagpipas, nukaka pudintranimi, nuka imasa kaskasinallawa kispiringapa.

Maikanpas imasa kaskasinallawa kispiringapa iuiarigpika, maspasmi nuka pudintrani iuiaringapa. ⁵ Puspuncha tiagsamuska kauraka, judiukunapa marka kuirpupi churasakami kani. Ñugpamanda achala taita Israelpa iawarmi kani. Nukapa ñugpamanda achala taitaka, Benjaminmi suti karka. Nukapa taita i mama, hebreomi karkakuna. Chimandami nukapas hebreollata kani. Moisés ima rurangapa niskata iachaikuspa, fariseomi nuka karkani. ⁶ “Moisés niskata tukui allillami rurakuni” iuiaspa, Cristowa tukuskakunata puchukangapa kalpachidurmi karkani. Moisés tukui ima niskata allillami rurakuni. Chasaka, ñi pipas mana pudirkakunachu, nukamanda imapas niwangakuna.

⁷ Nuka chasa kagpipas, tukui ima ñugpata nukamanda baligsina niraiaskaka kunaauraka ñi ima mana balinchu, nuka Cristowa kagmanda. ⁸ Iaia Jesucristota nuka rigsingamanda, paimi nukamanda tukui tukupuarka. Chimandami nini: tukui ima mana paiwa kaskaka, ñi imapas mana balinchu. Cristowa nuka tukuskamandami tukui ima iukaska, kichui tukugsina kani. Chi tukui ima mana paiwa kaskaka, ismuskasinami niraiá. Chimanda, tukui sakispa, ⁹ Cristopagma chaigrispa, paiwa kagringapa: chasaka, tukuimanda mas allimi ka.

Nuka mana munanichu, Moisés niskallata uiaspa ruraskawa mana pandarigsina kangapa. Cristowa suma iuiariskawami mana pandarig niraiangapa munani. Ari, munanimi, paiwa suma iuiarispa, Taita Diospa ñawipi mana pandarig niraiangapa.

¹⁰ Kasapasmi munani: Cristota mas allilla rigsingapa i pai iapa iachaiwa imasa kaugsariska kagta iachangapa. Pai imasa llakii iukaskata, nukapas paiwa llakii iukangapami munani. Imasami pai wañurka: nukapas chasallatami munani. ¹¹ Chasa wañuspaka, nukapas ikuti kaugsaringapami iuiani.

Munasunchi, tukuipi Jesucristo imasa munaskasina kaugsangapa

¹² Nuka mana nikunichu, ña tukui chi munaskakunallawaka tukuipi allilla tukuska kagta. Imasami Jesucristo, nukata agllawarka: chasamandami nuka munakuni, pai imasa munawaskasina kaugsangapa. ¹³ Taitakuna i mamakuna, mana niikichitachu, tukuipi pai imasa munawaskasina ña kaugsakugta. Nuka ñugpata imasa kaugsakuskata sakispa, kunaura munanimi, kati kati sinchi paita katichispalla kangapa; ¹⁴ chasaka, maipi chaigriruma chaigringapa. Chiwa, imasami Taita Dios, Jesucristowa nukata kaiawa: chasamandami suma luarpi ima karawangapa kaskata chaskigringapa suiakuni.

¹⁵ Imasami Jesucristowa allilla iuiarispa kanchi: chasallatami iukanchi, iuiarispa kangakuna, paipagma chaiagrinkama. Kamkuna imapipas sug rigcha iuianakugpika, chitapasmi Taita Dios allilla iuiachinga. ¹⁶ Chasa kagpipas, nukanchi ña iachaskatami iukanchi alli iuiarispa kangakuna.

¹⁷ Taitakuna i mamakuna, kawawaichi imasa nuka kaugsakugta. Chasallatami kamkuna iukangichi kaugsangkuna. Maikan imasa nukanchi iachachiskasina kaugsanakuskatapas kawaspa, chasallata kaugsangichi. ¹⁸ Ña achka biajimi kasa willarkaikichita. Iktimi kuna rapas wakaspa niikichita: Cristo kruspi wañugpipas, achkakunami paita mana munaspa kaugsanakú. ¹⁹ Chasa kaugsanakugka, kai alpa tukurii puncha, diltudupa chingangapa luarma sitai tukungapa kankuna. Kuna paikunapa wigsallami dius niraipakunata. Paikunapa jiru ruraikunawa pingaichirigsina tukungataka, chikunawa atuniachirigsinami iuiarinkuna. Kai alpapi ima tiaskakunallowami iuiarispa kaugsangkuna.

²⁰ Ikuti nukanchika, suma luarpi kaugsangringapami niraianchi. Chimandami Iaia Jesucristo kispichig ikuti samunkama suianakunchi. ²¹ Pai Jesucristomi nukanchipa ismungapa kuirputa sug rigcha ruragsamungapa ka, pai kikinpa suma kuirpusinallata kawari. Paipa iapa iachaiwami chasa ruragsamungapa ka. Paipa iapa iachailawami tukuipi pai ima niskata tukugsamungapa ka.

4

Iaia Jesuswa imaurapas alli iuiachiillawa kasunchi

¹ Chasamanda, nukapa kuiaska taitakuna i mamakuna, Iaia Jesusllawa iuiarispa kangichi, mana sambaiaspalla. Nuka, ajaimi munakuni kamkunata kawagringapa. Kamkunawami alli iuiachiwa kani. Kamkunami nukapa llaugtusina kangichi.

² Pani Evodiata i pani Sintiketaka kasami mañaikichita:

Iaia Jesuswa suma iuiarispa ñañandisina, suglla kagsina tukugsamuichi. ³ Chasallata, kam waugki nukawa Taita Diosmanda allilla ruragtapasmi kasa mañai: chi panikunata iuiachispa aidapuai, sugllasina kaugsanakungapa. Paikunaka, waugki Klementewa i sug nukawa waugkikunawanta, Alli Willaita mana munanakuskatapasmi willai aparkakuna. Paikunapa sutikuna, diltudupa kaugsangapa willaraiaska librupimi willaraiá.

⁴ Iaia Jesuswa imaurapas alli iuiachiillawa kapuangichi. Iktimi niikichita: paiwa alli iuiachiillawa kangichi. ⁵ Tukuikuna kamkunamanda iachachukuna, tukuipi sumaglla ruraspa kaugsanakugta. Iaia Jesús samungapa puncha, ñami chaiaku.

⁶ Ñi imamandaspa mana llakispa kangichi. Chasapaka, tukui imamandaspa Taita Diusta willanakungichi. Paita tukui mañaspa, “Pai Siñur” ningichi. ⁷ Chasa kaugsanakuskataka, Taita Dioska paipa sumaglla kaugsaitami karamunga. Chi sumaglla kaugsaika, tukui iuiaita ialigtami ka. Chi sumaglla kaugsaita karamuskawaka, kamkunapa uma i suma iuiái, Jesucristopa wakachiska kagsinami kankangichi.

Alli kaskakunallata iuiarispa kasunchi

⁸ Taitakuna i mamakuna, kasapasmi niikichita: tukui sutipa kaskata iuiarispa kangichi. Chasallata iuiaringichi, tukui allilla uiangapa chaiakuskata, tukui suma alli chaia kaskata, tukuipi alli kagta niraikaskata i ima suma alli kaskamanda suma rimangapa chaiakuskata. Chikunamandami iukangichi iuiarispa kangakuna.

⁹ Imasami nuka iachachispa rimaskata uiawarkangichi i imasami nuka ruraskata kawawarkangichi: chasallata ruraspa kaugsapuangichi. Kamkuna chasa kaugsanakugpika, Taita Dios suma iuiailapi charigmi kamkunawa sugllapi kangapa ka.

Filiposmandakuna, San Pablota kulki karaskamanda

¹⁰ Kamkuna ikuti nukata iuiariwagmanda, Iaia Jesuswa iapami alli iuiachiwarka. Nuka chasa nigpipas, mana niraianchu, kamkuna nukata kungariwaska kagta. Nukata maituku iuiariwanakugpipas, mana pudirkangichichu aidawangapa. ¹¹ Nukata ima pisiwagmandaka mana rimaikichitachu. Iachaikurkani, nuka ima iukaskallawa allilla iuiarispa kaugsangapa. ¹² Iachanimi ima ministiska kaugsaita. Achka iukaspa kaugsaitapasmi iachani. Iacharidumi kani, imasa kaugsagpipas, allilla iuiarispa kaugsangapa: sagsagta mikuspa u iarkaiwapas, puchugta iukaspa u ñi ima mana iukaspas. ¹³ Cristomi kuawá, nuka chasa suma kaugsangapa. Tukui, paiwami pudini. ¹⁴ Chasa pudigpipas, nuka llakiwa kaura, kamkuna suma allilla karawaskawami aidawarkangichi.

¹⁵ Kam Filiposmanda runakuna iachangichimi, nukaka Alli Willaita willagringapa kamkunapa Masedonia alpamanda manara llugsigpi, Cristowa iuiagkuna sugnigta kaskakuna, ñi maikanpas mana aidawagtakuna. Kamkunallami, nuka ima willaskata uiaspa, Taita Diusta karagsina kulkitarawarkangichi. ¹⁶ Nuka Tesalónika puiblupi kaurapas,

nuka ima ministiskakunamanda ikuti ikutimi karawangapa kachapuarkangichi. ¹⁷ Nuka chaskikungapaglla mana munanichu. Kamkunamanda munanimi, chi karawaskakunawaka, Taita Diuspa ñawipi kamkuna achka miraskata chaskigringapa. ¹⁸ Kamkuna tukui ima kachamuwaskawaka puchugtami iukani. Epafroditowa ima kachamuwaskatami chaskirkani. Chiwanka, ñi ima mana pisiwanchu; kamkuna ima karawaskaka, Taita Diusmanda insinsu rupachiura, miski asnami niraiá: chasa. Chitami Taita Dius, suma kawamuspa, kuntintarispa, chaskigsina rurá. ¹⁹ Imasami nukapa Taita Dius, Jesucristowa iapa achka tukui suma iuká: chasallatami kamkunatapas tukui ima pisikuska karamunga. ²⁰ Nukanchipa Taita Diusta nisunchi: “Kam, iapa suma atunmi kangí, maituku waranga waranga watakuna ialigpipas”. Chasa kachu.

Kaiakama, niskamanda

²¹ Tukui Jesucristowa tukuskakunata: “Puangi” nipaiaichi. Nukawa kaipi kag waugki-kunami kamkunata: “Puangi” ninkuna. ²² Taita Diuspalla kagkuna tukui kaipi kagkuna-pasmi, “Puangi” ninkuna. Iaia mandagpa wasipi kagkuna, masmi kamkunata: “Puangi” ninkuna.

²³ Iaia Jesucristo, tukui kamkunata sumaglla kawapuachu. Chasa kachu.

KOLOSAS PUIBLUPI CRISTOWA TUKUSKAKUNATA SAN PABLO KARTA KACHASKAMANDA

¹ Taita Dius munaskamanda, Jesucristo kachamuwaskami nuka kani, Alli Willaita willaspa puringapa. Waugki Timoteowa kaspá, ² kamkuna Cristowa suma iuiarispa Taita Diuspalla kaspá taita i mamakunata, Kolosas puiblupi kaugsagkunatami kai karta kachaikichita. Nukanchipa Taita Dius, kamkunata kuiaspa, suma iuiaiwa kawapuachu.

Cristowa tukuskakunamanda Taita Diusta mañaskamanda

³ Nukanchipa Iaiá Jesucristopa Taita Diusta imaurapas kamkunamanda mañaspa, Pai Siñurmi ninchi. ⁴ Kamkuna Jesucristowa suma iuiariskamandami iachagsamurkanchi. Chasallata, tukui paimandalla sumaglla kaugsanakugta, kamkuna kuianakuspa kagtakunami iachagsamurkanchi. ⁵ Kamkuna suma luarpi ima chaskigringapa suianakuspa chasa kaugsanakungichi. Sutipa Alli Willaita uiaspasi chasa suianakungichi. ⁶ Imasami tukui alpapi chi Willaita suma iuiarigkuna mas miraspa rinakú: chasallata kamkuna kaskapi; chi Willaita uiaspa, Taita Diuspa suma kuiaita sutipa kagta iachaskauramandasi mas allilla ruraspa kaugsanakungichi. ⁷ Nukanchipa kuiaska waugki Epafraswasi chasa iachaikurkangichi. Paika, nukanchiwa Cristopa lutrinsinami ka. Kamkunamandapas tukuiipi allilla ruragmi ka. ⁸ Paimi nukanchita willagsamurka imasa kamkuna, Santu Ispirituwa kuianakuspa, sumaglla kaugsanakugta.

⁹ Chasamanda nukanchipas, kamkunamanda chasa uiasauramandata mana sakinchi-chu, Taita Diusta kasa nispa mañangapa: imasa chaiaskasina, paipa suma iachaita kamkunata karapuachu. Chasaka, Santu Ispirituwa tukui ima pai munakuskata allilla iuiarispmi iachankangichi. ¹⁰ Chiwanka, imapipas paita alli iuiachispa, ima ruraikunapipas tarpuskata sumaglla pallakuginsa kawachispa i Taita Dius imasa kagta maspas iachagsamuspa, Taita Diuspa wambrakunasina sumagllami kaugsankangichi. ¹¹ Kasapasmi kamkunamanda Taita Diusta mañanchi: paipa iapa suma iachaiwa kamkunata tukuiipi allilla charipuachu. Chasaka kamkuna, mana sakirisipalla, ñi pitapas mana piñaspallami kaugsanakunganchi, ¹² alli iuiachiillawa Taita Diusta: “Pai Siñur” nispa. Paimi kamkunata sumaglla kangapa iuiachirka, paipalla kagkunawa, paipa suma punchapi, pai ima kanganapa niskata chaskigringapa. ¹³ Paimi, nukanchi iana tutapisina iuiaiwa kaskata anchuchispa, punchaiachigsamurka. Chasaka, paipa kuiaska wambra suma mandakuskapimi iakugsamurkanchi kaugsangapa. ¹⁴ Paipa wambramandami nukanchi kispichiska kanchi; nukanchipa pandariikunatapas pasinsiai tukunchi.

Cristo wañuchii tukuskamanda, Taita Diuswa pasinsiai tukuskamanda

¹⁵ Cristomi ka mana kawarig Taita Diuspa kawarig. Tukui ima tiaskakunamanda mas ñugpa, paimi tiarka. ¹⁶ Paiwami tukui ima ruraska tia. Sug luarpi i kai alpa luarpi, kawariska i mana kawariska, kai alpamandakunata mandag i sug mana kawarig luarpi mandagkunatapas, tukuimi paiwa i paimanda ruraska tia. ¹⁷ Ñi imapas manara tiagpi, paika ñugpami tiarka. Tukui ima kunaúra tiaskataka, paimi suma chariraiá. ¹⁸ Cristowa tukui tukuskakuna suglla kuirpusina niraiaskapi, paillatata iaiá ka, uma kagsina. Paimi ka tukuikunamanda mas ñugpa. Pai wañuspa, tukuikunamanda ñugpami diltudupa kaugsarigsamurka; chasaka, paillatata tukuiipi imapipas ñugpa ladu kangapa. ¹⁹ Paimi ka Taita Dius imasa kaskasinallatata. Chasami Taita Dius munarka.

²⁰ Kasapasmi munarka: Cristowa, kai alpapi i sug luarpi tukui kagkunawa kikin Taita Diuswa pasinsianakungapa. Cristo kruspi wañuspa, iawar ichaskawami tukuikunawa Taita Diuswa pasinsiachinurka.

²¹ Kasapas. Kamkunaka, ñugpata mana allilla ruraspa kaugsaiwa Taita Diusta mana rigsginsinami karkangichi. Kamkunapa iuiaipei paita mana munarkangichichu. ²² Ikuti kunaúra, Cristo wañuchii tukuskawami kamkunawa Taita Dius kikinwa pasinsiachigsamurka; chasaka kamkuna, tukuiipi alli kaspá, ñi imapipas mana piñái tukungasina i mapasina kaspá, pai kikinpa ñawipi kawarigringapa. ²³ Kamkuna chasa kangapaka, imasami suma saiachiska muruchu wasi mana kuiuri: chasami iukangichi, Cristowa suma iuiaringakuna. Alli Willaita uiaspaka, paita iuiaspallami suianakungichi; chi iuiaita mana sakispalla kangichi. Chi Alli Willaitaka kai alpapi tukuiipi willanakú. Nuka Pablopasmi agllai tukuska kani, chi Willaita willaspa puringapa.

Cristowa tukuskakunata aidag kangapa, San Pablo mingai tukuskamanda

²⁴ Nuka, kunaúra kamkunamanda iapa llakii pasakuskawami alli iuiachiriwa kani. Imasami Cristo, paiwa tukuskakuna pai kikinpa kuirpusina niraiaskamanda iapa llakii pasarka: nukapa kuirpumanda llakiikunawapas chi kuirpumallatatami pisikuskata

churakuni. ²⁵ Cristowa tukuskakunata aidagmi nuka kani. Chasami Taita Dios mingawarka, kamkuna allilla kangapa. Paipa Rimaita tukuikunata allilla willagringapami mingawarka. ²⁶ Ñi maikan ñugpamandakunapas mana iachaskata, Taita Dios kunaura paimandalla kaugsagkunatami willagsamurka. ²⁷ Paimandalla kaugsagkunatami Taita Dios munarka, kunaura kasa rigsichukuna: chi pipas mana iachaskaka, mana judiu kagkunamandapami niraiá, iapa suma achka iukagsina kangapa. Chi iapa iukaika niraianni Cristo kamkunawa suglapi kangapa. Paimi ka kamkunapa suianakuska; chasaka, suma puncha luarpi paiwa kagringapa.

²⁸ Pai Cristomandami nukanchi willaspa purinchi. Tukuikunata tukui iachaiwami allilla iachachispa i iuiachispa purinchi; chasaka tukuikuna, allilla wiñachiskasina Cristowa kawarigringapa. ²⁹ Chasa kangapami Cristo karamuwarka, tukui animuwa i iapa iachaiwa sinchi ruraspá puringapa.

2

¹ Kamkunamanda, Laodisea puiblupi kaugsanakuskamanda i tukui mana ñawi ñawi rigsiwagkunamandapas Taita Diustami iapa sinchi nuka mañapuikichita. Chita, kamkuna iachangapami munani. ² Kasami mañani: paikunata alli sumaglla iuiachichu; chasaka paikuna, sugllasina kuianakuspa, imapipas alli iuiapipi tukugsamuspa, Taita Dios ñugpata mana pitapas iachachiskata allilla iachachukuna. Chika, Cristota rigsigmi niraiá. ³ Cristopimi tia tukui alli iachaiwami i suma iuiakuna wakachiriska. ⁴ Chasami niikichita, ñi pipas mana kamkunata miski simiwa pandachichukuna. ⁵ Nuka kikin, mana kamkunawa kaspapas, iuiapipi kamkunawa kagsina kani. Chasa kaspaka, kamkuna Cristota mana sakisipalla suma iuiarispa imapipas alli kagtakuna iachaspami nukata iapa alli iuiachiwá.

Cristowa musuiachiska kaugsaita iukasunchi

⁶ Chasamanda, imasami Iaia Jesucristota chaskirkangichi: iukangichimi pai imasa niskasina kaugsanakunga. ⁷ Imasami sacha, muruchu angukuna iuká: chasallatami kamkuna, ima iachachiskallatata uiaspa, iukangichi Cristowa kangakuna. Imaurapas Taita Diusta: “Pai Siñur” nispa kangichi.

⁸ Allilla iuiarispa uiangichi. ¡Ujalallapas maikan, kikinpa iuiaimandalla iuiarispa, ianga rimaskawa kamkunata pandachichukuna! Paikunaka, ñugpamanda runakuna ima rimaskallatami iachachinkuna. Chasa paikuna iachachiskaka, kai alpamandallami niraiá. Cristo allilla iachachiskataka mana willanakunchu. ⁹ Cristopa kuirpupi, Taita Dios kikin tukui ima kaskami kaugsá. ¹⁰ Kamkunapas, paiwa kagmandami ñi ima mana pisi tukuska kangichi. Paika, uma kagsina, sug luarpi iapa iachaiwa mandagkunamandapas iaiami ka. ¹¹ Paiwa kagmandami kamkuna marka churai tukuska kangichi. Chi marka, kuirpupi judiukunapa makiwa churaska mana kanchu. Tukui pandarii tiaskakunata anchuchispa kagmandami Cristopa marka churai tukuska niraiangichi. ¹² Kamkuna baugtisariskapimi Cristowa wañuspa pambaskasina niraiangichi. Chasallata, Taita Diospa iapa iachaiwa, pai Cristota kaugsachiskawa suma iuiarispa paiwa kaugsachiska niraiangichi.

¹³ Kamkuna judiukunapa marka mana churaska kagkuna, ñugpata pandarispa kaugsasakunamanda Diospa ñawipi wañuskasinami karkangichi. Kamkuna chasa kagpipas, Taita Dios, tukui mana allilla ruraikunata pasinsiaspa, Cristowami kamkunata kaugsachigsina rurarka. ¹⁴ Nukanchi mana allilla ruraskakunamanda diltudupa ninama sitai tungunapa iskribiraiaska, chitami anchuchigsamurka. Cristo krusipi wañuskawami chi iskribiraiaskata krusllapita klabagsina ruragsamurka. ¹⁵ Cristowami, iapa iachaiwa kuku mandagkunata binsispa, tukuikunapa ñawipi kawachispa kumurichispa kungurichirkakunata.

Sug rigcha iachachiskakunata mana uiangichi

¹⁶ Chasamanda, kamkunata ima mikui, ima upiai mana michanchu. Chasallata, samadiru u atun punchakuna u wawa killakuna mana judiukunasina wardachigpipas, kamkunata mana pipas pudingakunachu ñi ima ningapa. ¹⁷ Chi kustumbrikunamandaka niikichitami: Cristo samungapa kaskata kawachigllami karka. Ikuti kunaauraka, sutipa kikin Cristomi kawarigsamurka. ¹⁸ ¡Ujalallapas pipas, kamkunata pandachispa, suma luarpi ima chaskigringapa kaskata kichuchu! Chi pandachigkunaka, uchullasinami tukunkuna; anjilkunatami kungurinkuna; muskui ukupisina kawaskamandallami iuiankuna; kikinunapa iuiaimandalla iuiarispa nirinkuna: “Nuka, iapa atunmi kani”. ¹⁹ Paikuna, Cristo uma kagsina kaskawa mana sugllapi kankunachu. Imasami umamanda tukui samú, angukunapi iawar tukuskawa suglla kuirpu suma wiñangapa: chasallatami Cristowa, paipa kuirpu niraiaskakuna, Taita Dios imasa munaskasina wiñanchi.

²⁰ Kamkunaka, kai alpamandalla niraiaskakunata sakispa, Cristowa wañuskasinami niraiangichi. Chasa niraiagpika, ¿imapatak kai alpamanda ima niskakunata chara uianakungichi? ²¹ Kamkunata ninkunami: “Mana chita tantiangichi. Mana chita mikungichi. Mana

chita apingichi”.²² Tukui chikunaka, imasapas tukurinllami. Chi iachachiskakunaka, runakunapa iuiailawami iachachiska ka.²³ Chi iachachiikunaka, suma kagsinami rigchá; chasaka, Taita Diosmanda iuiaringapa, mana atun tukuspa kangapa, kikinpa kuirputa sinchi alli ruraikunapi charingapa. Ikuti jiru iuiai munaikunataka manima chikunawa pudirinchu arkangapa.

3

Maskasunchi, suma luarwa iuiaripa kaugsangapa

¹ Kamkunaka, Cristowa ña kaugsachiskami niraiangichi. Chiwanka maskaichi, awa suma luarwa iuiaripa kaugsangapa. Chipika Cristo, Taita Diospa alli ladumi tiaku.² Mana iuiachi kai alpapi tiaskakunallawa. Awa suma luarwami iukangichi mas iuiaripa kaugsangakuna.³ Kamkuna, Cristowa wañuskami niraiangichi. Kamkunapa kaugsaika, Cristowa Taita Diospa makipimi pakaskasina ka.⁴ Cristomi kamkunapa kaugsai niraiá. Pai kawarigsamuuraka, kamkunapas paiwa suma puncha luarpimi kawarigrinkangichi.

Ñugpata kaugsaimanda i musu kaugsaimanda

⁵ Chasamanda, tukui kai alpamanda mana allilla iuiaikunata wañuchigsina ruraichi. Kari warmiwa mana pandaringichi. Ima jiru iuiarispapas, mana rurangichi. Ima mana suma munai i iuiai iuiachigpipas, mana chasa rurangichi. Sugkuna iukaskata mana munaringichi, kamkunapa kangapa. Chasa munarigkunaka, ianga diuskunata kungurigsinami rurankuna.⁶ Taita Diusta mana uiagkuna chasa mana allilla ruraskakunamandami pai, askurinti rabiawa llakirispas, diltudupa ninama sitangapa ka.⁷ Kamkunapas, ñugpata chasallata ruraspami kaugsanakurkangichi.⁸ Kunauramanda tukui kaikunata sakingichi: rabiarpas piñaikunata, mana allilla rurangapa iuiaikunata, kamispa rimai i tukui jiru rimaikunatapas.⁹ Mana kam kikinpura llullachinakungichi.

Kamkuna ñugpata mana alli iuiaspa i ruraspa kaugsanakuskata ñami sakirkangichi.¹⁰ Kunaura, musu iuiaitami kamkuna ña apigsamurkangichi. Chi musu iuiaita, Taita Diosmi ikuti ikuti iuiachigsamuku; chasaka kamkuna, paipa ñawipi ñallapas paisinallata sumaglla kangapa. Chasawami pai Taita Diusta allilla rigsinkangichi.

¹¹ Kunauramanda mana kawanakusunchi, judiu u mana judiu kagta. Chasallata, judiukunapa marka churaska u mana churaska kagta, sug maimanda kagta, patrun u lutrin u sachukumanda runasina* kagta, chasa mana kawanakusunchi. Iukanchimi iuiarispas kawanga, tukuikunamanda Cristo kagta.

¹² Taita Diosmi kamkunata suma kuispas agllarka, paipalla kangapa. Chimanda, tukuikunamanda llakirinakuspa, tukuikunawa alli i sumaglla kaspa kaugsanakungichi, mana pitapas piñaspalla, mana iapa atuniachiriskasina iuiarispalla.¹³ Kam kikinpura mana piñachirinakuspalla kangichi. Maikanpas ima rabiachingasina nigpika, kamkuna ningichi: “Pasinsianakusunchi”. Imasami Iaia Jesús, kamkunata pasinsiarka: chasallata kamkunapas, parijuma pasinsianakungichi.¹⁴ Tukuimanda mas suma katanga churarigsina, tukuipi parijuma kuianakuspa kaugsaiichi. Chasa tukuikuna kuianakusapimi tukuipi parijuma sugllasina tukugsamú.¹⁵ Cristo kamkunata iuiachichu, sumaglla kaugsanakungapa. Chasapami agllaska kangichi, suglla kuirpusina kangapa. Taita Diusta: “Pai Siñur” nispa kangichi.

¹⁶ Cristomanda willaraiaskata kamkuna suma iuiarispas kaugsanakungichi. Kamkuna, tukui suma iachaskawa parijuma iachachinakuspa, iuiachinakuspa kapuangichi. Taita Diusta: “Pai Siñur” nispa, tukui sug rigcha sug rigcha suma kantukunata birsiaspa kangichi.¹⁷ Tukui ima rimaska i ruraska, Iaia Jesusmanda iuiarispas kapuangichi. Pai Jesusllawantami pudingichi, Taita Diusta: “Pai Siñur” ningapa.

Cristowa kagkuna, imasa sugkunawa kaugsanakui iukaskamanda

¹⁸ Warmikunata niikichitami: kamkunapa kusakunata sumaglla uiangichi. Chasami Iaia Jesuswa kagkunata chaiá kangapa.

¹⁹ Kusakunata niikichitami: kamkunapa warmikunata sumaglla kuiangichi. Paikunata mana piñaspalla, mana llakichispalla kaugsangichi.

²⁰ Wambrakunata niikichitami: kamkunapa taita i mama tukui ima niskata allilla rurangichi. Chasa ruraspaka, Iaia Jesus-tami suma kuntintachinkangichi.

²¹ Taitakunata i mamakunata niikichitami:

* 3:11 griego rimaiwa: eskita.

kamkunapa wambrakunata mana llakichingichi. Llakichigpika, kamkuna iuiachispa rimanakuura, manami munagakuna uangapa.

²² Lutrinkunata niikichitami:

kamkunapa kai alpapi patrun niraiaskakuna tukui ima niskata suma uiaspa, allilla ruraspa kangichi. Mana kawanakugmandallaka allilla ruraspa kangichi, “Sumami rurakungi niwachukuna” iuiaspaka. Chasapaka, Iaia Jesusta suma kuiaiwa manchaspaka, tukui alli iuiaiwa allilla rurangichi. ²³ Runakuna ima niskata ruragsinaka mana iuiachichi. Kasa iuiachichi: “Iaia Jesús ima niskata ruragmi kani”. Chasa iuiaspaka, imapipas tukui animuwami rurankangichi. ²⁴ Kasami iachangichi: kamkuna alli ruraskakunamandaka, Iaia Jesús ima karangapa kaskata, pai kikinmi kamkunata karangapa ka. Iaia Cristomi kamkunapa patrun niraiá. ²⁵ Ikuti maikanpas mana allilla ruragka, justisiaimi tukungapa ka. Taita Diospa ñawipi, ñi pipas mana tianchu sug rigcha.

4

¹ Patrunkunata niikichitami:

kamba lutrinkunataka tukuipi sumaglla allilla kawaspa charingichi. Kamkunapas, sug patrun suma luarpi iukagta iuiarispaka kangichi.

² Taita Diusta mañangapa mana kungaringichi. Suma iuiaiwa tukuipi kaspa, imapipas “Pai Siñur” nispa kangichi. ³ Nukanchimandapas chasallata Taita Diusta mañapuangichi: Cristomanda Alli Willaita pipas mana ñugpata iachaskata nukanchi willaura, paikunapa iuiaiwa allilla iuiarigsamuchukunata. Chi Alli Willaita iachachiskamandami nuka kaipi wataska wichkaraiani. ⁴ Taita Diusta mañapuaichi, nuka willangapa kallariura, tukuipi allilla iuiachiwachu rimangapa.

⁵ Manara Taita Diusta rigsigkunawa kamkunata kangapa chaiagpika, tukuipi allilla iachaiwa iuiapi ruraspa kangichi. Kaugsanakunkama iukangichimi, tukuipi allilla ruraspa chisianakunga. ⁶ Kamkunata piwapas rimangapa chaurura, imaurapas suma chaia rimangichi. Maikanpas ima tapugpika, iukangichimi imasa paikunata allilla ain-ingata iachanga.

Waugki Tíkiko kachai tukuskamanda

⁷ Waugki Tíkiko kikinmi, kamkunapagma chaiagriura, nuka imasa kaskata willagringa. Paimi ka nukanchipa kuiaska waugki. Nukanchiwa kaspa, Iaia Jesús ima niskata tukuipi allilla ruragmi ka. ⁸ Kasamandami paita kamkunapagma kachakuni: nukanchi imasa kaskata willagringapa; chasaka, kamkunata sumaglla iuiachingapa. ⁹ Nukanchipa kuiaska waugki Onesimopasmi sugllapi ringapa ka. Pai kanmi kamkunapura. Tukuipi allilla ruragmi kapuá. Paikunaka, tukuikuna kaipi imasa kaskatami willagringakuna.

Kaiakama, niskamanda

¹⁰ Waugki Aristarko nukawa wichkaraiagpasmi kamkunata: “Puangi” niku. Waugki Bernabepa primu Marcospasmi, “Puangi” niku. Marcosmanda ñami allilla iachangichi. Chimanda, pai kamkunapagma chaiagrigpika, sumaglla chaskipuangichi. ¹¹ Waugki Jesús suti Justo ninchi; paipasmi kamkunata: “Puangi” niku. Taita Dios imasa suma mandakuskata nukawa iachachigpura, paikunallami judíu kankuna. Paikunami nukata llakiikuna anchuchiwarekakuna. ¹² Kamkunapura waugki Epafrafrasi, “Puangi” niku. Paika, Jesucristopa lutrinsina kaspa, imaurapasmi kamkunamanda Taita Diusta suma mañaku; chasaka kamkuna, imapipas sinchi iuiapi kangapa i Taita Dios tukui ima munaskata tukui iuiaiwa allilla ruraspa kangapakuna. ¹³ Paimanda kasapasmi willaikichita: kamkunamanda, Laodisea puiblupi kaugsanakuskamanda i Ierápolis puiblupi kaugsanakuskamandapas iapa sumami Taita Diusta mañaku. ¹⁴ Lucas, kuiaska ambidur, i waugki Demaspasmi kamkunata: “Puangi” ninkuna.

¹⁵ Waugkikuna Laodiseapi kaugsanakuskata, kamkuna “Puangi” nipuaichi. Pani Nin-fata i paipa wasi ukupi sugllapi tandarigkunatapas: “Puangi” nipuaichi. ¹⁶ Kai kartata tukui kamkuna ña uiaspaka, Laodiseapi Cristowa tukuskakunapagma kachapuangichi, paikunapas iachangapa. Chasallata, Laodiseama nuka kachaska karta kamkunapagma chaiagriuraka, kamkunapas iachankangichimi nuka ima nikugta. ¹⁷ Waugki Arkipotaka kasa nipuaichi: Iaia Jesús ima rurangapa mingaskata allilla rurachu.

¹⁸ Nuka Pablo, nuka kikinpa makiwami iskribiska, kai saludaita kachaikichita. Iuiari-puaichi, nuka kaipi wichkaraigta. Taita Dios, kamkunata sumaglla kawapuachu. [Chasa kachu.]

TESALONIKA PUIBLUPU CRISTOWA TUKUSKAKUNATA SAN PABLO MUSUGLLA KARTA KACHASKAMANDA

¹ Nuka Pablo, Silvano i Timoteowa kasper, kamkuna Tesalónika puiblupi Cristowa tukuskakunatami kai karta kachaikichita. Kamkuna, Taita Diuswa i Iaia Jesucristowa sugllapi tukuskami kangichi. Taita Dius, kamkunata kuiaspa, suma iuiiwa kawapuachu.

Tesalonikapi Cristowa tukuskakuna, paiwa suma iuiarispa kaugsanakuskamanda

² Imaurapas tukui kamkunamanda mañaspa, Taita Diusta: “Pai Siñur” nispami kanchi. ³ Kamkuna, chituku paiwa suma iuiarispa i kuiaspa, allillami rurasp kaugsanakungichi. Nukanchipa Iaia Jesucristota iuiarispa suiaspami kangichi, mana sambaiaspalla. Nukan-chi, chasa iuiarispa, nukanchipa Taita Diusta imaurapas kamkunamanda mañaspami kanchi. ⁴ Taita Diuspa kuiaska taitakuna i mamakuna, iachanchimi pai kamkunata agllaska kagta. ⁵ Nukanchi, kamkunata Alli Willaita willaspa, mana rimailawa iachachirkanchi-chu. Paipa iapa iachaiwa i Santu Ispirituwami iachachirkanchi, chi Alli Willai sutipa kagta allilla iachaspa. Nukanchi kamkunawa kankama, kamkunata kuiaspa, sumagllami kaugsanakurkanchi. Chita, allillami iachangichi.

⁶ Kamkunapas, nukanchita kawaspaka, nukanchisina i Iaia Jessusnami sumaglla kaugsanakurkangichi. Kamkuna Iaia Jesusmanda achka llakii iukagpipas, Santu Ispiritumi kamkunata kuntintulla kangapa iuiachirka. Chasaka, Diuspa Rimaita all iuiachiiwami uiaspa karkangichi. ⁷ Chasamanda, kai Masedonia i Akaiia alpakanapi tukui Cristowa tukuskakunata kamkunapa suma kaugsaimi kawachirkangichi. Chasaka paikunapas, mas allilla ruraspami kaugsai kallarikakuna. ⁸ Kamkunapagmanda Iaia Jesusmanda rimaita uiarigsamurka, kai alpakanallapi, mana. Tukuimami iacharigsamurka imasa kamkuna, Taita Diuswa suma iuiarigtakuna. Chasaka, nukanchita mana ministinchu, imapas paikunata ningapa. ⁹ Paikunallatami nukanchimanda rimankuna, imasa kamkuna, nukanchi chaiagriura, sumaglla chaskigtakuna. Rimankunami imasa kamkuna, ianga dius kaskakunata sakispa, sutipa Taita Diuswa tukugsamugtakuna; chasaka, sutipa kaugsag Taita Diusmandalla kaugsangapa. ¹⁰ Kasapasmi rimankuna: kamkuna suianakungichisi, Taita Diuspa wambra Jesús suma luarmanda samungapa kagta. Jesús wañuskatami Taita Dius kaugsachirka. Taita Dius iapa rabiariispa llakii puncha, Jesusmi nukanchita kispichingapa ka.

2

Tesalonikapi, San Pablo ima ruraskamanda

¹ Taitakuna i mamakuna, kam kikinkunami iachangichi: nukanchi, kamkunapagma ianga mana rirkanchichu. ² Kamkuna ñami iachangichi: nukanchika, Filipos puiblupi mana allilla pasaska i kami tukuskami karkanchi. Chasa pasagpipas, Taita Diusmi nukan-chita iuiachirka, paimanda Alli Willaita kamkunata willagringapa, achkakuna kamispa piñanakugpipas. ³ Panda llulla rimaiwa u jiru iuiiwa mana kamkunata willanakurkanchichu. ⁴ Chasapaka, imasami Taita Dius, nukanchita agllaspa mingarka, paimanda Alli Willaita willangapa: chitami nukanchi willanchi. Runakunata suma kuntintachin-gapaglla mana rimanchichu. Taita Dius nukanchipa tukui iuiaita kawagta suma kuntin-tachingapami rimanchi. ⁵ Kamkuna ñami iachangichi: miski simiwa mana rimanchichu. Chasallata, kulki chaskingamanda mana rimanchichu; chitaka, Taita Diusmi iachá. ⁶ Mana maskanchichu, kamkuna ñi sug runakuna nukanchita ningapa: “Mas atunmi kangichi”. ⁷ Nukanchi, Cristo kikin agllaska runakuna kasper, pudirkanchimi, kamkunata imapas mañanga. Nukanchi chasa pudispapas, mana chasa ruranchichu. Chasapaka, imasami mama, kikinpa wawakunata kuiaspa wiñachi: chasallatami nukanchi, kamkunata kuianchi. ⁸ Chasa kuiaspami Taita Dius iuiachiska Alli Willaita rimarkanchi. Kamkunata iapa kuiaspa, kamkunamandapasmi wañuntranchi. ⁹ Taitakuna i mamakuna, kamkuna iuiaringichimi, imasa nukanchi saikugta sinchi trabajagtakuna. Diuspa Alli Willaita kamkunata rimanakunkama, tukui puncha tutaiagta mana samaspallami trabajasp kaugsanakurkanchi; chasaka, kamkunata mana ñi ima mañaspalla kaugsangapa.

¹⁰ Nukanchi, kam Cristowa iuiarigkunawa kankamaka, allilla ruraspami Taita Diusmandalla sumaglla kaugsanakurkanchi. Chasaka, ñi pipas mana pudinkunachu, nukan-chimanda imapas ninga. Chitaka, kamkuna allillami iachangichi. Taita Diuspasmi allilla iachá. ¹¹ Imasami taitakuna, paikunapa wambrakunata suma kawankuna: chasallata-mi nukanchipas, tukui kamkunata allilla iuiachirkanchi. Chitapasmi kamkuna allilla iachangichi. ¹² Kamkunata iachachirkanchimi, Taita Diuspa wambrakunasina sumaglla

kaugsangapa. Taita Diosllatami kamkunata agllarka, paipa suma puncha mandakuska luarpi kamkunapas sugllapi kagringapa.

¹³ Kasamandapasmí Taita Diusta imaurapas: “Pai Siñur” ninchi: Diospa Rimaita nukanchi willaura, kamkuna, uiaspaka, mana nirkangichichu: “Kai, runakunapa iuiailawami ka”. “Diuspa Rimaimi ka”; chasami nirkangichi. Chasami ka. Chi rimaiwami kamkuna Cristowa iuiarigkunata Taita Dios iuiachispa iachachí.

¹⁴ Kam taita i mamakunata, kam kikinpura kaugsanakugka piñaspá unZaspami apar-kakuna. Chasaka, Taita Dioswa tukuskakuna Judea alpapi kaugsanakuskasinallatatami pasarkangichi. Paikuna Jesucristota kuiagmanda, judiukuna kikinpura kaugsanakug chasallatami paikunatapás jiru rurarkakuna. ¹⁵ Judiukunami ñugpata Santu Ispirituwa rimagkunata wañuchirkakuna. Pai kikinpuramandallatatami Iaia Jesustapas wañuchirkakuna. Pai kikinkunallatatami nukanchitapas kalpachispa llugsichirkakuna. Chasa ruraspaka, Taita Diusta mana kuntintachirkakunachu. Tukui runakunawapas mana allilla kaugsankunachu. ¹⁶ Nukanchita mana sakinkunachu, mana judiú kagkunata Diospa Rimaita willangapa; chita uiaspaka, paikunapas kispiringapa. Chasa ruragkunami mas achka pandarii mirachirinakú. Chasamandami Taita Dios kunaura paikunawa iapa sinchi llakirigsamurka.

Tesalonikama ikuti chaiagringapa, San Pablo munakuskamanda

¹⁷ Nukanchi, kam taita i mamakunapagmanda sug ratu anchurispapas, mana kamkunata kungarinchichu. Askurintimi munanakunchi, nukanchi kamkunata ikuti kawan-gapa. ¹⁸ Chimandami munanakurkanchi, kamkunapagma chaiagringapa. Nuka Pablo, ikuti ikutimi chasa munakurkani. Chasa munakugpipas, iaia kukuka nukanchitami arkarka. ¹⁹ ¿Pitak nukanchita alli iuiachinga? ¿Imatak suanakunchi? Nukanchipa Iaia Jesús samuuraka, kam kikinkunami paipa ñawipi kawaringapa kangichi. Kamkuna chipi kaskakunata kawaspami nukanchita iapa alli iuiachingapa ka. ²⁰ Ari, kamkunami kangichi nukanchita suma alli iuiachiiwa kangapa.

3

¹⁻² Chimanda nukanchi, ña mana mas suiai pudispa, iuiarirkanchimi, waugki Timoteota kamkunapagma kachangapa. Nuka sapallami Atenas puiblupi chisiarkani. Pai Timoteomi ka Taita Dios munaskata allilla rurag. Cristomanda Alli Willaita nukanchiwa willagmi ka. Paitami kacharkanchi, kamkunata iuiachigringapa; chasaka kamkuna, Cristowa mas suma iuiariiwa kangapa. ³ Chasawaka kamkuna, llakiiwa kagpikunapas, ñi pi Cristota mana wasa churankangichichu. Kam kikinkuna ñami iachangichi: nukanchita chaianmi, chasa llakiiwa kangapa. ⁴ Ñugpata, nukanchi kamkunawa kauraka, willanurkaikichitami nukanchi llakiiwa kangapa kagta. Chasallatami kamkuna iachaskasina pasarirka. ⁵ Chasamandami nuka, mana mas suiai pudispa, Timoteota kamkunapagma kacharkani; chasaka, kamkuna imasa iuianakuskata katinakugta iachangapa. Iuiakurkani: ¡ujalallapas iaia kuku, kamkunata pandariikunapi urmachichu; chiwanka nukanchi, kamkunata willaska ianga kangapa!

⁶ Kunauraka Timoteoka, kamkunapagmanda kutimuspaka, nukanchita sumami willag-samurka, kamkuna Cristowa suma iuiarispá, kam kikinpura kuianakuspa kaugsanakugta. Kasapasmi willarka: kamkuna, nukanchimanda imaurapas suma iuiarispá, munan-kungichisi, ikuti kawanakungapa; imasami nukanchi munanakunchi: chasa. ⁷ Chasa-manda, taitakuna i mamakuna, nukanchi tukuipi iapa llakiiwa kaspapas, kamkunamanda sumaglla iuiachiimi tukunchi, kamkuna Cristowa suma iuiarita charinakugta iachaspa. ⁸ Kamkuna Iaia Jesuswa mana sakisipalla iuiarigtakuna iachaspaka, mas musukunasinami iuiaiwa kanchi. ⁹ Kamkuna nukanchita iapa alli iuiachiskamanda, nukanchi iukanchimi, Taita Diospa ñugpa ladu kaspá, imaurapas paita: “Pai Siñur” kamkunamanda ninga. ¹⁰ Tuta i puncha paita askurintimi mañanchi, kamkunata kawagringapa; chasaka, ñawi ñawi kawanakuspa, kamkuna paiwa iuiarispapas, manara iachaikuskata iachachingapa. ¹¹ Ari, nukanchipa kikin Taita Dios i Iaia Jesús, nukanchita kamkunapagma ringapa lisinsia kuachu. ¹² Kamkunataka, Iaia Jesús mas suma kuiai karapuachu. Chasaka, kam kikinpura i tukuikunawa mas kuianakuspami sumaglla kaugsankangichi. Chasallatami nukanchipas kamkunata kuianchi. ¹³ Nukanchipa Iaia Jesuska, tukui paipalla kagkunawami ikuti samungapa ka. Pai Jesús, chi punchakama kamkunata tukuipi allilla charipuachu. Chasaka, Taita Diospa ñugpa ladu kamkuna tukuipi alli kawarigriura, ñi pipas mana kamkunamanda ningachu: “Mana alli runami ka”. [Chasa kachu.]

4

Imasa Taita Diusta suma kuntintachispa kaugsangapa chaiagta

¹ Kasapasmi kam taita i mamakunata Iaia Jesús imasa niskasina nukanchi mañaspa ninchi. Imasami nukanchi, kamkunata iachachirkanchi, Taita Diusta suma kuntintachispa kaugsangapa; imasami kunaura kaugsanakungichi: kunaoramanda chasallata sumaglla kaugsanakungichi.

² Iaia Jesús imasa niskasinami kamkunata iachachirkanchi. Chi iachachiskakunata, kamkuna ñami iachangichi. ³ Kasami Taita Dios kamkunamanda muná: paimandalla suma kaugsangichi, kari warmiwa mana pandarispalla. ⁴ Tukui karikuna, sug warmilla-wa sumaglla kuianakuspa, Taita Diosmandalla kaugsanakungichi. ⁵ Manara Taita Diusta rigsigsina jiru iuiiwa, kamkunaka mana kaugsanakungichi. ⁶ Ñi pipas, sug waugkindita llullaspa, paipa warmita kichugsina mana rurangichi. Ñami kamkunata willarkanchi: chasa ruragkunataka, Iaia Jesús iapa rabiawa llakirispami justisianga. ⁷ Taita Dios, nukanchita mana agllarkachu, jiru ruraspas kaugsanakungapa. Paimandallami suma kaugsangapa nukanchita agllarka. ⁸ Chasamanda, maikanpas chi iachachiskakunata wabutig, mana runallata wabutinchi. Taita Dios paipa Santu Ispirituta karaskatami wabuti.

⁹ Kamkunapura kuianakuskataka, nuka mana iukanichu ñi ima ninga. Taita Diosmi kamkunata iuiachispa iachachi, parijuma kuianakungapa. ¹⁰ Sutipami Masedonia alpapi tukui Jesuswa tukuskakunawa kuianakuspa kaugsanakungichi. Chasa kuianakugpipas, kam taita i mamakunata ninchimi: maspas kuianakuichi. ¹¹ Nukanchi imasa kamkunata mingaskasina, kam kikinkunapa makikunawa trabajaspas, mana sugkunapata kawaspalla sumaglla kaugsanakungichi. ¹² Kamkunata chasa kawaspaka, manara Cristota rigsigkunapas ñi imapipas mana unzái pudingakunachu. Chasallatami ñi imapas kamkunata mana pisinga.

Iaia Jesús imasa ikuti samungapa kaskamanda

¹³ Taitakuna i mamakuna, nukanchi munanchimi, kamkuna allilla iachangapa, wañuskakuna imasa kaugsaringapa kagtakuna. Chasa iachaspaka, kamkuna mana llakispallami kaugsankangichi. Sugkunaka mana iachankunachu, kaugsaringapa kagtakuna. Chiwami llakispalla kaugsanakú. ¹⁴ Nukanchi iachanchimi, Jesús wañuspa, kaugsarigsamugta. Chimandami kasapas iachanchi: imasami Taita Dios, Jesusta kaugsachirka: chasallatami paiwa tukuspa wañuskakunatapas kaugsachingapa ka.

¹⁵ Iaia Jesús nukanchita iuiachiskatami kasa kamkunata ninchi: Iaia Jesús samungapa punchakama nukanchi kaugsanakugpika, wañuskakunamanda ñugpaka mana sug luarma ringapa kanchichu. ¹⁶ Kikin Iaia Jesusmi suma luarmanda uraikumungapa ka. Sinchi rimaiwa mandaspami uraikumungapa ka. Chiurallatami iaia anjil kaparimungapa ka. Taita Diospa bututusinapasmi uiarigsamungapa ka. Chiuraka Cristowa tukuspa wañuskakuna, ñugpami kaugsarigsamungapa kankuna. ¹⁷ Chiuramanda nukanchi chara kaugsanakugka, paikunawanta puipupimi apai tukungapa kanchi, Iaia Jesuswa awapi tarinakungapa. Chiuramanda, diltudupami Iaia Jesuswa sugllapi kagringapa kanchi. ¹⁸ Chasa iachaspaka, chi iachachiskawa kam kikipura sumaglla iuiachirinakuspa kaugsanakungichi.

5

¹ Ima puncha, ima ura Iaia Jesús samungapa kagtaka, mana ministirinchu, kam taita i mamakunata willangapa. ² Kam kikinkuna allillami iachangichi: imasami sisai, tuta mana willaspalla samú: chasallatami Iaia Jesuspas, mana iuiianakuura chaiagsamungapa ka. ³ Sug runakuna, kungaskami ninakungapa ka: “Alli sumagllami kaugsanakunchi”. Chasa kungaska kaura, chi puchukarii puncha diulpillami chaiamungapa ka. Imasami ungeringapa warmita nanai chaiá: chasallatami chi puncha, paikunata chaiamungapa ka. Chitaka, ñi pi mana kispiringapa kankunachu.

⁴ Ikuti kam taitakuna i mamakunaka, iana tutapisina mana kaugsanakungichichu. Chimanda Iaia Jesús, sisaisina mana willaspalla samugpipas, kamkunata mana kungaska shachingapa kanchu. ⁵ Tukui kamkunapa iuiai punchapisinami allilla kaugsanakungichi. Nukanchipa iuiai, iana tutapisina ñi amsapisina mana kanchichu. ⁶ Chiwanka, sugkuna puñunakuskasina mana kaugsanakusunchi. Chasapaka, rigchariskalla mana machaskasina kaugsanakusunchi. ⁷ Tutami puñugkuna puñunkuna. Machagkuna chasallata tutami machankuna. ⁸ Ikuti nukanchika, punchapisina kaspas, mana machaskasina kaugsasunchi. Tukui jiru iuiaikunata kispiringapaka, iukanchimi kuianakuspa, Cristowa suma iuiarispa, tukuipi allilla kanga. Chasallata, umapi ima michag churariskasina kaspaka, iukanchimi diltudupa kispiringapa iuiaita charinga. ⁹ Taita Dios mana nukanchita agllarkachu, pai rabiawa justisiangapa. Nukanchipa Iaia Jesucristomanda kispichii tukungapami nukanchita agllarka. ¹⁰ Jesucristoka, nukanchimandami wañurka; chasaka nukanchi, pai

samuura wañuska u kaugsa kaspapas, paiwa sugllapi kaugsagringapa. ¹¹ Chimanda, kam kikinpura mas alli suma iuiachinakuspa kaugsangichi; imasami kunaura allilla ruraspa kangichi: chasa.

Cristowa tukuskakunata iuiachiskamanda

¹² Kam taita i mamakunata kasami mañaikichita: Iaia Jesusmanda allilla ruraspa, kamkunata iachachispa, iuiachispa kagkunata allilla uiapuungichi. ¹³ Paikuna allilla ruranakuskamandaka, sumaglla kuiaspa charipuungichi. Kam kikinpura sumaglla kaug-sanakungichi.

¹⁴ Kasapasmi mañaikichita, taitakuna i mamakuna: killa wangukunata piñapuungichi. Llakiwa kaskakunata sumaglla rimapuungichi. Mana allilla iachaikuskakunata sumaglla iuiachispa iachachipuungichi. Tukuikunawa mana piñanakuspalla kaugsapuungichi. ¹⁵ Maikanpas kamkunata jiru ruraskata mana chasallata randichingichi. Chasapaka, iukangichimi imaurapas allilla ruranga, kikinpura u mana kikinpura kagpipas.

¹⁶ Imaurapas suma kuntintulla kangichi. ¹⁷ Taita Diusta imaurapas iuiarispa mañaspa kangichi. ¹⁸ Tuku i ima pasarigpipas, “Pai Siñur” nispa kaugsangichi. Chasami Taita Dios muná, kamkuna, Jesucristowa tukuspa, “Pai Siñur” nispa kaugsangapakuna.

¹⁹ ¡Ujalallapas Santu Ispiritu iuiachiskakunata kungaringichi! ²⁰ Mana wabutingichi maikanpas Santu Ispirituwa ima willakuskata. ²¹ Tuku i ima willakuskata iukangichimi iuiaringa: “¿Sutipacha Santu Ispirituwa willawaku?”. Allilla kaskatami iukangichi katichinga. ²² Ikuti mana allilla ruraikunamandaka tukuipi anchuringichi.

²³ Kikin Taita Dios sumaglla kaugsaita karag, kamkunata charipuachu, tukuipi pai-mandalla kaugsangapa. Kamkunapa alma, iui i kuirpuwanta suma charipuachu; chasaka kamkuna, mana jiru ruraspalla kaugsangapa, nukanchipa Iaia Jesucristo samunkama. ²⁴ Taita Dios kamkunata agllagka, mana llulla kanchu. Paillatami nuka imasa mañaskasina rurangapa ka.

Kaiakama, niskamanda

²⁵ Taitakuna i mamakuna, nukanchimandapas Taita Diusta mañapuungichi. ²⁶ Cristowa tuku i tukuskakunata Taita Diosmanda iuiarispa, “Puangi” muchaspa nipuaichi. ²⁷ Iaia Jesús imasa niskasinami niikichita: Cristowa tuku i tukuskakunata kai kartata uiachipuuchi. ²⁸ Nukanchipa Iaia Jesucristopa suma kuiai, tuku i kamkunawa kachu.

TESALONIKA PUUBLUPI CRISTOWA TUKUSKAKUNATA SAN PABLO ISKAIMA KARTA KACHASKAMANDA

¹ Nuka Pablo, Silvano i Timoteowa kaspá, kamkuna Tesalónika puublupi Cristowa tukuskakunatami kai karta kachaikichita. Kamkuna, nukanchipa Taita Dioswa i Iaia Jesucristo-wa sugllapi tukuskami kangichi. ² Taita Dios i Iaia Jesucristo, kamkunata kuiaspa, suma iuiiawa kawapuachu.

Cristo samuura, Taita Dioska jiru ruragkunata justisiangapa kaskamanda

³ Taitakuna i mamakuna, imaurapasmi iukanchi, kamkunamanda Taita Diusta: “Pai Siñur” ninga. Kamkuna Cristowa mas suma iuiarinakugmanda, kam kikinpura mas sumaglla kuanakugmandami nukanchita cháiá, chasa “Pai Siñur” ningapa. ⁴ Kamkunata piñaspa, unzaspa apanakugpipas, kamkuna Cristowa suma iuiariskata mana sakispallami kangichi. Kamkuna chasa kagmanda, nukanchi kikin, Taita Dioswa tukuskakuna sugkunapi kagkunata alli iuiachillami kamkunamanda rimanchi. ⁵ Kamkuna mana allilla pasanakuspapas, Cristomanda mana kungarigmandami Taita Dios allillapi justisiai rurangapa ka. Chasawaka pudinkangichimi, Taita Dios suma mandakuskapi iaikugringa.

⁶ Kamkunata piñaspa unzaspa kagkunataka allillami ka, paikunata Taita Dios rabiawa justisiachu; ⁷ chasallata, kamkuna mana alli pasanakuskataka nukanchiwanta tukui chi pasanakuskata samachichu. Iaia Jesús iapa iachag anjilkunawa suma luarmanda kawarigsamuura, chi punchami chasa samachigsamungapa ka. Paika, nina sindi chaugpipimi samungapa ka. ⁸ Taita Diusta mana rigsikunguna, nukanchipa Iaia Jesusmanda Alli Willaita mana uiagkunata rabiawami justisiangapa ka. ⁹ Chi mana uiagkunataka, mana imaurapas wañudiru ninamami sitangapa ka. Iaia Jesuspa ñawimanda, paipa suma atun mandadiru tiakuskamanda, karumami sitai tungungapa kankuna, mana mas kawanakungapa. ¹⁰ Chi puncha Iaia Jesús samuuraka, paimandalla kaugsagkunaka paita ningapami kankuna: “Kam, iapa suma atunmi kangí”. Tukui nukanchi paiwa iuiarigkuna, suma ujnarispa, alli iuiachiiwami paita kawangapa kanchi. Kamkunapas, nukanchi ima willaskata uiaspami chasallata nukanchiwa paita ningapa kangichi: “Kam, iapa allimi kangí”.

¹¹ Chimanda, nukanchipa Taita Diusta kamkunamanda imaurapas kasami mañanchi: imasami pai, kamkunata agllarka: chasallata tukui allillapi kawapuaspa charichu. Kasapasmi paita mañanchi: kamkuna, paiwa suma iuiariikunawa imapas runanakuskaka, tukui chikuna, pai kikinpa iapa iachaiwa allilla tukugsamuchu. ¹² Chasaka kamkunamanda, Iaia Jesús mas suma atuniachiimi tungungapa ka. Chasallata, kamkunapas paiwa suma atuniachiimi tungungapa kangichi. Nukanchipa Taita Dios i Iaia Jesucristo, kamkunata suma kuiaspami chasa charipuangapa ka.

2

Iaia Jesús ikuti samungapa kaskamanda, mas allilla iachachiskamanda

¹ Taitakuna i mamakuna, nukanchipa Iaia Jesucristo ikuti samuura, nukanchi paiwa sugllapi kagringapa kaskamanda kasami willanchi. ² Sugkuna nichukuna: “Iaia Jesús samui puncha, ñami chaiamurka”: chasa ninakugpipas, kamkuna mana sug rigcha iuiangichi; mana mancharingichi. “Santu Ispirituwami chasa rimani” nikugpipas, maikan runa chasa rimakugpipas, maikan nukanchi kartapi kachaskasina chasa iachachikugpipas, ³ ¡ujalallapas kamkunapa suma iuiaita pandachichu! Manara chi puncha chaiamugpimi Taita Diusta mana munagkuna kawarigsamungapa kankuna. Diltudupa chingangapa luarma sitai tungungapa kag jiru rurag runapasmi kawarigsamungapa ka. ⁴ Chi runaka, tukui dius niraiaskakunata i tukui kungurii ruragkunata piñaspa, kalpachispa, llugsi-chispa, tukuikunamanda mas atunmi tungungapa ka. Taita Diospa atun wasi ukupi paipa mandadirupi tiarisa, kikin Taita Diussinami niringapa ka.

⁵ ¿Manachu iuiaringichi, nuka, chara kamkunawa kaspá, chasakuna rimakugta? ⁶ Kunauraka iachangichimi, pi chi jiru rurag runata arkakugta. Chasaka, paipa puncha chaiankama, manara kawarigsamungachu. ⁷ Jiru rurachig, mana pipas iachagpipas, ñami kagsamú. Paita arkakugta anchuchiurami chi runa kawarigsamungapa ka. ⁸ Ari, chi punchami chi jiru rurag runa kawarigsamungapa ka. Chitaka Iaia Jesús, kikinpa simiwa pukuspami wañuchigsamungapa ka. Ari, Iaia Jesús iapa suma kawarigsamuskawami chi runata puchukagsamungapa ka.

⁹ Chi jiru rurag runaka, iaia kukupa iachaiwami samungapa ka. Iapa iachag kaspá, ñi pipas mana imaurapas kawaskasina ruraspami llullachigsamungapa ka. ¹⁰ Tukui

jiru ruraikunawa, mana imaurapas wañudiru ninama sitai tukungapa kag runakunata llullachispami purigsamungapa ka. Chi runakunaka mana munarkakuna, sutipa Alli Willaita uangapa. Mana kagpika, kispirinkunami. ¹¹ Chimanda, Taita Diosmi paikunata saki, pandachii tukungapa, llullachigkunata uangapa. ¹² Chasaka tukui paikuna, sutipa Alli Willaita mana uiaspa, jiru ruraikunawa alli iuiachiriskakunamandami diltudupa ninama sitai tukungapa kankuna.

Taita Dios agllaskakuna, diltudupa kispichii tukungapa kaskamanda

¹³ Iaia Jesús kuiaska taitakuna i mamakuna, nukanchika imaurapasmi iukanchi, kamkunamanda Taita Diusta: “Pai Siñur” ninga. Taita Diosmi kamkunata ñugpa agllarka, kispichii tukungapa. Santu Ispirituwami chasa kispichirka, kamkuna paimandalla kaugsangapa. Kamkuna sutipa Alli Willaita suma iuiariskamandami kispichirka. ¹⁴ Chasa kispichingapami nukanchi Alli Willaita willaskawa kamkunata kaiarka. Chasaka, nukanchipa Iaia Jesucristowa, paipa suma puncha luarpimi kamkunapas kagringapa kangichi.

¹⁵ Chasamanda, taitakuna i mamakuna, nukanchi kamkunata rimaspa i karta kachaspa ima iachachiskata mana sakisapalla, mana kungarisapalla kangichi. ¹⁶⁻¹⁷ Nukanchipa Iaia Jesucristo kikin i nukanchipa Taita Dios, kamkunata allilla iuiachispa charipuaichu; chasaka kamkuna, imapipas allilla rimaspa i ruraspas kaugsangapa. Pai Taita Dios, nukanchita suma kuiaspami iuiachirka, alli suma iuiaiwa kaspas, mana puchukariduru kaugsaita suiangapa.

3

Nukanchimanda Taita Diusta mañapuaichi, niskamanda

¹ Kunaura mañaikichitami, taitakuna i mamakuna, nukanchimanda Taita Diusta kasa mañapuaichi: imasami kamkuna, Iaia Jesusmanta rimaita uiaspa, suma apirkangichi: chasallata mana unaila, chi rimaita tukuikuna suma uiaspa chaskichukuna. ² Sugkunaka, manara Jesuswa iuiarinkunachu. Chimanda, kasapas Taita Diusta mañapuaichi: jiru iuiag runakunamanda, pai nukanchita kispichichu. ³ Iaia Jesús ima rurangapa niska, chasami kanga. Paimi kamkunata allilapi charingapa ka; chasaka, mana pandarispa kaugsangapakuna. ⁴ Iaia Jesusmanta iuiarispami iachanchi, nukanchi imasa niskasina kamkuna ruranakugta i chasallata rurangapa kagtakuna. ⁵ Iaia Jesús kamkunata iuiachichu, Taita Diusta kuiangapa i kikin Jesucristowa imapipas allilla rurangapa, mana sakisapalla.

Mana killaspalla kaugsasunchi

⁶ Kam taita i mamakunata, nukanchipa Iaia Jesucristo imasa niskasinami kasa ninchi: maikan waugki, killaspalla, nukanchi imasa iachachiskasina mana kaugsanakuskapag-manda anchuriichi. ⁷ Kamkuna allillami iachangichi: imasami nukanchi, kamkunawa kankama, mana killaspalla trabajaspas kaugsarkanchi: chasallatami kamkunapas kaugsai iukangichi. ⁸ Randispallami mikurkanchi. Tukui puncha tutaiahta mana samaspallami sinchi jumbigta trabajaspas kaugsarkanchi; chasaka, kamkunata mana mañaspalla kanga. ⁹ Nukanchi, kamkunata iachachig taitakuna kaspas, pudirkanchimi, kamkunata: “Aidawai” ningapa. Chasa pudispapas, kamkunata kawachingapami sinchi jumbigta trabajarkanchi. Chiwanka, kamkunapas iukangichimi chasallata kaugsanga. ¹⁰ Nukanchi, kamkunawa kankama, kasami nirkanchi: “Maikan mana trabajangapa munag mana mikuchu”. ¹¹ Nigpika uianakunchimi: sugkunaka, wasi wasillasi purinakungichi, ñi ima mana ruraspalla. ¹² Chasa kaugsanakuskatami iuiachispa ninchi: Jumbispa saikugta trabajaspami iukangichi mikunga. Iaia Jesucristomi chasa muná.

¹³ Taitakuna i mamakuna, mana sambaiangichi, allilla rurangapa. ¹⁴ Maikanpas nukanchi kai kartapi ima iachachiskata mana uiagtaka kawaichi: pimi ka. Chikunawaka mana sugllapi kangichi. Chasaka, sitaskakunasina kagtami iuiaringakunata. ¹⁵ Chasa kagpipas, paikunata mana chariichi kuntrakuna kagsina. Waugkinditasinami iukangichi sumaglla iuiaiwa kawanga.

Kaiakama, niskamanda

¹⁶ Iaia Jesús kikin sumaglla kaugsaita karag, imapipas imaurapas kamkunata sumaglla kaugsaita karapuachu. Iaia Jesús, tukui kamkunawa kachu.

¹⁷ Nuka Pablo, nuka kikinpa makiwami iskribiska, kai saladaita kachaikichita. Tukui nuka kachaska kartakunapimi chasallata iskribini. ¹⁸ Nukanchipa Iaia Jesucristo, tukui kamkunata sumaglla kawapuachu.

TIMOTEOTA SAN PABLO MUSUGLLA KARTA KACHASKAMANDA

¹ Jesucristo kachamuskami nuka kani, Alli Willaita willaspa puringapa. Taita Dios nukanchita kispichig i nukanchi suianakuska Jesucristomi chasa niwarka. ² Kam Timoteotami kai karta kachaiki. Kam, Jesucristowa suma iuiarigmandami nuka kikinpa wambrasina kapuangi. Taita Dios i nukanchipa Iaia Jesucristo, kamta kuiaspa, llakispa, suma iuiaiwa kawapuachu.

Llullachispa iachachigkunata piñai iukaskamanda

³ Nuka Masedonia alpama llugsingapa kaspera, kamta Efeso puiblupi kangapami mañarkaiki. Chasa kunaurapas chillapita kapuangi; chasaka, mana allilla iachachigkunata kam upallachingapa. ⁴ Ianga parlukunata mana puchukangasina ñugpamandakunapa wambrakunapa wambrakunamanda sugkuna willanakuskata mana uianakuchu. Chi parlukunawaka ianga rimanakuimi tia. Chikunawaka mana alli kankunachu, Taita Dios ima niskata rurangapa. Paiwa suma iuiarispami chasa ruranchi.

⁵ Chasapaka iachachingi, tukuipi suma allilla mana jiru iuiaspalla, Cristowa sutipa suma iuiarispalla tukui parijuma kuianakuchu. ⁶ Sugkunaka, chasa kuianakungapa sakispa, ianga piñachirinakuspallami kaugsanakú. ⁷ Paikuna, sutipa chasa kagta nispa rimaskata mana iachaspapas, munanakumi, Moisés ima rurangapa niskata iachachig taitakuna tungupapa.

⁸ Kasami iachanchi: Moisés niskata imasa allilla ruraspa kaugsangapa iachachigpika, sumami ka. ⁹ Kasapami iachanchi: Moisés niska, allilla kaugsanakuskata iuiachingapa mana kanchu. Subirbiaspa mana uiagkunamandami ka. Chasallata, mana Taita Diusta manchagkunamanda i tukuipi mana allilla ruragkunamanda, Taita Diusta mana munagkunamanda i paita kamirigkunamanda, taitata i mamata wañuchigkunamanda, pitapas wañuchingapa munagkunamanda, ¹⁰ kari warmiwa pandarigkunamanda, karipura warmiwasiwa pandarigkunamanda, runakunata randispa katugkunamanda, llullagkunamanda, llullaspa juragkunamanda i Jesucristomanda allilla iachachiskata tukui sug rigcha sug rigcha nispa wabutigkunamandapasmi ka. ¹¹ Chi allilla iachachii, tukuipi alli Taita Diospa askurinti suma Alli Willaitami willaraiá. Chi Alli Willaitami mingawaska ka, nuka willaspa puringapa.

Taita Dios, San Pablomanda llakirispa, suma kawaskamanda

¹² Nukanchipa Iaia Jesucristomi iapa animu karawarka. Pai ima niskata nuka rurangapa kagta iachaspami pai kikin aglawarka, pai ima niskata rurag kangapa. Chimandami nuka paita: “Pai Siñur” nini. ¹³ Ñugpata karkanimi paimanda mana allilla rimaspa kamidur. Chasallata, paiwa tukuskakunata puchukangapa kalpachidurmi karkani. Paiwa manara iuiarispapa, paita mana allilla iachaspami chasa rurakurkani. Chimandami Taita Dios nukamanda llakiripuarka. ¹⁴ Nispa nukanchipa atun Taita Dios, iapa sumami kawawarka. Chasallata, Jesucristowa karamuwarka, paiwa iuiarispapa, sumaglla kuiaspa kaugsangapa.

¹⁵ Jesucristo, kai alpamami samurka, pandarii iukagkunata kispichingapa. Chasa rimaika, tukuipi sutipami ka. ¡Amalai tukuikuna, chasa iuiantrangichi! Tukuikunamanda mas pandarii iukagmi nuka kani. ¹⁶ Nuka chasa kagpipas, Jesucristo ñugpa nukawa kawachirka, pai tukui pasinsiawa kagta. Chimandami Taita Dios nukamanda llakiripuarka. Chasapika, nuka tukugsamurkanimi, sugkunata kawachigsina pai iapa pasinsiadu kagta; chasaka paikunapas, Jesucristowa suma iuiarispapa, mana puchukariduru kaugsaita chaschingapa. ¹⁷ Suglla Taita Dios, imaurapas iaia mandagmi ka. Paimi mana kawarig i mana wañug ka. Pai nukanchimanda iapa llakirispa suma kawaskamanda, paita nisunchi: “Kam, iapa suma allilla atunmi kang, maituku waranga waranga watakuna ialigpipas”. Chasa kachu.

¹⁸ Timoteo, nukapa wambrasina kagmanda, imasami Santu Ispirituwa rimagkuna ñugpata kammanda willarkakuna: chasallatami kamta mingakuiki, alli suldadusina Diospa Rimaimanda makanakugsina kangapa. ¹⁹ Chasaka, Cristowa suma iuiarispapa, tukui allilla iuiaiwa imasa chaiaskasina ruraspami kaugsankangi. Ikuti sugkunaka, kikinpa alli iuiaita mana uiaspa, pandarispa, Cristowa iuiariskakunatami wabutirkakuna. ²⁰ Imeneo i Alejandromi chasapi kankuna. Paikunataka iaia kukutami kararkani, Taita Diusta mana kamingapa iachaikuchukuna nispa.

2

Imasa Taita Diusta mañai iukaskamanda

¹ Tukuimanda ñugpa, kasa iachachingapami mañaiki: tukuikunamanda Taita Diusta mañaspa i ruaspa, “Pai Siñur” nispa kangichi. ² Atun mandagkunamanda i tukui paikunawa kagkunamandapasmi mañai iukangichi; chasaka nukanchi, Taita Diusta iuiarispa, tukuipi alli iuiai iukaspa, sumaglla allilla kaugsanakungapa. ³ Chasa mañagpikunaka, allillami ka. Taita Dios nukanchita kispichidurtami suma kuntintachisunchi. ⁴ Paika munanmi, tukuikuna kispichiska kangapa. Paimanda sutipa Alli Willaita iachachukunami muná.

⁵ Suglla Taita Diosmi tia. Suglla runami tia, Taita Dioswa i runakunawa pasinsiachig. Chi runa kanmi Jesucristo. ⁶ Pai kikinmi sakirirka, tukuikunamanda wañuchii tukungapa; chasaka, nukanchita kispichingapa. Imasami Taita Dios, chi puchapa niska karka: chasami tukugsamurka. ⁷ Chimandami nukapas Jesucristo aglaska kachamuska kani; chasaka, Alli Willaita willaspa puringapa. Chasa nukata chaiawaku, mana judíu kagkunatapas chi sutipa Alli Willaita allilla iachachingapa, paikunapas Cristowa iuiaringapa. Nuka, mana llullaspallami sutipa kaskata niiki.

⁸ Chasamandami munani: karikuna, maipi kaskapipas, Taita Diusta suma iuiarispa mañaspa kangichi, awasinama maki churaspa. Tukuipi alli iuiaiwa mañaspa kangichi, mana piñachirinakuspalla, mana ainirinakuspalla.

⁹ Chasallatami munani: warmikunapas, mana iapa awapi i mana achka kulkiwa randiska katangakuna churarichukuna. Umamanda agchakunatapas mana iapa sumaiachichukuna. “Sumaiasami” iuiarispa, iapa bali katangakuna, kurita pirlakunata ruraska u imakunapas mana churarispa kaugsachukuna. ¹⁰ Chasapaka, imasami Taita Diusta iuiarispa warmikuna iukankuna kaugsanga: chasallata tukuipi allilla ruraspakaugsanakuchu.

¹¹ Warmikuna, tukui ima iachachikuskata upalla uiaspa iachaikuchukuna. ¹² Warmikunata mana sakinichu, karikunata iachachispa, mandag kangapa. Paikuna iukan-kunami, ima iachachikuskata upalla uianakunga. ¹³ Adantami Taita Dios ñugpa wiñachirka; nispa Evata. ¹⁴ Chasallata, Adán mana ñugpa llullachii tukurkachu. Warmimi ñugpa llullachii tukurka. Chimandami pandarig tukugsamurka. ¹⁵ Chasa tukugsamuspas, warmikunaka alli mama kaspami kispiringapa kankuna, tukuikunawa allilla iuiaiwa kaspa, Cristowa suma iuiarispa, tukuikunata kuiaspa i Taita Diosmandalla kaugsaspa.

3

Cristowa tukuskakunapura iachachig taitakuna, imasa kaugsai iukaskakunamanda

¹ Kasa sutipami niiki: maikanpas Cristowa tukuskakunapura iachachig taita kangapa munag, allilla rurangapami munaku. ² Chimandami iachachig taitata chaiá, ñi imapipas mana piñai tukungasina kangapa. Sug warmillawa kaugsachu. Mana iapa urdimal kachu. Tukuíwa allilla iuiaiwa, sumaglla kuiai tukug, wasima pipas chaiagriskata: “Iaikui” nidur kachu. Allilla iachachingapa pudi kachu. ³ Mana kachu machangichu, piwapas piñachirinakug, kulkimandalla iuiaspa kaugsag. Piliaringataka, pasinsialla iuiaiwa kachu. ⁴ Kikinpa wasipipas sumaglla kaugsangapa iachachichu, paipa wambrakuna sumaglla kuiaspa uia kangapakuna. ⁵ Maikanpas kikinpa wasipi kaugsanakuskata sumaglla kaugsanakungapa mana iachachii pudigpika, ¿imasatak Taita Dioswa tukuskakunata pudi, sumaglla kawaspa iachachingapa? ⁶ Cristowa iuiaringapa musuglla kallarikugsina mana kachu. Paiwa musuglla iuiarig kagpika, pudinmi atun kagta iuiaringa. Chiwanka, imasami iaia kuku, urmaspa, justisiai tukurka: chasallatami justisiai tukunga. ⁷ Cristowa manara iuiarigkunapas paimanda: “Allillami kaugsá” iuiarispa kawanakuchu. Mana chasa kagpika, pudinmi chi iaia kukupa tugllapisina urmaspa, tukui wagllinga.

Cristowa tukuskakunata aidagkuna, imasa kaugsai iukaskakunamanda

⁸ Cristowa tukuskakunata aidagkunatapas chasallatami chaiá, ñi imapipas mana piñai tukungasina kangapa; chasaka, suma iuiaiwa kawachukuna. Paikuna rimaska mana ianga kachukuna; mana machangichu kachukuna; chasallata, imasapipas kulki mirachingapa iuiailawa mana kachukuna. ⁹ Cristomanda iuiariska mana pipas ñugpata iachaskata charirichukuna, tukuipi allilla iuiaiwa tukuspa. ¹⁰ Kasapas. Paikunata chaiakumi, ñugpa kawaspa, imasa kagtakuna iachangapa. Nispaka, tukuipi alli kagta kawarigpikunaka, pudingakunami, Cristowa tukuskakunata aidag kangapa.

¹¹ Warmikunatapas chasallatami chaiá, ñi imapipas mana piñai tukungasina kangapa; chasaka, suma iuiaiwa kawachukuna. Mana kachukuna wasa rimagkuna i iapa urdimal-kuna. Suma ruraikunata mana kungarichukuna.

¹² Cristowa tukuskakunata aidag runakunaka, sug warmillawa kaugsaspa, paikunapa wambrakunata i wasipi kaugsagkunata sumaglla kaugsangapa iachachichukuna. ¹³ Chi

aidagkunataka, allilla ruraskamanda, suma iuiawami kawangakuna. Chasaka paikuna, Jesucristowa suma iuiariskamanda mana manchaspallami willangakuna.

Nukanchi Cristomanda iuiariska iachaika, askurinti sumami ka

¹⁴ Kambagma utkalla chaiagringapa iuiakuspapas, kai kartatami kachaiki. ¹⁵ Chiwanka, nuka unaiagpika, kam iachankangimi, Diuspa wasimandapura imasa kaugsanakugta. Diuspa wasimandakunaka niraianmi Taita Dius imaurapas kaugsagwa tukuskakuna. Imasami wasita pilarkunawa rumikunawa sinchi chari: chasallatami Cristowa tukuskakuna, sutipa Alli Willaita charig kankuna. ¹⁶ Sutipami kasa niiki: nukanchi Cristomanda iuiariska mana pipas iachaskata iachaika, askurinti sumami ka. Kunaura, kasami iachanchi:

Cristoka, runa tukuspami kawarigsamurka.

Santu Ispiritumi kawachirka,

kaugsaipi wañuipipas, pai ñi ima mana pandarig kagta.

Anjilkunatami pai kawarirka.

Mana judíu kagkunatapami

paimanda willai uiarigrirka.

Kai tukui alpapimi

chi paimanda Alli Willaita

iuiaringapa tukugsamurka.

Paika, sug luarmami apai tukurka,

suma punchapi kagringapa.

4

Cristowa iuiariskata sakigkunamanda

¹ Santu Ispiritu, allita willaspa, kasami ni: “Tukurii punchakuna ña chaiamukuura, sugkunaka, Cristowa iuiariikunata sakispa, llullachig kuku wairakunawa iachachigkunatami uangapa kankuna. ² Chi iachachigkunaka, miski simimi iukangapa kankuna. Tukuipi llullaspami kangapa kankuna. Jiru ruraskamandami paikunapa alli iuiaita wañuchii tukuskasina kangapa kankuna. ³ Chi llullaspa iachachigkunami ningakuna mana kasarangapa; maikan mikuita mikungapa, sug mikuikunataka sakingapa”. Chi mikuikunataka, Taita Diusmi ruraska ka; chasaka, paimanda sutipa Alli Willaita iuiarispaga kagkuna, paita: “Pai Siñur” nispa, mikuspa kachukuna. ⁴ Taita Dius ima ruraskaka, tukui allillami ka. Chimanda, ñi imatapas mana wabutii chianchu. Sumaglla “Pai Siñur” nispami mikudiru ka. ⁵ Diuspa Rimaimanda i paita: “Pai Siñur” niskakunamandapasmi chi mikuikuna mana mapa kagsina niraiagsamú.

Jesucristopa alli lutrinsinamanda

⁶ Nuka ima nikuskata Jesucristowa tukuskakunata kam iachachigpika, paipa alli lutrinsinami kankangi. Chi Alli Willaikunata nuka iachachiskata kam uiaspa katichikugpika, alli mikui mikukugsinami kankangi. ⁷ Kasapasmi niiki: kai alpamandalla ianga parlukunatapas mana uiakungi. Chasapaka, Taita Diusta iuiarispalla kangi. ⁸ Pugllaikuna iachaikuika, mailla allimi ka. Ikuti Taita Diusta iuiariika, tukuimanda mas allimi ka. Kaiipi kaugsaimanda i sug luarmandapasmi alli ka. ⁹ Chasa rimaika, tukuipi sutipami ka. ¡Amalái tukuikuna, chasa iuiantrangichi! ¹⁰ Chimandami nukanchi, sinchi trabaju pasaspa ruranchi. Mas iapa llakiikuna pasanakuspapas, Taita Dius imaurapas kaugsagta suma suiaspami chasa mana sakirinchi. Paika, tukuikunata kispichigmi ka. Paiwa suma iuiarigkunatami mas kispichingapa muná.

¹¹ Nuka ima nikuskata rurangapami iukangi suma iuiachispa iachachinga. ¹² Mana pipas kamta wasa churachukuna, “Musumi kangi” nispa. Chasapaka, iukangimi tukuipi alli kanga: rimaskapi, suma kaugsaskapi, kuiaskapi i iuiaskapi, tukui jiru iuiaikunata sakispa; chasaka, Cristowa suma iuiarigkunata imasa kaugsanakungapa chaiagta kawachingapa. ¹³ Nuka manara chaiagrinkama, Diuspa Rimai iskribiraiaskata uiachispa, suma iuiachispa, allilla iachachispa kangi. ¹⁴ Cristowa tukuskapura iacha taitakuna, Santu Ispirituwa rimaspa, kamta maki churaura, Taita Dius karaska; chitapas mana kungarisapalla iuiakungi.

¹⁵ Tukui chikunata rurangapaka, tukuipi suma iuiarispaga kangi. Chasaka, tukuikunami kawangakuna, kam allilla iachaita mas iachaikukugta. ¹⁶ Kam kikin iuiaringi, alli iuiaiwa kangapa. Kam kikin iachachikuskatapas kawangi, allillachu ka. Tukuipi mana sakispallakangi. Chasa ruragpika, kam kikin kispirinkangimi. Kamta uiagkunapasmi kispiringakuna.

5

Imasa sugkunawa kaugsai iukaskamanda

¹ Achala runakunata mana sinchi rimangi. Kamba taitatasinami iukangi suma iuia-chinga. Musukunatapas chasalata waugkinditasina suma iuiachingi. ² Achala warmikunataka mamatasina suma iuiachingi. Sipaskunataka, mana jiru iuiaspalla, paninditasina suma iuiachingi.

³ Mana iukag sapalla kidaska warmikunataka ima ministiskakunata aidangi. ⁴ Maikan biudapas wambrakuna i wambrakunapa wambrakuna iukagpika, chi wambrakunata ñugpa iachachingi, pai kikinpura suma llakirispa, imakunapipas mamata i taitata: “Pai Mamita, Pai Siñur” nispa aidanakuchu. Chasa ruragkunami Taita Diusta suma kuntintachinkuna. ⁵ Ikuti sapalla kidaska warmika iukanmi, tuta punchapas Taita Diusta iuiaris-palla mañaspa, paita iuiaspalla kanga. ⁶ Maikan biudapas kikinmandalla alli iuiachirispa kaugsagka, wañuskasinami niraiá.

⁷ Nuka ima nikuskata rurangapaka, allilla iachachingi. Chasawaka uiaspa ruragkunata, ñi pipas mana piñai pudingakunatachu. ⁸ Ikuti maikanpas paipurakunamanda i maspas kikinpa wasipi kaugsanakuskamanda kuidangapa kungarigka, chi Alli Willaita uiaskata piñarigmi niraiá. Taita Diusta mana uiagkunamanda mas pandarigmi niraiá.

⁹ Sapalla kidaska warmikunata aidangapa willaraiaska librupika churangi sugta chung aiali wataiug i suglla kusa iukaskakunallata. ¹⁰ Iukangimi, paikuna allilla ruraspa kagkunata kasa rigsinga: wambrakunata alli wiñachispachu ka; paipa wasima chaiagriskakunata sumagllachu chaskí; Taita Diuspalla kagkunata chakikunata maillaspachu ka; ima llakii iukaskakunatapas sumagllachu aidangapa kawá; nisunchi: tukuí imapipas allilla ruraspa kagta, chasakunata chi librupi churangi aidangapakunata.

¹¹ Ikuti mas sipas biudakunapa sutikunataka mana chi librupi churangi. Pudinkunami, paikunapa iuiaska munaita mana sakingapa pudispa, Cristota wasa churagsina ruras-paka, ikuti kasarangapa munanakunga. ¹² Chasa ruraspa, paikuna mana imasa Cristota niskasina ruragmandami pandarig tukugsamunkuna. ¹³ Kasapasmi tukugsamunkuna: killa wangu tukuspa, wasi wasillami puringapa munankuna. Mana killa wangulla tukun-kunachu. Chankuakuna tukuspa, tukuipi rimarispami purinkuna. Imasa mana chaiaska parlukuna wasa rimaikuna rimaspallami purinkuna. ¹⁴ Chimandami munantrani: sipas biudakunaka ikuti kasarankuna, wawita iukachukuna; allilla wiñachichukuna; kik-ina wasipi tukuí allilla ruraspa kaugsachukuna. Chasaka, iaia kukuka mana pudingachu, ñi ima juchachinga. ¹⁵ Maikan biudakuna, ñami Cristowa iuiariskata sakispa, iaia kukuta katichinakú.

¹⁶ Kasapas. Maikan [warmi] Cristowa iuiarig, sug biuda paipura iukagpika, chi biudata sumaglla kawaspa, ima ministiskakunata aidachukuna. Chasaka, tukuí Cristowa tukuskakunata mana chaiangachu paita kawangapa. Chiwanka, paikuna pudingakunami, sapalla warmi kidaskakunata aidangapa.

¹⁷ Cristowa tukuskapura iacha taitakunata iukangimi, iskai biaji “Pai Siñur” nispa nunanga. Diuspa Rimaita willaspa iachachispalla kagkunataka masmi chaiagri kulki karanga. ¹⁸ Chasallatami ñugpamanda librupi willaraiá, kasa nispa:

Triguta saruspa iskug wagrata
mana simita watangi.

Chasallatami niraiá:

Maikan trabajagkunatapas chaianmi,
trabajaskamanda paganga.

¹⁹ Cristowa tukuskapura iacha taitakunamanda pipas ninakuchu: “Mana allilla ruranchu”: iskai u kimsa kawaskakuna mana chasalata willagpikunaka, kam mana ñi imapas uiakungi. ²⁰ Maikanpas ikuti ikuti pandarigtaka tukuikunapa ñawipi iuiachispa piñangi. Chasa kawaspaka, sugkunaka, mancharispa, mana chasa pandariikunata rurangakunachu. ²¹ Taita Diuspa, Jesucristopa i agllaska anjilkunapa ñawipimi kai niraiaskata mingaiki: nuka ima kamta niska iuiachiskakunata rurangi, ñi pitapas mana agllakasina iuiaspalla. ²² Manara allilla rigsispa kawaspalla, kamba maki mana pitapas churakungi, Cristowa tukuskapura iacha taita kangapa. Mana kagpika, paikuna mana allilla ruragpikuna, kam pandarikugsinami tukunga. Imakunapipas sumaglla iuiapi kangi.

²³ Kam ikuti ikuti wigsá nanai ungu kaspá, kunaoramanda niikimi: mana iakulla upiangi. Aslla aslla binutami iukangi upianga.

²⁴ Sugkuna pandariskamanda ñami iacharí, manara kabilduma chaiagrípita. Ikuti sugkuna pandariskakunamandaka mas nispami iacharí. ²⁵ Chasalata, ima allilla ruras-kakunamanda ñami iacharí. Ikuti manara iachariskaka, mana pakalla kidanchu. Imaurapasmí iacharí.

6

¹ Maikan lutrinpas, kikinpa patrunta tukuipi suma iuiaiwa uiachukuna. Chasaka, Taita Dios i paimanda ima iachachiskakuna mana kamirispalla kachukuna. ² Cristowa iuiarig patrún iukagkunaka mana nichukuna: “Nukapa patrún, nukawa waugkindisinami ña kanchi. Chiwanka, paita mana uiasa”. Chasapaka iuiarichukuna, chi patrunkuna Cristowa iuiarig kuiaska waugkindisina kagtakuna. Chasa iuiarispaka, mas allilla rurachukuna. Chi niskakunatami iukangi, sinchi iuiachispa iachachinga.

Taita Dioswa suma iuiarispaka, iapa iukagsinami kanchi

³ Maikanpas, Iaiá Jesucristopa alli suma rimaikunawa i Taita Dioswa iuiaringapa iachachiskakunawa iuiaringataka, sug rigcha iachachigkunaka, ⁴ atun tukuspa, “Iachami kani” iuiarisa, ñi imapi allilla iuiaita mana iukankunachu. Chi runakunaka, ima rimaipipas maskarinkunami, sugkunawa ainchirinakuspa ningapa: “Kam rimaskaka, mana allilla kanchu”. Chimandami kasa mana allilla tukugsamú: sugkunata jiru iuiaiwa kawan-gapa; piñachirinakungapa; kaminakungapa; mana allilla sugkunamanda iuianakungapa; ⁵ sutipa kaskata sakispa, jiru iuiagpura piñachirinakungapa, mana tukurinkama. Chasakuna iuiankunami, Taita Dioswa iuiarispaka, iapa kulki iukag tukugsamungapa kagtakuna. Paikunapagmandaka anchuringi. ⁶ Taita Dioswa suma iuiarispaka, mana ñi ima iukaspapas, iapa iukagsinami kanchi. Chasaka, Taita Dios ima karaskallawa allillami kaugsasunchi. ⁷ Nukanchi tiagsamuura, ñi imawa mana chaiagsamurkanchichu. Chasallata, wañuura, ñi imapas mana apaspa ringapa kanchichu. ⁸ Mikungapa i katanga churaringapa tiachu: chikunallowami iukanchi kuntintarisa kanga. ⁹ Ikuti iapa iukangapa iuiarisa munagkunaka, manami pudingapa kankuna, chasa iuiaikunata sakingapa. Tugllapisina urmaspa, waglichirinkunami. Iapa upasina, tukui iukangapami munagsamunkuna. Chasa iuiailawa kaskakuna, diltudupami wagllirisa puchukarinkuna. ¹⁰ Kulkita iapa kuiaspa munag, tukui mana allillapi urmachigmi ka. Sugkunaka, kulkillawa iapa iuiaspa, Cristowa iuiariskata sakispa, sug mana alli ñambitami rigsina rurankuna. Chasaka, iapa llakii iukaspallami kaugsankuna.

Timoteo ima rurai iukaskamanda

¹¹ Kamka, Taita Diospa runa kaspera, tukui chi jiru iuiaikunamanda anchurisa kaugsangi. Taita Dios ima munaskata ruraspa, paita suma iuiarisa, Cristowa tukui iuiariskata mana sakispalla kaugsakungi. Chasallata, tukuikunata kuiaspa, mana piñanakuspalla, mana atuniachirispalla iuiapi kangi. ¹² Cristomandalla iuiarisa tukuipi binsispa kangi. Mana puchukariduru suma kaugsaita, jujalallapas kichui tukungi! Chi kaugsaita iukangapami Taita Dios kamta kaiarka. Chasamandami, achkakunapa ñugpa ladu, kam Cristowa tukuskata allilla willarkangi.

¹³ Taita Dios tukuita kaugsai karappa ñawipi i Jesucristopa ñawipi kasami niiki. (Kikin Jesucristopas, Ponso Pilatospa ñawipi kikinmanda tapuchiura, allillami willarka.) ¹⁴ Nuka ima niskata allilla ruraspa kaugsangi, mana pandarispalla. Chasa kaugsagpika, kamta mana chaiangachu, ñi imapipas piñai tukungapa. Chasa ruraspa kaugsangi, nukanchipa Iaiá Jesucristo ikuti samunkama.

¹⁵ Taita Dios kikin munaska punchami Jesucristota ikuti kachamunga. Pai Taita Diosmi ka suglla, tukuipi iapa suma pudig. Atun mandagkunamanda i iaiá mandagkunamandapas mas iaiami ka. ¹⁶ Paillami ñi imaurapas mana wañungapa ka. Mana pipas chaiangasina punchapimi kaugsá. Paita, ñi maikan runa mana kawaska kanchu. Pai, ñi ima mana kawarigmi ka. Tukuikuna imaurapas paita kuiaspa nisunchi: “Kam, diltudupa tukuikunamanda mas atun mandagmi kangi”. Chasa kachu.

Iapa iukagkunata iuiachiskamanda

¹⁷ Kai alpapi iapa iukag runakunata nipuai, mana iapa atuniachiriska iuianakuchu; kaipi tukurig iukaskakunallowa mana iuiarinakuchu; kaugsag Taita Diosllata iuiarisa kaugsanakuchu. Taita Diosmi tukui puchugta kará; chikunawaka, nukanchi allilla kaugsangapa. ¹⁸ Chi iapa iukagkuna, tukuipi allilla rurachukuna. Chi ruraskakunawami, Taita Diospa ñawipi iapa iukagsina niraiangakuna. Mana michaspalla, ima iukaskata karaspa kachukuna. ¹⁹ Chasa ruragkunaka, saiachingapa wasi muruchu rumikuna kagsinami suma luarpi iukangakuna. Chiwanka, sutipa mana puchukariduru suma kaugsaitami taringakuna.

Kaiakama, niskamanda

²⁰ Timoteo, kamta mingaskata allilla kawangi. Kai alpamandalla ianga parlukunata mana uiangi. Chasallata, llullaspa alli iachai kagta sug rigcha sug rigcha iachachiskakunata mana tuparingi. ²¹ Sugkunaka, chi iachachiskakunata katispa, Cristowa iuiariskata sakispa, sug mana alli ñambitami rigsina rurankuna.

Taita Dios, kamwa kagkunata sumaglla kawapuachu.

TIMOTEOTA SAN PABLO ISKAIMA KARTA KACHASKAMANDA

¹ Taita Dius nukata munawaskamanda, Jesucristo kachamuwaskami kani; chasaka, paipa suma kaugsaita Jesucristowa karangapa niskamanda Alli Willaita willaspa puringapa. ² Kam Timoteotami kai karta kachaiki. Kam, nukapa kuiaska wambrasinami kapuangi. Taita Dius i nukanchipa Iaia Jesucristo, kamta kuiaspa, kammanda llakispa, suma iuiaiwa kawapuachu.

Cristomanda willai iukaskamanda

³ Nuka, tuta i puncha Taita Diusta mañaspa, kammanda imaurapas iuiarispa, Pai Siñurmi nini. Imasami nukapa ñugpamanda taitakuna, Taita Dius imasa niskasina rurarkakuna: chasallatami nukapas, tukuipi suma iuiaiwa pai ima niskata ruraspa kaugsakuni. ⁴ Nuka kambagmanda llugsikuura, kamba wiki wakaskatami iuiariwá. Chimandami askurinti munakuni, kamta kawangapa; chasaka, alli iuiachiwangapa. ⁵ Kam Cristowa sutipa suma iuiarigtapasmi iuiarini. Ñugpaka, kamba achala mama Loida, nispaka kamba mama Eunisemi chasa Cristowa suma iuiarispa karkakuna. Kammandapasmi iuiani, paikunasinallatata Cristowa suma iuiarispa kagta.

⁶ Chasa kaskamanda, kasami niiki: kamta nuka maki churaura, Taita Dius karamuska; chi karamuskataka masmi kamba iuiapi kaugsachirii iukangi. ⁷ Mana sugkunata manchaiwa kaugsangapami Taita Dius paipa Ispirituta nukanchita karamurka. Paipa iapa iachaita iukaspa, tukuikunata kuiaspa, tukuikunawa alli iuiaiwa kaspera kaugsangapami Santu Ispirituta karamurka.

⁸ Chasa mana manchaspallami nukanchipa Iaiamanda iukangi willanga. Nuka paimanda wichkaraiagpipas, mana mancharikungi. Chasapaka, kamtapas Alli Willaimanda llakichigpika, nukasinallatami iukangi pasanga. Taita Diosmi kamta paipa iapa iachaita karanga, ima llakiikunapas chaiagpika, alli iuiachiiwa kangapa.

⁹ Taita Dius kikinmi nukanchita kispichispa agllarka, paimandalla kaugsangapa. Nukanchita mana agllarkachu, nukanchi ima allilla ruraskamanda. Pai kikin imasa munaskasinami nukanchita iapa kuiaspa agllarka. Kai alpa manara tiaskauramandatami, Jesucristomanda iuiaspa, nukanchita iapa kuiarka. ¹⁰ Kunaura, Jesucristo nukanchita kispichig samuskawami chi kuiaita kawachigsamurka. Jesucristomi wañuita binsig-samurka. Alli Willaiwa willaspa, mana wañudiru suma kaugsaitami iachachigsamurka, nukanchipas taringapa.

¹¹ Chi Alli Willaita willaspa puringapami Jesucristo agllaska kachamuska runa kani. Chasami nukata chaiawaku, chi Alli Willaita allilla iachachingapa. ¹² Chita willagmandami kaipi llakiiwa pasakuni. Chasa kagpipas, nuka iachanami piwa iuiarikugta. Chimandami mana manchaiwa kani. Kasapasmi paimanda iachani: pai Alli Willaita mingawaskata, pai kikin samunkamami iuká kawangapa.

¹³ Imasami nuka, kamta allilla rimaikunawa iachachirkaiki: chasallata kaugsangi. Jesucristowa suma iuiarispa, tukuikunata kuiaspa kaugsangi. ¹⁴ Santu Ispiritu nukanchiwa sugllapi kaugsagwa, Taita Dius paipa Alli Willai mingaskata suma kawangi, mana sug rigcha tukungapa.

¹⁵ Ñami iachangi, Asia alpamanda tukui nukawa kagkuna nukata sakiwagtakuna. Paurapa kankunami Fijelo i Ermójenes. ¹⁶ Waugki Onesiforollami achka biaji kawawagsamurka. Paimi nukata alli iuiachiwagsamurka. Chimandami Iaia Jesusta nini: paipa wasipi kaugsanakuskata sumaglla kawapuachu. Paika, nuka wataska wichkaraiaskamanda iachaspaka, mana ñi imapas mancharirkachu. ¹⁷ Chasapaka, Romama chaisamungallawa kallarirkami, mana samaspalla maskawangapa, tariwankama. ¹⁸ Tukurii puncha chaimuura, Iaia Jesús paimanda llakirispa suma kawapuachu. Ñami iachangi, Efeso puiblupipas pai ikuti ikuti nukanchita aidagta.

2

Jesucristopa alli suldadusina kaskamanda

¹ Kam nukapa wambrasina kagmandami niiki: Jesucristo kamta suma kuiakuskawami iukangi sinchi muruchu tukunga. ² Achkakunapa ñawipi nuka iachachiskata uiawarkangi; chi iachachiskataka Cristomanda tukuipi allilla rurag iachachii pudigkunata nipuangi, paikuna sugkunata iachachichukuna.

³ Kamka, Jesucristopa alli suldadusina kaspera, iukangimi tukui llakiikunata chaskinga. ⁴ Ñi maikan suldadu tukuska mana iukanchu, mana suldadukunapa iuiaita chapuringa.

Iukanmi, paita mandag ima niskallata ruranga. ⁵ Chasallata, maikan pugllagpas pugllangapa chaiskasina mana pugllagpika, primiuta manami chaskinga. ⁶ Chasallata, maikan saikugta tarpug pudinmi, ñugpa pallagringa. ⁷ Chi nuka rimaskataka allilla iuiaripuai. Iaia Jesusmi iuiari karanga, kam tukui ima niraiaskata iachangapa.

⁸ Jesucristomanda iuiaringi. Paipa ñugpamanda achala taita, atun mandag Davidmi karka. Pai Jesucristo wañuspa, pai kikinmi kaugsarirka. Chi paimanda Alli Willaitami nuka willakuni. ⁹ Nuka chasa willakuskamandami kaipi wataska chariwanakú, wañuchidurtasina. Ikuti Diuspa Rimaika mana wataska kanchu. ¹⁰ Chimandami Taita Dius agllaska runakunamanda tukui llaikiita chaskikuni; chasaka paikunapas, kispirispa, Jesucristowa mana puchukariduru suma punchapi chaigringapa.

¹¹ Kai niraiaskaka, sutipami ka:
Nukanchi paiwa sugllapi wañuska niraiagpika,
paillawantami kaugsaringapa kanchi.
¹² Paimanda llakii iukagpika,
paiwa sugllapimi kagringapa kanchi, mandangapa.
“Paita mana rigsinihu” nigpika,
paipasmi nukanchimanda chasallata ningapa ka.
¹³ Nukanchi paimanda kungarigpipas,
paika nukanchimanda mana kungarinchu.
Pai ima niskata,
pai kikin mana pudinchi:
“Mana chasa rurasa” ningapa.

Diuspa ñawipi, allilla rurag kawariskamanda

¹⁴ Chi niraiaskata iuiachipuai. Diuspa ñawipi nipuai, ianga rimai niraiaskakunamanda mana ainichirinakuchu. Chi ainichirinakuskaka, ñi imapa manima allilla kanchu. Chi uiagkuna allilla iuianakuskatami pandachi. ¹⁵ Kamka, mana sakirispallami sinchi iuiari iukangi; chasaka, Diuspa ñawipi allilla rurag kawaringapa. Chasa allilla ruraspami ñi imapipas mana mancharispalla kankangi. Sutipa Suma Rimaika imasa niraiaskasina allilla iachachipuangi.

¹⁶ Kai alpamandalla ianga parlukunata mana uiakungi. Chasa rimagkunaka, mailla mailla Taita Diusta mana manchagmi tukunkuna. ¹⁷ Chasa pandachispa iachachigkunaka, uiagkunata ismuchijsinami rurankuna. Chasa iachachigpura kankunami Imeneo i Fileto. ¹⁸ Paikunaka, sutipa Alli Willaita sakispami llullaspa ninakú: “Cristowa tukuskakunaka, ñami kaugsariska kanchi”. Chasa rimaikunawami sugkuna Cristowa iuiarigkunata pandachinakú. ¹⁹ Chasa ninakugpipas, Taita Dius kikin willaskaka wasita kallariska suma rumipi saichiskasinami ka, ñi pipas mana kuiuchingasina. Chipika, kasami willaraiaí:
Atun Taita Diuska,
paipa kaskakunata
allillami rigsi.

Kasapasmi willaraiaí:

Tukuikuna Jesús nukapa iaia kagta iuiarigkunaka,
jiru iuiaikunata sakichukuna.

²⁰ Kasapas. Atun wasipi mana tianchu kurita i kulkita ruraska upiadirukunalla. Kaspita i alpata ruraskakunapasmi tia. Chikunaka kankunami: sugkunaka, atun punchakunapalla; ikuti sugkunaka, imaurapipapas. ²¹ Nukanchi atun punchapasina kangapa chainmi, tukui jiru ruraikunata sakispa kaugsangapa. Chasaka, Iaia Jesuspalla kaspas, paimandalla allipimi kasunchi. Tukuipi allilla rurangapa allichiskasinami kasunchi.

²² Musukunapa mana allilla iuiari munaikunata anchuriskasinami kaugsangi. Alli ruraspas, Cristowa suma iuiarispas, alli kuiaspas, sumaglla kaugsangi. Iaia Jesusta tukuipi suma iuiariwa mañagkunawa sugllapi kangi. ²³ Ianga upasina rimanakuskata mana uiakungi. Ñami iachangi, chasa rimanakuskamanda piñachinakuduru chaimudur kagta. ²⁴ Iaia Jesuspa lutrinsina mana iukanchu, ñi piwapas piñachinakuspa kaugsanga. Chasapaka iukangimi, tukuikunawa alli kanga, tukuikunata allilla iachachinga i tukuikunawa mana piñanakuspalla iuiariwa kanga. ²⁵ Kamta piñagkunata rimangapa chaiaura, mana atun-iachirispalla iuiachingikunata. Chasa iuiachigpika, Taita Diuska paikunata pudinmi karanga, paiwa tukugsamuspa, sutipa Alli Willaita iachagsamungapa. ²⁶ Chiwanka, paikuna pudinkunami, rigcharigsina tukuspa, iaia kuku ima munakuskata rurangapa wataskasina tugllamanda mitikunga.

3

Tukurii punchakuna, imasa runakuna kaugsangapa kaskamanda

¹ Kasapas iachapuai: tukurii punchakuna chaimuuraka, iapa llakii punchakunami chaiamungapa ka. ² Chi punchakuna kaugsanakugka, kikinkunamandalla iukangapa iuiaiwa, iapa kulkita kuiaspa munaiwami kangapa kankuna. Chasakunaka, atuniachirispá, nirispami kankuna: "Nukami tukuikunamanda mas kani". Taita Diusta kamispami rimangapa kankuna; taitata i mamata mana uangapa kankunachu; mana "Pai" nisipallami kangapa kankuna; Taita Diusta mana manchangapa kankunachu; ³ ñi pitapas mana kuiangapa kankunachu; piñanakuspaka, mana kungarigkunami kangapa kankuna; iangami pitapas juchachispa kangapa kankuna; jiru iuiaikunata mana arkangapa pudingapa kankunachu; ima kawariskata puchukaspami ringapa kankuna; tukui allilla kaskakunatapasmí puchukangapa munangapa kankuna; ⁴ pitapas llullaspa apichispami munangapa kankuna; mana iuiarispallami imapas rurangapa kankuna; atuniachirispá iuiaspami kangapa kankuna. Taita Diusta munangataka, kikinkunamandallami iuiarispá kangapa kankuna. ⁵ Taita Dioswa kagsinami kawaringapa kankuna. Nigpika, kikinkunapa ruraikunawaka mana chasa kagta kawachinkunachu.

Chasakunataka sakingi, anchuringi, ianga kawangi, paikunawa mana kangi. ⁶ Pai-puramanda sugkuna, wasikunama llullachispa iaikuspa, mana iuiaiug pandarii iukaska warmikunatami maskankuna; chi warmikunaka, sug rigcha sug rigcha jiru munaiwa aliuu tukuskasina kaspá, ⁷ iachaikui iachaikui apakugpipas, sutipa Alli Willaita mana imaurapas iachagsamungapa kankunachu. ⁸ Imasami Janes i Jambres, jiru iachakuna kaspá, mana munarkakuna Moiesta uangapa: chasallatami chi llullachig runakuna, sutipa Alli Willaita mana uangapa munanakú. Iapa jiru iuiaikunami iukankuna. Taita Dioswa kagsina kawarispapas, ianga sug rigchami iuiarinakú. ⁹ Chasa pandachigkuna, mana iapa unaiangapa kankunachu. Imasami chi Moiesta iskai mana munagkuna, upasina kawachirirkakuna: chasallatami chi pandachigkuna, tukuikunapa ñawipi upasina kawachiringapa kankuna.

Timoteota ima rurangapa, San Pablo mingaskamanda

¹⁰ Kamka, allillami iachangi, nuka imasa iachachikuskata, imasa kaugsakuskata, imasa iuiakuskata, imasa Cristowa suma iuiarispá kaskata, imasa sugkunawa mana piñanakuspalla kaskata, imasa sugkunata kuiaspa kaskata, imasa allillata charirig kaskata, ¹¹ imasa jiru iuiaiwa kalpachii tukuskata; imasa iapa llakiikuna iukaskatapasmi allilla iachangi. Kammi iachangi, imasami Antiokia, Ikonio i Listra puiblukunapi nuka iapa llakiikuna iukaspá, kalpachii tukurkani. Tukui chikunamanda, Iaia Jesusmi kispichiwarka. ¹² Jesucristomandalla sumaglla kaugsangapa munagkunata, tukuikunatami jiru rurangapa munangapa kankuna. ¹³ Chi jiru pandachispa ruragkunaka, mas jiru mas jirumi ruraspalla kangapa kankuna. Sugkunatami pandachingapa kankuna. Paikunatapás, sugkunami pandachingapa kankuna.

¹⁴ Kamka, ima Cristomanda iachaikuspa iuiakuskata mana sakispalla kaugsangi. Allillami iachangi: pikunami kamta iachachirkakuna. ¹⁵ Wawa kauramandatami Diospa tukuipi iapa alli Rimaita iachaikuska kangi. Paipa Rimaiwa pudirinmi, allilla iachaikuspa, Jesucristowa suma iuiarispá, kispiringa. ¹⁶ Tukui chi rimaikuna, Taita Dios kikin iuiachiskawa ruraskami ka. Paipa Rimaiwa allillami ka iachachingapa i mana alli ruragkunata iuiachingapa; chasaka, mana allilla ruraikunata sakichukuna. Chasallatami alli ka iachachingapa, Taita Dios ima munaskata ruraspa kaugsanakungapa. ¹⁷ Chasaka Taita Diospa runakuna, suma iuiachiska i allilla iachachiskami kangakuna, tukuipi allilla ruraspa kaugsangapa.

4

¹ Taita Diospa ñawipi i Iaia Jesucristopa ñawipimi kasa niiki. Pai Jesucristomi samungapa ka, kaugsakunata i wañuskunatapás ima ruraskakunamanda iuiachispa kawachingapa. ² Diospa Rimaita allilla iuiachispa, munanakuskata i mana munanakuskatapas willangi. Imaurapas iachachingi, mana piñaspalla. Mana allilla ruraskakunata sumaglla iuiachingi. Mana sambaiaspalla, tukuikunata rimangi, allilla kaugsachukuna. ³ Allilla iachachiikunata mana uangapa punchakuna, ñallami chaiamungapa ka. Chi mana uiagkunaka, kikinkuna imasa munaskasina achka iachachigkunatami maskangkuna, pai kikinkuna ima munaskallata iachaikungapa. ⁴ Sutipa Alli Willaita mana uiaspa, munangapami kankuna, ianga parlukunallata uangapa. ⁵ Ikuti kamka, mana iapa urdimal kangi. Ima llakii chaiagpika, upalla kangi. Alli Willaita willaspalla kangi. Kam tukui rurangapa chaiaskata allilla ruraspa kangi.

⁶ Nukata wañuchiwangapa puncha ñami chaimuku, chiura Taita Diusta karagsina tukuspa, paita alli iuiachingapa. ⁷ Alli Willaita willaspa, alli suldadusinami kunankama kani. Kalpakuskasinapi chaiangapa kaskama ñami chaiakuni. Jesuswa suma iuiariskata mana sakispallami kunankama kaugsakuni. ⁸ Chasa allilla kaugsakuskamanda, ñami

llaugtu allichiska suiawaku. Chi llaugtutaka, Iaia Jesusmi, pai samug puncha iukachiwagsamungapa ka. Paimi ka imasa chaiaskasina justisiai rurag. Chi llaugtutaka mana nukallata karawagsamungapa kanchu. Maikan pai samungapa puncha chaiangapa suianakuskatapasmi chasallata karagsamungapa ka.

Timoteo ima rurai iukaskamanda

⁹ Imasa ruraspapas, utkalla samui, nukata kawawangapa. ¹⁰ Waugki Demaska, sitawaspami rirka Tesalónika puibluma. Kai alpapi tiaskakunallatami pai mas munarirka. Waugki Kreskenteka, Galasia alpamami rirka. Waugki Titoka, Dalmasia alpamami rirka. ¹¹ Waugki Lucasllami nukawa ka. Kam samuura, waugki Marcosta pusamuwangi. Paipas allillami tukuwanga, nukawa Alli Willaita willangapa. ¹² Waugki Tikikotaka Efeso puiblumami kacharkani. ¹³ Kam samuura, Troas puiblupi waugki Karpopa wasipi nuka sakiska churaridiruta i librukunata apamuwangi. Chimandaka, iskribiraiaska karakunata mana kungarisipalla apamuwangi.

¹⁴ Alejandro iruta imapas ruragka, nukata jirumi rurawarka. Pai ima ruraskamanda, Iaia Jesusmi llakiripuanga. ¹⁵ Paimi nukanchi rimaskata: “Chasaka mana kanchu” sinchi nikurka. Chimanda kampas, paita mana rimangi.

¹⁶ Nukata justisiapagma musuglla apawauraka, ñi pipas mana tiarkachu, nukamanda rimapuungapa. Tukuikunami, nukata sakiwaspa, rirkakuna. Nuka ninimi: paikunataka, Taita Dios mana imapas piñapuachu. ¹⁷ Iaia Jesusmi, nukawa sugllapi kaspá, tukuipi animu karawarka. Chasawami Alli Willaita nuka allilla willarkani, tukui mana judiu kagkunapas uiangapa. Chi puncha, wañuchiwangapa ninakuskamandami Iaia Jesús nukata kispichiwarka. ¹⁸ Tukui mana alli runakunamandapasmi kispichiwangapa ka. Michawangapami ka, sug luarpi pai suma mandakuskapi nuka chaiagrinkama. Pai Jesusta imaurapas nisunchi: “Kam, iapa suma atunmi kangí, maituku waranga waranga watakuna ialigpipas”. Chasa kachu.

Kaiakama, niskamanda

¹⁹ Pani Priskata, paipa kusa Akilata i waugki Onesiforopa wasipi tukui kausanakuskata: “Puangi” nipuai. ²⁰ Waugki Erastoka, Korinto puiblupimi chisiaku. Waugki Trofimotaka Mileto puiblupi ungugmi sakirkani. ²¹ Kamka, utkalla samui, manara tamia punchakuna chaiamugpi. Eubulo, Pudente, Lino, Klaudia, tukui sug waugkindikuna i panikunapasmi kamta: “Puangi” ninakú.

²² Iaia Jesús, kamwa kachu. Taita Dios, kamwa kagkunata sumaglla kawapuachu.

TITOTA SAN PABLO KARTA KACHASKAMANDA

¹ Nuka Pablo, Taita Diospa lutrinsina, Jesucristo kachamuskami kani, Alli Willaita willaspa puringapa; chasaka, Taita Dios agllaskakuna paiwa suma iuiaringapa; chiwanka, chi sutipa Alli Willaita iachagsamuspa, paita iuiarispa kaugsangapa. ² Chasa kaugsaspaka, mana puchukariduru suma kaugsaita iukangapami suianakunchi. Kai alpa manara tiagpitami Taita Dios, mana llullag kaspapa, nukanchita chasa karangapa nirka. ³ Kunaura, Taita Dios niska punchami chaiarka, paipa Rimaita willangapa. Chasa willangapaka, Taita Dios nukanchita kispichigmi mingawaspa kachamuwarka. ⁴ Kam Titotami kai karta kachaiki. Kamka, nukasinallatata Jesucristowa suma iuiarispa, nuka kikinpa wambra-sinami kapuangi. Taita Dios i Jesucristo nukanchita kispichig, kamta kuiaspa, suma iuiaiwa kawapuachu.

Kreta alpapi, Tito ima rurai iukaskamanda

⁵ Kasamandami kamta Kreta alpapi sakirkaiki: chipi kaugsanakuskata alli ruraikunata mas suma iuiachispa iachachingapa. Tukui puiblukunapi Cristowa tukuskapura iachachig taitakunata agllangapapasmi sakirkaiki; imasami nuka mingarkaiki: chasa.

⁶ Iachachig taitakunaka iukankunami kanga ñi imapipas mana piñai tukungasina. Sug warmillawa kaugsachukuna. Paipa wambra-kunaka, Cristowa suma iuiarigkuna kachukuna. Mana pipas paikunamanda nichukuna: “Mana alli runakunami kankuna; taitata mana uiagkunami kankuna”. ⁷ Maikanpas iachachig taita kaskataka, Taita Dios tukui Cristowa tukuskakunatami mingaska ka. Chimandami paita chaiá, ñi imapipas mana piñai tukungasina kangapa. Mana kachu paipa iuiailawa rurag, maituku sugkuna: “Mana rurakuchu” nigpipas. Mana kachu rabiari-g, machangichu, piliari-g, imasapipas kulki mirachingapa iuiaila kag. ⁸ Chasapaka iukanmi, wasima pipas chaigriskata: “Iaikui” nidur kanga, imapipas allilla ruraíta iuiaspalla ruranga, tukuikunawa allilla iuiaiwa i tukuiipi alli kanga, Taita Diosmandalla kaugsanga, ima jiru iuiarispa munai apigpipas, chita mana ruraspalla. ⁹ Diospa sutipa Rimaita iachachiskataka mana kungarispallami iuká kaugsanga; chiwanka, sugkunata suma iuiachispa, allillata iachachingapa; chasallata, maikanpas: “Diospa Rimai mana allilla kanchu” ninakuskata allillapi iuiachingapa.

¹⁰ Alli Willaita mana uiagkunaka, achkakunami tiankuna. Judiukunapa marka churachingapa iachachigkuna, maspami mana uangapa munankuna. Chasakunaka, ianga rimaspami sugkunata pandachinkuna. ¹¹ Chasakunata chaianmi upallachingapa. Paikuna mana allillata iachachinakunchu. Paikuna iachachispami wasipi tukui kaugsakunata pandachinakú. Chasaka, kikinkunamandallami kulki mirachinakú.

¹² Kretamanda sug willag runa, chi alpapi kaugsanakuskamanda kasami nirka: “Kai Kretapi kaugsagkuna, imaurapas llullaspa, jiru ruraspapa, killa wangu mikungapaglla iuiaspami kankuna”. ¹³ Chasa nispa, sutipa kaskatami willá. Chasamanda, paikunata sinchi piñaspa iuiachingi; chasaka paikuna, Cristowa mas suma iuiarigkuna kangapa. ¹⁴ Chiwanka, judiukuna kikinpa iuiaiwa rimanakuskata mana uianakuchu. Ñi sutipa Alli Willaita sakiska kagkunatapas ima niskata ruranakuskata mana uianakuchu.

¹⁵ Alli iuiaiwa kagkunaka, tukuiipi alli iuiaiwami kawankuna. Ikuti mana Cristowa iuiarispa jiru iuiaiwa kagkunaka, tukuiipi mana alli iuiailawami kawankuna. Paikunapa iuiaiipi ima iuiariskapipas, jiru iuiailami tukugsamú. ¹⁶ “Taita Diusta rigsinimi” nigpipas, mana paita rigsgisinami jiru ruraspapa kaugsankuna. Chasa kaugsagkunaka, millangasinami tukunkuna. Iapa subirbi kaspami mana pudinkuna, ñi imapas allilla rurangapa.

2

Allilla iachachiskallata rimangi, niskamanda

¹ Kamka, allilla iachachiskallata rimangi.

² Achala runakunata iachachingi, mana iapa urdimal kachukuna; tukuiwa allilla iuiai-wa kaugsanakuchu, ñi imapipas mana piñai tukungasina. Cristowa suma iuiarispa, tukui-kunata allilla kuiaspa, tukuikunawa mana piñanakuspalla kaugsanakuchu.

³ Achala warmikunata chasallata iachachingi, paikuna Taita Diospalla kagkunasina kaugsachukuna, mana pimandapas wasa rimaspalla, mana machaspalla. Chasa sumaglla kaugsaspami pudinkuna, ⁴ mas sipas warmikunata suma iuiachispa iachachinga, paipa kusata i wambra-kunata kuiangapa, ⁵ tukuikunawa allilla iuiaiwa kangapa, tukuiwa alli kangapa, wasipi ima tiaskata ima ministiska ruraspapa kangapa i kikinpa kusata suma

uiaspa kaugsangapa. Chasa kaugsaggipikunaka, ñi pipas mana pudingakunachu, Diuspa Rimaimanda ningapa: “Mana allilla kanchu”.

⁶ Musukunataka chasallata iuiachingi, tukuikunawa allilla iuiaiwa kangapakuna. ⁷ Kamka, tukuipi allilla rurangi. Chasaka sugkuna, kamta kawaspaka, chasallatami rurangakuna. Alli Willaita suma iachachingi, mana urdimal nisipalla. ⁸ Chasallata, imapipas allilla rimangi. Chasaka, mana pipas kammanda: “Mana allilla kanchu” ningakunachu. Chasa ruraggpika, maikan kamta piñagkunapas, mancharispa, mana pudingakunachu, ñi ima jirupas nukanchimanda rimangapa.

⁹ Lutrinkunata iachachingi, patrunta tukuipi sumaglla uiachukuna. Mana ainirispalla, patrún ima niskata sumaglla rurachukuna. ¹⁰ Sisai kagpikunaka, mana ikuti sisachukuna. Chasa sumaglla kaugsaggipikunaka, Taita Dius nukanchita kispichigmanda iachachiskata iapa suma kaskatami sugkunata kawachingakuna.

¹¹ Taita Dius, kikinpa wambrawa kachamuspa, paipa suma kuiaitami kawachirka; chasaka, tukui runakuna kispiringapa. ¹² Chi kuiaiwa iachachimukumi, mana allilla iuiaikunata i jiru ruraikunata nukanchi sakingapa; chiwanka, tukuikunawa allilla iuiaiwa kaspera, allilla ruraspas, Taita Diusmandalla iuiarispa, kai alpapi kaugsanakungapa. ¹³ Kasapasm iachachimuku: kuntintulla suiangapa, Taita Dius ima niska tukugsamunkama. Chika niraianmi, nukanchipa atun Dius i kispichig Jesucristo sumaglla ikuti samungapa puncha chaiankama. ¹⁴ Pai kikinmi sakirirka, nukanchimanda wafuchii tukungapa; chasaka, nukanchi tukui pandariskakunata kispichingapa. Chiwanka nukanchi, armaskasina limpiulla tukuspa, paipalla runakuna niraianangapa. Chasaka munanakusunchimi, tukuipi allilla ruraspas kaugsanakungapa.

¹⁵ Chasami iukangi, tukui iachaiwa sinchi rimanga i iuiachinga. Mana allilla ruranakuskataka iukangimi piñanga. Kamta, ñi pipas mana wabutichu.

3

Cristowa tukuskakuna, imasa kaugsai iukaskakunamanda

¹ Tukuikunata iuiachingi, maikan mandag ima niskata suma uiaspa, ruraspas kaugsanakuchu. Imaurapas iuiapi kachukuna, allilla rurangapa. ² Mana pimandapas wasa rimachukuna. Piharingataka, tukuikunawa mana piñanakuspalla i mana atuniachirinakuspalla iuiapi kachukuna.

³ Nukanchipas, ñugpata upasinami karkanchi. Taita Diusta mana uiaspallami chingaskasina karkanchi. Tukui jiru munaiwa, nukanchi alli iuiachiringapa iuiaiwa wataskasinami karkanchi. Parijuma piñanakuspa, jiru iuiaiwa kawanakuspa, tukui jiru ruraspami kaugsanakurkanchi. ⁴ Chasa kaugsanakugpipas, Taita Dius nukanchita kispichig, runakunamanda llakirispa, paipa suma kuiaitami kikinpa wambrawa kawachimuspa, ⁵ nukanchita kispichirka. Nukanchi allilla iuiarispa ruraskakunamandaka, mana; nukanchimanda llakispami pai kikin kispichirka. Nukanchipa pandariskakunata maillaskasinami ikuti tiagsamugsina niraianchi. Santu Ispirituwami chi musu kaugsaita nukanchi. ⁶ Jesucristo nukanchita kispichigmandami Santu Ispirituta nukanchita achka karamurka; ⁷ chasaka nukanchi, paipa suma kuiaiwa mana pandarig niraiaugsamungapa. Chiwanka suianakunchimi, mana puchukaridiru suma kaugsaita chaskingapa.

⁸ Chi willaika, tukui sutipami ka. Munaniami, kamps sugkunata sinchi rimaspas iuiachingapa. Chasaka Taita Diuswa suma iuiarigkuna, allilla ruraspami kaugsanakuna. Chi tukui suma iachachiikunaka, tukuikunamanda allipami kankuna.

⁹ Sugkuna ianga rimanakuskata mana uiakungi. Chasallata, ñugpamanda taitakuna imasa kagkunamanda parlukunata mana uiakungi. Moisés rurangapa niska ima niraiauskata paipura ainichirinakuskatapasa mana uiakungi. Chi parlukunaka, iangallami rimanakú; ñi pimandapas mana allilla tukunchu.

¹⁰ Maikanapas Cristowa tukuskakunata sugkunawa sugkunawa piñachirinakuskataka sug biaji sug biaji piñaspas, allillapa iuiachingi. Iskaima rimaskata mana uiagpika, kamkunapuragmanda llugsichingi. ¹¹ Kasa iuiaringi: chasakuna, kikinkunami pandarinakú. Chasa pandariskakunawaka kikinkunami maskarinakú, diltudupa ninama sitai tukungapa.

Tito ima rural iukaskamanda

¹² Waugki Artemasta u Tikikota nuka kambagma kachaura, mana unaila Nikópolis puiblumasa samungi kawawangapa. Chipimi nuka iuiakuni, tamia punchakuna ialichingapa. ¹³ Waugki Zenas, justisiakunata nukanchimanda rimagmi ka. Paita, waugki Apolostapas, kam masa pudiska aidapuangi. Chasaka, paikuna purinakuura, mana imapas pisingakunatachu. ¹⁴ Nukanchi kikinpura Cristowa tukuskakunapas iachaikuchukuna, suma ruraspas, ministiskakunata aidangapa. Chasa aidagkunaka, allillapami kaugsanakungapa.

Kaiakama, niskamanda

¹⁵Nukawa sugllapi kagkuna, tukuikunami kamta: "Puangi" ninkuna. Cristowa iuiaripa nukanchita kuiagkunata: "Puangi" nipuai. Taita Dios, tukui kamwa kagkunata sumaglla kawapuachu.

FILEMONTA SAN PABLO KARTA KACHASKAMANDA

¹ Nuka, Jesucristomanda willaskamandami kai karsilpi wichkaraiani. Waugki Timoteowa kaspera, kam kuiaska nukanchisinallata willag Filemontami kai karta kachaiki. ² Chasallata pani Apiata, nukanchisina alli suldadusina waugki Arkipota i kamba wasipi tandarispa Cristowa tukuskakunatami kaita kachaikichita. ³ Nukanchipa Taita Dios i Iaia Jesucristo, kamkunata kuiaspa, suma iuiaiwa kawapuachu.

Filemón, Cristowa suma iuiarispa, paita iapa kuiag kaskamanda

⁴⁻⁵ Kam Iaia Jesuswa suma iuiarispa, paita iapa kuiag kaskatami iachani. Chasallata, Taita Diosmandalla tukui kaugsagkunata kam allilla kuiaspa aidaskamandapasmi iachani. Chimanda nuka, imaurapas kammanda nukapa Taita Diusta mañaspa, Pai Siñurmi nini. ⁶ Kasami Taita Diusta mañapuiki: kam nukanchisina Taita Dioswa iuiarigmanda, Cristollatata nukanchita tukuipi allilla karamuskata kam iachagsamungapa. ⁷ Kam waugkita: Pai Siñurmi niiki, Taita Diosmandalla kaugsagkunata kuiaspa, allilla aidapuaskamanda. Chasa iachaspaka, nukapas, kuntintarispa, iapa alli iuiachiwami kani.

Onésimo suti Filemón randiska lutrinmanda mañaskamanda

⁸ Kasapasmi niiki: nuka, Cristo kikin agllawaska kagmanda, kamta ningapami pudiiki, imasa rurangapa chaiagta. ⁹ Chasa pudispapas, kuianakuspami kasa mañaiki. Nuka Pablo, ña rukumi kani. Jesucristomanda willaspa purikugmandami kunaora kai karsilpi wichkaraiani. ¹⁰ Nuka kaipi kankama, waugki Onesimoka, Jesucristowa suma iuiarigsamuspa, nukapa wambrasinami tukugsamurka. Paimandami kamta kasa mañakuiki.

¹¹ Onésimo, ñugpata kamba lutrin kaspera, kamta ñi imapa mana bali karkachu. Ikuti kunaoraka, kammanda i nukamandapas iapa suma ruragmi tukugsamurka. ¹² Paita kutichikuikimi. Imasami nukata suma chaskiwantrangi: chasallata paitapas suma chaskipuangi. ¹³ Paita munakurkanimi, nukawa kidarichu; chasaka, nuka Alli Willaimanda wichkaraiaskapi kankama, kamba kuintapi pai aidawangapa. ¹⁴ Chasa iuiakuspapas, kam manara “Ari” niwankama, mana munanichu chasa rurangapa. Chasaka, kam mana aidawankangichu nuka niskamanda. Kam kikin iuiarispa munagpimi chasa aidawankangi.

¹⁵ Onésimo, kamba ladumanda manachar iapa unaika anchurirka. Kunaoramandaka, imaurapasmi kamllawa kangapa ka. ¹⁶ Kunaoramanda, kamba lutrintasina mana charingi. Lutrinmandapas mas allillami kapungapa kangi. Kuiaska waugkimi kunaoramanda niraingapa ka. Pai, ñami nukapa kuiaska kapuá. Kam, masmi iukangi paita munanga; pai runa kagmandalla, mana; Iaia Jesuswa nukanchiwa pariju iuiarispa kagmanda.

¹⁷ Imasami nukata kamba alli waugkitasina iuiariwangi: chasallata nukata chaskiwag-sina paitapas chaskipuai. ¹⁸ Pai imapipas pandariska kagpi u ima apaska kutichingapa chaiagpika, nukami kutichisaki. ¹⁹ Nuka Pablo, nuka kikinpa makiwami iskribiiki, nispa: nukami kutichisaki. Chasa nisppapas, nuka nintraikichar, kamta nukapas dibichiska kagta, Alli Willaita iachachiskamanda. ²⁰ Ari, waugki, kam Iaia Jesuswa iuiarispa, nuka niskata allilla rurapuai. Chasa ruraspaka, Cristopa kaspera, nukata allillami kuntintachiwankangi.

²¹ Nuka niskata kam rurangapa kaskata iuiaspami kai kartata kachaiki. Kam, mana nuka mañaskallata rurangapa kangichu. Mas allilla rurangapa kaskatami iachani.

²² Kasapasmi mañaiki: wasi maskapuai, nuka chaiagriura, chisiagringapa. Kamkuna Taita Diusta mañapuanakuskamandami suiakuni, pai uiaspa, kamkunapagma kachawachu.

Kaiakama, niskamanda

²³ Jesucristomanda willaskamanda, nukawa wichkaraiaag waugki Epafrasmi kamta: “Puangi” niku. ²⁴ Nukawa Alli Willaita willag waugkikuna Marcos, Aristarko, Demas i Lucaspasmi, “Puangi” ninakú.

²⁵ Iaia Jesucristo, kamkunata sumaglla kawapuachu. [Chasa kachu.]

HEBREOKUNATA KARTA KACHASKAMANDA

Taita Dios, paipa wambrawa nukanchita willaskamanda

¹ Ñugpataka Taita Dios, nukanchipa ñugpamanda taitakunata ikuti ikuti, sug rigcha sug rigcha, Santu Ispirituwa rimagkunawami willadur karka. ² Kai tukurii punchakunaka, pai kikinpa wambrawami nukanchita rimagsamurka. Pai kikinpa wambrawami tukui alpakunata rurarka. Pai kikinpa wambratami tukui kararka. ³ Pai wambami ka Taita Diospa iapa suma luarpi paipa punchawa punchaiachig. Taita Diussina rigchallatatami kawari ka. Pai, tukui pudispa, pai kikinpa rimailawantami tukuita suma chari. Paillatatami, nukanchipa pandariikunata anchuchii ruraspa, suma luarpi iapa atun Taita Diospa alli ladu tiarigrirka.

Taita Diospa wambra, anjilkunamanda mas atun kaskamanda

⁴ Chasaka, anjilkunamanda mas atuniachiskami tukurka. Paipa sutipas, paikunapa suti-kunamanda mas atunmi ka. ⁵ Ñi maikan anjiltapas, Taita Dios mana kasa nirkachu: Kam, nukapa wambami kangi.

Nukami kuna puncha kaugsa karaiki.

Kasapasmi ñugpamanda librupi nirka:

Nukami paipa Taita kangapa kani.

Pai, nukapa wambami kangapa ka.

⁶ Paipa suglla wambata kai alpama kachamuspaka, kasami nirka:

Nukapa tukui anjilkuna,

paita kungurispa, nipuangichi:

“Iapa allimi kangi”.

⁷ Anjilkunamandaka kasami ni:

Paipa anjilkunatami kachá,

wairasina pai ima niskata ruragkuna kangapa.

Pai ima niskata sug nina sindi rilampasina mana unaila ruragmi kankuna.

⁸ Ikuti kikin Taita Diospa wambataka kasami ni:

Kam, Diosllatata kaspá,

diltudupami mandangapa kangí,

maituku waranga waranga watakuna ialigpipas.

Tukui imapipas allilla mandagmi kangí.

⁹ Allikunatami kuiarkangi.

Ikuti mana allikunataka

mana munarkangichu.

Chimandami kamba Taita Dios

kam Diosllatata kaskata agllarka.

Chiwanka, kamta karamurkami,

kamwa kagkunamandapas

mas alli iuiachiiwa kangapa.

¹⁰ Kasapasmi paita nirka:

Kam Taitikumi kallariskapi

kai alpata rurarkangi.

Kamllatatami sug luartapas rurarkangi.

¹¹ Chikunaka, tukuimi puchukaringapa kankuna.

Ikuti kamka, imaurapas kaugsallami kangapa kangí.

Tukui chi wiñaskakunaka,

katanga rukuiskasinami tungupapa kankuna.

¹² Katangata patarigsinami

rurangapa kangí sitangapa.

Maugka katangata sitaspa,

musu katanga churachigsinami rurangapa kangí.

Chasa ruraspapas, kam kikinllatatami kangapa kangí.

Ñi imaurapas mana wañungapa kangichu.

¹³ Ñi maikan anjiltapas, Taita Dios mana imaurapas kasa nirkachu:

Nukapa alli ladu tiarii,

nuka tukui kamta mana munagkunata apagrispa,

kamba chaki sarudiru ukuma churankama.

¹⁴ Tukui anjilkunaka, ispiritukunallami kankuna, Taita Dios ima munaskata ruragkuna. Paikuna kachamuskami kankuna, suma luarpi diltudupa kispiringapa gagkunata aidag kangapa.

2

Kispiringapa kaskamanda Alli Willaita mana kungarisunchi

¹ Chimandami nukanchita chaiaku, chi Alli Willaita uiaskata mas suma iuiaringapa; chasaka, sug ñambipisina rinakuskamanda mana chingagringapa. ² Taita Dios anjilkunawa Moiesta willaskataka, ñugpamandakuna iukarkakunami uiaspa, chi Willaita imasa niraiaskasina rurangakuna. Maikankunapas chi willaskata uiaspa, mana chasa ruragkunaka, imasa chaiaskasinami justisiai tukurkakuna. ³ Nigpika nukanchi kikinkuna, chi kispiringapa kaskamanda iapa suma Alli Willaita kungarigpika, ¿imasatak iuiasunchi, Taita Dios llakiriskamanda kispiringapa kagtakuna? Iaia Jesús kikinmi ñugpa willarka, nukanchi imasa ruraspa kispiringapa kagtakuna. Chiuramandaka, paita uiagkunami nukanchita chasa kaskata willagsamurkakuna. ⁴ Taita Diospas, ujnangasina mana pipas rurangasinakunawami kawachimurka, Jesús sutipa allilla willakugta. Chimanda, pai imasa munaskasina, Santu Ispirituwami nukanchita sug rigcha sug rigcha karamú. Chikunawapasmí kawachimú, Jesús sutipa allilla willag kagta.

Jesucristo, nukanchisina runa tukugsamuskamanda

⁵ Taita Dios mana anjilkunata churarkachu, nukanchi rimanakuska musu alpata mandagkuna kangapa. ⁶ Mana kagpika, sug ñugpamanda librupi, maikanchar Taita Diusta kasa nispa willamú:

¿Imapatak runakunamandalla iuiaringi?

¿Imapatak paikunamanda llakingi?

⁷ Manancha unaiillapimi

paikunata churarkangi,

anjilkunamandapas mas uchulla niraiangapakuna.

Chasa churaspapas,

paikunata iapa suma llaugtuchispami atuniachirkangi.

⁸ Tukuitami paikunapa chaki ukuma kagsina churarkangi,

paikunamandalla kangapa.

Taita Dios, chasa tukuiata churaspaka, mana sakirkachu, ñi imapas runakunamanda mana kangapa. Tukuimi sakirka, runakunamandalla kangapa. Chasa kagpipas, kunankama manara kawanchichu, tukui imasa niskasina tukugsamugta. ⁹ Jesustami iuiiaipi kawanchi. Paitami Taita Dios manancha unaiillapi churarka, runa tukuspa, anjilkunamandapas mas uchulla kangapa. Taita Dios kikinmi nukanchita iapa kuiaspa munarka, pai Jesús tukukunamanda wañuchu. Jesús, chasa wañuspaka, kunaura iapa suma llaugtuchispa atuniachiskami ka.

¹⁰ Tukui tiaska, Taita Dioswami ka. Tukui, paimandallami tia. Taita Diosllatami muná, achka wambrakunata paipa suma puncha luarma chaiachigringapa. Chimandami nukanchipa kispichig Jesús kikinta chaiarka, achka llakii nanaikuna iukaspa, wañungapa. Chasawami kawachirka, paipa Taita Dios imasa munakuskasina tukuipi allilla ruraspa runa kagta. ¹¹ Pai Jesús, nukanchita tukui pandariikunata anchuchig, i nukanchi kikin-kunapas, tukuikuna suglla Taitapami kanchi. Chimandami Jesús mana manchaspalla nukanchita ni: “Waugkikuna” i “Panikuna”. ¹² Chasallatami ñugpamanda librupi willaraía, kasa Taita Diusta nispa:

Kammanda nukapa waugki i panikunatami willangapa kani.

Kamta suma iuiarigkuna sugllapi kaskakunapa chaugpimandami

suma birsiukuna kantangapa kaiki.

¹³ Kasapasmí niraiá:

Taita Diosllatami suma iuiaripa suiangapa kani.

Ikuti kasapasmí niraiá:

Kaipimi kani,

Taita Dios karawaska wambrakunawa.

¹⁴ Imasami suglla taitapa i mamapa wambrakuna, tukuikuna chi iawarmandallatata kankuna: chasallatami Jesuspas, nukanchisina aichaiug runa tukugsamurka; chasaka, pai wañuskawa, wañuima apakugta binsingapa. Chi wañuima apakugka, iaia kukumi ka. ¹⁵ Wataraiagsina wañuita manchaspas kaugsanakugmanda, tukui paikuna kispirigsina kangapami Jesús wañurka. ¹⁶ Paika mana kai alpama samurkachu anjilkunamanda. Abrahampa wambra niraiaskakunamandami samurka. ¹⁷ Chimandami iukarka, runa tukuspa, tukuipi nukanchisinallatata iukanga, waugkindisina kangapa; chasaka

pai, tukui ima niskata allilla rurag kaspera, iaia sasirduti nukanchimanda llakig, Taita Diuspa ñugpa ladu tukugringapa; chasallata, pai wañuskawa tukuikunapa pandariikunata anchuchingapa. ¹⁸ Paika, iapa llakiimi iukarka, jiru rurangapa iuiaikuna chaiapura. Nigpika, chi iuiaikunata: “Mana” nisipami binsirka. Chimandami pudí, maikantapas jiru rurangapa iuiaikuna chaiskaka chi iuiaikunamanda michanga.

3

Jesús, Moisesmanda mas atun kaskamanda

¹ Chimanda, Taita Diuspalla kag taitakuna i mamakuna, paiwa suma luarpi kagringapa agllaskakuna, Jesusta suma iuiariichi. Paika, Taita Dius kachamuska iaia sasirdutimi tukugsamurka. Paiwami suma iuiarispa kanchi. ² Imasami Moisés, tukui Israelmanda runakuna Diuspa wasisina niraiaskakunamanda tukui imasa Taita Dius munaskata rurarka: chasallatami Jesús, iaia sasirduti kangapa churai tukuspa, Taita Dius tukui ima munaskata allilla rurarka. ³ Imasami chaiá, allilla wasichigta: “Kam ruraska wasimanda mas allimi kangi” ningapa: chasallatami Jesusta chaiá, Moisesmanda mas suma atunichingapa. ⁴ Maikan wasipas iukanmi, pipas wasichig tianga. Chasallatami nini: tukui ima kawariskaka, Taita Diusmi rurarka. ⁵ Moiseska, Taita Dius ima munaskata ruraglla kaspera, Diuspa wasisina tukui niraiaskakunamanda allillami rurarka; chasaka, Taita Dius ima nikuskata willagridur kangapa. ⁶ Ikuti Cristoka, Taita Diuspa wambra kaspera, Diuspa wasisina niraiaska, pai kikinpa wasipisinami allilla rurarka. Nukanchi tukuikunami Diuspa wasisina niraianchi. Paita alli iuiachiiwa suma iuiarispa suianakuskata mana sakisipami paipa wasisina niraianchi.

Taita Dius agllaskakuna, paiwa samagringapa kaskamanda

⁷ Chiwanka, kasami Santu Ispiritu ñugpamanda librupi willarka:

Kuna puncha,

Taita Dius ima rimaskata

kamkuna uiaspaka,

mana tukungichi mana uiagsina.

⁸ Moiseswa chusa sitaska alpapi purigkuna,

Taita Diusta piñarispami nirkakuna:

“¿Ar pudingichu?”;

paikunasina mana tukunakungichi.

⁹ Kamkunapa ñugpamanda achala taitakuna,

chusku chungu watakuna

nuka suma allilla ruraskata kawasppapas,

charami chipi niwarkakuna:

“¿Ar pudingichu?”.

¹⁰ Chimandami chi punchakuna kaugsanakuskawa rabiariwarka.

Paikunamandami nirkani:

“Imaurapas chingaskakunasina mana allilla iuiaspami purinakú.

Nuka munakuskasinaka

mana imaurapas munankunachu ruraspaka kaugsangapa”.

¹¹ Chimandami,

paikunawa rabiariwarka,

mana llullaspalla nirkani:

“Paikuna ñi sug mana iaikugringapa kankunachu nuka alpa karangapa niskama,

chipi samarigringapa”.

¹² Chimandami niukichita, taitakuna i mamakuna, ñujalallapas maikan, mana allilla iuiaspaka,

Taita Dius kaugsagwa mana suma iuiarispa, anchuriskasina kantrangichi! ¹³ Chasapaka,

chara kai luarpi kaugsankama, tukui punchakuna kam kikinpura allillapa iuiachinakuspa

kaugsanakuchi; chasawaka ñi pipas, mana pandachii tukuspa, subirbi mana uiag tukun-

gapa. ¹⁴ Imasami Cristowa suma iuiariskawa kallarikanchi: chasallatami iukanchi, paita

mana kungarispalla, wañunkama iuiarispa kangakuna; chasaka, Cristo chaskiskata

nukanchipas chaskigringapa.

¹⁵ Chimandami kasapas niraiá:

Kuna puncha,

Taita Dius ima rimaskata

kamkuna uiaspaka,

mana tukungichi mana uiagkuna.

Moiseswa purigkuna Taita Diusta piñarigkunasina

mana tukunakungichi.

¹⁶ ¿Pikunatak, Taita Dios rimaskata uiaspapas, paita piñarig karkakuna? ¿Manachu karkakuna Ejipto alpamanda tukui Moisés llugsichiskakuna? ¹⁷ Chasallata, ¿pikunawatak chusku chungu wata Taita Dios rabiariska karka? ¿Manachu jiru ruraska kagkunawa rabiariska karka? Chi chusa sitaska alpapi purinakugka, tukuimi wañurkakuna. ¹⁸ Chasallata, ¿pikunamandatak Taita Dios mana llullaspalla nirka: “Mana iaikugringapa kankunachu nuka alpa karangapa niskama, chipi samarigringapa”? ¿Manachu pai ima niskata mana uiagkunamanda chasa nirka? ¹⁹ Kasapasmi iachanchi: Taita Dioswa mana iuiarispa kagmandami paikuna mana pudirkakuna, chima iaikugringapa.

4

¹ Taita Dios charami nukanchita kaiaku, pai kaskama iaikugrispa samarigringapa. Chimanda, kamkunata kaiakuura, uangichi. ¡Amalai maikan, mana uiaspaka, mana chima iaikugrintrangichi! ² Nukanchipasmi Alli Willaita uiarkanchi; imasami ñugpamandakuna uiarkakuna: chasallata. Paikuna, chi Alli Willaita uiaspapas, mana munarkakunachu, suma iuiarispa kaugsangapakuna. Chimandami paikunamanda ñi imapi mana allilla tukurka. ³ Nukanchika, chi Alli Willaita uiaspa suma iuiarispa kaugsaspami pai kaskama iaikugrispa samarigringapa kanchi. Chasallatami Taita Dios, nukanchipa ñugpamanda achala taitakunamanda willarka, kasa nispa:

Chimandami,

paikunawa rabiarispa,
mana llullaspalla nirvani:

“Mana iaikugringapa kankunachu nuka alpa karangapa niskama,
chipi samarigringapa”.

Kasapas. Taita Dios, kai alpata wiñachispa, pai wiñachii puchukaspaka, ñami samarirka.

⁴ Chasallatami sug ñugpamanda librupi kanchisma punchamanda willaraiá, kasa nispa:

Taita Dios, ña tukui wiñachispa,
kanchis punchamami samarka.

⁵ Ikutipasmi kasa nirka:

Mana iaikugringapa kankunachu nuka alpa karangapa niskama,
chipi samarigringapa.

⁶ Chasa niraiagpipas, charami alli ka, Taita Dios kaskama sugkuna iaikugrispa samarigringapa. Chi ñugpamanda runakuna Alli Willaita uiaskakunaka, Taita Dios ima niskata mana allilla ruraskakunamandami mana pudirkakuna, chima iaikugrispa samarigringapa. ⁷ Chimandami Taita Dioska, suurapa sakirka. Chi suuraka, kuna punchami niraiá. Chasallatami, atun mandag David sakiska librupi, achka watakunapi willaraiá, ikuti kasa nispa:

Kuna puncha,

Taita Dios ima rimaskata
kamkuna uiaspaka,

mana tukungichi mana uiagkuna.

⁸ Josué suti Israelmanda runakunata mandag, Taita Dios alpa karangapa niskama pusaspa samachigrigpika, manimami Taita Dios sug samarigringapa punchamanda ni. ⁹ Chimandami chara alli ka, Taita Dios agllaska runakuna, pai kaskama iaikugrispa samarigringapa. ¹⁰ Imasami Taita Dios, pai ima rurakuskata puchukaspa samarirka: chasallatami maikanpas, Taita Dios kaskama iaikugrispa, paipas ima ruraikunata puchukaspa samarigringapa. ¹¹ Chimanda fuirsarisunchi, tukuipi alli ruraspaka kaugsangapa; chasaka, Taita Dios kaskama iaikugrispa samarigringapa. Imasami ñugpamanda runakuna, mana uiaspalla, Taita Dios ima niskata mana ruraspa karkakuna: ¡amalailapas kamkuna, chasallata kantrangichi!

¹² Diospa Rimaika, kaugsami ka. Chiwanka, tukui pudirimi ka. Iskandima aflaska machitisinamanda mas kuchugsinami ka. Chasaka, alma u ispirituta chaugpikamasinami iaikú. Runakuna maituku pakalla iuianakuskapipasmi chaiaagri. Tukui imasa nukanchipa iuiaillapi munanakuskatapasmi rigsí. ¹³ Taita Dios kikin wiñachiskakuna, ñi pipas mana paimanda pakakui pudingapa kanchichu. Paipa ñawi, tukuipimi allilla kawaku. Paitami nukanchi tukui ima ruraskata iukanchi willarigringapa.

Nukanchipa iaia sasirduti, Jesús kagmanda

¹⁴ Taita Diospa wambra Jesús, suma luarma iaikugrispa, nukanchipa iaia sasirdutimi tukugsamurka. Chimandami iukanchi, paiwa suma iuiarispa kanga, mana sakispalla.

¹⁵ Nukanchi sambaiaaska kaura, pai Jesuska, nukanchipa iaia sasirduti kaspaka, nukanchimanda iapa llakirispa, munanmi aidangapa. Paipasmi, kai alpapi nukanchisina kaugsaura, tukui pandariikunapi urmachingasina tukugsamuska karka. Chasa kagpipas,

ñi imapi pai mana pandarirkachu. ¹⁶ Chimanda, kuiaska Taita Diospa laduma mana manchaspalla imapas mañangapa tuparisunchi. Chasa mañagpika, paika, nukanchita suma uiaspa, llakirispami kawanga. Chasallata, nukanchi imaurapas ima ministinakuura, nukanchita suma kuiaspa aidangami.

5

¹ Kasapas. Judíu iaia sasirdutikuna, runakunapuramanda agllaskami kankuna; pai-kunaka, Taita Diospa ñawi ladu runakunamanda kawarigringapa; chipika, paikunapa pandariikunamanda kamarikukunata i animalkunata wañuchispa rupachispa kangapa-kuna. ² Iaia sasirdutikunatapas mana allilla iuiaikunami cháiá. Chimandami iukankuna, maikan mana iachaspalla jiru ruragkunamanda llakii iukangakuna. ³ Mana allilla iui-i-kuna iaia sasirdutikunatapas chaiagmanda, runakunapa pandariikunamanda ufrinda rupachispa, pai kikinkunapa pandariikunamandapasmi Taita Diusta ufrinda rupachii iukankuna.

⁴ Ñi pipas mana pudinchu, kikin atuniachirispa, iaia sasirduti tukunga. Taita Diosmi iaia sasirdutikunata agllá; imasami Moisespa waugki Aaronta agllarka: chasallata. ⁵ Cristo kikinpas, mana atuniachirispa iaia sasirduti tukurkachu. Taita Diosmi paita suma atunia-chingapa agllarka, kasa nispa:

Kam, nukapa wambрами kangi.

Nukami kuna puncha kaugsai karaiki.

⁶ Kasapasmi Taita Dios ñugpamanda librupi Cristomanda nirka:

Kam, imaurapasmi mana puchukaringapa

sasirduti kapuangi.

Melkisedekpa sasirdutipurami kangi.

⁷ Cristo, kai alpapi kaugsakuura, sinchi kaparispa i wakaspami Taita Diusta sumaglla mañakurka. Kikin Taita Dios, pudigmi karka, wañuita paita kispichingapa. Pai Cristo suma manchaiwa mañaspa kagmandami Taita Dios paita uiarka. ⁸ Cristo, Taita Diospa wambra kaspapas, iachaikurkami, tukui llakii iukaspa, tukui ima Taita Dios munaskata ruraspa puringapa. ⁹ Pai chasa tukui allilla ruraspaka, pai ima munaskata tukui ruraskakunata diltudupa kispichigmi tukugsamurka. ¹⁰ Chimandami Taita Dios paita churarka, Melkise-deksina iaia sasirduti kangapa.

¡Ujala Cristowa suma iuiariita kungarintrangichi!

¹¹ Chi Melkisedekmanda achka iachachingapa tiagpipas, kamkuna iapa allimanda iui-i- iukagmandami manara pudinchi, kamkunata chasa tukui allilla iachachingapa. ¹² Achka watakunami ña ialiska ka; iukarkangichimi, kamkunapas ña iachachispa kangakuna. Nigpika, kamkunata chaiakumi, Taita Diosmanda ñugpata iachachiskakunata sugkunaka ikuti ikuti iuiachispa iachachingapa. Llullu wawakuna lichilla upianakugsinami chara kangichi. Iukarkangichimi, ña atun wiñaska kagsina tukui mikui mikuspa kangakuna. ¹³ Lichilla upiagsina kagkunaka, chuchug wawakunasinami kankuna. Chasa kagkunaka manara iachaikunkunachu, Diospa Rimaipi imasa willaraiaskasina ima allilla u mana allilla kagta. ¹⁴ Ña atun wiñaskakunami pudinkuna, tukui mikui mikuspa kagsina kangakuna. Paikunaka ñami iachankuna, ima allilla u mana allilla kagta.

6

¹⁻² Chimanda, Cristomanda ñugpata iachaikuskakunata sakispaka, mas iachaikusunchi, nukanchi mas alli iui-i- tukunkama. Ñami kasa iachaikurkangichi: wañuima pusag jiru ruraikunata sakingapa, Taita Dioswa suma iuiaringapa, baugtisingapa, Cristowa tukuskakunata umapi maki imasa churangapa chaiagta, wañuskakuna kaugsaringapa kaskamanda i diltudupa justisiai tukungapa kaskamanda. Chi ñugpata iachaikuskakunata mana ikuti ikuti chasallata iachaikunakusunchi. ³ Taita Dios chasa munagpika, mas alli iui-i- tukusunchi.

⁴ Maikanpas, paipa iui-i- kunata punchaiachii tukuspa, Taita Dios karamuskata iachaspa, Santu Ispirituta chaskispa, ⁵ Taita Dios kachamuska Alli Willaita uiaspa iachaspa, samungapa punchakuna ima suma kangapa kaskatapas iachaspa, ⁶ tukui chikunata sakigtaka mana pudiringapa kanchu, ikuti Taita Diospagma tigrachingapa. Chasa sakigkunaka, Taita Diospa wambra ikuti kruspi kikin klabaspa, tukuikunapa ñawipi unzagsinami rurankuna. ⁷ Tamia iakuta alpa chupaskawa, trabajagkunapa tarpuska suma pukuskata pallangapa tukugpika, Taita Dios sumagllami kawá. ⁸ Ikuti mana suma ugsakuna ispi-nakunalla tukugpika, ñi imapa mana balinchi. Chitaka, Taita Dios mana sumagllami kawá. Chikunataka ninama sitangapagllami cháiá. Chasallatami chi runakuna Taita Diusta sakigkunata rurangapa ka.

Cristota suma iuiaiwa suianakuspa, sinchi iuiariskamanda

⁹ Chasa nukanchi rimaspapas, allillami iuianchi, kam kuiaskakuna, suma kaugsanakuspa, diltudupa kispiringapa rinakugta. ¹⁰ Taita Dios, tukuipi alli kaspa, kamkuna paimanda allilla ruranakuskata mana kungaringapa kanchu. Paita kuiaspaka, paipalla kaskakunatami aidarkangichi. Chasallata kuna rapasmi aidaspalla kangichi. ¹¹ Chimandami tukui kamkunamanda munanakunchi, chasa animullawa tukurii punchakama allilla ruraspalla kaugsanakungapa; chasaka kamkuna, imasa suianakuskasina allilla tukugsamungapa. ¹² ¡Ujalallapas killa wangu tukunakungichi! Chasapaka, imasami sugkuna, Cristowa suma iuiariskata mana sakispalla, Taita Dios ima karamungapa niskata chaskinakú: chasallata kamkunapas, suiaspalla kaugsanakungichi.

¹³ Taita Dioska, mana pipas paimanda mas atun tiagmanda, Abrahamta ima rurangapa niskata munaspa, pai kikitami chi niskata kawag churarka, ¹⁴ kasa nispa:

Ari, kamta iapa kuiaspami
kawangapa kaiki.

Chiwanka, kamba wambrapa wambrapa kati wambrakunata sakingapami kani,
iapa mirachukuna.

¹⁵ Abraham mana sambaiaspalla suma iuiaiwa suiakugmandami, Taita Dios chasa rurangapa niraiaskata rurarka.

¹⁶ Runakuna, “Mana llullanichu” ningapaka, paikunamanda mas atuntami kawag churankuna. Chasa kawag churapika, paikuna ima rurangapa niskaka iukankunami chasa tukunga. ¹⁷ Chasallata Taita Dioska, pai ima karamungapa niskata chaskingapa gagkunata sutipa karamungapa kaskata kawachingapami munarka. Nispami nirka:

Nuka kikinmi chi niskata kawag churaspa niiki:
karamungapami kaiki.

¹⁸ Taita Dios mana llulla kanchu. Pai ima karamungapa niskata mana pudinchu, ikuti “Mana” ningapa. Kai iskai niskamanda, pai karamungapa niskamanda i mana llullaspalla kagmandami nukanchi, Taita Diusta mañakuna, iapa sumaglla iuianakunchi, nukanchita kispichingapa kagta. Pai ima karamungapa niskata chaskingapa iuiaiwami suianakunchi.

¹⁹ Chasa iuiaspaka, imasami sug atun barku, saiachidiru llasta iruwa chariraiá: chasasinami nukanchipa suma iuiaita sinchi chariraianchi. Chi suma iuiaiwami pudiri, Taita Dios kaskapi atun linsu arkaraiaska ukuma iaikugringapa.* ²⁰ Chi ukumami Jesús iaikugrirka. Nukanchimandapasmi iaikungapa ñambi rurarka. Diltudupami iaia sasirduti chi ukupi tukurka. Melkisedekpa sasirdutipurami kidarka.

7

Melkisedekmanda

¹ Chi Melkisedekka, Salem puibluta atun mandag kaspa, tukuikunamanda mas atun Taita Diospa sasirdutimi karka. Abraham sug atun mandagkunawa wañuchinakuskapi mitikuchispa paipa wasima kutikuura, chi Melkisedekka, tupagrispa, kasami nirka: “Taita Dios, kamta iapa kuiaspa kawapuachu”. ² Chiura Abrahamka, wañuchinakuskapi tukui imapas tandachiskata, chungamandaka sugmi Melkisedekta kararka.

Melkisedek sutika niraianni: “Tukuipi allilla atun mandag”. Salem niraianni: “Sumaglla kaugsai”. Melkisedek, Salemta atun mandag kaspa, niraianni: “Sumaglla kaugsaita karag atun mandag”. ³ Melkisedekpa taita, mama i paipa ñugpamanda achala taitakunamandapas mana iacharinchu pikuna kagta. Pai tiagsamuskamanda i wañuskamandapas ñi ima mana iacharinchu. Chasa kaskamandaka, paika Taita Diospa wambrasina diltudupami sasirduti niraiá.

Jesús, Levipa wambrakunamanda mas iaia sasirduti kaskamanda

⁴ Iuiarichi chi Melkisedek, atun iaia sasirduti kagta. Paitami Abraham, nukanchipa ñugpamanda achala taita kaspa, wañuchinakuskapi imapas tandachiskata, chungamandaka sug kararka.

⁵ Kasapas. Levi suti Abrahampa wambrapa wambrapa kati wambrakuna, paikunapas sasirdutikunami kankuna. Paikunatami chaiá, Moisés imasa rurangapa willaraiaskasina, tukui runakunapa ima tiaskata, chungamandaka sug chaskingapa. Chi Levipa wambrakuna, Abrahampa wambrapa wambrapa wambrakuna kaspa, waugkindikuna niraiagpipas, paikunatapasmí chasa chaskingapa chaiá. ⁶ Ikuti Melkisedekka, Levipa wambrakunapa wambra mana kasapas, Abraham ima tandachiskata, chasallata chungamanda sugmi chaskirka. Taita Dios Abrahamta karamungapa niskatami Melkisedek kasa nirka: “Taita Dios, kamta iapa kuiaspa kawapuachu”.

* 6:19 San Mateo 27.51.

⁷ Mas atun niraiagmi mas uchullata kasa nispa kará: “Taita Dios, kamta iapa kuiaspa kawapuchu”. Chasa bindisagka, mas atunmi ka. Ñi pipas mana sug rigcha ningakunachu. ⁸ Kai alpapi chungamanda sug chaskig sasirdutikuna, wañugkunami kankuna. Ikuti Melkisedekmandaka, ñugpamanda librupi niraiami, kaugsalla kangapa kagta.

⁹ Kasapami pudinchi ninga: Levi, chungamanda sug chaskig, Abrahampa wambrapa wambrapa wambra kaspami kikin Melkisedekta chasallata karagsina rurarka. ¹⁰ Abrahamta Melkisedek tupagriuraka, Levi, paipa achala taita Abrahampa kuirpupi kagsinami karka.

¹¹ Levipa wambrakunapa wambrakunatami Israelmanda runakuna, Moisés ima rurangapa willaskata chaskirkakuna iachachingapa. Chi willaskata tukuipi allilla ruraspaga kaugsangapa pudigpikunaka, manachar chaiangapa karka, sug Melkisedekpa sasirdutipura kawarigsamungapa. Chi sasirdutika, Aarón suti Levipa wambrakunapa kati wambrapapura mana kanchu. ¹² Sug rigcha sasirduti trukarigsamugpika, chaianmi Moisés niraiaskapas trukarigsamungapa.

¹³ Nukanchipa Iaia Jesusmandami ñugpamanda librupi chasa sasirdutimanda willaraiaí. Paika, Levipa wambrakunapa wambra mana kanchu. Paipa ñugpamanda achala taitapura, ñi pipas sasirduti mana karkachu. ¹⁴ Allillami iachari, nukanchipa Iaia Jesuska, Judá suti runapa wambrakunapa wambra kagta. Moisés willakuura, mana nirka, chi runapa wambrakunapa wambrakuna, sasirduti kangapa kagtakuna.

¹⁵ Sug Melkisedeksina sasirduti kawarigsamuskawami allilla iachanchi, sug rigcha mandaraiaaskapas trukarigsamuska kagta. ¹⁶ Paika, imasa Moisés niskapi maikanpa wambrakunapa wambrakunamanda kaskapi mana sasirduti tukugsamurkachu. Mana imaurapas puchukariduru kaugsai iukaspami kikin sasirduti tukugsamurka. ¹⁷ Kasami, ñugpamanda librupi, Taita Dios paimanda nirka:

Kam, imaurapas mana puchukaringapa sasirdutimi kapuangi.

Melkisedekpa sasirdutipurami kangi.

¹⁸ Ñugpamanda Levipa wambrakuna sasirduti kangapa niraiaska anchuchiimi tururka, paikuna mana kispichigkuna pudingapa kagmanda. ¹⁹ Moisés mandaskawaka ñi imapi mana allilla tukugsamurkachu. Chi mandaita anchuchii tukuskawaka, tukuimanda mas allilla chaskingapa iuiawami ña suianakunchi. Chi suma iuiaita iukaspami Taita Diuspagma kaillaianchi.

²⁰ Taita Dios, juraspami Iaia Jesusta churarka, sasirduti kangapa. Ikuti Levipa wambrakunaka, sasirduti tukuspa, pai mana juraskami karkakuna. ²¹ Iaia Jesuska, Taita Dios juraskawami sasirduti tukugsamurka. Chasallatami ñugpamanda librupi willaraiaí, kasa nispa:

Atun Taita Dioska jurarkami.

Sug rigchaka mana iuiaringapa kanchu.

Kasami nirka:

“Kam, imaurapas mana puchukaringapa sasirdutimi kapuangi”.

²² Chimandami Jesús, Taita Dioswa runakunawa ikuti sumaglla tukungapa chaugpipi tukugsamurka; chasaka, ñugpamanda iuiarinakuskamanda mas allilla tukungapa.

²³ Levipa sasirdutikunata wañui tiagmandami achka sasirdutikuna tiagsamurka. ²⁴ Ikuti Jesuska, mana imaurapas wañugmi ka. Chiwami pailla diltudupa iaia sasirduti ka. ²⁵ Chiwanka, maikan paiwa Taita Diuspagma kaillaiagkunata, pai kikinmi diltudupa kispichingapa ka. Paika, imaurapas kaugsallami kangapa ka. Chasaka, chi kaillaiagkunamandami Taita Diusta mañaspalla kangapa ka.

²⁶ Chimandami Jesusta ministirkanchi, nukanchipa iaia sasirduti kangapa. Paimi tukuipi ñi ima mana pandarig ka. Ñi ima pandariikunapipas mana urmaspalla, tukuipimi alli ka. Paitami Taita Dios, pandarig runakunamanda anchuchispa, suma luar awapi tiarichigrirka.

²⁷ Kasapas. Jesús mana kanchu sug iaia sasirdutikunasina. Chi sug sasirdutikunata tukui punchakunami chaiá, ñugpa kikinkunapa pandariikunamanda ufrinda rupachingapa; nispaka, sugkunamandapas. Ikuti Jesuska, sug biajillami wañurka, ufrindasina kikin tukuspa. ²⁸ Moisés niraiaskapi, pandarig runakunami agllai tururkakuna, iaia sasirduti kangapa. Chi mandaraiaaskata sakiskauramandami Taita Dioska, juraspa, paipa wambrata agllarka, iaia sasirduti kangapa. Paipa wambrata wiñachirkami, ñi imaurapas mana pandarig kangapa.

8

Diuswa runakunawa mas allilla kangapa, Jesús chaugpipisina tukugsamuskamanda

¹ Nuka kamkunata willakuskamanda, kasami mas ministiri iachaikungapa: chi iaia sasirdutika, nukanchimandami ka. Paimi suma luarpi iapa atun Taita Diospa mandadiru alli ladu tiarigrirka. ² Chipika, sasirduti rurangapa chaiskata pai ruragmi ka. Taita Dios sutipa kaugsadiru wasi ukupimi chasa rurag ka. Chi wasika, runakuna saiaichiska mana kanchu. Atun Taita Dios kikinmi chi wasita saiaichiska ka.

³ Tukui iaia sasirdutikunaka agllaskami kankuna, kamarikukunata i animalkunata rupachispa, Taita Diusta kawachingapa. Chimandami Jesustapas chaiarka, Taita Diusta imapas karangapa. ⁴ Kai alpapi ñami tia Moisés niskapi willaraiaskasina Taita Diusta kamarikukuna kawachig sasirdutikuna. Chimanda Jesús, suma luarma sikangataka chara kai alpapi kagpika, manachar sasirduti ñi imapas pai kantra. ⁵ Taita Diosmanda iuiaridiru linsu wasita Moisés rurangapa kauraka, Taita Dioska paita kasami nirka:

Iuiarii. Imasami chi lumapi kawachirkaiki:

chasallatami tukui iukangi ruranga.

Chasawaka, sug luarpi suma ruraikuna tiaskamanda kawachigsinallami chi sasirdutikuna kai alpapi Taita Diosmanda iuiaridiru wasi ukupi ruranaku. ⁶ Ikuti nukanchipa iaia sasirdutika chaskirkami, Taita Diosmanda tukuipi mas allilla rurangapa. Taita Dioswa runakunawa ikuti sumaglla tukungapa, paimi chaugpipi tukugsamurka; chasaka, ñugpamanda iuiarinakuskamanda mas allilla tukungapa. Taita Dios mas allilla rurangapa niskamandami chasa tukugsamurka.

⁷ Ñugpa iuiarinakuskawaka Taita Dioswa runakunawa tukuipi allilla tukugpika, manachar tiangapa karka iskaima iuiarinakungapa. ⁸ Ñi imapi mana allilla runakuna kaskamandami ñugpamanda librupi kasa niraiá:

Atun Taita Diosmi kasa ni:

“Sug punchakunami chaiaumungapa ka,

Israelmanda i Judamanda runakunawa

sug musu iuiaiwa

nukawa iuiarinakungapa.

⁹ Paikunapa ñugpamanda achala taitakunata

nukapa makiwa Ejipto alpamanda llugsichiura,

paikunawa iuiarirkanchi;

chasaka mana kangapa kanchu.

Paikunaka, chi suma iuiaripa kaugsangapa niraiaskata

mana rurarkakunachu.

Chimandami paikunata sakirkani”.

¹⁰ Atun Taita Dios kasapasmi ni:

“Chi punchakuna ialiskauramanda,

kasami nukawa

Israelmanda runakunawa

iuiarinakungapa kanchi:

nuka ima rurangapa niskakunata

paikunapa iuiaipimi churangapa kani.

Paikunapa sungupimi

imasa rurangapa kaskata

iskribingapa kani.

Chasa ruraspaka,

paikunapa Taita Diosmi kangapa kani.

Paikunaka, nuka agllaska runakunami kapuangapa kankuna.

¹¹ Ñi pipas mana iukangapa kankunachu,

rigsidupura u waugkindipura

iachachinakuspa ningakuna:

‘Atun Taita Diusta rigsisunchi’.

Uchulla i atun kagkuna,

tukuikunami rigsiwangapa kankuna.

¹² Nukami paikunata mana allilla ruraskakunata pasinsiaspa kungaringapa kani.

Paikuna pandariskakunatapas mana ikuti iuiaringapa kanichu”.

¹³ Taita Dios ikuti runakunawa sug musu iuiarinakuimanda willauraka, ñugpata iuiarinakuskaka mana baligsamurkachu; ña rukumi tukurka.

9

Kai alpapi i suma luarpi Diusmanda iuiaridiru wasikunamanda

¹ Ñuggpamanda runakunawa iuiariskapika willaraiarkami, imasa Taita Diusta kungurin-gapa. Kai alpapi paimanda iuiaridiru wasi imasa rurangapa kagtapasmi willarka. ² Chi linsu wasipika, kasami karka. Iaikugridirulla ukuka niraiarkami: “Taita Diuspa uku”. Chi ukupika, bila saiachidirumi tiarka. Sug misapasmi tiarka, kamariku tanda churadiru. ³ Iskaima linsu arkaraiaska ukuka niraiarkami: “Taita Diuspalla tukuikunamanda mas alli uku”. ⁴ Chipika, insinsu rupachingapa kurita ruraska altar i Taita Diuswa runakunawa iuiarinakuska suti baulmi tiarka. Chi baulpi tukui laduta kuriwa maituskami karka. Chi baulpi tiarkami sug kuri manga; chipika, “maná” suti mikui wakachiska. Aaronpa tawina tugturiska i Taita Dius runakunawa iuiariska iskribiraiaska pamba rumikunapasmi chipi tiarka. ⁵ Chi baul awalla, iskai runakunasina alasiugkunami karkakuna. Chikunaka, Taita Dius suma punchalla kagta kawachigsinami karkakuna. Chikunaka, pandariikunamanda animalkunapa iawar tallichidirutami alaskunawa kilpagsina sumbraiachig karkakuna. Chikunamandaka, kunaura mana chaiawanchu, mas rimangapa.

⁶ Chikuna ña chasa allichiska kaura, sasirdutikunaka iaikugridirulla ukumami tukui punchakuna iaikunkuna, imasa chaiaskasina Taita Diusta kungurispa mañangapa. ⁷ Ikuti iskaima ukumaka, iaia sasirdutillami wata watapi sug biajilla iaikui iuká. Chima iaikun-gapaka, animalkunapa iawarta apaspami iaikú. Kikin mana iachaspalla pandariskakuna-manda i sug runakuna mana iachaspalla pandariskakunamandapasmi chi iawarta Taita Diusta karagsina kawachigrí.

⁸ Chasakunawaka, Santu Ispíritu kasami nukanchita iachachí: chi ñugpata wasi chara tiagpika, Taita Diuspalla tukuimanda mas alli ukuma manara alli ka iaikungapa. ⁹ Chi tukui tiaskakunaka niraianni, kuna punchakunamanda runakuna kawaspa, “Taita Diuspaggi chasachar ka” iuiaringapaglla. Taita Diusta chipi kawachiska kamarikukunawa i animalkuna rupachiskakunawa, paita kungurigkunata mana pudirinchu, chikunallawa pandariikunata anchuchii tukungapa. ¹⁰ Chi niskakunawaka, ima mikungapa, ima upiangapa, suma armaspa kuirputa maillargisinnallami willaraiá. Chikunaka, Taita Dius sug rigcha rurankamallami balirkakuna.

¹¹ Kunaura Cristoka, ñami kawarigsamurka. Pai, iaia sasirduti kaspami tukui allita apa-murka. Taita Dius kaugsadiru wasi, suma luar ukupimi pai iaia sasirduti ka; chi wasika, tukuikunamanda mas suma allillami ka. Chi mana kanchu runakuna ruraska wasi. Kai alpamanda mana kanchu. ¹² Taita Diuspalla kaska ukumami Cristo iaikugrirka. Mana chi ukuma iaikugrirkachu, kabritupa ñi wagra pa iawar apaspa. Pai kikinpa iawar kruspi ichachiskawami iaikugrirka. Sug biajillami chi ukuma iaikugrirka; chasaka, nukanchita tukui pandariskakunamanda diltudupa kispichingapa.

¹³ Kari wagra pa i kabritupa iawarta pandarig runakunapa awasinamami shabimachidur kankuna. Chasallata, warmi wagrata altarpi rupachispa, chi uchpata runakunapa awasinamami sitadur kankuna. Chasa ruraspaka niraianni tukui kuirpu armaska-sina tukugsamugtakuna; chasaka, Diuspa ñawipi allilla kawaringapa. ¹⁴ Chasa kagpika, Cristopa iawarwaka iapa mas achkami pudiri. Pai kikin, ñi imapipas mana mapasina kaspá, kuirpupi wañurka, Taita Diusta ufrindasina kikin tukuspa. Paipa ispirituka, ñi imaurapas mana wañunchu. Paipa iawarwaka nukanchipa mana suma iuiaikunatami sumaiachigsamú, nukanchi mana diltudupa wañungapa; chasaka, kaugsag Taita Dius ima munaskata allilla ruraspá kaugsangapa.

¹⁵ Cristo chasa ruraskawami Taita Diuswa runakunawa chaugpipi pai tukugsamurka; chasaka, ikuti musu iuiaiwa iuiarinakungapa. Ñuggpata Taita Diuswa runakuna imasa kaugsangapa iuiariskata pandarigmandami kispichingapa Cristo wañugsamurka; chasaka, imasa Taita Dius karangapa niskasina, pai agllaskakuna mana puchukaridiru suma kaugsaita chaskigringapa. ¹⁶ Kaugsakuspa, ima sakingapa willaraiaska iskritura tiagpika, chi firmag wañuuramandami chi iskritura bali. ¹⁷ Chi firmag chara kaugsakugpika, manara bali. Wañuuramandami chi iskritura bali. ¹⁸ Chimandami Taita Diuswa ñug-pamanda runakunawa iuiariskaka, wañuchiska animalkunapa iawarwa wañugsamurka. ¹⁹ Moisés, tukui imasa ruraspá kaugsangapa niraiaskakunata tukui runakunatami willarka. Nispaka, puka milma aisaspa, hisopo suti birbina sachasinatami watarka. Chiwanka, kari wagra pa i kabritupa iawar iakuwa chapuchispami kuiuchirka. Chiwami chi niskata willaraiaska libru awata tukui chipi kagkunapa awasinama shabimachirka,

²⁰ kasa nispa:

Kai iawarwami
tukui imasa Taita Dius kamkunawa iuiariskaka

allilla tukugsamurka.

21 Chasallata, Taita Diosmandalla linsu wasita i tukui Taita Dios ima niskata rurangapa chi ukupi tiaska awatapasmi iawarwa shabimachirka. 22 Moisés ima rurangapa willaskapi niraiianmi: ñalla tukuitami chaiá, iawarwa maillaskasina tukugsamungapa. Iawar mana ichachigpika, pandariikunatapas mana pasinsiai tukunchu.

Cristo wañuspa, pandariikunata anchuchiskamanda

23 Kai alpapi linsu wasi ukupi ima tiaskakuna niraiianmi suma luarpi kagsina. Chi ukupi tiaskakuna Taita Diospalla kagmandami chaiakurka, animalkunapa iawarwa maillagsina rurangapa. Ikuti suma luarpi tiaskakuna maillagsina rurangapaka, mas allilla ufrindapa iawarmi ministiri. 24 Taita Diosmandalla linsu wasi, runakuna kai alpapi ruraska, chi wasika, suma luarpi chasa tiagta kawachingapagllami ka. Chi wasi ukuma, Cristo mana iaikurkachu. Suma luarmami Cristo iaikugrirka; chipika, Taita Diospa ñawipi kagrispa, tukui nukanchimanda mañakungapa. 25 Judíu iaia sasirdutikuna, wata watapimi tukui-kunamanda mas alli ukuma iaikudur kankuna, animalkunapa iawarta apaspa. Ikuti Cristoka, ufrindasina kikin tukuspa, mana maituku biaji wañurkachu. 26 Chasa kagpika, kai alpa tiaskauramandata iukantrami, achka biaji wañunga. Kai tukurii punchakunaka, sug biajillami Cristo kawarigsamurka. Samuspaka, ufrindasina wañurka, runakunapa pandariikunata anchuchingapa.

27 Imasami tukui runakunata chaiá, sug biajilla wañungapa; nisipaka, Diospa ñawi ladu justisiai tukugringapa: 28 chasallatami Cristo sug biajilla ufrindasina wañugsamurka, achkakunapa pandariikunata anchuchingapa. Ikutimi parisma kawarigsamurka, tukui ka. Mana samungapa kanchu, pandariikunata anchuchingapa. Paita iuiarispa suianakugta diltudupa kispichingapami samungapa ka.

10

1 Moisés ima rurangapa willaraiaskaka, kipa samungapa kaska allikunata amsapisina kawachigsinallami karka. Chi samungapa niraiaskaka mana karkachu. Chimanda, chi niskapi willaraiaskasina Taita Diosmanta animalkunata rupachingapa tukui wata kailla-iaigkunaka, chi rupachiskakunawa mana imaurapas pudingapa kankunachu, tukuiipi alli tukungapakuna. 2 Chi ufrindakunawa tukuipi alli tukungapa pudirigpika, mana pandarig ña niraiagta iuiarigpikunaka, ¿manachu sakintrakuna, ufrindakunata rupachingapa? 3 Chasapaka, chi rupachiskakunawami pandarig kagtakuna tukui watakuna iuiarinkuna. 4 Kari wagrapa i kabritupa iawarllawa mana pudirinchi, pandariikunata anchuchingapa.

5 Chiwanka Cristo, kai alpama tiagsamuspaka, Taita Diusta kasami nirka:

Kamariku i rupachiska animalkunata
ña mana munangichu.

Nukata sug kuirpumi karawarkangi,
nuka aichaiug runa tukungapa.

6 Runakunapa pandariikunamanda ufrindakuna
i animalta rupachiskakuna,
kamba ñawipi ña mana suma kawarinchi.

7 Chimandami kasa niiki:

“Nukami samuni,

kam kikin Taita Dios ima munakuskata rurangapa”.

Chasallatami nukamanda

ñugpamanda librupi willaraiá.

8 Cristo, kasami ñugpa nirka: “Kamariku i rupachiska animalkunata ña mana munangichu. Chasallata ufrindakuna, kamba ñawipi ña mana suma kawarinchi”; chikunawaka, pandariikunata anchuchingapa. Moisés ima rurangapa willaraiagpipas, chasami nirka. 9 Nispaka, kasapasmi nirka: “Nukami samuni, kam kikin Taita Dios ima munakuskata rurangapa”. Chasa niskaka niraiianmi, ñugpamanda ufrindakunata Cristo anchuchispa, pai kikin ufrinda tukungapa. 10 Sug biajillami Jesucristo, kikinpa kuirputa ufrindasina churaspa wañurka, Taita Dios imasa munaskasina. Chasami wañurka, nukanchi, pandariikunata anchuchii tukuspa, Taita Diospalla kangapakuna.

11 Judíu sasirdutikunatami chaiá, kada puncha maituku animalkunata wañuchispa rupachingapa. Chasa kada puncha rupachinakugpipas, mana imaurapas pudiringapa kanchu, runakunapa pandariikunata anchuchingapa. 12 Ikuti Jesucristoka, runakunapa pandariikunamanda sug biajillami wañurka, ufrindasina kikin tukuspa. Chasa tukuipi allilla ruraspaka, Taita Diospa alli ladumi tiarigrirka. 13 Chipimi suiaku, “paita mana munagkunata apagrispa, paipa chaki sarudiru ukuma tukuikunata churankama”.

14 Sug biajillami Cristo ufrindasina wañurka; chasaka, Taita Diospalla kaskakuna imaurapas tukuipi alli kangapa. 15 Chasallatami Santu Ispiritu willá, kasa nukanchita nispa:

16 Atun Taita Dios kasami ni:

“Chi punchakuna ialiskauramanda,
kasami nukawa paikunawa iuiarinakungapa kanchi:
nuka ima rurangapa niskakunata
paikunapa iuiaipimi
churangapa kani.

Paikunapa sungupimi
imasa rurangapa kaskata
iskribingapa kani”.

17 Nispaka, kasapasmi ni:

Paikuna pandariska i mana allilla ruraskakunatapas
mana ikuti iuiaringapa kanichu.

18 Chasamanda, nukanchi pandariikunata ña pasinsiai tukuskamandaka, mana ikuti ministirinchu, sug ufrindakuna pandariikunamanda rupachingapa.

Taita Diuspagma kaillaiia iukaskamanda

19 Chimanda, taitakuna i mamakuna, Jesuspa iawarmandami pudinchi, Taita Diuspalla tukuikunamanda mas alli ukuma mana manchaspalla iaikungakuna. 20 Musu ñambisinami pai rurarka, nukanchi suma kaugsaita iukangapa. Atun linsu arkaraiaskata llikigsinami rurarka, pai kikinpa kuirpu wañuspa. 21 Nukanchi Diuspa wasi niraiaskakunamanda, pai iaia sasirdutitami iukanchi. 22 Chasamanda, pai Jesuswa tukuipi suma iuiarispa, Taita Diuspagma mana manchaspalla kailliasunchi. Paimi tukui nukanchipa mana alli iuiaikunata anchuchirka. Nukanchipa kuirputapas mana mapa iakuwami armachigisina rurarka. 23 Taita Dios ima rurangapa niskata pai ruranni, mana kungarisipalla. Chimandami iukanchi, paita mana sambaiaspalla suianakunga. 24 Iuiachinakusunchi, tukui nukanchipura kuianakuspa, allilla ruraspa kaugsangapa. 25 Nukanchi Cristota iuiaringapa sugllapi tandariura, sugkunaka mana nukanchiwa sugllapi kankuna; mana paikunasina rurasunchi. Chasapaka, Jesucristo samungapa puncha ñalla chaiamukuskata iachaspami iukanchi, sugllapi tandaripa, nukanchi kikinpura iuiachinakunga, suma kaugsangapa.

26 Sutipa Alli Willaita ña allilla iachaspas, nukanchi kikinpa munaiwa pandarigpika, ñi ima ufrinda, chi pandariikunata anchuchingapa mana tiangapa kanchu. 27 Chasa pandarigkunaka, manchaiwami suianakungapa kankuna, Taita Dios, rabiariipa, paikunata diltudupa ninama sitangapa kagmanda. Chi nina rupakuskamami Taita Diusta mana munagkunata sitangapa ka. 28 Maikanpas Moisés ima rurangapa willaskata mana uiaspalla jiru rurachu: iska u kimsakuna, chasa kawaspa, willagpikunaka, paita chaianmi, mana llakisipalla wañuchingapa. 29 Chimanda, maikanpas Taita Diuspa wambrata sarugsina ruraspa, paipa iawarta: “Ianga, mana balimi ka” nispa, kuiag Santu Ispirituta unZaspa kaugsanakugtaka, ¿manachu iuiangichi: chasa ruragkunata chaianga, Taita Dios askurinti rabiariipa, paikunata justisiangapa kagta? Chi iawarwami Taita Dios runakunawa musu iuiariskaka allilla tukugsamurka. Chi iawarllawantami chi runakunapas Taita Diuspalla tukugsamurkakuna. 30 Kasami iachanchi: atun Taita Diosmi nirka:

Nukatami chaiawaku,
jiru ruraikunata randichingapa.

Kasapasmi niraiá:

Atun Taita Diosmi

paipa runakuna ima ruraskakunata kawachingapa ka.

31 ¡Ai, Taita Dios mana wañugpa makipi urmagringapa, askurintimi manchawaku, paillata justisiai rurag kagmanda!

32 Kamkunaka iuiariichi chi ñugpa punchakuna Taita Dios kamkunapa iuiaikunata punchaiachiskata. Chi punchakunaka, iapa llakii iukaspas, maikankunawa makanakugsinami karkangichi, Cristowa iuiariskata mana sakingapa. 33 Maikankunaka, tukuikunapa ñawipi piyai kamiimi tukurkangichi. Ikuti sugkunaka, chasa llakii iukaskakunawa sugllapisinami tukurkangichi. Chasaka, kamkunapasmi llakii iukarkangichi. 34 Karsilpi wichkaraiaskakunamanda iapa llakii iukaspami kawagrirkangichi. Sugkunaka, ima iukaskakunata kichui tukuspapas, iapa alli iuiachiwa iangami sakinakurkangichi, kasa iuiarispa: sug luarpika, mana imaurapas tukuringapa mas suma iukaikunatami iukangapa kanchi.

35 Chimandami niikichita: chi suma iuiaita mana kungarisipalla kaichi. Chi iuiaita mana sakispalla kagpikunaka, iapa suma karaitami sug luarpi chaskigrirkangichi. 36 Kamkuna iukangichimi mana sambaiaspalla kangakuna, ima llakiikuna chagpipas. Chasaka, Taita Dios ima munaskata kamkuna ruraspa kagpika, pai ima karangapa niskatami chaskigrirkangichi. 37 Kasami ñugpamanda librupi Cristomanda niraiá:

Mana unaiillami chi samungapa kag chaiamungapa ka.

Mana unaiangapa kanchu.

³⁸Nukapa ñawipi alli kawarig runaka, nukawa suma iuiarispallami kaugsanga.

Ikuti llakiikunata kawasp mancharispa sakiwagpika,

paitaka mana munangapa kanichu.

³⁹Nukanchika, Taita Diusta chasa sakigpura mana kanchichu. Chi sakigkunaka, diltudupa ninamami sitai tukungapa kankuna. Ikuti nukanchika, Taita Dioswa suma iuiarispaga kagmandami kispiringapa kanchi.

11

Taita Dioswa suma iuiariimanda

¹Taita Dioswa suma iuiarii niraianmi, pai ima rurangapa niskata suianakuska sutipa tukugsamungapa kaskata iachai. Chasa suma iuiarispaga, iachanchimi, mana kawaspapas, sutipa kagta. ²Nukanchika ñugpamanda taitakunapas chasallata iuiarigmandami Taita Dios paikunata nirka: "Allimi kangichi".

³Taita Dioswa suma iuiarispallami iachanchi, tukui luarkuna paipa iachaillawa wiñachiska kagta. Chimanda, kunaura kawariskakuna, mana kawaridirukunawami rurarka.

⁴Abel suti runaka, Taita Dioswa suma iuiarispami, sug ubijakuna wañuchispa, Diospa ñawipi rupachirka. Ikuti paipa waugki Kaín kamariku karakuskaka, Diospa ñawipi mana sumami kawarirka. Chimandami Taita Dios, Abelta nirka: "Mana pandarigmi tungungi". Chasa kagmandami, paita suma kawaspaga, chaskigsina rurarka. Abel wañuska kaspapas, pai suma iuiariskawaka kawachinmi, nukanchi imasa kaugsangapa.

⁵Enok suti runaka, Taita Dioswa suma iuiarispalla kaugsakugmandami sug luarma apai tukurka, mana wañuspalla. Paita kai alpapi maskanakuspapas, mana tarirkakunachu. Taita Diosmi paita aparka. Ñugpamanda librupi kasami niraiá: pai manara apai tukugpita, Taita Diospa ñawipi alli kagtami paita kawarirka. ⁶Taita Diusta suma iuiariskallawami pudiri, paipa ñawipi sumaglla kawaringapa. Taita Diospaga kaillaiangapa, iukanchimi iuiailapi iuiaringa pai tiagta, i paillatata maikan paita maskanakugta alli karag kagta.

⁷Noé suti runaka, Taita Diosllawa suma iuiarispami sug atun barku rurarka. Ima tukungapa kagta Taita Dios willaura, manara chasa tukugta kawaspapas, Taita Dios ima niskata uiaspallami chi barkuta rurarka; chasaka, tukui paiwa kaugsanakuskata kispichingapa. Taita Dios ima niskata uiaspa, suma iuiarispami kai alpapi kaugsanakuskata kawachirka, paikuna puchukarii tukungapa kagtakuna. Chasa suma iuiarigmandami paipas mana pandarig niraiagsamurka.

⁸Abraham suti runaka, Taita Dios kaiaura, paiwa suma iuiarispami uiaspalla nirka, Taita Dios alpa karangapa kaskama chaiagringapa. Maima chaiagringapa kagta mana iachaspallami nirka. ⁹Taita Dioswa suma iuiarispami, chi alpa Taita Dios paita karangapa niraiaskapi ialigsinalla kaugsagirka. Karpa wasikunallapimi kaugsakurka. Chasallatami ñugpamanda taita Isaak i Jakobpas kaugsarkakuna. Paikunatapami Taita Dios chi alpaillatata karangapa niraiarka. ¹⁰Abraham suiakurkami, mana imaurapas waglichingasina puiblupi suma luarpi kaugsagringapa. Chi puibluta, Taita Diosmi ka alli iuiarispaga saiachig.

¹¹Sara suti Abrahampa warmipas, chasallata Taita Dioswa suma iuiarispami, ña awila kaspapas, Taita Diospa iapa iachaiwa karamuska wambra iukagsamurka. Saraka, ima Taita Dios niskata iuiarispallami karka, chasa sutipa rurangapa kagta. ¹²Abrahampas, diruku ña wañungasina kaurami chi wambra tiapugsamurka. Chasapami paipa wambra wambra kati wambrakuna, iapa achka tukugsamurkakuna. Imasami awapi iapa achka istrillakuna tia; imasami lamar iaku patapi kaskajukunata mana kuintangapa pudiri: chasallatami Abrahampa wambra wambra kati wambrakuna, achka tukugsamurkakuna.

¹³Tukui chi ñugpamanda taitakuna i mamakuna, Taita Dios karangapa niraiaskata mana chaskispallami wañurkakuna. Chi runakuna kaugsanakuurami, Taita Dioswa suma iuiarispaga, kipama imasa kangapa kaskata karumandalla kawanakugsina iuiaspa, alli iuiachiiwa karkakuna. Chasallatami kawachirirkakuna, kai alpapi ialigkunasinalla kagtakuna. ¹⁴Chasa kawachirigkuna niraiankunami, chara kikinkunapa chaiagridiru alpata maskaspa purinakugta. ¹⁵Paikuna maimanda llugsiska alpama kutingapa munanakugpika, chasami pudintrakuna. ¹⁶Chasa pudigpipas, iapa alli alpamami chaiagringapa suianakurka. Chika niraianmi sug luarmanda suma luar. Chimandami Taita Dios sakiri, paikunapa Taitiku niraiangapa. Paikunamandami sug suma puiblu allichiska suiaku.

¹⁷Abraham Taita Dioswa suma iuiariskamandami, Taita Dios mañaura, paipa wambra Isaakta apirka, ufrindasina wañuchispa rupachingapa; chasaka, uia kagta kawachiringapa. Paipa suglla wambatami wañuchispa karka, Taita Dios chasa mañagmenda. ¹⁸Chi

wambramandami Taita Dios niska karka: “Isaakmandami achka wambrakuna mirapug-samungapa kangsi”.¹⁹ Abrahampa iuiaipika iacharkami, Taita Dioska wañuskakunatapas kaugsachingapa pudigta. Chiwami paipa wambrata wañungapa niraiagta kaugsachigsina ikuti kaugsaila sakirka.

²⁰ Isaakka, Taita Dioswa suma iuiarispami nirka, paipa wambrakuna Jakobta i Esauta, Taita Dios iapa kuiaspa kawangapa kagta.

²¹ Jakobka, Taita Dioswa suma iuiarispami, ña wañukuspa nirka, Josepa iskai wambrakunata, Taita Dios iapa kuiaspa kawangapa kagta. Chasa nispaka, tawinawa saiarispa, Taita Diustami nirka: “Kam, iapa allimi kangsi”.

²² Josepas, Taita Dioswa suma iuiarispami, ña wañukuspa willarka, Israelmanda runakuna chi Ejipto alpamanda llugsingapa kagtakuna. Chasa iachaspami nirka: “Kamkuna, lluginakuura, nukapa tullukunata apapuaspa ringichi, kamkuna chaiagringapa kaskapi pambagringapa”.

²³ Moisespa taitakunaka, Taita Dioswa suma iuiarispami, Moisés tiagsamuskata kimsa killa pakaspa charinakurka. Paikuna, Moisés iapa suma wawa kagta kawaspami, chi alpata iaia mandag “Tukui kari wambrakunata wañuchingichi” nigpipas, mana manchas-palla pakaspa charinakurka.

²⁴ Moisespas, Taita Dioswa suma iuiarispami, ña wiñaura, mana munarka, chi iaia mandagpa warmi wambrapa wambra niraiangapa. ²⁵ Pandariikunawa mana unaila kusikuspa kaugsangataka, munarkami, Taita Dios agllaska runakunawa sugllapi llakii iukaskakunawa kaugsangapa. ²⁶ Ejiptopi iapa iukag kangapa munaringataka, masmi iuiarispaka karka: “Nukaka, sug kispichig samungapa kagta iuiarispami piñai kamiipas tukusa”. Taita Dios ima karangapa kaskata kawagsina, chasa iuiaiwami iuiarispalla karka.

²⁷ Taita Dioswa suma iuiarispami, Moisés, Ejiptota iaia mandag rabiariukuskata mana manchaspalla, chi alpamanda llugsispa rirka. Taita Dios mana kawarigta kawakugsina iuiarispallami rirka. ²⁸ Taita Dioswa suma iuiarispami Moisés nirka: “Wañuchiska ubijapa iawarwa punguta charikuska kaspikunata awingichi. Chasaka anjil wañuchig, Israelmanda runakunapa ñugpa kari wambrakunata mana wañuchingachu”. Ñugpata chasa ruraskaka, judiukunapa paskuami niraiá.

²⁹ Ejiptomanda llugsispa, Israelmanda runakuna, rinakuspa, Taita Dioswa suma iuiarispami, Puka Kucha suti atun iakuta, ñambisina paskaspa, chakichiska alpapi chimbarkakuna. Ikuti Ejiptomandakuna kalpachinakugka chasallata chimbanakuura, chi iaku wichkarirka. Chiwanka, tukuikunami puchukarirkakuna.

³⁰ Taita Dioswa suma iuiariiwami, Israelmanda runakuna Jerikó suti puibluta muiuchiraiaska atun pata kincha muiundi kanchis puncha muiuska kauraka, chi kincha pailla urmarka.

³¹ Rahab suti karisapa warmika, Taita Dioswa suma iuiarispami chi alpata pakalla kawangapa kachaska runakunata sumaglla chaskispa pakarka. Chimandami, Taita Diusta mana uiagkuna wañuchii tukuura, paika kispirirka.

³² ¿Ikuti sugkunamandachu willasakichita? Mana pagtariwanchu. Jedeonmanda, Barakmanda, Sansonmanda, Jeftemanda, Davidmanda, Samuelmanda i Santu Ispirituwa rimagkunamanda willangapa. ³³ Paikuna, Taita Dioswa suma iuiarispami, alpakanapi atun mandagkunawa wañuchinakuspa mitikuchispa, imasa chaiaskasina suma ruraspa mandarkakuna. Sugkunaka, Taita Dioswa suma iuiariskamandami pai ima karangapa niskata chaskirkakuna. Sugkunaka, Taita Dioswa suma iuiarispami liunkunapa simikunatapas wichkarkakuna. ³⁴ Chasallata sugkunaka, manchangasina ninakunatami wañuchirkakuna. Sugkunaka, atun machitiwa wañuchingapami kispirirkakuna. Sugkunaka, sambaiaska mana pudigsina kaspapas, pudigmi tukurkakuna. Iapa pudig tukuspa, sugnigmanda suldadukuna wañuchinakungapa samugkunatami mitikuchirkakuna. ³⁵ Chasallata sugwarmikunaka, wañuska wambra kaskata kaugsami chaskirkakuna.

Ikuti sugkunaka, paikunapa suma iuiariita sakispaka, wañuchingapa kispiriskami kantrakuna. Mana sakigmandaka, iapa nanaiwami wañuchii tukurkakuna. “Taita Dios nukanchita kaugsachiura, mas suma kaugsaitami iukangapa kanchi” iuiarispami chasa wañuchii tukurkakuna. ³⁶ Sugkunaka, kamii, unZai, asutiimi tukurkakuna. Sugkunaka, wataspa karsilpi wichkaimi tukurkakuna. ³⁷ Sugkunaka, rumiwa piai tukuspami wañurkakuna. Sugkunaka, siruchiiwa chaugpi chaugpi kuchui tukuspami wañurkakuna. Sugkunaka, atun machitiwami wañuchii tukurkakuna. Sugkunaka, Taita Dioswa suma iuiariita mana sakigmandami, llugsichii tukuspa, mana katanga iukaspa, iukarkakuna ubijapa i kabritupa karata churarispalla purinakunga. Iapa ministidukunami kaugsanakurka. Paikunata mana munarkakuna; nispami kamispa unZaspa kalpachirkakuna. ³⁸ Chi alli runakunataka mana chaiakurka, kai alpamandalla iuiaiwa kaugsanakuska chaugpipi kaugsangapa. Paikuna llugsichii tukuskamanda, mana wasi iukaspa, sachuku,

chusa sitaska alpakanapimi puringapa chaiarkakunata. Pata alpa ukumami iukarkakuna kaugsanakunga.

³⁹ Tukui paikuna Taita Dioswa suma iuiariskakunamandami paikunata nirka: “Allimi kangichi”. Chasa nigpipas, pai karangapa niraiaskata manara chaskispallami wañurkaku. ⁴⁰ Taita Dios, nukanchimanda iuiarispas, ñugpata karaskakunamanda mas sumami karangapa nirka; chasaka, paikunawa nukanchipas sugllapi tukuspa, tukuikuna allillapi tukugringapa.

12

Jesusllata kawakugsina iuiarispas kaugsasunchi

¹ Chasaka, achkakunami nukanchita kawachirirkakuna, imasa Taita Dioswa suma iuiarispas kaugsagtakuna. Chimanda, nukanchita ima llasakugsina tukui pandariikunapi urmachingapa kaskata sakisunchi. Chasaka, mana sambaiaspalla kalpakugsina rurashunchi, suma luarna chaiagringapa. ² Jesusllata kawakugsina iuiarispas kaugsasunchi. Paimi nukanchita suma iuiachigsamurka. Paillatamani iuiachii apaku, nukanchi tukuipi paiwa suma iuiaringapa. Pai kikin iacharkami, wañuskauramanda, iapa suma kuntintulla kangapa kagta. Chimandami sakirirka kruspi klabai tukungapa, pingaita mana manchaspalla. Chasamandami Taita Diospa mandadiru alli ladu tiarigrirka.

³ Iapa pandarigkuna paita kamispa, unzaspa kagpikunapas, pai Jesuska upallami karka. Pai chasa pasaskata iuiaringichi. Chasa iuiariskawa kamkuna pasanakuspapas, mana saikuskasina iuiaringichi. Mana sambaiaspalla kangichi. ⁴ Kamkuna, pandariikunawa makanakugsina kaspapas, manara iukangichichu Jesusmanda wañuchii tukungapa iuianakunga.

⁵ Kasapas. Taita Dios kamkunata iuiachiskaka, ñapash kungarinakungichi. Paipa wambrakunatasinami ñugpamanda librupi kasa kamkunata nirka:

Nukapa wambra,
atun Taita Dios kamba allillapa iuiachispa llakichigpika,
mana ningi: “Mana uiasachu”.

Pai piñagpika,
mana sambaiangi.

⁶ Atun Taita Dios kuiaskakunatami
iuiachispa llakichi.

Paipa tukui kuiaska wambra niraiaskakunatami
chasallata asutigsina rurá.

⁷ Chasa iuiarispaka, Taita Dios kamkunata llakichigpipas, upalla kangichi. Kamkuna paipa wambrakuna niraiaskamandami chasa llakichii tukungichi. Maikan taitapas, pai kikinpa wambratami asuti. ⁸ Chasallata Taita Dios, tukui paipa wambra niraiaskakunatami asutigsina rurá. Chimanda, kamkunata mana chasa llakichigpika, pai kikinpa wambra manachar kanrangichi.

⁹ Kasapas. Nukanchi uchulla wambrakuna kaura, nukanchipa kai alpamanda taitakuna nukanchita asutigmandaka, paikunata suma uiaspa kuiaspami kaugsarkanichi. Chimandaka, ¿manachu nukanchita cháiá, Taita Dios kaugsai karagta suma allilla uiangapa; chasaka, alli kaugsaita charingapa? ¹⁰ Nukanchipa kai alpamanda taitakuna, paikunaka imasa chaiaskasinami sug watakunalla nukanchita iuiachispa asutirirkakuna. Nukanchi allilla kangapami Taita Dios nukanchita suuraka asutigsina rurá; chiwanka nukanchi, paiwa tukuipi alli runakuna tukugsamungapa. ¹¹ Asutiuraka, pitapas mana alli iuiachinchu. Chasapaka, iapami naná. Chasa pasaspaka, iachaikugkunaka, allilla ruraspas, sumagllami kaugsanakunga.

¹² Chasamanda, kamkunapa saikuska makikunata, kamkunapa sambaiaska kungurkunata musuiachigsina ruraichi kamkunapa iuiapi. ¹³ Chasallata, alli ñambi kaskata katinakugsina kaugsaiichi; chasaka mana allilla ñambipi purinakuspa chaki kiwiskaka, chiuramanda ambirispa, alli ñambita mana wistuiachispalla katigsina suma iuiarispas kaugsanakungapa.

¡Ujalallapas Taita Dios rimaskata wabutingichi!

¹⁴ Tukuikunawa sumaglla kaugsanakungapa iuiaiwa kangichi. Chasallata, Taita Diosmandalla kaugsangapa iuiailata apanakungichi. Mana chasa kaugsaspaka, ñi pipas manima pudingapa kankunachu, Iaiá Jesusta kawangapa. ¹⁵ ¡Ujalallapas Taita Diospa suma kuiaita sakispa kungaringichi! ¡Amalai maikan, mana alli ugsakunapa angusina iukaspas, kamkunapa iuiaita wagllichigsamuntrakuna; chasawaka achkakuna, puchukarigsina tukugsamungapakuna! ¹⁶ ¡Ujala pipas, kari warmiwa pandarichukuna! ¡Ujala Esausina Taita Dios ima karangapa kaskata wabutichukuna! Chi runaka, ñugpa wambra

kaspapas, ima taitata chaskingapa kaskata suglla mikuiwami trukarka. ¹⁷ Kamkuna, Esaumanda kasami iachangichi: manancha unaipika, paipa taitata mañakurka: “Taita Dius, kamta iapa kuiaspa kawapuachu” ningapa; chiura, paimanda mana chasa chaiarka, mikuiwa katuska kagmanda. Maituku wakakugpipas, mana alli karka ima ruranga.

¹⁸ Kasapas. Kamkunata mana chaiarkachu, kai alpamanda lumapi chaiangringapa. Israelmanda runakunami chi Sinaí suti lumama chaiagrirkakuna. Chipika, nina sindimi rupakurka. Iapa lana tuta tukuska, sinchi wairawami tamiakurka. ¹⁹ Sinchi bututusinami uiarirka. Iapa sinchi rimaipasmi uiarirka. Chi rimaita uiaspaka, mañarkakunami, mana mas rimakuchu. ²⁰ Taita Dius ima nikuskata uiaspaka, wañungasina iuiachigmandami chasa mañarkakuna. Kasami Taita Dius nirka:

Runa u ima animalpas
kai lumama tuparigrigpika,
rumiwa piaspa [u flichaspa]
wañuchichukuna.

²¹ Chi lumapi iapa manchangasina kawarigmandami Moisespas nirka: “Nukapas, askurintimi manchaiwa chugchukuni”.

²² Ikuti kamkunaka, Taita Dius imaurapas kaugsagpa puiblumami chaiaska niraiangichi. Chimi suti ka suma luarpi Sión luma u Jerusalén puiblu. Chipimi iapa achka waranga waranga anjilkuna kankuna. Sugllapimi kusikunakú. ²³ Chillapitami ñugpamanda Taita Diuspa wambrakunapas sugllapi kankuna. Paikuna, suma luarpi kaugsangapa willaraiaska librupimi iskribiraiaska iukankuna. Taita Dius tukuikunata justisiai ruragpagmami chaiaska niraiangichi. Chipimi alli runakunapa almakuna kankuna. Chi runakuna, tukui pandariikuna allillapi tukuskami kankuna. ²⁴ Jesuspagmami chaiaska niraiangichi. Paimi, Taita Diuswa runakunawa chaugpipi tukugsamurka; chasaka, ikuti musu iuiaiwa iuiarigsamungapa. Kruspi klabaska wañuska iawarwami chasa rurarka. Paipa iawar, mana Abelpasina niraianchu, Taita Dius randichingapa. Nukanchita pasinsiangapami niraiá.

²⁵ Kamkuna, ñujalallapas Taita Dius rimaskata wabutingichi! Ñugpata kai alpapi Taita Dius iuiachispa rimaskata wabutigkuna, paipa rabiamanda mana kispirirkakunachu. Suma luarmanda iuiachispa rimamuskata nukanchi wabutisunchi; chika manima kispiringapa kanchichu. ²⁶ Taita Dius kikin ñugpata Moiesta rimaura, kai alpapasmi iapa chugchurirka. Kunauraka, pai nirkami:
Ikutimi nuka chugchuchingapa kani alpallata, manima.

Sug luartapasmi chugchuchingapa kani.

²⁷ Chasa niskaka niraianni, Taita Dius kikin ruraskata kuiuchispa anchuchingapa kagta. Ikuti mana kuiuchidiru kaskakunaka, chasallami tiangapa kankuna. ²⁸ Taita Dius suma mandakuskatami mana pipas kuiuchingapa pudí. Chipi nukanchi iaikugringapa kagmanda, Taita Diusta: “Pai Siñur” nisunchi. Paita suma manhaspa, tukui iuiaiwa, pai imasa munakuskasina, “Kam, iapa allimi kangí” nisunchi. ²⁹ Imasami nina, tukui rupachí: chasami nukanchipa Taita Dius ka.

13

Taita Diusta imasa kuntintachingapa rurai iukaskamanda

¹ Kam kikinpura kuianakuskata mana sakiriichi. ² Mana kungaringichi, kamkunapa wasima maikan chaiagrirkunata sumaglla chaskingapa. Maikankuna, wasipi sumaglla chaskispaka, anjilkunatami pi kagta mana iachaspalla ñugpata chaskirkakuna.

³ Karsilpi wichkaraiaskakunata kawagrangichi; imasami kamkunapas paikunawa sugllapi wichkaraiantangichi: chasa. Maikan piai tukuska nanaikunawa kaskata iuiaringichi, kam kikinunapa kuirpupi kagsina.

⁴ Tukui kasaraska kagkunaka, mana pandarispalla kam kikinpura sumaglla kuianakuspa kaugsaiichi. Maikanpas sugpa warmiwa kariwa siririskataka, Taita Diusmi justisiai rurangapa ka.

⁵ Kulcita iapa kuiaspa munarigkuna mana kangichi. Chasapaka, kamkuna ima iukaskallawa allilla kangichi, kasa iuiarispá: Taita Diuska nirkami:
Mana sakisakichu.

Ñi imaurapas mana kungarisakichu.

⁶ Chimandami nukanchi, mana manhaspalla ninchi:

Atun Taita Diusmi ka nukata aidawag.

Chimandami mana manchani

maikan runapas jiru rurawangapa iuiaspa kaskata.

⁷ Ñugpata Diospa Rimai kamkunata iachachig taitakunamanda iuiariichi. Paikuna imasami sumaglla kaugsarkakuna wañunkama: chasallata kamkunapas, Jesucristowa suma iuiarispa kaugsaichi.

⁸ Jesucristoka, ñugpamandata, kunaura, imaurapas paillatami ka.

⁹ Mana sakiringichi, ima sug rigcha sug rigcha iachachiskawa pandachii tukungapa. Chi iachachigkuna ninkunami: “Kaita mikungapa, allimi ka. Ikuti chita mikungapaka, michanmi”. Chasa ninakuskata uangataka, mas allillami ka, Taita Diospa suma kuiaiwa iuiarispa, kamkunapa iuiaita tukuipi allilla charingapa. Chasa ninakuskata uiagkunataka ñi imapipas mana allilla tukupurkachu.

¹⁰ Jesús ufrindasina wañuskamanda, kunaura sug musu altarmi iukanchi. Judíu sasir-dutikuna Diosmandalla wasipi paimanda ruragkuna, mana pudinkunachu chi musu altarmandata mikunga. ¹¹ Taita Diospalla tukuikunamanda mas alli ukumami iaia sasirduti, animalkunapa iawarta pandariskakunamanda apa. Ikuti chi animalkunapa kuirputaka, runakuna kaugsanakuskamanda llugsichispami rupachigrinkuna. ¹² Chasallata Jesuspas, puiblumanda llugsichii tukuspami wañuchii tururka; chasaka, pai kikinpa iawarwa runakuna Taita Diospalla tukugsamungapakuna. ¹³ Chimandami nukanchitapas chaiaku, Jesuswa tukungapa munaspa, ñugpata mandaskakunata sakingapa, maskipas paisina unZai tukungatapas.

¹⁴ Imaurapas mana puchukadiru puibluka kai alpapi mana iukanchichu. Mas nispa samungapa sug puiblutami suianakunchi. ¹⁵ Chimandami iukanchi, imaurapas Jesuswa Taita Diusta ninga: “Kam, iapa suma atunmi kangí”. Chasa niskawaka paimanda kamarikusinami niraiá. Taita Diusta iuiarispa, iapa suma atun kagta nisunchi. ¹⁶ Chasallata, mana kungaringichi, allilla ruraspa, mana iukaskakunata maillallapas karangapa. Chasa ruraskawapas kamarikusinami niraiá. Chasa ruraskami, Taita Diospa ñawipi sumaglla paita kawari.

¹⁷ Kamkunata iachachig taitakuna ima niskata sumaglla uiaspa rurangichi. Paikunatami chaiá, kamkunapa almata kawaspa, Diospa ñawipi ainigringapa. Paikunata sumaglla uiaichi; chasaka paikunapas, suma kuntintulla kangapakuna. Kamkuna mana uiag-manda, paikuna llakiiwa kamkunata iachachingapa chaigpika, kamkunata ñi imapipas mana allilla tukungapa kanchu.

¹⁸ Nukanchimanda Taita Diusta mañapuaichi. Iachanchimi nukanchipa iuiái allilla kagta. Tukuipi allilla ruraspa kaugsangapami munanchi. ¹⁹ Suma iuiarispami mañanakuikichita: Taita Diusta mañapuaichi, nukata utkalla kamkunapagma ikuti kachawachu.

Taita Diusta iapa suma atun kagta nispa, puchukariskamanda

²⁰ Taita Dios sumaglla kaugsaita karamugmi nukanchipa Iaia Jesús wañuskata kaugsachirka. Paipa iawarwami Taita Dioswa nukanchiwa iuiarinakungapa diltudupa allilla ruragsamurka. Paimi ka tukui runakuna paipa ubija niraiaskakunapa iaia kawag. ²¹ Taita Diosllata kamkunata iuiachichu, tukuipi alli kangapa; chasaka, pai imasa munaskasina allilla rurangapakuna. Chasallata, Jesucristowa tukui nukanchita pai kikin imasa munaskasina rurachu. Cristota imaurapas nisunchi: “Kam, iapa suma atunmi kangí”. Chasa kachu.

²² Kam taita i mamakunata mañaikichitami: nuka kamkunata iuiachiskamanda pasinsia iukawaichi. Mana achka rimaikunallowami kachanakuikichita.

²³ Kasa iachaichi: nukanchipa waugki Timoteo, wichkaraiaskamanda kachariisi tururka. Pai nukapagma utkalla chaiamugpika, iskandikunami kamkunata kawagrisunchi.

²⁴ Kamkunata tukui iachachig taitakunata: “Puangi” nipuangichi. Tukui Diospalla kagkunatapas: “Puangi” nipuangichi. Italia alpamanda kagkunami kamkunata: “Puangi” nínakú.

²⁵ Taita Dios, tukui kamkunata sumaglla kawapuachu.

SANTIAGO KARTA KACHASKAMANDA

¹ Nuka, Taita Diuspa i Iaia Jesucristopa lutrinsina kaspá, Santiagomi suti kani. Ñugpamanda taita Israelpa chungá iskaí wambrakunapa wambrakuna maipi kaugsanakuskata: Puangimi niikichita.

Llakii chaiaura, mana sambaiaspalla kangapa niskamanda

² Taitakuna i mamakuna, kamkunata achka llakiikuna chaiauraka, mana llakiwa kagsina suma alli iuiachiriiwa kangichi, ³ kasa iuiaripa: kamkuna Iaia Jesuswa iuiarinakugta sug rigcha iuiakuna chaiakugpika, chianmi, mana sambaiaspalla paillawa iuiarikungapa, ima kagpipas. ⁴ Iaia Jesuswa chasa iuiarispalla mana sambaiaspalla kagpika, iukangichimi tukui allilla iuiaiipi kanga, ñi ima mana kungarisipalla.

⁵ Maikanpas, allilla iachaita mana iachaspaka, Taita Diusta mañaichi. Chasaka chaskinkangichimi. Taita Diuska, tukuikunatami ima mañaska mana tupuspalla kará, mana piñarispalla. ⁶ Taita Diusta mañakuraka, paita suma iuiaripa mañaichi, mana kasa iuiarispalla: “¿Karawangachu u manachu karawanga?”. Mana allilla iuiaiwa mañagka, wairawa iaku kuchata kaima chima kuiuchispa apakugsinami rurá. ⁷ Maikan chasa mañagka mana iuiakuchu: “Atun Taita Dius, imapas karawangami”. ⁸ Chi runaka, sug rigcha sug rigcha iuiaspa, ima rurai kallarikatapas mana puchukadurmi tukú.

⁹ Maikanpas kumpuramanda mana iukag kaspaka, alli iuiachiiwa kachu. Paikunataka, Taita Dius kikin kawag sumami atuniachingapa ka. ¹⁰ Chasallata, maikan iapa iukag kaskataka, Taita Dius kikinmi paitaka uchullaiaichingapa ka. Chasa kagpipas, alli iuiachiillawa iuiakuchu. Iapa iukagka, ugsa tugtusinami mana unaila wañuringapa ka. ¹¹ Indi llugsispa rupariuraka, ugsakunata chakichinmi. Tugtukunatapas urmachinmi. Chiwanka, tukui suma kawari puchukarinmi. Chasallata iapa iukag runa, ima tiaska i iukaska sakispa, chi tugtusinami chingarí.

¹² Jiru rurangapa iuiakuna chaiauraka, mana chasa ruragkunaka Taita Diuspa iapa kuiaskami kankangichi. Chi mana jiru ruragkunaka, alli suma kaugsai primitami chaskigrinkangichi. Chi kaugsaitaka, Taita Dius nirkami, paita kuiagkunata karangapa.

¹³ Maikantapas jiru rurangapa iuiakuna chaiauraka, mana iuiarikuchu: “Taita Diusmi chi jiru iuiaita iuiachiwaku”. Ñi pipas mana Taita Diusta iuiachinkunachu, jiru rurangapa. Chasallata Taita Diuska, ñi pitapas mana iuiachinchu, jiru rurangapa. ¹⁴ Chi jiru rurangapa iuiakunataka, tukuikuna iukanchimi nukanchi kikinpa iuiailapi. Chasaka nukanchita iuiachispa, jiru ruraitami munachi. ¹⁵ Chimandami nukanchi jiru ruraikunata ruranchi. Chasa jiru ruraskakunamandaka, Diuspa ñawipi wañuimi tarinchi.

¹⁶ Nukapa iapa kuiaska taitakuna i mamakuna, mana pandaringichi. ¹⁷ Tukui suma iuiakuna i ima ministiskakunata, Taita Diusmi suma luarmanda karamú. Paimi ka tukui punchaiachigkunata rurag. Paika, imaurapas paillami ka; punchallami ka. ¹⁸ Pai kikin munaspalla, paipa rimaiwa nukanchita mana puchukariduru suma kaugsaitami karamurka. (Chi rimai, tukuiipi sutipami ka.) Chasaka, tukui pai ima wiñachiskakunamanda, nukanchi paimanda ñugpa kispichiska kangapa.

Sutipa rimaskakunata uiaspa, allilla rurangapa niskamanda

¹⁹ Nukapa iapa kuiaska taitakuna i mamakuna, kasa uiawaichi: tukui kamkuna, Diuspa Rimaita allilla uangichi. Allimanda iuiaripa rimangichi. Chasallata, rabia chaiaura, mana utkalla rabiaringichi. ²⁰ Rabiariaska runaka, Taita Dius munaskata mana ruranchu. ²¹ Chimanda, tukui millai ruraikunata i mana allilla kaugsaikunata sakiichi. Diuspa Rimai uiaskata upalla chaskiichi, mana atuniachirispalla. Chi Diuspa Rimaiwaka, kamkuna suma iuiarigkunatami kispichingapa ka.

²² Diuspa Rimaiipi imasa walaraiaskasina rurangichi. Mana ianga uiaspalla kangichi. Ianga uiaspalla kagkunaka, kikinkunami iuianakú: “Allillapimi kani”. Nigpika, mana chasa kanchu. ²³ Maikan Diuspa Rimaita uiaspapas, mana chasa ruragkunaka, paipa ñawi imasa kaskata ispijupi kawarigsinami kankuna. ²⁴ Chasa kawaspaka, kikinpa ñawi imasa kaskata mana unailami kungarinkuna. ²⁵ Ikuti maikanpas, Taita Dius ima niskata uiaspa, mana kungarisipalla umapi wakachispa ruragpika, chi runaka, Taita Diuspa iapa kuiaskami kanga, chasa ruragmanda. Taita Dius ima niskaka, tukuiipi allillami ka. Chasa niskata uiaspa ruragkunaka, wataraiaska kaskamanda kachariskasinami tukunkuna.

²⁶ Maikanpas paipa simita* mana upallachigpika, pai kikinlla, pandaripa, iangami iuiaku: “Nuka, Taita Diuswami kani”. ²⁷ Taita Diuspa ñawipi, maikan imapipas paiwa suma

* 1:26 griego rimaiwa: kalluwa.

iuiarigkuna, kasa ruraspami kaugsankuna: wagchukunata i llakiiwa kag sapalla kidaska warmikunata tukuipi aidaspa; chasallata, kai alpapi ima jiru ruraikunata mana imapas ruraspalla.

2

Suglla iuiari runapura tiachu

¹ Kam taitakuna i mamakuna, nukanchipa suma Iaia Jesucristowa iuiarigkuna kaspas, sugkunata sug rigcha sug rigcha iuiariwa mana kawangichi. ² Kasa iuiarisunchi. Kamkuna sugllapi tandariska kaskapi iaikugsamuchu sug runa, kuri surtijawa i suma musu katan-gawa. Chasallata sug mana iukag runapas iaikugsamuchu, ruku katanga churariska. ³ Chi-ura kamkunaka, chi suma churariska iaikugta suma rimaiwa ailastimaspa ninkangichimi: “Samui. Ñugpa ladu tiarigsamui”. Ikuti mana iukagtaka ninkangichimi: “Chillapi saiakui” u “Alpapi tiarii”. ⁴ Chasa ruraspami kam kikinpura sug rigcha sug rigcha iuiariwa kawana-kungichi. Mana sugllasina iuiarispami sugkunataka mas sumaglla kaianakungichi.

⁵ Nukapa kuiaska taitakuna i mamakuna, kasa iuiariichi. Kai alpapi mana iukag gagkunatami Taita Dios agllarka, paikuna, Jesucristota suma iuiariwa iapa iukagsina tukun-gapakuna; chiwanka paikunapas, Taita Dios suma mandakuskapi iaikugringapa. Chasa-mi Taita Dios nirka, paita kuiagkunata karangapa. ⁶ Ikuti kamkunaka, mana iukagkunata mana balitasinami kawangichi. *¿Manachu chi iapa iukagkunaka, kamkunata imapi-pas mana allilla charinkuna? ¿Manachu paikuna, kamkunata justisiakunapagma ali-uspa apachinkuna?* ⁷ *¿Manachu paikuna, Iaia Jesucristopa suma sutimandapas jiru rimankuna?* Ikuti kamkunaka, Iaia Jesumandallami sutichiska kangichi.

⁸ Taita Dios imasa kaugsangapa niskapi, kasami willaraiá: “Kam kikintasinami iukangi, tukui runakunatapas kuianga”. Kamkuna chasa ruragpi, allillami ruranakungichi. ⁹ Ikuti runapura sug rigcha sug rigcha iuiariwa kawagpika, atun pandariimi ruranakungichi. Chasa ruragpika, Moisés sakiska willaraiaskapi niraiami, kamkuna mana allilla ruraipi urmagtakuna.

¹⁰ Tukui imasa Moisés sakiska willaraiaskasina rurakuspapas, sugllapas chi willaraias-kata pandarigpika, tukui chi willaraiaskakunatami mana allilla ruragsina tukungapa ka. ¹¹ Kikin Taita Diosmi ni: “Mana sugpa warmiwa kariwa siriringi”. Kasapasmi nirka: “Mana wañuchingi”. Kamkunaka, mana sugpa warmiwa kariwa siririspapas, maikanta wañuchigpika, tukui chi willaraiaskakunata mana allilla ruragsinami tukugsamungichi. ¹² Suglla willaraiaskapika tianmi, kamkuna kispiringapa. Chi willaraiaskawami kamkuna justisiai tukungapa kangichi. Chasa iachaspaka, iukangichimi tukuipi allilla rimaspa i ruraspa kaugsanakunga. ¹³ Maikan sugkunamanda mana llakigpika, Taita Diospas mana llakispallami paikunata justisiangapa ka. Ikuti maikanpas sugkunamanda llakispa suma ruragkunaka, justisiai puncha paita chaiauraka, tukuipimi allilla llugsingapa ka.

Taita Dioswa iuiariillawa mana chaianchu; allilla ruraimi cháiá

¹⁴ Taitakuna i mamakuna, maikanpas iuiarichu: “Taita Dioswa suma iuiarigmi kani”: chasa iuiariillawa kaspaka, ñi ima allilla mana ruragpika, *¿imawatak kawanchu, suma iuiarig kagta?* Pai chasa iuiariillawa sug luarpi mana kispirigringapa kanchu. ¹⁵ Kasa iuiarisunchi: maikanpas kam kikinpura mana katanga iukachu, ñi mikui mana tiapuchu. ¹⁶ Chasa mana iukaskataka, maikan kempura nintra: “Apaijim. Alli katanga churaringi. Wiga jundagta mikungi. Kunaura riilla”; chasa nispaka, ñi ima mana karaspalla kachag-pika, *¿imatak allilla ruragta niraiá?* ¹⁷ Chasallata, maikanpas iuiarichu: “Taita Dioswa suma iuiarigmi kani”: chasa iuiariillawa kaspaka, ñi ima allilla mana ruragpika, chi iuiarii, wañuskasinami niraiá.

¹⁸ Maikan ningami: “Kam, Taita Dioswa sumasi iuiaringi. Ikuti nukaka, tukui allillami rurani. Kam, ñi ima allilla mana ruraspapas, kawachiwai paiwa suma iuiarikugta. Ikuti nukaka, allilla ruraskawami kawachisaki, nuka paiwa suma iuiarig kagta”.

¹⁹ Suglla Taita Dios tiagta kam iuiagpika, allillami ka. Kuku wairakunapasmi chasallata iuiankuna. Chasa iuiarispaka, dimanchaimi chugchurinkuna. ²⁰ Mana upasina kai. *¿Manachu kasa iuiaringi?* Kam ñi ima mana allilla ruraspalla kaugsakugpika, kam iuiantrangi: “Taita Diosllawami kani”; chi iuiarika, ñi imapa mana balinchu; wañuskasinami niraiá.

²¹ Nukanchipa ñugpamanda taita Abrahamka, *¿manachu paipa wambra Isaakta altarpí rupachingapa churaskamanda, Diospa ñawipi alli runa kagta kawarka?* ²² *¿Manachu iachangichi: Abrahamka, chasa ruraspa, pai Taita Dioswa suma iuiarig kagta kawachi-rirka?* Chasa ruraspami pai imapiapas suma iuiarig tukurka. ²³ Chiwanka, ñugpamanda librupi imasa willaraiaskasina tukugsamurka. Kasami niraiá: Abrahamka, Taita Dios imasa niskata iuiarispami karka: “Chasami tukunga”.

Chimandami pai mana pandarig niraiarka.

Paitaka, Taita Dios kikin nirka:

“Kuiaskami kapuangi”.

²⁴ Chimandami niikichita: maikan runa Taita Dioswa iuiarispallaka, paipa ñawipi mana allilla niraianchu. Paiwa suma iuiaripa, allilla ruraskakunawami mana pandarig tukug-samú.

²⁵ ¿Manachu chasallata sug karisapa warmi, Rahab suti rurarka? Chi warmika, iskaí Israelmanda runakuna chi puiblupi pakalla chapaspa purinakuskata paipa wasi ukuma pakakuchirkakunata. Nispaka, sug ñambita llugsichirkakunata. Chasa allilla ruraskawami chi warmi mana pandarig tukugsamurka.

²⁶ Imasami, alma llugsiura, kuirpu wañuska ka: chasallata maikanpas, Taita Dioswa iuia-riillawa kaspaka, ñi ima allilla mana ruragpika, chi iuiarii, wañuskasinami niraiá.

3

Simiwa rimaskamanda

¹ Nukapa kuiaska taitakuna, kumpurakuna mana munangichi, achkakuna Diospa Rimaita iachachigkuna tiangapa. Kasa iuiarisunchi: nukanchi iachachigkunaka, sug luarpika sugkunamandapas masmi tapuchii tukungapa kanchi. ² Tukuikunami achka imapipas pandarinchi. Maikan mana pandarispalla rimagka, chi runakar tukui imapipas allillami ka. Paika, paipa kuirputapasmi mana sakinga, ñi ima jirukunata rurangapa.

³ Kaballupa simita prinumi wataspa churanchi. Chiwanka nukanchi, maima munaskamami pusanchi. Chasa churaspami kaballupa kuirputa maima munaskama ñugpachinchi. ⁴ Kanuamandapas iuiariichi, maituku atun kaggipas. Maikanpas kanuata iakupi apakug, maituku sinchi wairakugpipas, uchulla walmullawami pai maima munaskama chi kanuata apachi. ⁵ Chasallata nukanchipa simi,* kuirpupi uchulla iukaspapas, nukanchipa rimaiwa pudirinmi, maituku atunpas tukugsamunga.

Chasallata iuiariichi: asllita nina, sindirispaka, atun ruku sachakunatapas pudinmi puchukanga. ⁶ Simipas, ninasina waglichigmi ka. Chi simiwaka pudirinmi, tukui kai alpapi kaugsanakuskata paipa jiru rimaiwa waglichinga. Chi simika, nukanchipa kuirpupimi tia. Chi simiwa rimaspaka, runakunapa iuiaitapasmi waglichigsamú. Chiwami simika infirnumanda ninawa sindichiskasina ka. Chi simillawantami sugkunatapas kaugsankama waglichingapa pudi. ⁷ Sachukupi kaugsagkunata i piskukunata, alpapi aliuripa purigkunata i iakupi kaugsagkunatapas, tukuikunatami runakuna mansuiachii pudinmi i mansuiachinkunallami. ⁸ Ikuti simitaka, ñi maikan runapas mana mansuiachii pudinchi. Chi simiwa rimaita mana pudirinchi, imawapas arhangapa. Simika, wañuchiduru wambii jundachiskasini ka. ⁹ Chi simiwami nukanchipa atun Taita Diusta iapa suma kagta ninchi. Chillawantami runakunatapas mana allilla rimanchi, Taita Dios kikin rigchasina ruraska kaggikunapas. ¹⁰ Chi simillawantami allillata i mana allillatapas rimanchi.

Nukapa kuiaska taitakuna i mamakuna, chasa rimaika mana allilla kanchu. ¹¹ Suglla iaku ñawillapika, miski iaku i winja iakuka mana llugsinchi. ¹² Chasallata, nukapa kuisakakuna, igus sachapi asiti surkuduru muiukunaka mana tiarinchi. Ñi ubas sachapi igus muiukunaka mana tiarinchi. Chasallata, suglla iaku ñawipika, kachi iaku i miski iakuka mana llugsinchi.

Taita Dios karaska iachaimanda

¹³ ¿Kamkunapura tianchu tukuipi iachag? Maikan chasa tiagpika, paipa alli suma kaugsaiwa uchullasina tukuspa, kawachichu pai sutipa iacha kagta. ¹⁴ Ikuti maikan sugkunata jiru iuiaiwa kawaspa, kikinpura “Nukaka, masmi kani” iuiarikugka, mana suma atuniahiriskasina iuiakuchu, maituku iacha kaspapas. Chasa jiru ruraskawaka kawachikumi, tukuipi llulla kagta. ¹⁵ Chi iachaitaka, Taita Dios mana karanchu. Kai alpamandalla runakunapa iuiaila i iaia kukupa iuiachiskallami ka.

¹⁶ Maikan sugkunata jiru iuiaiwa kawaspa, kikinpura “Nukaka, masmi kani” iuiaripa kaskakunapagpika, piñarispalla i tukui mana allilla ruraspallami kaugsankuna. ¹⁷ Ikuti Taita Dios karaska iachaitaka iukagkunaka, ñi imapi mana pandarisallami kaugsankuna. Chimanda, tukuikunawa sumaglla mana piñachirinakuspallami kaugsankuna. Paikunapa suma iuiaiwa tukuikunamandami alli iuiankuna. Ima niskatami uiankuna. Sugkunamanda llakispa, tukui imapipas allillami rurankuna. Ñi pitapas mana sug rigcha sug rigcha iuiaiwa kawasalla, ñi imapipas mana llullaspallami kaugsankuna. ¹⁸ Maikan sumaglla pasinsichispa, tukuikunawa sumaglla kaugsanakug, paikunakar, Diospa ñawipi alli runakunami niraiankuna.

* 3:5 griego rimaiwa: kalluwa.

4

Kai alpapi ima tiaskakunallawa mana iacharingapa niskamanda

¹ Kam kikinpura, ¿imamandataka makanakui i piñachirinakui tiagsamú? Kam kikinpura mana suma iuiái iukaspami chasa ruranakungichi. ² Ima munaskata mana tarispaka, kam kikinpurami wañuchirinakungichi. Sugpata iukangapa munarispaka, mana kichui pudispaka, chimandami makanakuspa i piñachirinakuspa kaugsanakungichi. Taita Diusta mana mañaspami kamkuna mana iukangichi. ³ Paita mañaspaka, kam kikinpunamandalla allilla kangapa iuiarispa mañanakugmandami mañanakuskaka mana chaskingichi.

⁴ Kamkuna, Diuspa ñawipi sug rigsi iukagsinami kangichi. ¿Manachu iachangichi: kai alpapi tiaskakunallawa iacharigka, Taita Diusta wasa churagsinami niraiá? Maikanpas kai alpapi tiaskakunallawa iacharigka, Taita Diuspa kuntrami ka. ⁵ Chimandachar ñugpamanda librupi kasa willaraiá:

Imasami kusa, warmindita muná, paillawa kangapa;
chasallatami Santu Ispíritu nukanchipi kaugsagka,
nukanchita muná, paiwa suglla kagsina kangapa.

⁶ Chiwanka Taita Duska, alli iuiaikunatami kará; chasaka, nukanchi sumaglla kaugsangapa. Chimandami ñugpamanda librupi kasapas willaraiá:
Iapa atuniachiriska iuiaiwa kagkunataka,

Taita Diosmi paikunata piñari.

Ikuti mana atuniaspalla iuiaiwa kagkunataka,
alli iuiaikunatami kará;

chasaka, paikuna sumaglla kaugsangapa.

⁷ Chimandaka, Taita Diuspa tukuichi, paimandalla kangapa. Iaia kukuta mana sakirispalla michariichi. Chasa ruragpika, chi iaia kukuka kamkunapagmanda mitikungami. ⁸ Taita Diuspagma mana manchaspalla kaillaiaichi. Chasa ruragpika, paipas kamkunapagma kaillaiangami.

Mana allilla ruragkuna kaspaka, chi mana allillata maillarigsina ruraichi. Kai alpawa i Taita Dioswa sugllapi iuiagkuna, tukui sungupi jiru iuiaita sakiichi, Taita Diuspalla kangapa. ⁹ Chimandami niikichita: irkiaichi; wakaichi; llakiriichi. Asinakungataka, niikichitami: wakaichi. Suma iuiaiwa kuntintulla kangataka, niikichitami: irkiaspa llakiriichi. ¹⁰ Atun Taita Diuspa ñawipi mana iapa atuniachirispalla iuiái iukaichi. Chasa ruragpika, Taita Diosmi kamkunata atuniachingapa.

¹¹ Taitakuna i mamakuna, kamkunapura ñi imapipas mana juchachinakuichi. Maikanpas sugkunamanda juchachispa, mana allilla rimakugpika, Taita Dios ima rurangapa willaskamanda mana allilla rimagmi niraiá. Chasa ruraspaka, Taita Dios imasa willaskasina rurag kangataka, kikin justisia kagsinami tukú. ¹² Suglla Taita Diosmi tia, runakuna imasa rurangapa nidur. Paillatatami justisia kangapa ka. Paimi pudí kispichingapa u puchukangapa. Nigpi kamka, ¿pitak kangí, justisia tukuspa, kamba waugkindikunamanda mana allilla rimakungapa?

Kaia ima pasaringapa kaskata mana iachaskamanda

¹³ Kunaura uiawaichi, kamkuna kasa nigkuna: “Kuna puncha u kaia, chi puiblumami risunchi. Randispa katuspa, sug watami chipi chiasasunchi, kulki mirachinkama”.

¹⁴ Kamkunaka mana iachangichichu, ñi kaia ima pasaringapa kagta. Nukanchipa kaugsai, puusinaimi ka; imasami puiuka, kawarispa, sug mana unaillapika ikuti mana kawari: chasa. ¹⁵ Mas allimi kantra, kamkuna kasa ningapa: “Atun Taita Dios munagpika, nukanchi, kaugsaspa, kasa u chasami rurasunchi”. ¹⁶ Chasa ningataka, kamkuna atun tukuspami rimanakungichi. Chasa atun tukuspa iuiagkunaka, mana allilla rurankunachu. ¹⁷ Maikanpas, allilla rurangapa iachaspapas, mana ruragpika, pandarigmi ka.

5

Iapa iukagkunata iuiachiskamanda

¹ Kamkuna iapa iukagkuna, kapisarpa wakaichi. Kamkunata iapa llakiimi chaiangapa ka. ² Kamkuna tukui iukaskaka, Diuspa ñawipi ismuskasinami kawari. Kamkunapa suma katangakunapas, pulilla mukuskasinami ka. ³ Kamkunapa kuri i kulkipas, lim wakariskasinami niraiá. Chi wakariskaka kawachikumi, kamkuna tukuiipi pandariska kagtakuna. Chi wakariskaka, kamkunapa aichata nina tukuspa rupachigmi tukungapa ka. Chi iukai-kuna wakachiriskakunaka, kai alpa tukurii punchakuna Taita Diospa rabia wakachirigsinami niraiá.

⁴ Kamkunapa piunkunata mana allilla pagaskamanda, chi kulkikunallatatami kamkunamanda mana allilla ruranakuskata willaku. Chi piunkuna llakiwiwa kaparinakuskata, tukui manduiug atun Taita Diosmi uiaku. ⁵ Kamkuna, kai alpapi suma mikuspa i upiaspa,

imasa munaskasina kaugsaspaka, wagra wiraiaskasinami tukungichi. Chasaka, ñami wira wagrata wañuchii puncha chaiakugsina kamkunata chaimuku. ⁶ Kamkuna, mana allilla justisiaspallami alli runakunata wañuchingichi. Paikunaka, mana micharirkakunachu.

Iaia Jesús samunkama, upalla mana sambiaspalla suianakuskamanda

⁷ Taitakuna i mamakuna, Iaia Jesús samunkama, upalla mana sambiaspalla suianakungichi. Chagra rurag runata iachaikuichi. Paika, tarpuskata manara pallankama, iukanmi mana sambiaspalla suianga, ñugpa tamia i kati tamia ialinkama. ⁸ Chasallata kamkunapas, Taita Dioswa iuiariilla kaspasuiangichi, mana sambiaspalla. Iaia Jesuska, ñami chaiaagsamungapa ka.

⁹ Taitakuna i mamakuna, kam kikinpura mana piñachirinakuspalla kaugsaichi. Chasaka, mana justisiai tukunkangichichu. Taita Dios justisiag, ñami punguma chaiaimukugsina ka.

¹⁰ Taitakuna i mamakuna, Santu Ispirituwa ñugpata rimagkunata iachaikuichi. Paikuna, atun Taita Diospa Rimaita willaspami karkakuna. Llakii iukaspapas, mana sambiaspallami kaugsarkakuna. Kamkunapas chasallata kaugsaichi. ¹¹ Maikanpas, llakiiwa kaspapas, mana sambiaspalla kaugsagkunamandaka ninchimi: “Taita Diospa iapa kuiaskami ka”. Job suti runa, iapa llakiiwa kaspapas, mana sambiaspalla kagmanda ñami iachangichi. Paita, katima, atun Taita Dios tukuimi kutichirka. Atun Taita Dioska, nukanchita iapa kuiaspa, llakiiwami kawaku.

¹² Taitakuna i mamakuna, imasa kaskata mana kawag churangichi sug luarta, ñi kai alpata ñi ima sutikunatapap. “Ari” ningapa chaiagpika, “Ari” ningichilla. “Mana” ningapa chaiagpika, ningichilla: “Mana”. Chasa nispa, mana justisiai tukunkangichichu.

Taita Diusta mañaimanda

¹³ Maikanpas llakii iukaspaka, Taita Diusta mañangichi. Maikan kuntintulla kaspaka, Taita Diusta birsiuwa kantangichi, “Kam, iapa allimi kangi” nispa. ¹⁴ Maikan ungug kaspaka, Jesuswa tukuskapura iacha taitakunata kaiangichi; Taita Diusta mañapuspa, Iaia Jesusmanda iuiarispas, asitiwa paita kakuchukuna. ¹⁵ Iaia Jesuswa suma iuiarispas mañapugpikunaka, paimi, chi ungugta aliachispa, atarichingapa ka. Chi ungug ima pandariskakunatapasmipasinsiai tukungapa ka. ¹⁶ Chimandami niikichita: kam kikinpura ima pandariskakunata willarinakungichi. Kam kikinpuramanda mañapunakungichi, Taita Dios kamkunata aliachichu.

Allilla rurag runa, tukui suma iuiaiwa mañaskawaka tukuipi iapami pudirí. ¹⁷ Elías suti Santu Ispirituwa ñugpamanda rimag, paimi, nukanchisinallatata kaspas, Taita Diusta: “Mana tamiachu” suma iuiaiwa mañarka. Chiuraka, sutipami kimsa wata sugta killa kai alpapi mana tamia urmaka. ¹⁸ Ikuti tamiangapa mañauraka, chasallatami tamiagsamurka. Chiura, alpapika ikuti tukui mikuimi tiarigsamurka.

¹⁹ Nukapa taitakuna i mamakuna, kasa iuiariichi: kamkunapuramanda maikanpas mana allillapi urmagpika, chi runataka sug runawa iuiachingichi, Taita Dioswa ikuti tigrangapa. ²⁰ Kasa iachaichi: chi pandarikuskata kispichig, chi runapa almatami kispichingapa ka, mana diltudupa wañungapa. Chasallata, chi tukui pandariikunatapasmipasinsiaichingapa ka.

SAN PEDRO MUSUGLLA KARTA KACHASKAMANDA

¹ Jesucristo kachamuskami nuka kani, Alli Willaita willaspa puringapa. Kamkuna kikin-pa alpamanda rispa, kasama chasama purispa, Ponto, Galasia, Kapadosia, Asia i Bitinia suti alpapunapi kaugsanakuskatami kai karta kachaikichita. ² Kamkunataka, Taita Dius ñugpamandata pai imasa munakuskasinami agllarka. Paipa Ispirituwa paipallami tukug-samurkangichi; chasaka, paita suma uiaspa, Jesucristopa iawarwa maillaska niraiangapa. Taita Dius, kamkunata kuiaspa, askurinti suma iuiaiwa kawapuachu.

Suma luarpi kaugsagringapa iuiailawa kaugsasunchi

³ Nukanchipa Iaia Jesucristopa Taita Diusta nisunchi: “Kam, iapa suma atunmi kangi”. Paika, Jesucristo wañuskata kaugsachiskawa, nukanchimanda iapa suma llakirispa, musu kaugsaitami karamarka. Chiwanka, suianakunchimi, suma luarpi kaugsagringapa. ⁴ Chikipa, Taita Dius kamkunata karangapa kaskatami wakachiraiá. Chi wakachiraiaskaka mana tukuringapa kanchu sug tugtu chakirigsina u ima ismugsina.

⁵ Kamkuna Cristowa suma iuiarigkunamanda, Taita Diuspa iapa iachaiwami kamkunata chariku. Chasaka, tukurii punchakuna chaiaura, pai imasa niskasinami kamkunata diltudupa kispichingapa ka. ⁶ Chimandami iukangichi kuntintulla kangakuna, kamkunata achka llakiikuna pasangapa chaiagpipas. Chika, mana uanillami ialinga. ⁷ Imasami kuri, ninapi rupachiskawa alli kagta iachankuna: chasallatami kamkuna, iapa llakiikuna chaiskawá Cristowa suma iuiarigkuna kagta kawachirinkangichi. Kuri puchukarinmi. Ikuti Cristowa suma iuiarigkunaka, llakii chaiagpipas, kurimandapas mas balimi niraiangichi. Jesucristo kawarigsamuuraka, paiwa suma iuiarigkunata suma atuniachispa, ningapami ka: “Kamkuna, sumami nukawa iuiarirkangichi”.

⁸ Kamkuna, Jesucristota mana kawaspapas, paita kuiangichimi. Manara kawaspapas, paiwa suma iuiarispami kaugsanakungichi. Chasa iuiarispami ñi imawa mana rimai pudiringasina iapa suma alli iuiachiwa kangichi, kasa iachaspa: ⁹ paiwa suma iuiarispami kamkunapa almata kispichiska niraiangichi.

¹⁰ Santu Ispirituwa ñugpamanda rimagkunaka, Taita Dius kamkunata suma kuiaspa kispichingapa kagta willaspapas, tapunakuspa tapunakuspami munarkakuna, chi kispichiita ima niraiaskata iachangapa. ¹¹ Cristopa Ispiritumi paikunata ñugpamandata iuiachirka, Cristo kikin iapa llakii nanai pasangapa kagta; nisbaka, sug luarpi atun sumaiachigrii tukungapa kagta. Chasa iuiachiuraka, paikuna tapunakurkami Cristo pi kangapa kagta i imaura chasa pasaringapa kagta. ¹² Chasa tapunakugtaka, Cristopa Ispiritumi iuiachirka, paikuna kaugsanakuskamandaka mana willanagugta. Kamkuna kunaura kaugsanakuskamandami Jesucristomanda chasa willanakurka. Kunauraka, chi ñugpamanda willaskakunallatami suma luarmanda kachamuska Santu Ispirituwa willagkuna, kamkunata ña willanakú. Chi willaitaka, anjilkunapasmi munantrakuna iachangapa.

Tukuipi alli kangapa, Taita Dius nukanchita agllaskamanda

¹³ Chasamanda, allichirispa, tukuipi alli iuiaiwa kaugsapuanakuichi. Suianakuichi, Jesucristo kawarigsamunkama. Chiurami Taita Dius, suma kuiaspa, kamkunata ima karangapa kaskata chaskinkangichi. ¹⁴ Suma uiaq wambrakunasina, Taita Dius ima niskata uiaspa ruraichi. Paita manara rigsispa, jiru iuiai munaikunawami karkangichi; chasa ruraspa mana kaugsanakuichi. ¹⁵ Chasapaka, imasami Taita Dius kamkunata agllag, mana pandarig tukuipi alli ka: kamkunapas chasallata tukuipi allillapi kaugsapuaichi, mana pandarispalla. ¹⁶ Chasallatami Taita Dius ñugpamanda librupi willarka, kasa nispa: Nuka, mana pandarig tukuipi allimi kani. Chimandami kamkunapas iukangichi tukuipi alli kanga, mana pandarispalla.

¹⁷ Kamkuna, Taita Diusta ningichimi: “Taitami kapuangi”. Paimi, tukuikunata imasa allilla u mana allilla ruraskata kawaspa, imasa chaiskasina justisiai rurá. Chimanda kamkuna, kai alpapi ialigkunasinalla iuiarispas kaugsankama, paita suma kuiaspa manchaiwa kapuaichi. ¹⁸ Kamkunapa ñugpamanda taitakuna, mana Taita Diuswa iuiarispallami kaugsarkakuna. Paikunasina mana kaugsangapami kamkunata Taita Dius kispichigsamurka. Tukuridiru kulkiwa u kuriwa mana kispichigsamurkachu. Chita allillami iachangichi. ¹⁹ Cristo wañuchii tukuspa, paipa iapa suma iawarwami kamkunata kispichigsamurka. Imasami iura ubija ñi imapipas mana mapasina kawariskata runakunamanda wañuchii

tukú: chasallatami Cristo ñi imapipas mana mapasina kaskata kamkunamanda wañuchii tukurka. ²⁰ Kai alpa manara tiagpitami Cristota agllaska karka, chasa wañuchii tukungapa. Kai alpa tukuringapa kaillaiakuurami kamkunamanda kawarigsamurka. ²¹ Pai Cristo samuskamandami kamkuna Taita Dioswa suma iuiarigsamurkangichi. Taita Dios kikinmi, Cristo wañuskata kaugsachispa, sumaglla atuniachirka. Chasamandami kamkuna Taita Dioswa suma iuiarispá suianakungichi, paipagma chaiagringapa.

²² Sutipa Alli Willaita suma uiaspa, kamkunapa almaka mailaskasinami niraiagsamungichi; chasaka, kam kikipura sutipa kuianakuspa kaugsangapakuna. Chimandami iukangichi, tukui suma iuiaiwa parijuma iapa kuianakunga. ²³ Kamkuna mana niraiangichichu wañudur taitakunamanda tiagsamugta. Imaurapas kaugsai iukag mana puchukarig Diospa Rimaimandami musu kaugsaita chaskiska niraiangichi, suma luarma ringapa. ²⁴ Chasallatami ñugpamanda librupi willaraiá, kasa nispa:

Tukui runakuna,

ugsasinallami kankuna.

Maituku suma kaugsaskakunapas,

ugsapa tugtusinallami kankuna.

Ugsa chakiriura,

tugtukunapas urmankunami.

²⁵ Ikuti Atun Taita Diospa rimaika

ñi imaurapas mana puchukaringapa kanchu.

Chi rimaika, kamkunata Alli Willai willaskatami niraiá.

2

¹ Chimandami niikichita: tukui mana allilla ruraikunata sakiichi. Mana imapipas llullachinakuichi. Mana kawariichi alli runa kagta, mana kaspapas. Ñi pitapas mana jiru iuiaiwa kawaichi. Mana pimandapas wasa rimaichi. ² Imasami uchulla wawakuna, tiagsamuramanda lichillata upiangapa munankuna: chasallatami kamkunapas iukangichi, Diospa Rimailata iachangapa munangakuna. Chasawaka, suma wiñagsina tukuspami diltudupa kispirinkangichi. ³ Iaia Jesús sutipa alli kagta iachagsamuspami paipa Rimaita chasa munangapa kangichi.

Cristo, iapa bali rumi kagsina kaskamanda

⁴ Iaia Jesuspagma alli iuiaiwa kaillaiachi. Paimi ka mana tukuriduru suma kaugsaita karag. Imasami wasichinakuskapi mana suma rumita wabutinkuna: chasallatami chiuramanda runakuna, Jesusta wabutirkakuna. Paitaka, Taita Dios kikinmi agllarka, Taita Diospa ñawipi iapa bali rumi kagsina kangapa.

⁵ Kamkunapas, musu kaugsaita iukaspa, suma rumikunasinami kangichi. Imasami achka rumikunawa suglla wasi saiachinkuna: chasallata sakichiringichi, Santu Ispíritu kamkunata Cristowa suglla wasisina rurangapa; chiwanka, Taita Diosmandalla kaugsag sasirdutikuna tukungapa; chasaka kam kikinkuna, ima karai ruragsina paita iukachiringapa. Chasa iukachirigkunataka, Jesucristowami Taita Dios chaskinga. ⁶ Chasallatami Taita Dios, ñugpamanda librupi willarka, kasa Iaia Jesusmanda nispa:

Imasami, wasichii kallaringapa

mas atun rumita churangapa chaiá:

chasallata Sión lumapi

sug runatami churani.

Paillami kapuá nuka agllaska iapa bali rumisina.

Paiwa suma iuiarigkunata

mana chaiangachu,

ianga suiangapa.

⁷ Kamkuna paiwa suma iuiarigkunapa ñawipi, paika iapa bali rumisinami niraiá. Ikuti paiwa mana iuiarigkunaka, paita wabutigsinami rurankuna. Ñugpamanda librupi, kasami paimanda niraiá:

Wasichigkuna wabutiska rumi

wasita charigmi tukurka.

⁸ Paikunamandaka kasapasmi niraiá:

Chi rumipi takarispami urmangakuna.

Iaia Jesusmanda rimaita iapa mana suma uiagkunami chi rumipi takarigsina niraiá. Paikunamandami Taita Dios chasa tukungapa nirka.

⁹ Ikuti kamkunaka, Taita Dios kikin agllaska runakunami kangichi. Iaia mandagpa sasirdutikunami niraiangichi. Taita Diosmandalla kaugsag runakunami kangichi, paipalla kangapakuna; chasaka, Taita Dios iapa suma alli ruraskakunamanda, kamkuna willaspa

kangapakuna. Paimi kamkunata kaiarka, iana tutapisina kaugsanakuskata sakispa, paipa iapa suma punchaiachiska iuiiawa kaugsangapakuna. ¹⁰ Ñugpataka, kamkuna mana Taita Diospa runakuna karkangichichu. Ikuti kunaauraka, Taita Diospa runakunami niraiangichi. Ñugpataka, kamkunamanda ñi pipas mana llakii iukarkakunachu. Ikuti kunaauraka, Taita Diosmi kamkunamanda llakii iuká.

Taita Dios ima niskata allilla ruraspalla kaugasunchi

¹¹ Nukapa kuiaskakuna kai alpapi ialigkunasinalla kaugsanakuskatami mañaikichita: kam kikinkunapa jiru iuiai munaikunata mana ruraspalla kaugsaiichi. Kamkunapa jiru iuiiakunawa i alli iuiiakunawa makanakugsinami kankuna. ¹² Taita Diusta manara rigsigkunapa ñawipipas allilla ruraspalla kaugsaiichi. Chasa kaugsagpikunaka, paikuna, kamkunamanda “Jiru ruragkunami kankuna” nigpipas, kamkuna allilla ruraskakunatami kawangkuna. Nispaka, justisiai puncha chaiaura, Taita Diusta ningakunami: “Kam, iapa suma atunmi kang!”.

¹³ Kai alpapi tukui mandagkuna imasa niskasina rurangichi, Iaia Jesusta kuntintachingapa. Iaia mandag imasa niskasina rurangichi, tukuikunamanda mas atun niraiagmanda. ¹⁴ Chasallata, iaia mandag churaska mandagkuna imasa niskasinapas rurangichi. Maikankuna jiru ruraskakunata justisiangapami churaska kankuna. Ikuti allilla ruragkunataka: “Sumaglla ruraspami kangichi” ningapami churaska kankuna. ¹⁵ Kamkuna allilla ruraspalla kangapami Taita Dios muná. Chasa ruraskakunawami Taita Dios muná, upakuna i mana allilla iuiagkunaka kamkunamanda mana imapas juchachinangkuna.

¹⁶ Taita Diospa ñawipi, ñi pipa lutrinsina mana niraiangichichu. “Kachariskasinami kani, nuka imasa munaskasina ruraspalla kaugsangapa” iuiarispapas, mana iukangichichu, jiru ruraikunata ruranakunga. Chasapaka, Taita Diospa lutrinsinakuna iuiarispapa, tukuipi allilla ruraspalla kaugsangichi. ¹⁷ Tukuikunawa sumaglla allilla kangichi. Cristowa iuiarig waugkindisina kuianakuspa kaugsangichi. Taita Diusta suma kuiaspa manchangichi. Iaia mandagta suma uangichi.

Cristo, nukanchimanda iapa llakii pasaspa, chasallata kaugsangapa iuiachiskamanda

¹⁸ Lutrinkuna, kamkunapa patrunkunata tukuipi suma manchaiwa uangichi. Alli patrunkunallata, mana; mana alli patrunkunatapasmii iukangichi suma uanga. ¹⁹ Maikanapas, ianga asutii tukuspaka, Taita Diosmanda iuiarispapa mana piñarispalla pasagpikunaka, paitaka, Taita Diosmi iapa kuianga. ²⁰ Kamkuna jiru ruraskamanda asutiura, mana piñarispalla kagpikunaka, ñi ima primiu mana tiangapa kanchu. Ikuti kamkuna tukuipi allilla ruranakugmanda ianga asutigpika, mana piñarispalla kagpikunaka, Taita Diospa ñawipika allimi ka.

²¹ Taita Dios, kamkunata agllarkami, chasa llakiikuna pasangapa, mana piñarispalla. Cristo, kamkunamandami iapa llakii pasarka. Chasa pasaspaka, kamkunata kawachirkami, paisina chasallata kaugsangapakuna. ²² Pai Cristo, ñi ima pandariipas mana ruraska karkachu. Ñi pitapas mana llullachiska karkachu. ²³ Paita kaminakuura, chasallata mana ainidur karkachu. Paita nanachinakuura, mana randichingapa rimarikurkachu. Chasapaka, kasa iuiailawami karka: “Tukuipi allilla justisiai rurag Taita Diospa makipimi kani”. ²⁴ Pai kikinpa kuirpupi nukanchipa pandariikunata aparigsinami kruspi klabai tururka; chasawaka nukanchi, jiru iuiiakunata sakispa, wañuskasina tukuspa, mana imapipas pandaringapa i allilla ruraspalla kaugsangapakuna. Paita kruspi klabaspa nanachiskawami kamkuna ambiriska tukugsamurkangichi. ²⁵ Ñugpataka kamkuna, sug ubija chingaska purinakugsinami kaugsanakurkangichi. Ikuti kunaauraka, Cristowami tukugsamurkangichi. Paimi ka ubijakunata suma kawagsina. Kamkunata suma kawagmi ka.

3

Kusandi warmindi imasa kaugsanakui iukaskamanda

¹ Chasallata, warmikuna, kam kikinkunapa kusata suma uiaspa kaugsangichi. Chasaka, Diospa Rimaita manara uangapa munag kusapas, paipa warmita allilla ruragta kawaspaka, pudingami chi Rimaita uiagsamungapa, kam mana willagpipas. ² Kamkuna tukuipi sumaglla uiaspa ruraspalla kagmandami pai pudinga Cristowa tukugsamungapa. ³ Kam warmikuna, “Sumaiasami” iuiarispapa, iapa bali katangakuna i kurita ruraskakuna churarispa mana kaugsangichi. Umamanda agchatapas mana iapa sumaiachingichi; chasaka, suma kawaringapa iuiaspalla. ⁴ Chasapaka, kamkunapa tukui iuiiakunata sumaiachiichi. Chi iuiaita sumaiachigka, tukuiwa sumaglla kaugsaimi iukangapa ka. Chi sumaiachiskaka, ñi imaurapas mana puchukaringapa kanchu. Chasa kagkuna, Diospa ñawipi iapa allimi kankuna. ⁵ Taita Diosmandalla kaugsag ñugpamanda warmikunapas, chasallata alli

iuiaitami sumaiachirirkakuna. Paikunaka, “Taita Dioswami kani” iuiarispa, kikinkunapa kusata sumami uiadur karkakuna. ⁶ Sara suti Abrahampa warmimi chasa karka. Paipa kusa ima niskata ruraspa, iacharkami paita ninga: “Nukapa iaiami kapuangi”. Kamkunapas, allilla ruraspa, mana iukangichichu ñi ima manchaipas iukangakuna. Chasaka, Sarasinallatatami tukugsamunkangichi.

⁷ Kusakunapas, chasallata, kamkunapa warmiwa iukangichimi, tukuipi sumaglla kaugsangakuna. Iuiariichi, warmikunaka karisina mana wapu kagtakuna. Taita Dios, kamkunata i paikunata suma kuiaspa, iskandikunatami nirka, diltudupa kaugsaita karangapa. Chasamanda, kamkunapa warmita niichi: “Suma kuiaska, allimi kangi”. Chasaka, kamkuna Taita Diusta mañakuura, chi mañaikuna mana imapipas arkai tukungachu.

Alli ruragkuna, llakii pasangapa kaskamanda

⁸ Nigpika chaiakumi, tukuikuna, suglla kagsina iuiarispa, alli iuiaikunawa sumaglla kaugsanakungapa. Kuianakuspa, parijsuna llakinakuspa, mana atuniachirispa iuiaiwa kangichi. ⁹ Kamkunata ima jiru ruragpipas, mana chasallata randichingichi. Kamkunata kamigpipas, mana chasallata kutichingichi. Chasapaka, maikan jiru ruraspa rimagta: “Taita Dios, kamta iapa kuiaspa kawapuachu” ningichi. Taita Dios, kamkunata iapa kuiaspa kawangapami agllarka. ¹⁰ Chasallatami ñugpamanda librupi willaraiá, kasa nispa:

Maikanpas unai suma kuntintulla kaugsangapa munag

iukanmi kikinpa kalluwa mana jiru rimanga;

chasallata, kikinpa simiwa mana llullanga;

¹¹ tukui mana allilla ruraikunata sakispa,

tukui allillataka ruranga;

tukuikunawa sumaglla kaugsangapa iuiarispalla kanga.

¹² Atun Taita Dios,

allilla ruraspa kaugsanakuskata sumami kawá.

Paikuna mañaskatapas uianmi.

Ikuti jiru ruragkunataka,

atun Taita Dios mana munanchu.

¹³ Kamkuna imaurapas allilla ruraspalla kagpikunaka, ¿pitak kamkunata mana allilla rurangapa pudingakuna? Ñi pipas manima. ¹⁴ Chasa kagpipas, kamkuna allilla ruraspa, llakii pasaspa kagmanda, Taita Diospa iapa kuiaskami kankangichi. Kamkunata piñagkuna ima rimagpipas, mana paikunata mancharingichi. ¹⁵ Chasapaka, Cristo kamkunapa iaia kagmanda, paita kamkunapa iuiaiwa ningichi, tukuipi mas alli kagta. Maikanpas kamkunata tapuchukuna, kasa nispa: “¿Piwatak iuiaringichi, chituku kuntintulla suianakungapa?”: chasa tapuuraka, kamkuna suma iuiarispa kangichi, imasa allilla ainingapa. ¹⁶ Tukuipi suma ainingichi, mana atuniachirispalla. Tukuipi allilla ruraspa kaugsangichi. Chasaka, mana kamkunapa iuiaiwi ñi ima jiru ruraska kawaringachu. Chasa kawaspaka, kamkuna Cristowa allilla ruraspa purigkunamanda mana suma rimagkuna, kikinkunami pingaipa pasangakuna. ¹⁷ Kamkuna jiru rurangataka, allilla ruraskamanda llakichigpikunaka, Taita Dios chasa munagmanda, paipa ñawipi mas allimi niraiankangichi.

¹⁸ Jesucristo kikinmi tukuikunapa pandariikumamanda sug biajilla wañurka. Pai tukuipi allilla rurag, nukanchi mana allilla ruragkunamandami wañurka; chasaka, nukanchita Taita Diospagma pusangapa. Paipa kuirpumi wañurka. Ikuti paipa Ispirituka, kaugsallami ka. ¹⁹ Paipa Ispiritullatami wichkaraiaska almakunata willagrirka.* ²⁰ Chi almakuna, ñugpamanda taita Noé kai alpapi willakuura, mana paita uiaska karkakuna. Paikuna mana uiagpikunapas, Taita Dios mana piñaspallami suiakurka, Noé atun barkuta puchukankama. Pusag runakunallami chi barkupi iakupi wañungapa kispirirkakuna.

²¹ Chi iaku, baugtisadiru iakuta kawachigsinami karka. Chasamandami kunaura baugtisariskapi nukanchi kispirinchi. Baugtisiariura, mana kanchu kuirputa mapa anchuchingapa. Baugtisariskapi, Taita Diustami mañanchi, nukanchipa iuiai tukuipi alli tukugsamungapa. Jesucristo kaugsariskamandami Taita Dios nukanchita kispichi. ²² Pai Jesucristo, suma luarma sikaspa, Taita Diospa alli ladumi tiaku. Anjilkuna, tukui sug luarpi mandagkuna i iapa pudigkunapas, pai ima niskatami iukankuna ruranga.

* **3:19** Sugkunaka iuiankunami chi wichkaraiaska almakunaka, limbo sutipi Iaia Jesusta suianakuska kagta.

4

¹Chimanda, imasami Cristo, paipa kuirpupi nanaikuna i llakiikuna iukarka: chasallatami kamkunapas iukangichi, nanai i llakii iukanga; chasaka, Cristollawa iuiaipi kangapakuna. Maikanpas Cristomanda kikinpa kuirpupi nanai i llakii pasagka, mana allilla rurai-kunatami sakinga; ²chasaka, kaugsankama, runakunapa jiru iuiaitami sakinga; Taita Dios imasa munakuskinami ruraspa kaugsanga.

³Unaimi kamkuna, Taita Diusta manara rigsispa, jiru munaiwa ruraspa kaugsanakurkangichi. Ñugpataka, imasa munaskasinami tukuipi jiru ruraspa kaugsanakurkangichi. Iapa machaspa, ialigta mikuspa i upiaspami karkangichi. Millangasina ianga diuskunatami kungurispa muchanakurkangichi. ⁴Ikuti kunaauraka, Taita Diusta rigsigkunawa kamkuna tukugsamuspa, chi jiru ruragkunawaka mana kagmandaka, paikuna, ujnarispa, kamkunamanda kamispami rimanakú. ⁵Chasa rimanakugpipas, kaugsakunata i wañuskakunata justisiangapa puncha ñami chaiamuku. Taita Diustami chiura paikuna willaringapa kankuna. ⁶Kasamandami wañuskakunatapap Alli Willaita willai tukurkuna: paikuna, kai alpapi kuirpupi justisiai tukuspapas, paikunapa ispirituka, Alli Willaita uiaspa, Taita Diospa ñawipi kaugsangapakuna.

Tukurii punchakuna imasa kaugsangapa chaiagta

⁷Tukui ima tiaskakuna tukuringapa punchaka, ñami chaiamuku. Chimanda, tukuikunawa alli iuiaiwa kaspera, Taita Diusta mañanakungichi, mana kungarispalla. ⁸Tukuimanda ñugpaka, kam kikinpura allillata kuianakuspa kaugsaiichi. Chasa kuiagka, achka mana allilla ruragkunata pasinsiangmi ka. ⁹Maikan kam kikinpura wasima chaiagriskatapap kaiangichi, mana ñi imapas rimarispalla. ¹⁰Imasami Taita Dios, sug sugta mingarka, kikinpura suma alli rurankungapa: chasallatami iukangichi parijuma allilla rurankunga. ¹¹Imaura maikantapas rimangapa chaiagpika, Taita Dios iuiachiska rimai-kunallata rimangichi. Maikanpas sugkunamanda allita rurangapa chaiagpika, Taita Dios karaska animuwa rurangichi. Tukui ima rurakuskapi, Jesucristomandalla iuiarispa rurangichi; chasaka, Taita Diusta: “Kam, iapa suma atunmi kangi” ningapakuna. Paita nisunchi: “Kam, imaurapas iapa suma atun tukui pudigmi kangi, maituku waranga waranga watakuna ialigpipas. Chasa kachu”.

Cristowa suma iuiarispa llakii pasaskamanda

¹²Nukapa kuiaskakuna, kamkuna Cristowa suma iuiarigkuna kaskata kawangapami llakiikuna nanaikuna chaiamú; mas ima kagpipas, mana ujnaringichi. Chasa pasarigpipas, iuiariichi ñi ima mana pasarigsina. ¹³Chasapaka, kamkunapa llakii iukaspera, kuntintulla kangichi, Cristopa llakiiwa sugllapi kamkunapas kagmanta. Chasa iukaspera, pai askurinti sumaglla kawarigsamuura, chiurami iapa kuntintarinkangichi. ¹⁴Kamkunata Cristomanda kamigpikunaka, Taita Diospa iapa kuiaskami kangichi. Chika niraianni Taita Diospa iapa suma Ispiritu, kamkunawa sugllapi kagta. ¹⁵Kamkunapa llakii mana kachu maikanta wañuchigmanda, ñi sisaimanda, ñi jiru ruraimanda ñi sugkuna imasa kaugsanakuskata kawaspa purigmanda. ¹⁶Cristowa kagmanta piñaspa kamispa llakichigpikunaka, mana iuiachi: “Pingaisinami ka”. Chasapaka, chi llakiikunamanda “Pai Siñur” Taita Diusta ningichi.

¹⁷Taita Dios justisiangapa punchaka ñami chaiarka. Taita Dioswa tukuskakuna maipipas kaskakunatami justisiai kallariku. Nukanchita chasa justisiai kallarigpika, Taita Diosmanta Alli Willaita mana uiagkunaka, ñimachar pasangakuna?

¹⁸Allilla ruragkuna, maillamandallami kispirigakuna.

Taita Diusta mana manchaspa pandarigkunaka, ñimasik pasangakuna?

¹⁹Chasamanda, Taita Dios imasa lisinsiasinasina paikunata piñaspa kamispa llakichii tukugkunaka iukankunami, alli ruraita mana sakispalla apanakunga i Taita Dios nukanchita wiñachigpa makipi almatapas mingangakuna. Pai ima niska mana llullanchu.

5

Cristowa tukuskakunata iuiachiskamanda

¹Kunaauraka, kamkunapura iacha taitakunata iuiachingapami munani. Nukapas, kamkunasina iacha taitami kani. Cristo imasa nanaiwa llakiiwa kagta kawaskata willagmi kani. Paipa suma atun puncha kawarigsamuura, nukapas kamkunawa sugllapimi kawarigringapa kanchi. ²Kasami niikichita: Taita Dios kamkunata mingaska ubijakunasinata suma kawapuachi. Taita Dios imasa munakuskasina alli iuiaiwami iukangichi paikunata

suma kawanga. Mana kawapuaichi, maikan “Kasa rurai” nigmandalla ñi “Kulkimi kuawanga” iuiarispalla. Mana killaspalla tukuipi kawapuaichi. ³ Kamkunata mingaskakunata mana iukangichichu, imasa munaskasina paikunata ruranga. Iukangichimi, paikuna imasa suma kaugsaita kwaspa iachaikungasina suma kaugsangakuna. ⁴ Chasa kaugsagkunaka, ubijakunasinata iaia kawag Cristo kawarigsamuura, mana imaurapas wagllirig llaughtusinata chaskispa, sumaiachiimi tukungapa kangichi.

⁵ Chasallata, musukuna, iacha taitakunata suma uiaichi. Tukuikuna iukangichimi, kam kikipura mana atuniachirispalla, ima iachachinakuskata suma uiangakuna. Chasallatami ñugpamanda librupi willaraiá, kasa nispa:

Maikan atuniachiriska iuiaiwa kagkunata,
Taita Diosmi paikunata wabuti.

Ikuti mana atuniachirispalla iuiaiwa kagkunataka
alli iuiaikunatami kará;

chasaka, paikuna sumaglla kaugsangapa.

⁶ Chasa kagmandaka, tukui pudig Taita Diospa ñawipi, “Uchullasinami kani” iuiariichi; chasaka, pai niska puncha chaiamuuraka, suma atuniachiska kangapa. ⁷ Taita Dioska, kamkunata suma kawagmi ka. Chimanda, tukui llakiikunata iuiaikunata paipa makipi churaichi.

⁸ Imasami liun, pitapas mikungapa maskaspa, sinchi wakaspa purí: chasallatami kamkunata piñag iaia kukuka, pitapas puchukangapa maskaspa puriku. Chimanda, alli iuiaiwa rigcharaiagsina kapuaichi. ⁹ Jesucristowa suma iuiarispá, chi iaia kukumanda michariichi. Ichangichimi, tukui alpakanapi kamkunapa waugki i panikunapas chasallata llakinakugta. ¹⁰ Kamkuna chi llakiikunata sug ratulla pasaskauramandaka, iapa suma kuiag Taita Dios kikinmi, kamkunata tukui allipi ruraspa, tukuipi allilla charingapa ka, mana paipagmanda llugsichii tukungapa. Paimi nukanchita agllarka, Jesucristowa paipa suma puncha luarpi diltudupa kaugsagringapa. ¹¹ Paita nisunchi: “Kam, imaurapas tukui pudigmi kangi, maituku waranga waranga watakuna ialgipipas. Chasa kachu”.

Kaiakama, niskamanda

¹² Waugki Silvanowami kai uchulla kartata iskribirkaikichita. Paika, Cristowa suma iuiarig waugkimi kapuá. Kamkunata suma iuiachingapami nirkaikichita, Taita Dios sutipa kamkunata suma kuiagta willangapa. Chi kuiaimanda mana kungaringichi.

¹³ Cristowa tukuskakuna Babilonia niraiaskapi kaskakuna, kamkunasina Taita Dios agllaska kagkunami, “Puangi” ninakú. Nukapa wambrasina Marcospasmi, “Puangi” kamkunata niku. ¹⁴ Kam kikipura Taita Diospa kuiaiwa iuiarispá muchanakuspa, “Puangi” ninakuichi. Cristowa tukui tukuskakuna, sumaglla kaugsapuaichi.

SAN PEDRO ISKAIMA KARTA KACHASKAMANDA

¹ Nukapa kuiaskakuna, nuka Simón Pedro, Jesucristopa lutrinsina, pai kachamuskami kani, Alli Willaita willaspa puringapa. Nukanchipa Dios i kispichig Jesucristo tukuipi alli kagmandami, kamkunapas nukanchisina paiwa suma iuiarigkuna tukugsamurkangichi. ² Taita Diosmanda i nukanchipa Iaia Jesusmanda kamkuna rigsiskamanda, Taita Dios, kamkunata askurinti kuiaspa, suma iuiaiwa kawapuachu.

Cristowa tukuskakuna, imasa kaugsai iukaskakunamanda

³ Taita Dios kikin, tukuipi atun suma alli kaspami nukanchita agllarka. Nukanchi paita rigsiskakunamandami, pai Taita Dioska paipa iapa iachaiwa ima ministiskakunata karamurka; chasaka nukanchi, paita iuiarispa, paimandalla kaugsangapakuna. ⁴ Chiwa, nukanchita willarkami, paiwa sugllapi iapa sumasina atun kagringapa. Chita suiaspaka, kamkuna, tukui millangasina ruraikunamanda anchurispas, Taita Dios imasa kaskapi sugllapimi tukunkangichi. Jiru munaikunamandami chi millangasina ruraikuna kai alpama chaiamurka.

⁵ Chimandami kamkuna iukangichi, paiwa suma iuiarispa, tukuipi allilla kaugsangakuna. Ña tukuipi allilla kaugsanakuspaka, iukangichimi tukuipi Alli Willaita iachaikungakuna. ⁶ Alli Willaita tukuipi iachaikuspaka, iukangichimi, ima mana allilla iuiarispa munai apigpi, chita mana rurangakuna. Tukui jiru munaikunata sakispaka, iukangichimi mana piñanakuspalla kaugsangakuna. Mana piñanakuspalla kaugsaspaka, iukangichimi Taita Diusta allilla iuiarig kangakuna. ⁷ Taita Diusta allilla iuiarigkuna kaspaka, iukangichimi kam kikinpura sumaglla parijuma llakinakuspa kawanakunga. Chasa kawanakuspaka, iukangichimi tukuikunata kuianakunga.

⁸ Kamkuna chasa suma iuiaiwa miranakupika, mana ianga kaugsanakunkangichichu. Chasallata, nukanchipa Iaia Jesucristota mana ianga rigsig kankangichichu. ⁹ Ikuti maikanpas mana chasa iuiai apagka, jiru ruraskakunata maillaska kagta kungarigmi niraiá. Ñawiwa mana karu kawangapa pudigsinami niraiá.

¹⁰ Chasamanda, taitakuna i mamakuna, Taita Dios kamkunata agllaspa kaiaskata mana kungarispalla, chi iuiaikunata sinchi chariripuaichi. Chasa sinchi charirispaka, ñi imaupas mana pandariipi urmankangichichu. ¹¹ Chasaka, nukanchipa kispichig Iaia Jesucristomi, kamkunata: “Samui” nispa, pai diltudupa suma mandakuskama sumaglla pusanga.

¹² Chimandami ikuti ikuti chasallata iuiachispa kaikichita, kamkuna sutipa Alli Willaita ña iachagsamuspa chariraigpikunapas. ¹³ Nuka kaugsankama, iukanimi kamkunata chi iuiaikunata iuiachikunga. ¹⁴ Nukanchipa Iaia Jesucristo willawarkami, ña wañui chawangapa kagta. ¹⁵ Chimandami munakuni, imasapipas, nuka wañuskauramandapas, kamkuna chi iachachiskakunata iuiailapi kangapakuna.

Cristo iapa suma punchalla kagta kawaskakunamanda

¹⁶ Iaia Jesucristo samuskamanda, pai tukuipi pudig kagta nukanchi kamkunata iachachiskaka, runakuna iuiariska ianga parlukuna mana kanchu. Pai iaia mandag kaskatami nukanchi kikinkunapa ñawiwa kawarkanchi. ¹⁷ Taita Dios paita atuniachispa sumaiachiskatami kawarkanchi. Askurinti suma puncha luarmandami kasa rimai uiarigsamurka: “Kaimi nukapa kuiaska wambra kapuá. Paita iapa alli sumami iuiachiiwa kawani”. ¹⁸ Nukanchi kikinkunami chi suma luarmanda rimaskata uiarkanchi. Chasa uiariura, Taita Diospalla tukugsamuska lumapi Iaia Jesuswami karkanchi.

¹⁹ Chi nukanchi kawaspa uiasakunawami mas suma iuiarinchu, Santu Ispirituwa ñugpamanda rimagkuna willaska sutipa kagta. Chi ñugpamanda willaikunaka kanmi imawapas amsapi punchaiachigsina. Kamkunaka iukangichimi, chi willaikunata suma uiaspa, mana kungarispalla kangakuna. Chikunawaka, kamkunapa iuiapi punchaiachigsinami iukankangichi, Cristo kawarigsamunkama. Pakarikuura lusiru istrilla llugsi; chasallatami Cristo kawarigsamungapa ka.

²⁰ Tukuimanda ñugpa, kasa iachaichi. Diospa Rimaipi Santu Ispirituwa ima ñugpamanda willaskakunataka mana pudiringapa kanchu, sug sug kikinpa iuiailawa ima niraiaskata iachangapa. ²¹ Ñugpamanda willag runakunaka, kikinpa iuiailawa mana willanakurkachu. Santu Ispiritu iuiachiskawami chasa Taita Diosmanda willanakurka.

¹ Imasami, ñugpamanda Israelmanda runapura, llullaspa willagkuna tiarka: chasallatami, kam kikinapura, llullaspa iachachigkuna tiangapa kankuna. Paikunaka, wagliichingapa iuiawami sug rigcha iuiaikunawa llullachispa iachachingapa kankuna. Chasaka, kispichig Iaia Jesustami wasa churaspa piñaringapa kankuna. Chasa ruragkunaka, mana unailami diltudupa ninama sitai tukungapa kankuna. ² Achkakunami, chi iachachigkunata iachaikuspa, jiru ruraspa katingapa kankuna. Paikuna chasa jiru ruraskata kawaspaka, Alli Willai sutipa kaskatami kamiringapa kankuna. ³ Paikunaka, kulkilla munaspa, kikinkunapa lulla rimailawami kamkunata tuntiachingapa kankuna. Paikunamandami ñugpamandata niraiá, diltudupa puchukaringapa kagtkuna. Paikuna chasa puchukaringapa niskataka mana tianchu imasa kispichinga.

⁴ Pandarig anjilkunataka, Taita Dios mana pasinsiarkakunatachu. Paikunata alpa ukuma amsapi kadinawa wataspami churarkakunata, justisiag atun puncha chaiankama. ⁵ Ñugpa punchakuna pandarig kaugsaskakunatapas, Taita Dios mana pasinsiarkachu. Chi runakuna imasa munaska jiru ruraspa kaugsanakugmanda, tukuipi iaku jundachikawami puchukarkakunata. Allilla kaugsangapa willag Noé suti runallatami sug kanchiskunallawa kispichirka. ⁶ Sodom i Gomorra suti puiblukunapi kaugsanakuskatapas ninami kachamurka. Rupaspa, uchpalla tukugtami rupachirka. Kati punchakuna Taita Diusta mana manhaspalla kaugsagkunata mana chasa kaugsangapa iuiachingapami chasa rurarka. ⁷ Chasa kaggipas, sug alli rurag Lot suti runatami chipi rupangapa kaskata kispichirka. Lotka, chi jiru iuiai munailawa ruraspa kaugsanakuskata iapa llakiiwami kawadur karka.

⁸ Chi alli rurag Lotka, paikunawa sugllapi tukui punchakuna kaugsakuspa, jiru ruraskunata kawaspa i uiaspami paipa alli iuiailapi iapa llakiiwa karka. ⁹ Atun Taita Dios, paita iuiarispa kaugsagkunata llakiiimanda kispichigmi ka. Ikuti jiru ruraspa kaugsanakugtaka, paimi charí, justisiag atun puncha chaiankama. Chiurami diltudupa ninama sitai tukungapa kankuna. ¹⁰ Pai niskakunata piñarispa, kikinpa jiru iuiailawa imasa munaskasina ruraspa kaugsanakuskata masmi chi ninama sitaiwa justisiangapa ka. Chasakunaka, maituku nikuggipas mana uiaspalla, imasa munaskasina ruraspami kaugsanakú. Sug luarpi suma atun kagkunatapas mana manhaspalla kamigkunami kankuna. ¹¹ Ikuti anjilkunaka, paikunamanda mas iachaiwa pudig kaspapas, mana ima kamiipas paikunata rimankunachu; chasaka, atun Taita Diospa ñawipi mana justisiai tukungapakuna.

¹² Chi llullaspa iachachigkunaka, ñi ima mana juisiuspalla animalkunasinami kaugsanakú. Apispa, wañuchii tukungapagllami tiagsamuska kankuna. Paikuna mana iachaskakunatapas kamispallami rimankuna. Chasa rimagkunaka, animalkunasinami puchukarii tukungapa kankuna. ¹³ Sugkunata iapa llakichiskamanda, paikunapas chasallatami randichii tukungapa kankuna. Mana unaila ialingapa kusikuska pandariikunawami munankuna kaugsangapa. Kamkuna atun punchakuna ialichingapa sugllapi tandariskapi, chi iachachigkunapas, chipi kaspa, paikunapa mana unaila ialig kusikuiwaka iapa pingaichispami kankuna. Chasa kawaspaka, kamkunapas pudingichimi pandaringa.

¹⁴ Paikunaka, maikan warmita kawaspaka, paita iapa mumarisa iuiailawami kankuna. Mana saikunkunatachu, jiru rurangapa. Cristowa manara suma iuiarigkunata mana allilapimi urmachinkuna. Tukui imapas iukangapa paikunamandallami munankuna. Chikunaka, maldisiskami kankuna. ¹⁵ Cristowa sutipa suma iuiariita sakispa, sug rigcha iuiaikunatami apigsamunkuna. Ñugpamanda rimag Balaam suti Beorpa wambra imasa kaugsaskasinami kaugsankuna. Chi Balaamka munakurkami, pai jiru ruraskamanda kulkilla chaskingapa. ¹⁶ Pai chasa rurangapa iuiaspa rikuuraka, kikin apakuska upa burumi, paita runasina rimaspa, piñaspa arkarka. Chasaka, pai upasina iuiakuskatami sakirka.

¹⁷ Chi llullaspa iachachigkunaka, iaku ñawi chakiriskasinami kankuna. Waira pukuspa kasama chasama apaska puiusinami kankuna. Paikunamandami niraiá diltudupa iana tutapi kagringapakuna. ¹⁸ Paikunapa suma ianga rimaiwa rimaspa, jiru iuiai munai-kunata iuiachispa, chi jiru ruraikunamanda mailla anchuchirinakuskata ikutimi iuiachinkuna, paikunasinallatata kangapa. ¹⁹ Ninkunami: "Wataskasinamanda kachariskami kankangichi". Chasa nisapapas, pai kikinkuna jiru munaikunawa ruraspa wataskasinami kaugsanakú. Maikan runapas sug jiru ruraita chariraiagpika, chi jiru ruraiwa watas-kasinami ka. ²⁰ Maikanpas nukanchita kispichig Iaia Jesucristota rigsigka, kai alpapi jiru munaikunamanda anchuchiriskami niraiá. Chasa anchuchiriska niraiaspapas, ikuti chi jirukunama tigragpika, chi jirukunawa wataskasinami ikuti tukugsamú. Chasaka, ñugpamandapas mas jiru ruragmi tukugsamunga. ²¹ Maikanpas Taita Dios tukuipi alli mandaskata iachaspa anchurigka, mas allichar kantra, chi Alli Willaita mana iachagsamuspa kangapa. ²² Paikunamanda chasa niraiaskaka, kai nidirupimi kasa nigsamurka: Alkuka, kikin kinnaskatami ikuti mikú.

Armachiska kuchipas,
ikuti turupimi builtiarí.

3

Iaia Jesús, ikuti samungapa kaskamanda

¹Nukapa kuiaska taitakuna i mamakuna, ña iskaima kartatami kachaikichita. Chi iskan-diwaka suma iuiachingapami munaikichita. ²Taita Diuspalla kag Santu Ispirituwa ñugpa-manda rimagkuna willaskata allilla iuiaripuaichi. Chasallata, kispichig Iaia Jesús ima niskata allilla iuiaripuaichi. Pai kikin kachamuska runakunami kamkunata chita iachachir-kakuna.

³Tukuikunamanda mas allilla, kasa iuiariichi: tukurii punchakunaka, Diuspa Rimaita unzagkunami kawarigsamungapa kankuna. Pai kikinkunapa jiru iuiaita imasa munas-kasina ruraspami kaugsangapa kankuna. ⁴Unzaspa, kasami ningapa kankuna: “Cristo ikuti samungapa niskaka, zimawantak mana samú? Nukanchipa taitakuna wañugpipas, ñi ima manima sug rigcha tukú. Imasami Taita Dius tukui ima wiñachiskauramandata kaska ka: chasallami ka”. ⁵Chi unzagkunaka mana munankunachu iachangapa, sug luar ñugpamandata tiagta. Kai alpatapas Diuspa rimaiwami iakumanda i iakuwa ruraspa wiñachirka. ⁶Chasallata, atun tamiaska iakuwami kai alpapi ñugpamanda kaugsana-kuskata puchukarka. Chitapas mana iachangapa munankunachu. ⁷Kunaura tiaska kai alpa i sug luarka, Diuspa rimailawantami charii tukunkuna, Taita Dius justisiai puncha chaiankama. Chiurami ninawa rupachii tukungapa kankuna. Chi punchami paita mana manchaspalla unzagkuna puchukai tukungapa kankuna.

⁸Nukapa kuiaska taitakuna i mamakuna, mana kasa kungariichi. Atun Taita Diuspa ñawipi, sug punchaka niraianmi waranga watasina. Waranga wataka, suglla punchasina-mi niraiapu. ⁹Ikuti sugkunaka ninkunami: “Atun Taita Dius iapami unaiaku, pai ima niskata ruragsamungapa”. Chasa mana kanchu. Atun Taita Diuska, pasinsialla suiaspa, mana munakunchu, pipas puchukaringapa. Kamkunamanda iapa suma llakispami munaku, tukuikuna, pandariikunata sakispa, paiwa tigrangapakuna.

¹⁰Chasa kagpipas, imasami sisai mana willaspalla samú: chasallatami, mana iuianakura, Iaia Jesús samungapa ka. Chi punchaka, sug luar iapa manchangasina uiarispami puchukaringapa ka. Tukui ima chipi tiaskami rupaspa tukuringapa ka. Kai alpa i tukui ima tiaskakunapasmi chasallata rupaspa puchukaringapa ka.

¹¹Chasa tukui puchukaringapa kagta iachaspaka, kamkunata chaiakumi, Taita Diusta sumaglla iuiaripa, paimandalla kaugsangapakuna. ¹²Chasa suma kaugsaspa, suianakungichi, Dius samug puncha chaiankama. Tukuipi allilla ruraspa kaugsanakungichi; chasaka, chi puncha mana unaiilla chaiamungapa. Chi puncha, sug luar rupaspami puchukaringapa ka. Tukui ima tiaskapasmi rupaspa iakuiaspa puchukaringapa ka. ¹³Ikuti nukanchika, Taita Dius niskata, musu sug luar i musu alpatami suianakunchi. Chikunapika, tukui allikunallami kagringapa kanchi.

¹⁴Chasamanda, nukapa kuiaska taitakuna i mamakuna, musu sug luar i alpata suianakunkama, animu rurangichi, tukuipi alli ruraspa sumaglla kaugsanakungapa, mana pandarisapalla. Kamkuna chasa sumaglla kaugsanakuskata, Taita Dius tarigsamuchu.

¹⁵Kasapas iuiaripuaichi: nukanchipa Iaia Jesús manara samuncho, sugkunatapas kispichigsamungapa pasinsialla suiaspa. Chasallatami nukanchipa kuiaska waugki Pablopas, Taita Diuspa iachaita karaskawa kamkunata karta kacharka. ¹⁶Tukui paipa kartakunapimi Pablo chasallata iachachispa rimarka. Chi kartakunapika, sug nigtakunaka mana iachangasinami iskribiraiá. Chi niraiaskakunata sugkunaka, mana allilla iachagkuna i manara suma uiagkuna, pandami iachachinkuna. Diuspa Rimaiipi tukui sug kaskakunatapasmi chasallata panda iachachinkuna. Chasa iachachispaka, pai kikinkunami puchukaringapa kankuna.

¹⁷Chiwanka, nukapa kuiaska taitakuna i mamakuna, manara chasa pasarigpimi kamkunata ña willarkaikichita. Chimanda, jamalailapas kamkuna, jiru iachachigkunawa pandachii tukuspa, Cristowa suma iuiariskata sakintrangichi! ¹⁸Nukanchipa kispichig Iaia Jesucristota mas suma rigsipuaichi. Paipa suma kuiaiwa mas kuianakuichi. Kunaura i imaurapas paita nisunchi: “Kam, iapa suma atunmi kangí, maituku waranga waranga wata ialigpipas”. [Chasa kachu.]

SAN JUAN MUSUGLLA KARTA KACHASKAMANDA

Diuspa Rimai, Jesús suti Runa Tukuskamanda

¹ Jesucristomanda nispami kamkunata kai karta kachanchi. Pai Jesucristoka, manara ñi ima tiaskauramandatami kaugsakurka. Paitami uiarkanchi. Nukanchipa ñawiwami paita kawarkanchi. Paita kawaspa, nukanchi kikinpa makiwami llamkarkanchi. Paimi ka Diuspa Rimai, nukanchita kaugsai karamug. ² Pai kaugsai karamug, kai alpapimi kawachirigsamurka. Paita kawaspami nukanchi paimanda willadurkuna kanchi. Mana puchukaridiru suma kaugsaita karagmandami kamkunata willanchi. Pai, Taita Diuswa sugllapi kaspaka, nukanchitami kawachirigsamurka. ³ Nukanchi ima uiaska kawaskatami kamkunatapas willanchi; chasaka kamkunapas, nukanchiwa suglla iuiai tukugsamungapa. Taita Diuswa i paipa wambra Jesucristowapasmí suglla iuiaiwa tukuska kanchi. ⁴ Kai tukui imakunata kamkunata willanakunchi; chasaka kamkunapas, imapipas suma alli iuiachiiwa kangapa.

Taita Dius, mana pandarii tiagmanta, punchallami ka

⁵ Jesucristo kikin ima nukanchita iachachiskatami uiarkanchi. Chasallatami kamkunatapas kasa willanchi: pai Taita Dius, punchallami ka, mana pandarii tiagmanta. Paipa ñawipi, tutaiai mana tianchu. ⁶ Paiwa suglla iuiaiwa tukuska kagta nukanchi iuianakuspa, manima sutipa allilla ruraspa kaugsanakugpika, llullami niraianchi. Chasaka, iana tutapi purinakugsinami kanchi. ⁷ Taita Dius, punchallapi kaugsagmi ka, mana pandarii tiaskapi. Nukanchipas, paipa punchaiachii suma iuiaiwa kaugsanakugpika, suglla iuiaiwami nukanchipura kaugsasunchi. Chasa kaugsanakugpika, paipa wambra Jesuspa iawarwa, tukui nukanchipa pandariikunatami anchuchí.

⁸ Nukanchi kikinakuna nisunchi: “Mana pandarigkunami kanchi”; nigpika, nukanchi kikinmi llullachirinakunchi. Chiwanka, paipa sutipa Alli Willaita nukanchi manachar charintranchi. ⁹ Ikuti nukanchi pandariskakunata willarigpika, Taita Diuska, tukuipi iapa alli kaspá, pai ima niskata mana llullá; chiwanka, nukanchi pandariskakunata pasinsiaspa, tukui mana alli iuiaikunata anchuchispa kispichingapa. ¹⁰ Nukanchi nisunchi: “Mana pandariska kanchichu”; nigpika, Taita Diusmandapas nintranchemi: “Llullami ka”. Chiwanka, paipa suma rimaita manachar charintranchi.

2

Jesucristo, Taita Diusta nukanchimanda mañadur kaskamanda

¹ Nukapa kuiaska wambrakuna, chi rimaikunata willarkaikichitami, kamkuna mana pandaringapa. Maikan pandarigpika, Taita Diusta nukanchimanda mañadurmi iukanchi. Jesucristo imapipas alli kagmi nukanchimanda mañaku. ² Paimi nukanchipa pandariikunata anchuchingapa wañurka. Nukanchipa pandariikunamandalla, mana; kai alpapi tukui kaugsagkunapa pandariikunamandapasmi wañurka.

³ Taita Dius ima niskata ruraspami iachanchi, paita sutipa rigsiga. ⁴ Maikanpas nichu: “Nukami Taita Diusta rigsini”: chasa nispapas, Taita Dius ima niskata mana ruragpika, chika tukuipi llullami ka. ⁵ Ikuti Taita Dius ima rimaskata ruragkunaka, sutipami tukui iuiaiwa paita kuiankuna. Chasa ruraspami iachanchi, nukanchi paiwa tukuska kagtakuna. ⁶ Maikanpas paiwa tukuska kagta iuiagka, imasami Jesucristo kaugsarka: chasallatami pai iuká kaugsanga.

Musu mandaimanda

⁷ Nukapa kuiaskakuna, mana willanakuikichitachu sug rigcha rimaskata rurangapa. Chi kamkuna Jesucristowa iuiarii kallariskauramandata rimai iukaskallata ikutimi iuiachinakuikichita. Chi ñugpamanda rimaita ñami uiarkangichi. ⁸ Chasa kagpipas, musuglla rimai kagsinami willanakuikichita. Chika, Jesucristowa i kamkunawapas sutipami tukugsamurka. Diuspa sutipa alli rimaita apigkunaka, iana tutapisina pandariikunata ñami sakinakú. Chasaka, paikunapa iuiaipika punchasinallami tukugsamunkunata.

⁹ Maikanpas nichu: “Nukaka, punchasinallapimi kani”: chasa nispapas, waugkindikunata mana kuiachu: chara iana tutapisinami chi runa ka. ¹⁰ Maikanpas waugkindikunata kuiagpika, paipa iuiaiwa punchasinallapimi ka. Chasa kaugsagkuna, sugkunata pandariikunapi mana urmachinkunachu. ¹¹ Ikuti waugkindikunata mana kuiagkunaka,

* 1:5 Pandariikunami tutasina ka.

iana tutapi kaugsanakugsinami ka. Paipa mana suma iuiaikunawa ñawi tutaiachiskasina tukugsamuspaka, mana iachanchu maíma rikugta.

¹² Kuiaska wambrakuna, kamkunapa pandariikunata Jesucristomandami pasinsiai tukurkangichi; chimandami rimaikichita. ¹³ Taitakunaka, Jesucristo kallariimandata kaugsagta kamkunami rigsingichi; chimandami rimaikichita. Musukunaka, iaia kukuta kamkunami mitikuchirkangichi; chimandami rimaikichita.

Kuiaska wambrakunaka, Taita Diusta ña rigsingichi; chimandami rimaikichita. ¹⁴ Taitakunaka, Jesucristo kallariimandata kaugsagta kamkunami rigsingichi; chimandami rimaikichita. Musukunaka, kamkuna, wapusina kaspá, Diuspa Rimaita charirispa, iaia kukutami mitikuchirkangichi; chimandami rimaikichita.

¹⁵ Kai alpata mana munangichi, ñi kai alpapi tiaskata. Maikanpas kai alpata munagkunaka, Taita Diustaka mana kuiankunachu. ¹⁶ Kai alpata munagkuna niraiami imasa kikinpa mana allilla iuiaiwa munaspa kaugsangapa, ñawiwa mana allikunata kawaspa munaringapa i ima iukaskakunawa atun tukuska iuiangapa. Chikunaka mana niraianchu Taita Diuspa munaikuna. Kai alpapi tiaskakunallawa iuiagkunapa munaikunami niraiá. ¹⁷ Kai alpa tukurikumi. Tukui kai alpapi mana alli munaikunapasmi tukuriku. Ikuti maikanpas Taita Dios ima munaskata ruragkunaka, diltudupami kaugsangapa kankuna.

Llulla i mana llulla kagmanda

¹⁸ Wambrakuna, ñami tukurii punchakuna chaiamurka. Kamkuna ñami uiarkangichi, Cristota mana munag chaiamungapa kagta. Sutipami iapa achka paita mana munagkuna ña tukugsamurkakuna. Chasamandami iachanchi, tukurii punchakuna ña chaiamuska kagta.

¹⁹ Chi Cristota mana munagkuna, nukanchiwa kaskamandami llugsirkakuna. Chi llugsirkuna, nukanchipa iuiaiwa mana karkakunachu. Nukanchipa iuiaiwa kagpikunaka, nukanchillawami kankuna. Paikuna llugsigmandaka, allillami kawarkanchi, nukanchipura mana tukuikuna nukanchipa iuiaiwa kagtakuna.

²⁰ Ikuti kamkunaka, Cristo karamuska Santu Ispiritutami chaskirkangichi. Chiwanka, tukuikunami suma iachaita iukangichi. ²¹ Nuka mana willaikichitachu, sutipa Alli Willaita mana rigsigtakunasina. Kamkuna allilla rigsigmandami willaikichita. Ñami iachangichi: Diuspa sutipa alli Rimaipi, mana ima llullaiipas tianchu.

²² ¿Pitak llulla ka? Maikan Jesusmanda nidurkuna, mana Taita Dios agllaska Cristo kagta. Chasa nidurkunami Cristota mana munag kankuna. Chasakuna, Taita Diusta i paipa wambratami piñarinakú. ²³ Maikanpas Taita Diuspa wambrata piñarigkuna, Taita Dios kikintapasmi piñarinkuna. Ikuti maikanpas Jesús Taita Diuspa wambra kagta rigsigkunaka, Taita Diustami iukankuna.

²⁴ Kamkuna ima kallarisauramandata uiaskata chariraiangichi. Kamkuna kallarisauramandata uiaskata chariraiagpikunaka, Taita Diuspa wambrawa i kikin Taita Dioswami suglla iuiai iukankangichi. ²⁵ Chimandami nirka, mana puchukariduru suma kaugsaita nukanchita karamungapa.

²⁶ Kamkunata pandachingapa munanakugmandami chasa willaikichita. ²⁷ Chasa willagpipas, kamkunaka ñi pi iachachigtapas mana ministingichichu. Jesucristo Santu Ispirituta karamuskami kamkunawa ka. Santu Ispíritu kikinmi tukuimanda kamkunata iachachi. Tukui pai ima iachachiskaka, sutipami ka, mana llullaspalla. Chasamanda, imasami Santu Ispíritu, kamkunata iachachirka: chasallata Cristowa suglla iuiaiwa kangichi.

²⁸ Kunaura, kuiaska wambrakuna, Cristowa suglla iuiaiwa kaichi; chasaka, pai ikuti kawarigsamuura, nukanchi paiwa suglla kagsina iuiangapa; chiwanka, pai samuura, mana manchaspalla paipa ñawipi kawarigringapa. ²⁹ Ñami iachangichi, Jesucristo tukuipi iapa alli kagta. Kasapas iachaichi: maikanpas allilla ruraspa kaugsagkuna, Taita Diuspa wambrakunami niraiangichi.

3

Taita Diuspa wambra tukuskakunamanda

¹ Iuiariichi imasa Taita Dios, nukanchita iapa kuiagta. Chiwami nukanchita nirka: "Nukapa wambrakunami kangichi". Chasami kanchi. Kai alpapi tiaskakunallawa iuiagkunaka, Taita Diusta mana rigsispami mana nukanchita rigsinkuna, Taita Diuspa wambrakuna kagta.

² Nukapa kuiaskakuna, nukanchikar ñami Taita Diuspa wambrakuna kanchi. Manarami kawachimú, nukanchi imasa kipama kangapa kagtakuna. Kasami iachanchi: Jesucristo

ikuti kawarigsamuura, paita imasa kagta kawasapami paisinallata tukugsamungapa kanchi. ³ Maikan chasa paita suma iuiaspa suiagkuna, pandariikunamanda anchuchirispami limpiulla tukugsamungapa kanchi; imasami Jesucristo mana pandarig ka: chasa.

⁴ Maikanpas ima pandariikunata ruragkuna, kikinkunami Taita Dios ima rurangapa niskata wabutinkuna. Ima pandariikunawa niraianni Taita Dios ima niskata wabutig. ⁵ Ñami iachangichi: Jesucristoka, pandariikunata anchuchingapami samurka. Pai kikin niraianni mana pandarig kagta. ⁶ Chimandaka, maikanpas Jesucristowa suglla iuiawiwa kagkuna mana pandarinkunachu. Ikuti maikanpas pandarispa kaugsagkunaka, paita mana kawaspa rigsigsinami kankuna.

⁷ Kuiaska wambrakuna, ¡ujalallapas kamkunata pipas pandachichukuna! Imasami Jesucristo alli ka: chasallatami maikan alli ruraspa kaugsanakugpas alli kankuna. ⁸ Ikuti maikanpas pandarispa kaugsagkunaka, iaia kukuwami kankuna. Chi iaia kukuka, kallariimandatami pandariilla ka. Taita Diospa wambra Jesucristoka, chi iaia kuku mana alli ruraskakunata puchukangapami samurka.

⁹ Taita Diospa wambra niraiaskakuna, Taita Diospa kaugsaita chariraiaspami mana pandarispa kaugsankuna. Taita Diospa wambra niraiaspami mana pudinkuna pandariipi urmangapa. ¹⁰ Taita Diospa wambra niraiaskakuna i iaia kukupa kagkuna, kasapimi rigsiri. Maikanpas jiru ruragkuna, mana Taita Dioswa kagta niraianchu. Chasallata, maikanpas waugkindikunata mana kuiagkuna, Taita Dioswa kagta mana niraianchu.

Nukanchi kikinpura kuianakusunchi

¹¹ Kasami kallarisauramandata uiarkangichi: nukanchi kikinpura kuianakuspa kaugsangapa. ¹² Mana rurasunchi Kaín suti karisina. Chi karika, iaia kukuwa kaspami paipa waugkindita wañuchirka. ¿Imapatak wañuchirka? Kaín kikin mana allilla rurag kaspas, paipa waugki allilla rurag kagmandami wañuchirka.

¹³ Taitakuna i mamakuna, kai alpapi tiaskakunallawa iuiagkuna kamkunata piñagpikunaka, mana ujnaringichi. ¹⁴ Nukanchi, wañuskasina kaugsaita sakispa, sutipa kaugsaitami iukanchi. Nukanchipa waugkindikunata kuiaspami chasa iachanchi. Ikuti maikanpas mana waugkindikunata kuiagkunaka, chara wañuskasina kaugsaitami iukanakuna. ¹⁵ Maikanpas waugkindikunata mana munaspa kaugsanakugka, wañuchidursinami kankuna. Ñami iachangichi: ñi maikan wañuchidur, diltudupa suma kaugsaita mana iukanchu. ¹⁶ Kasami rigsunchi, sugkunata kuiai imasa kagta. Jesucristo, nukanchimandami dikuiai sakirirka wañuchii tukungapa. Chasallatami nukanchipas iukanchi, waugkindikunamanda llakii iukanga, wañungapa chaiagpipas. ¹⁷ Maikanpas, kai alpapi iukag kaspas, sug waugkindi ñi ima mana iukaskata kawasapapas, mana aidagpika, ¿imasasik Taita Diospa kuiaita paipa sungupi charikugta nintra? ¹⁸ Nukapa kuiaska wambrakunata niikichitami: mana rimailawa nisunchi: “Nukaka kuiaikichitami”. Iukanchimi, alli ruraikunawa chi kuiaita kawachinga.

Diospa ñawipi, imasa mana manchaspalla kaskamanda

¹⁹ Chasaka iachasunchimi, nukanchi mana llullag Taita Diospa kagtakuna, paipa ñawipi mana imamandapas manchaspalla. ²⁰ Nukanchi kikin pandariskakunata iuiarigpipas, Taita Dioska, nukanchita pasinsiaspa, nukanchipa iuiaiwantami allilla kawá. Paimi tukui iachá.

²¹ Nukapa kuiaskakuna, nukanchipa iuiapi ñi imapas mana juchachirigpika, Taita Diospa ñawipi mana manchaspallami kasunchi. ²² Pai ima niska i munaskata nukanchi ruragpikunaka, tukui ima mañaskatami nukanchita karanga. ²³ Nukanchita kasami ni: paipa wambra Jesucristowa suma iuiarispa kangapa; chasallata, tukuiuna parijuma kuianakuspa kaugsangapa. Chasami Jesucristo nirka. ²⁴ Pai ima niskata allilla ruragkunaka, parijuma paillawanta suglla kaugsai iukagmi niraianchi. Paipa Santu Ispiritutami nukanchita karamurka. Santu Ispirituwami iachanchi, pai nukanchipi kaugsagta.

4

Taita Diospa Ispiritumanda i llullag kuku wairamanda

¹ Nukapa kuiaskakuna, achka llullachigkunami kai alpapi purinakú, “Santu Ispirituwa rimagmi kani” nispa. Mana tukui chasa nigkunawa suma iuiaringichi. Chasapaka, paikunata tapuchingichi: ¿sutipachu Diospa Ispirituwa rimagkuna ka? ² Kasamandami iachankangichi, pikuna Diospa Ispirituwa rimanakugta. Maikanpas ninakuchu: “Jesucristo, sutipa Runa Tukuskami samurka”: chikunami Diospa Ispirituwa rimanakú. ³ Ikuti maikanpas Jesucristomanda mana chasa ninakugka, mana Diospa Ispirituwa rimanakunchu. Cristota mana munaspa kuku wairapa iuiaitami iukanakuna. Ñami uiarkangichi, chi Cristota mana munag ña chaimungapa kagta. Niikichitami: timpumi kai alpapi kagsamú.

⁴ Kam nukapa kuiaska wambrakunaka, Taita Diuspami kangichi. Pai kamkunawa sugllapi kag, pai, iaia kuku kai alpapi tiaskakunallawa iuiachigmandapas mas iapa iachami ka. Chimandaka kamkuna, chi llullachigkunata ña binsiskami kangichi. ⁵ Chi llullachigkunaka, kai alpapi tiaskakunallawami iuanikuna. Chimandaka, kai alpapi tiaskakunamandallami rimankuna. Chasa rimagkunatami kai alpapi tiaskakunallawa iuiagkuna uiankuna. ⁶ Nukanchika, Taita Diuspami kanchi. Maikanpas Taita Diusta rigsikuna, nukanchitami uiankuna. Ikuti maikanpas mana Taita Diuspa kagkunaka, mana nukanchita uiankunachu. Chasapimi rigsiri, maikankuna sutipa alli Santu Ispirituwa rimagkuna i maikankuna llullag kuku wairawa rimagkuna.

Taita Dius, sutipa iapa kuiagmi ka

⁷ Nukapa kuiaskakuna, nukanchi kikipura kuianakusunchi. Taita Diusmi nukanchita iuiachimú, kuianakuspa kaugsangapa. Tuku kuianakuspa kaugsagkuna, Taita Diuspa wambrakunami niraianchi. Nispaka, paitami rigsinchí. ⁸ Ikuti mana kuianakuspa kaugsagkunaka, mana Taita Diusta rigsinkunachu. Taita Dius, sutipa iapa kuiagmi ka.

⁹ Kasami Taita Dius kawachigsamurka, nukanchita sutipa kuiag kagta: pai kikipura suglla wambratami kai alpama kachamurka; chasaka nukanchipas, mana puchukaridiru suma kaugsaita paiwa iukangapa. ¹⁰ Nukanchi mana karkanchichu Taita Diusta ñugpa kuiag. Paimi nukanchita ñugpa kuiarka. Nispaka, dikuiaimi kikipura wambrata kachamurka, kikin wañugsamurka, nukanchi pandariskata anchuchingapa. Chasawami kawachigsamurka, sutipa kuiagta.

¹¹ Nukapa kuiaskakuna, chitukumi Taita Dius nukanchita iapa kuiarka. Chasamandami nukanchi kikipura iukanchi kuianakunga. ¹² Ñi imaurapas Taita Diusta ñi pi mana kawaska kanchu. Chasa kagpipas, nukanchi kikipura kuianakugpika, pai kikin, nukanchiwa sugllapimi ka. Chasa kuianakuspami nukanchi tukuipi allilla kawachinchí Taita Dius kuiag kagta. ¹³ Taita Dius, pai kikipura Ispiritutami nukanchita karamurka. Chasamandami iachanchi, parijuma nukanchiwa Taita Diuswa suglla kaugsai iukag niraiagta.

¹⁴ Kasapas. Nukanchi, kawaspa, sutipami willanchi: Taita Dius, kikipura wambratami kachamurka, kai alpamanda runakuna kispichigsamungapa. ¹⁵ Maikanpas willachukuna: “Jesús, Taita Diuspa wambrami ka”: chasa willagkunami parijuma Taita Diuswa suglla kaugsai iukag niraiankuna.

¹⁶ Chasapimi iuiaspa iachanchi, Taita Dius nukanchita kuiag kagta. Taita Diusmi ka sutipa suma kuiag. Kuianakuspa kaugsagkunami parijuma Taita Diuswa suglla kaugsai iukag niraiankuna.

¹⁷ Nukanchi, Taita Dius munaskasina tukuipi kuianakuspa kagpika, Jesucristosinami kai alpapi kaugsaspa kasunchi. Chasamandaka, justisiai puncha chaiamuura, mana manchaspallami kagrisunchi. ¹⁸ Taita Diuspa kuiaiwa kaugsanakuskapika, mana manchai tianchu. Tukuipi kuianakuspa kaugsaipika, manchaika anchurinmi. Manchaiwa kagkuna, justisiai tukungapami suianakú. Chasamanda maikanpas manchaiwa kaugsagkuna, manara tukuipi Taita Dius munaskasina kuianakuspa kaugsanakunchu.

¹⁹ Taita Dius nukanchita ñugpa kuiaskamandami nukanchitapas cháiá, kuianakuspa kaugsangapa. ²⁰ Maikanpas kikin nirichu: “Nuka, Taita Diusta kuianimi”; nigpika, waugkindita mana kuiachu: chika, sug llullami ka. Waugkindita allilla kawanakuspapas, mana kuiagpika, ¿imasasik mana kawaska Taita Diustaka kuianga? ²¹ Kikin Jesucristomi nukanchita kasa nirka: maikanpas Taita Diusta kuiagka iuanmi, chasalata waugkindikunata kuiaspa kaugsakunga.

5

Kai alpapi jiru munai i ruraikunata sakispa binsiskakunamanda

¹ ¿Iuiaringichichu, Jesús, Taita Dius agllaska Cristo kagta? Tuku chasa iuiarigkunami Taita Diuspa wambra tukugsamuska kanchi. Taitata kuiagka iuanmi, paipa wambratapas kuianga. ² Taita Diusta kuiaspa, pai ima niskata ruragkuna niraianni, Taita Diuspa wambrakunatapas kuiag kagtakuna. ³ Taita Diusta kuiangapa chaiakumi, pai ima niskata ruraspa kangapa. Chasa ruraspa kangapaka, pudiringasinallami ka.

⁴ Taita Diuspa wambra tukugsamuska, tukuikuna kai alpapi mana alli munai i ruraikunatami sakispa binsinchi. Jesuswa suma iuiariskawami chi mana alli munai i ruraikunata sakispa binsinchi. ⁵ Jesús Taita Diuspa wambra kagta suma iuiarigkunallami chi mana alli munai i ruraikunata sakispa binsinchi.

Taita Diuspa wambra kagta willagkunamanda

⁶ Jesucristo samuspa, iakuwami baugtisarirka. Nispaka, kruspi wañukuspa, paipa iawarwami kawachirka. Pai sutipa samuskata mana iakullawa kawachirkachu. Iakuwa i

iawarwapasmi kawachirka pai kikin samuska kagta, nukanchi iachangapa. Chita willag, kikin Santu Ispiritumi ka. Santu Ispiritu mana llullanchu. [7 Suma luarpika, kimsa willagkunami tiangkuna: Taita Dios, Diospa Rimai i Santu Ispiritu. Chi kimsandi, sugllami ka. ⁸ Kai alpapias chasallata] kimsa siñalkunami kawachirigsamurka: Santu Ispiritu, iaku i iawar. Tukui chi kimsandi, Jesucristo samuskamandami chasallata willankuna.

⁹ Runakuna ima kawaspa willaskatami chaskinchi. Nigpika, ¿imawantak Taita Dios paipa wambramanda willaskata mana chaskisunchi? ¹⁰ Maikanpas Taita Diospa wambrawa suma iuiarigkuna, kikinpa iuiaipimi chi willaita charinakú. Ikuti maikanpas mana Taita Dioswa iuiarigkunaka, Taita Diosmanda nigsinami kankuna: “Pai, llullami ka”. Taita Dios paipa wambramanda willaskata ña mana munankunachu uiangapa.

¹¹ Kasami Taita Dios willá: mana puchukariduru suma kaugsaitami nukanchita karamuska ka. Chi kaugsaita paipa wambrawami karamuska ka. ¹² Chiwa, maikanpas Taita Diospa wambrawa suglla iuiái chariraiag, chi kaugsaitapasmi iuká. Ikuti maikanpas mana Taita Diospa wambrawa suglla iuiái chariraiagpika, manima chi kaugsaita iukanchu.

Tukuchiskamanda

¹³ Nuka willaskata kachanakuikichitami, kamkuna kasa iachangapa: kamkuna Taita Diospa wambrawa suma iuiarigkuna, mana puchukariduru suma kaugsaitami iukangichi.

¹⁴ Taita Diosmandami kasa allilla iachanchi: pai imasa munaskasina nukanchi imapas mañagpika, pai mana piñarispallami nukanchita uiá. ¹⁵ Kasapasmi iachanchi: pai tukui nukanchi mañanakuskata allilla uiaqta; chimandami iachanchi, tukui nukanchi ima mañanakuskata karamungapa kagta.

¹⁶ Maikan waugki sug pandariska mana wañuima apai tukungapa pandarikuskata kawaspaka, Taita Diusta mañapuichi pasinsiachu. Chasapika Taita Dios kikin, pasinsiaspa, ikuti suma kaugsaitami paita karamunga. Mana wañuima apai tukungapa pandariikunamandami rimaikichita. Diltudupa wañuima apai tukungapa pandariipasmi tia. Chasa pandarigkunamanda, mana niikichitachu, Taita Diusta mañapungapa. ¹⁷ Tukui mana alli ruraikuna, pandariimi kankuna. Chasa kagpipas, mana wañuima apag pandariikunami tia.

¹⁸ Kasami iachanchi: maikanpas Taita Diospa wambra tukugsamuska kagkuna mana pandarispa kaugsankunachu. Paikunata, Taita Diospa wambra kikinmi chariku. Chimandami iaia kuku mana pudí, paikunata imapas ruranga.

¹⁹ Iachanchimi, nukanchi, Taita Diospakuna kagta. Ikuti tukui kai alpaka, iaia kukupa makipimi ka.

²⁰ Iachanchimi, Taita Diospa wambra samuska kagta i pai nukanchita suma alli iuiaita karamuska kagta; chiwanka, sutipa alli Taita Diusta rigsingapa. Nukanchi, sutipa alli Taita Dioswa i paipa wambra Jesucristowami suglla kaugsaita iukanchi. Paimi sutipa alli Diusllatata ka. Paimi ka mana puchukariduru suma kaugsaita karag.

²¹ Kuiaska wambrakuna, mana sakiringichi, sug rigcha dius niraiaskakunawa iuiangapa.

SAN JUAN ISKAIMA KARTA KACHASKAMANDA

¹ Nuka, Jesuswa tukuskapura iacha taita kaspera, Taita Dios agllaska mama panita i kamba wambrakunatami kai karta kachaikichita. Sutipami kamkunata suma kuiaikichita. Mana nukalla kuiaikichitachu. Sutipa Alli Willaita tukui rigsigkunapasmi kamkunata kuiankuna. ² Nukanchi sutipa Alli Willaita iuiapi charispami kamkunata kuiaikichita. Chi sutipa Alli Willaika, diltudupami nukanchiwa kangapa ka. ³ Taita Dios i Jesucristo, Taita Diospa wambra kaspera, kamkunamanda llakirispaspa, kamkunata kuiaspa, suma iuiaiwa kawapuachu; chasaka, sutipa Alli Willaita charispa, kuianakuspa kaugsangapa.

Sumaglla kikinpura kuianakuspa kaugsangapa iachachiskamanda

⁴ Kamba maikan wambrakuna, Taita Dios imasa niskasina sutipa Alli Willaita charispa, allilla kaugsanakugta kawaspaka, askurintimi alli iuiachiwarka. ⁵ Kunauraka, mama pani, mañaikimi, nukanchipura kuianakuspa kaugsangapa. Chasa niskawaka, musu mandaika mana niraiianchu. Chi mandaitaka kallariskauramandatami iukarkanchi. ⁶ Kuianakuika niraiianmi Taita Dios imasa niskasina ruraspaspa kaugsanakungapa. Kamkuna imasa ñugpamandata uiaskasina niraiaskata iukangichimi kuianakuspa kaugsanakunga.

Llullaspa iachachigkunamanda

⁷ Ikuti llullaspa iachachigkunaka, achkakunami kai alpapi purinakú. Paikunaka, llullaspa ninkunami: “Jesucristoka, aichaiug runa tukuspa mana kai alpama samurkachu”. Chasa nigkunaka, Cristomanda llullaspa, paita mana munagmi kankuna. ⁸ Kamkuna suma iuiaripuangichi, kamkuna alli ruraikunamanda apamunakuskata mana kichui tukungapa. Chasaka, Taita Dios ima karangapa kaskata, tukuimi chaskinkangichi.

⁹ Maikanpas Cristo ima iachachiskata sug rigchata ialigta iachachigkunaka, Taita Dioswa mana kankunachu. Ikuti Cristo ima iachachiskallata katigkunaka, Taita Dioswa i paipa wambrawapasmi suglasina kanchi. ¹⁰ Maikanpas kamkunapagma chaiagrispa, Cristo ima iachachiskallata mana iachachigpika, mana chaskingichi. Mana paita: “Puangi” ningichi. ¹¹ Maikanpas chi llullaspa iachachigkunata: “Puangi” nigpika, chi llullagkunawami tukugsamú.

Kaiakama, niskamanda

¹² Kamkunata achka ningapa iuiakuspapas, mana munaikichitachu iskribingapa. Chasapaka, iuiakunimi kamkunapagma chaiagrispa, ñawi ñawi rimanakungapa; chasaka, nukanchi tukuipi suma alli iuiachiwa kangapa.

¹³ Taita Dios agllaska kamba ñaña wambrakunapas, kamtami: “Puangi” ninakú.

SAN JUAN KIMSAMA KARTA KACHASKAMANDA

¹ Nuka, Jesuswa tukuskapura iacha taita kaspá, kuiaska waugki Gaiotami kai karta kachaiki. Kamta sutipami kuaiaiki.

Gaiota: "Allimi kangí" niskamanda

² Nukapa kuiaska, kasami Taita Diusta mañapuiki: imasami kamba almapi allilla ka: chasallata tukui imapipas allilla kachu; kamba kuirpupas, saludulla kachu. ³ Maikankuna Cristowa tukuskakuna, nukapagma chaiamuspaka, kammamandami willawarkakuna: kam, sutipa Alli Willaita mana sakispallasi kaugsakungi. Chasa uiaspaka, iapa allimi iuiachiwarka. ⁴ Nukapa wambrakunasina sutipa Alli Willaita mana sakispalla kaugsanakugta uiaspami tukuikunamanda mas alli iuiachiwá.

⁵ Nukapa kuiaska, iachanimi: kamka, sutipasi waugkindikunata allilla ruraspa kangí. Chasallata, mana rigsiskakunatapassi allilla ruraspa kaugsakungi. ⁶ Paikunaka, kambag-manda samuspami, kam ima paikunata suma kuiaskamanda, Cristowa tukuskakuna kaipi kaskakunata willagsamurkakuna. Taita Diusta kuntintachingapaka, kamka paikunata ima ministiska karapuangi. Chasaka, Diuspa Rimaíta willaspami puringakuna. ⁷ Paikunaka, Jesucristomandalla purigkuna kallarispa, Taita Diusta manara rigsiskunataka mana ñi ima chaskirkakunachu. ⁸ Chimandami nukanchi iukanchi, paikunata imapas karanga; chasaka paikuna, sutipa Alli Willaita willaspa puringapakuna.

Diótfes suti runa, mana allilla kaugsakuskamanda

⁹ Ñami kamba puiblupi Cristowa tukuskakunata karta kacharkani. Chasa kachagpipas, Diotrefeska, paikunata mandag tukuspaka, nukanchi ima kachaskata manima uangapa munarkachu. ¹⁰ Chimandami nuka, rispa, paita nigringapa kani: "¿Imapatak, wasa churaspa, nukanchimanda llullaspa, jiru rimaspa kangí?". Paika, unzaspalla manasi kuntintari. Maikan kainigmanda waugkikuna chima chaiagriskataka manasi allilla chaskí. Sug waugkikuna paikunata chaskinakuskataka manasi lisinsía chaskingapa. Nispaka, Cristowa tukuskakunawa kaskamandasi llugsichí.

¹¹ Nukapa kuiaska, jiru ruraspa kaugsakunata mana iachaikungi. Tukuipi sumaglla ruraspa kaugsakunatami iukangi iachaikunga. Maikan alli rurag, Taita Dioswami ka. Ikuti jiru ruragkunaka, mana Taita Diusta rigsiskunachu.

Demetrio suti runa, allilla ruraspa kaugsakuskamanda

¹² Waugki Demetriomandaka, tukuikunami allilla rimankuna. Pai, sutipa Alli Willaita uiaspa, katiraiaspami alli kagta kawachirí. Nukanchipas, pai alli kagtami willanchi. Kammi iachangi, nukanchi sutipa kaskata willagkuna kagta.

Kaiakama, niskamanda

¹³ Kamta achka ningapa iuiakuspapas, mana munaikichu iskribingapa. ¹⁴ Iuiakunimi, mana unailapi kamta kawagringapa. Chiurami ñawi ñawi rimanakusunchi.

¹⁵ Kam, sumaglla kapuangi. Tukui kamta rigsiskakunami, "Puangi" ninakú. Tukui nukanchi rigsiskakunataka, kam sug sugta: "Puangi" nipuangi.

SAN JUDAS KARTA KACHASKAMANDA

¹ Nuka, Jesucristopa lutrinsinami kani. Santiagopa waugkimi kani. Taita Dios kuiaspa agllaskakunatami kai karta kachaikichita. Kamkunaka, Jesucristowa wakachiskami kangichi. ² Taita Dios, kamkunamanda llakirispa, kamkunata kuiaspa, suma iuiaiwa kawapuachu.

Llullaspa iachachigkunamanda

³ Nukapa kuiaska taitakuna i mamakuna, iapami munakurkani, kamkunapa i nukanchipa kispiriimanda kamkunata willangapa. Chasa munakugpipas, kunaura chaiawakumi, kasa nispa mañangapa: Taita Dios, paipalla kagkunata sug biajilla paiwa iuiaringapa karamuskata, chi iuiaitaka mana sakiriichi kichui tukungapa. ⁴ Ñami maikanakunaka, llullachispa, nukanchipurapagpi iaikurirkakuna. Chi llullachigkunamandaka ñugpamanda willaraiaska librupi kasami niraiá: “Kikinkunami diltudupa ninama rinakú”. Chikunaka, nukanchipa Taita Diusta mana manhaspa, ninkunami: “Taita Dios, tukukunata sumami kuiá”. Chasa nispaka, paikuna imasa munaska jirukunata ruraspami kaugsankuna. Chasallata ninkunami, nukanchipa suglla mandag laia Jesucristo mana tiagta.

⁵ Kamkuna ña iachagpipas, ikuti kasami iuiachingapa munanakuikichita. Atun Taita Dioska, Ejipto alpamanda judiukunata llugsichispa, chiuramandaka mana paita uiagkunata puchukarka. ⁶ Chasallata maikan anjilkuna paikuna mandangapa churakamanda anchurigkunataka diltudupa mana llugsii amsa ukupi wataspami wichkarkakunata, ninama sitai atun puncha chaiankama. ⁷ Sodoma i Gomorra suti i chi ladu suiu puiblukunapi kaugsanakugpasmichi anjilkunasinallatata jiru rurarkakuna. Kari warmiwa maikanpas siririnakurka. Karipuralla i warmipuralla mana ruradirukunatapasmichi ruranakurka. Chikunaka, mana imaurapas wañudiru ninamami rirkakuna; chasa pasariskata iachaspaka, sugkunaka mana chasa ruraspaka kaugsanakuchu.

⁸ Chasa iachaspapas, chi llullaspa iachachigkunaka muskuipimi kawaska ninkuna. Nispaka, pai kikinkunapa kuirpupimi jiru millai ruraskawa jiru iuiachi kankuna. Iaia Jesusami wabutinkuna. Sug luarpi suma atun kagkunatapasmichi kaminkuna. ⁹ Ikuti atun anjil Miguelka, Moisés wañuska kuirputa iaia kukuwa parijuma kichunakuura, mana chi iaia kukuta kamirkachu. Chasapaka, nirkallami: “Kamtaka, atun Taita Dios iuiachispa justisichu”. ¹⁰ Ikuti chi runakunaka, mana rigsiskakunatami kaminakú. Mana juisiuspalla animalkunasina kaspaka, paikunapa iuiailawa imapas iachaskakunawami jiru ruranakú; chasaka, pai kikinkuna puchuringapa.

¹¹ ¡Ai, chasa ruragkuna, imachar pasangakuna! Paikunaka, Kain suti runa mana allilla ruraskata katichigsinami runanakú. Balaam suti runasina kulkita munaspallami pandarispa iuianakú. Imasami Koré suti runa, Moiesta kuntrakungamanda wañuchii tukurka: chasallatami paikunapas kuntranakú. ¹² Kamkuna kuianakuspa mikungapa sugllapi tandariskapi paikuna kagpika, iapa pingaipami ka. Chipika paikuna, mana manhaspalla, wiga jundachiringapagllami rinkuna. Paikunaka, ubijakunata suma kawagsina kangataka, kikinkunamandallami kuidarispa kankuna. Mana iakuuig puuiukuna awapi wairawa kasama chasama apai tukugsinami kankuna. Mikui muui pallangapa puncha chaiaura, chusa pangalla sachakunasinami kankuna. Iskai biaji angukunawanta surkuspa, wañuska sachakunasinami niraiankuna. ¹³ Imasami lamar iaku, rabiariarpa, ulaskunawa ispuma tukuska kuchuma sitá: chasallatami paikunapa pingaichingasina kawari ruranakú. Imasami istrillakuna, kikin ridiru ñambi chingá: chasami kankuna. Chasawaka, diltudupa iana tutapi kagringapami rinakú.

¹⁴ Taita Adanmanda kanchismanda kati Enok suti taita, Santu Ispirituwa chi runakunamanda kasami nirka:

Atun Taita Dios,

waranga waranga anjilkuna paipalla kagkunawa samukugtami kawarkani.

¹⁵ Tukui runakunata justisiangapami samuku.

Tukui pandarig paita mana manchagkunata, mana manhaspalla tukui jiru ruraskakunamanda i paimanda kamiriskakunamandapas, diltudupa ninama sitangapami samuku.

¹⁶ Chi runakunaka kankunami tukuimandapas jiru wasa rimadurkuna. Pai kikinkuna tukui ima munaskallata ruraspami kaugsankuna. Atun tukuspa, nuka alli kagtami nirinkuna. Pitapas: “Iapa allimi kangi” nispami kaugsanakú, kikinmandalla iuiarispa.

Cristowa kagkuna, imasa Diusmandalla kaugsai iukaskakunamanda

¹⁷ Ikuti kam kuiaska taitakuna i mamakunaka, nukanchipa Iaia Jesucristo kikin agllaska runakuna ima pasaringapa willaskata iuiariichi. ¹⁸ Kasami willanakurka:

Tukurii punchakuna chaimukuura,

Taita Diuspa kaskakunata unʒag runakunami tiangapa kankuna.

Mana paita iuiarispalla,

kikinkuna tukui ima munaskallata ruraspami kaugsangapa kankuna.

¹⁹ Chasakunami Cristowa tukuskakunata iskaima piñachirispá rurankuna. Kai alpapi tias-kakunallawami iuiarinkuna. Santu Ispiritutaka mana iukankunachu.

²⁰ Ikuti kam kuiaska taitakuna i mamakunaka, tukuipi iapa alli Cristowa suma iuiarispa, kam kikinpura alli suma iuiái iuiachinakuichi. Santu Ispirituwa Taita Diusta mañaichi.

²¹ Taita Dius kamkunata kuiakuskataka mana kungariichi. Nukanchipa Iaia Jesucristo, kamkunamanda llakirispá, mana puchukaridiru suma kaugsaita karankama suianakuichi.

²² Maikankunaka, Diuspa Rimaita: “¿Sutipa u mana sutipachar ka?” iuiagkunamanda llakirispá, allilla kaskama tigrachiichi. ²³ Sugkuna mana wañuduru ninapi urmagingapa rinakuskataka aisaspá llugsichigsina ruraichi. Sugkuna jiru ruragkunamandaka llakirispapas, paikunata manchaichi. Paikunapa jiru ruraiwa paikunapa churaridiru katangapas iapa mapaiachiskasinami kankuna.

Taita Diusta iapa suma atun kagta nispa, puchukariskamanda

²⁴ Taita Diusmi pudí, kamkunata wakachingapa; chasaka kamkuna, mana pandariipi urmaspa, ñi imapipas mana mapasina kaspa, iapa alli iuiachirispá, paipa askurinti suma ñawipi kawarigringapa. ²⁵ Nukanchipa Iaia Jesucristowa, nukanchita kispichig suglla Taita Diusta nisunchi:

—Kam, imaurapas tukuikunamanda mas suma atunmi kangi. Kammi kangi imaurapas tukuipi mandag i tukui pudig. Chasami karkangi. Chasami kangi. Chasallatami kangapa kangi, maituku waranga waranga watakuna ialigpipas. Chasa kachu.

JESUCRISTO, IMA SAN JUANTA KAWACHISKAMANDA

¹ Kasami Taita Dios, Jesucristota willarka; paika, imasa mana unailapi pasaringapa kagta paipa lutrinsinakunata kawachingapa. Paika, sug anjilta Juan suti paipa lutrinsinapagma kachamurka, Taita Dios willaskata kawachingapa. ² Nuka Juanka, tukui ima kawaskatami willani. Taita Diospa rimaita i kikin Jesucristo ima willaskata, tukuimi willani. ³ Maikanpas kai Santu Ispirituwa rimaikunata kawaspa i uiaspa ruragkunaka, Taita Diospa iapa kuiaskami kangapa kankuna. Chi punchakunaka, ñami chaiamungapa ka.

Jesuswa tukuskakuna kanchis puiblukunapi kaugsanakuskata willaskamanda

⁴ Nuka Juan, Jesuswa tukuskakuna Asia alpapi kanchis puiblukunapi kaugsanakuskata kai librutami kachaikichita. Taita Dios kamkunata kuiaspa, suma iuiiwa charipuachu. Paimi kunaura ka i ñugpata karka. Paillatami samungapa ka. Tukui kanchis ispiritupa paipa mandadiru ñugpa ladu kagkuna i Jesucristopas, chasallata kamkunata kuiaspa, suma iuiiwa charipuachu.

⁵ Jesucristo, sutipa tukuipi willagmi ka. Pai, wañuska kaspera, tukuikunamanda ñugpami kaugsarirka, mana mas wañungapa. Kai alpapi mandagkunata iaia mandagmi ka. Cristo, nukanchita iapa kuiaspami paipa iawarwa nukanchi pandariskakunata anchuchirka. ⁶ Paimi nukanchita agllarka, atun mandagkuna i sasirdutikuna kangapa; chiwanka, paipa Taita Dios ima niskata rurangapa. Cristota imaurapas nisunchi: “Tukuikunapa iaia mandag i suma atunmi kangi. Chasami kankangi, maituku waranga waranga watakuna ialgipipas. Chasa kachu”.

⁷ Cristo, puiupimi samungapa ka. Tukuikunami paita kawasunchi. Paita kruspi klabaspa wañuchigkunapasmi kawangapa kankuna. Paita kawaspaka, kai alpapi tukui runakunami, llakirispas, wakangapa kankuna. Ari, chasami kangapa ka.

⁸ “Nukami kani kallari i puchukag”; chasami tukui pudig atun Taita Dios ni. Paimi kunaura ka i ñugpata karka. Paillatami samungapa ka.

Jesucristo, askurinti punchalla kawariskamanda

⁹ Nuka Juan, kamkunawa waugkindimi kani. Kamkunasina iapa llakiiwami kani. Kamkunawa, Taita Dios suma mandakuskapimi nukapas kagringapa kani. Jesusmi nukanchita karamú, tukuipi paita mana sambaiaspalla katiraiangapa. Diospa Rimaita i Jesús ima willaskata nuka iachachikugmandami Patmos suti islapimi nuka wichkaraiarkani. ¹⁰ Dumingu, Iaia Jesusta iuiaridiru puncha, Santu Ispiritumi nukawa tukugsamurka. Chasawaka, muskui ukupisinami tukugsamurkani. Chiuraka, nukapa wasanigmada bututusina sinchi rimaimi uiariwarka. ¹¹ Kasami niwarka:

—Kam tukui ima kawaskata suma katichispa, librupi iskribingi. Nispaka, chi libruta kachangi Jesuswa tukuskakuna Asia alpapi kanchis puiblukunapi kaugsanakuskama: Efesoma, Esmirnama, Pergamoma, Tiatirama, Sardisma, Filadelfiama i Laodiseama.

¹² Chasa niwaura, nuka tigrarirkani kawangapa: ¿pitak chasa rimawaku? Tigrariuraka, kanchis kurita ruraska bila saiachidirukunami kawariwarka. ¹³ Chi bilakuna saianakuska chaugpipika, kawariwarkami sug runa saiakugsina. Paika, alpakama kusmasina churariska i kuri chumbisina pichupi chumbilliskami saiakurka. ¹⁴ Paipa uma i paipa agchakunaka, iura milmasina i sirinu puiusina askurinti iapa iurami karka. Paipa ñawi murukunaka, nina sindisinami karkakuna. ¹⁵ Paipa chakikunaka, sug iru brunsi lambuia-chiska puka ninapi rupachiskasinami iukarka. Paipa rimaika, achka iakukuna awamanda tallirispas rinakugsinami uiariwarka. ¹⁶ Paipa alli makipika, kanchis istrillami charikurka. Paipa simimandaka, puntiaska iskandima aflaska machitisinami llugsiraiarka. Paipa ñawika, indisina punchami karka.

¹⁷ Paita kawaspaka, nuka, paipa chakikunapi wañuskasinami urmarkani. Paika, alli maki churawaspa, kasa niwarka:

—Mana mancharikui. Nukami kani kallari i puchukag. ¹⁸ Diltudupami nuka kaugsani. Nuka, wañuspapas, ikitimi kaugsarirkani. Imaurapasmi kaugsaila kangapa kani, maituku waranga waranga watakuna ialgipipas. Nukami wañuipa llabi iukani, i wañuskakuna maipi kaskakunamandapas.

¹⁹ —Kasa librupi iskribingi: ñugpata kawarkangi: chita; kunaura kawakungi: chita; kunauramanda kawangapa kang: chitapas. ²⁰ Kam, kai kanchis istrillakuna nukapa alli makipi charikuskata i kai kanchis kurita ruraska bila saiachidirukunata kawakuspapas, mana iachangichu ima niraiagta. Willasaki. Kai kanchis istrillakunaka niraiankunami

kanchis igliriamanda anjilkuna. Kai kanchis bila saiachidirukunaka niraianmi chasallata chi kanchis iglisiakuna.

2

Jesuswa tukuskakuna Efesopi kaugsanakuskata willangapa kachaskamanda

¹ Jesuswa tukuskakuna Efeso puiblupi kaugsanakuskamanda anjilta kasa ningapa kachai.

Kanchis istrillakuna alli makipi charispa, kanchis kurita ruraska bila saiachidiru chaugpipi purispa kag, kasami ningapa kachaiki: ² kam tukui ima sinchi rurakuskata mana sambaiaspalla kagtami rigsiki. Jiru ruragkunataka mana awantangapa pudingchu. Paikuna, kikinkunamanda nirinkunami: “Jesús kachamuska runakunami kanchi”. Ikuti kamka, paikunata tapuchispa, rigsirkangimi llullakuna kagta. ³ Nukamanda kamba suma iuiaita mana sakispalla, iapa llakiikunami apakungi, mana sambaiaspalla.

⁴ Chasa kagpipas, imajchu iukaiki ninga. Kam, ñugpamanda nukawa kuiaitami sakikungi. ⁵ Iuiarii, imasami ñugpata karkangi. ¿Imapatak, allilla kaspaka, pandarikungi? Chi mana allilla ruraikunata sakii. Ñugpata imasami allilla rurakurkangi: chasallata kuna ramanda ikuti kallaringi rurangapa. Mana uiawagpika, nukaka, kambagma rispa, kamba bila saiachidiruta nuka maipi saiachiskamanda kichugsinami rurangapa kaiki; chika, kam pandariskakunata mana sakigpika.

⁶ Chasa kagpipas, kam chara kasa alli kagtami kawakuiki. Nikolaitas suti runakuna ima jiru ruranakuskatami mana munangi. Nukapasmi chasallata mana munanikunata.

⁷ Chasami Santu Ispíritu, Jesuswa tukuskakunata willaku. Paitaka, rinri iukagkuna uangichi. Mana alli ruraikunata binsigtaka kaugsa karadiru sachamanda mikuitami karangapa kani. Chika, Taita Diuspa paraíso suti suma alpapimi tia.

Jesuswa tukuskakuna Esmirnapa kaugsanakuskata willangapa kachaskamanda

⁸ Jesuswa tukuskakuna Esmirna puiblupi kaugsanakuskamanda anjilta kasa ningapa kachai.

Nukami kani kallarispa puchukag. Wañuspapas kaugsarirkanimi. Kasami ningapa kachaiki: ⁹ nuka iachanimi, kam iapa llakiikunawa kagta i ñi ima mana iukagta. Chasa kagpipas, niikimi: nukapa ñawipi iapa iukagsinami niraiapuangi. Nuka iachanimi, judíu sutchirigkunaka imasa kamta juchachinakugta. Chasa sutchirisppapas, mana sutipa judíu kankunachu. Iaia kukuwa iuiarispa tandaridiru wasisinami niraiankuna.

¹⁰ Mana mancharingi, kamta ima llakii chaiaggpipas. Iaia kukuka, maikankunata karsilpimi churachingapa ka. Chipimi rigsiringa, maikan nukawa u mana nukawa kagta. Chunga punchami chasa llakii iukangapa kangichi. Wañunkama nukallawa iuiakungi. Chasa nukallawa wañunkama iuiakugpika, llaugtusina kaugsaitami karasaki.

¹¹ Chasami Santu Ispíritu, Jesuswa tukuskakunata willaku. Paitaka, rinri iukagkuna uangichi. Mana alli ruraikunata binsigka, parisma wañuitaka* mana iukangapa kangichichu.

Jesuswa tukuskakuna Pergamopi kaugsanakuskata willangapa kachaskamanda

¹² Jesuswa tukuskakuna Pergamo puiblupi kaugsanakuskamanda anjilta kasa ningapa kachai.

Nuka, puntiaska iskandima afilaska machitisina iukag, kasami ningapa kachaiki: ¹³ kam maipi kaugsakuskatami iachani. Iaia kuku mandadiru kaskasinapimi kaugsakungi. Chasa kaugsakuspapas, nukamanda allilla iuiailapimi kaugsakungi. Antipas suti runa nukamanda mana sakispalla willagta kamkuna kaskapi wañuchii tukuura, chi punchakunapas kamkuna mana kungariwarkangichichu, chi iaia kukupa alpapisina kaugsanakuspapas.

¹⁴ Chasa kagpipas, imajchu iukaiki ninga. ¿Imapatak, Balaam suti ñugpamanda runa iachachiskata ruranakugpipas, chara awantakungi? Chi Balaammi Balak suti mandagta iachachirka, Israelmanda runakunata kasa pandachingapa: ianga diuskunata kamariku karaska aichata mikuchingapa i kari warmiwa pandachingapa. ¹⁵ Chasallata, nikolaitas suti runakuna imasa iachachiskasina kaugsanakugtapasmi awantakungi. Nuka, chasakunata mana munanichu. ¹⁶ Chasamandami niiki: allilla iuiarigsamui. Mana kagpika, nuka kikinmi kambagma utkalla risa, nukapa simimanda machitisina iukaskawa paikunata puchukangapa.

¹⁷ Chasami Santu Ispíritu, Jesuswa tukuskakunata willaku. Paitaka, rinri iukagkuna uangichi. Mana alli ruraikunata binsigtaka kai alpapi mana kawaridiru mikuitami†

* 2:11 Parisma wañuika niraianmi diltudupa rupakuska nina ukuma sitai tukungapa; chimandaka, mana mas llugsingapa. † 2:17 Chi mikui suti karka “maná”.

karangapa kani. Sug iura rumipasmi paita kuangapa kani. Chi iura rumipi, mana pipas rigsiska musu sutimi churangapa kani. Chi sutitaka, maikan chaskigllami iachangapa ka.

Jesuswa tukuskakuna Tiatirapi kaugsanakuskata willangapa kachaskamanda

¹⁸ Jesuswa tukuskakuna Tiatira puiblupi kaugsanakuskamanda anjilta kasa ningapa kachai.

Nuka, Taita Diospa wambra, nina sindisina ñawiiug, llambu brunsisina chakiug kaspas, kasami ningapa kachaiki: ¹⁹ kam tukui ima rurakuskatami iachani. Kam kuia-waspa, suma iuiawaspa, sugkunata allilla ruraspa mana sambaiaspallami kaugsakungi. Ñugpata rurai kallariskamandapas masmi kunauraka rurakungi. Chitapasmi iachani.

²⁰ Chasa kagpipas, imajchu iukaiki ninga. Jezabel suti warmitami sakingi iachachingapa. Chi warmika nirinmi: “Nuka, Santu Ispirituwami rimag kani”. Chasaka, nukapa lutrinsinakunatami pandachipuaku, kari warmiwa pandaringapa i ianga diuskunata kamariku karaska aichata mikungapa. ²¹ Chi warmitaka achka punchakunami suiakurkani, chi pandariikunata sakispa, Taita Dioswa tigramuntra. Chasa suiakugpipas, mana munanchu, chi karikunawa pandariikunata sakingapa. ²² Chimandami sinchi unguiwa kawitupi urmachingapa kani. Chi paiwa pandarigkuna mana chi pandariikunata sakigpikunaka, paikunatapasmu chasallata mas sinchi unguiu urmachingapa kani. ²³ Paipa wambra niraiaskakunatapasmu jiru unguiwa puchukangapa kani. Chasawaka, tukui Jesuswa tukuskakunaka iachangapami kankuna: nukaka, runakunapa maikuku pakalla ukupi iuianakugtapas pasagtami kawakuni. Chasallata, allilla ruraskata i mana allilla ruraskatapas imasa chaiaskasinami karangapa kaikichita.

²⁴ Kunauraka uiawaichi, Tiatira puiblupi mana chasa jiru ruraikunata katichigkuna. Chi sugkunaka ninkuna: “Iaia kukupa pipas mana iachaskata willaikunatami iachanchi”; chi llulla iachachigkunataka, kamkuna mana iachaikurkangichichu. Chimandami sug llasa ruraikunasina mana mingaikichita. ²⁵ Imasami allilla ruraspa kaugsanakungichi: chasalla kangichi, nuka samunkama. ²⁶ Mana alli ruraikunata binsig, wañunkama nuka ima munaskata ruraspa kaugsalpika, karasami, sug alpakanamanda runakunata pai mandag kangapa. ²⁷ Imasami alga mangata iru barawa pakichigsina rurá: chasami nukapa mandaiwaka chi runakunata rurangapa ka. ²⁸ Imasami nukapa Taita mandai karamuwaskawa iukani: chasallatami paipas mandangapa ka. Lusiru istrillatapasmi paita karangapa kani. ²⁹ Chasami Santu Ispiritu, Jesuswa tukuskakunata willaku. Paitaka, rinri iukagkuna uangichi.

3

Jesuswa tukuskakuna Sardispi kaugsanakuskata willangapa kachaskamanda

¹ Jesuswa tukuskakuna Sardis puiblupi kaugsanakuskamanda anjilta kasa ningapa kachai.

Nuka, Taita Diospa kanchis ispiritukunata i kanchis istrillakunata iukag, kasami ningapa kachaiki: kam tukui ima rurakuskatami iachani. Kasapasmi niiki: kammanda ninkuna: “Kaug sami kang i”. Chasa nigpipas, wañuskasinami kang i. ² Rigcharigsina tukugsamui. Wañungasina kaugsaita mas kaugsachii. Kam ima ruraskakunaka, nukapa Taita Diospa ñawipi manara allilla ruraska kagtami kawaiki. ³ Chimanda, kam ima uiaspa iachaikuskata allilla iuiarii. Chi iuiaikunata suma charirii. Tukui pandariikunata saki. Kam puñukugsina kagpika, nukaka sisaisinami mana willaspalla chaiangringapa kani. Kam mana iachangapa kangichu, imaura nuka kamta shachigsamungapa kagta.

⁴ Chasa kagpipas, Sardispi kamkunapura maillakunaka, mana katanga mapa churariskasinami kaugsanakungichi. Kamkunaka, iapa iura katanga churariskakunami nukawa puringapa kangichi, nukapa allikuna kagmanda. ⁵ Mana alli ruraikunata binsigkunaka, iapa iura katanga churariskami kangapa kangichi. Kamkunapa sutikunaka, kaugsangapa aglaskakunata willaraiaska librupimi ña tiapungichi. Chi sutikunataka mana imaurapas anchuchingapa kanichu. Kamkunamandaka nukapa Taitapa i anjilkunapa ñawipi willangapami kani: “Paikunata rigsini”. ⁶ Chasami Santu Ispiritu, Jesuswa tukuskakunata willaku. Paitaka, rinri iukagkuna uangichi.

Jesuswa tukuskakuna Filadelfiapi kaugsanakuskata willangapa kachaskamanda

⁷ Jesuswa tukuskakuna Filadelfia puiblupi kaugsanakuskamanda anjilta kasa ningapa kachai.

Nuka, tukupi sutipa alli, mana llullaspalla kag, ñugpamanda taita Davidpa llabita charikugmi kani. Chi llabiwa nuka ima paskaskataka, ñi pipas mana pudingapa kan-kunachu wichkangapa. Chasallata nuka ima wichkaskataka, mana ñi pipas pudingapa

kankunachu paskangapa. Kasami ningapa kachaiki: ⁸ kam tukui ima rurakuskatami iachani. Uiamui. Kamba ñugpa ladu sug pungusinami paskapurkaiki. Chitaka, ñi pipas mana wichkai pudingapa kankunachu. Kam, mana iapa iachai iukaspapas, nuka ima niskata mana piñarisipallami charirirkangi.

⁹ Uiamui. Iaia kukuwa iuiaripa tandariduru wasipi iaikugkuna, llullachispami ninakú: “Juduikunami kanchi”, mana sutipa juduikuna kaspapas. Paikunataka kaia-chingapami kani, kamba chaki ladu kunguringapa. Chipimi rigsingapa kankuna, nuka kamta kuiagta. ¹⁰ Kam nukapa rimaita mana sakispalla charirigmandami nuka sumaglla kispichingapa kaiki, kai alpapi tukui kaugsanakuskata iapa llakiikuna tukug-samuura. ¹¹ Nuka, mana unaillami samungapa kani. Kamba suma kaugsa i ruraita suma chariringi, mana kacharisipalla. Chasaka, kamba llaugtusina chaskingapa kaskata mana kichui tukunkangichu.

¹² Mana alli ruraikunata binsigtaka nukapa Taita Diospa atun wasipi pilartasinami saichingapa kani. Chimandaka, ñi imaurapas mana llugsichii tukungapa kanchu. Chipika, nukapa Taita Diospa sutita i nukapa Taita Diospa atun puiblupa sutitami churangapa kani. Chi puiblu niraianmi suma luarmanda musu Jerusalén. Nukapa Taita Diospa ñawimandami uraikumungapa ka. Nuka kikinpa musu sutitapasmu chipi churangapa kani. ¹³ Chasami Santu Ispiritu, Jesuswa tukuskakunata willaku. Paitaka, rinri iukagkuna uangichi.

Jesuswa tukuskakuna Laodiseapi kaugsanakuskata willangapa kachaskamanda

¹⁴ Jesuswa tukuskakuna Laodisea puiblupi kaugsanakuskamanda anjilta kasa ningapa kachai.

Nuka, tukuimanda mana llullaspalla sutipa kaskata willagmi kani. Nukawami Taita Dios tukui wiñachirka. Kasami ningapa kachaiki: ¹⁵ kam tukui ima rurakuskatami iachani. Kam mana kangichu nukawa ñi sugkunawa. Chasapika, rupasina ñi chirisina mana kangichu. ¡Amalai kantrangi suglla: rupasina u chirisina! ¹⁶ Kam rupasina u chirisina kangataka, kunusinallami kangi. Chasa nukapa simipi charikugsina kaskata kimgnsinami sitangapa kaiki.

¹⁷ Kam iuiakungimi: “Iapa iukagmi kani. Tukuimi iukani. Mana imapas pisiwanchu”. Chasa iuiakugpipas, ¿manachu iuiaringi imasa kam kikin kagta? Kam, achka llakiwa, katanga i ñi imapas mana iukagsinami kangi. Mana ñawi iukagsinapasmu kangi. ¹⁸ Chimandami nuka nintraiki: nukapa kuri ninapi suma rupachiskasinata randiwai. Chasaka, sutipa iukagmi niraiankangi. Iura katangasinata randiwai; chita katarispaka, pingai llatansina niraiaska mana kawaringapa. Ñawikunamanda ambisinatapas randiwai. Chi tallirispami allilla kawag niraiankangi. ¹⁹ Nukapa kuiaskakunatami iuiachispa, piñaspa, asutigsina ruraspa kuiani. Chasamanda, pandariikunata sakispa, rupasina nukawa tukui.

²⁰ Uiamui. Nukaka, pungu ladu saiarispami kaiakuiki. Maikanpas nukapa rimaita uia-waspa, punguta paskapuagpika, wasipisina paipa sungupi iaikupusami. Paiwa i nukawa sugllapi mikugsinami rurasunchi. ²¹ Imasami nuka kikin, mana allita binsispa, nuka kikinpa Taitapa mandadirupi paiwa sugllapi sumaglla tiarigrirkani: chasallatami maikan mana alli ruraikunata binsigta ningapa kani: “Nukapa mandadirupi nukawa sugllapi tiarigsamui”. ²² Chasami Santu Ispiritu, Jesuswa tukuskakunata willaku. Paitaka, rinri iukagkuna uangichi.

4

Suma luarpi, Taita Diusta iapa kuiaspa kungurinakuskamanda

¹ Chiuramandaka, sug pungu suma luarpi paskaraiaskatami kawarkani. Chi ñugpata bututusina uiariwagka niwarka:

—Kasama sikamui. Kawachingapami kaiki, kunaoramanda ima pasarangapa kagta.

² Chasa niwagllapika, Santu Ispiritumi nukawa tukugsamurka. Chasawaka, muskui ukupisinami tukugsamurkani. Suma luarpi kawarkani, sug mandag tiariduru tiagta. Chi mandadirupika, sugmi tiakurka. ³ Chi tiakugka, jaspe i kornalina suti rumikunasina iapa suma punchaichigsinami kawariwarka. Chi tiariduru muiundika, esmeralda punchaichikugsina kuichimi saiakurka.

⁴ Chi mandag tiariduru muiugtaka, iskaik chungu chusku tiaridirumi tiagta kawarkani. Chi tiaridurukunapika, iskaik chungu chusku iacha taitakunami tianakurka. Chi taitakunaka, suma iura katangakuna i umapika kuri llaugtukunasina churarispami tianakurka. ⁵ Chi mandag tiaridirupagmandaka, iapa manchangasina rilampa, triwinusina sinchi rimaipasmu uiarikugsamurka. Kanchis sindi michunkunami mandag tiariduru

ñugpa ladu rupanakurka. Chikuna, Diuspa kanchis ispiritukunami niraiarkakuna. ⁶ Atun kucha u bidriusina rigchapasmi chi tiaridiru ñugpa ladu kawariwarka.

Chi tiaridiru ukupi, chusku kuchukunapi tiarkami chusku animalsina rigcha kaug-sagkuna. Chikuna, tukuipi ñawilla jundami kawariwarkakuna. ⁷ Chi sug animalsina rigchakunamandaka, liunmi rigcha kawariwarka; iskaimaka, kari wagrassina rigcha; kimsamaka, runasina ñawiiug; chuskumaka, sug atun agila ña wairapi ataringasinami kawariwarka. ⁸ Chi tukui chusku animalsina rigchakunaka, sugta sugta alaskunami iukarkakuna. Tukui alaskunapika, iskandima ñawi murullami junda karkakuna. Tuta i puncha mana sakinkunachu, ikuti ikuti ninakungapa:

—Iapa alli, iapa alli, iapa alli,
tukui pudig atun Iaia Taita Dius.

Paimi ñugpata karka
i kunaurapas ka.

Paillatatami samungapa ka.

⁹ Chi chusku animalsina rigchakuna, diltudupa imaurapas kaugsaiwa mandag tiaridirupi tiakugta iapa suma allilla atuniachispa, “Pai Siñur” nispa kauraka, ¹⁰ chi iskai chungu chusku iacha taitakunaka, paipa chaki ladu kumurispami kungurinkuna. Nis-paka, paikunapa llaugtukunata tiaridiru ñugpa ladumi churankuna, kasa nispa:

¹¹ —Nukanchipa atun Taita Dius,

kammi iapa alli kangi,

iapa suma alli atuniachii tukuspa,

tukui pudig kangapa,

maituku waranga waranga watakuna ialigpipas.

Kammi tukui ima tiaska wiñachirkangi.

Kam munaskamandami

tukui ima wiñachiskapas tia.

5

Maituskapi iskribiraiaskamanda i ubijasina rigchamanda

¹ Chiuramandaka, chi tiaridirupi tiakugpa alli makipi sug maituskapi iskribiraiaskata charikugtami kawarkani. Ñugpa ladu i wasa ladu iskribiskami karka. Kanchis sillu prinsaskami karka. ² Sug anjil iapa pudigtapasmi kawarkani. Chi anjilka, sinchi rimaiwa kaparirka, kasa tapuspa:

—¿Pitak iapa alli kangichi, chi sillukunata pitichispa, iskribiraiaskata paskangapa?

³ Chiura sug luarpi, alpapi ñi alpa ukupi, ñi pipas mana alli tiarka, chi iskribiraiaskata paskaspa, ima niraiaskata kawaspa iachangapa. ⁴ Ñi pipas mana tiagmanta, nukata iapa wakaimi chaiawarka. ⁵ Chasa wakakuuraka, sug iacha taitaka niwarka:

—Mana wakakui. Kawai. Judá suti runapa iawarmanda liun kagsina, atun mandag Davidpa wambrakunapa wambrami binsigsamurka. Paimi, chi kanchis sillukunata pitichispa, iskribiraiaskata paskangapa ka.

⁶ Chiuraka, kasapasmi kawarkani: mandag tiaridiru chaugpipi, chi chusku animalsina rigchakunapa chaugpipi, chi iacha taitakuna kaskapi, chipika, sug Ubijasini saia-rigsamurka. Chi Ubijaka, wañuchingapa tugsiska kagsinami kawariwarka. Kanchis kachuiug, kanchis ñawi muruiugmi karka. Chikuna niraiami Taita Diuspa kanchis ispiritukunata kai tukui alpama pai kachamuska.

⁷ Chi Ubijaka, mandag tiaridirupi tiakugpagma kaillaiaspaka, paipa alli maki ladu charikuska iskribiraiaskatami chaskirka. ⁸ Chita chaskiuraka, chi chusku animalsina rigchakuna i iskai chungu chusku iacha taitakunaka, Ubijapa ñugpa ladu kumurispami kungurirkakuna. Chi tukuikunaka, sug sug arpa i suma asna kupal jundachiska kurita ruraska kupakunami charinakurka. Chi suma asna kupalkuna niraiami Taita Diuspalla kagkuna ima mañanakuska. ⁹ Kungurispaka, musu kantumi birsiarkakuna, kasa nispa:

—Kammi wañuchii tukurkangi.

Kamba iawarwaka,

tukui puiblukunanigmanda,

tukui alpakunanigmanda,

tukuinigmanda sug rigcha

sug rigcha rimaspa runakunatami

Taita Diusmanda randirkangi.

Chimandami kam kikin alli kangi,

chi iskribiraiaskata chaskispa,

prinsaska sillukunata pitichingapa.

¹⁰ Paikunatami nukanchipa Taita Diusmanda agllarkangi, mandagkuna i sasirdutikuna kangapa. Paikunami tukui alpapi mandangapa kankuna.

¹¹ Chiuramandaka, ikuti kasapasi kawarkani: mandag tiaridiru muiugta, chi chusku animalsina rigchakuna i chi iacha taitakunapa muiugtapas, iapa achka anjilkunatami uiarkani. Chi anjilkuna, iapa achka waranga warangami karkakuna. ¹² Paikunaka, sinchi rimaiwa ninakurka:

—Kam Taita Diuspa Ubija suti wañuchiimi tukurkangi.

Kamta chaiakumi

tukui pudiita,

tukui iukaita,

tukui iachaita

i tukui mandaita

kam iukangapa.

Kam, iapa sumami kang;

iapa allimi kang;

iapa atunmi kang.

¹³ Sug luarpi, kai alpapi, alpa ukuma i lamar iakupi, tukuipipas tukui ima tiaskakuna i tukui kaugsagkunapas ima ninakuskatami uiarkani. Taita Dius tiaridirupi tiakugta i paipa Ubija sutitapas kungurinakurka, kasa nispa:

—Ari, kam, imaurapas iapa suma alli atunmi kang.

Kammi imaurapas kang tukui pudig.

Chasami kamta ninakungapa kanchi,

maituku waranga waranga watakuna ialigpipas.

¹⁴ Chiura, chi chusku animalsina rigchakunaka nirkakuna:

—Chasa kachu.

Iacha taitakunapas, alpama kumurispas, paita kungurirkakuna.

6

Chi kanchis prinsaska sillukunata pitichiskamanda

¹ Taita Diuspa Ubija suti kanchis prinsaska sillukunamanda sug silluta pitichiskatami kawarkani. Chiuraka chi chusku animalsina rigchapura sugka, triwinu uiarigsina rimaiwa kaparirka, kasa nispa: “Samui”. ² Chasa kaparigllapika, sug iura kaballumi kawarigsamurka. Chipi tiakugka, flichadiru arkusmi charikurka. Paitaka sug llaughtumi churachirkakuna. Chasaka, binsidursinami llugsirka, ikuti ikuti binsiilla apakungapa.

³ Iskaima chi prinsaska silluta pitichiuraka, ikuti sug animalsina rigchata uiarkani, “Samui” kaparigta. ⁴ Chasa kaparigllapika, ikuti sug puka kaballumi llugsirigsamurka. Chipi tiakugtaka kacharkakunami, tukui kai alpapi runakunapura wañuchinakui tukungapa. Chasa rurangapaka, sug largu machitimi paita kuarkakuna.

⁵ Kimsama chi prinsaska silluta pitichiuraka, kimsama animalsina rigchata uiarkani, “Samui” kaparigta. Chasa kaparigllapika, iana kaballumi kawarigsamurka. Chipi tiakugka, libradirumi makipi charikurka. ⁶ Chiura, chi chusku animalsina rigchakunapa chaugpamanda kasa rimaimi uiariwarka:

—Iapa iarkai puncha chaiamugmanda, suglla kilu trigu, chisiagta puncha ganaska kulkimi balingapa ka. Kimsa kilu sidadapas, chasallatami balingapa ka. Ikuti asiti u binutaka mana wagllichingi.

⁷ Chuskuma chi prinsaska silluta pitichiuraka, chuskuma sug animalsina rigchata uiarkani, “Samui” kaparigta. ⁸ Chasa kaparigllapika, killu kaballumi llugsirigsamurka. Chipi tiakugka suti niraiarkami: “Wañui”. Paipa katika, ikuti sugka kati ladu tiakurka. Chi, sutimi niraiarka: “Wañuskakuna kadiru”. Paitaka lisinsia kuarka, kai alpapi tukui kaugsanakuska runakuna chuskuma partiriska kaskakunataka sug partita wañuchingapa. Wañuchinakuiwa, iarkaiwa, unguikunawa i sachukumanda jiru animalkunawami wañuchii tukungapa lisinsia kuarka.

⁹ Pichkama chi prinsaska silluta pitichiuraka, sug almakunatami altar ukuma kawarkani. Chi almakunaka, Diuspa Rimaita suma allilla willagkunamanda wañuchii tukuskami karkakuna. ¹⁰ Chikunaka, sinchimi kaparinakurka, kasa tapuspa:

–Tukui manduiug Taitiku, tukuipi mas alli kag, suma mandaiwa kag i sutipa ima niskata rurag, ¿imaurakamatak suiankangi, justisiai rurangapa? ¿Imauratak nukanchita wañuchiska iawar surkuskakunata alpapi kaugsagakunata randichipuankangi?

¹¹ Chiuraka, chi tukuikunata sug sug iapa iura katangami iukachirkakunata, kasa nispa:

–Chara sug ratu suiariichi. Kamkunapa waugki i panikunami chara pisinakú. Paikunapas kamkunasinallata Cristomanda wañuchii tukuspa samunkama suiariichi.

¹² Sugtama chi prinsaska silluta pitichiuraka, nuka kawarkanimi, tukui alpa timburig-samugta. Indi punchaiaika, iana tutami tukugsamurka. Killa punchaiaika, iawarllami kawarig tukugsamurka. ¹³ Istrillakunaka, awanigmanda kai alpama urmamurkakuna; imasami igus sacha iapa sinchi wairawa chabsirispa llullu mikuikuna susurinkuna: chasa. ¹⁴ Awa ladupas, sug papil maituriskasinami tukugsamurka. Tukui atun filukuna i islakuna pariju, sugsinamami ialichii tukurkakuna. ¹⁵ Chasa kawaspaka, kai alpapi atun mandagkuna i kati mandagkuna, suldaduta atun mandagkuna, iapa iukagkuna i iapa pudigkuna, patrunkuna i lutrinkunapas, tukui runakunaka maipi pusukuna kawariska i piñakunanigtami mitikuspa pakakugrirkakuna, ¹⁶ kasa nispa:

–Filukuna i awa rumikuna, nukanchipa awa urmagsamuichi. Pakawaichi, chi mandag tiaridirupi tiakug mana nukanchita kawangapa, chi Ubija sutika nukanchiwa rabiarispa llakii iukagmanda. ¹⁷ Paikuna askurinti rabiarispa llakii punchami chaimurka. Chasataka, ¿pisik pudinga kispiringapa?

7

Israelpa iawar iukaskakunata agllaskakunamanda

¹ Chiuramandaka, ikutimi kawarkani: chusku anjilkuna, kai alpapi saianakuspa, chusku ladunigmanda waira chaianakuskatami arkanakurka, alpapi, lamar iakupi ñi ima sachapi mana waira chaimungapa. ² Sug anjiltapasmi kawarkani. Chi anjilka, indi llugsidirunigmanda samuspa, kaugsag Taita Diospa prinsadiru sillutami charikurka. Ikuti sug chusku anjilkunapasmi karkakuna; paikuna, alpata i lamar iakuta waglichingapa kachamui tukuskakuna. ³ Prinsadiru silluta charikug anjilka, paikunata sinchi kaparig-samurka, kasa nispa:

–Alpata, lamar iakuta ñi sachakunata manara waglichingichi, nukanchipa Taita Diospa lutrinsinakunata printipi sillu churankama.

⁴ Chiuramandaka uiarkani maitukukuna silluwa prinsai tukugtakuna: patsa chusku chungu chusku waranga. Chi tukui runakunapa ñugpamanda kallari achala taita, Israelmi suti karka.

⁵ Judá suti runapa wambrakunapa wambrakunataka, chungu iskai warangasi silluwa prinsai tukurkakuna.

Rubén suti runapa wambrakunapa wambrakunataka, chungu iskai waranga chasallata.

Gad suti runapa wambrakunapa wambrakunataka, chungu iskai waranga chasallata.

⁶ Aser suti runapa wambrakunapa wambrakunataka, chungu iskai waranga chasallata.

Neftalí suti runapa wambrakunapa wambrakunataka, chungu iskai waranga chasallata.

Manasés suti runapa wambrakunapa wambrakunataka, chungu iskai waranga chasallata.

⁷ Simeón suti runapa wambrakunapa wambrakunataka, chungu iskai waranga chasallata.

Leví suti runapa wambrakunapa wambrakunataka, chungu iskai waranga chasallata.

Isakar suti runapa wambrakunapa wambrakunataka, chungu iskai waranga chasallata.

⁸ Zabulón suti runapa wambrakunapa wambrakunataka, chungu iskai waranga chasallata.

José suti runapa wambrakunapa wambrakunataka, chungu iskai waranga chasallata.

Benjamín suti runapa wambrakunapa wambrakunataka, chungu iskai waranga chasallata silluwa prinsai tukurkakuna.

Iapa achkakuna, iura katanga churariska kawariskamanda

⁹ Chiuramandaka, mana pipas kuintai pudingasina iapa achka runakunatami kawarkani. Chi runakuna karkakunami tukui alpanigmanda i tukui puiblukunanigmanda. Tukuinigmanda sug rigcha sug rigcha rimaspami karkakuna. Taita Dios kikin mandag tiaridiru ñugpa ladu i paipa Ubijapa ñugpa ladumi saianakurka, iura katangakuna churariska i ramuskuna charispa. ¹⁰ Chi runakunaka, sinchi kaparispa, ninakurka:

–Nukanchipa Taita Dios, mandag tiaridirupi tiakug i paipa Ubija sutimi nukanchita kispichig kangí.

¹¹ Iacha taitakuna i chi chusku animalsina rigchakuna, mandag tiaridiru ladupimi karkakuna. Tukui anjilkuna, paikuna kaskapi i tiaridiru muiugtami saianakurka. Nispaka,

chi tiariduru ñugpa ladu alpama kumurispa, nukanchipa Taita Diusta kungurirkakuna,
¹² kasa nispa:

—Kasa kachu.

Kam, imaurapas iapa suma alli atunmi kangi.

Imaurapas kamta:

Pai Siñurmi ninchi.

Kammi imaurapas kangi

tukui iachag,

tukui pudig

i tukui mandag.

Chasami kamta ninakungapa kanchi,

maituku waranga waranga watakuna ialigpipas.

Chasa kachu.

¹³ Chipi kag sug iacha taitaka tapuwarka, kasa nispa:

—Chi iura katanga churariskakuna, ¿pikunatak kankuna? ¿Maimandata samurkakuna?

¹⁴ Nukaka ainirkani:

—Kam kikin taitami iachapuangi.

Chasa ainiura, paika niwarka:

—Paikuna, iapa achka llakii pasaskami kankuna.

Paikunapa katangakuna,

Taita Diospa Ubijapa iawarpimi tagsaspa,

iuraiachirkakuna.

¹⁵ Chasamandami Taita Dios mandag tiariduru ñugpa ladu kagsamunkuna.

Tuta i puncha, paipa atun wasipi pai ima niskata ruragmi kankuna.

Taita Dios mandadirupi tiakug kikinmi suma kawangapa kankunata.

¹⁶ Mana iarkai ñi iakunaiai

paikuna iukangapa kankunachu.

Indi rupai ñi sug rigcha rupaikunapas,

paikuna mana tantiangapa kankunachu.

¹⁷ Taita Diospa Ubija suti mandag tiaridirupa ñugpa ladu saiakugpasmi suma kawangapa kankunata.

Iaku ñawikunamami

paikunata pusangapa ka,

chipi upiaspa, sumaglla kaugsai iukangapa.

Taita Diospas,

paikunapa tukui wikitami

ñawimanda tustachingapa kankunata.

8

Kurita ruraska kusnichingapa churadirumanda

¹ Taita Diospa Ubija suti kanchisma chi prinsaska silluta pitichiuraka, chaugpi urasinami sug luarpi upallagsamurka. ² Chiuramandaka kanchis anjilkuna, Taita Diospa ñugpa ladu saianakugtami kawarkani. Tukui kanchiskunata sug sug bututusinami kuarkakunata.

³ Chiuramanda sug anjilka, altar ñugpa ladumi saiarigsamurka, kurita ruraska kusnichingapa churadiruta chaririska. Paitaka achka suma asna kupalmi kuarkakuna; chiwanka, Taita Diosmandalla kaugsagkuna ima mañanakuskawa kurita ruraska altarpi chapuchispa kusnichingapa. Chi altar, mandag tiariduru ñugpa ladumi saiachiska ka.

⁴ Chasapika, suma asna kusnikunaka, anjilpa makimanda atarispas, chi suma mañanakuskawa sugllapi chapurispa, Taita Diospa ñawipi chaiagrirka. ⁵ Chiuramanda chi anjilka, altarpi rupakuska ninata apispa, kusnichingapa churadirupi jundachispaka, kai alpama sitamurka. Chi nina kilimsakuna alpama sitamuraka, iapa sinchi rimai i triwinu uiarispa, rilampa kawarispa, alpami timbugsamurka.

Kanchis bututusinata pukuskakunamanda

⁶ Chi kanchis anjilkunaka allichirirkakunami, bututusinata pukungapa. ⁷ Sug anjilka pukurka. Pukugllapi, granisu i nina iawarwa chapurisipami kai alpama urmagsamurka. Chasawaka, kai alpa kimsama partiriska kaskata sug parti sachakuna i birdi ugsawantami rupagsamurka.

⁸ Iskaima anjilka pukurka. Pukugllapi, atun luma filu ninalla sindisinaka lamar iakuma sitai tukurka. Chasawaka, lamar iaku kimsama partiriska kaskata sug parti pai iawarllami

tukugsamurka. ⁹ Chasapika, chi kuchapi kaugsag animalkuna kimsama partiriska kaskata sug partimi wañurkakuna. Chipi kaska barkukunapas, chasallatami puchukarirkakuna.

¹⁰ Kimsama anjilka pukurka. Pukugllapi, sug atun istrilla nina sindisinami awamanda urmagsamurka. Iakukuna i iaku ñawikuna kimsama partiriska kaskata sug partipimi urmagsamurka. ¹¹ Chi istrilla suti kanmi “Winja”. Chi istrilla urmagsamuskawaka, chi sug parti tukui iakumi winjaiagsamurka. Iapa achka runakunami, chi winjaiaska iaku upiaspa, wañurkakuna.

¹² Chuskuma anjilka pukurka. Pukugllapi, indi, killa i istrillakuna kimsama partiriska kaskata sug partimi wagllichii tukugsamurkakuna. Chasawaka, chitukullatata paikunapa punchaiaika tutaiagsamurka. Puncha i tutapas chasallata sug parti iapa tutaiarka.

¹³ Chiuramandaka, sug agila iapa awapi bulakuskatami kawaspa uiarkani. Chi agilaka, sinchi rimaspami kaparigsamurka, kasa nispa:

—¡Ai ai ai, apai alpapi kaugsagkuna, imachar pasangakuna, kai sug kimsa anjilkuna bututusinata pukura!

9

¹ Pichkama anjilka pukurka. Pukugllapi, sug istrillasina kawari awamanda kai alpama urmaskatami kawarkani. Chi istrillasinatata kai alpa ukunigmanda pusupa pungumanda llabitami kuarkakuna. ² Chi pusuta paskagsamuuraka, sug asukurinti atun kusnimi llugsigsamurka. Chi kusniwaka indi i wairata iapami amsaiachirka.

³ Chi kusnimandaka, langosta suti atun chapulinkunasinami kai alpapi tukuima chapurigsamurka. Paikunata kuarka, kai alpamanda alakrankunasina tugsispa wagllichingapa. ⁴ Paikunata nirka:

—Kai alpapi tiaska ugsakunata, waskakunata i sachakunata mana wagllichingichi. Mai-kan runa Taita Diospa prinsaska sillu printipi mana iukaskakunallata tugsispa nanachingichi.

⁵ Chi langostakunataka mana chi runakunata wañuchingapa lisinsia kuarkakunatachu. Pichka killapa mana awantangasina nanachingapagllami niraiarkakunata; imasami alakran, tugsispa, runakunata mana awantangasina nanachi: chasa. ⁶ Chi punchakunaka, runakuna wañungapa maskanakugpipas, mana pudingapa kankunachu wañui taringapa. Ari, wañungapa munanakugpipas, wañui mana chaimungapa kankunatachu.

⁷ Chi langostakunaka rigchawarkakunami kaballukuna wañuchinakuima ña ringapa kagsina. Paikunapa umapika, kuri llaugtu churaraiaaskasinami rigchawarkakuna. Paikunapa ñawika, runakunapasinami rigchawarkakuna. ⁸ Paikunapa agchaka, warmikunapa agchasinami rigchawarka. Kirukunaka, liunpasinami rigchawarka. ⁹ Paikunapa pichupika, iruta ruraska katangasinami kataraiarkakuna. Alaskuna kuiuchiuraka, achka kaballu aliudiru augtukuna wañuchinakuima kalpanakugsinami uariwagsamurka. ¹⁰ Chupakunaka, alakran tugsidiruiug kagsinami rigchawarkakuna; chikunawaka, pichka killa runakunata mana awantangasina nanachiikuna rurangapa. ¹¹ Paikunata mandagka, alpa ukumanda iaia anjilmi ka. Paipa sutika, hebreo rimaiwami ka “Abadón”. Griego rimaiwaka, Apolionmi suti ka. (Chi sutikuna, llakichispa puchukagmi niraiá.)

¹² Ñugpa llakii, ñami ialirka. Charami iskai llakii pisiku.

¹³ Chiuramanda, kasami kawarkani. Sugtama anjilka, bututusinata pukurka. Pukugllapi, Taita Diospa ñugpa ladu kurita ruraska altar saiakuska chusku ladunigmandaka * sug rimaitami uiarkani. ¹⁴ Chi rimaika, sugtama anjilta nirka:

—Chusku anjilkuna Eufates suti atun iaku patapi wataraiaskakunata kacharigrii.

¹⁵ Chiuraka, chi chusku anjilkunata kacharigrirka. Paikunami allichiriska suianakurka, ima ura, ima puncha, ima killa, ima wata chaimunkama, runakuna kimsama partiriska kaskakunataka sug partita puchukangapa. ¹⁶ Chi anjilkunapa kaballupi tiarig suldadukunaka, iskai patsa waranga warangasi karkakuna. Chasami uiarkani.

¹⁷ Nukapa muskui ukupisinaka, kasami kaballukuna i chikunapi tianakuskata kawarkani. Tianakuskapa pichupika, nina sindisina puka, asul i asufrisina killu rigcha iruta ruraska katangasinami kataraiarkakuna. Kaballukunapa umaka, liunpa umasinami rigchawarkakuna. Paikunapa simimandaka, asufri nina kusnimi llugsikurka. ¹⁸ Runakuna kimsama partiriska kaskata sug parti, chi kimsa llakiikunawami wañurkakuna. Chi kaballukunapa simimanda asufri nina kusni sitanakuskawami wañurkakuna. ¹⁹ Chi kaballukunaka, simiwa i chupawapasmu wañuchii pudirkakuna. Chupakunaka, kulibrasina umaiugmi karkakuna; chiwanka, runakunata tugsingapa.

* 9:13 u “ladu kachumanda”.

²⁰ Chi llakichiikunawa wañuskakunata kawasapapas, kaugsa kidagkunaka, paikunapa jiru ruraikunata mana sakirkakunachu. Kuku wairakunata, ñi kurita, kulcita, brun-sita, rumita i kaspita ruraska diuskunatapas mana sakirkakunachu muchangapa; chi ianga diuskuna, kawangapa, uangapa ñi puringapa mana pudinkunachu. ²¹ Chasallata wañuchii, jiru iacha pukui, kari warmiwa pandarii ñi sisaipas mana sakirkakunachu. Chiwanka, Taita Dioswa mana tigrarkakuna.

10

Uchulla maituskapi iskribiraiaskata, San Juan mikuskamanda

¹ Chiuramandaka, kasami kawarkani. Sug iapa iacha anjil puiiwa maituriskami sug luarmanda uraikumukurka. Paipa umapika, kuichisinami muiuchiraiarka. Paipa ñawika, indisinami puncha karka. Paipa chakikunaka, puka nina pilarkunasinami karka. ² Paipa makipika, uchulla maituskapi iskribiraiaska paskaskatami charikurka. Chi anjilka, alli chakita lamar iakupimi churarka. Lluki chakitaka alpamami sarurka. ³ Nispaka, liun sinchi kaparigsinami kaparigsamurka. Chasa kaparigllapika, kanchis triwinukunapasmu sugllapi ainichirkakuna. ⁴ Nuka chi kanchis triwinukuna ima ainichiskata iskribingapa ña kauraka, suma luarnigmanda rimai kasami niwarka:

—Kanchis triwinukuna ima ainichiskata mana iskribii. Chasaka, ñi pipas mana iachangachu.

⁵ Chi nuka kawakuska lamar iakupi i alpapi saiakug anjilka, alli maki awasinama atarichirka, ⁶ kasa nispa:

—Diltudupa imaurapas kaugsag, sug luar, alpa luar, lamar iaku i tukui ima chikunapi tiaskakunata wiñachigmi kawaku. Kasami paipa ñawipi nini: mana mas suiiai tiangapa kanchu.

⁷ Kanchisma anjil bututusinata pukungapa kaura, Taita Dios ima iuiaskata timpumi ruraska karka, imasa pai kikinpa Ispirituwa rimaspa lutrinsinakunata willaskasina. Chitaka pakaskasinami karka, ñi pipas mana ñugpa iachangapa.

⁸ Chi suma luarnigmanda rimawagka ikuti kasami niwarka:

—Chi anjil lamar iakupi i alpapi saiakugpagma kaillaiagrii. Chi uchulla maituskapi iskribiraiaska makipi paskaska charikuskata chaskigrii.

⁹ Chiuraka, chi anjilpagma rispa, nigrirkani:

—Chi uchulla maituskapi iskribiraiaskata kuawai.

Chiura, kuawaspa niwarka:

—Kam mikui. Kamba simipi dusesina miski mikurigpipas, kamba wigsa ukumaka winjallami iuiachingapa ka.

¹⁰ Chi iskribiraiaskata anjilpa makimanda chaskispaka, mikurkani. Nukapa simipi, dusesina miskimi mikuriwarka. Mikui puchukaskauramandaka, wigsa ukuma iapa winjallami iuiachiwagsamurka. ¹¹ Chiuramandaka niwarkakuna:

—Ikutimi kamta chaiaku, achka puiblukunapi kaugsanakuskamanda, achka alpakunamanda, sug rigcha sug rigcha rimai iukaskakunamanda i achka mandagkunamandapas Santu Ispiritupa iuiaiwa willagringapa.

11

Diusmanda iskai willagkunamanda

¹ Chiuramandaka, tupudiru pukungasinami kuawarkakuna, kasa niwaspa:

—Atarii. Diuspa atun wasi altarwanta tupugrii. Maituku chi ukupi kunguriska tiagkunatapas kuintangii. ² Ikuti chi atun kanchataka sakingi, mana tupuspalla. Chi kanchaka, mana Taita Diusta uiagkunamandami sakiska ka. Paikunaka, chusku chungu iskai killami Taita Diuspalla kaska puibluta apuntadu sarunakungapa ka. ³ Nukamanda iskai willagkunatami chima kachangapa kani. Paikunaka, wañuskasinamanda iana katanga churarispa, nukapa Ispirituwami chipi rimapuungapa kankuna, chi waranga iskai patsa sugta chungu punchakuna.

⁴ —Chi iskai nuka kachaskakunaka, kai alpata mandag atun Taita Diuspa ñawipika iskai olivos suti sacha i iskai bila saiachiduru, paikunallatatami niraiankuna. ⁵ Maikanpas paikunata mana alli rurangapa munanakuskata, nina sindimi paikunapa simimanda pukungapa kankunata, chi mana munagkunata diltudupa puchukangapa. Chasami maikanpas paikunata jiru rurangapa munanakug puchukaringapa kankuna. ⁶ Chi iskandi Santu Ispirituwa rimagkunaka pudingapami kankuna, tamiatapas arkachingapa; chasaka, mana chi punchakuna tamiangapa. Chasallatami pudingapa kankuna, iakukunatapas: “Iawar tukugsamui” ningapa i, masa biajikunapas paikuna imasa munaskasina, kai alpamanda runakunata sug rigcha sug rigcha llakichingapapas.

⁷ —Paikuna chasa willaita puchukaskauramandaka, sug iapa manchangasina atun kukuka, alpa ukunigmanda llugsirispa, paikunata makaipi binsispami wañuchingapa ka. ⁸ Wañuchii tukuskakunapa kuirpukunataka atun kaska puiblupimi sitaspa sakingapa kankuna. Chi puiblupi mana allilla ruraspa kaugsanakuskamanda, Iaia Jesuswa suma iuiarigkuna sutichinchimi: “Sodoma” u “Ejipto”. Chi puibullupitami Iaia Jesús kruspi klubai tukurka. ⁹ Chasa pasariuraka, tukui sug puiblukunanigmanda i alpakananigmanda, tukuinigmanda sug rigcha sug rigcha rimagkunapasmi chi sitaska kuirpukunata kawangapa kankuna. Kimsa puncha i chaugpimi mana pambaspalla kanchapi sakingapa kankuna. ¹⁰ Paikuna wañugsamugmandaka, kai alpapi kaugsanakugka, sumaglla kuntintarispa, paipura paipura sugma sugma iukachiriikunami ruranakungapa kankuna, kasa nispa: “¡Achalai! Chi iskandi Santu Ispirituwa rimagkuna ñami wañurkakuna. Paikunami nukanchita iapa imapipas piñaspa iacharkakuna kanga”.

¹¹ Chi kimsa puncha i chaugpi ialiskauramandaka, kasami kawarkani: chi iskandikunapa kuirpupika, Taita Diospa samaiwami kaugsachirkakunata. Chiwanka, ikutimi saiarispa purii kallarrirkakuna. Chipi tukui kawanakugtaka askurintimi manchachirkakuna. ¹² Chi iskandikunaka, suma luarnigmanda sinchi rimaitami uiarkakuna: “Kasama sikamui” nigta. Chiuraka, suma luarmami puiupi sikarkakuna, paikunata mana munagkuna kawanakugllapi.

¹³ Paikuna sikagllapika, alpami timbugsamurka. Chiwanka, chi atun puibluta chungama pitichigsina niipa, sug piti chi atun puiblu kaskaka puchukarigtami urmarka. Chipika, kanchis waranga runakunami wañurkakuna. Ikuti sugkunaka kaugsa kidagkunaka, askurinti mancharispa, Taita Dios suma luarpi tiagtami dimanchai kungurispa, nirkakuna: “Kam, iapa suma atunmi kangi”.

¹⁴ Iskaima llakii ñami ialirka. Ñallami kimsama samungapa ka.

Kanchisma bututusinata pukuskamanda

¹⁵ Kanchisma anjilka, bututusinata pukurka. Pukugllapi, sinchi rimaikunami suma luarmanda uiarirka, kasa nispa:

—Tukui alpapi mandai tiagkuna, nukanchipa atun Taita Diospa i pai agllaska Cristopami tukugsamurka. Ari, mana tukurii punchakunapimi mandangapa ka, maituku waranga waranga watakuna ialigpipas.

¹⁶ Chiwanka chi iskai chungu chusku iacha taitakuna Taita Diospa ñawi ladu mandadirupi tianakugka, suma kumurispa, paita kungurirkakuna, ¹⁷ kasa nispa:

—Kam tukui pudig atun Taita Diusta:

Pai Siñurmi ninchi.

Kammi kunaora kangi

i ñugpamandata karkangi.

Kam kikinpa iapa iachaiwami

tukuita suma mandaiwa kallarrirkangi.

¹⁸ Tukui alpapi kaugsanakugka,

kamwami rabiariska kankuna.

Chi rabiariskakunamanda,

ñami kamba puncha chaiamurka,

paikunatapas rabiallowanta randichingapa;

chasallata, wañuskakunatapas justisiala rurangapa.

Ikuti kamba lutrinsinakunata,

kamba Ispirituwa rimagkunata,

kammandalla kaugsagkunata

i atun u uchulla kaskakunatapas,

tukui kamta sumaglla kuiaspa manchaiwa kaskakunataka

sumagllami karangapa kangi.

Alpapi tukui wagllichigkunatapas

chasallatami paikunata randichingapa kangi.

¹⁹ Chiura Diospa atun wasi suma luarpi tiaskaka, pungu paskaskasinami kawariwarka. Taita Dioswa runakunawa iuiarinakuska suti baultami chi ukupi kawariwarka. Chasa kawariwauraka, rilampa kawarispa, iapa sinchi rimai i triwinusina uiarispa, alpa timburispa, iapa granisumi urmagsamurka.

12

Warmi indisina puncha katanga churariska i amaran kukumanda

¹ Chiuramandaka, sug ajai iapa atun siñalmi awapi kawariwagsamurka. Chipika, sug warmi indisina puncha katanga churariska, killa awallami saiakurka. Paipa umapika,

chunga iskai istrillaiug llaughtusinami muiuchiraiarka. ² Chi warmika, wambrituwa unguringapami karka. Ajaimi kaparikurka, nanai apikugmanda.

³ Sug siñalpasmi awapi kawarigsamurka: sug nina pukasina ajai atun amarus kuku, kanchis umaiug i chungacha kachuiug. Tukui kanchis umapi, sug sug llaughtusinami churaraiaarka. ⁴ Chi amarus kukuka, awapi tiaska istrillakuna kimsama partiriska kaskakunataka sug partita paipa chupawa aliuspami kai alpama bulachimurka. Chi amarus kukuka, chi ungug warmipa ñugpa ladumi saiarigsamurka, wawa tiagsamugllapi, mikungapa.

⁵ Chi warmika, kari wambra iukagsamurka. Chi wambra niraiarkami tukui alpamanda runakunata iru barawa iapa mandag kangapa. Chi wawataka tiakug Taita Diuspa mandag tiaridirumami aparkakuna. ⁶ Chi warmika, Taita Dius agllaska chusa sitaska alpa luarmami mitikurka; chipika, waranga iskai patsa sugta chungacha puncha paitaka mikui karakungapa.

⁷ Chiuramandaka, sug luarpi makanakuimi tiarka. Atun anjil, Miguel suti, paipa anjilkunawa, amarus kuku i amaruspa anjilkunawapasmi makanakurka. Chi amaruska, paipa anjilkunawanta ⁸ mana pudirkakunachu bingsingapa. Chasaka, mana mas pudirkakunachu, sug luarpi kaugsangapa. ⁹ Chasapika, chi iapa atun amarus kuku, kai alpamami sitamui tukurka. Chi amaruska niraianmi unai ñugpamanda kuku kulibra, tukui kai alpamanda runakunata llullachig, Diablu u Satanás suti iaia kuku. Paita i tukui paipa anjilkunawantami kai alpama sitamui tukurkakuna.

¹⁰ Chiuraka, suma luarpi, kasami sinchi kaparii uiariwarka:

—Ñami nukanchita kispichii puncha chaiamurka.

Taita Diuspa iapa iachaiwami chaiamurka.

Nukanchipa Taita Diuspa suma mandai puncha

ñami chaiamurka.

Pai agllaska Cristopa mandaipasmi kawarimurka.

Nukanchipa waugkindikunata juchachig iaia kuku

ñami sitai tukurka.

Tuta i punchami

nukanchipa Taita Diuspa ñawipi paikunata juchachidur karka.

¹¹ Nukanchipa waugkindikunaka,

paipa Ubija suti wañuchii tukuskapa iawarwami

chi iaia kukuta mitikuchirkakuna.

Diuspa Rimaita willaskakunawapasmi

paita mitikuchirkakuna.

Ari, wañuita mana mancharispallami

willai aparkakuna.

¹² Chasamanda, suma luarmanda kagkuna i tukui chipi kaugsagkunapas, ajai sumaglla alli iuiachiriilla kaichi.

Ikuti, jai, kamkunamanda

iapa llakii alpapi i lamar iakupi tukui kaugsagkunamanda!

Chi iaia kukuka iachá,

mana achka punchakuna

paimanda iukangapa kagta.

Chimandami askurinti achka rabiawa kamkunapagma uraikumurka.

¹³ Chi amarus kukuka, alpama sitamui tukuska kagta kawarispaka, chi kari wambra iukaska warmita kalpachingapami kallarirka. ¹⁴ Chi warmitaka atun agilapa iskandi alaskunatami churachirkakuna; chiwanka bulaspa, amarus kukuta sakispa, mitikungapa; paimanda agllaska chusa sitaska alpa luarpika kimsa wata sugta killa mikui chaskispa kaugsakungapa. ¹⁵ Amarus kukuka, paipa simimanda atun iakumi kimnarka; chiwanka, chi warmi apai tukungapa. ¹⁶ Alpaka, warmita kispichingapaka, simi paskarigsina tukugsamuspa, chi amaruspa simimanda kimnaska iakuta amullispa upiarka. ¹⁷ Chasamanda amaruska, chi warmimanda askurinti rabiarispa, rirka, warmipa sug wambrakunata makangapa. Chi wambrakunaka niraiankunami Taita Dius ima niskakunata ruraspa i Jesús ima willaskata suma charirispa kaugsagkuna.

¹⁸ Amarus, lamar iaku patapi rispaka, saiarigrirka.

13

Iskai iapa manchangasina atun kukukunamanda

¹ Lamar iakumandaka sug iapa manchangasina atun kuku llugsirigsamugtami kawar-kani. Chi kukuka, chungacha kachuiug, kanchis umaiugmi karka. Tukui chungacha kachupimi sug sug llaughtu churaraiaarka. Umakunapika, Taita Diusmanda kamispa rimaikunami

willaraiarka. ² Chi kukuka, tigrisina rigchami kawariwarka. Chakikunaka, usupasinami karka; simika, liunpasina. Amarun kukuka, kikinpa iachaitami chi kukuta kararka, kikinpa mandag tiaridirupi tiarigringapa; chipika, iapa achkakunata mandangapa. ³ Chi manchangasina kukupa sug umaka, wañungapasina kuchui tukuskami karka. Chi wañungapasina kuchuskaka ambirigsamurkami. Chasa kawaspaka, tukui kai alpapi kaugsanakugka, iapa ujnarispa, pai imasa rimaskata uiaspa rurai kallarirkakuna.

⁴ Amarun chi kukuta paipa mandaita karaskamandaka, paitami kungurirkakuna. Kikin animaltapasmi chasallata kungurirkakuna, kasa nispa:

—¿Pisik tia kai kukusina? ¿Pisik pudinga, paiwa makanakungapa?

⁵ Chi manchangasina kukutaka lisinsia kuarka, atuniachirispa Taita Diusta rimaspa kamingapa. Chusku chungu iskai killami chasa rurangapa lisinsia kuarka. ⁶ Chiwanka, Taita Diusmanda, paipa wasimanda i suma luarpi kaugsagkunatami kamidur karka.

⁷ Chi kukutaka lisinsia kuarka, Taita Diusmandalla kaugsanakuskata makaspa, bisingapa. Tukui puiblukananigmanda i alpakananigmanda, tukuinigmanda sug rigcha sug rigcha rimagkunata mandangapapasmi lisinsia kuarka. ⁸ Maikanpas kai alpapi kaugsanakug kikinpa sutikuna, paipa wañuchii tukuska Ubija chariska librupi mana tiaskakuna, tukui paikunaka chi kukuta kungurirkakuna. Ikuti sug luarpi kaugsagringapa agllaskakunapa sutikunallawami kai alpa wañachiskauramandata chi librupi willaraiá; paikunaka, mana chi kukuta kunguringapa.

⁹ Maikan rinri iukagkunaka, kasa uiawaichi.

¹⁰ Maikan karsilpi churagtaka, chasallatami paitapas churangapa kankuna.

Maikan largu machitiwa wañuchigtaka

chasallatami wañuchingapa kankuna.

Chiwanka, Taita Diusmandalla kaugsagkunaka iukangichimi, sutipa allita mana sakispa-lla, paiwa suma iuiái apanakunga.

¹¹ Chiuramandaka, ikuti sug manchangasina iskai kachuiug atun kuku alpa ukunigmanda llugsirigsamugtami kawarkani. Chi kachukunaka, ubijapa kachukunasinami rigchawarka. Ikuti rimaika, amarun kukusinami rimakurka. ¹² Chi kati kukuka, ñugpamanda manchangasina kukupa tukui mandaiwami kikinpa ñawipi rurarka. Chiwanka, tukui kai alpapi kaugsanakuskata nirka, chi ñugpamanda kuku wañungasina kuchuska ambiriskata kunguringapa. ¹³ Askurinti ujnachingasina mana imaurapas kawaskatami ruradur karka. Nina sindi awanigmanda kai alpama urmachiimi runakunapa ñawipi ruradur karka.

¹⁴ Chasa ñugpamanda manchangasina kukupa ñawipi rurangapa chaskiskakunawaka, kai alpapi kaugsanakuskatami pandachirka, kasa nispa:

—Chi kuku largu machitiwa wañuchii tukuspa aliaskata kawaspa, chasallata kawari imajin ruraichi.

¹⁵ Chi kati atun kukutaka lisinsia kuarka, ñugpamanda kukupa imajinta kaugsachingapa. Chi imajinka, rimagsamuspa, nirka:

—Nukata mana muchawagsamugkunata wañuchiichi.

¹⁶ Chimanda, atunkunata i uchullakunata, iukagkunata i mana iukagkunata, patrunkunata i lutrinkunata nirka:

—Tukuikunata alli makipi i printipi chi kukupa silluta prinsaspa churaichi—. ¹⁷ Maikanpas mana chi silluta iukagpika, mana pudirkachu randingapa u katungapa. Chi prinsaska sillupika willaraiarka, ñugpamanda manchangasina kuku imasa suti kaska u paipa sutika numirukunawa.

¹⁸ Kaitaka, alli iuiaiiugkunallami iachangapa kankuna. Maikanpas iuiaita apigkunaka, iachangakunami, chi atun kukupa sutika ima numirukunawa niraiangapa kagta. Chi numiruka, sug runapa sutimi willaraiangapa ka. Sugta patsa sugta chungu sugtami chi suti kangapa ka.

14

Patsa chusku chungu warangakuna, musu kantu kantaskakunamanda

¹ Chiuramandaka, Sión suti lumapi Taita Diuspa Ubija saiakuskatami kawarkani. Patsa chusku chungu chusku warangakunami paiwa sugllapi karkakuna. Chikunaka, chi Ubijapa i paipa Taitapa suti printipi sillu piaskami iukarkakuna. ² Chiuraka, atun iaku tallirispa rikugsina i sinchi triwinakugsinami suma luarnigmanda uiarigsamurka. Chi uiariipika, achka arpakuna uiachinakuskasinami uiarigsamurka. ³ Musuglla sug rigcha kantumi uiachigsamurkakuna. Taita Diuspa mandag tiaridiru ñugpa ladu, chusku animalsina rigchakunapa i iacha taitakunapa ñugpa ladumi chi kantu uiachigsamurkakuna. Ni pipas mana pudirkakunachu, chi kantuta iachaikungapa. Chi patsa chusku chungu

chusku waranga kai alpamanda kispichii tukuskakunallami pudirkakuna, chita kantangapa. ⁴ Paikuna, ñi imaurapas ñi maikan warmiwa mana sugllapi kaugsarkakunachu. Chasallata, paikunapa kuirpuwapas ñi imapi mana pandariska karkakuna. Paikunaka, Taita Diuspa Ubijata maima rikuskamami sugllapi katiraiankuna. Paikunaka, ñugpa agllaskakunami karkakuna, runapuramanda kispiringapa; chasaka, Taita Diuspa i paipa Ubijapalla niraingapa. ⁵ Paikuna ñi imaurapas mana llullarkakunachu. Paikunataka, ¿pitak ninga: “Imapipas pandariskami kangichi”?

Kimsa anjilkuna willaskakunamanda

⁶ Chiuramandaka, sug anjil awapi bulakuskatami kawarkani. Chi anjilka, kai alpapi tukui kaugsanakuskata mana puchukaridiru Alli Willaita willangapa samukuskatami kawarkani. Tukui alpamandakunata, tukui puiblumandakunata i tukuinigmanda sug rigcha sug rigcha rimagkunatapas chi Willaita willangapami samukurka. ⁷ Sinchi rimaiwami nikurka:

—Taita Dius justisiai rurangapa puncha, ñami chaiamurka. Chimanda, paita suma manchaiwa iuiarispa niichi: “Kam, iapa suma atunmi kangi”. Sug luarta, alpata, lamar iakuta i iaku ñawikunata wiñachig kagmanda, paita kunguriichi.

⁸ Iskaima kawarig anjilka, kasa kaparispa nigsamurka:

—Babilonia suti atun puibluka ñami urmaspa puchukarirka. Imasami sug karisapa warmi, iapa machachiwa upa iuiapi urmachi: chasallatami tukui alpamanda runakunata paipa mana alli iuiaiwa tuntiachigsamuska karka.

⁹ Kimsama kawarig anjilka, sugkunasinallatata sinchi rimaiwa kaparispa nigsamurka:

—Maikanpas chi manchangasina kukuta i paipa imajinta muchagkunata i paipa prin-saska silluta printipi u makipi churachirigkunata, ¹⁰ paikunataka, Taita Dius kikin rabi-arispa llakiiwa kupapisina mana iaku chapuskalla binuta upiachigsinami rurangapa ka. Paikunaka, Taita Diuspa tukuipi alli anjilkunapa ñawipi i paipa Ubijapa ñawipika nina asufri tiaskapimi rupachii tukungapa kankuna. ¹¹ Chi rupachii tukunakuskapa kusnika, imaurapas mana puchukarisalla kusnikungapagllami ka. Chi kukuta i paipa imajinta muchagkuna paipa suti willaraiaska silluta churachiriska kagkunaka, mana sakispallami rupachii tukungapa kankuna, maituku waranga waranga watakuna ialigpipas. ¹² Chasamanda Taita Diusmandalla kaugsagkuna, pai ima niskakunata ruraspa Jesuswa suma iuiarigkunaka, chasallata tukui animuwa apanakuichi, mana sambaiaspalla.

¹³ Chiuramandaka, suma luarnigmanda uiarkaniami kasa nikuskata:

—Iskribii. Maikanpas kunauramanda Iaia Jesuswa suma iuiarispa wañugkunaka, Taita Diuspa iapa kuiaskami kangakuna.

—Ari—, Santu Ispirituka ninmi—. Paikuna tukuipi allilla ruraskakunamandami sumaglla samaringapa kankuna.

Alpapi tarpuskata pallangasina justisiai tukuskamanda

¹⁴ Chiuramandaka, sug iura puiumi kawariwarka. Chi puiupika, sug runa tukuska rigchami tiakurka. Paipa umapika, kurita ruraska laughtumi churaraiarka. Paipa makipika, aflaska machitisinami charikurka. ¹⁵ Chiura sug anjilka, Diuspa atun wasinigmanda llugsimurka. Llugsimuspaka, chi puiupi tiakuskata sinchi rimaiwa kaparirka, kasa nispa:

—Ñami justisiai puncha chaiamurka. Alpapi tarpuska ñami pallangasina ka. Chi-mandaka, machitiwa kuchugsina rurali, kamba justisiai tukungapa.

¹⁶ Chiuraka chi puiupi tiakugka, machitiwa alpapi kuchuspa kuchuspa tandachirka.

¹⁷ Ikuti sug anjilka, Diuspa atun wasi sumalpari tiaskamanda llugsimurka. Paipas, aflaska machitisinami charikurka. ¹⁸ Ikuti sug anjilka, altarnigmandami llugsimurka. Chi anjil, altarpipi nina tiaskata kawagmi karka. Chi anjilka, aflaska machiti charikugtaka sinchi rimaiwa kaparirka, kasa nispa:

—Alpapi pukuska ubaskunaka ñami tandachingasina ka. Chimandaka, aflaska machitiwa kuchuspaka, ubas waiungakunata tandachii.*

¹⁹ Chiuraka chi anjilka, kai alpapi tiaska ubaskunata machitiwa kuchuspa kuchuspa tandachirka. Chi ubaskunataka kapidirupimi churarka, kapingapa. Chi kapidiruka niraianmi Taita Diuspa tukui rabiawa churaska. ²⁰ Chi ubaskuna, puiblu kanchapimi kapii tukurka. Chi kapidirumandaka, iawarmi llugsirka. Chi iawarka, kaballukunapa simipi churaska prinu awakamami jundarka. Kimsa patsa kilumitrukamami chi iawar iakusina kalpakurka.

15

Kanchis anjilkuna, iapa sinchi llakii charinakuskamanda

* 14:18 Chi ubaskunaka, mana alli rurag runakunami niraiankuna.

¹ Chiuramandaka, sug iapa ujnaila manchangasina siñaltami sug luarmanda kawarkani. Kanchis anjilkunaka, sug sug iapa sinchi llakiimi charinakurka. Chi llakiikuna anjilkuna runakunapagma kachamuskawaka, Taita Dios pasinsiaringapami ka. ² Ninawa kristalwa chapuska atun kuchasina rigchatapasmi kawarkani. Chi kucha ladullapika, manchangasina kukuta mitikuchigkunami Taita Dios arpa iukachiskakunata charispa saianakurka. Taita Dios karaska iuiaiwa mana sakirirkakuna, kukupa imajinta muchangapa i paipa suti numiru willaraiaska siñalta chaskingapa. ³ Paikunaka, Moisés suti Taita Diospa lutrinsinapa kantu i Taita Diospa Ubijapa kantumi kantanakurka, kasa nispa:
—Tukui pudig atun Taita Diosmi kangí.

Kam tukui ima ruraskakunaka
iapa suma achalai ujnangasinami kankuna.
Tukui alpapi mandagkunamanda mas atun mandagmi kangí.

Kam tukui sutipa kaskata
allilla ruraskami kapungi.
⁴ Kam tukui mas alli atun Taita Diosllami kangí.

Chimandaka tukui runakunami,
kamta suma manchaiwa iuiarispa,
mas suma atuniachinakunga.
Kam imasa chaiaskasina justisiai ruragsamugmandami
tukui alpanigmanda runakuna,
chasa kawaspaka, samuspa,
kamta kunguringapa kankuna.

⁵ Chiuramandaka, suma luarpi Diospa atun wasimanda pungu paskaraiaskatami kawarkani. Chi ukupika, sug linsu wasisinami kawariwarka. Chipi, Taita Dios kikin kaugsadirumi niraiá. ⁶ Chi ukumandaka, chi kanchis anjilkuna, sug sug iapa sinchi llakii charinakuskami llugsimurkakuna. Chi anjilkunaka, linsu katanga suma punchallami churariska karkakuna. Paikunapa pichupika, kuri siñidurmi chumbilliska karkakuna. ⁷ Chi chusku animalsina rigchakuna sugka, chi kanchis anjilkunata sug sug kuri kupatami kuarka. Chi kupakunapika, Taita Dios diltudupa imaurapas kaugsagpa rabiariispa llakiikunatami jundachiska tukugsamurka. ⁸ Chiuraka, tukui kikin suma ruraska atun Taita Diospagmanda samukug kusnimi Diospa atun wasi ukupi jundagsamurka. Chasawaka, ñi pipas mana pudirkakunachu chi ukuma iaikungapa, manara tukui chi kanchis anjilkuna iapa sinchi llakiikuna charinakuskata puchukankama.

16

Taita Dios iapa rabiariiska kanchis kupapi llakiikuna tiaskamanda

¹ Chiuraka, Diospa atun wasi ukunigmanda sinchi kaporispa rimaitami uiarkani. Chi kanchis anjilkunata kasami nirka:

—Riichi. Taita Dios iapa rabiariiska kanchis kupapi llakiikuna tiaskata alpama talligriichi.

² Chasa uiaspaka, sug anjilka, llugsimuspaka, paipa kupapi tiaskata alpamami talligsamurka. Chasawaka, maikan runakuna manchangasina kukupa silluta churaraiaskakunata i paipa imajinta muchaskakunataka millangasina iapa nana chupukunami llugsirirkakunata.

³ Iskaima anjilka, paipa kupapi tiaskata lamar iakunami talligsamurka. Chiuraka, wañuskapa iawarsinami tukugsamurka. Chiwanka, tukui lamar iakupi tiaskakunami wañurkakuna.

⁴ Kimsama anjilka, paipa kupapi tiaskata iakunama i iaku ñawikunapimi talligsamurka. Chikunapas iawarllatami tukugsamurkakuna. ⁵ Chiuraka, iakuta kawag anjiltami uiarkani, kasa nigta:

—Tukuipi mas alli Taitiku,
ñugpamandata karkangi
i kunaura imaurapasmi chasalla kangí.
Kam tukui chasa justisiai ruragmandami
tukui allilla kangí.

⁶ Chi justisiai tukugkunami,
kammandalla kaugsagkunata
i Santu Ispirituwa rimagkunata wañuchispa,
paikunapa iawarta icharkakuna.
Chasa ruragkunamandami

iawar upiachirkangi.

Chimandami paikunata chasa chaiarka chaskingapakuna.

⁷ Altarnigmandaka, kasa rimaiipas uiariwarka:

—Ari, tukui pudig atun Taita Dios, kam chasa ruraspaka, sutipami tukuiipi alli justisiai rurarkangi.

⁸ Chuskuma anjilka, paipa kupapi tiaskata indimami talligrirka. Chiuraka, indi kallairirka, tukui runakunata rupachingapa. ⁹ Chi indi rupachiskawaka, runakunapa aichakunaka rupaspami iapa llakingasina kusarinakurka. Chasa rupachikugpipas, mana pandariikunata sakirkakunachu. Mana Taita Dioswa tukuspa, paipa suma atuniachirkakunachu. Chasapaka, pai Taita Dios chi llakiikunata kachamui pudigmandaka, paitami kaminakurka.

¹⁰ Pichkama anjilka, paipa kupapi tiaskata chi manchangasina kukupa mandaspa tiaridirupimi talligsamurka. Talliglapika, chi kuku mandakuska alpapika iana tutami tukugsamurka. Chasa tukugsamuura, tukui runakunaka dinanai kallutami kanirinakurka. ¹¹ Chasa tukugsamugpipas, pandariikunata mana sakirkakunachu. Paikunapa nanai i chupukunawa kaspapas, Taita Dios suma luarpi kagtami kaminakurka.

¹² Sugtama anjilka, paipa kupapi tiaskata Eufrates suti atun iakupimi talligsamurka. Chiuraka, chi iaku tustagsamurka. Chasaka, indi llugsidirunigmanda atun mandagkunata sakirka ialingapa.

¹³ Kasapasmi kawarkani. Amarun kukupa simimanda, manchangasina kukupa simimanda i kuku wairawa llullaspa rimagpa simimandapas, tukui chi kimsakunapa simimandaka sug sug sapusina rigcha kuku wairakunami llugsirirkakuna. ¹⁴ Chi kuku wairakunaka, mana pipas rurangapa pudiskasinami kawachinakurka. Kai tukui alpapi mandagkunata tandachingapami llugsirirkakuna; chasaka, tukui pudig Taita Diospa atun puncha chaiamuuraka, paiwa wañuchinakungapa iuiaiwa.

¹⁵ Iaia Jesús, kasami ni:

—Uiamuichi. Nukaka, sug sisaisina mana iuiakuurami samungapa kani. Maikanpas suma katanga churariska rigcharaiagsina suiawanakugka, Taita Diospa iapa kuiaskami kapuankangichi. Chasaka, chi puncha mana llatansina pingaipa kankangichichu.

¹⁶ Chi kuku wairakunaka, hebreo rimaiwa Armagedón suti pambapimi mandagkunata tandachirkakunata.

¹⁷ Kanchisma anjilka, paipa kupapi tiaskata wairapimi talligsamurka. Chiuraka, Diospa atun wasi ukupi mandag tiaridirunigmandami sinchi rimaiwa uiarigsamurka, kasa nispa:

—Tukui imasa niraiaskasinami tukugsamurka—. ¹⁸ Chasa niuraka, rilampa kawarisa, iapa sinchi rimai i triwinu uiariura, tukui alpa kuiurisa timburigsamurka. Kai alpapi runakuna tiaskauramandata, mana imaurapas chasa kuiurisa timburii tiarkachu. ¹⁹ Chiwanka chi atun puiblu, kimsamami partirigsamurka. Chasallata, kai alpapi tiaska tukui puiblukunapasmi dirumbagsamurkakuna. Chasami Taita Dios, Babilonia suti atun puiblu iapa pandariikuna iukagmanda, chasa iuiarisa, kikin iapa rabiarisa llakiwa kupapi binuta upiachigina rurarka.

²⁰ Chasa tukuuraka, tukui islakuna i atun filukunapasmi chingarirkakuna. ²¹ Iapa atun granisukuna, awanigmanda tukui runakunapi urmagsamurkakuna. Chi granisukunaka, kimsa arubasinami llasarkakuna. Chasa llakii askurinti manchangasina tukugpipas, runakunaka Taita Diusta kamiillami apanakurka.

17

Karisapa warmisina atun puibluta justisiai tukuskamanda

¹ Chiuramandaka, chi kanchis anjilkuna kupa charinakugpura sug rimawagsamurka, kasa niwaspa:

—Samui. Kawachisakimi, chi karisapa atun warmisina atun iakukuna patapi tiakuskasinata imasa justisiai tukungapa kagta. ² Alpapi atun mandagkunaka, paiwa pandariikunami rurarkakuna. Alpapi kaugsagkunapas, paipa binuta machagtami upiagsina ruraspaka, paiwa tukui mana allilata rurarkakuna.

³ Chasa niwaspaka, muskui ukupisina chusa sitaska alpamami apawarka. Chipika sug warmi manchangasina puka kukupi tiakugtami kawarkani. Chi kukupika, Taita Diusta kamispa rimaikunallami willaraiarka. Chi kuku karkami kanchis umaiug i chungachuiug. ⁴ Chi warmika, pichi i puka katangakunami churaraiarka. Kuri, pirlakuna i sug rigcha sug rigcha iapa bali uchullita rumikunawami allichiriska karka. Paipa makipika,

sug kurita ruraska kupami charikurka. Chi kupapika, karikunawa pandariska i paipa iapa millai jiru iuiiakunata jundachiskasinami kapurka. ⁵ Paipa printipika, sug mana pipas iachangasina sutimi willaraiarka. Kasami suti niraiá: “Nuka, Babilonia suti iapa atun puiblumi kani. Tukuí karisapa warmikunapa mamami niraiáni. Tukuí sug rigcha mana allilla ruraikuna alpapi tiaskakunapa mamapasmi kani”.

⁶ Chiuramandaka, chi warmita kawaspa, iuiariwagsamurkami, Taita Diuspalla kagkunata i Jesusmanda willagkunata wañuchispa, paikunapa iawarta upiaspa machaskasina kagta. Paita kawaspa, iapa mancharirkani. ⁷ Chi anjilka niwarka:

—¿Imapatak mancharingi? Chi warmi kanchis umaiug chungá kachuiug atun kukupi tiakuska i kikin kuku ima niraiaskakunatami willangapa kai. ⁸ Chi kukuta muskui ukupi kam kawaskaka, ñugpatami kaugsarka; kunaúra mana tianchu. Mana tiagpipas, ikutimi alpa ukunigmanda llugsimungapa ka, diltudupa manara wañuchii tukugpi. Chi kuku ñugpata kaugsaska, kunaúra mana tiaska ikuti samugta kawaspa, kai alpapi kaugsagkuna, achkakuna iapa mancharispami kawangapa kankuna. Chasa mancharigkunapaka, kikinpa sutikuna kai alpa wiñachiskauramandata suma luarpi kaugsagringapa willaraiaska librupi manima willaraiangapa ka.

⁹—Alli iuiái iukagkunami kaita iachangapa kangichi. Chi kanchis umakunaka, kanchis lumakunami niraiá. Chi lumakunapimi chi warmi niraiaska tiaku. ¹⁰ Chi umakunaka, kanchis atun mandagkunapasmi niraiankuna. Chi kanchis mandagkunamandaka, pichkakuna ñami wañurkakuna. Sugka, kunaúrami mandaku. Ikuti sugka manara samunchu. Pai mandai kallariuraka, pai mandakuska mana iapa unaiangapa kanchu. ¹¹ Chi ñugpata kaugsaska atun kukuka, kunaúra mana manima ña tia; chika, chi kanchis mandagpuramandaka, ikutimi kawarigsamungapa ka pusagma. Paimi diltudupa wañuchii tukungapa ka.

¹²—Chi chungá kachuta kawarkangi; chikunaka, chungá atun mandagkunami niraiankuna. Chi mandagkunaka, manara mandangapa kallarinakunachu. Paikunaka, sug ratullami chi manchangasina kukuwa sugllapi mandangapa kankuna. ¹³ Chi chungá mandagkunaka, suglla iuiaiwami tukungapa kankuna. Paikunapa mandaitaka chi manchangasina kukutami kuangapa kankuna, pai mandai iukangapa. ¹⁴ Paikunaka, Taita Diuspa Ubija sutiwami makanakungapa kankuna. Chi Ubija sutika, iaiakunapa iaiá i mandagkunatapas tukuita mandag kaspá, chiwami tukuí kukuwa kaskakunata mitikuchingapa ka. Taita Dius agllaspa kaiaska paita mana sakispalla kagkunami chi Ubija sutiwa sugllapi mitikuchingapa kankuna.

¹⁵ Kasapasmi anjil niwarka:

—Iakukuna patapi karisapa warmisina tiakugta kawarkangi; chi iakukunaka niraiami tukuí puiblukuna, tukuí alpamanda runakuna i tukuinigmanda sug rigcha sug rigcha rimagkuna.

¹⁶—Chi chungá kachu atun kukupi tiaskata kawarkangi; chikunaka niraiami karisapa warmisina wabiarispa, kichuspa, katanga pariju lluspichigsina ruraspami sitangapa kankuna. Paipa aichatapasmi mikugsina rurangapa kankuna. Nispaka, tukuími rupachingapa kankuna. ¹⁷ Taita Diusmi paikunata chasa iuiiakuna kachamurka, pai kikin imasa munaskasina paikuna rurangapa. Paimi chi mandagkunata iuiachirka, suglla iuiaiwa tukuspa, chi kukuta mandai kuangapa; chasaka, Taita Dius kikin imasa pai rimaskasina tukugsamungapa.

¹⁸—Chi warmita kam kawarkangi; chika niraiami atun puiblu tukuí alpapi atun mandagkunata mandag.

18

Babilonia atun puiblu justisiai tukuskamanda

¹ Chiuramandaka sug iapa iacha anjil, suma luarmanda uraikumukugtami kawarkani. Paipa suma punchaiachiiwaka kai alpa mas punchami kawarigsamurka. ² Chi anjilka, sinchi rimaiwa kaparirka, kasa nispa:

—Babilonia suti atun puibluka ñami urmaka; ñami urmaka. Tukuí sug rigcha sug rigcha millangasina kuku waira kaugsadirumi chi atun puiblu tukugsamurka.

Chillapita, tukuí millangasina kuku piskukuna kaugsadirupasmi tukugsamurka.

³ Chi puiblupimi tukuí alpamanda kaugsagkuna, paiwa binuta machagta uplagsina ruraspá, tukuí jiru pandariikunata ruraspá kaugsarkakuna.

Kai alpapi atun mandagkunapas, paiwami iapa pandarii rurarkakuna. Chi puiblu iapa iukag kaskamanda,

kai alpapi randispa katuspa purigkunapas,
pai iapa ima munaska katui tiaskakunawami
iapa iukag tukuska karkakuna.

⁴ Chiuramandaka, sug rimai suma luarnigmanda uiariwarka, kasa nispa:

—Nuka agllaska runakuna,
chi puiblumanda llugsiichi.
Chasaka kamkuna,
chi puiblumanda pandariikunapi
mana urmankangichichu.
Llugsigpikunaka,
chi puiblupi iapa sinchi llakiikuna chaiangapa kaskapas
mana kamkunata chaiangachu.

⁵ Chi puiblumanda pandariikunaka,
iapa achkami mirarka.
Chiwanka Taita Dioska,
chi pandariikunata mana kungaringapa kanchu.

⁶ Imasami sugkunata mana allilla rurarka:
kamkunapas chasallata
chaugpi iapawa paita kutichiichi.
Pai imasa mana allilla ruraskata iskaima randichiichi.
Imasami sugkunata llakiikuna upiachigsina rurarka:
chasallata paita iskaima mas timburiskata karaichi.

⁷ Imasami iapa iukag tukuspa,
sugkunata unZarka:
chasallata paitapas unZaspa
llakichispa nanachiichi.
Paipa iuiaillapimi kasa iuiá:
“Nukami kani tukuikunata mandaspa tiakug.
Mana kusaiug warmisinaka
mana kaugsakunichu.
Ima llakiikunapas manima iukangapa kanichu”.

⁸ Chasa iuiakugpipas,
suglla punchapimi
kasa paita samungapa ka:
sinchi llakii,
iarkai i wañuipas.
Ninawapasmii
rupachii tukungapa ka.
Tukui pudig atun Taita Dios kikinmi
chi puibluta justisiagsamurka.

⁹ Kai alpapi atun mandagkuna, chi puibluwa iapa pandarispa imasa munaskasina iapa iukag tukuskakuna, chi mandagkuna, chi puiblu rupakuskata, nina sindi kusni puiuia-kuskata kawaspaka, iapa atun llakiiwami wakaspa kangapa kankuna. ¹⁰ Iapa manchai-wami chi llakiikunata karumandalla kawanakungapa kankuna, kasa nispa:

—¡Ai, ai, tukui pudig atun puiblu Babiloniami karkangi!
Suglla urallapimi
diltudupa llakingasina
justisiai tukurkangi.

¹¹ Kai alpapi randispa katuspa purigkunapasmi chi puiblumanda iapa llakirispaspa wakan-gapa kankuna. Kunauramandaka, ñi pipas mana tiangapa kankunachu, paikuna ima katungapa apamunakuskata randingapa. ¹² Kasami apadur karkakuna: kuri, kulki, pirla i sug rigcha iapa bali uchullita rumikuna, sida, pichi, puka i sug rigcha iapa suma linukuna, tukui sug rigcha sug rigcha suma asna kaspikuna, marfilta ruraskakuna, iapa bali kaspikuna, brunsi, iru, marmul suti iura rumi, ¹³ kanila, miski suma asnai asnarikuna, mira suti i sug rigcha asna kupalkuna, suma asnaiachiridiru tugtu iakukuna, binu, asiti, arina, trigu, aparichidiru animalkuna, ubijakuna, kaballukuna, kaballukuna aliudiru augtukuna i randispa i katudiru runakuna.

¹⁴ Chi puibluta ningapami kankuna:
—Sachakunamanda iapa miski muiukuna
chituku munadur karkangi;
chikunaka ñami tukuripurkangi.
Kam sumaglla allichirispaspa churaridirukuna,

suma mikui mikuspa kuntintulla kadiru,
tukui chikunami puchukaripurkangi.

Tukui ima iukaska, mana mas kawangapa kangichu.

¹⁵ Imasami randispa katuspa purirkakuna; chasawaka, iapa iukag tukurkakuna; chasa puibluta kawaspa, iapa manchaiwami llakispa, karumandalla kawanakungapa kankuna. Iapa atun llakiiwa wakaspa kaparingapami kankuna, kasa nispa:

¹⁶ —¡Ai, ai, chituku atun puiblumi karkangi!

Pichi, puka i sug rigcha sug rigcha

iapa suma linsu katanga

churariska warmisinami rigchakurkangi.

Kuri, pirla i sug rigcha sug rigcha

iapa bali uchullita rumikunawa

allichiriskami karkangi.

¹⁷ Chituku iapa iukaikunapas,

mana unailami tukuripurkangi.

Chasallata tukui barkukunata mandagkuna, iaku pata pata rigsispa purichigkuna, barkukunapi trabajagkuna i tukui lamar iakupi chalwaspa purigkuna, chi tukuikunami karumandalla kawanakurka. ¹⁸ Chi puiblu rupakuskata, kusni nina sindi puiuiakuskata kawaspaka, kaparirkakuna:

—¿Maikan puiblusik tia; kam atun puiblu puchukarikungi: chasa?

¹⁹ Chasa kaparispaka, dillakii alpa ñutuchispa, umapi tallirirkakuna. Iapa atun llakiiwa wakaspa, kasapasmi kaparirkakuna:

—¡Ai, ai! Kai atun puiblupi iapa iukaiwaka,

tukui barku iukagkunapasmi

iapa iukag tukugsamurkanchi.

Tukui ima iukai tiaska,

mana unailami puchukarigsamurka.

²⁰ Ikuti kamkuna Taita Diusmandalla suma kaugsagkuna,

pai kikin agllaska runakuna

i Santu Ispirituwa rimagkunaka,

sumaglla alli iuiachiriilla

sug luarpi kaichi,

chi puiblu puchukariskamanda.

Taita Diuska,

ñami kamkunamanda

allilla justisiai ruragsamurka.

²¹ Chiuramandaka sug iapa iacha anjilka, atun kutangasina rumita atarichispa, lamar iakuma sitamurka, iaka nispa:

—Kasami Babilonia atun puiblupas

diulpilla sitai tukungapa ka.

Chiuramandaka, mana mas kawaringapa kanchu.

²² Mana mas, kamba ñambikunapika,

arpa, flaugta i bututu

uiaringapa kankunachu.

Ñi maikan ima ruraikuna ruradurkunapas,

kamba puiblupi mana mas kawaringapa kankunachu.

Ñi maikan rumipi kutagkunapas

mana mas uiaringapa kankunachu.

²³ Ñi ima punchaiachidirupas

mana mas punchaiachingapa tiangapa kanchu.

Mana mas kasaraiپی kusikuchinakui atun puchasina tiangapa kanchu.

Kambagpi randispa katuspa purigkunaka,

kai alpapi iapa pudigkunami karkakuna.

Kai alpapi kaugsanakuskata,

tukuikunatami kamba jiru iachaiwa llullachigsamurkangi.

²⁴ Santu Ispirituwa rimagkuna, Taita Diusmandalla suma kaugsagkuna i sugkuna kai alpapi wañuchii tukuskakunapas, tukui chi runakunapa iawarpas chi puiblupimi kawarirka.

19

¹ Chiuramandaka, iapa achka runakuna sinchi rimaiwa suma luarpi kaparinakuskatami uiarkani. Kasami ninakurka:

—Nukanchipa atun Taita Diusta
iapa suma atuniachisunchi.
Paimi suma atun tukui pudig kispichig ka.

² Paimi tukuipi allilla justisiai sutipa rurá.
Chi karisapa atun warmisina kag,
tukui kai alpamanda runakunata
atun pandariikunapi
urmachispa waglihirka.
Chimandami paita justisiai ruragsamurka.
Chi warmisina kag,
Taita Diospa lutrinsinakunata wañuchiskamandami
paita chasa justisiai rurarka.

³ Iskaima ikuti kaparigsamurkakuna, kasa nispa:
—Atun Taita Diusta iapa suma atuniachisunchi. Chi puiblu rupakuska nina sindi
kusnika, mana sakispallami puuiakungapa ka, maituku waranga waranga watakuna
ialigpipas.

⁴ Chiura chi iskai chungá chusku iacha taitakuna i chusku animalsina rigchakunaka,
mandag tiaridirupi tiakug Taita Diospa chaki ladu kumurispa, kungurirkakuna, kasa
nispa:

—Chasa kachu. Atun Taita Diusta iapa suma atuniachisunchi.

⁵ Chiuraka, chi tiaridirunigmandaka sug rimai uariwarka, kasa nispa:

—Nukanchipa Taita Diospa lutrinsinakuna, paita suma kuiaspa manchaiwa kagkuna,
uchullakuna i atunkunapas, tukuikuna suma paita atuniachiichi.

Taita Diospa Ubija suti kasarai punchamanda

⁶ Iapa achka runakuna rimanakugsinami uiarkani. Atun iaku tallirispa rikugsina i sin-
chi triwinusinapasmi uariwarka. Kasami ninakurka:

—Nukanchipa tukui pudig atun Taita Dios,
paipa suma mandaiwami ña kallariirka.
Chimandaka, paita iapa suma atuniachisunchi.

⁷ Sumaglla alli iuiachiriwa kuntintarisunchi.

Paita iapa suma atuniachisunchi.

Taita Diospa Ubija suti kasarai punchaka
ñami chaiamurka.

Paipa warmi tukungapa kagpas
ñami allichiriska ka.

⁸ Ñami paipa warmi tukungapa kagta lisinsia kuarka,
ñi imapi mana mapa suma puncha katangata churingapa—.

Chi suma katangakunaka, Taita Diosmandalla suma kaugsagkuna imapipas allilla ruras-
kununami niraiá.

⁹ Chiuraka, anjilka niwarka:

—Kasa iskribii. Maikanpas Taita Diospa Ubija suti kasaraska budama kunbidai tukuska-
kunaka, Taita Diospa iapa kuiaskami kankuna.

Kasapasmi niwarka:

—Chikunaka, kikin Taita Dios rimaska, tukui sutipami ka.

¹⁰ Chasa niwauraka, anjilpa chakipi kungurirkani, paita ningapa: “Iapa allimi kangi”.
Chiuraka, paika niwarka:

—Mana chasa rurakui. Nukaka, kamsina i kamba waugkikunasina, Jesuspa alli willai-
kunata suma charirigkunasina, Taita Diospa lutrinsinallatata kani. Taita Diosllatami
kungurii iukangi—. Jesuspa willaikunawami Santu Ispirituwa rimagkunata suma iuiachii
tukunkuna.

Iura kaballupi tiakuskamanda

¹¹ Chiuramandaka, suma luar paskaskasinami kawariwarka. Chipika, sug iura kaballu-
mi kawariwarka. Kaballupi tiakugka suti kanmi: “Sutipa tukui ima niskata allilla rurag”.
Tukuipimi imasa chaiaskasina justisiai. Wañuchinakungapa chaiaura, allillapami rurá.

¹² Paipa ñawi murukunaka, nina sindisinami punchaiakurka. Paipa umapika, achka
llaugtukunasinami churaraiairka. Chi llaugtukunapika, sug sutimi willaraiairka. Chi
sutiitaka, paillami iachá ima niraiagta. ¹³ Iawarwa tiñiriska katangami churaraiairka.
Paipa sutika kanmi: “Diospa Rimai”.

¹⁴ Suma luarpi kaugsag suldadukunaka, iura kaballupi tiarispami paita katiraiarka-
kuna. Chi suldadukunaka, mana mapa, suma iura linsu katangakunami churaraiairka-
kuna.

¹⁵ Chi mandagpa simimandaka aflaska largu machitimi llugsiraiarka; chiwanka, kai alpapi kaugsanakuskata kuchungapakunata. Iru barawami iapa mandangapa kankunata. Ubaskunata chakiwa sinchi saruspa kapigsinami justisiai rurangapa kankunata. Tukui pudig Taita Dios iapa rabiariSPA llakiiwa kupapi jundachigsina ruraspapa upiachingapami kankunata. ¹⁶ Paipa katangapi i paipa kungur awa ladu, kasami niraiarka: "Atun mandagkunapa mandag i iaia mandagkunapa iaia".

¹⁷ Chiuramandaka, sug anjil indipi saiakuskatami kawarkani. Chi anjilka, tukui gallinasukuna awapi bulanakuskata sinchi rimaiwa kapariSPA, kasa nirka:

–Samuichi. Taita Dios achka mikui tiaskama tandarigsamuichi. ¹⁸ Chipika, atun mandagkuna, suldadukunata mandagkuna, iapa mana manchagkuna, kaballukuna i kaballupi tianakugkuna, patrunkuna i lutrinkunapas, uchullakuna i atunkunapas, chi tukuikunapa aichatami mikungapa kangichi.

¹⁹ Chiuraka, chi manchangasina kukuta i kai alpapi atun mandagkunata paikunapa suldadukunawantami kawarkani. Chikunaka tandariskami karkakuna, chi iura kaballupi tiakugwa paipa suldadukunawanta wañuchinakungapa. ²⁰ Manchangasina kukuta i kuku wairawa llullaspapa rimagtami sugllapi apii tukurkakuna. Chi llullaspapa rimagmi manchangasina kukupa ñawipi mana imaurapas kawaskasinakunata ruradur karka. Chasakunawaka, chi kukupa sillu prinsaska churachiriskakunata i paipa imajinta muchagkunata llullachidur karka. Chi iskandikuna, asufri rupakuska atun nina ukuma kaugsa sitai tukurkakuna. ²¹ Tukui iskandita katiraiagkunaka, chi kaballupi tiakugpa simimanda largu machitiwami wañuchii tukurkakuna. Chi wañuchii tukuskakunapa aichata, tukui gallinasukuna sagsagtami mikurkakuna.

20

Iaia kuku, diltudupa nina ukuma sitai tukuskamanda

¹ Chiuramandaka, sug anjil suma luarmanda uraikumukgtami kawarkani. Chi anjil, alpa ukunigmanda pusupa pungumanda llabi i atun kadinapas chariskami uraikumukurka. ² Chi anjilka, chi iapa atun amarun kukutami apigsamurka. Chi amarunka niraiami unai ñugpamanda kuku kulibra, Satanás suti iaia kuku. Chi amarunka apispaka, waranga watapa kadinawami watarka. ³ Nispaka, jundu pusumami sitarka. Pusu punguta wichkaspapa, sillaspapa sakirka; chasaka, chi waranga wata ialinkama, kai alpapi kaugsagkunata mana llullachigsamungapa. Waranga wata ialiuraka, ikutimi sug ratullaka kacharii tukungapa ka.

⁴ Achka mandag tiaridirukunatapasmami kawarkani. Chipi tianakugtaka, Taita Dios kuarkami, justisiai rurangapakuna. Sug runakunapa almakunatapasmami kawarkani. Chi runakunaka, Diospa Rimaia mana sakispalla, Jesusmanda willagkuna kagmandami kunga anchuchispa wañuchii tukurkakuna. Paikunaka, chi manchangasina kukuta i paipa imajinta mana muchangapa munarkakunachu. Chasallata, paipa prinsaska silluta printipi ñi makipi mana churachiringapa munarkakunachu. Chiwanka paikuna, kaugsariSPA, waranga watami Cristowa mandag kangapa kankuna. ⁵ Paikunaka, ñugpa kaugsarigkunami kankuna. Chi waranga wata manara ialinkama, sug wañuskakunaka manara kaugsaringapa kankunachu. ⁶ Nugpa kaugsarigkunaka, Taita Diospa iapa kuiaskami kankuna; paipallami niraiankuna. Paikunataka, parisama wañuika mana chaiangapa kankunatachu. Paikunaka, Taita Dios i Cristomanda sasirdutikunami kangapa kankuna. Waranga watami Cristowa mandagkuna kangapa kankuna.

⁷ Chi waranga wata ialiskauramandaka, iaia kukuka wichkariaskamanda kachariimi tukungapa ka. ⁸ Llugsichii tukuspaka, kai tukui alpapi kaugsanakuskatami llullachigsamungapa ka. Gog i Magog suti alpapunapi mandagkunatami llullachigsamungapa ka. Nispaka, paikunapa suldadukunatami tandachingapa ka, Cristowa puchukanakungasina makanakungapa. Chi suldadukunaka, askurinti iapa achkami karkakuna, lamar iaku plaiakunapi arinasina; chiwanka, mana kuintangapa pudiringasina achka.

⁹ Chi kukuwa kag suldadukunaka, tukuinigmanda samuspaka, Taita Diosmandalla suma kaugsagkuna kaskata i pai kuiaska puiblutami muiuchigsamurkakuna. Chasa kauraka, awanigmanda ninami, urmamuspapa, tukuikunata rupachispa puchukagsamurka. ¹⁰ Chi iaia kuku tukuikunata llullachigtaka asufri rupakuska atun nina ukumami sitai tukurka. Chipika, manchangasina kuku i kuku wairawa llullaspapa rimagpas timpumi sitai tukuska karkakuna. Chi ukupi kaskakunaka, tuta i puncha tukui llakii i nanaikunami iukangapa kankuna, maituku waranga waranga watakuna ialigpipas.

Taita Diospa atun mandag tiaridiru ñugpa ladu justisiai tukuskakunamanda

¹¹ Chiuramandaka, mandag tiaridirutami kawarkani; chika, iapa iura i atunmi karka. Chipika, Taita Diosmi tiakurka. Paipa ñawinigmandaka, kai alpa i sug luarka anchurisipami

tukurirka, ñi maipipas mana mas kawaringapa. ¹² Atun i uchulla wañuskakuna, chi mandag tiaridirupa ñugpa ladu saianakugtami kawarkani. Chiuraka, sug librukunata paskarkakuna. Maikan suma luarpi kaugsagringapa willaraiaska librutapasmi paskarkakuna. Chi librukunapi imasa willaraiaskata kawaspami, allilla u mana allilla kaskata chi wañuskakunata justisiai rurai tukurkakuna. ¹³ Lamar iakupi wañuskakunata kutichimurkami, chasallata kai alpapi pambaraiaskakunatapas. Tukuikunatami justisiai chaiarkakunata. Chasaka tukuikuna, imasa allilla ruraskakunawa u mana allilla rurasakunawami justisiai tukurkakuna. ¹⁴ Justisiai ruraskauramandaka, kikin wañuitami rupakuska atun nina ukuma sitai tukurka. Chi nina rupakuskaka niraianmi diltudupa parisma wañui luar. ¹⁵ Maikanpa suti kaugsangapa willaraiaska librupi mana taririgpika, paikunatapasmi chi ukuma sitai tukungapa kankuna.

21

Sug luar i kai alpa luar; musu kaskamanda

¹ Chiuramandaka, musu sug luar, chasallata musu alpami kawarkani. Ñugpa sug luar i ñugpa alpapas puchukariskami karka. Lamar iakupas ña mana mas kawariwarkachu. ² Sug atun suma puiblu, Taita Diuspalla kag musu Jerusalén niraiaskatami kawarkani. Chi puibluka, suma luarmanda, Taita Diuspagmandami uraikumukurka. Imasami warmi tukungapa kag, sumaglla allichiriska ka, kusawa sugllapi tukungapa: chasallatami allichiriska karka.

³ Mandag tiaridirunigmanda sinchi rimai uiariwarka, kasa niwaspa:

—Kawai. Kaika, Taita Dios runakunawa kaugsadirumi chaiamurka. Paikunawami kaugsangapa ka. Chi runakunaka, paipallami kangapa kankuna. Taita Dios kikinmi paikunawa kangapa ka. ⁴ Paikunapa tukui wikimi ñawimanda tustachingapa ka. Mana mas tiangapa kanchu wañui, ñi wakai, ñi llakiiwa kaparii ñi nanai. Tukui ima ñugpata tiaskakuna ñami puchukarirka.

⁵ Chiuraka, mandag tiaridirupi tiakugka nirka:

—Kawai. Nuka, tukui musuiachikuni—. Kasapasmi niwarka— Iskribii: chi rimainakuna sutipa kaskatami nini. Tukui nuka niskami tukugsamungapa ka.

⁶ Kasapasmi niwarka:

—Tukui imasa niraiaskasinami tukugsamurka. Litrapa A kallarisgina i Z puchukagsina, chasallata nukami kani kallari i puchukag. Maikan iakunaiai iukaskataka karangapami kani, suma kaugsai karadiru iaku ñawimanda mana randispalla upiangapa. ⁷ Mana alli ruraikunata binsigtami chasa karangapa kani. Nukaka, paipa Taita Diosmi kangapa kani. Paika, nukapa wambami niraiangapa ka. ⁸ Ikuti maikanpas nukata kunguriwaspa mana uiawagkuna, mana nukawa uiariwagkuna, jiru millaita ruragkuna, wañuchigkuna, kari warmiwa pandarigkuna, jiru iacha pukugkuna, ianga diuskunata kungurigkuna i tukui llullachigkuna, chikunataka chaianmi, asufri rupakuska atun nina ukuma sitai tukungapa. Chika, diltudupa parisma wañui luarmi niraiá.

Musu Jerusalén niraiaskamanda

⁹ Chiuramandaka, chi kanchis anjilkuna puchukangapa llakiikuna kupapi junda tiaskata chariska kagpura sugka, samuspaka, niwarka:

—Samui. Taita Diuspa Ubijapa warmi tukungapa kaskata kawachisaki.

¹⁰ Chasa niwaspaka, muskui ukupisina awa atun lumamami apawarka. Chimandaka, atun suma puiblu, Taita Diuspalla kag musu Jerusalén niraiaskatami kawachiwarka. Chi puibluka, suma luarmanda, Taita Diuspagmandami uraikumukurka.

¹¹ Chi puibluka, Taita Diuspa suma punchaiachiiwami punchalla karka; iapa bali rumisina, bidriusina, jaspe suti rumisina, chasa. ¹² Chi puiblu awa atun kincha muiuraiskapika, chungá iskai pungumi iukarka. Tukui pungupimi sug sug anjil saianakurka. Chi pungukunapika, ñuggpamanda achala taita Israelpa chungá iskai wambakuna imasa suti kaskami sug sug pungupi willaraiarka. ¹³ Kasami tiarkakuna: kimsa pungu, indi llugsidiru ladu; sug kimsaka, alli maki ladu; sug kimsaka, indi chingaridiru ladu; sug kimsaka, lluki maki ladu. ¹⁴ Chi awa kincha muiuchiraiaskaka, chungá iskai atun rumikunapimi saiachiska karka. Chi rumikunapika, Taita Diuspa Ubijapa chungá iskai agllaska runakuna imasa suti kaskami sug sug rumipi willaraiarka.

¹⁵ Nukawa rimakug anjilka, kurita ruraska tupumi charikurka; chiwanka, chi atun puibluta, pungukunata i awa kincha muiuchiraiaskata tupungapa. ¹⁶ Chi puibluka, chuskundima larguma i anchuma chasallata iwallami tupu iukarka. Anjil tupuuraka, iskai waranga iskai patsa kilumitrumi iukarka. Larguma, awama, anchuma, chasallatami tukuima tupuraiarka. ¹⁷ Awa kincha muiuchiraiaskatapasmi anjil tupurka. Runakuna tupudiruwaka iskai chungá iskai brasasinami awama iukarka.

¹⁸ Chi awa kinchaka, jaspe suti iapa suma rumiwami ruraska karka. Chi atun pui-bluka, maillaska bidriusina puncha kurillawa ruraskami karka. ¹⁹ Awa kincha kallariipi churaska, chi atun rumikunaka karkakunami sug rigcha sug rigcha iapa bali rumikunawa sumaiachiska.

Sug rumika, jaspe sutiwami sumaiachiska karka;

iskaimaka, zafiro sutiwa;

kimsamaka, ágata sutiwa;

chuskumaka, esmeralda sutiwa;

²⁰ pichkamaka, ónise sutiwa;

sugtamaka, kornalina sutiwa;

kanchismaka, krisólito sutiwa;

pusagmaka, berilo sutiwa;

iskunmaka, topasio sutiwa;

chungamaka, krisoprasa sutiwa;

chunga sugmaka, jasinto sutiwa;

chunga iskaimaka, amatista sutiwa.

²¹ Tukui chungá iskai pungukunaka, askurinti atun pirlallami karkakuna. Tukui pungukunaka, sug suglla pirlawami ruraska karka. Puiblu atun ñambika, bidriusina puncha kurillawami ruraska karka.

²² Chi puiblupi, Taita Diusta iuiaridiru wasi apartika mana kawariwarka. Chimandami chi puiblupi pudiri, tukui pudig atun Taita Diusta i paipa Ubijapa maipipas kunguringapa.

²³ Indi ñi killa mana ministinchu, chi puibluta punchaiachingapa. Taita Dios suma kawakuskawami puncha ka. Paipa Ubijami tukui chipi punchaiachig niraiá. ²⁴ Chi puiblupi punchaiakuskawami kai alpamanda kaugsagkunapas punchalla puringapa kankuna. Kai alpapi atun mandagkunaka, ima suma iukaskatami chi puibluma apangapa kankuna.

²⁵ Punchakuna, chi puiblupika pungukuna paskaskallami kangapa kankuna. Chipika, mana tuta tiangapa kanchu. ²⁶ Tukui kai alpapi kaugsagkunaka, paikunapa ima suma iukaikunata i iachaikunata chi puiblumami apangapa kankuna.

²⁷ Maillallapas mapa niraiaskaka mana chipi iaikungapa kanchu. Jiru millaita ruragkuna, llullachispa kaugsagkuna, chikunapas mana iaikungapa pudingapa kankunachu. Runakuna kikinkunapa suti kaugsangapa willaraiaska librupi tiaskakunallami chima iaikungapa kankuna. Chi librutaka, Taita Diospa Ubijami chariku.

22

¹ Chiuramandaka chi anjilka, suma kaugsai karadiru atun iakutami kawachiwarka.

Chi iakuka, sug bidriusina punchami karka. Taita Dios i paipa Ubijapa mandadirungmandami chi iaku llugsimukurka. ² Chi puiblu atun ñambi chaugpipi i iaku pata patapas, chasallata kaugsai karadiru sachakunami wiñanakurka. Chi sachakunaka, killa killapimi mikui aparí. Chasaka, watapika chungá iskai biajimi aparí. Chi sacha pangakunaka, kai alpapi kaugsagkunamanda ambimi ka.

³ Ñi ima maldisiskaka mana chipi tiangapa kanchu. Taita Dios i paipa Ubijapa mandadiruka, chi puiblupimi kangapa ka. Paipa lutrinsinakunaka ningapami kankuna: "Iapa allimi kangí".

⁴ Paita ñawi ñawimi kawangapa kankuna. Paipa sutika, printipimi churaraingapa kankuna. ⁵ Tutaka, chipi mana tiangapa kanchu. Chipi kaugsagkunaka, indi ñi sug rigcha punchaiachidiru mana ministingapa kankunachu. Atun Taita Diosmi paikunata punchaiachig kangapa ka. Paikuna mandangapami kankuna, maituku waranga waranga watakuna ialigpipas.

Jesucristo ña samungapa kaskamanda

⁶ Chiuramandaka, anjilka niwarka:

—Chi rimaikunaka sutipa kaskatami nini. Tukui nuka niskaka, chasami tukugsamungapa ka. Kikin atun Taita Dios, Santu Ispirituwa rimagkunata iuiachigmi paipa anjilta kachamurka, paipa lutrinsinakunata ima mana unaillapi pasaringapa kaskata iuiachispa kawachingapa.

⁷ Iaia Jesusmi niku:

—Ñami samungapa kani. Santu Ispirituwa kai librupi willaraiaskata uiaspa, chasallata kaugsagkunaka, Taita Diospa iapa kuiaskami kapuankangichi.

⁸ Nuka Juanmi chasa uiarkani i kawarkani. Chasa uiaspa i kawaspaka, chi anjil kawachiwaska kagpa chakipi kungurirkani, paita ningapa: "Iapa allimi kangí".

⁹ Chiura, paika niwarka:

—Mana chasa rurakui. Nukaka, kamsina, kamba waugkikunasina, Santu Ispirituwa rimagkunasina i kai librupi willaraiaskata suma charirigkunasina, Taita Diospa lutrinsinallatatami kani. Taita Diosllatami kungurii iukangi.

¹⁰ Kasapasmi niwarka:

—Kai librupi ima Santu Ispirituwa willaraiaskata mana upalla kang'i. Kam ima iachaskata willangi. Ñami chaiamuku, tukui ima niraiaskasina tukugsamungapa. ¹¹ Ianga kawangi mana allilla ruragkunata i jiru millai ruragkunatapas; paikuna iachachukuna. Ikuti allilla ruragkunaka, chasallata sumagilla apanakungichi. Taita Diosmandalla suma kaugsagkunapas, paillawa iuianakungichi.

¹² Iaia Jesúsni niku:

—Ari, ñami samukuni. Tukuikuna allilla u mana allilla ruraskakunatami imasa chaiaskasina karagsamungapa kani. ¹³ Litrap'i A kallarisina i Z puchukagsina, chasallata nukami kani kallari'g i puchukag.

¹⁴ —Maikanpas katangakunata Taita Diospa Ubijapa iawarpi tagsagsina ruragkunaka, suma kaugsai karadiru sachamandata mikui pudingapami kangichi. Taita Diospa iapa kuiaskami kangichi. Chasamanda kamkunaka, chi alli puiblu pungukunapi iaikungapapasm'i pudingapa kangichi. ¹⁵ Ikuti maikanpas alkusina mana alli iuiaiwa kaugsagkuna, jiru iachaiwa pukugkuna, kari warmiwa pandarigkuna, wafuchigkuna, ianga diuskunata kungurisp'a muchagkuna i llullaita munasp'a llullachigkuna, chikunaka kanchapimi sakii tukungapa kankuna.

¹⁶ —Nuka Jesús, nukapa anjilta kacharkaikichitami, tukui nukawa tukuskakunata chasa willangapa. Nukami atun mandag Davidpa iawar kani. Lusiru istrillasinami kani.

¹⁷ Santu Ispiritu i Taita Diospa Ubijapa warmika ninakumi:

—Samui.

Maikan uiagka niichi:

—Samui.

Maikan iakunaiai iukagkunaka, munaspaka samuichi, diltudupa kaugsai karadiru iakuta mana randispalla upiagsamungapa.

¹⁸ Santu Ispirituwa kai librupi willaraiaskata tukui uiagkunataka kasami nuka iuiachii-kichita: maikan kai willaraiaskapi mas iapagpika, Taita Dioska kai librupi willaraiaska llakiikunatami paita kachamungapa ka. ¹⁹ Maikanpas kai librupi Santu Ispirituwa willaraiaskata anchuchigpika, Taita Dioska mana sakingapa kanchu, diltudupa kaugsai karadiru sachamandata pai mikungapa. Chasaka, Taita Diospalla kag puiblupi mana kaugsagringapa pudingapa kanchu. Chasamandami kai librupi willaraia.

²⁰ Iaia Jesús, chasa willaspaka, nikumi:

—Ari. Nukaka ñami samukuni.

Chasa kachu. Samuilla, Iaia Jesús.

²¹ Iaia Jesuspa suma kuiaip'i tukui paipalla kagkunata charipuuachu.